

ՄԵԿՆՈՂ ԱԿՄԵ ԳՐԱԿԱՆՈՒԹՅԱՆ
ԲՐԵՍՏՈՄԱՏԻՎ

ԱԿՏՄԱՐԱՆԱԿԱՆ
ԸՌԱՎԵՆԵՐԻ
ՄԵԿՆՈՒԹՅՈՒՆՆԵՐ



2013

Գր-առ-Կ

8(47.925)
շհ-56



ՀՐԱՄԱՆԱԻ
ՆՈՐԻՆ ՍՈՒՐԲ ՕԾՈՒԿԹԻՆ
Տ. Տ. ԳԱՐԵԳՆԻ Բ
ՍՐԲԱԶՆԱԳՈՅՆ ԵՒ ՎԵՅԱՓԱՌ
ԿԱԹՈՂԻԿՈՍԻ ԱՄԵՆԱՅՆ ՀԱՅՈՑ



4973

**ԱՎԵՏԱՐԱՆԱԿԱՆ
ԱՌԱԿՆԵՐԻ
ՄՆԿՆՈՒԹՅՈՒՆՆԵՐ**

ՄԱՅՐ ԱԹՈՒ ՍՈՒՐԲ ԷԶՄԻԱՇԻՆ
2013



ՀՏԴ 23/28
ԳՄԴ 86.37
Ա 565

*Տպագրվում է երաշխավորությամբ
Մայր Աթոռ Սուրբ Էջմիածնի
Հրատարակչական խորհրդի*

Կազմող՝ Լիլիթ Հովսեփյան
Խմբագիր՝ Գևորգ Տեր-Վարդանյան

Մեկնողական գրականության քրեստոմատիա: ԱՎԵՏԱՐԱՆԱԿԱՆ
Ա 565 ԱՌԱՎՆԵՐԻ ՄԵԿՆՈՒԹՅՈՒՆՆԵՐ/Կազմ.՝ Լ. Հովսեփյան. – Մայր Աթոռ
Սուրբ Էջմիածին, 2013. - 552 էջ:

Ներկա բնագիրն ընդգրկում է ավետարանական առակների մինչև ժե. դ. մեկնությունների հատվածները, ու դրանք համակարգելու և որպես ամբողջական բնագիր ներկայացնելու առաջին փորձն է: Ավետարանական առակների մեկնության ներկայացվող բնագիրը հնարավորություն է տալիս մեկնողական գրական ավանդույթի մեջ ավելի տեսանելի դարձնել ավանդականն ու փոխանցվողը, ամեն առանձին հեղինակի անհատական-ինքնուրույն շերտերի դրսևորումները:

Գիրքը նախատեսված է Հոգևոր ճեմարանների, Աստվածաբանության ֆակուլտետի ուսանողների և ընթերցողների լայն շրջանակի համար:

ՀՏԴ 23/28
ԳՄԴ 86.37

ՏՊԱԳՐՎՈՒՄ Է ՃԵԿԵՆԱՍՈՒԹՅԱՄ

ԳԱՐԻԵԼ ԶԵՄՊԵՐՃՅԱՆԻ

ISBN 978-9939- 59-116-2 © Մայր Աթոռ Սուրբ Էջմիածին, 2013 թ.

ԱՎԵՏԱՐԱՆԱԿԱՆ ԱՌԱՎՆԵՐԻ ՄԵԿՆՈՒԹՅՈՒՆՆԵՐ

Քրիստոսի առակների մեկնություններն առանձին մեկնողական երկեր չեն¹. հեղինակները, մեկնելով այս կամ այն Ավետարանը, բնականաբար, մեկնել են նաև առակները: Առակի մեկնության առաջին օրինակը տալիս է Քրիստոս²: Գրական այս տեսակին բնորոշ է այլաբանությունը, ինչը մեկնիչների համար ստեղծագործական լայն հնարավորություններ է ստեղծել. «Առակքն Քրիստոսի նմանին պարտիզի, զի որպես պարտեզն բոլիս զզանազան ծաղկունս և զծառս, տյնպէս և Տէրն մեր կազմեաց զայսոսիկ իմանալի պարտեզս, որք բոլիսն զանազան խորհուրդս՝ ծածկեալս ի սկզբանէ աշխարհի»³: Ավետարանական մեկնություններում հաճախ խոսվում է առակի՝ որպես գրական տեսակի, նրա այլաբանական մեկնության առանձնահատկությունների մասին:

Հայ միջնադարյան մատենագրության մեջ մինչև ժե. դ. հայտնի են հետևյալ ավետարանական մեկնությունները, որոնց ձեռագիր կամ տպագիր մեզ հասանելի օրինակներն օգտագործվել են ներկայացվող բնագիրը կազմելիս⁴.

¹ Բացառություն է կազմում Պետրոս արք. Բերդումյանի «Աղբիւր բացեալ» աշխատությունը, որը հայ մատենագրության մեջ պահպանված ավետարանական առակների միակ ամբողջական մեկնությունն է. տե՛ս Աղբիւր բացեալ՝ արարեալ Պետրոսի եպիսկոպոսի Բերթումեան Աղամալեանց, Սբ. Էջմիածին, 1857: Աշխարհաբար թարգմանությունը՝ Պետրոս արքեպիսկոպոս Բերդումյան, Բացված աղբյուր, թարգմանությունը՝ գրաբարից, առաջաբանը և ծանոթագրությունները՝ Տիգրան սարկավազ Բաղումյանի, Մայր Աթոռ Սուրբ Էջմիածին, 2008:

² Տե՛ս, օրինակ, Սերմնացանի (Մատթ. ԺԳ. 18-23) կամ Որոմների առակի (Մատթ. ԺԳ. 36-43, 51-52) մեկնությունները:

³ Աղբիւր բացեալ՝ արարեալ Պետրոսի եպիսկոպոսի Բերթումեան Աղամալեանց, էջ 11:

⁴ Օգտագործված ձեռագիր և տպագիր աղբյուրները տե՛ս առանձին: Նաև՝ Պետրոսյան Ե. եպս., Տեր-Ստեփանյան Ա., Սուրբ գրքի հայերեն մեկնությունների մատենագիտություն, Հայաստանի աստվածաշնչային ընկերություն, Երևան, 2002, էջ 80-85, 90-93:

«Չորս Ավետարանների մեկնություն» Ստեփանոս Սյունեցի¹ (Ը. դ.): Մատթեոսի Ավետարանի մեկնություններ՝ Անանիա Սանահնեցի (ԺԱ. դ.), Ներսես Շնորհալու մեկնության շարունակությունը (Արիստակես և Եփրեմ (ԺԲ. դ.), Յովհաննես Ծործորեցի (ԺԳ.-ԺԴ.դդ.), սբ. Գրիգոր Տաթևացի (ԺԴ.-ԺԵ. դդ.):

Մարկոսի Ավետարանի մեկ թերի մեկնություն՝ Բարսեղ Մաշկևորցի (ԺԳ.-ԺԴ. դդ.):

Ղուկասու Ավետարանի մեկնություններ՝ Իգնատիոս Սկլեռնեցի (ԺԱ.-ԺԲ. դդ.), Սարգիս Կունդ (ԺԲ. դ.), Մատթեոս Ջուղայեցի (ԺԴ.-ԺԵ. դդ.):

Յովհաննու Ավետարանի մեկնություններ՝ Սարգիս Կունդ, սբ. Գրիգոր Տաթևացի, Մատթեոս Ջուղայեցի, Գրիգոր Խլաթեցի (ԺԴ.-ԺԵ. դդ.)²:

Մեկնության ավանդական եղանակի կողքին (Արիստակես և Եփրեմ Բարսեղ Մաշկևորցի, Մատթեոս Ջուղայեցի և այլք) հանդես են գալիս նաև լուծմունքը (Գրիգոր Տաթևացի) և քաղվածո-շարք մեկնությունը³ (Սարգիս Կունդ):

Լուծմունքը Գրիգոր Տաթևացու նախասիրած մեկնողական եղանակներից էր և դիդակտիկ-ուսուցողական նպատակ էր հետապնդում⁴: Նա նույն այդ ձևով է մեկնաբանել նաև Յին Կտակարանի «Առակաց» և «Երգ երգոց» գրքերը⁵: Գրիգոր Տաթևացին սահմանափակվում է առանձին բառերով և կապակցություններով արտահայտ-

¹ Աշխարհաբար թարգմանությունը հրատարակվել է աշխատասիրությամբ՝ Վիգեն դպիր Ղազարյանի, Ս. Էջմիածին, 1997:

² Գրիգոր Խլաթեցու մեկնության միակ ինքնագիր օրինակը Երուսաղեմի 1400 թ.ի Յմր 2521 (էջ 1-530) ձեռագիրն է. մեր բնագիրը կազմելիս այս հեղինակի մեկնությունն օգտագործելու հնարավորություն չենք ունեցել:

³ Սարգիս Կունդի օգտագործված աղբյուրների մասին տե՛ս Պետրոսյան Եզնիկ, «Երկու խոսք Սարգիս վրդ. Կունդի «Մեկնութիւն Ղուկասու» աշխատության մասին», Էջմիածին, 1982, Ը-Թ. էջ 45-48: Սարգիս Կունդ (ԺԲ. դ.), Մեկնութիւն Աւետարանին Ղուկասու, աշխատասիրությամբ՝ Եզնիկ եպիսկոպոս Պետրոսյանի, Մայր Աթոռ Սուրբ Էջմիածին, 2005, էջ 7: Նույն ձևով է գրված նաև Յովհաննու Ավետարանի մեկնությունը:

⁴ Տե՛ս Սուրբ Գրիգոր Տաթևացի, Մեկնութիւն Յոհաննու Աւետարանին, աշխատասիրությամբ՝ Ղուկաս արեղա Ջաքարյանի, խմբագիր՝ Արշավիր Գաբուլյան, Մայր Աթոռ Սուրբ Էջմիածին, 2002, էջ 10:

⁵ ՄՄ ձեռ. Յմր 1200, Համառօտ հաւաքումն ի տեսութիւն լուծմանց Երգոյ երգոյն (այսպէս)՝ աշխատասիրեալ Գրիգորիոս հսկողի, արի և երջանիկ հռետորի եւ քաջ փիլիսոփայի հայոց՝ աշակերտի եռամեծին Յոհաննու Որոտնեցոյ ի լուսաւոր բանից վարդապետին Վարդանայ. աւզնեա Յոգիդ Սուրբ Աստուած, 367ա-395:

ված խորհրդանիշերի այլաբանական մեկնաբանություններով՝ ընդհանրացնելով իրենից առաջ եղած մեկնությունները և ամբողջացնելով առանձին խորհրդանիշերի այլաբանական իմաստները: Գրիգոր Տաթևացու մեկնությունն ավետարանական ամբողջական բնաբաններ չունի:

Սարգիս Կունդի քաղվածո մեկնությունը հայ իրականության մեջ «մեզ հասած առաջին շարք մեկնությունն է», որտեղ օգտագործվել են Եփրեմ Ասորու, Յովհան Ոսկեբերանի, Կյուրեղ Ալեքսանդրացու, Ստեփանոս Սյունեցու և Իգնատիոս Սկլեռնցու գործերի հատվածներ: Այս երկն աղբյուրագիտական արժեք ունի:

Ձևային այս տարբերությունները, անշուշտ, պայմանավորված էին կիրառական-գաղափարական պատճառներով, ինչի արդյունքում ստեղծվում են կառուցվածքային հատկանիշներով մեկը մեկից տարբեր մեկնություններ, որոնք մեկտեղել ենք սույն բնագրում:

Ներկա բնագիրն ընդգրկում է ավետարանական առակների մինչև ԺԵ. դ. մեկնությունների հատվածները, ու դրանք համակարգելու և որպես ամբողջական բնագիր ներկայացնելու առաջին փորձն է: Այդ նպատակով հաճախ հարկ է եղել համեմատել նույն գործի տարբեր հրատարակություններ, գրչագիր օրինակներ¹, համակարգել կամ փոփոխել որոշ ընթերցումներ²: Բնագրագիտական-աղբյուրագիտական քննությունը թողել ենք ուսումնասիրողներին՝ հույս ունենալով, որ սույն ծաղկաքաղ մեկնության բնագիրն օգտակար կլինի առակների և մեկնությունների խնդրահարույց հարցերին լուծում տալու համար:

Ավետարանական առակների մեկնության ներկայացվող բնագիրը հնարավորություն է տալիս մեկնողական գրական ավանդույթի մեջ ավելի տեսանելի դարձնել ավանդականն ու փոխանցվողը, ամեն առանձին հեղինակի անհատական-ինքնուրույն շերտերի դրսևորումները:

¹ Երկու ձեռագրի համեմատությամբ կազմել ենք Արիստակեսի և Եփրեմի մեկնության բնագրի հատվածը (տե՛ս օգտագործված ձեռագրերի մատենագիտությունը՝ ձեռ. Ա, Բ):

² Ինչպես, օրինակ, Իգնատիոսի մեկնության դեպքում:

ՔՐԻՍՏՈՍԻ ԱՌԱՎԵՆԵՐԻ ՄԵՎՆՈՒԹՅԱՆ ՉԵՌԱԳՐԵՐԸ ԵՒ ՏՊԱԳԻՐՆԵՐԸ

Ա. ՉԵՌԱԳՐԵՐ

Ներկայացվող բնագիրը ծաղկաքաղ է, ուստի հարկ ենք համարել առանձին հեղինակի բնագրային հատվածը կազմել ըստ մեկ լավագույն ձեռագիր օրինակի: Անհրաժեշտության դեպքում որոշ ընթերցումներ կարգավորել ենք այլ ձեռագրի հետ համեմատելով: Չեռագիր վիճակում (դեռեւս անտիպ) են Արիստակեսի և Եփրեմի, Գրիգոր Տաթևացու¹, Մատթեոս Ջուղայեցու մեկնությունները: Ստորև ներկայացնում ենք օգտագործված ձեռագրերի ժամանակագրական ցանկը²:

1. ԺԲ., ԺԳ. դդ., 1249ից առաջ, ՄՄ ձեռ. Գ⁰ 1283, ժողովածու, Արիստակես եւ Եփրեմ, ժողովումն մեկնութեան սրբոյ Աւետարանին որ ըստ Մատթեոսի. բնագիրը՝ 65ա-112բ (համեմատվել է ՄՄ ձեռ. Գ⁰ 1253ի հետ (Ա): Սկզբից և վերջից թերի, սակայն ընտիր երկաթագրախառն բոլորգրով գրված ձեռագիր է, մանրակրկիտ եւ ճշգրիտ կետադրված է:

2. ԺԳ. դար, ՄՄ ձեռ. Գ⁰ 5448. ժողովածու, Մատթեոս Ջուղայեցի, Պատճառ սուրբ Աւետարանին Յոհաննու սրբոց վարդապետաց ասացեալ. բնագիրը՝ 30ա-289բ: Չեռագիրս գրված է կոկիկ բոլորգրով, հեղինականիշ հարուստ նշումներով. սուրբգրային քաղվածքներն ամբողջական են՝ առանց համառոտումների. հատուկ անունների խոստոր ձևերով՝ «Իսրայէլ»-ի փոխարեն՝ «Իսրայէղ», «Յովհաննու» փոխարեն՝ «Յոհաննու» ծնընդեան-ծննդեան, սրովբե-սերովբե, գինոյն-գինւոյն: «Օ»-ի փոխարեն՝ «աւ», «ւ»-ը բառամիջում չկա՝ «գինոյն», «եկեղեցոյն»: «Սէրովբե» ձևի փոխարեն ունի «սրովբե» ձևը:

3. 1391 թ., ՄՄ ձեռ. Գ⁰ 2519. ժողովածու, Նուաստ եւ յետին աշակերտի Մաթեոս եռամեծաց Յովհաննու եւ Գրիգորի աշխատասիրեաց հաւաքումն Բանից յԱւետարանէն Ղուկասու եւ քարոզ յոլովք ի վայելումն մանկանց Հայաստանեայց. բնագիր՝ 4ա-82բ (Դ, ինքնագիր): Խոնավություն տեսած, գրադաշտի արտաքին անկյունների մասերը հաճախ անընթեռնելի, կան ընկած թերթեր, կոկիկ արևելյան (անց-

¹ Տպագրված է միայն Հովհաննեսի Ավետարանի մեկնությունը. տե՛ս ծնթ. 5:

² Համապատասխան միավորի նկարագրությանը վերջում նշված է նաև ձեռագրի մեր բնագրում ստացած պայմանանշանը. օրինակ՝ (Ա) և այլն:

ման) բոլորգրով: Գլուխների սկզբնատողերը՝ կարմիրով: Տեղ-տեղ թվարկումներն արված լուսանցային մասերում: Սրանից ընդօրինակված է ՄՄ ձեռ. Գ⁰ 2518, որով էլ վերականգնել ենք սույն օրինակի ընկած թերթերի և անընթեռնելի հատվածները: Նկատելի են խուլերի ձայնեղացման երևույթներ՝ «անտ» «անդ»ի, «տնանգ» «տնանկ»ի, «պանտոկ» «պանդոկ»ի փոխարեն և այլն: Կան «յ» կիսաձայնի անկման դեպքեր՝ «հրամանաց» «հրամայեաց»ի փոխարեն, «ը»ի հավելման դեպքեր՝ «ըռընգունք» «ռնգունք» ձևի փոխարեն և այլն:

4. ԺԴ., ԺԵ. դդ., ՄՄ ձեռ. Գ⁰ 5871. ժողովածու, Յոհաննու Որոտնեցի[ոյ տիեզերայլոյս ռաբունապետի, արարեալ բան յԱւետարանէն Յոհաննու, բնագիր՝ 13ա-80բ: Մանր նոտրգրով է, բոլոր սուրբգրային տեղիներն ու բնաբանային հատվածները՝ կարմիր թանաքով: Գլուխների ու ենթագլուխների համարները՝ լուսանցային մասերում, համապատասխանաբար՝ կարմիր և սև թանաքով: Սուրբգրային տեղիները և շատ բառեր համառոտված՝ հատկապես տողերի վերջում: «Յ» կիսաձայնը բառամիջում և բառավերջում չկա:

5. 1416 թ., ՄՄ ձեռ. Գ⁰ 1264, Գրիգոր աշակերտի եռամեծի եւ տիեզերայլոյս վարդապետի Յովհաննու Որոտնեցւոյ հաւաքեալ քաղուածոյ մեկնութիւն սրբոյ Աւետարանին Մաթեոսի. բնագիրը՝ 3ա-336բ (Գ): Կոկիկ բոլորգրով ընդօրինակություն է, բոլոր գլուխներն ու ենթագլուխները՝ կարմիրով: Պատճառների թվագրումը՝ լուսանցային մասերում՝ կարմիր և սև թանաքով: Նկատելի են ձայնեղների խլացման երևույթներ՝ «պինտ» «պինդ»ի, «տնանգաց» «տնանկաց»ի, սկիսպն-սկիզբն, «անծուկ»ը «անծուկ»ի, «տաղանտ»ը «տաղանդ»ի փոխարեն և այլն:

6. 1590 թ., ՄՄ ձեռ. Գ⁰ 1253. Ներսես Շնորհալի, Մեկնութիւն Մատթեի լրացված Արիստակեսի և Եփրեմի կողմից, բնագիրը՝ 134ա-353ա (Ա): Խառը նոտրգրով գրված օրինակ է, ամեն առանձին գլուխ համապատասխան լուսանցազարդով և կարմիր թանաքով: Նկատելի են խուլերի ձայնեղացման երևույթներ՝ «տեսչութեամբ»ի փոխարեն՝ «տեսչութեամբ», «անկաւ»ի փոխարեն՝ «անգաւ» և այլն: «Ու»ի փոխարեն ունի «ւ»՝ «լւաւ», «հերծւած», «զանգւած» և այլն: Ունի «յ» կիսաձայնի հավելման՝ «նայ», «ապայ» և անկման՝ «հրամաէ», «ցանկանաին» և այլ ձևեր:

7. ԺԵ. դ., ՄՄ ձեռ. Գ⁰ 1200. Գրիգոր Տաթևացի, Մեկնութիւն Երզոց երզոյն, բնագիրը՝ 367ա-395բ:

Բ. ՏՊԱԳՐԵՐ

Մեկնությունների տպագիր օրինակները ներկայացնում ենք հեղինակների ապրած ժամանակի կարգով¹.

1. Ստեփանոս Սիւնեցի, Մեկնութիւն չորից Աւետարանչացն, Համամ Արեւելցի, Մեկնութիւն առակաց, Աշխատասիրությամբ Գարեգին կաթողիկոս Հովսեփյանի, խմբագրությամբ Եզնիկ Ժ. վրդ. Պետրոսյանի և Արմեն Տեր-Ստեփանյանի, Աստվածաշնչյան մեկնություններ, Երևան, 1994 (ՍՏ).

2. Յովհաննէս Ծործորեցի (ԺԳ-ԺԴ. դդ.), Մեկնութիւն Աւետարանին որ ըստ Մատթէի (Ե. 18 - ԻԸ. 20), աշխատասիրությամբ Գոհար Ղազարյանի, Սեդա Ստամբուլցյանի, Գայանե Ներսիսյանի, Մայր Աթոռ Սուրբ Էջմիածին, 2009.

3. Մեկնութիւն սրբոյ Աւետարանին որ ըստ Մարկոսի, արարեալ երանելոյն Բարսղի Շնորհալի վարդապետի ճոն կոչեցելոյ ըստ մակարական անուանն, լուսաւոր մտօք և իմաստալի յորդորակօք, Հատոր երկրորդ, աշխատասիրութեամբ տ. Անդրեաս վարդապետի Նարինեան Ակնեցոյ, Կ. Պոլիս, 1826 (ՍՏ).

4. Մեկնութիւն Սրբոյ Աւետարանին, որ ըստ Ղուկասու, արարեալ սուրբ վարդապետին Իգնատիոսի ի խնդրոյ տեառն Գրիգորիսի Հայոց կաթողիկոսի, Կ. Պոլիս, 1824 (ԻՏ).

5. Հրամանաւ տեառն Գրիգորի Հայոց կաթողիկոսի, արարեալ մեկնութիւն Ղուկասու Աւետարանին սուրբ վարդապետի Իգնատիոսի. համացանցային կայք՝ http://www.shiraksec.am/general_links/gradaran/electronayin_grarumner/electronayin_grarumner.html.

6. **Սարգիս Կունդ** (ԺԲ. դ.), *Մեկնութիւն Աւետարանին Ղուկասու, աշխատասիրությամբ Եզնիկ եպիսկոպոս Պետրոսյանի, Մայր Աթոռ Սուրբ Էջմիածին, 2005:*

ԲՆԱԳՐԻ ՊԱՏՐԱՍՏՄԱՆ ՍԿԶԲՈՒՆՔՆԵՐԸ

Տարբեր հեղինակների տարբեր ժամանակների, միաժամանակ տպագիր և ձեռագիր նյութերի համադրումը հարկադրում է միօրինակացնել բնագիրը. այդ է պատճառը, որ.

¹ Ներկայացնում ենք միայն բնագիրը կազմելու համար գործածված օրինակները, կողքը փակագծերում, նշում ենք համապատասխան պայմանաճշանը. օրինակ՝ ՍՏ, այսինքն՝ Ստեփանոս տպագիր և այլն: Մեկնությունների հրատարակությունների մատենագիտական ամբողջական ցանկը տե՛ս վերջում (Մատենագիտութիւն):

ա. Անտեսել ենք աւ-օ, եւ-և տարբերությունները, ինչպես նաև բառամիջում եւ բառավերջում յ-ի անհարկի չգոյութեան (օրինակ՝ «հրամաեաց», «զգաարան», «ցանկանաին» «հրամաե» և այլն) կամ աւելորդ գործածութեան դեպքերը («նայ», «ապայ», «նմայ» և այլն).

բ. Ուղղագրական ակնհայտ խտտոր ձեւերն արտահայտել ենք շեղատառով («տվօղին», «արօսեակ») և այլն).

գ. Ձեռագրերում առկա սրբագրումները ևս արտահայտել ենք ընթերցումների մեջ՝ համապատասխան պայմանաճիշին հավելելով՝ նշանը՝ «Գ մերում թողութեամբ (Գ՝ թողութեամբ մերում)». առաջինը բուն շարադրանքի ձևն է, երկրորդը՝ սրբագրումը, որոնց մոտ երբեմն նշել ենք՝ «լս» (լուսանցում).

դ. Քանի որ ձեռագրերի պայմանաճիշերը նշանակել ենք հայերենի գլխատառերով, ընկալման շփոթ չառաջացնելու նպատակով տարընթերցումների մեջ մեծատառ չենք օգտագործել, իսկ թվատառերը երկու կողմից առել ենք կետերի մեջ («.կ.աւոր, .ճ.աւոր, .լ.աւոր») եւ այլն):

ե. Ընթերցումները նշանակել ենք ավանդական եղանակով. «փոխարեն»-ի համար՝], «չիք»-ի համար՝ >, բառի կրկնութիւնը՝ < >: Բնագրի անհրաժեշտ վերականգնումն արել ենք անկյունավոր փակագծերում []:

զ. Բնագրի կետադրությունը սրբագրել ենք ժամանակակից հայերենի կետադրությամբ համապատասխան: Հատուկ անունների ուղղագրությունը նույնպես միօրինակացվել է (Աւսեպոս, Յօսեպոս-Յովսէպոս).

է. Եթե սուրբգրային քաղվածքը համապատասխանում է հայերեն Աստվածաշնչի բնագրին¹, նշել ենք համապատասխան հատվածի գլխահամարը եւ տնահամարը, իսկ եթե ընկալյալ բնագրի համեմատ տարբերություններ կան, նշանակել ենք «հմմտ.», վերաշարադրված հատվածները նշել ենք «տե՛ս» ցուցումով: Սուրբգրային քաղվածքներն արտահայտել ենք բնագրում: «Հանգիստ սրբոյն Յովհաննու առաքելոյ եւ աւետարանչի» պարականոն գրքից բերված մեջբերումների տեղիները նշել ենք տողատակում.

ը. Բնագիրը կազմել ենք ավետարանական առակների հերթականությամբ. առանձին առակի մեկնությունները դրել ենք հեղինակները

¹ Աստուածաշունչ մատեան Հին եւ Նոր Կտակարանաց յաշխատութենէ Տեառն Հ. Յովհաննու Ջօհրապեան վարդապետի, ի միաբանութենէ Մեծին Միսիթարայ ռաւունապետի եւ առաջին Աբբայի, Վենետիկ, 1805:

րի ապրած ժամանակի կարգով. այսպես՝ ՎԱՍՆ ՍԵՐՄԱՆԱՑ, Մատթ. ԺԳ. 4-23, Ստեփանոս Սիւնեցի, մեկնության հատվածը. Արիստակես եւ Եփրեմ, մեկնության հատվածը և այսպես շարունակ.

թ. Առակների խորագրերը պայմանական են. հիմք ենք ընդունել Մ. Օրմանյանի «Համապատում»¹ աշխատության աշխարհաբար խորագրերը, որոնք համադրել ենք Պ. Բերդումյանի «Աղբյուր բացեալ» աշխատության և Գրիգոր Տաթևացու մեկնությունների մեջ առկա խորագրերի հետ: Ստորև ներկայացնում ենք մեր բնագրի ավետարանական առակների խորագրերը համապատասխան հատվածներով².

- * Վասն սերմանաց (Մատթ. ԺԳ. 4-23, Ղուկ. Ը. 5-18)
- Վասն որոմանց առակին (Մատթ. ԺԳ. 24-30)
- Մեկնութիւն առակին որոմանց (Մատթ. ԺԳ. 36-43, 51-52)
- Վասն հատոյ մանանխոյ (Մատթ. ԺԳ. 31-32, Ղուկ. ԺԳ. 18-19)
- Առակ խմորոյն (Մատթ. ԺԳ. 33, Ղուկ. ԺԳ. 20-21)
- Առակ գանձի (Մատթ. ԺԳ. 44)
- Վասն մարգարտի (Մատթ. ԺԳ. 45-46)
- Առակ ուռկանին (Մատթ. ԺԳ. 47-50)
- Առակ հարիւր ոչխարաց (Մատթ. ԺԸ. 12-14)
- Առակ երկուց պարտապանացն (Մատթ. ԺԸ. 23-35)
- Վասն այգւոյն եւ մշակաց (Մատթ. Ի. 1-16)
- Վասն անիծեալ թզենւոյն (Մատթ. ԻԱ. 18-20)
- Առակ երկուց որդւոցն (Մատթ. ԻԱ 28-32)
- Վասն այգւոյն (Մատթ. ԻԱ. 33-46, Մարկ. ԺԲ. 1-11)
- Վասն սեղանին հարսանեաց (Մատթ. ԻԲ. 1-14)
- Վասն թզենւոյն (Մատթ. ԻԴ. 32-35, Մարկ. ԺԳ. 28-31, Ղուկ. ԺԳ. 29-33)
- Տանուտըր եւ տնտես (Մատթ. ԻԴ. 42-51, Մարկ. ԺԳ. 33-37)
- Առակ տասն կուսանաց (Մատթ. ԻԵ. 1-13)
- Առակ քանքարաց (Մատթ. ԻԵ. 14-30, Ղուկ. Ի. 9-18)
- Բարի սամարացի (Ղուկ. Ժ. 29-37)
- Առակ անմիտ մեծատանն (Ղուկ. ԺԲ. 16-21)
- Առակ անպտուղ թզենւոյն (Ղուկ. ԺԳ. 6-9)
- Յաղագս կորուսեալ ոչխարին (Ղուկ. ԺԵ. 3-7)

¹ Մաղաքիա արք. Օրմանյան, Համապատում, Մայր Աթոռ Սուրբ Էջմիածին, 1997, էջ 214-224, 340, 399 և այլուր:

² Եշել ենք միայն բնագրի մաս կազմող հատվածները:

- Վասն կորուսեալ դրամին (Ղուկ. ԺԵ. 8-10)
- Վասն անառակ որդւոյն (Ղուկ. ԺԵ. 11-32)
- Վասն անիրաւ տնտեսին (Ղուկ. ԺԶ. 1-9)
- Մեծահարուստ եւ աղքատ (Ղուկ. ԺԶ. 19-31)
- Դատաւոր եւ այրի կին (Ղուկ. ԺԸ. 1-8)
- Փարիսեցի եւ մաքսաւոր (Ղուկ. ԺԸ. 9-14)
- Առակ տասն մնասաց (Ղուկ. ԺԹ. 11-27)
- Առակ ճրագի (Ղուկ. Ը. 16-18)
- Վասն հրաւիրելոցն ի խնջոյս (Ղուկ. ԺԴ. 8-11)
- Ընտրութիւն հրաւիրելոցն (Ղուկ. ԺԴ. 12-14)
- Վասն մեծի խնջոյից (Ղուկ. ԺԴ. 15-24)
- Վասն չար մշակացն (Ղուկ. Ի. 9-19)
- Աւրինակ ճշմարիտ հովուի (Յովի. Ժ. 1-18)
- Վասն որթոյն եւ ծիւղին (Յովի. ԺԵ. 1-11)

Ձեռագրական ամբողջ աշխատանքի կազմակերպման եւ բնագրի քննության ընթացքում շնորհակալությամբ ստացել ենք Գեորգ Տեր-Վարդանյանի սիրահոծար աջակցությունը և Մայր Աթոռ Սուրբ Էջմիածնի միաբան Ջաքարիա արեղա Բաղումյանի պատրաստական օգնությունը:

ՊԱՅՄԱՆԱՆԻՇԵՐ ՀԱՄԵՄԱՏՎԱԾ ՄԻԱՎՈՐՆԵՐԻ

- Ա - ձեռ. Հ^օ 1253, 1590 ք.
- Բ - ձեռ. Հ^օ 1283 ԺԲ., ԺԳ. դդ., 1249ից առաջ
- Գ - ձեռ. Հ^օ 1264, 1416ք.
- Դ - ձեռ. Հ^օ 2519, 1391ք.
- ԻՏ – տպագիր, Իզմատիոս, 1824 ք.
- ՄՏ – տպագիր, Բարսեղ Մաշկետորցի (Շնորհալի), 1826 ք.
- ՍՏ – տպագիր, Ստեփանոս Սիւնեցի, 1994 ք.

ՄԱՏԵՆԱԳԻՏՈՒԹՅՈՒՆ

Բնագրի հրապարակություններ

1. Հրամանաւ տեառն Գրիգորի Հայոց կաթողիկոսի, արարեալ մեկնութիւն Ղուկասու Աւետարանին՝ սուրբ վարդապետի Իզմատիոսի. համացանցային կայք՝ http://www.shiraksec.am/general_links/gradaran/electronayin_grarumner/electronayin_grarumner.html

2. Մեկնութիւն սուրբ Աւետարանին, որ ըստ Մատթեոսի, արարեալ ի սրբոյն Ներսիսէ Շնորհալոյ մինչ ի համարն 17 հինգերորդ գլխոյն և անտի աւարտեալ յերանելոյն Յօհաննու Երզնկացոյ, որ և կոչի Ծործորեցի, Կ. Պօլիս, 1825

3. Մեկնութիւն Սրբոյ Աւետարանին, որ ըստ Ղուկասու արարեալ սուրբ վարդապետին Իգնատիոսի, ի խնդրոյ տեառն Գրիգորիսի Հայոց կաթողիկոսի, Կ. Պօլիս, տպարան Աստվածատուր Կոստանդնուպոլսեցու, 1735

4. Մեկնութիւն սրբոյ Աւետարանին, որ ըստ Մարկոսի, արարեալ երանելոյն Բարսղի Շնորհալի վարդապետի ճոն կոչեցելոյ ըստ մակադրական անուանն, լուսաւոր մտօք և իմաստալի յորդորակօք, Հատոր երկրորդ, աշխատասիրութեամբ տ. Անդրեաս վարդապետի Նարինեան Ակնեցոյ, Կ. Պօլիս, 1826

5. Մեկնութիւն Սրբոյ Աւետարանին, որ ըստ Ղուկասու, արարեալ սուրբ վարդապետին Իգնատիոսի ի խնդրոյ տեառն Գրիգորիսի Հայոց կաթողիկոսի, Կ. Պօլիս, 1824

6. Յովհաննէս Ծործորեցի (ԺԳ.-ԺԴ. դդ.), Մեկնութիւն Աւետարանին որ ըստ Մատթեոսի (Ե. 18-ԻԸ. 20), աշխատասիրութեամբ Գոհար Ղազարյանի, Սեդա Ստամբուլցյանի, Գայանէ Ներսիսյանի, Մայր Աթոռ Սուրբ Էջմիածին, 2009

7. Սարգիս Կունդ (ԺԲ. դ.), Մեկնութիւն Աւետարանին Ղուկասու, աշխատասիրութեամբ Եզնիկ եպիսկոպոս Պետրոսյանի, Մայր Աթոռ Սուրբ Էջմիածին, 2005

8. Ստեփանոս Սիւնեցի, Մեկնութիւն չորից Աւետարանչացն, Մետրոպ արքեպիսկոպոս Գրիգորյանի խմբագրութեամբ, Աթենք, 1988

9. Ստեփանոս Սիւնեցի, Մեկնութիւն չորից Աւետարանչացն, Մետրոպ արքեպիսկոպոս Գրիգորյանի խմբագրութեամբ, Անթիլիաս, 1991

10. Ստեփանոս Սիւնեցի, Մեկնութիւն չորից Աւետարանչացն, Համամ Արեւելցի, Մեկնութիւն առակաց, աշխատասիրութեամբ Գարեգին կաթողիկոս Հովսեփյանի, խմբագրութեամբ Եզնիկ Ծ. վրդ. Պետրոսյանի և Արմեն Տեր-Ստեփանյանի, Աստվածաշնչյան մեկնություններ, Երևան, 1994

11. Սուրբ Գրիգոր Տաթևացի, Մեկնութիւն Յօհաննու Աւետարանին, աշխատասիրութեամբ Ղուկաս արեղա Զաքարյանի, խմբագիր Արշավիր Գաբուշյան, Մայր Աթոռ Սուրբ Էջմիածին, 2002

ԱՎԵՏԱՐԱՆԱԿԱՆ ԱՌԱՎՆԵՐԻ ՄԵՎՆՈՒԹՅՈՒՆՆԵՐ

ՎԱՍՆ ՍԵՐՄԱՆԱՅ

Մարթ. ԺԳ. 4-23

ՍՏԵՓԱՆՈՍ ՍԻՒՆԵՑԻ

Յաւուրս յայնոսիկ ելեալ Յիսուս ի փանէն, նստեր առ ծովեզերն, եւ ժողովեցան առ նա ամբոխ բազում (հմմտ. Մարթ. ԺԳ. 1-2):

Յաղագս բազում մարդասիրութեանն ի տանէն ելանէր, ոչ միայն յերեւելոյն, այլ որպէս թուի ինձ եւ յաներեւելոյն, եւ անփոյթ արարեալ իւրոյ բնութեանն իմանալոյն եւ երկնաւորին, «նստեր առ ծովեզերն». ի ծովային ծփական կենցաղոյս այսորիկ, զի ցածուսցէ եւ խաղաղացուսցէ զծովս մարդկան զալեկոծեալ կենցաղս, այլ եւ ի նաւ մտանէր վասն նորին մարդասիրութեանն ի մարդկային եւ ի մահկանացու մարմինս եւ ապականացու, զի ազատեսցէ ի մահուանէ եւ յապականութենէ եւ արասցէ անմահս եւ անապականս:

Եւ խաւսեր ընդ նոսա առակաւք (հմմտ. ԺԳ. 3):

Որք կային առ ծովեզերն, ընդ նոսա առակաւք խաւսէր, զի դեռ եւս ոչ էին կարաւորք յայտնապէս լսել զբանն Քրիստոսի, իսկ աշակերտացն ասաց որպէս կարաւորաց:

Լուարուք դուք զառակ սերմնահանին (ԺԳ. 18):

Իսկ զայժմեան զառակս ինքն իսկ մեկնէ, վասն որոյ ոչ է պարտ յերկարբանել:

Չեր երանի աչաց, զի փեսանեն եւ ականջաց՝ զի լսեն (հմմտ. ԺԳ. 16):

Ամէն ասեմ ձեզ. զի բազում մարգարէք եւ արդարք ցանկացան փեսանել, զոր փեսէրդ, եւ ոչ փեսին, եւ լսել, զոր լուայրդ, եւ ոչ լուան (հմմտ. ԺԳ. 17):

Աչս եւ ականջս, զի ոչ ասէ զերեւելիսս, կարծեմ ամենեցուն յայտնի է. վասն զի երեւելի աշաւք եւ փարիսացիքն տեսին զՔրիստոս եւ այլ ամբոխն հրէական մարդկան, նոյնպէս զգալի եւ մարմ-

ԷԲԵԿ

նական ձայնն Քրիստոսի լուսան ամենեքեան մերձայկայքն. ապա ուրեմն երանէ զաչա եւ զլսելիս առաքելոցն, զի այնպէս տեսին զՔրիստոս, որպէս պարտ էր զՈրդի[ն] Աստուծոյ տեսանել, եւ այնպէս լուսան նմայ, որպէս պարտ էր եւ պատշաճ Որդւոյ[ն] Աստուծոյ լսել: Ոմանք կարծեցին եթէ վասն յարութեանն եւ դատաստանին խաւսեցաւ ընդ նոսայ, եւ յաղագս այնորիկ երանեցան, բայց ինձ թուի առաջինն պատշաճագոյն. բազում մարգարէս ասաց եւ արդարս, եւ ոչ զամենեսեան, քանիս ոմանք ի մարգարէիցն եւ յարդարոցն տեսին իմանալի աչաւք զաւր զալստեանն Քրիստոսի, որպէս ինքն իսկ ասաց Քրիստոս. Աբրահամ ետես եթէ մարդանալ ունիմ եւ ի դժոխս իջանել եւ հանել զկապեալսն ի վիշապէն կամակորէ եւ ուրախ եղեւ ընդ այս տեսութիւն:

Որ¹ ունիցի քացի նմա եւ յաւելցի, եւ որ ոչն ունիցի եւ զոր ունիցի բա[ր]ձցի ի նմանէ (հմմտ. ԺԳ. 12):

Գտաք ի մեկնութեան Իւրողինի, ի Մա[տ]թէոս աւետարանիչ յԺԲ. երորդ (երկոտասաներորդ) գիրսն, եթէ ամենայն տունկ, զոր տնկեաց Հայրն Միածնի Որդւոյն Աստուծոյ, ի յայն տունկ Միածնին վարդապետութիւնն առաւելցցի. եւ մի՛ ոք կարծեսցէ զտունկն Պաւղոսի, եւ զաճելն Պաւղոսի արտաքոյ գոլ տնկոցն Աստուծոյ, զի ամենայն, որ ըստ հաճոյիցն Աստուծոյ է տնկեալ, տունկ Աստուծոյ կոչի. եւ յաւելոյ յայդպիսի տունկ. զայդպիսի տունկ որ ունի, յաւելցի այնպիսւոյն. բայց զոր ոչ տնկեաց Հայրն երկնաւոր, այլ ընդդիմակացն ի հոգւոջ եւ զայն, զոր ունի, բարձցի ի նմանէն: Զայդ Ուրիզինէս այդպէս մեկնեաց, եւ ես ոչ ընդդիմանամ, բայց կարծեմ ըստ այժմեան մեկնութեանս, եթէ «որ ունիցի զսերմն բարի»՝ հոգին, որ բարի է, «երկիր» անուանեցաւ, նմա առաւելեսցի եւ յաւելցի, իսկ որ «անկաւն առ ճանապարհաւն» եւ «ի վերայ վիմաց», եւ զայն, որ ընկալաւն ի վարդապետութենէն Քրիստոսի, եկեալ չարին, ի բաց բառնայ, վասն զի չէր հաստատեալ ի սրտի, ի բաց բարձաւ ի նմանէ զոր ունէրն:

¹ US Մեկնութիւնը այս համարի տակ եւ ամբողջ հատուածի կանոնաւոր չէ ընթանում, այլ յետ ու առաջ ընկած: Գուցե այստեղ Զ.ը պակասաւոր է այն մեկնութեան հետ, որ կապուած է Որոգինեսից մէջ բերուած հատուածի հետ (ծմբ. կազմողի), էջ 77:

ԱՐԻՍՏԱԿԷՍ ԵՒ ԵՓՐԵՄ

Նստէր առ ծովուն եւ որսայր՝ արկեալ ընդ ուռկանաւ զայնուսիկ, որ առ ծովերքն էին: Եւ ոչ վայրապար ինչ նստէր, այլ որպէս աւետարանիչն զնոյն իսկ ակնարկէ, եթէ զի առ հասարակ զամենիսեան ի մի վայր գումարիցէ (տե՛ս Մատթ. ԺԳ. 2), եւ ոչ զոք ի թիկանց թողուցու, այլ զամենիսեան ի դիմի կացուցանիցէ:

Եւ սկսաւ,- ասէ,- խաւսել ընդ նոսա առակաւք (հմմտ. Մաւրթ. ԺԳ. 3):

Ի լերինն թէպէտ եւ այնչափ վարդապետութիւնս արար, ոչ ինչ առակս յաւրեաց, քանզի տխմարք էին եւ ուսմիկք, իսկ աստ զպիրք եւ փարիսեցիքն խառնէին: Եւ զի՞նչ ասիցէ.

Ահա ել սերմանացան՝ սերմանել զսերմանիսն¹ (ԺԳ. 4):

Եւ ուստի՞ ել, որ յամենայնին է եւ զամենայն ընու, եւ կամ որպիսի՞ իրաւք ել. ոչ ի տեղոջէ ինչ ի տեղի, այլ խնամով եւ տեսչութեամբ եկեալ՝ մերձեցաւ առ մեզ ըստ մարմնազգածն, մարմնապատն լինելոյ: Եւ քանզի մեք չկարէաք մտանել առ նա վասն մեղացն, որ պարսպեալ² պահէին զմեզ, ինքն իւրովի ելեալ զառ մեզ:

Եւ ի սերմանելն իւրում, էր որ անկաւ առ ճանապարհաւն, եւ թոչունք կերան³ զնա (ԺԳ. 4):

ԵՓ Արդ, «սերմանահանն» մի է, եւ երկիրն մի է, այլ արմատիքն չորք բաժինք երեւեցան ո՛չ ի սերմանողէն ինչ, այլ յերկրէն, որ չընկալաւ, այսինքն՝ [յ]անհնազանդ ոգոցն: Եւ ընդէ՞ր չասիցէ, թէ՛ զկէսն ընկալան⁴ ծոյլքն եւ կորուսին, եւ զկէսն՝ մեծատունքն եւ հեղձուցին, եւ զկէսն յոյլ[ք]ն աղաւաղեցին: Ո՛չ կամի կսկծեցուցանել, զի մի ի վհատութիւն ինչ արկանիցէ, այլ թոյլ տայ լսողացն մտաց անձամբ զանձինս յանդիմանել:

Եւ զի՞նչ ի դէպ էր, ասեն, ի մէջ փշոցն կամ յապառաժի եւ առ ճանապարհի⁵ սերմանել, երկրի չէ՞ր ինչ այն ի դէպ: Բայց ոգւոց մարդկան եւ վարդապետութեան կարի ի դէպ իսկ էր եւ առաւել

¹ Ա > զսերմանիսն

² Ա պարան դեալ] պարսպեալ

³ Ա > կերան

⁴ Ա > ընկալան

⁵ Ա > կամ յապառաժի եւ առ ճանապարհի

գովելի, քանզի ի խաւսուն երկիրս մարթի քարին եւս յերկիր պարարտ դառնալ եւ ճանապարհ ինչ լինել. ճանապարհ եւ կոխան անցաւորաց¹, այլ անդ պարարտ եւ պտղաբեր, եւ փշաբերացն կալուղ լինել սերմանեաց տեղիս, զի թէ չէ՛ր իսկ հնար, նա եւ սերմանէր իսկ ո՛չ. եւ եթէ առ ամենիսեան չեղեւ նորոգութիւն եւ փոփոխումն, այն ոչ սերմանահանին ինչ վնասէ², այլ նոցայ, որք ոչն կամեցան դառնալ: Նա զիւրն, զոր ինչ պարտն էր առնել, արար: Եթէ նոքա նորայոցն եղեն մատնիչք, նա չէ ինչ վնասու պատճառ, որ այնչափ մարդասիրութիւն եցոյց:

ԵՓ Իսկ այն, «որ անկաւ առ ճանապարհան», նա ինքն է նմանութիւն ոգւոց զրկողաց³, եւ իբրեւ զայն է, որ զմի քանքարն առ եւ անարգեաց զտուիչն բարերար (տրն՝ Մարթ. ԻԵ. 14-30): Եւ զի ոչ կակղացաւ՝ ընդունել զսերմանիս նորա, եղեւ նա անց եւ կոխան ամենայն չարեաց. զի վասն այսորիկ ոչ եղեւ յանդ երկրի նորա տեղի վարդապետին, իբրեւ մշակի մտանել՝ պատառել զխստութիւն նորա եւ սերմանել ի նմա: Իսկ զչարն նմանութեան թռչնոյ զրեաց. եթէ յափշտակեաց զնա (տրն՝ ԺԳ. 4): Յայտ արար յայսմ վայրի, եթէ ոչ բռնութեամբ յափշտակէ ի սրտէ զուսումն վարդապետութեան նորա, զի ահաւասիկ ըստ արիւնակին զոր եցոյց, ի դուռն լսելեաց կայր ձայն Աւետարանին, որպէս հատն ցորենոյ ի վերայ երեսաց երկրի. այն, որ ոչ ամփոփեաց արգանդին զսերմանիսն, որ անկան ի նմա, զի չէ՛ կարելի թռչնոցն քաղել զսերմանիս երկրի, որ ամփոփեաց գերկիր ցորեանն ի ներքոյ թեւոց իւրոց՝ ըստ այնմ, եթէ՝ «Ի սրբի իմոս թագոցի զբանս քո» (Մաղմ. ՃԺԸ. 11): Եւ այնու, զի ի վերայ ապառաժին ասաց, եցոյց բարերարն զողորմութիւն զթութեան իւրոյ, զի թէպէտ ոչ լինէր զործեալ խստութիւն նորա, սակայն ոչ խնայեաց ի նմանէ զսերմանիս իւր, զի նոքա են, որ դառնան յաշակերտութենէ անտի նորա, իբրեւ զայնտսիկ, որ ասացին. «Խիստ է բանդ այդ, ո՞ կարէ լսել դմայ» (Յովն. Ձ 61): Նման Յուդայի, որ լուաւ զբան նորա եւ ծաղկեցաւ նշանաւք նորա եւ ի ժամանակի փորձութեանն անդ⁴ եղեւ անպտուղ:

¹ Բ յանցաւորաց

² Ա սերմանահանին չվնասէ] սերմանահանին ինչ վնասէ

³ Ա զզրկողաց

⁴ Ա > անդ

Իսկ երկիր փշալից ընդունել զսերմանիսն (տրն՝ Մարթ. ԺԳ. 7), որ զգաւրութիւն իւր փշոյ¹ եւ տատասկի ետ, յայտ արար վարդապետն զսերմն իւր, յայնմիկ, զի սերմանեաց յաւժար զսերմանիս իւր ի յերկիր, յաղթի սնուցիչ աւտար վաստակոց: Թէպէտ եւ թագաւորեալ էր փուշ յերկրի անդ, սերմանեաց ի նմա² զիւրսն առատապէս, զի եղիցի առանց պատասխանի տալոյ:

Մատեաւ մեծատուն մի առ Տէր ուրախութեամբ եւ ասէ. «Զայս ամենայն արարեալ է իմ ի մանկութենէ իմմ» (հմմտ. Մարկ. Ժ. 20): Առ Տէրն սրբեաց եւ ետ մերկ սերմանիս. «Թէ կամիս կարարեալ լինել, երթ վաճառեա՛ զինչս քո» (հմմտ. Մարկ. Ժ. 21), իսկ նա, իբրեւ ետես, թէ եկն եհաս կատարած սերմանն, զի ամենայն հեղձուցիչ փշոց³ ազատեսցի, գտաւ տրտմեալ վասն մեծութեան իւրոյ, նա ինքն փուշ ապականիչ⁴, յապաղիչ նորայ: Իսկ «երկիր բարի» եւ պարարտ՝ ոգիք, որ գործեալ են ստուգութեամբ⁵, նման են այնոցիկ, որ կոչեցան եւ «թողին զամենայն ինչս իրեանց եւ գնացին զհետ նորա» (հմմտ. Ղուկ. Ե. 11): Իսկ «երեսնաւորն» եւ «վաթսնաւորն» եւ «հարիւրաւորն»՝ ասէ վասն ընթացից ի մանկութենէ, յերիտասարգութենէ, ի ծերութենէ, իբրու երկիրն մի է, եւ սերմն՝ մի: Իբրու ըստ կարին, այսպէս ժողովէ զթիւն, եւ իբրու մի՛ քան զմի առաւել են արմտաւք, սակայն եցոյց բարերարն զքաղցրութիւն իւր, զի իբրեւ եկին առնուլ զվարձս որոշեալ արմտաւք, յետինքն ընդ առաջինսն վարձս հասարակ առին:

Դարձեալ՝ «հարիւրաւորն» թուի, թէ կատարումն է այն ընտրութեան, որ առ զկնիք ընտրութեան եւ զմահ վկայութեան փոխանակ Աստուծոյ: Իսկ «վաթսնաւորքն» այնոքիկ են, որ կոչեցան եւ ետուն զմարմինս իւրեանց ի տանջանս չարչարանաց վասն Աստուծոյն իւրեանց: Եւ մահու փոխանակ Տեառն ոչ ժամանեցին, բայց կացին մնացին ի վախճանն բարւոք: Իսկ «երեսնաւորն»՝ չափ է հանապազորդ բարւոք երկրի, եւ են այնոքիկ, որ ընտրեցան յաշակերտութիւն եւ ոչ յարեան ի վերայ նոցա ժամանակք, հալածանաց եւ պսակեցան բարւոք վաստակաւք իւրեանց, իբրեւ զերկիր մի, որ պսակեալ իցէ պտղովք իւրովք, բայց յընտրութիւն մարտիրոսութեան եւ վկայութեան ոչ կոչեցան:

¹ Ա փոշոյ] փշոյ

² Ա նա] նմա

³ Ա փշոյ

⁴ Ա > ապականիչ

⁵ Ա ստուգութիւն

Մաքեան աշակերտքն եւ ասեն. «Ընդէ՞ր առակաւք խաւսիս ընդ նոսա» (հմմտ. ԺԳ. 10):

Արժան է զարմանալ ընդ աշակերտսն, թէ զիա՞րդ ցանկային ուսանել եւ դէպ ժամանակի մնային, թէ ե՛րբ պարտ իցէ հարցանել, զի ոչ առաջի ամենեցուն զայն առնէին եւ զայս Մարկոսի յայտ արարեալ՝ ասէ, թէ՛ «Մատեան առ նա առանձինն» (հմմտ. Մարկ. Գ. 10). այսպէս պարտ էր մաւրն եւ եղբարցն առնել, եւ միտ զիր նոցա խնամոցն, զոր ունէին առ այլս, զի նախ զնոցայն խնդրէին եւ ապա՝ զանձանց:

«Ընդէ՞ր,- ասեն,- առակաւք խաւսիս ընդ նոսա» եւ ոչ ասացին՝ ընդ մեզ, զոր եւ այլուր ասէին, թէ՛ «արձակեաց զժողովուրդը՝¹» եւ առ այն, զինչ ասիցէ Քրիստոս.

«Ձեզ փուեալ է գիտել զխորհուրդս արքայութեան երկնից, եւ նոցա չէ փուեալ» (ԺԳ. 11):

Ձայս, ասէ, «ոչ»՝ հարկ մուծանիցէ կամ վիճակ ինչ վայրապար առանձին հասեալ նոցա, այլ զնոսա յայտ առնէ ամենայն չարեաց պատճառս եւ ցուցանէ, թէ պարգեւք էին իրքն եւ ի վերուստ տուեալ շնորհք, բայց ոչ վասն զի պարգեւք են այնու, ինչ անձնիշխանութիւնն բառնի: Եւ այս ի յաջորդացն յայտ է.

«Որ ունիցի,- ասէ,- փացի նմա եւ յաւելցի» (հմմտ. ԺԳ. 12):

Եւ զոր ասեն, այսպիսի է, եթէ յորժամ յաւժարութեամբ ոք եւ փոյթ յանձին ունիցի, տացի նմա ամենայն ինչ եւ յաստուածակոյս կողմանէ անտի, իսկ յորժամ յայսցանէ թափուր ոք իցէ, եւ չի լինիցի ինչ նպաստ յանձնէ, ապայ եւ ոչ յԱստուծոյ ինչ տացի նմա: Քանզի եւ զոր ունին, ասէ, բարձցի ի նմանէ ոչ իբրեւ յԱստուծոյ ինչ բառնալով, այլ նորա զիւր անձն չառնելով արժանի:

«Վասն այնորիկ առակաւք խաւսիս ընդ նոսա, զի փեսանն եւ ոչ փեսանն» (ԺԳ. 13):

Եւ թէ չտեսանէին, ասեն, ապա պարտ էր զաչան բանալ, եթէ բնութեան ինչ կուրուսթիւն էր, պարտ էր բանալ, իսկ եթէ կամաց եւ անձնիշխանութեան, զայն զի՞նչ հարկ էր առնել: Վասն այնորիկ

ոչ հարկ ինչ ասաց, թէ չտեսանեն, այլ թէ տեսանեն եւ չտեսանեն, զի յայտ լիցի, թէ յանձնիշխանութենէ է կուրուսթիւնն, քանզի տեսանէին զգեւս հանեալ եւ «ասէին, թէ՛ Բէեղզերուդա իշխանաւն դիւսց հանէ դա զդես» (Ղուկ. ԺԱ. 15): Եւ լսէին, զի առ Աստուած մերձացուցանէր զնոսա եւ բազում միաբանութիւն ցուցանէր զիւր ընդ Աստուծոյ, եւ ասէին, թէ՛ չէ դա յԱստուծոյ: Եւ կատարի առ նոսա մարգարէութիւնն Եսայեայ, որ ասէ՛ «Ասելով լուիջիք եւ մի իմացջիք» (Ես. Զ. 9) եւ այլն: Տեսանես եւ զմարգարէն մեծամեծ հաւաստեաւք լեալ ամբաստան զնոցանէ, քանզի չասաց, թէ՛ չտեսանէք, այլ թէ՛ տեսանէք, եւ ոչ տեսանէք, զի անձամբ իսկ զանձանց խցին զականջս եւ կափուցին զաչս եւ թանձրացուցին զսիրտս (տես Մարթ. ԺԳ. 15), զի ոչ միայն լսել չկամէին, այլեւ ծանունս լսէին, եւ զայս այնր աղապաւ առնէին, զի մի դարձցին, եւ թողցի նոցա: Զ[յ]աճախութիւն չարեաց նոցա կամի ցուցանել եւ զյաւժարութեամբ յետս կալն:

Գուցէ դարձցին, եւ բժշկեցից զնոսա (հմմտ. ԺԳ. 15):

Յայտ արար, թէ եւ դառնալ մարթէ եւ թէ ապաշխարեսցեն, զոյ հնար:

Բայց ձեր երանի աչաց, զի փեսանն եւ ականջաց, զի լսեն (ԺԳ. 16):

Ո՛չ զայս մինչ տեսանելեաց ասէ եւ ոչ զյայտնի լսելեացս, այլ զմտացն աչացն եւ զսրտին լսելեաց: Քանզի եւ նոքա հրէայք իսկ էին՝ ընդ նոսա սնեալք, այլ ոչ ինչ վնասեցան ի մարգարէութենէն, զի զարմատս բարութեանց յանձինս ունէին:

«Բազում մարգարէք եւ արդարք ցանկացան փեսանել, զոր փեսանէք եւ ոչ փեսին» (ԺԳ. 17):

Եւ զիա՞րդ իցէ, զի ոչ միայն, զոր հրէայքն ոչ տեսին, տեսանէին, այլեւ զոր արդարքն ցանկային՝ տեսանել եւ ոչ տեսին: Այլ նոքա հաւատովք տեսին, եւ սոքա՝ աչաւք իսկ, եւ յայտ յանդիման: Տեսանես, զիարդ զհինն միաբանէ ընդ նորոյս, յայտ արարեալ, թէ ոչ միայն զիտէին նոքա զհանդերձեալսն, այլեւ կարի իսկ ցանկանային:

¹ Ա ժողովուրդս

¹ Ա ցանկանայ

Եւ արդ, լուարուք դուք գառակս սերմնացանին (ԺԳ. 18):

Եւ ապայ սկսանի ասել, զոր յառաջագոյնն ասացաք:

Զմիւսն՝ թէպէտ եւ յափշտակել կամի սատանայ, այլ մեք եմք տեսարք՝ տալ ի ձեռս եւ չտալ: Եւ թէ ծածկեսցուք յաւժարութեամբ զսերմն եւ հանապազորդ յիշատակաւք զգուշասցուք, չկարէ յափշտակել, եւ զմիւսն՝ թէպէտ եւ ցամաքիցն սերմանիքն, այն ոչ ի խորշակէն ինչ լինի, քանզի ոչ ասաց ի խորշակէն ցամաքեցաւ, այլ վասն չունէր արմատս: Իսկ զմիւսն՝ թէպէտ եւ հեղձուցանէր փուռքն, ոչ ի փշոցն ինչ բռնութենէ, այլ ի ծուլութենէ այնոցիկ, որ փշոցն ետուն բուսանել: Գո՞յ Հնար արգելուլ զչար բոյսսն, եթէ կամիցիս յաւգուտ մատակարարել զմեծութիւնն, քանզի չասաց, եթէ աշխարհս, այլ եթէ՝ Հոգք աշխարհիս, եւ ոչ ասաց, թէ մեծութիւնն¹, այլ թէ՝ պատրանք մեծութեանն, զի ամենայն ինչ մեծութեանն պատրանք են, քանզի անուանք եւեթ են, եւ ոչ իրք հաստատունք: Ապայ յետո բարւոք երկիրն դնէ. թէպէտ եւ երկիրն բարւոք իցէ, եւ սերմնահանն՝ մի եւ սերմն՝ նոյն, այլ ոմն ձ. (100), եւ ոմն՝ Կ. (60), եւ ոմն՝ Լ. (30) տայ գտոհմականսն: Թէպէտ եւ երկիրն բարւոք իցէ, սակայն գունակ գունակ կերպարանաւք երեւին: Տեսանես, զի ոչ մշակն ինչ է պատճառ, եւ ոչ սերմն, այլ երկիրն, որ ընդունիցի, ոչ ըստ բնութեան ինչ, այլ ըստ կամաց: Եւ քանզի մարդարսէր է, ո՛չ մի ճանապարհ հորդեաց, զի չասաց, թէ որ զձ.(100)աւորն չառնիցէ, խոտան գտանի, այլ թէ որ զվաթանաւորն առնիցէ, կեայ: Եւ ոչ այս չա՛փ միայն, այլեւ որ զերեսնաւորն առնիցէ եւ այսու դիւրին յարդարէ զփրկութիւնն: Եւ դո՛ւ, թէ չկարիցես² անինչ եւ առանց կարասոյ լինել, տաջիր աղքատացն յընչիցն, զոր ունիցիս եւ եթէ այնմ եւեթ բուռն չհանդարտիցես, բաժանեաց ընդ Քրիստոսի զինչսն, զի այսոքիւք կեցցես:

ՅՈՎՀԱՆՆԷՍ ԾՈՐԾՈՐԵՅԻ

Յաւոր յայնմիկ ելեալ Յիսուս ի փանէն, նսպեր առ ծովեզերն: Եւ ժողովեցան առ նա ժողովուրդք բազումք (Մատթ. ԺԳ. 1-2):

¹ Ա > քանզի չասաց, եթէ աշխարհս այլ եթէ հոգք աշխարհիս, եւ ոչ ասաց, թէ մեծութիւնն
² Բ թէ չկարիցես կուսութիւն պահել արհմաւք ամուսնականցի ի եթէ չկարիցես

Միշտ կարգին եւ ժամանակին Հոգ տանի աւետարանչս Մատթէոս, որ է յատուկ սորա, իսկ այլքն՝ միայն բանիցն զաւրութեան, քանզի յորժամ զարմացոյց, ասէ եւ արար, զոր խնդրէին ծնաւդն եւ եղբարքն, որպէս ի հարսանիսն, թէպէտ նախ զսնափառութիւնն բժշկեաց, որպէս անդ, եւ յետոյ զպատշաճ պատիւն մատոյց ծնողին, ապա ելեալ ի տանէն՝ առ ծովեզերն բազմէր, որպէս զի ամենեքեան անդր յընդարձակ վայրի հաւաքեալ՝ շահեսցին ի վարդապետութենէն, միանգամայն եւ ծովեզերեայսն որսասցէ, զոր տեսեալ ժողովեցան առ նա բազումք: Իսկ առ ի միտս՝ յաղագս բազում մարդասիրութեանն ելեալ ի տանէն հայրենի սեփհական աթոռոյն, յաներեւութէն ասեմ, պայծառ եւ անմատչելի լուսոյն ծայրութեամբ, զոր աւրն նշանակէ, անփոյթ արարեալ իւրոյ բնութեանն իմանալոյն եւ երկնաւորին, եւ նստաւ առ ծովեզեր կենցաղական մարմնոյս, յեզր կալով ծփական ալեաց ամբոխից մտաց եւ մարմնոյ մեղաց, որով բազում ժողովուրդք հրէից եւ հեթանոսաց ած առ ինքն ի ձեռն հաւատոցն:

Մինչեւ մրանել նմա ի նաւն եւ նսպել եւ ամենայն ժողովուրդն կայր առ ծովեզերն (ԺԳ. 2):

Յաղագս այնորիկ ի նաւ մտանէր, զի մի՛ զօք ի թիկանց թողուցու, այլ զամենեսեան ի դիմի կացուցէ եւ առանց խափանածուի զվարդապետութիւնն ամենեցունց պատմեցէ: Իսկ մտաւորաբար՝ մտեալ ի մարմին մահկանացու, եւ զի մի թափանցումն միայն կարծեսցես, ասէ՝ «նստեալ», որ գոյժ միութեամբ հանգչելն ցուցանէ եւ նովաւ ի ծով աշխարհի անվնաս մնացեալ: Եւ ո՛չ միայն այս, այլեւ ցածոյց մարմնովն զալեկոծութիւն ի մարդկանէ, որով էած զմարդիկ յեզր ծովու կենցաղոյս՝ ազատելով ի մահուանէ եւ առնելով անմահս եւ անապակասս:

Եւ խաւեր ընդ նոսա բազումս առակաւք եւ ասեր (ԺԳ. 3):

Յորժամ ի լերինն ուսուցանէր ո՛չ առակաւք, քանզի անդ տխմարքն եւեթ էին եւ ուսմիկքն, իսկ աստ՝ դպիրք եւ փարիսեցիք խառն եկեալ էին: Եւ դարձեալ, զի ցուցցէ, թէ ի լրումն եկեալ իսկ են տառք մարդարէիցն՝ մանաւանդ Դաւթեան, զի ասէր. «Բացից առակաւ գրեան իմ» (Մաղմ. ՆԷ. 2): Իսկ առ ի միտս՝ յերկինս գուրով իմանալաբար զիմանալիսն ուսուցանէր, իսկ ի յերկիր իջեալ եւ ի

ծով աշխարհի մխեալ՝ մարմնականացս մարմնատիպ բանիւ աւրինականաւ վարդապետէր:

Ահա ել սերմանահան սերմանել (ԺԳ. 4):

«Ահա»-յն գյանկարծակի երեւումն իւր ի յերկրի նշանակէ՝ ըստ այնմ. «Ահա այր, եւ ծագումն անուն նորա» (Ջաբ. Զ. 12): Իսկ «ելն»՝ ո՛չ ի տեղւոջէ ի տեղի, որ յամենայնի է եւ զամենայն ընու, այլ զխնամով եւ զտեսչութեամբ մարմնազգեցութիւնն աւրինակէ, մինչ զի ի ծածուկ գոլով ի ծոցն Հաւր՝ ցուցաւ մեզ, քանզի մեք չկարէաք մտանել առ նա վասն մեղաց պարսպին, ի՛նքն իւրովի ելեալ եկն առ մեզ: Եւ դարձեալ՝ «ել» ասելովն ցուցանէ, թէ նախ ծննդեամբ ելեալ էր ի Հաւրէ եւ այժմ մարմնով ել ի կուսէն՝ ըստ այնմ. «Ելի ի Նարե եւ եկի յաշխարհ» (Յովի. ԺԶ. 28). զի որ միանգամ ել ի Հաւրէ, նա երկրորդ անգամ եկն յաշխարհ. եւ ո՛չ Հայր, որ ոչ յուժեքէ է, եւ ոչ Հոգին, որ թէպէտ ելումն է ի Հաւրէ, այլ բղխմամբ եւ ո՛չ ծննդեամբ, զի Հոգին ըստ անձինն բղխումն միայն ի Հաւրէ է եւ ոչ յորդւոյ: Եւ պատճառն՝ զի միայն Հայր առաքէ եւ ո՛չ առաքի, քանզի Հայր ո՛չ յուժեքէ էլ, վասն այսորիկ ո՛չ յուժեքէ առաքեալ ասի ի Գիրս, իսկ Որդի, զի ի Հաւրէ ծնանի եւ տայ Հոգւոյ, վասն այսորիկ առաքի ի Հաւրէ եւ առաքէ զՀոգի:

Իսկ թէ ոք ասիցէ, թէ եւ Հոգի զՈրդի առաքէ՝ ըստ այնմ. «Տէր առաքեաց զիս եւ Նոզի նորա» (Եւ. ԽԼ. 16), ապա ուրեմն եւ Որդի ի Հոգւոյ է, առ այս ասեմք լուծումն, թէ զայս առաքումն Որդւոյ ի Հոգւոյն ըստ մարդկութեանն ասէ մարդարէն, իսկ ըստ աստուածութեանն՝ Հոգի որպէս ի Հաւրէ, այսպէս եւ յՈրդւոյ առաքումն, վասն այսորիկ եւ առաքումն Հաւասար ասի ի Հաւրէ եւ յՈրդւոյ, բայց աստ զՈրդւոյ միայն ասէ, քանզի ելումն է ծննդեամբ ի Հաւրէ, վասն այսորիկ եւ ըստ մարմնոյն ասէ, թէ՛ «ել սերմանահան», իսկ «սերմանահան» զինքն անուանէ, որ զսերմն բարի վարդապետութեանն հանէ ի բնական բարութեանէն եւ սերմանէ յերկիր, քանզի զնախ սերմանեալ բարին զաւսացոյց թշնամին, յազազս որոյ կրկին ել՝ սերմանել:

Եւ «անդապտան», յորում սերմն անկանի, են Հոգիք բանականաց, միանգամայն եւ զայն ցուցանէ, թէ սերման է ժամանակ, իսկ որայն ի հանդերձեալն բարդի: Եւ դարձեալ՝ ել ի խաչ եւ յերկինս, եւ զսերմն Հոգւոյն շնորհաց պէսպէս նորոգութեամբ սեր-

մանեաց առաքելովքն՝ ըստ այնմ. «Ել ի բարձունս եւ գերեաց զգերութիւնն», բաշխեաց աւար որդւոց մարդկան» (Հմմտ. Սաղմ. Կէ. 19), եւ որ ելն՝ ի վերոյ ել, քան զամենայն երկինս, զի լցցէ զամենայն: Եւ դարձեալ՝ ի գերեզմանէ եւ ի դժոխոց հանեալ զկապեալսն քաջութեամբ իւրով՝ ըստ նմանութեան արեւու, զի «ելանէ յառազաստէ» (Սաղմ. ԺԼ. 6) եւ սերմանեաց ի հոգիս մեր զյոյս յարութեան, զի «սերմանի մարմին շնչաւոր եւ յառնէ մարմին հոգեւոր» (Ա. Կոր. ԺԵ. 44):

Եւ ի սերմանելն իւրում էր, որ անկաւ առ ճանապարհաւ, եւ եկն թռչուն երկնից եւ եկեր զնա:

Ըստ զանազան բարուց ժողովելոցն յարմարեաց զառակս, քանզի սերմն մի է, Սերմանահանն՝ մի եւ երկիրն՝ մի, սակայն արմատիքն ի չորս բաժանեցան, եւ այս ո՛չ ի Սերմանողէն, այլ յերկրէն, այսինքն՝ յանհնազանդ Հոգւոցն: Բայց ընդէ՞ր ոչ ասաց, թէ զկէսն ընկալան կարծրասիրտքն եւ կորուսին, եւ զոմանս մեծատունքն եւ հեղձուցին, եւ զայլս յոյլքն եւ աղաւաղեցին. ո՛չ կամեցաւ առ այժմ կսկծեցուցանել, զի մի՛ վհատիցին, այլ թոյլ տայ անձամբ զանձն յանդիմանել ի ձեռն առակին: Եւ թէ ասիցէ ոք՝ զի՞նչ ի դէպ էր ճանապարհին, կամ յապառաժին, կամ ի մէջ փշոցն սերմանել: Նախ՝ զի որ սերմանէն ո՛չ ընտրէ գերկիրն, այլ խառնիրուռն սերմանէ, զի առատութիւն սերմանողին ցուցցի եւ պատճառն հատանիցի: Եւ երկրորդ՝ երկիր չէ ի դէպ, բայց ոգւոց մարդկան եւ վարդապետութեան կարգի յարմար է եւ առաւել գովելի, զի որպէս զանձրեւ եւ զարեւ՝ չարաց եւ բարեաց (տե՛ս Մատթ. Ե. 45), այսպէս եւ զայս, քանզի խաւսուն երկիր վասն ընդունակ գոլոյ ընդդիմակաց կրից՝ մարթ է քարին պարարտ լինել եւ ճանապարհին չլինել կոխան եւ փշաբերն ծաղիկս վերընծիւղել. եւ թէ ո՛չ փոփոխին, ո՛չ սերմանողին է վնաս, այլ ընդունողացն: Իսկ թէ ոք ընդդէմ բերցէ, թէ ընդէ՞ր ասաց. «Գինի նոր ի փիկս նորս արկանելի է եւ ոչ ի հինս, զի երկոքին պահին» (հմմտ. Մարթ. Թ. 17), իսկ աստ ի ճանապարհին եւ յապառաժին զսերմն կորուսանէ, ասացուք, թէ այն շնորհացն է, որ յետ վարդապետութեանն նորանայ եւ ընդունի, իսկ այս սկիզբն վարդապետութեանն, որպէս ասէ, թէ՛ «ի սերմանելն իւրում էր, որ անկաւ առ ճանապարհաւ»:

Արդ, զայս թէպէտ Տէրն լուսաւոր եւ յայտնի մեկնէ ի կարգի իւրում, սակայն ի տեղւոջս զայս ասացուք, թէ սոքա են Հոգիք զրկո-

դացն, որպէս այն, որ զմի քանքարն էառ եւ անարգեաց զտուիչն նորա (Կրն՝ Մարթ. Ե. 14-30), զի ոչ կակղացաւ ընդունել զսերմանիս նորա եւ աճեցուցանել տոհմականաւք, այլ եղեւ կոխան ամենայն չարեաց, զիւաց եւ ախտից եւ մեղաց, քանզի ո՛չ մի է ճանապարհ կորստեան, այլ բազումք: Վասն որոյ թուչունն աւղոյզ չարն՝ զսերմն ուսման եւս քաղեաց ի սրտէ նորա, ո՛չ բռնութեամբ, քանզի աւասիկ ի դրունս լսելեաց մերձ էր ձայն Աւետարանին, որպէս Հատ ցորենոյ ի վերայ երեսաց երկրի, այլ զի ոչ ամփոփեաց յարգանդ սրտի իւրոյ զսերմն, որ անկաւ ի նա, գործով ետ ուտել զնա, այսինքն՝ մոռացմամբ ծածկեաց զնա:

Եւ այլն անկաւ յապառաժի, ուր ոչ գոյր հող բազում, եւ վաղվաղակի բուսաւ առ ի չգոյէ հիւթոյ երկրին: Ի ծագել արեւու փայլացաւ, եւ զի ոչ գոյին արմաքք, չորացաւ (ԺԳ. 5-6):

Աստ զմարդասիրութիւնն յայտնապէս ցուցանէ, զի թէպէտ ոչ էր Հանդերձեալ կակղանալ խստութիւն նորա, սակայն ո՛չ խնայեաց ի սերմն իւր, որպէս այնոքիկ, որ յաշակերտութենէ յետս դարձան՝ ասելով, թէ. «Խիստ է բանդ, ո՛ր կարէ լսել դմա (Յովի. 9. 61): Նման Յուդայի, որ լուաւ զբան նորա եւ վաղվաղակի ծաղկեցաւ սքանչելեաւք նորա եւ ի ժամանակի փորձութեանն եղեւ անպտուղ, քանզի զբանն գործով ոչ արմատացոյց ի սիրտ իւր, վասն այսորիկ դաւսացոյց զնա սատանայ յառաքելական պտղոյն: Վասն զի արժան է եւ յանձանց մերոց նպաստ լինել սերման բանին Հիւթոյ առաքինութեամբ, զի ի ծագել խորչակին նեղութեանց եւ վշտաց՝ ներողութեամբն Աստուծոյ յածել փորձողին, մի՛ գայթակղեալ վրիպիցիմք ի Հաւատոցն, որպէս բազումք, քանզի չեն ընդ մի Համար տկարքն եւ զաւրաւորքն, յորժամ վիշտք ի վերայ Հասանիցեն, այլ ոմն ժուժկալէ, իսկ ոմն՝ գթէ:

Եւ այլն անկաւ ի մէջ փշոց, եւ ելին փուշքն եւ հեղձուցին զնա (ԺԳ. 7):

Թէպէտ զզաւրութիւն իւրեանց փշոյ եւ տատակի ետուն, սակայն վարդապետն յայտնեաց զսէր իւր սերմանել եւ ի նոսա՛ յաւժարութեամբ, որպէս զի անպատասխանիք լինիցին: Եւ զի մի՛ ոք ասիցէ, թէ ի մէջ փշոյն զիս՞րդ բուսանէր, ասէ՝ «հեղձուցին» եւ ոչ թէ «հեղձաւ», քանզի կամաւ մատնեցին զսերմն մեղաց եւ ապա-

կանութեանց եւ ոժդութեանց: Քանզի աւանիկ ընչեղն յորժամ առ Տէրն եկն եւ եցոյց զվարս ի մանկութենէ իւրմէ երկիր գէր եւ պարարտ, սակայն փուշս բուսուցեալ, սրբել կամեցաւ. «Թէ կամիս կապարեալ լինել, վաճառեա զինչս թո» (Մարթ. ԺԹ. 21): Եւ նա ո՛չ կամեցաւ, այլ գնաց խոժոռեալ զիմաւք իբրեւ զփուշս, վասն որոյ ասաց. «Այդպիսեացդ զժուարին է յարքայութիւնն մտանել» (հմմտ. Մարթ. ԺԹ. 23), այլ Հրոյ ճարակ լինիցին, եթէ ոչ սրբեսցին, քանզի կամաւք թոյլ ետուն փշոցն ծածկել զբանն եւ անպտուղ առնել, վասն որոյ ո՛չ փշոցն բռնութեանն, այլ նոցա ծուլութեանն է մեղադրանքն:

Եւ այլն անկաւ յերկիր բարի եւ փայր պտուղ. էր՝ որ հարիւրաւոր, եւ էր՝ որ վաթսնաւոր, եւ էր՝ որ երեսնաւոր (ԺԳ. 8):

Սոքա այնոքիկ են, որ զանդաստան մտաց իւրեանց գործեցին ստուգութեամբ, որպէս նոքա, որ «թողին զամենայն եւ զնացին զհետ նորա» (հմմտ. Մարթ. ԺԹ. 27): Այլեւ ցուցանէ, թէ սակաւ են վաստակքն, եւ բազում են փառքն, միանգամայն ուսուցանէ եւ զայն, թէ սակաւք են, որ ապրելոց իցեն: Բայց «Հարիւրաւոր» եւ «վաթսնաւոր» եւ «երեսնաւոր» նախ զնոսա ասէ, որ յերեք Հասակս բարեգործք եղեն՝ ի մանկութիւն, յերիտասարդութիւն եւ ի ծերութիւն: Եւ երկրորդ՝ յերիս ժամանակս Հաւատացին. ոմանք՝ ի մանկութիւն եւ ընդունելիք եղեն, կէսք՝ ի կատարեալ այրութիւն [եւ] արժանաւորք գտան, եւ այլք ի ծերութեանն աշակերտեցան եւ Հաճոյացան: Եւ երրորդ՝ Հարիւրաւն զկատարելոցն ընտրութիւնն ասէ, որք ի վերայ Հաւատոյն եւ գործոյն՝ եւ արեա՛մբ մարտիրոսացան. եւ «վաթսնաւոր»՝ զնոսա, որք կոչեցան ի Հանդէս եւ ետուն զմարմինս իւրեանց ի չարչարանս վասն Տեսուն, բայց ի մահն, յոր փութային, ոչ ժամանեցին, այլ արձակեալք ի բռնաւորաց՝ կացին մնացին բարւոք մինչ ի վախճան. իսկ «երեսնաւոր»՝ որք ընտրեցան յաշակերտութիւնն Քրիստոսի, եւ ո՛չ ժամանակ Հալածանաց յարեաւ ի վերայ նոցա, այլ բարի վաստակաւք իւրեանց պսակեցան՝ իբրեւ զերկիր պտղաւք զարդարեալ: Եւ չորրորդ՝ որք բնական աւրինաւքն արդարացան, երեսնաւորք են, եւ որ զբաւորականաւն՝ վաթսնաւորք, իսկ [որք] Աւետարանաւն՝ նեղ եւ անձուկ ճանապարհաւն ընթացան եւ ոչ միայն զմարմին, այլեւ զմիտս մաքրեցին՝ Հարիւրաւորք:

Եւ Հինգերորդ՝ որք զհոգիս առաքինութեամբ խոհականին զարգարեցին, հարիւրաւորք են, եւ որք զբանն ճշմարտախաւսութեամբ պայծառացուցին՝ վաթսնաւորք, իսկ որք զմարմինս անբիծ քաղաքավարութեամբ պահեցին՝ երեսանւորք:

Արդ, եթէ մի այր զամենեսեան արար ըստ Դաւթի՝ «գնայ անբիծ, գործէ զարդարութիւն, խաւսի զճշմարտութիւն» (Մաղմ. ԺԴ. 2), զերեսին փառսն ժառանգէ՝ զհոգւոյն, զբանին եւ զմարմնոյն, իսկ եթէ զանազան արք, զանազանապէս փառաբանեսցին: Վեցերորդ՝ ո՛չ զանտի փառսն ասէ, այլ զաստիս, արդ, որ «զամենայն եթող եւ գնաց զկնի նորա, զկին եւ զորդիս եւ զբոսս եւ զագարակս, զհարիւրապարիկս ասար առցէ եւ զկեանսն յախրենականս ժառանգեսցէ» (հմմր. Մարթ. ԺԹ. 29), որք են աստ տաւնախմբութիւնք, որպէս սրբոցն եւ նշխարաց նոցին սքանչելագործութիւնք, իսկ անդ՝ երկնից արքայութիւնն: Եւ որք զկէս ընչից իւրեանց բաշխեցին եւ մասանցն ծառայեցին իբրեւ հարկաւոր պիտոյից, նոքա վաթսնաւորքն՝ յիշատակեալք եւ գովեալք ի կենցաղս ի բարիս եւ անդ եւս փառաց արժանաւորեալք ըստ գոյիցն: Իսկ որք արդար վաստակաւք կենցաղավարին, ո՛չ զայլոյ ուրուք յափշտակելով, այլ իւրեանց ընչիւքն շատանան եւ զայլ եւս աւրէնսն կատարեն, երեսնաւորք են, որք ի մարմնական կեանս յղփանան առատութեամբ պարգեւացն Աստուծոյ եւ անդ եւս հանգիստ գտանեն:

Եւ եաւթներորդ՝ որք զերկինս ժառանգեն, հարիւրաւորք են՝ ըստ առաքելոյ. «Յոգիս արդարոց արանց կարարելոց յեկեղեցիս անդրանկաց գրելոցն յերկինս» (հմմր. Եբր. ԺԲ. 23), որք են առաքեալք եւ մարգարէք, եւ կուսանք հոգւով եւ մարմնով, եւ մարտիրոսք, եւ վարդապետք քարոզաւորք: Իսկ որք զգրախտն՝ վաթսնաւորք, եւ են նահապետք եւ հայրապետք եւ արդարք: Իսկ որք զերկիրս զբախտացեալ՝ երեսնաւորք, հաւատացեալ եւ սրբազան ժողովուրդք եւ ուղղափառ եկեղեցիք քրիստոնէից առանց աղանդոյ, քանզի որպէս աստիճանքն եւ գործքն զանազան, այսպէս եւ փառքն զանազան՝ ըստ առաքելոյ (րնս Ա. Կոր. ԺԵ. 41): Եւ ութերորդ՝ երեսնաւորք, որք ծառայական երկիւղիւ պաշտեցին զԱստուած, իսկ վաթսնաւոր՝ որք վասն վարձուց մշակեցին յայգի աստուածային աւրինացն, իսկ հարիւրաւորք որդիական սիրով կատարիչք եղեն կամաց երկնաւոր Հաւրն: Իններորդ՝ կուսանաց պարգեւի պտուղ հարիւրապատիկ, եւ այս երկնային է, զոր նշանակէ հարիւրաւորն,

իսկ՝ այրեաց պարգեւի պտուղ վաթսնաւոր, զի այսպիսիքս կրթեն զինքեանս ի գործ ողորմութեան: Իսկ ամուսնանալոց պարգեւի պտուղ երեսնաւոր, զի սոցա բաւական է ընուլ զտասն պատուիրանն հաւատով Սուրբ Երրորդութեանն, զի երեք տասն՝ երեսուն է, ըստ որում եւ զմեզ զաշխատաւորքս եւ զաւգտաւորքս եւ զլսաւորքս՝ մասին արժանի արասցէ սրբոցն ի լոյս:

Որ ունիցի ականջս լսելոյ, լուիցէ (ԺԳ. 9):

Ամենեքեան ունէին լսելիս, բայց զներքինն՝ ոչ, զոր մարգարէն ըղձացաւ առնուլ. «Յաւել ինձ ունկն ի լսել» (Ես. Ծ. 4): Ուստի յայտ է, թէ հաւատո՛յ էին պէտք առ ընդունել զիմաստս առակին, եւ քննութեան՝ հանճարոյ՝ առանց խորամանկութեան սրտի, զորս ո՛չ ունէին դպիրքն եւ փարիսեցիքն եւ ունէին պարզամիտ աշակերտքն, զի թէպէտ ոչ իմացան, այլ հարցմամբն լուեալ՝ տեղեկացան, որպէս եւ ասէ.

Եւ մաքուցեալ աշակերտքն՝ ասեն ցնա. «Ընդէ՛ր առակաւք խաւսիս ընդ նոսա» (ԺԳ. 10):

Նախ՝ զի ցանկութիւն ունէին ուսման առակին, վասն այնորիկ հարցին եւ այն ի դէպ ժամանակի «առանձինն», որպէս ասէ Մարկոս (Մարկ. Դ. 10), եւ ո՛չ առաջի ամենեցուն, որպէս մայրն եւ եղբարք նորա, քանզի խրատեցան անդ: Եւ երկրորդ՝ զի դուրթ խնամոց ունէին առ ժողովուրդն, զի նախ զնոցայն խնդրէին եւ ապա՝ զանձանց, վասն այնորիկ ասացին, թէ՛ «Ընդէ՛ր առակաւք խաւսիս ընդ նոսա» եւ ո՛չ թէ՛ «ընդ մեզ», որպէս եւ այլուր ցուցանէին, թէ՛ «Արձակեա՛ գժողովորդդ» (Մարթ. ԺԴ. 15), եւ թէ՛ «Գիւրնս, զի գայթաղեցին ոմանք» (հմմր. Մարթ. ԺԵ. 12):

Նա պաքասխանի եր եւ ասէ ցնոսա. «Քանզի ձե՛զ փուեալ է զիւրել զխորհուրդս արքայութեանն երկնից եւ նոցա չէ՛ փուեալ» (ԺԳ. 11):

Զայս ասելով՝ ոչ թէ հարկ ինչ կամ վիճակ մուծանիցէ առանձինն հասեալ նոցա, այլ զի սոքա ազատք էին ի չարեաց, եւ նոքա՝ չարեաւք յղփացեալ, իսկ «յանձն չարարուեստ իմապութիւն ոչ մտանէ», - ասէ Սողոմոն (Իմաստ. Ա. 4): Եւ դարձեալ՝ ցուցանէ, թէ պարգեւք են իրքն, եւ ի վերուստ տուեալ՝ շնորհքն, բայց ո՛չ թէ պարգեւք են՝

Ամէն ասեմ ձեզ, զի բազում մարգարէք եւ արդարք ցանկացան փեսանել, զոր փեսանէքդ եւ ոչ փեսին, եւ լսել, զոր լսէքդ եւ ոչ լուան (ԺԳ. 17):

Եւ այս զիա՞րդ իցէ, զի ոչ միայն հրէայք ոչ տեսին, այլեւ արդարք: Գիտելի է, զի երկակի տեսութիւն է ի մեզ եւ լսելութիւն՝ ներքին եւ արտաքին: Արդ, զոր արդարքն ըղձացան տեսանել մարմնով՝ ըստ Դաւթի, թէ՛ «Փափագէ անձն իմ ի գաւիթս քո» (Մաղմ. 2Գ. 3), զի «երեսցայց երեսացդ Աստուծոյ» (Մաղմ. ԽԱ. 3), զայն ո՛չ ետես, այլ հոգւով, յայտ է ահա՝ «Յուցէր ինձ զճանապարհս քո կենաց, լցուցեր զիս ուրախութեամբ երեսաց քոց» (Մաղմ. ԺԵ. 11), եւ թէ՛ «Արբախամ ցանկացաւ փեսանել գար իմ, երես եւ ուրախ եղեմ» (Յովհ. Ը. 56), եւ՝ «Տեսաք մեր գնաւ, եւ ոչ գոյր նորա փեսիլ», - *ասէ Եսայի* (Ես. ԺԳ. 2) *այսինքն՝ հոգւով: Թէպէտ տեսիլ մարմնոյ նորա տակաւին ոչ էր ի միջի, իսկ հրէայքն մարմնով միայն տեսին եւ ո՛չ հոգւով, բայց սոքա՝ հոգւով եւ մարմնով՝ հոգւոյն տեսութեամբ քան զհրէայսն գերազանցեցին եւ մարմնոյն լսելութեամբ արդարոցն վերագոյն եղեն, յաղազս այնորիկ երանեցան: Եւ դարձեալ՝ ցուցանէ զՀնոյն միաբանութիւն ընդ Նորոյս, թէ ոչ միայն տեսանէին զհանդերձեալսն, զոր Քրիստոս կատարեաց, այլեւ խաւսէին վասն նորա եւ ցանկային՝ ըստ այնմ. «Երես Եսայի զփառս նորա եւ խաւսեցաւ վասն նորա» (հմմտ. Յովհ. ԺԲ. 41):*

Եւ արդ, լուարո՞ւք դուք զառակ սերմանացանին (ԺԳ. 18):

Այսինքն՝ իմացայք զառակաւոր իմաստս, որ այլ իրս ասելով՝ ա՛յլ իմն ծանուցանէ. կամ թէ՛ կամիք ուսանել զառակաւոր բանսն. կամ՝ լսեցէ՛ք դուք արժանաւորքդ, որք տեսանէք եւ լսէք եւ ի միտ առնուք:

Յամենայնէ, որ լսէ զբանն արքայութեան եւ ոչ առնու ի միտ, զայ չարն եւ յափշտակէ զսերմանեալն ի սիրտ նորա. այն է, որ առ ճանապարհաւն սերմանեցաւ (ԺԳ. 19):

Սկսանի մեկնել լուսաւոր վարդապետութեամբ զառակն եւ «բան արքայութեան» զԱւետարանն ասէ, ո՛ր ոչ մարմնական բարի, այլ հոգեւոր եւ աստուածային: Քարոզէ երկնից թագաւորութեանն ժառանգս լինել աշակերտելոցն հաւատով, բայց «լսել» եւ «ոչ առնուլ ի միտ»՝ որպէս հրէայքն, որք ոչ բացին զառագաստ

սրտին եւ ծածկեցին յաւժարութեամբ զսերմն Բանին եւ միշտ յիշատակաւք չզգուշացան, վասն այնորիկ յափշտակեաց սատանայ ոչ բռնութեամբ, այլ հաւանութեամբ անձնիշխան մտացն ի մոռացաւնս էած աստուածեղէն բանիցն՝ կոխան լինելով ախտիցն:

Եւ որ յապառածին սերմանեցաւ, այն է, որ իբրեւ լսէ զբանն եւ վաղվաղակի խնդութեամբ ընդունի գնա: Բայց քանզի ոչ ունի արմափս յինքեան, այլ առ ժամանակ մի է. ի լինել նեղութեան եւ հալածանաց վասն բանին, վաղվաղակի զայթազդին (ԺԳ. 20-21):

Ի հրաշիցն պակուցեալ կամ խոստմանցն տենչացեալ՝ եմուտ յուռկանն խնդութեամբ եւ ընկալաւ զբանն, բայց զգործն ոչ հետեւեցոյց արժանաւոր բանին, այլ առ ժամանակ մի շնորհաւք փայլեաց, իսկ յորժամ հալածումն եղեւ, զի ընտիրքն երեւեսցին եւ հալածիչք յանդիմանեցին, նա պարտասեալ յանդիմանեցաւ: Բայց այսմ ո՛չ եթէ խորշակ փորձութեանն եղեւ պատճառ, այլ վասն զի չուներ արմատս, որպէս ասաց, վասն այնորիկ ցամաքեցան սերմանիքն:

Իսկ որ ի մէջ փշոցն սերմանեցաւ, այն է, որ իբրեւ լսէ զբանն, եւ հոգք աշխարհիս եւ պարբանք մեծութեան հեղձուցանեն զբանն, եւ լինի անպտուղ (ԺԳ. 22):

«Փուշ» զկեցուցիչ սէր աշխարհիս ասէ՛ ըստ այնմ. «Փուշ բուսուցէր քեզ երկիր» (հմմտ. Ծննդ. Գ. 18): Արդ, որ ի սէր աշխարհիս հարեալք են եւ ջանան Տեառն ծառայել, ո՛չ կարեն, քանզի «ո՛չ կարէք Աստուծոյ ծառայել եւ մամոնայի» (Մաթթ. Զ. 24): Վասն այնորիկ ասէ, թէ այն է, որ լսէ զբանն եւ կամիցի առնել, սակայն ո՛չ աշխարհս, այլ «հոգք աշխարհիս», եւ ոչ մեծութիւնն, այլ «պարբանք մեծութեանն», քանզի ամենայն մեծութիւնք պատրանք եւեթ են եւ ո՛չ հաստատուն իրք, զաւրացեալ ի վերա բանին՝ հեղձուցանեն եւ առ սակաւ սակաւ ոսացուցեալ գաւսացուցանեն: Եւ այս ո՛չ ի փշոցն բռնութենէ, այլ ի մտացն ծուլութենէ, զոր թէ արհամարհեսցուք, դիւրաւ զբանն բեղմնաւորեալ աճեցուցուք: Արդ, երեք մասունքն արտաքս ելին. ճանապարհ եղեալքն մեղաց եւ ի հաւատս եկեալ եւ մեռեալքն առանց գործոց, եւ ընչաւէտ մեծատունքն: Իսկ որք շահեալ աւգտեցան, ասէ եւ զայն.

Իսկ որ յերկիրն բարի սերմանեցաւ, այն է, որ իբրև լսէ զբանն եւ ի միտ առնու, եւ փայ զպտուղ, է՝ որ հարիւր, եւ է՝ որ վաթսու, եւ է՝ որ երեսուն (ԺԳ. 23):

Աստ ուսուցանէ, թէ ո՛չ ի սերմանողէն կամ ի սերմէն, այլ յընդունաւոր երկրէ՛ն զանազան եղեն սերմանքն եւ ո՛չ միայն ասացեալ առաջինքն, այլեւ պարարտ երկիրն գունակ կերպարանս ցուցին՝ հարիւր եւ վաթսուն եւ երեսուն, զի ստուգապէս իմասցիս, թէ ո՛չ բնութեան գործ է այն, այլ մտաց. կամ՝ զի երեք դասք արտաքս ելին, եմուտ մին փոխանակ երիցն՝ երեք աստիճանաւք հաւասարեալ, ո՛չ թուոյն գուգութեամբ, այլ փառացն բազմութեամբ: Եւ դարձեալ՝ յայսմ տեղոջ զմարդասիրութիւնն եւ զհեղութիւնն իւր յայտ առնէ, քանզի ո՛չ ասաց՝ որ հարիւր չառնիցէ, խոտան է, այլ թէ՛ եւ որ զվաթսուն եւ զերեսուն առնիցէ, ընդունելի է, որով զիրին կազմեաց փրկութեան ճանապարհ, որպէս թէ կուսութեամբ եւ անընչութեամբ ոչ կարիցես ընթանալ դու, ամուսնութեամբ եւ անընչութեամբ ընթացիր, եւ թէ ո՛չ այնու, ընդ Քրիստոսի բաժանելով զինչսն՝ արժանաւոր լինիլիւր երրորդի մասինն: Եւ այս առակ յայտոսիկ աւարտեցաւ:

**ԳՐԻԳՈՐ ՏԱԹԵԻԱՅԻ
ՎԱՍՆ ՍԵՐՄԱՆՅ ՔԱՐՈՉՈՒԹԵԱՆՅ**

Ահա ել սերմանացան՝ սերմանել (Մարթ. ԺԳ. 4)

Ոչ թէ ել ի տեղոջէ ի տեղի, զի անմարմին բնութիւնն Աստուծոյ յամենայնի է եւ զամենայն լնու: Չորս ինչ ցուցանէ «ելն».

Ա. Նախ՝ զձնանելն ի Հաւրէ յառաջ, քան զյաւիտեանս:

Բ. Երկրորդ՝ զի խնամաւք եւ տեսութեամբ եկն առ մեզ:

Գ. Երրորդ՝ զի ել մարմնով ի կուսէն:

Դ. Չորրորդ՝ ել ի քարոզութիւն:

Գիտելի է, զի բազում իրաւք բաղդատի վարդապետն սերմանողի: Եւ ասեմ ժ. (10) կերպիւ.

Ա. Նախ՝ զի սերմանողն յանդն երթայ: Այսպէս վարդապետն երթայ առ ժողովուրդն:

Բ. Երկրորդ՝ թէ ոչ սերմանէ, ոչ աճէ: Եւ բանքն ի լսողքն աճեն:

Գ. Երրորդ՝ ընտրէ զսերմն եւ զհողն: Այսպէս եւ վարդապետն զճշմարիտ բանն ընտրեսցէ եւ զհաւատարիմ ժողովուրդն, որ կարեն տալ զպտուղ նորա արգիւնաւոր:

Դ. Չորրորդ՝ ընտրէ զժամանակն սերման: Այսպէս եւ վարդապետն զքարոզելոյ ժամանակն ընտրեսցէ՝ զմահու, զյարութեան, զտաւնի եւ զայլն:

Ե. Հինգերորդ՝ ընտրէ զհողն, թէ զո՞ր սերմն տանի: Եւ վարդապետն ընտրէ զգէմն եւ քարոզէ՝ հերձուածող թէ ուղղափառ, իմաստուն թէ տգէտ եւ այլն: Որպէս Քրիստոս տխմարացն պարզ խաւսէր եւ դպրացն եւ փարիսեցւոցն առականոր բանիւք:

Զ. Վեցերորդ՝ ըստ չափոյ հերկին սերմանէ: Եւ վարդապետն չափաւոր քարոզէ, զի աւելին ծանրացուցանէ եւ նուազն ծարաւ թողու:

Է. Եւթներորդ՝ որքան սերմանէ, նոյնքան եւ հնձէ: Եւ վարդապետն՝ որքան աշխատի եւ քարոզէ, այնքան վարձս ընդունի:

Ը. Ութերորդ՝ նախ հերկէ եւ ապա սերմանէ: Եւ պարտ է կակղացուցանել զսիրտն եւ ապա զճշմարիտն ուսուցանել:

Թ. Իններորդ՝ յետոյ խնամէ եւ ջրէ: Եւ վարդապետն յետ քարոզութեանն աղաւթս առնէ եւ աւրհնէ:

Ճ. Տասներորդ՝ նախ ինքն վայելէ ի պտղոյն, որպէս առաքեալ ասէ. «Մշակին աշխարհոյ պարս է նախ ի պտղոյն վայելել» (Բ Տիմոթ. Բ. 6): Որպէս Տէրն առնէր եւ ուսուցանէր: Այսքան ըստ նմանութեան: Այլ նոյնքան զանազանութիւն է սերման եւ քարոզութեան.

Ա. Նախ՝ զի այն սերմն եւ սերմանողն, եւ երկիրն իմանալի է, եւ այս՝ զգալի:

Բ. Երկրորդ՝ նա՝ հոգեւոր, եւ սայ՝ մարմնաւոր:

Գ. Երրորդ՝ նա՝ կենդանի, եւ սայ՝ անկենդան:

Դ. Չորրորդ՝ նա՝ բանական, եւ սայ՝ անբան:

Ե. Հինգերորդ՝ նա՝ անմահ եւ անապական, իսկ սայ՝ մահկանացու եւ ապականացու:

Զ. Վեցերորդ՝ նա՝ երկնաւոր սերմն եւ սերմանողն եւ կրողն, եւ սայ՝ երկրաւոր:

Է. Եւթներորդ՝ այն մի է սերմանողն Քրիստոս, եւ մի է սերմն, եւ մի է բանական երկիր, իսկ այս՝ բազում:

Ը. Ութերորդ՝ այն բոլորն ի բազումս, եւ բոլորն ի մասնաւորս, եւ այս՝ ոչ:

Թ. Իններորդ՝ նա յամենայն տեղիս սերմանէ՝ ի քար, ի փուշ, եւ սա՝ ոչ:

Ժ. Տասներորդ՝ նա բան սերմանէ եւ արդիւնք ժողովէ, եւ սայ՝ զոր սերմանէ, զնոյն հնձէ՝ ըստ սերմանց: Այսքան որիչ են:

Հարց. Վասն է՞ր սերմն մի է, եւ արդիւնքն՝ Դ. (4):

Պատասխանի՝ Վասն անհնազանդ հոգոցն: Ոմն զսերմն կորոյս, ոմն բուսաւ եւ չորացաւ, ոմն հեղձաւ եւ ոմն արդիւն արար (տն՛ս Մաթթ. ԺԳ. 5-7): Եւ տես, զի չէ պարտ յանուանէ զոք յանդիմանել.

Ա. Նախ՝ զի մի՛ դառնասցին:

Բ. Երկրորդ՝ զի մի՛ յուսահատեսցին, այլ որպէս Տէրն Հասարակաց խրատեաց զմեծատունս եւ զայլս:

Հարց. Վասն է՞ր ի քար եւ ի փուշ սերմանէ:

Պատասխան. Ա. Նախ՝ ի կողմանէ լսողացն, զի կարեն ի չարէն փոփոխիլ եւ լինել բարի, զի բանաւորք են եւ անձնիչխանք:

Բ. Երկրորդ՝ ի կողմանէ ասողին, զի երեւեսցի բարութիւն նորա, զի առանց ակնառութեան քարոզէ: Եւ դարձեալ՝ անպատասխան լիցին ոչ լսողքն:

Այն, որ անկաւ առ ճանապարհան (ԺԳ. 3):

Այս առաջինն է, որ զսերմն կորոյս եւ զրկեաց զՏէրն, որպէս այն, որ զմին քանքարն էառ եւ կորոյս (տն՛ս Մաթթ. ԻԵ. 18): Եւ «ճանապարհն» Գ. (3) յատկութիւն ունի.

Ա. Նախ՝ զի ոչ ծածկէ զսերմն. նոքա են, որ զսերմն ի լսելիքն եւ ի կամքն ունին եւ ոչ ի մէջ սրտին:

Բ. Երկրորդ՝ զի կոխան է. ցուցանէ զծոյլն, որ կոխան են սատանայի եւ մեղաց:

Գ. Երրորդ՝ ջուր լինի ժողովեալ. ցուցանէ զբղջախոհն, որ ոչ ունի զսերմն բանին: Եւ զի պինդ է եւ ոչ գործի, վասն այն ոչ ծածկէ զսերմն եւ լինի կոխան եւ ջրկոյս: Սոյնպէս եւ ծոյլն ոչ ընդունի զխրատն, լինի կոխան եւ բղջախոհ, վասն այն թռչունն աւգային քաղէ զբանն, ոչ ի սրտէն, այլ յերեսացն եւ ի կամացն:

Երկրորդն՝ «ապառաժն» (ԺԳ. 5).

Գ. է յատկութիւնն.

Ա. Նախ՝ զի բարձր է:

Բ. Երկրորդ՝ խիստ է:

Գ. Երրորդ՝ ցուրտ է: Նշանակէ զհպարտն եւ զբարկացողն, եւ զնախանձաւորն, որ աստէ զամենեցուն բարին: Սոքա ոչ ունին հող եւ հիւթ, եւ արմատ: Հող, որ է խոնարհութիւն եւ հեղութիւն: Հիւթ՝ յոյսն կենդանի: Արմատ՝ հաւատն եւ սէրն՝ հաստատեալ ի խոնարհութիւնն: Եւ «արեգակն» (ԺԳ. 6) աստ զսատանայ անուանէ եւ տապ՝ զփորձութիւնն, ըստ նմա. «Խէթիւ կայեցաւ ընդ իս արեգակն» (Երզ Ա. 5): Եւ սոքա հպարտութեամբ շուտով բուսանին եւ ի տապոյն չորանան, որպէս նոքա, որք յետս կացին ի Քրիստոսէ: Եւ Յուդայ, որ ծաղկեցաւ նշանաւքն, եւ անպտուղ եղեւ:

Երրորդ՝ «փուշքն» (ԺԳ. 7).

Նշանակէ զազահն եւ զորկորամուքն, որպէս երկիր զգաւրութիւնն ի փուշն տա, այսպէս եւ սոքա միշտ հոգան վասն ազահութեան եւ որովայնի:

Եւ փուշ է մեծութիւնն վասն չորից.

Ա. Նախ՝ զի հեղձուցանեն զպտուղ հոգւոյն, որպէս մեծատունն, որ զամենայն պատուիրանն պահեալ էր, յորժամ ասաց Քրիստոս. «Վաճառեա՛ զինչս քո», «զնաց փրփմեալ» (Մաթթ. ԺԹ. 21, 22) եւ անպտուղ յարքայութենէն:

Բ. Երկրորդ՝ որպէս փուշն ի ժողովելն եւ ի կրելն կսկծէ, այսպէս մեծութիւնն փուշ է հոգւոյն. ի ժողովելն չարչարի, ի պահելն հոգայ, ի ծախելն ցաւի:

Գ. Երրորդ՝ փուշն զոտս եւ զձեռս խոցէ, եւ մեծութիւնն զհոգեւոր գնացս խափանէ եւ զբարի գործս:

Դ. Չորրորդ՝ զի փուշն լուցկի է հրոյն, եւ մեծութիւնն՝ գեհե-նոյն, որպէս մեծատունն այրէր ի տանջանս (տն՛ս Ղուկ. ԺԶ. 23):

Սոքայ, որ ունին զէ. (7) մահացու մեղքն, ոչ ընդունին զսերմն Բանին, այսինքն՝ «ճանապարհ» (ԺԳ. 4)՝ ծոյլ եւ բղջախոհն, «ապառաժ» (ԺԳ. 5)՝ հպարտն, բարկացողն, նախանձոտն, «փուշ» (ԺԳ. 7)՝ ազահն եւ որկրամուքն:

Չորրորդն՝ «արգաւանդ՝ երկիր» (հմմտ. ԺԳ. 8):

Որ արգարութեամբն պարարտացեալ են եւ քրքրեալ. սոցա ամենեցուն ընդդէմ են, որ ասացաք, սոքա ընդունին զպատուիրանս Աստուծոյ եւ տան զպտուղ գործոյն, որպէս առաքեալքն, որ «թողին

¹ Գ արգաւանք

զամենայն եւ զնացին զհետ «Քրիստոսի» (Ղուկ. Ե. 11): *Եւ սոքա յերեք բաժանին. ըստ կամացն յաւթարութեան, որ զանազան է եւ ոչ՝ ըստ բնութեան, որ հասարակ է ամենեցուն: Տե՛ս «զձ. (Հարիւր)աւորն» (ԺԳ. 8):*

Հարց. Զի՞նչ է «Ճ.» «Կ.» եւ «Լ.»¹» (ԺԳ. 8):

Պատասխանի. Զանազան բարի գործս եւ զարդիւնս նշանակէ՝ առաւել եւ նուազ եւ միջակ: Եւ զայս ասեմք ԺԶ. (16) կերպիւ.

Ա. Նախ՝ որ քրիստոնեայ ծնաւդաց զավակ է՝ մկրտեալ, եւ ի մանկութենէ մինչ ի մահ զբարիս գործէ, այն ձ. (Հարիւր)աւորն է: Եւ որ յերիտասարդութեանն է եկեալ ի հաւատս, այն Կ. (վաթսն)աւորն է: Եւ որ ի ծերութեանն է, զայ ի հաւատս, այն Լ. (երեսն)աւորն է:

Հարց. Վասն է՞ր սոցա հասարակ տայ զվարձն, որպէս այն, որ յառաջին ժամն եւ ի Զ. (վեց) ի մետասան ժամն գործեաց յայգին (տե՛ս Մատթ. Ի. 6):

Պատասխանի. Երեք է իմացումն.

Ա. Նախ՝ ասեն զառատ բարութիւնն եւ զողորմութիւնն ցուցանէ Աստուծոյ:

Բ. Երկրորդ՝ արդարութեամբ է, զի թէպէտ ի վերջին ժամանակն մտին, այլ ըստ իւրաքանչիւր կարողութեան եւ ըստ թուոյ կենաց իւրեանց հաւասար գործեցին, յիրաւի հասարակ պատուեսցին:

Գ. Երրորդ՝ ասեն ոմանք, թէ դահեկան գտեսութիւնն Աստուծոյ կոչէ, զոր հասարակ տեսանեն ըստ կարողութեան, այլ զպսակ արդեանցն՝ առաւել եւ նուազ, որպէս «Աստուծոյ քան զաստուծոյ» (Ա. Կոր. ԺԳ. 41), ասէ առաքեալ: Երկրորդ՝ ասէ Եփրեմ. «ձ. (Հարիւր) են մարտիրոսքն կատարեալ, որք վկայեցին արեամբ»: Վաթսուն՝ որք զչարչարանս եւ զհալածանս կրեցին եւ ի վախճան ոչ հասին: Երեսուն՝ որք մնացին ի հաւատս Քրիստոսի առանց հալածանաց եւ խաղաղութեամբ վախճանեցան: Երրորդ՝ կուսանքն՝ հարիւրաւոր, ողջախոհ ամուսանցեալքն՝ վաթսնաւոր: Դարձեալք ի մեղաց՝ երեսնաւոր:

Դ. Չորրորդն՝ զղջացեալքն՝ երեսնաւոր, խոստովանեալքն՝ վաթսնաւոր, ապաշխարեալքն՝ հարիւրաւոր:

Ե. Հինգերորդ՝ որ ըստ մարմնոյ չարչարին՝ երեսնաւոր: Եւ բանիւ սաղմոսեն՝ վաթսնաւոր եւ մտաւք միշտ զվերինն խորհին՝ հարիւրաւոր:

Զ. Վեցերորդ՝ աշխարհականք՝ երեսնաւոր եւ միաբան վանականք՝ վաթսնաւոր եւ ճգնաւորք յանապատս՝ հարիւրաւորք:

Է. Եւթներորդ՝ պաշտաւնեան՝ երեսնաւոր, քահանան՝ վաթսնաւոր, քահանայապետն՝ հարիւրաւոր:

Ը. Ութերորդ՝ ըստ այսմ կարգի՝ բարեպաշտ թագաւորք՝ հարիւրաւոր, իշխանք՝ վաթսնաւոր, իշխեցեալքն՝ երեսնաւոր:

Թ. Իններորդ՝ ըստ ընդհանրէ՝ հարիւրաւոր, քարոզողք՝ վաթսնաւոր, աշակերտք՝ երեսնաւոր:

Ճ. Տասներորդ՝ հաւատն՝ երեսուն, յոյսն՝ վաթսուն, սէրն՝ կատարեալ՝ հարիւր, զի մեծ է, քան զնոսա:

ՃԱ. Մետասաներորդ՝ պահքն՝ երեսնաւոր, աղաւթքն՝ վաթսնաւոր, ողորմութիւնն՝ հարիւրաւոր, որ կատարեալ առնէ զմարդ:

ՃԲ. Երկոտասաներորդ՝ կամաւոր աղքատն՝ հարիւրաւոր, ողորմածն՝ վաթսնաւոր, որ կամի զողորմութիւնն կամ բաժակ ցուրտ ջուրն տալ՝ երեսնաւոր:

ՃԳ. Երեքտասաներորդ՝ որք նախքան զաւրէնս՝ երեսնաւոր, եւ որք յաւրէնս՝ վաթսնաւոր եւ որք ընդ շնորհաւքս՝ զհարիւրաւորն:

ՃԴ. Չորեքտասաներորդ՝ երկոտասանքն՝ հարիւրաւոր, եւթանասունքն՝ վաթսնաւոր, հետեւողքն՝ երեսնաւոր:

ՃԵ. Հնգետասաներորդ՝ աստ առցեն սուրբք զերեսնաւոր՝ խնդութիւնն ի միտս եւ յետ մահու՝ զվաթսնաւորն՝ հանգիստն ի հոգիս եւ յարութեանն՝ զհարիւրաւորն՝ յարքայութեանն երկնից:

ՃԶ. Վեցտասաներորդ՝ ասեն ոմանք՝ զերկիրս սրբեալ՝ երեսնաւոր եւ զգրախտն՝ վաթսնաւոր եւ զարքայութիւնն՝ հարիւրաւոր: Եւ զայս տեղեալ իմանալ ոչ է հասարակ կարծիս, զի մի է արքայութիւնն երկնից: Իսկ թէ ըստ փառաց զանազանութեան ընդունելի է, որպէս «Աստուծոյ քան զաստուծոյ» (Ա. Կոր. ԺԳ. 41), ասէ առաքեալ:

Այսքան առ այս:

¹ Այսուհետեւ՝ .ճ.] հարիւր, .կ.] վաթսուն, .լ.] երեսուն. համապատասխանաբար՝ .ճ.աւոր] հարիւրաւոր, .կ.աւոր] վաթսնաւոր, .լ.աւոր] երեսնաւոր

ՄԵԿՆՈՒԹԻՒՆ ՍԵՐՄԱՆԱՑԱՆԻ

Յամեն[այն]է, որ լսէ զբանն [արքայութեան] (Մաթթ. ԺԳ. 19)

Այսինքն է, թէ յԱւրինաց եւ թէ յԱւետարանէն եւ այլն: Տե՛ս, զի մեր կամաւք յափշտակէ սատանայ, զի թէ ծածկեմք յաւժարութեամբ ի մեզ եւ Հանապաղ յիշատակեմք զպատուիրանսն, ոչ կարէ քաղել: Այս առաջինն:

Տե՛ս եւ զերկրորդն, զի ոչ ասաց ի փորձութեանցն ցամաքել, այլ զի ոչ ունի արմատ եւ Հիւթ, որպէս ասացան:

Տե՛ս եւ զերրորդն, զի թէ զփուշ մեծութեանն քաղեմք, այսինքն՝ տրաւք տնանկաց, ոչ Հեղձնումք: Եւ ոչ թէ մեծութիւն է չար, այլ Հոգք մեծութեանն, զի ամենայն խաբող եւ պատրանք է մեծութիւնն եւ ոչ մնացական իր:

Իսկ «հարիւր» եւ «վաթսուն» եւ «երեսուն» (ԺԳ. 8).

Ա. Նախ՝ ցուցանէ, թէ զան[ա]զանութիւն պտղոցն ոչ ի մշակէն է եւ ոչ ի սերմանցն, այլ յանձնիշխան կամացն, զի որ ոք կամի, առաւել կամ նուազ պտղաբերէ:

Բ. Դարձեալ զմարդասիրութիւն փրկչին ցուցանէ, զի բազում ճանապարհ եցոյց, զի թէ ընդ մինն ոչ կարասցեն գնալ, չլինիցին անպիտանք, ընդ միւսն գնասցեն, որպէս ասացաւ իվերոյ:

Դարձեալ գիտելի է, զի Հարիւրն կատարեալ թիւ է, զի տասամբ չափի, եւ վաթսուն կատարեալ է, զի Զ. (6) Ժ. (10)ն է, եւ երեսուն կատարեալ է, զի Գ. (3) Ժ. (10)ն է:

Արդ, երեք դասք են յեկեղեցիս, այսինքն՝ կուսանք, այրիք եւ ամուսնացեալք: Ամուսնացեալքն են երեսնաւոր, զի նոցա բաւական է Հաւատ Սուրբ Երրորդութեանն եւ Ժ.(10)բանեան աւրէնք: Եւ այրիքն՝ վաթսնաւոր, զի ընդ Ժ.(10)բանեան աւրինացն պարտ է եւ նոցա Զ. (6) ողորմութիւնն, զոր Հրամայեաց Քրիստոս. «Քաղցեա, եւ երուր ինձ ուրել» (Մաթթ. ԻԵ. 35) եւ այլ[ի]ն: Իսկ կուսանքն պարտին զԺ.(10)բանն այլ եւ զամենայն մասնաւոր խրատս եւ զկանոնս լիով կատարել:

Դարձեալ գիտելի է, զի երից ոմանց միայն է Հարիւրաւորն անփոփոխ, այսինքն՝ մարտիրոսաց, վարդապետաց եւ կուսանաց: Նախ՝ զի մարտիրոսքն կատարեալ յաղթեցին զաշխարհս, եւ կուսանք՝ զաղտեղի ցանկութիւն աշխարհիս, եւ վարդապետք՝ զսատանայ եւ զՀակոբակողքն, ոչ միայն յինքեանց, այլեւ յայլոց Հալածեցին:

Եւ դարձեալ՝ վարդապետք՝ իմացմամբն յափշտակեալ է եւ խորհի զվերինս, եւ մարտիրոսք՝ արիութեամբ սրտիւ եւ կուսանք՝ ցանկութեամբն առ Աստուած դիմեցին: Վասն որոյ եւ միայն սոքա ոսկեղէն պսակացն արժանի եղեն:

Դարձեալ դէմք առակիս Հայի եւ յանմարմին զաւրս երկնից, ըստ որում՝ սերմանահան բանն զամենայն երկնաւորացն եցոյց զինամս տեսչութեան իւրոյ: Այլ ոմանք կամաւ իւրեանց ճանապարհ եղեն չարեաց, որպէս սատանայ, եւ խստացաւ ի չարն եւ սնուցիչ եղեւ աւտար բուսոց: Իսկ այլ դասքն ետուն տոհմականս զպտուղս իւրեանց: Առաջին դասքն՝ Հարիւրաւոր, զի անմիջոց տեսանեն զԱստուած եւ ուսանին, եւ միջինքն՝ վաթսնաւոր, զի յառաջնոցն ուսանին եւ զվերջինս ուսուցանեն: Եւ վերջինքն՝ երեսնաւոր, զի միայն ուսանին միշտ: Այսքան յառաջին առակսն:

Ղուկ. Ը. 5-18

ԻԳՆԱՏԻՈՍ

Եւ ի շրջելն նորա եւ յուսուցանելն՝ ժողովեցան առ նա բազմութիւն մարդկան, առ եզր ծովուն Գալիլիացոց, եւ սկսանի խաւսել ընդ նոսա առակաւք: Վասն զի եւ այս գրեալ էր վասն նորա. «Բացից առակաւ զբերան իմ, խաւսեցայց զիմաստութիւն զծածկեալն ի սկզբանէ» (Խմմաք. Մաղմ ՏԷ. 2):

Վասն որոյ կարգէ զանձն իւր սերմանաւղ բանին: Եւ զոգիս բանաւոր եւ մտաւոր՝ երկիր, յոր սերմն անկանիցի: Եւ են ոմանք ի սոցանէ առապարք, որ ի բազմապատիկ մեղացն Հոսմանէ ողողեալ՝ գերփեցաւ թանձրութիւն իմաստից Հողոյն, եւ այնպէս մնացին ապառաժուտ: Որք թէպէտ եւ ընկալան զսերմանս բանին, սակայն զպտուղ առաքինութեան Հատուցանել սերմանողին ոչ զաւրեցին: Վասն զի ոչ ունին, որով Համբերեն տապոյ սատանայական փորձութեանցն, յորմէ տարածամ խորշակահար կորնչին: Եւ ոմանք ճանապարհ զանձինս արարին՝ գնալ ի ոտից եւ սմբակաց ախտից եւ կռեալ, պնդեալ կարծրացան՝ ախտացեալ ամբարշտութեամբ եւ ծածկեալ զսերմն բանին ոչ ունին: Եւ ի վերայ սոցա¹ վազվազակի Հասանէ թռչուն փորձութեանն, եւ քա-

¹ ԻՏ ungu վերս

ղեալ ի բաց առնու զսերմանս բանին, եւ այսպէս անշնորհ սերմանողին ցուցանին: Են եւ ոմանք յոլովութենէ աշխարհական փշոցն ցանկութեանց տեղի, որք ընկալան զբանն: Եւ զի ոչ էր հնար՝ նեղ եւ ընդարձակ ճանապարհաւ միում գնալ եւ զփուշս մեղաց, եւ զսերմանս առաքինութեան ի միում ոգւոյ սնուցանել, նորին աղագաւ եւ սոքա հեղձուցին եւ ի պտղոյ առաքինութեան պակասեալ գտան: Յուցան եւ բարիք ոմանք, որք պահեցին զանձինս ի լինելոյ ճանապարհ կամ ապառաժուտ: Նաեւ ոչ փշոց եղեն ընդունակ, այլ իբրեւ զբարի երկիր ընկալան զսերմն բանին ի բարի մշակողէն ոգւոց եւ աճեցուցին զբարեաց արդիւնս տուողին սերմանն, սակայն ոչ միով չափով ամենեքեան ցուցան, այլ զանազանեալ են: Եւ որքան աճեցուցանեն զպտուղ բարեաց, ըստ նմին սահմանեալ է նոցա յԱստուծոյ եւ պարգեւացն չափ:

Ուսուցանէ աշակերտացն միայն զառակին իմաստ եւ յայտնէ նոցա, թէ այսու զիտութեամբ ջահ վառեաց զնոսա յառատ լուսոյ անտի, զոր ինքն բնութեամբ ունէր: Եւ ոչ է աւրէն նոցա թաքուն լինել, այլ ունին նոքա ի ժամանակէ անտի իբրեւ զլոյս սաստիկ սփռել ընդ բնաւս, որ յայնժամ ի Պաղեստին ծածկեալ կային:

Առ այս երկեցուցանէ, որք զլանան զպտուղն՝ ասելով, որ ունիցի զգործս բարիս, եւս յաւելցին ի նմա սերմանք բանին: Իսկ որ ոչ կամեցաւ տալ զպտուղ բարեաց, լսելն եւս բարձցի ի նմանէ՝ ըստ այնմ. «Ամենայն ուռ, որ բերէ պտուղ, սրբէ զնա, եւ որ ոչ բերէ պտուղ, կտրէ զնա» (Խմբ. Յովհ. ԺԵ. 2):

ՍԱՐԳԻՍ ԿՈՒՆԴ

Եւ ժողովեալ բազումք ի բաղաբաց բաղաբաց եկելոց առ նա (Ղով. Ը. 4)՝ առ եզր ծովուն Գալիլեացուոց:

ՈՍԿ Որսայր եւ արկանէր ընդ ուռկանաւ զայնոսիկ, որ առ ծովուն դեգերէին: Եւ առհասարակ զամենեսին ի մի վայր գումարէր, զի մի՛ զոք ի թիկանց թողուցու: Այլ զամենեսին ի դիմաց կացուցանէ, զի զալէկոծութիւն կենցաղոյս ցամաքեցուցանիցէ:

Խաւսէր ընդ նոսա առակաւ (Ը. 4):

Ի լերինն: Թէպէտ եւ այնչափ վարդապետեաց, ո՛չ առակ յաւղեաց, զի տխմարք էին եւ ո՛չ էին կարող յայտնապէս լսել զԲանն

Քրիստոսի, իսկ աստ զպիրքն եւ փարիսացիքն ընդ նոսա էին: Բանայ առակաւ զբերանն, խաւսի զիմաստութիւն՝ ի սկզբանէ զծածկեալն:

Եւ սերմանահան (Ը. 5):

ՈՍԿ Ուստի՞ ել, որ «զերկինս եւ զերկիր ընու» (Հմմտ. Երեմ. ԻԳ. 24)՝ ըստ մարգարէին, եւ ո՛չ ի տեղոջէ ի տեղիս փոփոխի: Վասն տեսութեան եկեալ առ մեզ մարմնապատ լինելով, քանզի մեք ո՛չ կարէաք մտանել առ նա վասն մեղաց պարսպին: Ինքն իւրով զթովն եկն առ մեզ:

ԻԳ Զինքն անուանէ սերմանող Բանին եւ զհոգիս մարդկան մտաւոր երկիր, յոր սերմ[ն] անկանիցի:

Եւ ի սերմանելն՝ ոմն անկաւ առ ճանապարհաւն եւ եղել կոխան (Ը. 5):

ԵՓ Ոգիք զրկողացն որպէս այն, որ զմին քանքարն էառ եւ անարգեաց զբարեբար տուիչն: Զի ո՛չ կակղացաւ ընդունել զսերմն Բանի նորա եւ եղել կոխան ամենայն չարեաց: Վասն այսորիկ ո՛չ եղել երկիր նորա տեղի վարդապետին, որ մշակէր արաւրով Բանին՝ պատառել զխստութիւն նորա եւ սերմանել ի նմա զուսումն աստուածային:

Եւ թռչունք երկնից կերան զնա (Ը. 5):

ԵՓ Զչարն անուանեաց թռչուն, զի ո՛չ բռնութեամբ յափշտակեաց զվարդապետութիւն ի լսելեաց նորա: Զի եցոյց զաւրինակն զի աւետարանին ձայնն ի դուրս լսելեացն մերձ էր, որպէս հատ ցորենոյն ի վերայ երկրի: Նա ո՛չ կամեցաւ ծածկել յարգանդ սրտի իւրոյ զսերմանիսն, որ անկաւ ի նմա, եւ ետ թռչնոց մուտ՝ անփոփել ի ներքոյ թեւոց իւրոց:

Եւ այլն անկաւ ի վերայ ապառաժի (Ը. 6):

Բարեբարն զգթութիւն իւր եցոյց ողորմութեան: Զի թէպէտ եւ ո՛չ էր գործել զխստութիւն երկրի նորա, սակայն ո՛չ խնայեաց ի նմա զսերմն իւր: Այնոքիկ են, որ դառնան յաշակերտութենէ նորա, եւ իբրեւ զայնոսիկ, որ ասացին. «Խի՛ստ է բանդ, ո՞ կարէ լսել

դմա» (Յովհ. Զ. 61): *Նման Յուդայի, զի լուաւ նմա եւ եղեւ ապառաժուտ, եւ ի ժամանակի փորձութեանն եղեւ անպտուղ:*

ՈՍԿ Բայց բանաւոր երկրի[ն] Հնար է քարին երկիր պարարտ լինել:

Եւ այլն անկաւ ի մէջ փշոցն (Ը. 7):

ԵՓ Զգալութիւն իւր փշոցն եւ տատակացն ետ: *Եւ փուշն թագաւորեաց առատապէս, զի եղիցի նա անպատասխանի: Եկն մեծատունն առ Տէրն մեր՝ ցուցանելով զվարսն ի մանկութենէ: Եւ Տէր սրբեաց զփուշն ի սերմանեացն՝ ասելով. «Եթէ կամիս կապարեալ լինել, քոնր զինչս քո աղքատաց» (Մարկ. Ժ. 21): Եւ նա, իբրեւ ետես զսերմն ի փշոցն հեղձուցչացն ազատեալ, տրտմեցաւ վասն մեծութեանն մերկանալոյ, որ փուշ ապականիչ աստուածային սերմանն էր, եւ փշաբեր երկրին պարտ էր լինել սերման տեղոյն:*

Եւ այլն անկաւ յերկիր բարի եւ պարարտ (Ը. 8):

ՍՏ Հոգիք արդարագործաց նման կոչեցելոցն, որ թողին զամենայն ինչս իւրեանց եւ գնացին զհետ Քրիստոսի:

Իսկ երեսնաւորն (հմմտ. Մաթթ. ԺԳ. 23):

ՈՍԿ Նշանակէ զ[ը]նթացս ի մանկութենէ յերիտասարդութիւն եւ յերիտասարդութենէ ի ծերութիւն: *Արդ՝ սերմանահանն մի էր եւ երկիրն մի, եւ արմտիքն ի չորս բարձանեցան: Սակայն բարերարն եցոյց զքաղցրութիւն իւր, զի յետինքն ընդ առաջինսն զվարձս հաւասար առին (տրն՝ Մաթթ. Ի. 16): Այլ սոքա այնոքիկ են, որ ընտրեցան յաշակերտութիւն Քրիստոսի, եւ ժամանակ հալածանաց ո՛չ յարեաւ ի վերայ, եւ բարիոք վաստակաւք իւրեանց պսակեցան եւ իբրեւ զերկիր պտղաւք զարդարեցան:*

Իսկ վաթսնաւորքն (հմմտ. Մաթթ. ԺԳ. 23):

Այնոքիկ են, որ կոչեցան ի չարչարանք վասն Աստուծոյ մարտիրոսութեամբ: Եւ ո՛չ ժամանեցին փոխանակ Տեսուն մեռանել, այլ կացին մնացին բարիոք մինչեւ ի վախճանն:

Իսկ հարիւրաւորն (հմմտ. Ը. 8, Մաթթ. ԺԳ. 23):

ՍՏ Թուի ինձ, թէ կատարումն է ամենայն ընտրութեան եւ կնիք, վկայ լինել վասն Քրիստոսի եւ մեռանել:

Նարցին ցնա աշակերտքն եւ ասեն. Ընդէ՞ր խասիս ընդ նոսա առակաւք (հմմտ. Ը. 9):

Ոկ. *Արժան է զարմանալ ընդ աշակերտսն, եթէ զիա՞րդ ցանկային ուսանել եւ ի դէպ ժամանակի հարցանել: Եւ ո՛չ առաջի ամենեցուն զայն առնէին: Եւ զայս Մարկոս յայտ առնէ, թէ մատեան առանձինն (հմմտ. Մարկ. Զ. 32): Այսպէս պարտ էր մաւրն եւ եղբարցն առնել:*

Աւէ. Զեզ փուել է գիրել զխորհուրդս արքայութեանն երկնից, եւ նոցա չէ փու[եալ] (Ը. 10):

Զայս ասելով՝ ո՛չ եթէ հարկ ինչ կամ վիճակ մուծանէ, այլ զնոսա առնէ պատճառս բարեացն եւ չարեաց[ն]: Եւ ցուցանէ, թէ շնորհք են ի վերուստ տուեալ, բաց ո՛չ զանձնիշխանութիւն խափանէ: Եւ այս ի յաջորդացն յայտ է:

Զի փեսցեն եւ ոչ փեսցեն (Ը. 10):

Ո՛չ եթէ բնութեամբ էր կուրութիւն նոցա, այլ կամաւ ո՛չ տեսանէին: Եւ զի յայտ է, զի յանձնիշխան կամս էր կուրութիւն նոցա, քանզի տեսանէին զդեւս հանեալ եւ ասէին, թէ՛ «Բէեղգերեղա հաւնէ դա» (Ղուկ. ԺԱ. 15, 18):

Լսելով լուիցեն եւ մի՛ իմասցին (Ը. 10):

Լսէին, զի Աստուած մերձեցուցանէր զնոսա եւ բազում միաբանութիւն ցուցանէր զիւրն ընդ Հաւր: Եւ նոքա ասէին. «Ո՛չ է զա յԱստուծոյ» (Յովհ. Թ. 16): Տեսանե՞ս, զի զմարգարէն կոչէ յամբաստանութիւն նոցա, զի անձնիշխանութեամբ զաչս եւ զականջս կափուցին:

Ո՛չ որ լուցանէ ճրագ եւ թաքուցանէ ընդ կարասեալ (Ը. 16):

ՍՏ Ո՛չ յաղագս երեւելի ճրագին ասէ զայն, այլ վասն իմանալոյն եւ ուղիղ վարդապետութեանն, որ ոչն ծածկի անաւթիւք իւրիք կամ ի ներքոյ մարմնոյ «կամ ընդ մահճաւք» (Ը. 16): *Այսոքիկ են մարմինք մարդկան՝ լսողք Բանին վարդապետութեան ճշմարիտ լուսոյն Քրիստոսի:*

Այլ ի վերայ աշտանակի փան (Ը. 16):

Որպէս անաւթ տան եւ աշտանակ, նոյնպէս եւ հոգւոյն զաւրու-
թիւնն եւ մարմնոյն:

Իգ. Կամ որպէս ջահ վառեալ զառաքեալսն յիւր լուսոյն:

Զի որպէս չիք ինչ ի ծածուկ, որ ո՛չ յայտնեսցի (Ը. 17):

Եւ ո՛չ է աւրէն նոցա թաքուն լինել: Այլ որպէս զլոյս սփռեալ
ընդ բնաւ աշխարհս, որ յայնժամ ընդ Պաղեստին ծածկեալ էին:

Զի ոյր գուցէ, փացի նմա եւ յաւելցի (Ը. 18):

Սփ. Որպէս զի ասիցէ, թէ՛ «Որ ունի զճրագն եւ լինէ լուսով ի
վերայ աշտանակի, տացի նմա գաղտնին եւ յայտնին» (հմմտ. Առկ.
ԺԱ. 33): Բայց որ ունիցի զսերմն բարի՝ զհոգին բարին, որ սերմանե-
ցաւ ի նմա: Եւ ամենայն տունկ, զոր տնկեաց Հայր Տեառն մերոյ՝
աստուածային վարդապետութիւնն, զի ամենայն, որ զհաճոյսն
Աստուծոյ առնէ, յայնպիսի տունկ յաւելցի:

Եւ ոյր ոչն գուցէ, զոր ունիցի, բարձցի ի նմանէ (Ը. 18):

Քանզի ո՛չ իբրեւ յԱստուծոյ ինչ բառնալով, այլ նա զանձն ո՛չ
արար արժանի:

«Ամենայն տունկ, զոր ո՛չ տնկեաց Հայր իմ երկնաւոր, խլէ»
(Մաթթ. ԺԵ. 13):

Իգ. Այլ ընդ[դ]իմակաց Հոգին բարձցի ի նմանէն:

Իսկ որ ոչ կամեցաւ լսել եւ տալ զպտուղ բարեաց, ըստ գրեցե-
լոյն՝ «Ամենայն ուռ, որ ո՛չ բերէ պտուղ բարի, կտրէ զնա» (Յովհ.
ԺԵ. 2):



ՎԱՍՆ ՈՐՈՄԱՆՅ ԱՌԱՎԿԻՆ

Մաթթ. ԺԳ. 24-30

ՍՏԵՓԱՆՈՍ ՍԻՒՆԵՅԻ

Այլ առակ եղ առաջի նոցայ՝ ասելով. «Նման է արքայութիւնն
երկնից մարդոյ, որ սերմանեաց սերմն բարի յանդաստանի իւ-
րում, իսկ ի ննջել մարդկան՝ եկն թշնամի նորա եւ սերմանել որոմն
ի մէջ ցորենոյն եւ գնաց (հմմտ. Մաթթ. ԺԳ. 24-25):

«Սերմանողն»՝ Աստուած ամենայն բարւոյ եւ արդարու-
թեան մարդկան, «անդաստան»՝ աշխարհս եւ ննջեալ մարդիկ,
որք ծուլանան եւ անփոյթ առնեն զհրամանէն Աստուծոյ. «թշնա-
մի» է Աստուծոյ բանասրկուն, «ցորեան»՝ արդարութեան պտուղ,
«որոմն»՝ անիրաւութիւնն, իսկ «թողուլն» եւ «ոչ փետելն զորոմնն
մինչեւ զհունձսն»՝ երկուս թուի ինչ նշանակել ինձ, կա՛մ ի ժողո-
վել զորոմնն հնձողացն հրեշտակաց, եւ այլոց զաւրութեանց խլիլ
եւ ցորենոյն՝ յաղագս անգիտութեան եւ զի անգիտանան յայտ-
նի մարդարէէն Եզեկիէլէ. «Յորս, - ասէ, - նշան իցէ նոսայ, մի՛ մերձենայ-
ցէք» (հմմտ. Եզեկ. Թ. 6). եւ յելիցն, ի տալ հրաման զսեմս երբա[յ]ե-
ցիոցն նշանակել արեամբն, զի մի՛ մտցէ անդ սատակիչն (տես Ելք
ԺԲ. 12, 23). արդ կա՛մ վասն այդորիկ ասացաւ՝ թողի կացցէ մինչեւ ի
հունձս կամ ցվախճան որոմանն. եթէ ոչ փոփոխեցի եւ լինիցի ցո-
րեան, ապա ի վախճանի աշխարհիս այսորիկ այրեսցի անշէջ հրովն
որոմնն, եւ ցորեանն ժողովեցի յիշտեմարանս իւր:

ԱՐԻՍՏԱՎԷՍ ԵՒ ԵՓՐԵՄ

Այլ միւս եւս առակ երկրագործին. զբարի ոք սերմն սերմանել
յազարակին, յորում եւ ի քուն լինելն նորա չար որոմանցն սերմա-
նողն զիւրն ցանէ (հմմտ. Մաթթ. ԺԳ. 24-25):

Աստ զհերձուածողացն զժողովսն յառաջագոյն ասէ, եւ աստ
իսկ սատանայի խարդախութեանն գործէ. միշտ ընդդէմ ճշմար-
տութեանն զմոլորութիւնն ճակատել: Բազում կերպարանս նմին
նման գունաւորեալ՝ առ ի դիւրաւ գողանալ զայնոսիկ, որք վաղ-

վազակի պարտիցին: Վասն այնորիկ ոչ այլ ինչ սերմն սերմանեաց, այլ զորոմն, եւ որ նման իսկ էր ցորենոյն: Ապայ ասէ զկերպարանս վնասակարութեանն, թէ յորժամ ի քուն եղեն մարդիքն, որ ոչ սակաւ ինչ վտանգ տագնապի, կախէ զպարանոցէ իշխանաց, որոց հաւատացեալ իցեն պահպանութիւնք անդաստանաց. ոչ միայն իշխանաց, այլ եւ նոցա, որի իշխանութեամբ իցեն: Յայտ առնէ եւ զմոլորութիւնն ընթերակաց ճշմարտութեանն, որպէս զի ելք իսկ իրացն վկայեն, զի եւ առ մարգարէիւքն սուտ մարգարէք էին, եւ առաքելաւքն՝ սուտ առաքելալք, եւ յետ Քրիստոսի դերաքրիստոսն¹, այսինքն՝ նեռն, հակառակ Քրիստոսի, զի թէ ոչ տեսանիցէ, ո՞ւմ լինիցի նմանող սատանայ եւ կամ ումէք վնասակար, եւ զի ոչ զիտէ, ոչ ժտի: Բայց այժմ, քանզի գիտաց, թէ ոմն զՃ.(100)աւոր տոհմականս արար եւ ոմն զԿ.(60)աւոր եւ ոմն՝ զԼ.(30)նաւորն, ապայ ընդ այլ ճանապարհ գայ գաղտագողի: Վասն որոյ եւ հանապազորդ իսկ զգուշութեան պետք են, քանզի այսպիսի [ի]նչ եղեւ զառաջինն, զի բազումք յառաջնորդաց զմարտս անաւրէնս յայլ աղանդաց մուծին յեկեղեցի գաղտագողի եւ բազում պատճառս ետուն վնասակարութեան չարի: Վասն այնորիկ յետ գործելոյ զյանդսն եւ ոչ իւրիք պակաս գտանելոյ, «ապայ ցանէ ի վերայ սերմանն զորոմն» (հմմտ. ԺԳ. 25), զոր աւրինակ եւ հերձուածողքն՝ ոչ վասն այլ իրիք, այլ վասն սնապարծութեան արկանեն զիւրեանց թիւնսն, զոր եւ յաջորդաւքն իսկ յայտ առնէ:

Յորժամ արձակեաց զրոյսն եւ արար պարուղ, ապայ երեւեցաւ եւ որոմն (հմմտ. ԺԳ. 26):

Որպէս եւ հերձուածողքն, որ զառաջինն թագուցանեն զյանձինս, եւ յորժամ համարձակիցին եւ մեծարանաց արժանի լինիցին, յայնժամ հեղուն զթիւնսն: Եւ զի՞ բերիցէ զճառս ծառայիցն ի մէջ, որ չարացան ընդ բոյս որոմանցն, եւ զի՞ ասիցէ, թէ՛ չէ պարտ զնոսա ի միջոյ բառնալ (հմմտ. ԺԳ. 29):

«Թշնամի» գնա կոչէ (ԺԳ. 28) աստ վասն մարդկան վնաս առնելոյ, զի զմեղանչականութիւնն ի մեզ ցուցանէ, եւ սկիզբն մեղանչականութեանն ոչ յայնմանէ է, զի մեզն մեղանչէ, այլ զի ընդ Աստուծոյ կամացն իշխեաց կացուցանել թշնամութիւն:

¹ Բ անդիքրիստոս] դերաքրիստոս

Մաքուցեալ ծառայքն ասեն՝ «Տէ՛ր, կամիս, զի երթիցուք, խլեսցուք զայն ի բաց (հմմտ. ԺԳ. 29):

Աստ զծառայիցն զփոյթ եւ զխնամակայութիւնն ցուցանէ, որ կարի իսկ դարման տանելոյ նորա սերմանն էր:

«Միգուցէ,- ասէ,- զցորեանն ընդ նմին ի բաց խլիցէք» (հմմտ. ԺԳ. 29):

Ջայս ասէ, զի զպատերազմունս եւ զարիւնս եւ զսպանութիւնս կարճեսցէ: Երկուք մտաւք արգելոյր զնոսա. մի՛ զի ցորենոյն ինչ ոչ մեղանչիցեն, երկրորդ՝ զի կրելոց են զանհնարին զպատիժս, որ առանց բժկութեան ցաւս աղիտանայցեն: Եւ զի՞նչ յայտ առնիցէ այն, թէ՛ «գուցէ զցորեանն ի բաց խլիցէք», զի թէ զէն կամիցէք կոտորել զհերետիկոսս, հարկ լինիցի եւ ի սրբոցն զբազումս ընդ նոսա կոտորել, կամ թէ անդստին որոմանցն բազումք են դառնալոց լինել ցորեան: Եթէ յառաջագոյն զնոսա ասէ՛ «խլիցէք», ապականիցէք զայնոսիկ, որ ցորեան լինելոց են, զի մարթի դառնալ եւ լինել¹ պիտանացու, թէ կամիցին, ապա թէ նոյնն մնայցեն, մինչ ցվախճան որոմն, ապայ ասացից ցհնձողսն².

«Կապեցէ՛ք զորոմնդ ի³ խրձունս առ ի յայրել» (ԺԳ. 30):

Դարձեալ յիշեցուցանէ նոցա զՅով[հ]աննու զբանսն, որք դատաւոր կացուցանեն զնայ, մինչ մաւտ ի ցորեանն կայցէ որոմն, խնայել պարտ է ի նոսա, զի մարթի ցորեան դառնալ: Եւ յորժամ ոչինչ շահեալ գնայցէ սնտոի, յայն ժամ ի հարկէ իսկ անհրաժեշտ պատիժքն ընդունիցին զնա, զի մի կարծիցեն, թէ եւ ցորեանն, ընդ նմին⁴ կապիցի խրձունս ի նիւթ հրոյ: Ասէ.

«Զցորեանն ժողովեցէք ի⁵ շտամարանս իմ» (ԺԳ. 30):

¹ Ա ի լինել
² Ա զհնձողսն
³ Ա > զորոմնդ ի
⁴ Ա > ընդ նմին
⁵ Ա յի] ի

ՅՈՎՀԱՆՆԷՍ ԾՈՐԾՈՐԵՑԻ

Այլ առակ արկ առ նոսա եւ ասէ: Նմանեցաւ արքայութիւնն երկնից առն, որ սերմանիցէ սերմն բարի յագարակի իւրում (Մաթթ. ԺԳ. 24):

Նախ՝ երեւելիքս ծանաւթ քարոզք եւն աներեւութիցն՝ ըստ առաքելոյ (Կրէստոս. Ա. 20), վասն այսորիկ ընդել եւ զգալի աւրինակաւք զիմանալիսն տպաւորէ՝ նման եւ յարմար բազմատուութեամբ:

Նմանեցաւ արքայութիւնն երկնից առն: «Այր» յաղագս ներգործական զաւրութեանն զԱստուած անուանէ՝ զսերմանաւղն ամենայն բարեաց յանդաստան աշխարհի բանական բնութեանս, որ իւր է ագարակ՝ ստեղծուածք եւ գործք ձեռաց, որով ծանուցանէ, թէ Աստուած բարի է բնութեամբ եւ բարեաց պարգեւաւղ, չարի եւ ո՛չ իմիք՝ ըստ այնմ, թէ՛ «Բարի է Իսրայէլի Աստուած» (Մաթթ. ՆԲ. 1), եւ թէ՛ «Արար զամենայն, եւ ահա բարի են» (հմմտ. Ծննդ. Ա. 31): Բայց ո՛չ զամենայն բարեացն մասունս ետ գործով, այլ զսե՛րմն միայն զաւրութեամբ ի մեզ տնկելով, որպէս զի պատուիրանացն, որ ետ մեզ յետոյ, նորին զաւրութեամբ գործոց յառաջագոյն առաք, զի կատարեսցուք եւ մի պակաս ցուցցուք առաւղք զբարիս, քան զտուողին սերմանիս: Եւ երկրորդ՝ զհերձուածողացն ժողովս յառաջագոյն ազգէ եւ «այր» զինքն անուանէ՝ կատարեալ աստուածութեամբ եւ մարդկութեամբ մարդն Յիսուս Քրիստոս արքայն երկնից եկեղեցւոյ, որ սերմանեաց զսերմն ուղղափառ Հաւատոյ յագարակ եկեղեցւոյ, զոր ստացաւ անբիծ եւ անարատ արեամբն իւրով՝ ըստ այնմ. «Դու ես վե՛ն» Հանդերձ դաւանութեամբդ, «եւ ի վերայ այդր վիմի շինեցից զեկեղեցի իմ» (Մաթթ. ԺԶ. 18):

Եւ ի քուն լինել մարդկան՝ եկն թշնամի նորա եւ ցանեաց ի վերայ որոմն ի մէջ ցորենոյն եւ գնաց (ԺԳ. 25):

Ի ննջել մարդկային բնութեանս ծուլութեամբ՝ եկն բանասարկուն, որ թշնամի Աստուծոյ է եւ ասի, եւ խառնեաց զմեղս ի մէջ բարեացն՝ գունելով եւ բարւոյն կերպարանաւք զչարն, որով պատրեաց, եւ գնաց ծածկեաց զանձն, որպէս թէ չէ բնաւին ինքն պատճառ մեղացն: Եւ այս ե՞րբ. ոչ յառաջագոյն, այլ յորժամ ետես, թէ պտուղս բեղմնաւորս ցուցին, ոմն՝ հարիւր եւ ոմն՝ վաթսուն եւ ոմն՝ երեսուն, քանզի ո՛չ անդ ժտի, որ ոչ են բարեաւք փարթամա-

ցեալ, բայց ասիցէ որ, թէ որք ննջեցին, զի՞նչ ընդհատ է յառաջնոցն, որք յապառածին կամ ի ճանապարհին սերմանեցան: Ասասցուք բազում իրաւք, զի նոքա անդէն ի սկզբանն յափշտակեցան՝ չեւ եւս արմատս հաստատեալ, բայց ըստ բազում մեքենայիւք ջանացաւ խանգարել, որով խրատիմք, թէ միշտ զգուշութեան պէտք են արթուն լինել, զի մի՛ յորոմանցն ապականիցիմք:

Եւ դարձեալ՝ տազնապ կախէ այսու զպարանոցէ իշխանացն, որոց հաւատացեալ իցեն զպահպանութիւն անդաստանաց, նաեւ հնազանդելոցն՝ ըստ այնմ. «Արածեա զոչխարսդ իմ» (Յովի. ԻԱ. 16), եւ թէ՛ «Արածեցէք որ ի ձեզ զհաւարսդ» (Ա. Պետ. Ե. 2), եւ թէ՛ «Նոքա փքնին վասն ոգոց ձերոց» (Եբր. ԺԳ. 17), որք դատարկացեալ ի գործոց եւ [յ]անփոյթ առնելոյ զհաւարից, որպէս հովիւք հնոյ ժողովարանին, խարդախանաւք թշնամին եմոյժ աղանդ հերձուածողաւք յեկեղեցի: «Զորոմն» ասաց ընդդէմ ճշմարտութեանն, որպէս զսուտ մարգարէսն եւ զսուտ առաքեալսն եւ զգերաքրիստոսն հակառակ Քրիստոսի, այսպէս եւ զհերձուածողսն ներհակ վարդապետաց, բայց ո՛չ ի բռնութենէ, այլ ի հովուացն անգործութենէ, որք սպրդեալ զաղտագողի գործմն անիրաւ հերձուածոյն ցանեցին ի մէջ ուղղափառ սերման հաւատոյն: Քանզի ո՛չ զայլ ինչ սերմն մեղաց եւ կամ չար գործոց, այլ գործո՛մն, որ նման էր ցորենոյն, զչարափառութիւն սնափառ ախտիւ վարակեալ. եւ ինքեանք բարձեալ ի կենաց գնացին, բայց աղանդն մնաց յեկեղեցի ի յիշատակ չարեաց նոցին:

Եւ իբրեւ բուսաւ խոփն եւ արար պտուղ, ապա երեւեցաւ եւ որոմն (ԺԳ. 26):

Յիրաւի յաճման հասակին եւ ի կատարեալ զգայութեանցն ախտ չարութեանն գործոց, ցանկութեամբն հանդերձ, երեւի խլրտալով ի մարմինն: Եւ դարձեալ՝ հերձուածաւղքն զառաջինն թագուցանէին զանձինս եւ յորժամ մեծարանաց արժանի լինէին եւ փառս ընդունէին, քանզի այս է «խոփն», յայնժամ համարձակեալ՝ զթոյնս հեղուին:

Մաքուցեալ ծառայք փանուրեառնն ասեն ցնա. «Տէ՛ր, ո՛չ սերմն բարի սերմանեցեր յագարակին քում, արդ ուսփի՛ ունիցի զորոմն» (ԺԳ. 27):

Աստ զխնամակալութիւն սրբոց հրեշտակացն նշանակէ, միանգամայն եւ վկայս ցուցանէ աստուածութեանն, զի զբարին սերմանեաց յազարակի աշխարհի, եւ առ այսու եւ զայն եւս, թէ ուսման են կարաւտ եւ սիրաւորք: Եւ դարձեալ՝ առաքելոցն է ասացուածս, որք ի տանէ Տեառն եկեղեցւոյ ուսեալ զհաւատս ուղղափառս՝ սերմանեցին յեկեղեցի, ուստի եւ զնեռինն ծանեան իրս եւ ծանուցին յառնել ի վերջին ժամանակին:

Եւ նա ասէ ցնոսա. «Այր թշնամի արար զայն» (ԺԳ. 28):

Յուցանէ, թէ ո՛չ է Աստուծոյ, այլ այլոց ումեմն թշնամւո՛յ արարուած չարութիւն, եւ ճշմարտապէս թշնամի ո՛չ միայն բնութեանս, այլեւ Աստուծոյ, քանզի սկիզբն զրժութեանն ո՛չ յայնմանէ ինչ է, զի ի մեզն մեղանչեաց, այլ զի եւ կամացն Աստուծոյ հակառակել իշխեաց: Եւ դարձեալ՝ յայտնապէս զհերձուածաւղսն «թշնամի» ասէ, զի որք սուտ խաւսեցան՝ խաբեալք յարգանդէ եւ աւտարացեալք ի մաւրէ աւազանէ, թշնամիք են Աստուծոյ, զի զուղիղ բանն խաթարեալ եղծին եւ զչար հերձուածս հաստատեցին:

Ասնն ցնա ծառայքն. «Կամի՛ս, զի երթիցուք քաղեսցուք զայն ի բաց» (ԺԳ. 28):

Ո՛վ երանելի հպատակութեան ծառայիցն, զի ո՛չ վայրապար հայցէին հրաման, այլ զկամացն պէտս կատարէին, քանզի թէպէտ հոգիք են հարկաւորք ի սպասաւորութիւն առաքեալք (Կրն՝ Եբր. Ա. 14), բայց ո՛չ առանց կամացն Աստուծոյ ներգործեն ինչ՝ ըստ մարգարէին (Կրն՝ Սաղմ. ճԲ. 20): Միանգամայն եւ զտաղտկալն նոցա ի չարեացն նշանակէ, որ եւ հայցեն, զի սուրբ սերմանքն ոչ կորնչիցին, եւ որոմունքն ըստ արժանեացն դատիցին: Եւ դարձեալ՝ արդարոց աղաւթիւք ոչ բառնայ Աստուած զաղանդ չարափառացն, որպէս յորժամ ասէին. «Կամի՛ս, զի իջուցուք հուր», եւ նա ասէ՝ ո՛չ (հմմտ. Դուկ. Թ. 54), որպէս եւ ոչ զսատանայ եւ կամ զցանկութիւնս ի մարմնոց եւ զհալածիչս յաշխարհէ, զի փորձքն երեւեցին, եւ աղանդասարքն իրաւամբք պատուհասեցին, զայնքան ժամանակս տեղի տուեալ զղջման, եւ նորա ոչ ապաշխարեցին, որպէս եւ ի հնումն ասէր. «Ո՛չ ի միում ամի բնորձից զազգն, զի մի՛ գազանքն բազմացին» (հմմտ. Ելք ԻԳ. 29):

Եւ նա ասէ ցնոսա. «Մի՛ գուցէ մինչ քաղիցէք զորոմն, եւ զցորեանն ընդ նմին ի բաց խլիցէք» (ԺԳ. 29):

Նախ հրաժարեցուցանէ, զի խափանելով զփորձութիւն զիւաց՝ դադարէ եւ բարեգործութիւնն, զի յաղագս մարտի աւգային այսոցդ՝ զաւրանան ճգունք բարեպաշտիցն, եւ հանդիսանան գործք արգասաւորք ընդդէմ չարին: Եւ երկրորդ՝ զսպանութիւնսն կարճէ այսու. մի՛ զի մի՛ ցորենոյն մեղանչիցեն եւ միւս՝ զի կրելոց են որոմունքն զանհնարին պատիժս, որք զանբժշկելին ախտացան, զի թէ՛ զէնս կազմիցէք, ասէ, կոտորել զհերետիկոսս, կամ բառնալ զհալածիչս, հարկ լինի եւ զոմանս ի սրբոցն ընդ նոսա կոտորել:

Թոյլ փուր երկոցունց աճել ի միասին մինչեւ ի հունձս (ԺԳ. 30):

Անսասջիք, ասէ, դէպ ժամանակի, զի բազումք ի նոցանէ ցորեան լինելոց են, որ այժմ որոմունքն են, զի մարթ է դառնալ եւ լինել պիտանացուս, եթէ կամիցին: Իսկ զի՛նչ այն, թէ՛ «երկոցունց աճել ի միասին», այսինքն՝ կատարիլ բարեացն բարեաւք իւրեանց եւ չարեացն չարեաւք իւրեանց, կամ միմեանց պիտոյանան ի կենցաղս, որպէս հատ ցորենոյ՝ փեճեկին իւրոյ: Բայց քանզի կամի խլել զորոմունսն, սակայն վասն անգիտութեան հնձողացն այժմ ոչ կամի: Ուստի՞ ասացեալ է արդեաւք, թէ՛ հրեշտակք ոչ գիտեն զտանջանաց արժանիսն. ասացուք՝ ո՛չ, յայտ ի մարգարէութենէ՛ն է. «Յորոյ վերայ նշանն է,- ասէ,- մի՛ մերձենայցէք» (Եզեկ. Թ. 6), եւ յիւսն Եգիպտոսի, զսեմս դրանց երբայիցւոց աւձանել ետ արեամբ (Կրն՝ Ելք ԺԲ. 21-23), զի մի՛ մտցէ սատակիչն, քանզի յորժամ յայտնէ եւ զոր յայտնէ՝ զայն գիտեն, որպէս ասելոց է, թէ՛ «Ասացից ցհնձաւղսն ի կատարածի»: Եւ թէ՛ ասէ ոք՝ ընդէ՞ր ոչ այժմ յայտնէ, նախ՝ որպէս ասացաւ, զի զղջացին, եւ երկրորդ՝ զի ուսուցէ, թէ՛ ո՛չ ամենցունց վրէժխնդրութիւնն աստ է, այլ մասնաւորաց՝ ի խրատ այլոց, այլ անդ բնաւից կատարեալն հատուցմունք:

Եւ ի ժամանակի հնձոց ասացից զհնձաւղսն. «Քաղեցէք նախ զորոմնդ եւ կապեցէք զայդ խրձունս առ ի յայրել, եւ զցորեանն ժողովեցէք ի շքեմարանս իմ (ԺԳ. 30):

Յայտնապէս զինքն դատաւոր գոլ ցուցանէ՝ ըստ Յօհաննու ձայնին (Կրն՝ Մարթ. Գ. 12), եւ Տէր փառաց եւ տանջանաց, բայց «ժամանակ հնձոց» կամ զիւրաքանչիւր ելս մահուն ասէ եւ զպատու-

Հասին ժամանակն, յորում լրացեալ մեղաւք տանջին ի հրեշտակաց տանջողաց՝ ըստ այնմ. «Առաքեաց ի նոսա փանջանս ի ձեռն հրեշտակի չարի» (Մաղմ. ՆԷ. 49), եւ կամ՝ զկատարած աշխարհիս՝ որպես ինքն ասէ (տե՛ս Մատթ. ԺԳ. 39), որք քաղեն զորոմունսն յաւուր նեռինն, իբր այն՝ «Ո քաղէ զոգիս իշխանաց» (Մաղմ. ՆԵ. 13): Եւ դարձեալ՝ քաղեն ի նոցանէ զմասնաւոր բարութիւնս, որպէս զի ամենեւին այրելիքն մնասցեն, եւ կապեն խրճունս զցաւդունսն առ ի յայրել յաւիտեանական գեհեանն՝ ըստ այնմ. «Կապեցէ՛ք զդորս ձեռս եւ զոտս» (Մաթթ. ԻԲ. 13), եւ թէ՛ «Ի գործս ձեռաց իրեանց կապեցին մեղաւորք» (Մաղմ. Թ. 17), այսինքն՝ անգերծանելի դոլ ի տանջանսն՝ իբր զկապեալ շղթայիւ համագումար ի միասին ըստ խրճան աւրինի, քանզի մինչ ի ցորեանն իցէ որոմն, խնայել պարտ է, զի թերեւս դարձցի եւ զի մի՛ կոխիցի ցորեանն, իսկ յորժամ անգեղջ մնայցէ եւ քաղիցի, այնուհետեւ ո՛չ ունիցի անխայումն:

Բայց ընդէ՞ր նախ զորոմն առաջին. զի մի՛ կարծիցեն, թէ եւ ցորեանն ընդ նոսին ժողովիցի. վասն որոյ եւ ասէ, թէ՛ «եւ զցորեանն ժողովեցէ ի շրեմարանս իս»՝ յարքայութիւնն վերին, որ պատրաստեալ է ի սկզբանէ նոցին, որք հաց սուրբ գտան եւ կերակուր Աստուծոյ եւ մարդկան եղեն: Եւ երկրորդ՝ զի ըստ կարգի այնպէս հանդիպելոց է, զի նախ մեղաւորք յայրումն առաքին եւ ապա արդարքն նման Տեառն փառաւորին: Լսի եւ այսպէս, թէ՛ բարձէք զմեղսն յաշխարհէ եւ կապեցէք ի գլուխս սատանայի, որ պատճառ եղեւ նորին՝ բորբոքիլ հրով գեհեանն՝ ըստ այնմ. «Պակասեցին մեղաւորք յերկրէ, եւ ամբարիշտք մի՛ եւս գրցին ի նմա» (Մաղմ. ԸԳ. 35), եւ արդարքն զերծեալք ի պատրանաց նորա՝ ժողովին ընդ հրեշտակս եւ աւրհնեն զԱստուած յաւիտեան:



ՄԵԿՆՈՒԹԻՒՆ ԱՌԱՎԵՐՆ ՈՐՈՄԱՆՑ

Մաթթ. ԺԳ. 36-43, 51-52

ՍՏԵՓԱՆՈՍ ՍԻՆԵՅԻ

Յայնժամ թողեալ զամբոխն եկն ի փուն (հմմտ. Մաթթ. ԺԳ. 36):

«Տուն» Յիսուսի է զիտութիւն բազմացեալ, որ յԱւետարանսն ասացեալ է, վասն նորայ զի՛նչ խաւսեցաւ եւ կամ զի՛նչ գործեաց:

Որ սերմանէ է Որդի մարդոյ զսերմն բարի. եւ ազարակն աշխարհս է, բարի սերմ՝ որդիք արքայութեանն (հմմտ. ԺԳ. 37-38):

Որք ընկալան զսերմ բարի վարդապետութիւնն՝ Քրիստոսի, եղեն «բարի սերմանք»՝ որդիք արքայութեանն Աստուծոյ: Իսկ որք ընկալան զվարդապետութիւնն չարին եւ ի բաց ընկեցին զսերմն Քրիստոսի, սոք[ա] եղեն որդիք չարին՝ «որոմն» գեհեանն հրոյ. թագաւորութիւնն Քրիստոսի «եկեղեցի» է եւ բանք աստուածայինք. ուստի զայթազողութիւնք, այսինքն՝ այլ աղանդք, որ առնեն զանաւրէնութիւն, ժողովեսցին եւ անկցին ի հնոց հրոյն:

Անդ [եղիցի] լալ եւ կրճել արամանց (ԺԳ. 42):

Հոգի իւրոյ կերակրոյն զործոց բարեաց, եւ ճշմարիտ զիտութեան մանրաւղ եւ ծամաւղ, սա ի ժամանակի յանդիմանութեանն գտեալ արհամարհաւղ զործոց բարեաց եւ ճշմարիտ զիտութեան ի նոյն ի ճշմարիտ զիտութենէն յանդիմանեալ «կրճարել» ասի զատամունս, ինքն զինքեան ամբաստանեալ տանջի:

Յայնժամ արդարքն ծագեսցեն առաջի Աստուծոյ որպէս զարեգակն (հմմտ. ԺԳ. 43):

Զանբաւ պայծառութիւն ասէ եւ համարձակութիւն ընդ աստի նեղութեանս, զոր վայելելոց են ի հանդերձեալ յաւիտենին ի թագաւորութեանն հաւր իւրեանց:

Եւ ասէ ցնոսա Յիսուս. «Իմացարո՛ւք զայս ամենայն» (ԺԳ. 51):

Ոչ հանդիմանելով հարցանէր, քանզի ճշմարտապէս գիտէր, եթէ իմացան կամ չիմացան, այլ հաստատապէս, ո՛չ ապաքէն իմացա-
րուք զայս ամենայն:

Եւ ասէր ցնոսայ. վասն այդորիկ ամենայն դպիր աշակերպեալ ի յարքայութիւն երկնից, նման է փանուրեառն, որ հանէ ի գանձէ իւրմէ հին եւ նոր (հմմտ. ԺԳ. 52):

«Աշակերպեալ արքայութեանն երկնից» կոչի, որ ի Հրէաստա-
նէն առնու զՔրիստոսի ուսումնն, իսկ խորագոյն ասել, որ ի գրոյն
ելանէ ի հոգեւորականն. արդ որ առաւելեալն է անսուտ գիտու-
թեամբ, լինի երկնային բազմութեանն յարքայութեանն տանու-
տեր, եւ ո՛չ միայն ի ծառայութենէ, այլ եւ յաղքատութենէ ազա-
տեալ լինի որպէս Քրիստոս, իսկ որ սորա նման զպիր «հանէ ի
գանձէ իւրմէ» զՀին եւ զՆոր Կտակարանս, ցուցանէ եթէ ո՛չ միայն
չէ պարտ, այլ եւ անհնարին է բաժանել զՆորս ի Հնոց Կտակարա-
նացն:

ԱՐԻՍՏԱՐԿԱՆ ԵՒ ԵՓՐԵՄ

Մարեան աշակերպքն եւ ասնն. «Մեկնեա՛ մեզ զառակ որո-
մանց ազարակին» (Մարթ. ԺԳ. 36):

Թէպէտ եւ այլուր յորժամ ուսանել ինչ կամէին, զանգիտէին
հարցանել: Եւ արդ, ուստի՞ եղեւ նոցա այսպիսի համարձակու-
թիւն: Յայնմանէ, զի լուան, թէ՛ «Ձեզ փուեալ է գիտել զխորհուրդս
արքայութեանն Աստուծոյ» (Մարկ. Դ. 11) եւ ընդելացան, վասն որոյ եւ
առանձինն իսկ հարցանէին եւ ոչ առաջի բազմութեանն, զի մի ի
նախանձ զոք գրգռեցնեն, այլ զի զՏէրն պահեսցեն զաւրէնս: Եւ
զի՞ ա՞րդ իցէ, զի զխմորոյն եւ զմանանխոյն թողեալ զառակ, զայն
եւեթ հարցանէին: Այլ զայս իբրեւ զյայտնի ինչ թողին եւ զայն իբ-
րեւ թէ անճառ ինչ ունիցի եւ աւելի զաւրութիւն ցուցանել, վասն
որոյ եւ ոչ սաստէ ի նոսա, այլ եւ վերըստին եւս լնու զուսուցեալսն:

«Ո՛ր սերմանէ,- ասէ,- սերմն բարի՝ է Որդի մարդոյ: Եւ ազարակն
աշխարհս է» (ԺԳ. 37, 38) եւ այլն:

Յորժամ ինքն իցէ սերմանիչն եւ նորին ազարակն, եւ յարքա-
յութենէ իւրմէ հրամիցէ ժողովել, ապայ կարի իսկ յայտ է, թէ այս

աշխարհս նորա է, եւ այն: Եւ արդ, զու միտ դիր անչափ մարդա-
սիրութեանն ի սերմանելն ինքնին սերմանէ եւ ի տանջելն այլոց
հրամայէ:

ՅՈՎՆԱՆՆԷՍ ԾՈՐԾՈՐԵՑԻ

Յայնժամ թողեալ Յիսուսի զժողովուրդսն՝ եկն ի փուն (Մարթ.
ԺԳ. 36):

Կրկին իրաւք նախախնամէ Աստուած զաշխարհ՝ կա՛մ բարու-
թեամբ, կա՛մ բարկութեամբ, եւ յորժամ մարդիկ այսու ոչ զգաստա-
նան, այնուհետեւ թողու ի խնամոց իւրոց, որպէս զհինն Իսրայէլ.
«Թողի, - ասէ, - զնոսա զնալ զհետ կամաց սրտից իրեանց» (Մարթ. 2. 13):
Այսպէս եւ Տէրն առակաւ կամէր զգաստացուցանել զնոսա, իսկ
նոքա ո՛չ հարցին, որով զգաստանային, վասն որոյ թողեալ զնո-
սա արտաքս ի վարդապետութենէն իւրմէ՝ «եկն ի փուն»: Եւ «փուն»
է գիտութիւն Տեառն բազմացեալ, որ յԱւետարանսն է ասացեալ
վասն նորա, զոր ինչ արար եւ զոր ինչ գործեաց: Եւ դարձեալ՝
զի ոչ ոք ի ժողովրդենէն զկնի եկն, յայտ է, զի զպիրքն եւ փարի-
սեցիքն էին, որք ոչ վասն այլ իրաց եկեալ էին, այլ զի բանս ինչ
կարիցեն հանել ի նմանէ, եւ իբրեւ ոչ կարացին հանել, քանզի ոչ
իմացան զասացեալն, թողին զնա եւ զնացին, եւ նա թողեալ զնո-
սա՝ եկն ի տուն, զի ուսուցէ զտենչացաւզս ուսմանն, որպէս ասէ:
Կամ զտաճարն ասէ «փուն»:

Մարեան առ նա աշակերպքն իւր եւ ասնն. «Մեկնեա՛ մեզ զա-
ռակս որոմանցն ազարակի» (ԺԳ. 36):

Ամենայն ուրեք ուսանել խնդրեն, բայց ո՛չ իշխէին հարցանել.
աստ ուստի՞ համարձակութիւն առին: Ինձ թուի՛ յայնմանէ, զի
ասաց՝ «Ձեզ փուեալ է գիտել զխորհուրդս արքայութեանն, իսկ նոցա չէ փուեալ»
(Մարթ. ԺԳ. 11), վասն այնորիկ հարցանեն. բայց առանձինն, յոր-
ժամ ի տուն եկն, եւ ո՛չ առաջի բազմութեանն, զի մի՛ ի նախանձ
զոք գրգռեցնեն, այլ զՏեառն պահեսցեն զաւրէնս: Բայց քննելի է,
թէ ընդէ՞ր զմանանխոյն եւ զխմորոյն թողեալ զառակ՝ զորոմանցն
հարցանէին: Կամ թէ հարցին, եւ ոչ գրեցան կամ թէ զայն իբր
զյայտնիս թողեալ եւ զայս իբր աւելի զաւրութիւնս ունել հարցա-

նէին, վասն որոյ եւ ոչ սաստեաց, այլ վերստին ընու գասացեալն՝ յամալթ առնելով զնոսա, որք ոչ հարցին, զի կամաւ չախորժէին:

Նա պարասխանի եր եւ ասէ ցնոսա. «Որ սերմանէ սերմն բարի, Է Որդի մարդոյ»: Եւ ազարակն աշխարհս Է. սերմն բարի նորա են, որ որդիքն արքայութեան են (ԺԳ. 37-38):

Աշակերտացն բացայայտէ գասացեալ առական լուսաւոր եւ հակիրճ բանիւ, քանզի նա, որ մարգարէիւքն սերմանէր ըստ աստուածութեանն՝ գաստուածպաշտութիւնն, աստ դարձեալ մարդկութեամբն՝ զԱւետարանին վարդապետութիւն, վասն ի բարիս ածելոյ զմարդիկ ի հինն եւ ի նորս: Իսկ «ազարակ» գաշխարհս անուանեալ՝ զփոքրկութիւն եւ զնուաստութիւն առ դրախտն եւ առ վերին կեանսն համեմատելով: Եւ որք ընկալան զվարդապետութիւն Տեառն, եղեն բարի սերմանք, այսինքն՝ բարեգործք, նաեւ սերմանաւղք ի յայլս, քանզի իրբեւ սերմն աւրինակեալ է կենցաղոյս առաքինութիւնք վասն յաճախութեան բազմապատիկ պտղոյ որային եւ մշտնջենաւոր պսակին, որք ժառանգք լինելոց են արքայութեանն վերին:

Իսկ որոմնն որդիք չարին են (ԺԳ. 38):

Նոքա, որք առին զվարդապետութիւն չարին, որպէս հրէայք եւ հերձուածաւղք եւ անհաւատ հեթանոսք, որք զկամս նորին պաշտելով՝ չար գործովք ծնունդք եւ որդիք եղեն նմին, այսինքն՝ ժառանգք հրոյ գեհննին:

Եւ թշնամին, որ վարեաց գայն, սարանայ Է (ԺԳ. 39):

Ուսուցանէ թէ եւ նա՛ կերպարանի ըստ ճշմարիտ մշակացն ձեւոյ եւ պատառէ զսիրտ մարդկան արօրիւ չարութեանն՝ սերմանելով զխորհուրդս չարեաց, որ եւ աճեցեալք գործովք՝ երեւի որոմնն, որով զթշնամութիւնն կացուցանէ՝ ոչ միայն առ մարդ, այլեւ առ Աստուած՝ զբարի սերմանս նորա խանգարելով: Նաեւ ա՛յլ ազգ. զի որ զմեզս յղանայ եւ վճարէ գործով, թշնամի Աստուծոյ է եւ հակառակ կամաց նորա՝ ըստ առաքելոյ (Կրն Յակ. Դ. 4):

Եւ հունձք կարարած աշխարհիս Է (ԺԳ. 39):

Ընդէ՞ր յառաջագոյն, յորժամ գաշակերտսն առաքէր, ասաց. «Նունձք բազումք են, եւ մշակք՝ սակաւ, աղաչեցէք զՏէր հնձոցն, զի հանցէ մշակս ի հունձս իւր» (Մարթ. Թ. 37-38), եւ թէ՛ «Ամբարձէք զաչս ձեր եւ փետք զարութիւնս, զի սպիտակացեալ են եւ ի հունձս հասեալ» (Յովն. Դ. 35), իսկ աստ զկատարած աշխարհիս դարձեալ «հունձ» ասէ: Արդ՝ կամ երկդիմի է հունձ մեղաց եւ կենաց, զառաջինն ի մեղաց հատին մանգաղաւ բանին առաքեալքն եւ մուծին յշտեմարանս եկեղեցւոյ զհաւատացեալսն եւ զյարդն սպառնական բանիւ արտաքս հոսեցին, իսկ յերկրորդումն հրեշտակք ի կենաց հնձեն եւ ի վերինն Սիոն ժողովեն, քանզի որպէս զալուստն կրկին, այսպէս եւ հունձն: Եւ կամ թէ՛ այն վճիռ էր փառաց եւ տանջանաց, իսկ այս՝ պտուղ ունկնդրութեան՝ արդեամբք եւ ներգործութեամբ բարի սերմանցն եւ որոմանցն:

Եւ հնձաւոքն՝ հրեշտակք են (ԺԳ. 39):

Առաջնոյն՝ մարգարէքն սերմանաւղք եւ առաքեալքն՝ հնձաւոք, իսկ վերջնոյն սերմանաւղ՝ Որդին Մարդոյ, եւ հնձաւոք՝ սպասաւորք նորին հրեշտակք երկնային, որպէս Յովհանն ի Յայտնութեանն ետես զհարուածս եաւթն սկաւառակացն, որով կատարած արարին յաւիտենիս (Կրն Յայր. ԺԵ. 7):

Որպէս ժողովի որոմնն եւ ի հուր արկանի, այնպէս եղիցի ի կարարածի աշխարհիս: Առաքեսցէ Որդի մարդոյ զհրեշտակս իւր, եւ ժողովեսցեն յարքայութենէ նորա զամենայն զայթագողութիւնս եւ զայնոսիկ, ոյք գործեն զանաւրէնութիւն: Եւ արկցեն զնոսա ի հնոց հրոյ. անդ եղիցի լալ եւ կրճել պարամանց (ԺԳ. 40-42):

Նախ ցուցանէ, թէ ճշմարիտ հատուցմունքն ի հանդերձեալն են: Եւ դարձեալ՝ զբարերարութիւն իւր յայտ առնէ, զի յորժամ զսերմն բարի սերմանէր, անձամբ առնէր, իսկ յորժամ վասն տանջանացն պատմէ, զհրեշտակս ասէ, առաքէ: Եւ միւս եւս. զի յորժամ սերմանէ, յազարակի իւրում սերմանէ, եւ յորժամ ժողովէ, յարքայութենէ իւրմէ ժողովէ, յայտ ուրեմն է, թէ այս աշխարհս եւ այն՝ նորա է, որով ուսուցանէ, թէ ամենեքեան յառնելոց են, թէպէտ ոմանք՝ ի կեանս եւ ոմանք՝ ի դատաստանս: Եւ դարձեալ՝ արքայութիւն է Տեառն՝ եկեղեցի սուրբ եւ բանք աստուածայինք, իսկ գայթագղութիւնք՝ աղանդք եւ հերձուածք, որք մտին յեկեղեցի՝ թոյլ տալովն

Աստուծոյ, եւ յետոյ ընտրին: Եւ դարձեալ՝ որ գայթաղեցուցանէ եւ որ գայթաղի եւ գործէ զանաւրէնութիւն՝ երկոքին տանջին, բայց ո՛չ ամենայն գայթաղեցուցանաւ, այլ որ ի մե՛ղս գայթաղեցուցանէ. ապա թէ ո՛չ՝ ընդէ՞ր ասաց Տէրն, թէ՛ «Որ գայթաղելոց է, գայթաղեցի», զի է երիս տեղի, որ թէպէտ գայթաղեցուցանեն, ո՛չ տանջին գայթաղեցուցիչքն, այլ գայթաղեալքն միայն:

Եւ դարձեալ՝ որ պատահամբ անկանի ի մեղս, սակայն այլ ոչ զղջասցի, իսկ կամաւորքն, որք են անաւրէնութեան գործաւորքն, առ հասարակ չարչարին: Եւ դարձեալ՝ սատանայ եւ կամարարքն նորին, որպէս ասաց Տէրն. կամ «գայթաղութիւն» զանհաւատ կռապաշտսն ասէ, որպէս յԱւրէնսն «գայթ» կոչեաց զգործս այլազգեացն (Ելք ԻԳ. 33, ԼԳ. 22), եւ «անարէն», որք յԱւրէնս յանցեան, ի մի տեղի տանջեսցին ի դժոխս, թէպէտ եւ զանազանութիւն լինի: «Արկցեն,- ասէ,- ի հնոց հրոյ, անդ եղիցի [լալ եւ կրճել ատամանց], ըստ այնմ՝ «Արկցեն գնա ի լիճ հրոյն» (հմմտ. Յայտ. ԺԺ. 20), եւ թէ՛ «Սաւրակեցէ Տէր Յիսուս Նոգով բերանոյ իւրոյ» (Բ Թես. Բ. 8) եւ այրմամբ շրթանց իւրոց: Իսկ յաղագս լալոյն եւ կրճելոյն ատամանց ասացեալ է, բայց աստ այսչափ, զի ի ժամանակի յանդիմանութեանն գտաւ արհամարհաւ գործոց բարեաց, յԱստուծոյ ճշմարտէ յանդիմանեալ՝ ինքն զինքն տանջէ եւ կրճտէ զատամուսնս իւր, վասն զի զբարիս սերմանցն եւ զճշմարիտ գիտութեանն զգործն ո՛չ ծաւրեաց ատամամբք իւրովք ի կենցաղս, անդ դատարկ գոլով ծնաւտին՝ կրճէ զատամուսնս, նաեւ ի դառնագոյն վշտացն եւս:

Յայնժամ արդարքն ծագեսցին իբրեւ զարեգակն յարբայութեան երկնից: Որ ունիցի ականջս լսելոյ, լուիցէ (ԺԳ. 43):

Կրկին տանջանք լինի[ն] մեղաւորացն. նախ՝ զի ինքեանք հրոյ եւ կրճել ատամանց մատնին, եւ երկրորդ՝ զի տեսանելով զփառս արդարոցն՝ առաւել չարչարին եւ այն, զի ձեռնահաս գոյր հասանել եւ ոչ հասին: Բայց ծագմունք արդարոցն ո՛չ այսչափ միայն, այլ բազմապատի՛կ, քան զծագումն սորա, այլ զի պայծառագոյն քան զսա, աստղ ոչ ունէայք, վասն այսորիկ ի մերոց ծանաւթիցն տայ մեղ աւրինակ, ապա թէ ոչ՝ արեգակն եաւթնապատիկ է լինելոց ըստ մարգարէին (տրն Ես. Լ. 26), զի՞նչ ասես զարդարոցն: Եւ այսու զանբաւ պայծառութիւնն եւ զհամարձակութիւնն եւ զգեղեցկութիւնն իմա, զոր վայելելոց են արդարքն ի հանդերձեալ յաւիտե-

նին՝ փոխանակ աստի նեղութեանցս: Եւ զի այս այսպէս է, ի վերաբերէ, թէ՛ «Որ ունիցի ականջս լսելոյ, լուիցէ»: Այսինքն՝ մի՛ կարծել անմահանալ զնոսա իբր զանբան անմահդ, այլ փառաւք ճոխութեամբ ի կամարս երկնից բարձրացին, զորս չարչարողքն տեսեալ՝ պատկառեսցին, կամ իբր շրտեալ աչք ի բոլորակածիր արեգական ճառագայթէ:

Բայց տարակուսելի է, թէ է՞ր վասն առաքեալն ասէ, թէ՛ «Արդարքն յաիշրակին ընդ առաջ Տեսուն» (Ա. Թես. Դ. 16), իսկ աստ՝ նախ մեղաւորքն մատնին ի տանջանս եւ ապա արդարքն իբր զարեգակն ծագեն: Գիտելի է, զի արդարոցն յերկինս պատրաստեալ է բնակութիւն, իսկ յորժամ ժամանակ զալստեանն եկեսցէ, իջանէ յերկնից փառաւքն Հաւր, եւ արդարքն առեալ զմարմինս իւրեանց, ելանեն ընդ առաջ Տեսուն յաւգս, եւ նոքաւք իջեալ յերկիր Տէրն՝ բեմ կազմէ եւ տայ զվճիռ մեղաւորացն՝ ըստ այնմ. «Աոչեսցէ զերկինս ի վերուստ եւ զերկիր՝ ի դարեւ գոողովորդ իւր» (Սաղմ. ԽԹ. 4): Յայնժամ իբրեւ այր թագաւոր յառնէ իւրովք բարեկամաւքն եւ տանի զնոսա յերանութեան հանգիստն՝ պսակել լուսեղէն փառաւք, որպէս զարեգակն, քանզի այրեցողական զաւրութիւն հրոյն եւ աղջամղջինն, որով ամենայն յաղին, տանջանք պատրաստեցան մեղաւորացն եւ լոյսն՝ պսակք արդարոցն, զաւրութեամբ ձայնի Տեսուն բաժանեալ ի հրոյն լոյս բոցոյն՝ ըստ մարգարէին (տրն Սաղմ. ԻԸ. 7):

ԳՐԻԳՈՐ ՏԱԹԵՒԱՅԻ

- Իսկ երկրորդ առակ որոման ուղիղ է կարգեալ.
- Ա. Նախ՝ զի այն՝ սերմն եւ այս, եւ այն՝ անդաստան, եւ այս:
- Բ. Երկրորդ՝ զի յետ բարի սերմանողին չարն սերմն է մերձաւոր: Եւ են ամենայն առակք արքայութեանն Եժ.ան (15): Եւ թէ զմաճն ընդ սոսայ կարգեսցես, վեցտասան եղիցի:
- Հարց. Վասն է՞ր առակաւք խաւսէր:
- Պատասխանի. Վասն Զ. (6) պատճառի.
- Ա. Նախ՝ որպէս ասաց Եփրեմ. «Ի մէջ զպրաց եւ փարիսեցոց խաւսէր»:
- Բ. Երկրորդ՝ զի արժանաւորքն իմացին եւ անարժանքն՝ ոչ: Ըստ որում՝ տեսցեն եւ մի՛ տեսցեն:

Գ. Երրորդ՝ զի կատարեսցի բան մարգարէին. «Բացից առակալ գրեւան իմ» (Մաւրթ. ԺԳ. 35) եւ այլն:

Դ. Չորրորդ՝ առակաւոր բանն հաստատուն մնայ:

Ե. Հինգերորդ՝ մարդն հոգի է եւ մարմին եւ միջնորդութեամբ մարմնոյն հասանի յանմարմինն, որպէս սանտղաւք, այսպէս առակաւք՝ զբանն:

Զ. Վեցերորդ՝ որպէս զպայծառութիւն արեգական հայելով կամ ջրով տեսանեմք, այսպէս ի պայծառ լոյս Աւետարանին՝ առակաւոր բանիւք:

Այս առակ ընդդէմ նոցա է, որք զբարի եւ զչարս յԱստուծոյ իմանան եւ պատճառ են, զի մի լիցի Բ. Աստուածս ըստ Մանիքոսի:

Ասեմք, եթէ Աստուած միայն բարեաց է պատճառ եւ ոչ չարեաց: Եւ յայտ է յերկրց.

Ա. Նախ՝ ի բնականէն, որպէս ի լուսոյն լոյս զայ յառաջ եւ ի քաղցրութենէն՝ քաղցր, այսպէս եւ ի բարի Արարչէն՝ բարի արարածք, որպէս վկայէ Մովսէս. «Եփես Ասրուած, եւ բարի են յոյժ» (Ծննդ. Ա. 31):

Բ. Երկրորդ՝ յայտ է ի Հին Աւրինացն, որոց ասէ մարգարէն. «Ոչ թէ դու, Ասրուած, կամիս զանարեւոտիւն, եւ ոչ բնակեն ամ թեզ չարք» (Մաղմ. Ե. 5-6):

Գ. Երրորդ՝ յայտ է ի Նորոյս, որպէս այս, որ ասէ. «Այր երկրագործ զտերմն բարի սերմանեաց յագարակի իրում եւ թշնամին ցանեաց գործն չարութեան» (հմմտ. Մաւրթ. ԺԳ. 24-25): Եւ այլ ուր ասէ. «Ծառ բարի պտուղ բարի ամեն եւ չար ոչ ամեն» (հմմտ. Ղուկ. Զ. 43):

Իսկ առ պատճառն նոցա ասեմք, եթէ ոչ լինին Բ. (2) Աստուածք, այլ մի, զի բարին էութիւն է եւ գոյացութիւն, իսկ չար՝ ոչ է էութիւն, այլ՝ պակասութիւն՝ ի սկզբնաչարէն գտեալ: Ոչ ուրեմն են Բ. Աստուածք, այլ մի Աստուած՝ արարիչ բարոյ եւ էութեան:

Հարց. Զի՞նչ է սերմն բարի:

Պատասխանի. Ա. Նախ՝ էութիւնն եւ բնութիւն հրեշտակաց եւ մարդկան:

Բ. Երկրորդ՝ սկզբնական բարին, զոր եզ ի բնութիւնն եւ ազատ կամքն եւ Բանն, եւ այլն:

Գ. Երրորդ՝ Աւրէնքն ի ձեռն մարգարէից:

Դ. Չորրորդ՝ Աւետարանն Քրիստոսի:

Հարց. Զի՞նչ է որոմն:

Պատասխանի. Չար սերմանքն է ի սկզբնաչարէն.

Ա. Նախ՝ ի յերկինս սերմանեաց եւ խռովեցոյց:

Բ. Երկրորդ՝ ի դրախտն եւ յանցոյց:

Գ. Երրորդ՝ ի յերկրի զանազան չարիս, ի մէջ մարդկան:

Դ. Չորրորդ՝ զհերձուածողս ի մէջ եկեղեցոյ:

Ա. Արդ, առաջինն՝ ի փառաց զրկեաց:

Բ. Երկրորդ՝ ի կենաց:

Գ. Երրորդ՝ ի բարեաց:

Դ. Չորրորդ՝ ի հաւատոց, որ մեծ է քան զամենայն:

Վասն քնոյ

Հարց. Զի՞նչ է «քուն լինելն» (ԺԳ. 25):

Պատասխանի. Առ Աստուած քուն զներելն իմանամք, եւ յառնել՝ զվրէժն: Եւ առ Քրիստոս, որ ննջեաց ի վերայ խաչին եւ յարեալ:

Եւ առ մարդս Դ. (4) կերպիւ առեալ լինի քուն.

Ա. Նախ՝ զգայութեանց քունն:

Բ. Երկրորդ՝ մտաց տգիտութիւնն:

Գ. Երրորդ՝ ծուլութիւնն ի բարեաց:

Դ. Չորրորդ՝ մեղաց քունն, որ ննջեմք ի մահ:

Նոյնպէս եւ արթնութիւնն Դ. (4) է.

Ա. Նախ՝ մարմնոյն:

Բ. Երկրորդ՝ մտացն զգուշութիւն:

Գ. Երրորդ՝ ժրութեան գործոյ:

Դ. Չորրորդ՝ առաքինութեանց:

Չոր ամենայնիւ պարտ է մեզ արթուն կալ, զի մի սերմանեսցէ ի մեզ զորոմն թշնամին:

Վասն հերձուածողաց

Հարց. Վասն է՞ր «որոմն» ասէ (ԺԳ. 25):

Պատասխանի. Վասն Ժ. (10) պատճառի.

Ա. Նախ՝ զի հակառակ է որոմն ցորենոյն: Եւ հերձուածողն զամենայն ինչ հակառակ ունի՝ զհարցումն, զբանն, զգործ եւ զայլն:

Բ. Երկրորդ՝ զի նման է ցորենոյն, յորժամ բուսանի: Եւ հերձուածողն նմանութեամբ պատրէ, բանիւ, անուամբ, հանդերձիւ եւ այլն:

Գ. Երրորդ՝ զի գաղտագողի մտանէ՝ ի քուն լինելն մարդկան:

Դ. Չորրորդ՝ ի մէջ ցորենոյն բուսանի: Այսպէս եւ սուտ մարդարէքն, եւ սուտ առաքեալքն ի մէջ ճշմարտիցն, զի նոցա հակառակ էին:

Ե. Հինգերորդ՝ ի վերայ ցորենոյն, զի հերձուածողն գաւելորդն ուսուցանէ, որ անպիտան է:

Զ. Վեցերորդ՝ դառն է որոմն, եւ բազում դառնութիւն մուծին յեկեղեցի դասք հերձուածողացն:

է. Եւթներորդ՝ վնասէ զխելս: Եւ հերձուածողն՝ զհաւատս սուրբ:

Ը. Ութերորդ՝ փայլուն է գունով: Եւ հերձուածողն լկտի է եւ սնապարծ:

Թ. Իններորդ՝ ի պտուղն երեւի որոմն: Եւ հերձուածողն նախ ծածկէ եւ յետոյ յայտնէ:

Ճ. Տասներորդ՝ կերակուր է անասնոց կամ նիւթ հրոյ, եւ հերձուածողն՝ սատանայի, եւ նիւթ գեհենին, որպէս ասէ. «Կապեցէք ի խրճուոնս առ ի յայրել» (ԺԳ. 30):

Հարց. Զի՞նչ է. «Այր թշնամի արար» (ԺԳ. 28):

Պատասխանի. Թշնամի կոչէ զսատանայ: Եւ Դ. (4) է իմացումն.

Ա. Նախ՝ զի վնասիչ են մարդոյ:

Բ. Երկրորդ՝ զի զմեզ թշնամի առնեն Աստուծոյ:

Գ. Երրորդ՝ մեր թշնամութեամբն ի յԱստուած հակառակին, որոյ արարած եմք:

Դ. Չորրորդ՝ զի պատկեր եմք, զքէն նորա ի մեզ վճարեն:

Իսկ ծառայք զհրեշտակս կոչէ կամ զմարդարէս եւ զառաքեալս եւ զայլ սուրբս:

Հարց. Վասն է՞ր ոչ ետ թոյլ քաղել զորոմն (հմմտ. ԺԳ. 29-30):

Պատասխանի. Վասն Դ. (4) պատճառի.

Ա. Նախ՝ զի մի՛ լիցի սուր եւ սպանումն ի յեկեղեցի, որպէս ի Հինն:

Բ. Երկրորդ՝ զի մի խլեացի եւ ցորեանն ընդ նոսա:

Գ. Երրորդ՝ զի թէ դարձցին եւ լինիցին ցորեան եւ պիտանի:

Դ. Չորրորդ՝ զի թէ անգեղջ մնասցեն, զանհնարին պատիժս ընկալցին անվախճան: Յայսմանէ ուսեալք՝ բարեպաշտ թագաւորքն ոչ սպանանէին զհերետիկոսս, այլ արտաքսէին յաշխարհէն իւրեանց:

Հարց. Ապա ոչ է պարտ դատել զվնասակարս հոգոյ կամ մարմնոյ:

Պատասխանի. Ասեն վարդապետք, թէ՛ ոչ են պատժելի Դ. (4) ոմանք.

Ա. Նախ՝ թէ անգիտութեամբ մեղանչեն, որպէս այն, զի աշակերտքն ասեն. «Նոր իջուցանել ի քաղաքն, եւ Տէրն արգել գնոսս» (Ղուկ. Թ. 52-56):

Բ. Երկրորդ՝ թէ վասն մարդկան փառաց եւ անարդութեան լինի, ոչ են պատժելի, որպէս եպիսկոպոսն ընդ բանիւ կապէ վասն փառաց կամ ազահութեան իւրոյ:

Գ. Երրորդ՝ թէ կարծեաւք լինի մեղքն եւ սուտ վկայ են, ոչ է պատժելի:

Դ. Չորրորդ՝ թէ իշխան լիցի երկրի, եւ նովաւ բազում անմեղ պատժեսցին, զի իշխանն որպէս փուշ է այգոյ, յորժամ քակին նոքա, այգին կոխան լինի:

Արտաքոյ սոցա ամենայն մեղանչականք պատժելի են: Եւ յայտ է յերկց.

Ա. Նախ՝ ի բնականէն, յորժամ աւճ խածանէ զմատն, եթէ ոչ հատանեն, բոլոր մարմինն ապականի:

Բ. Երկրորդ՝ ասէ Աւրէնքն, թէ՛ «Ի սեղանոյ իմոյ արարաքս քարշնցես զմեղանչականսն» (հմմտ. Ելից ԻԸ. 43):

Գ. Երրորդ՝ ասէ առաքեալ. «Փոքր մի խմոր զամենայն խմորէ» (Ա. Կոր. Ե. 6) եւ թէ՛ «Խան գշարն ի միջոյ» (Ա. Կոր. Ե. 13), զի բարձցի աղաղակ ընդ նմա: Ապա՝ պարտ է զհերձուածողս եւ որք անգեղջ մնան ի չարիս, արտաքսել յեկեղեցոյ (տես Ա. Կոր. Ե. 10):

Վասն դժոխց

Հարց. Զի՞նչ է «կապեցէք ի խրճուոնս» (ԺԳ. 30):

Պատասխանի. «Կապելն» է, որ ասաց զատաւորն. «Կապեցէք զդորայ զոքս եւ զձեռս, հանէք ի խաւարն» (հմմտ. Մաթթ. ԻԲ. 13): Իսկ «խրճուոնքն», այսինքն՝ զհամամեղս ի միասին տանջել, որպէս զնեստորականն՝ ի մի, եւ զարիոսեանսն՝ ի մի, զամբարտաւանսն՝ ի մի, եւ զպոռնիկքն՝ ի մի, եւ զայլ չարսն ըստ իւրաքանչիւր գործոց:

Եւ գիտելի է, զի թէպէտ ի մի խուրճն կապին, այլ զանազանապէս այրին, որպէս այն, որ արքայութիւնն՝ մի է, եւ միապէս առին զգահեկան տեսութեանն Աստուծոյ, այլ առաւել եւ նուազ տեսանեն զԱստուած: Նոյնպէս եւ մի է զժոխքն եւ մի հուր գեհենին, այլ առաւել եւ նուազ տանջէ, որպէս ասէ Եգեկիէլ. «Անցի ընդ գեպն, եւ է՛ր

մինչ ի սրուն եւ յերանս եւ մինչ ի գաւրին եւ ի պարանոցն» (հմմտ. Եզեկ. Խէ. 4-6):
Այս է հրեղէն գետն.

Ա. Առաջին՝ այրէ մինչեւ յուրքսն. նոքա են, որ նոր սկիզբն արարին մեղաց եւ մեռան:

Բ. Երկրորդ՝ մինչեւ յերանս. նոքա են, որ մեղաց ի մեղս ընթանան, զի ծունկն է ընթանալոյն պատճառ, ծնկամբն այրեսցին:

Գ. Երրորդ՝ մինչեւ ցգաւտին այրին. նոքա են պոռնիկքն, զի սկիզբն վավաշոտ ախտին երիկամունքն է:

Դ. Չորրորդն՝ մինչեւ ցպարանոցն այրին. նոքա են, որ ի մէջ մեղացն անզեղ մնացին, որպէս ասէ առաքեալ. «Նոր ծորալիր պարանոցաթաւալ ընկալցի զնոսս» (հմմտ. Ես. Լ. 28): Յորոց փրկեսցէ Քրիստոս՝ յոյսն մեր, զամենայն հաւատացեալս անուան իւրոյ յաններելի ի տանջանաց գեհենին:

Այս է երկրորդ առակն:



ՎԱՍՆ ՀԱՏՈՅ ՄԱՆԱՆԽՈՅ

Մաթթ. ԺԳ. 31-32

ՍՏԵՓԱՆՈՍ ՍԻՆԵՅԻ

Այլ առակ ասաց նոցա. «Նման է արքայութիւնն երկնից հապոյ մանանխոյ, որ է փոքրագոյն քան զամենայն սերմանիս» (հմմտ. Մաթթ. ԺԳ. 31-32), եւ որ ինչ ի կարգին:

Հատի մանանխոյ նմանեցուցանէ, որպէս թուի ինձ, ոչ բեռն իւրոյ քաղցր եւ թեթեւ վարդապետութեանն լինելոյ, թէպէտ եւ առ ժամանակ մի երեւի խստագոյն եւ ծանրագոյն, այլ յորժամ կատարիցի յոք եւ բերիցէ պտուղ, ծառ լինի ի մեծագոյն քան զամենայն մարդկա[յ]ին հիւնադութեան բանջարս. «Որ հիւանդն է, - ասէ, - բանջար կերիցէ» (Նոոմ. ԺԴ. 2), յաղագս ոչ հանդուրժելոյ հաստատուն կերակրոց եւ թողին յայնպիսի ծառ թուռնք հոգիք մարդկան, եւ կամ հատ մանանխոյ ասէ զինքն, վասն զի փոքրացաւ եւ աղքատացաւ՝ առեալ զկերպարանս ծառայի, իսկ յորժամ փառաւորեցաւ եւ բարձրացաւ, ձգեաց առ ինքն զամենեսեանն, եւ ժառանգեաց զազգս եւ իշխեաց ամենայն ծագաց երկրի. ծառ եղև մեծ, որ հանգեան ամենայն թուռնք երկնաւորք, այսինքն՝ հոգիք առաքելոց եւ մարգարէից եւ ամենայն արդարոց: Քրիստոսի յազգս արքայութեանն Աստուծոյ. բան փոքր էր յառաջագոյն եւ անարգ երեւէր. եւ աճեաց եւ քան զամենայն բան, որ սերմանեալ էին ի մարդիկ, մեծացաւ յոյժ, եւ այնչափ զաւրացաւ, զի աստուածային եւ երկնաւոր զաւրութիւնք հանգչէին յոստս նորայ. ոստք նորա կարծելի են, որք մեծացան բանիւ նորա, առաքեալքն են նմանողք առաքելոցն:

ԱՐԻՍՏԱԿԷՍ ԵՒ ԵՓՐԵՄ

Այլ միւս եւս առակ մանանխոյն, զի.

Փոքր է նայ, քան զամենայն սերմանիս (հմմտ. Մաթթ. ԺԳ. 32):

ԵՓ Վասն զի փոքրկութեան քարոզութեանն, որ ի սկզբանն էր, ասաց իբրեւ զայն, զի ասէ. «Մի երկնցի, հապ փոքրիկ» (Ղուկ. ԺԲ. 32):

Եւ յորժամ բուսանի,- ասէ,- եւ աճէ, լինի ծառ (հմմտ. ԺԳ. 32):

Զի թագաւորէ Աւետարան նորա, մինչեւ ի ծագս երկրի: «Ընդ ամենայն երկիր, - ասէ, - ել բարբառ աներեաց նոցա» (Նոոմ. Ժ. 18):

Եւ գան,- ասէ,- թոչունք (ԺԳ. 32):

Հեթանոսք աշխատեալք հանգչին ի վերայ հաւատոցն. «Եկայք,- ասէ,- առ իս, ամենայն աշխարհայք» (հմմտ. Մաւրթ. ԺԱ. 28):

Դարձեալ նմանեցոյց զանձն իւր հատոյ, որ սերմանեցաւ յերկիր (տես Մաւրթ. ԺԳ. 37): Եւ առ իւր մարմինն յերկրէ, այն, զի ի վերայ նորա հանգեաւ թռչունն սուրբ՝ ըստ Յովհաննու ձայնին (տես Յայտն. ԺԹ. 21):

ՅՈՎՀԱՆՆԷՍ ԾՈՐԾՈՐԵՅԻ

Այլ առակ արկ առ նոսա եւ ասէ. «Նման է արքայութիւնն երկնից հապոյ մանանխոյ, զոր առեալ մարդոյ՝ սերմանեաց յագարակի իւրում: Որ փոքր է քան զամենայն սերմանիս, եւ յորժամ աճիցէ, մեծ է քան զամենայն բանջարս, եւ լինի ծառ, մինչեւ զալ թոչնոց երկնից եւ հանգչել յոսրս նորա» (Մաւրթ. ԺԳ. 31-32):

Որք բնախաւսեցին, ասեն զմանանխոյ անփտելի ունելով բնութիւն, եւ յորում տեղւոջ անկանի՝ բուսանի, եւ կատարեալ է ըստ ձեւոյն եւ ճճեաց անուտելի, եւ զաւրաւոր ըստ որակին: Արդ, ըստ այսմ զաղափարի՝ «իսպ մանանխոյ» զինքն անուանէ՝ անփուտ գոյ ըստ աստուածութեանն եւ մարդկութեանն, որ սերմանեալ ի մարդկային բնութիւնս՝ «բուսաւ յերկրէ» ըստ մարգարէին (Մաղմ. ԶԴ. 12), կատարեալ լրմամբ՝ աստուածութեամբ եւ մարդկութեամբ, զաւրաւոր հրաշիւք եւ անարատ ի մեղաց, զի ուտիճն մեղասաէր ո՛չ կարաց կամագիւտ լինել նորա: «Որ փոքր է լքան զամենայն սերմանիս» կամ զի ի դոյզն եւ յաղքատ աղջկանէ ծնաւ ի յայրի եւ կամ ըստ կարծեաց հրէիցն, եւ կամ զի փոքրկացաւ՝ առեալ զկերպարանս ծառայի, նաեւ ըստ մահուն եւս: Իսկ յորժամ աճեաց անաճելին բնութեամբ ըստ մարմնոյ, որպէս ասացեալ է, թէ «աճէր հասակաւ» (հմմտ. Ղուկ. Բ. 52), եւ կամ ի ձեռն սքանչելեացն մեծացաւ եւ փառաւորեցաւ քան զամենայն մարդ՝ սերմանեալ ի մարդկանէ, զթագաւորս ասեմ եւ զմարգարէս, եւ եղեւ ծառ կենաց ի խաչին, մինչ ձգել առ ինքն տնաւրինաբար զթռչունն սուրբ երկնային՝ զՀոգին աղաւնակերպ իջեալ հանգուցեալ ի վերա գլխոյ նորա, զոր «ոստ»

ասաց, քանզի ո՛չ ըստ աստուածութեանն, այլ ըստ մարդկութեանն ընկալաւ տնաւրինաբար:

Եւ զարձեալ՝ զքարոզութիւն Աւետարանին, որ ի սկզբանն ի ձեռն առաքելոցն ի հատ մանանխոյ առակէ, իբր այն, զի ասէ. «Մի՛ երկնչիր, հա՛ւտ փոքրիկ» (Ղուկ. ԺԲ. 32), քանզի իբրեւ զսերմն զՀոգին շնորհաց առին, որով աճեցեալ եղեւ ծառ մեծ, զի թագաւորեաց Աւետարանն մինչ ի ծագս երկրի՝ ըստ այնմ. «Ընդ ամենայն երկիր ել բարբառ նոցա, եւ մինչեւ ի ծագս [աշխարհի եւ խաւսք նոցա]» (Մաղմ. ԺԸ. 5), որով առաւել գտաւ քան զամենայն բան մարդկային, որ ճարակ տուաւ բնութեանս մերոյ, մինչ զալ հոգւոց մարգարէից եւ արդարոց եւ թռչնոց զաւրութեանց երկնից եւ հանգչել ի քարոզութիւնս առաքելոցն, որք մեծացան բանիւ նորա: Որպէս թէ լցան իղձք բաղձանաց առաջին արդարոց եւ հանգեան ի տառապանաց, զոր վասն բնութեանս կրէին: Եւ կամ՝ թռչունք հեթանոսք աշխատեալք մարմնով եւ հոգւով յաւրս եւ ի ծովու՝ ընդ հովանեաւ Աւետարանին մտին եւ հանգեան ի մեղացն բեռանց՝ ըստ այնմ. «Եկայք առ իս, ամենայն աշխարհայք եւ բեռնաւորք, եւ ես հանգուցից զձեզ» (Մաւրթ. ԺԱ. 28):

ԳՐԻԳՈՐ ՏԱԹԵԻԱՅԻ

«Հատ մանանխոյ» ասէ զԱւետարանն եւ զհաւատն Քրիստոսի, զի նախ փոքր է ի մէջ փոքր հաւտից առաքելոցն եւ յետոյ աճեաց, «ընդ ամենայն երկիր ել բարբառ Անկարանին» (հմմտ. Նոոմ. Ժ. 18), եւ հեթանոսք, աշխատեալք ի կուռս, հանգեաւ ի հաւատս Աւետարանին, ըստ այնմ. «Եկայք առ իս ամենայն աշխարհայք, եւ ես հանգուցից զձեզ» (Մաւրթ. ԺԱ. 28):

- Հարց. Վասն է՞ր ի հատ մանանխոյ առակէ զհաւատն:
- Պատասխանի. Վասն Ժ. (10) պատճառի.
- Ա. Նախ՝ զի փոքր է քան զամենայն սերմանիս: Եւ հաւատն փոքր է, քան զամենայն գիտութիւնս:
- Բ. Երկրորդ՝ յերկիր անկեալ՝ բուսանի: Եւ հաւատն ի սիրտ մարդկան աճէ:
- Գ. Երրորդ՝ նախ՝ ծածկի եւ ապա յայտնի: Եւ հաւատն ի սիրտն ծածկի եւ ապա յայտնի:

Դ. Չորրորդ՝ նախ՝ զարմատն հաստատէ, եւ ապա՝ բուսանի: Եւ հաւատն նախ հաստատի ի հոգին եւ ապա ի զգայարանքն բուսանի:

Ե. Հինգերորդ՝ աճի եւ մեծանայ: Եւ հաւատն աճէ յուսով եւ սիրով եւ մեծանայ գործով:

Զ. Վեցերորդ՝ «Թռչունք հանգչին ի յոստն» (ԺԳ. 32): Եւ ամենայն իմացմունք հանգչին ի հաւատն:

Է. Եւթներորդ՝ բոլոր է: Եւ հաւատն բոլոր է, ի բոլոր սրտէ եւ ի բոլոր մտաց (տրն Մարթ. ԻԲ. 37):

Ը. Ութերորդ՝ անծակ է: Եւ հաւատն՝ անապական, ոչ ինչ կրէ յարտաքուստ:

Թ. Իններորդ՝ անբեկ է: Եւ հաւատն անբիժ եւ աներկեւան:

Ժ. Տասներորդ՝ կծու է: Եւ հաւատն ունի զգործս նեղ եւ անձուկ: Նմանապէս եւ բաղդատի առ Տէրն, որ հատ եղեւ կենդանութեան.

Ա. Նախ՝ փոքր կեցաւ յարգանդի կուսին:

Բ. Երկրորդ՝ մարմին եղեւ, հոգի եւ միտք:

Գ. Երրորդ՝ առ Հայր եւ յարգանդի հաստատ:

Դ. Չորրորդ՝ զի ծնաւ ի կուսէ:

Ե. Հինգերորդ՝ աճէր հասակաւ մարմնոյն:

Զ. Վեցերորդ՝ բոլորն Աստուած է մարդացեալ:

Է. Եւթներորդ՝ անապական էր մարմնով:

Ը. Ութներորդ՝ անբաժան միացեալ:

Թ. Իններորդ՝ նեղ եւ անձուկ տնաւրէնութեամբն:

Ժ. Տասներորդ՝ եղեւ ծառ քաղցր պտղով մարմնոյն, եւ Հոգին Սուրբ հանգեաւ ի վերայ նորա:

Այսքան երրորդն:

Ղուկ. 18-19

ՍԱՐԳԻՍ ԿՈՒՆԴ

Նման է արքայութիւն երկնից հափոյ մանանխոյ] (Ղուկ. ԺԳ. 19):

«Նապ մանանխոյ» զինքն ասէ Քրիստոս, վասն զի փոքրկացաւ եւ աղքատացաւ՝ առեալ զկերպարանս ծառայի: Եւ վասն աւետարա-

նական քարոզութեանն. «Որ փոքր էր» (Մարթ. ԺԳ. 32) ի սկզբանէ աշակերտացն, եւ սփռեալ տարածեցաւ ընդ տիեզերս:

Եւ աճեալ՝ եղև ծառ (ԺԳ. 19):

ՍՏ Իսկ յորժամ փառաւորեցաւ եւ բարձրացաւ, ձգեաց զամենեւին առ ինքն եւ ժառանգեաց զազգս եւ իշխեաց ամենայն ծագաց երկրի: Եւ բան նորա փոքր էր յառաջագոյն եւ անարդ երեւեր:

Աճեաց քան զամենայն բան, որ սերմանեալ էր ի մարդիկ եւ մեծացաւ յոյժ:

ԵՓ Զի թագաւորեաց Աւետարան նորա մինչեւ ի ծագս երկրի. «Ընդ ամենայն երկիր ել բարբառ» (Ղոմմ. Ժ. 18) աւետեաց նորա:

Եւ թոչունք երկնից բնակէին յոսոս նորա (ԺԳ. 19):

ՍՏ Հոգիք առաքելոց եւ մարգարէից եւ ամենայն սրբոց, յորս բնակեն թոչունք երկնաւորք: Եւ այնչափ զաւրացաւ, մինչ զաւրք «երկնից բնակեն յոսոս նորա»: «Ոստ նորա» թուի ինձ, որք մեծացան բանիւ նորա՝ առաքեալքն եւ նմանողք նոցա:

ԵՓ Թոչունք՝ հեթանոսք, աշխատեալք հանգչին ի վերայ հաւատոց. «Եկայք առ իս ամենայն աշխարհալքր» (Մարթ. ԺԱ. 29):



**ԱՌԱԿ ԽՄՈՐՈՅՆ
Մապթ. ԺԳ. 33**

ՍՏԵՓԱՆՈՍ ՍԻՒՆԵՑԻ

Այլ առակ խաւսեցաւ ընդ նոսա. «Նման է արքայութիւնն երկ-
նից խմորոյ, զոր առեալ կնոջ՝ թաքոյց ի գրիւրս երիս, մինչեւ խմո-
րեցաւ բոլորն» (հմմտ. Մապթ. ԺԳ. 33):

«Խմոր»՝ վարդապետութիւնն Քրիստոսի, «կին»՝ Հոգի մարդոյ,
«գրիւք երեք»՝ մասունք Հոգւոյն՝ բանական, սրտամտական, ցանկա-
կան եւ կամ երեք մասունք ժամանակիս՝ անցեալն եւ առաջիկայս
եւ Հանդերձեալն. որ ոք յերբեակ ժամանակիս յայսմիկ պահես-
ցեն յինքեանս զվարդապետութիւնն Քրիստոսի, այսինքն՝ բոլոր
զինքն լուսաւորեաց:

ԱՐԻՍՏԱԿԷՍ ԵՒ ԵՓՐԵՄ

Դարձեալ խմորոյ նմանեցոյց զարքայութիւնն (տնն Մապթ. ԺԳ.
33): Զոր աւրինակ նա զբազում ալեւրն յիւր բնութիւնն շրջէ, նոյն-
պէս եւ՝ «դուք,- ասէ,- զամենայն աշխարհս դարձուցանէք»: Եւ
տես, զիմաստութիւնն, զի զբնութեան ինչ իրս ի մէջ բերէ՝ յայտ
արարեալ, թէ որպէս մարթի այնմն լինել, նոյնպէս եւ այսմ: Զի
որպէս խմորն, որ յորժամ ի զանգուածն մաւտի, յայնժամ խմո-
րէ, նոյնպէս եւ դուք. յորժամ միջամուխ լինիջիք ձերոց պատե-
րազմողացն, յայնժամ յաղթիցէք նոցա: Եւ զոր աւրինակ յորժամ
խմորն թաղի եւ ոչ ապականի, այլ առ սակաւ սակաւ յինքն ձգէ եւ
դարձուցանէ, նոյնպէս եւ քարոզութիւնդ առ սակաւ սակաւ զամե-
նիսեան դարձուցանէ¹:

Իսկ երիս գրիւս ասելն՝ զբազմութիւնն առակէ, քանզի գիտէ
զթիւս զայս ի վերայ բազմութեանն առնուլ: Եւ ընդ այն մի՛ ինչ
զարմանայցես, եթէ զարքայութենէն ճառեալ: Մանանխոյ (տնն
Մապթ. ԺԳ. 31-32, Ղուկ. ԺԳ. 18-19) եւ խմորոյ նմանեցուցանէ (տնն
Մապթ. ԺԳ. 33, Ղուկ. ԺԳ. 20-21), քանզի ընդ տխմար եւ ընդ տգէտ
մարդկան² խաւսէր, որք այնու եւս առաւել յորդորէին:

¹ Ա > նոյնպէս եւ քարոզութիւնդ առ սակաւ սակաւ զամենիսեան դարձուցանէ
² Ա մարդիկ

«Խմոր» դարձեալ զանգուած, մարմին նորա ի զանգուած տանն
Ադամայ: Եւ ինքն է, որ արկ ի խմորն զգաւրութիւնն, նմին իրի եւ
խառնեաց յայնչափ բազմութիւն անհաւատից եւ արար հաւատա-
ցեալս, զի մեք փոփոխիցիմք յայլս ի մերմէ իմաստութենէ: Եւ արդ,
մի ոք զնուագութիւնն աղարտիցէ, զի բազում է զաւրութիւն քա-
րոզութեանն, եւ որ խմորեցաւ մի անգամ, դարձեալ զայլս¹ խմո-
րեաց: Զոր աւրինակ եւ կայծակուք. յորժամ զփայտն վառիցեն,
զվաղուց այրեցեալ բոցոյն յաւելուած առնեն եւ այնու եւ յայլսն
ճարակին, նոյնպէս եւ քարոզութիւնն: Եւ ոչ ասաց՝ «խոր», այլ՝
«խմոր», զի հրոյն ո՛չ ամենայն ինչ իւր է, այլ կէս մի եւ փայտին,
իսկ խմորն² ամենեւիմք³ ինքն ազդէ: Եւ թէ ԲԺ. (12) այր զամենայն
աշխարհս խմորեցին, ի միտ առ՝ որչափ ինչ իցէ մեր անպիտա-
նութիւնս, զի այսչափ ինչ իցեմք եւ չկարեմք զմնացեալսն ածել
յուզգութիւն:

Զայս ամենայն խաւսեցաւ Յիսուս ընդ ժողովրդեանն, եւ առանց
առակի ոչ [ինչ] խաւսէր ընդ նոսա (հմմտ. ԺԳ. 34):

Մարկոս ասէ՝ որպիսի ինչ կարէին լսել (տնն Մարկ. Դ. 9):

«Խաւսէր ընդ նոսա առակաւք», եւ զի ցուցցէ եթէ ոչ աւտար ինչ եւ
նորոգէ, ածէ զմարդարէն ի մէջ, որ յառաջագոյն գուշակէր զաւրի-
նակ այնպիսի վարդապետութեանն, եւ ուսուցանէ մեզ զՔրիստո-
սի միտս: Եթէ ոչ, զի իմանայցեն, այլ զնոսա ածիցէ ի հարցուածս.
«Խաւսէր ընդ նոսա», յարէ ի նոյն, թէ՛ «Առանց առակի ոչինչ խաւսէր»:
Թէպէտ բազում անգամ առանց առակի խաւսեցաւ, այլ յայնժամ
եւ ոչ ինչ, սակայն ոչ ինչ ոք եհարց ցնայ, քանզի տանջանս մեծա-
մեծս սպառնային առակքն, այլ նոքա ոչ ինչ ընդոստեան: Վասն
այնորիկ եթող զնոսա եւ գնաց (հմմտ. Մապթ. ԺԳ. 36):

Եւ ոչ ոք երթայր զհետ նորա ի դպրացն, ուստի յայտ իսկ է, թէ
ոչ վասն այլ իրիք եկեալ էին անդր, այլ զի բանս ինչ կարիցեն հա-
նել ի նմանէ, եւ իբրեւ ոչինչ իմացան յասացելոցն, եթող եւ գնաց:

ՅՈՎՆԱՆՆԷՍ ԾՈՐԾՈՐԵՑԻ

Այլ առակ խաւսեցաւ ընդ նոսա եւ ասէ. «Նման է արքայութիւնն

¹ Ա զայս
² Ա <իսկ խմորն>
³ Ա ամենեւիմք

երկնից խմորոյ, գոր առեալ կնոջ՝ թագոյց ի գրիս երիս ալեւր, մինչեւ ամենայն խմորեցաւ» (Մաւրթ. ԺԳ. 33):

Կրկին իմաստ եւ ա՛յս առակ ընձեռէ. նախ՝ զմարմինն իւր «խմոր» անուանէ, որ ծնեալ ի ձեռն կնոջ՝ խառնեաց ի զանգուած տանն Ադամայ՝ հոգւոյ եւ մարմնոյ եւ մտաց, մինչեւ ամենայնն անմահացաւ յուսով յարութեանն՝ լինելով «առաջին պարու ննջեցելոց» (Ա. Կոր. ԺԵ. 20), կամ՝ եկեղեցի ի ձեռն հաւատոյն, որ ի Հայր եւ յՈրդի եւ ի Հոգին Սուրբ մկրտեալ յանուն նորին: Եւ կամ «կին» զհոգի մարդոյ ասէ, զի թէպէտ բնութիւնն արու է յաղագս ներգործութեանն, բայց յԱստուծոյ առնելով սերմանս բարւոյ՝ կարաւ է եւ գրիւս երիս՝ գերիս մասունս հոգւոյն՝ զբանն զցասումն եւ զցանկութիւն, նաեւ գերիս մասունս ժամանակիս՝ զանցեալն եւ զներկայն եւ զապառնին: Արդ, որ յերիս մասունս հոգւոյ յերիս հատուածս ժամանակաց եւ ի հասակս ընկալաւ հաւատով եւ երկիւղիւ եւ սիրով զմարմինն Տեառն հաղորդութեամբ՝ ըստ այնմ. «Ի ծոց իմ թագոցի զբանս քո, որպէս զի մի՛ մեղայց քեզ» (հմմտ. Մաղմ. ԸԺԸ. 11), այնպիսին բոլոր զինքն աստուածատեսակս գործելով լուսաւորէ եւ մարմին եւ ոսկր նմին լինիցի: Եւ երկրորդ՝ զվարդապետութիւնն առակէ ի խմոր յաղագս ձգողական զաւրութեանն, քանզի որպէս խմորն զբազում ալիւրն, զոր «երեքն» նշանակէ, յիւր զաւրութիւնն շրջէ, նոյնպէս եւ դուք զամենայն աշխարհս՝ զԱսիա եւ զԼիբիա եւ զԵւրոպիա, դարձուցանէք ըստ բնութեան խմորոյ սահմանի, զի որպէս այն, նոյնպէս եւ այդմ մարթ է լինել: Բայց յորժամ խառնիցի խմորն, նոյնպէս եւ դուք, յորժամ միջամուխ լինիցիք պատերազմողաց ձերոց, յայնժամ՝ յաղթիցէք նոցա, որպէս եւ եղև իսկ, զի մի ի միոյ խմորեալ՝ զբազումս յիմաստս իւրեանց փոխեցին զաւրութեամբ նորին: Զսակաւն ի բազում աճեցոյց, զի զոր աւրինակ հուր վառեալ զբազում անտառս բորբոքէ, նոյնպէս եւ նոքա խմորեալք ի Տեառնէ, զբազում աշխարհս խմորեցին առ ի յամալ մեզ, զի այսքան վարդապետք այժմ զմնացեալն ի նոցանէ ոչ կարեմք դարձուցանել: Եւ դու մի՛ ինչ զարմասցիս, թէ զարքայութիւնն երկնից մանանխոյ եւ խմորոյ բազատէ, քանզի ընդ ախմարս եւ ընդ տգէտս խաւսէր, քանզի այնչափ անտեղեակք էին, զի մեկնութեան կարաւտանային, բայց այնու առաւել յորդորէին:

Այլ վարանելի է ի տեղւոյն, թէ է՞ր աղագաւ զմի եւ զնոյն էութիւն նիւթոյ Գիրք սովորեցին ի լաւից եւ յոռեաց առնուլ ապա-

ցոյց, իբր այն՝ «Ահա այր, եւ ծագումն անուն նորս» (Զաք. Զ. 12), եւ թէ՛ «Ծագեցից երկիւղածաց ինոց արեգակն արդարութեան» (հմմտ. Մաղ. Դ. 2), եւ թէ՛ «Երեւցաւ մեզ արեգակն ի բարձանց» (հմմտ. Ղուկ. Ա. 78), իսկ ընդդիմակին, թէ՛ «Արեգակն ի քուէ քեզ մի մեղիցէ» (Մաղմ. ԸԻ. 6), եւ թէ՛ «Ծագեաց արեւ հանդերձ խորշակաւ» (Յակոբ Ա. 11): Եւ դարձեալ՝ «Խաւարեցին ասպեղք գիշերոյն այնորիկ» (Յոր Գ. 9), եւ թէ՛ «Ես եմ ասպղ առաւապուն» (հմմտ. Յայր. ԻԲ. 16): Եւ դարձեալ՝ «Ելեր բազմեցար իբրեւ զառիւծ յանձնապասարանէ» (հմմտ. Ծննդ. ԽԹ. 9), եւ ի տեսիլ կենդանեացն՝ զէմք միոյ զէմք առիւծու լծեալ ի կառս Աստուծոյ եւ ներհակին, թէ՛ «Ոտխն ձեր սաքանայ իբրեւ զառիւծ գոչէ» (Ա. Պետ. Ե. 8) եւ «դարանայ իբրեւ զառիւծ ի մորոց իրում (հմմտ. Մաղմ. Թ. 30): Եւ դարձեալ՝ «Գեպք յորովայնէ նորս բղխեցեն» (Յովի. Է. 38), եւ՝ «Աղբիւր ի քանէ Տեառն ելցէ» (Յովի Գ. 19), եւ՝ «Գնացք գեպոց ուրախ առնեն զբաղաքն Աստուծոյ» (Մաղմ. ԽԵ. 5), եւ թէ՛ «Մի՛ ընկլուցցեն զիս պարոյք ջրոց» (Մաղմ. ԿԸ. 16), եւ՝ «Շրջանք գեպոց պաշարեցին զիս» (հմմտ. Մաղմ. ԶԷ. 18), եւ՝ «Ապրեցո զիս ի ջրոց բազմաց» (Մաղմ. ԸԽԳ. 7): Եւ դարձեալ՝ «Որպէս զի. քաղցր են ի քիմս իմ բանք քո, քան զմեր բերանոյ [իմոյ]» (Մաղմ. ԸԺԸ. 103), եւ «Կերայ զիս իմ մեղու իմով» (Երգ Ե. 1), եւ թէ՛ «Մեր կաթէ ի շրթանց կնոց պոռնկի» (Առակ. Ե. 3), եւ՝ «Քաղցր բանիք պարենս զսիրս անմեղաց» (հմմտ. Նոմ. ԺԶ. 18): Եւ դարձեալ՝ «Ծագեաց մեզ Տեր եղջիր ի Դաւիթ» (հմմտ. Մաղմ. ԸԼԱ. 17), եւ՝ «Բարձր եղիցի եղջիր արդարոյ» (Մաղմ. ՆԴ. 11), եւ թէ՛ «Ջեղջիրս մեղատրաց փշրեցես» (Մաղմ. ՆԴ. 11), եւ՝ «Մի՛ բարձրացուցանէք ի բարձունս զեղջիրս ձեր» (հմմտ. Մաղմ. ՆԴ. 5): Եւ դարձեալ՝ «Դնեն ի հիմունս Միոնի վեմ ընկիր» (հմմտ. Ես. ԻԸ. 16), եւ թէ՛ «Քար գայթաղութեան եւ քար գորման» (Նոմ. Թ. 33) եւ այլ սոյնպիսիք յոլովք եւ անթիւք: Նույնպէս եւ աստ՝ «Նման է արքայութիւնն երկնից խմորոյ», եւ թէ՛ «Զգո՛յ լերոք ի խմորոյ սաղուկեցունցն» (Մաւրթ. ԺԶ. 6), եւ թէ՛ «Մի՛ ի խմորն հին եւ մի՛ ի խմորն չարութեան, այլ յանխմորն սպուգութեան եւ ճշմարտութեան» (Ա. Կոր. Ե. 8):

Արդ՝ տարակոյս յայտասիկ: Իսկ լուծումն ճշմարիտ՝ ճշմարտախոհիցն է յայտնի, բայց որքան մերս դատի նուաստ տեսութիւն, ըստ երկուս եղանակս իմանամք: Նախ՝ զի ամենայն էութիւն արարածական երկրիմի ունի զաւրութիւն՝ լաւագոյն եւ վատթարագոյն, արդ, ըստ լաւ կողմանն՝ լաւիցն առնուն ապացոյց, եւ ըստ յոռոյն՝ վատթարագունիցն, զոր եւ մի ի բազմացն յիշեցուք: Քանզի ահա աւճ ըստ թունիցն դառնագոյն է եւ մահաբեր, իսկ զի եւ ի նմանէ հանեն բժիշկք, որք զթիւրակէքն կազմեն, որով զթոյնս նորա բժշկեն: Նոյնպէս եւ արեգակն, զի ըստ լուսոյն պայծառու-

թեան՝ ազնուագոյն է եւ պատճառ խնդութեան, իսկ ըստ տապոյն՝ կիզիչ է եւ ցամաքեցուցիչ. նոյնպէս եւ ամենայն ինչ: Եւ երկրորդ՝ Աստուած բնութեամբ բարի է, քանզի զանեղութիւնն ունի, իսկ մարդիկ՝ ստացմամբ, վասն զի եղականք են, զի որպէս յառաջին գոյացութեանն յանէութենէ ի լինելութիւն եկն փոփոխմամբ, այսպէս եւ այլայլութիւն միշտ կրէ եւ ի բարւոյն ի չարն միտէ, ուստի փայտ գիտութեան բարւոյ եւ չարի ի Գրոց անուանեցաւ (տե՛ս Ծննդ. Բ. 17):

Եւ արդ, քանզի ի գլուխ արարածոցս ստեղծաւ եւ աշխարհի գլուխ կարգեցաւ եւ ընդունայնացաւ, ընդ նմին եւ արարածքս Հնազանդեցան՝ ըստ առաքելոյ, թէ՛ «Ընդունայնութեան արարածք հնազանդեցան, ո՛չ իրեանց կամաւ, այլ վասն այնորիկ, որ հնազանդեցոյցն յուսով» (Նոմ. Ը. 20): Եւ արդ, որպէս մարդն երբեմն ի չարն դիմէ եւ երբեմն ի բարին՝ վասն ասացեալ պատճառին, այսպէս եւ էակքս երբեմն ի չարն յիշին եւ երբեմն ի բարին՝ փոփոխական գոլով, որպէս եւ մարդն, մինչ Հոլովմամբ կենցաղոյս դարձեալ ի կատարելութիւն բարւոյն ելանիցեն, որպէս ասէ Պաւղոս, թէ՛ «Եւ ինքեանք իսկ արարածք հնձնն եւ երկնն մինչև ցայժմ, զի ազալրեսցին ի ծառայութենէ ապականութեան յազալրութիւն փառացն Որդոյն Աստուծոյ» (հմմտ. Նոմ. Ը. 21-22), եւ Դաւիթ, թէ՛ «Տեսից գերկինս՝ զգործս մարանց բոց, զլուսին եւ զասլոնդս» (Սաղմ. Ը. 4) Հաստատեալ նորոգմամբ եւ ո՛չ փոփոխեալ, որպէս այժմ:

Բայց եթէ ոք ասիցէ, թէ յետ ի բարին ելանելոյ դարձեալ ի չարն թաւալիցի, ասասցուք, թէ՛ ո՛չ, զի կամ զչարին փորձ զժնդակութեան առեալ՝ ոչ տենչայ նմին, այլ միշտ ի բարին յաւերժանալով ինքն՝ գլուխն աշխարհի, եւ ընդ նմին՝ աշխարհ ամենայն, եւ կամ բնաւ կատարի ի բարին լրմամբ, մինչ զի ոչ կարէ դառնալ ի չարն, որպէս եւ են այժմ Հրեշտակք անշարժ ի չարիսն, իբր զՔարն պլլաւր ի ջրոյ եռացեալ: Եւ ասեմ զայս ո՛չ բարձումն անձնիշխան կամացն, այլ ընդունելութիւն բարւոյն՝ լրմամբ մտացն. ահա ա՛յս է պատճառն, [զի] զմիոյ նիւթոյ էութիւն բարւոյ եւ չարի առնուլ ազալցոյց Գիրք սովորեցին:

Չայս ամենայն խաւսեցաւ Յիսուս առակաւք ընդ ժողովրդեանն. եւ առանց առակի ոչինչ խաւսէր ընդ նոսա (ԺԳ. 34):

Մարկոս ասէ, թէ վասն այնորիկ խաւսէր առակաւք, որպէս զի կարողացին լսել (տե՛ս Մարկ. Դ. 33), գոնէ թէ ո՛չ զիմաստս բանին,

սակայն զճառս պատմութեանն իմանային: Իսկ ասելն, թէ՛ «առանց առակի ոչ ինչ խաւսէր», ո՛չ յամենայն ժամ, այլ յայնժամ միայն, ո՛չ վասն այնորիկ, զի մի՛ իմանայցեն, այլ որպէս զի ի Հարցումն չարժեացէ զնոսա. բայց նոքա ոչինչ ընդոստեան, թէպէտ տանջանս ահագինս սպառնացաւ նոցա առակաւքն:

Չի լցցի ասացեալն ի մարգարէն. «Բացից առակաւք զերան իմ եւ բղխեցից զճառեալսն ի սկզբանէ աշխարհի» (ԺԳ. 35):

Թէպէտ նոքա ոչինչ Հարցին, սակայն աւետարանիչս զմարգարէն վկայ ածէ, թէ ո՛չ աւտարս ինչ, այլ զկանխասացութիւն տեսանողին կատարէ (տե՛ս Սաղմ. ՆԷ. 2), որ զվարդապետութիւն Տեառն առակաւոր ասաց լինել: Ապա ուրեմն լցեալ են տառք մարգարէիցն՝ ի կատարումն եկեալ բանին, զոր բղխէր Հոգևով առակաւոր վարդապետութեամբ, որ ինչ ծածկեալ էր ի սկզբանէ արարածոց մինչ ի կատարած աշխարհի, նախ զալստեանն իւրոյ խորհուրդ եւ ապա փառք արդարոց եւ տանջանքն մեղաւորացն, որ թէպէտ սուղ յայտնեալ էր, բայց կատարեալ ի տեառնէ ծանուցաւ:

ԳՐԻԳՈՐ ՏԱԹԵԻԱՅԻ

Եւ այս ըստ կարգի առաջնոյդ յարմարեալ, զի նա ըստ բնութեան ածէ, եւ սա:

Հարց. Վասն է՞ր խմորն երբեմն չարութեան եւ աղանդոյ աւրինակի եւ երբեմն՝ արքայութեան:

Պատասխանի. Նախ՝ զի ունի զաւրութիւն եւ ունի ապականութիւն, ըստ զաւրութեան բարոյն բաղդատի, եւ ըստ ապականութեան՝ չարին:

Դարձեալ՝ երբեմն արեգակ եւ արօսեակ զբարին նշանակէ, եւ երբեմն՝ զչար: Նոյնպէս եւ այս:

Իսկ զի՞ խմորն.

Ա. Նախ՝ զի ընտանի եւ ծանաւթ է ամենեցուն:

Բ. Երկրորդ՝ զի նա ըստ բնութեանն առնէ, ապա եւ Արարչին մարթի առնել:

Եւ երիւք բաղդատի.

Ա. Նախ՝ որպէս խմոր զամենայն ալիւրն յինքն շրջէ, այսպէս եւ առաքեալքն զամենայն աշխարհս դարձուցին:

Բ. Երկրորդ՝ յորժամ խառնի յալիւրն, յայնժամ խմորէ: Եւ առաքեալքն. յորժամ քարոզութեամբն եւ չարչարանաւք ի մէջ հեթանոսաց խառնեցան, ապա յաղթեցին նոցա:

Գ. Երրորդ՝ որպէս խմորն թաղի եւ ոչ կորնչի, այլ զալիւրն յինքն քարչէ, այսպէս եւ առաքեալքն ի մէջ հեթանոսաց ոչ կորեան, այլ գտին զնոսա:

Իսկ Գ. (Երեք) գրիւն զբազմութիւնն նշանակէ, ըստ այնմ. «Որ Բ. (Երկու) եւ Գ. (Երեք) ժողովեալ յանուն իմ, անդ եմ ես, ի մէջ նոցա» (Մաթթ. ԺԸ. 20): Եւ դարձեալ՝ բազում չափէ գրիւն եւ բազում՝ հատ:

Իսկ «Կնոջ առեալ» (Մատթ. ԺԳ. 33), որպէս այն, որ եզիտ զգրամն: Երբեմն այր կոչի վասն արիական բնութեանն, երբեմն՝ կին, վասն կրող զաւրութեան, ըստ այնմ. «Որ կրէ զամենայն բանիս զարութեան իւրոյ» (Եբր. Ա. 3):

Դարձեալ «խմոր»՝ Բանն Աստուած յարգանդի կուսին ի զանգուած տանն Աղամայ, զհոգի, զմարմին, զմիտս միաւորեալ ընդ իւրում աստուածութեանն: Նոր խառնումն եւ սքանչելի խառնուած, որպէս առողն, նոյնպէս եւ առեալն Աստուած, այն է՝ բոլորն խմորեցաւ: Եւ դարձեալ՝ որպէս խմորն փոխէ զմերձաւորն, եւ նա՝ զհեռաւորն: Նոյնպէս եւ Քրիստոս՝ զառաքեալսն: Եւ նոքաւք զամենայն հաւատացեալսն յաւդեաց յինքն՝ զլուխ եղեալ մեզ, եւ մեք անդամք ըստ առաքելոյ (Կրն Ա. Կոր. ԺԲ 27): Եւ այս ըստ հաւատոյն եւ մարմնոյ նորայ ճաշակմամբն, եւ այլն ամենայն յայտ է ի մեկնիչն:

Ղուկ. ԺԳ. 20-21
ՍԱՐԳԻՍ ԿՈՒՆԴ

Նման է արքայութիւն Ասպուծոյ խմորոյ (Ղուկ. ԺԳ. 21):

ԵՓ Որպէս խմոր ի զանգուած, նոյնպէս եւ մարմինն Քրիստոսի ի զանգուած տանն Աղամայ, կամ՝ վարդապետութիւն[ն] Քրիստոսի: Առեալ կնոջ՝ թաքոյց ի գրիս երիս (ԺԳ. 21):

Սր. (Եփ.) Կին՝ հոգի մարդոյն:

Գրիս երիս (ԺԳ. 21):

Երեք մասունք հոգոյն՝ բանական, սրտմտական, ցանկական: Երեք մասունք ժամանակիս՝ անցեալն եւ առաջիկայս եւ հանդերձեալքն: Որ յերեք ժամանակի յայսմիկ պահեսցէ յինքեան զվարդապետութիւնն Քրիստոսի, այնպիսին բոլոր զինքն լուսաւորեաց:

ԱՌԱԿ ԳԱՆՉԻ
Մաթթ. ԺԳ. 44

ՍՏԵՓԱՆՈՍ ՍԻՒՆԵՑԻ

Դարձեալ նման է արքայութիւնն Ասպուծոյ գանձի ծածկելոյ յանդի (Խմմր. Մաթթ. ԺԳ. 44):

«Անդաստան»՝ աստուածային մարգարէութեան գիրն, որ ասի զանազանութիւն տնկոց ի բառսն. իսկ «գանձ»՝ մտացն ծածկելոյ զաւրութիւն եւ իմաստութիւն ի բառսն՝ ես այլապէս «անդաստան»՝ Քրիստոս, յորում ամենայն գանձ գիտութեան եւ իմաստութեան ծածկեալ կան, զգանձս զաղտնիս եւ զծածուկս նա ոչ արկանէ առաջին շանց եւ խողոց, զմարգարիտ եւ զսրբութիւն (Կրն Մաթթ. Է. 6):

ԱՐԻՍՏԱԿԷՍ ԵՒ ԵՓՐԵՍ

Դարձեալ նման է արքայութիւնն երկնից գանձի ծածկելոյ յազարակի եւ մարգարոյ[ի] գեղեցկի գնե[ալ] ի վաճառականէ (Խմմր. Մաթթ. ԺԳ. 45):

Ջոր աւրինակ անդ հատ մանանխոյն եւ խմորն սակաւ ինչ այլ գունակ կերպարանս ունէին զմիմեանց, նոյնպէս եւ աստ՝ «գանձ¹» եւ «մարգարիս», «գլխմորն» եւ «զհապ մանանխոյն», վասն զաւրութեան քարոզութեանն յաւդէ յառակ, թէ յաղթելոց է ամենայն տիեզերաց, եւ զգանձն պատուականութեանն, զի ձգի իբրեւ զխմոր եւ տարածանի իբրեւ զմանանիս, պատուական է իբրեւ զմարգարիտ եւ բազում շահս յաւդէ իբրեւ զգանձս:

Եւ ընդէ՞ր միոյ մարգարտի ասէ. քանզի մի է ճշմարտութիւնն եւ ոչ ի բազումս ճեղքեալ: Եւ զոր աւրինակ, որ մարգարիտն ունիցի, ինքն միայն գիտէ, թէ մեծանալոց է, եւ բազմաց չէ ինչ յայտ: Բազում անգամ եւ ի ձեռին իսկ ունիցի, եւ ոչ ոք գիտէ, քանզի ոչ է, թէ անձնեղ ինչ մարմին իցէ, սոյնպէս եւ քարոզութիւնն. ոչք ունին, գիտեն, թէ մեծանալոց են: Իսկ անհաւատքն ո՛չ զգանձն գիտեն, եւ ո՛չ զմեծութիւնն ի միտ առնուն:

¹ Բ գանձս
6 - ԱՒԵՏԱՐԱՆԱԿԱՆ ԱՌԱԿՆԵՐԻ ՄԵԿՆՈՒԹԻՒՆՆԵՐ

ՅՈՎՆԱՆՆԷՍ ԾՈՐԾՈՐԵՑԻ

Դարձեալ՝ նման է արքայութիւնն երկնից գանձի ծածկելոյ յագարակի, զոր գրեալ մարդոյ՝ թագոյց եւ ի խնդութենէ անփի երթայ վաճառէ զամենայն ինչ, զոր ունի եւ զնէ զագարակն զայն (Մաթթ. ԺԳ. 44):

Ըստ պէսպէս ներգործութեան իրացն առակս յաւդէ եւ նովաւ գիմանալին ծանուցանէ, զոր աւրինակ ասէ ագարակի ոք պատահեալ, որ զգանձ ունիցի յինքն ծածկեալ, զամենայն զգոյս իւր տայ եւ զագարակն զայն ստանայ: Նոյնպէս «ագարակ» է Քրիստոսի մարմինն, զոր յերկրեղինացս էառ, եւ «գանձ ծածկեալ»՝ աստուածութիւնն, զոր գտին ի ձեռն հաւատոց հրէայք եւ հեթանոսք եւ ամենայն մարմնականացս բարաւրութիւնն ետուն: Եւ կամ զհաւաւտն իսկ, զի այն է մերն ամենայն, եւ զնա, որ բաւական է ամենայնի, փոխանակ առին, եւ զայս խնդութեամբ՝ ըստ առաքելոյ. «Չյափշտակութիւն ընչից ձերոց խնդութեանք ընկալարուք» (Եբր. Ժ. 34), եւ՝ «Ուրախ եմք ի չարչարանս, որ վասն Տեառն» (հմմտ. Կող. Ա. 24). ասէ եւ Յովհանն. «Եղեր յոգւոջ իմում մի՛ ինչ պատուական ստացուած համարիլ քան զքեզ»¹:

Եւ զարձեալ՝ «ագարակ» է տառք մարգարէից, որ ունի[ն] զանազանութիւն տնկոց ի բառսն, յորում ամենայն գանձք իմաստութեան եւ զիտութեան ծածկեալ կան՝ զաւրութիւն մտացն եւ ի ծածուկ ունելով՝ ըստ այնմ. «Դնէ ի խորս զգանձս իւր» (Մաղմ. ԼԲ. 7), զոր գտեալ ոք աշխատասէր ընթերցմամբ եւ Հոգւոյն ընդունելութեամբ, թագուցանէ ի միտս՝ ըստ այնմ. «Մի՛ փայք զսրբութիւն շանց եւ մի՛ արկանէք զմարգարիսս ձեր առաջի խոզաց» (Մաթթ. Է. 6): Ուստի եւ անճառ խնդութեամբ լնանի միտք աշխատողին եւ արհամարեալ զփառս աշխարհի եւ բարեաւ մնալ ասացեալ մարմնական հանգստի՝ ի Գիրս Սուրբ տաժանի, որ զգանձն երկնային իմաստից խորհրդեանն Քրիստոսի յամանս խեցեղէն ժողովեալ հաւաքէ ի Հին եւ ի Նոր կտակարանաց: Դարձեալ՝ «ագարակ» աշխարհս է, եւ «գանձ ծածկեալ յագարակի»՝ աշխարհի՝ է գործք բարիք, որ զարքայութիւնն ժառանգեցուցանէ: Եւ «ծածկեալ», զի պարտ է զգործս բարիս ոչ ի փառս մարդկան գործել՝ ըստ Տեառն (տե՛ս Մաթթ. Զ. 1-4), այլ ի ծածուկ Հաւր հատուցանողին, որպէս ասէ, թէ՛ «գտեալ թա-

¹ Հանգիստ սրբոյն Յովհաննու առաքելոյ եւ աւետարանչի, Ը

գոյց», եւ խնդայ ընդ զիւս գործոցն, զոր եզիտ ի բանիցի Աստուծոյ՝ ըստ Դաւթայ, թէ՛ «Յնծացայ ես ի բանս քո, որպէս այն, որ գտանէ աւար բազում» (Մաղմ. ԸԺԸ. 162), եւ յանճառ խնդութենէն լցեալ՝ հրաժարէ յաշխարհէս եւ ուրանայ զանձն եւ ստանայ սովաւ զծածկեալ կեանսն:

ԳՐԻԳՈՐ ՏԱԹԵՒԱՅԻ

Նման է արքայութիւնն երկնից գանձի ծածկելոյ յագարակի (Մաթթ. ԺԳ. 44)

Արքայութիւնն հոմանուն է եւ Ժ. (10) կերպիւ առեալ լինի ի գրոց.

Ա. Նախ՝ արքայութիւն է Սուրբ Երրորդութիւնն, ըստ որում. «Արքայութիւն քո արքայութիւն յաիպենից» (Մաղմ. ԸԽԴ. 13) եւ ծածկեալ է անմատոյց լուսով եւ անզիտութեան միզով:

Բ. Երկրորդ՝ Քրիստոս է արքա՝ որդի արքային, ըստ որում. «Մերձեալ է արքայութիւն Աստուծոյ» (Ղուկ. Ժ. 11), եւ նա ծածկեալ է յագարակի մարմնոյն:

Գ. Երրորդ՝ կոչի արքայութիւն եւ առաջին գալուստն արքային, ըստ որում. «Նասեալ է ի վերայ ձեր արքայութիւնն Աստուծոյ» (Ղուկ. ԺԱ. 20): Եւ կոչի արքայութիւն առաջին, զի արար փրկութիւն հոգւոց:

Դ. Չորրորդ՝ Գիրք Սուրբ եւ Աւետարանն, որ ծածկեալ է առակաւ եւ բառիւ, ըստ որում. «Բարձցի ի ձեռք արքայութիւնն եւ փացի [ազգի, որ առնիցէ զպարուս նորայ]» (Մաթթ. ԻԱ. 43):

Ե. Հինգերորդ՝ եկեղեցի սուրբ կոչի արքայութիւն, զի բնակիչ է արքայութեան՝ ըստ որում. «Արքայութիւնն նմանի ուղկանի» (տե՛ս Մաթթ. ԺԳ. 47-50) եւ ժողովելոց եւ ծածկեալ է ըստ կենցաղոյս:

Զ. Վեցերորդ՝ խորհուրդք եկեղեցոյ կոչի արքայութիւն, զի տանի յարքայութիւնն, զոր «նման է խմորոյ» (ԺԳ. 33), ասէ: Եւ նա ծածկեալ է մարմնական նիւթով:

Է. Եւթներորդ՝ հաւատքն կոչի արքայութիւն՝ նման հատոյ մանախոյ (տե՛ս Մաթթ. ԺԷ. 19, Մարկ. Դ. 30-34, Ղուկ. ԺԳ. 18-19), եւ նա ծածկեալ է ի սրտի:

Ը. Ութներորդ՝ հոգին մարդոյ, զի պատկեր է արքային, ըստ որում. «Արքայութիւնն Աստուծոյ ի ներքս ի ձեզ է ծածկեալ» (հմմտ. Ղուկ. ԺԷ. 21):

Թ. Իններորդ՝ եւ կոչի արքայութիւն եւ միւս անգամ գալուստն, յորժամ եկեսցէ Որդի մարդոյ արքայութեամբ իւրով (տե՛ս Մատթ. ԻԵ. 31): Եւ կոչի արքայութիւն, զի տացէ զփառս արքայութեան սիրելեաց իւրոց, եւ նա ծածկեալ է ի ներքի կողմ վարագուրին:

Ժ. Տասներորդ՝ արքայութիւն է ժառանգութիւնն երկնից, եւ նա ծածկեալ է յերկինս, զոր ակն ոչ ետես եւ այլն: Զորմէ ասէ. «Եկայք արհնեալք Նար իմոյ, ժառանգեցէք պարաստեալ ձեզ զարքայութիւնն ի սկզբանէ աշխարհի» (Մարթ. ԻԵ. 34):

Վասն գանձի

Իսկ «գանձ» կոչի վասն Ը. (8) պատճառի.

Ա. Նախ՝ զի փարթամութիւն է:

Բ. Երկրորդ՝ շահ ունողացն:

Գ. Երրորդ՝ պատուական է:

Դ. Չորրորդ՝ ցանկալի է:

Ե. Հինգերորդ՝ զի մթերեալ է:

Զ. Վեցերորդ՝ խնդութիւն տայ:

Է. Եւթներորդ՝ ստանալի է:

Ը. Ութերորդ՝ փրկութիւն, ըստ որում. «Գանձիւք եղիցի փրկութիւն նոցա» (հմմտ. Ես. ԼԳ. 6):

Իսկ «ծածկեալ» (ԺԳ. 44) վասն չորից.

Ա. Նախ՝ զի բազմաց անգիտեալ է:

Բ. Երկրորդ՝ զի խնդրելի է:

Գ. Երրորդ՝ զի գտանելի է:

Դ. Չորրորդ՝ զի մնացական է:

Հարց. «Վաճառեաց զամենայն ինչ» (հմմտ. ԺԳ. 44):

Պատասխանի. Երեք է իմացումն, այսինքն՝ որ ինչ մեր է, եւ ներս ի մեզ, եւ շուրջ զմեզ:

Ա. Նախ՝ Հոգի եւ մարմին եւ միտքս մեր է:

Բ. Երկրորդ՝ աստուածային եւ մարդկային առաքինութիւնքս ի մեզ է:

Գ. Երրորդ՝ ժամանակն եւ Հանգիստ եւ ինչք եւ ազգականք շուրջ զմեզ են, տալ պարտիմք զամենայն, ասէ:

ՎԱՍՆ ՄԱՐԳԱՐՏԻ

ԺԳ. 45-46

ՍՏԵՓՈՆՍ ՍԻՒՆԵՑԻ

Դարձեալ նման է արքայութիւնն երկնից վաճառականի, որ խնդրեսցէ գեղեցիկ մարգարիպ (հմմտ. Մարթ. ԺԳ. 45), եւ որ ինչ ի կարգին է:

Բազում զանազանութիւնք են մարգարտոց գեղեցկաց, եւ Հնդիկն, եւ պարսկականն, նոյնպէս եւ յարեւմտեան ծովուն ի Բրետտանիկան յովկիանոսի լինին եւ Բոսպորոն. լինին եւ յԱկառնական ծովուն. այդ յաղագս երեւելի մարգարտաց. իսկ որ խնդրէ զգեղեցիկն զարմանալի մարգարիտն, որ ո՛չ խնդրէ զայլափառիցն եւ զաղանգաւորացն բանս, զաղջամղջին եւ զսեւաթոյրս, այլ զճշմարիտ ակրէնսս եւ զգեղեցիկ ճրագունս, զհազարապետս խորհրդոցն Աստուծոյ, զառաքեալսն եւ զմարգարէս, եւ ի նոսայ ամենեսեան զբազմագինն Քրիստոս, եւ որ խնդրէ զայս մարգարիտ զամենայն ինչս իւր տուգանեայ (՞), զի զինքն շահեսցի եւ զփոքրն խափանէ, զի զվեհագոյն գիտութիւնն յինքն ընկալցի:

ՅՈՎՀԱՆՆԷՍ ԾՈՐԾՈՐԵՑԻ

Դարձեալ՝ նման է արքայութիւնն երկնից առն վաճառականի, որ խնդրիցէ մարգարիպս գեղեցիկս: Եւ գրեալ մի պարուական մարգարիպ՝ երթեալ վաճառեաց զամենայն ինչ, զոր ունէր եւ գնեաց զայն մարգարիպ (Մարթ. ԺԳ. 45-46):

Զոր աւրինակ անդ հատ մանանխոյ եւ խմորն սակաւ ինչ զանազանութիւն ի միմեանց ունէին, նոյնպէս եւ աստ գանձն եւ մարգարիտն, զի զնոսա վասն զաւրութեան քարոզութեանն յաւրեաց առակ, թէ յաղթելոց է ամենայն տիեզերաց, զի տարածի իբր զմանանեխ եւ ձգի իբր զխմոր, իսկ զսոսա՝ թէ շահաբեր է իբր զգանձ եւ պատուական է որպէս մարգարիտ: Ըստ որում իմանամք, թէ զոր «գանձ» ասաց, զնոյն եւ «մարգարիպ» ասէ եւ «գեղեցիկք», քանզի բազում տեսակք են մարգարտաց՝ Հնդկայինն եւ պարսկականն եւ

որ յԱրեւմտեան ծովուն եւ յովկիանոս լինի: Բայց աստ ո՛չ վասն զգալի, այլ իմանալի անխաւս մարգարտին ճառէ, զոր «գեղեցիկ» ասէ՝ ըստ այնմ, թէ՛ «Ընփրեալ է ի բիրտոց» (Երգ Ե. 10), եւ՝ «Գեղեցիկ է եւ փեսաներով քան զամենայն որդիս մարդկան» (Սաղմ. ԽԴ. 3), վասն որոյ վաճառականն խնդրէ նախ, եւ ապա՝ զոր ինչ ունի՝ տայ եւ գնէ զայն մարգարիտ: Այսինքն՝ արթուն եւ զգոյշ լինի գիւտի մարգարտին եւ հրաժարէ յերկրաւոր խորհրդոց եւ ի ցանկութեանց, որով ստացանի մարգարիտն այն, քանզի զոր աւրինակ, որ զմարգարիտն ունիցի, ինքն գիտէ, թէ մեծանալոց է, եւ բազմաց չէ յայտ, նոյնպէս եւ որ զՔրիստոս եւ զքարոզութիւն նորա ունի, գիտէ, թէ փառաւորելոց է, իսկ անհաւատքն ոչ զնա գիտեն եւ ոչ զմեծութիւն նորա ի միտ առնուցուն:

Քննելի է եւ այն, թէ ընդէ՞ր ասաց մի զմարգարիտն: Նախ՝ զի մի է ճշմարտութիւնն եւ ո՛չ ի բազումս ճեղքեալ, որպէս չարն: Եւ երկրորդ՝ «զի մի է Աստուած եւ մի՛ միջնորդն Աստուծոյ եւ մարդկան՝ մարդն Յիսուս Քրիստոս» (Ա. Տիմ. Բ. 5), որ թէպէտ զմարդկային բնութիւնս զգեցաւ՝ խառնելով ընդ աստուածութեանն, սակայն մի Որդի Աստուծոյ եւ կուսին ասի՝ անապական գոլով եւ լուսատեսիլ մարմնական էութեանն՝ վասն առ Բանն անշփոթ միութեամբ ըստ աւրինի մարգարտի գունոյ եւ մարմնոյ:

ԳՐԻԳՈՐ ՏԱԹԵԻԱՅԻ

«Մի պարուական մարգարիպ» (Մարթ. ԺԳ. 46):

Հարց. Վասն է՞ր «մի» մարգարիտ ասէ:

Պատասխանի. Ա. Նախ՝ զի մի է ճշմարիտ հաւատն եւ բոլոր, ըստ որում. «Մի Տէր, մի հաւապ» (Եփես. Դ. 5):

Բ. Երկրորդ՝ զի մի է ճշմարտութիւնն եւ բոլոր, եւ ոչ ի բազումս ճեղքի, որպէս սուտն, զի ամենայն սուտ բազում է, այլ ոչ ամենայն բազում սուտ է:

Գ. Երրորդ՝ մի է ճիշտն, եւ բազում է աւրինակն. որպէս մի է բունն եւ բազում ստեղծւնքն:

Դ. Չորրորդ՝ մի է ճշմարիտ բանն, եւ բազում՝ պարագայքն. որպէս մի է գոյացութիւնն, եւ բազում՝ պատահմունք:

Եւ զարձեալ՝ մի է, զի միայն ստացողքն մեծանան նովաւ, եւ միայն նոքա գիտեն զմեծութիւն նորա: Այսպէս՝ մի է հաւատն, եւ

միայն ստացողին է աւգուտ, եւ միայն նոքա գիտեն զմեծութիւնն, իսկ անհաւատքն՝ եւ ոչ ինչ:

Դարձեալ՝ «մարգարիպ» կոչի Տէր մեր, ըստ այնմ՝ զանխաւս մարգարիտն:

Եւ այս ԺԶ. յատկութեամբ մարգարտի.

Ա. Նախ՝ ի ցաւոյ գոյանայ: Եւ Բանն Աստուած ի Հաւրէ էջ:

Բ. Երկրորդ՝ յարգանդ՝ ոստրէոս, կուսին՝ անսերմն յղացեալ:

Գ. Երրորդ՝ որպէս նա անապական ծնեալ:

Դ. Չորրորդ՝ ի մէջ ծովու կենցաղոյս, կամ եզրական գիտութեանց:

Ե. Հինգերորդ՝ ցանկացողքն գտանեն միայն:

Զ. Վեցերորդ՝ մի է յամենայն էսս եւ ընտրեալ ի բիւրուց:

Է. Եւթներորդ՝ «պարուական է, եւ ամենայն ինչ չարժ գնա» (հմմտ. Առակ. Ը. 11)՝ ըստ իմաստնոյն:

Ը. Ութերորդ՝ «գեղեցիկ է փեսայն քան զամենայն որդիս մարդկան» (հմմտ. Սաղմ. ԽԴ. 3)՝ ըստ Դաւթի:

Թ. Իններորդ՝ յստակ է անմեղութեամբ:

Ժ. Տասներորդ՝ անապական մարմնով:

ԺԱ. Մետասաներորդ՝ պայծառ է սքանչելեաւք:

ԺԲ. Երկոտասաներորդ՝ լուսաւոր է բանիւ:

ԺԳ. Երեքտասաներորդ՝ բժշկական է արդեամբ:

ԺԴ. Չորեքտասաներորդ՝ բոլոր է եւ կատարեալ անսկիզբն աստուածութեամբ եւ անվախճան մարդկութեամբ:

ԺԵ. Հնգտասաներորդ՝ անբեկ եւ անբաժան միութեամբ:

ԺԶ. Վեցտասաներորդ՝ անխաւս մարգարիտ, զի անգին է մեծութեամբ:

Այսքան վասն պատուական մարգարտին, նմանապէս եւ զհաւատ եւ զայլ եղանակ արքայութեանն իմասցիս:



ԱՌԱԿ ՈՒՌԱԿԱՆԻՆ

Մաթթ. ԺԳ. 47-50

ՍՏԵՓԱՆՈՍ ՍԻՒՆԵՑԻ

Դարձեալ նման է արքայութիւնն երկնից ուռկանի արկելոյ ի ծով եւ յամենայն ազգաց ժողովելոց (Մաթթ. ԺԳ. 47):

«Ծով» ալեկոծեալ՝ կենցաղս է մարդկային՝ յամենայն ազգէ ժողովեալ ուռկանաւն աներեւութիւ կամ զզանազան եւ բազմադիմի մարդկան յաւժարութիւն կամ կոչումն հեթանոսաց. գործաւղք ուռկանին՝ Տէրն եւ հրեշտակք, որ սպասաւորեն նմա, եւ ոչ ելանէ ուռկանն, եթէ ոչ լրումն հեթանոսաց մտցէ, այսինքն՝ ոչ դադարէ վարդապետութիւնն Քրիստոսի մինչեւ ի վախճանն աշխարհիս:

ԱՐԻՍՏԱՎԷՍ ԵՒ ԵՓՐԵՄ

Դարձեալ նման է արքայութիւնն ուռկանի արկելոյ ի ծով (Մաթթ. ԺԳ. 47):

Եւ ի՞նչ ընդհատէ այս յորոմանն առակէ, զի անդ ոմանք կեան եւ ոմանք կորրնչին, այլ անդ վասն չար կրաւնիցն արար զընտրութիւն, որք ոչ բարւոք նայիցին ի միտս զրոց: Եւ աստ, վասն զործոց չարաց, որքան զամենիսեան եւս հիքագոյն իցեն:

Ելցեն,- ասէ,- հրեշտակ[ք] եւ մեկնեսցեն զչարս ի միջոյ արդարոց եւ արկցեն [զնոսա] ի հնոց հրոյն (ԺԳ. 49-50):

Զայս առակ առանց հարցանելոյ ինքն մեկնէ եւ սակաւ մասամբ զամենայն յայտ առնէ, զի յորժամ լսիցեն, զի զյոռիսն ի բաց խլիցէ, անպատժական ինչ զկորուստն համարիցին: Մեկնութեամբն յայտ առնէ, թէ.

Ի հնոց հրոյն անգանելոց են, ուր լալ աչաց է եւ կրճել արամանց (ԺԳ. 50):

Բայց դարձեալ յետ այսր ընտրութեան, որ ի ծովէս է, այսինքն՝ յաշխարհէս, այլ միւս եւս ընտրութիւն լինի նոցա. ա՛յս ահա կարի եւս երկիւղի է:

Եւ յորժամ հանին,- ասէ,- զնա արքաքս, մարջին ընտրել զբարի բարին, եւ զխտրանսն արքաքս ընկեցին (հմմտ. ԺԳ. 48):

Զկունքն, որ մտին յուռկանսն՝ մարդիք ի հաւատս նորա, եւ «բարիք»ն այնոքիկ են, որ սկսան եւ կատարեցին զԱւետարանն նորա: Եւ «խտրան» այնոքիկ են, զորս մերժեաց, ընկէց եկեղեցի ի միջոյ իւրմէ, վասն ուրացութեան նոցա:

«Ի միտ առէ՞ք,- ասէ,- զայս ամենայն»: Ասեն. «Այո՛, Տէ՛ր» (հմմտ. ԺԳ. 51):

Եւ քանզի իմացան, ապայ եւ գովէ զնոսա:

Վասն այնորիկ,- ասէ,- ամենայն դպիր՝ աշակերտեալ արքայութեանն երկնից, նման է առն փանուրեառն (ԺԳ. 52):

Որպէս եւ այլուր իսկ ասէ, թէ՛ «Առաքեցից ի ձեզ իմաստունս եւ դպիրս» (հմմտ. Մաթթ. ԻԳ. 33): Տեսանես, զի չխոտէ զհինն, այլ գովէ եւ գանձս եւս կոչէ: Որպէս զի որք աստուածեղէն գրոց չիցեն տեղեակք, չեն երբէք լինելոց տանուտեարք՝ ոչ յանձանց ինչ ունիցին եւ ոչ յայլոց ինչ առնուցուն, այլ անփոյթ արարեալ՝ լինին սովամահ: Եւ ոչ այնպիսիքն միայն, այլեւ հերձուածողք վրիպեալ են յայնպիսի երանութենէ, զի ոչ հանեն զչինն եւ ոչ՝ զՆորն, այլ յերկոցունց զրկեալ են, զի սոքա, երկոքին ընդ միմեանս կապեալ՝ զրկախառնեն: Եւ արդ լուիցեն, որք զգրոյն ընթերցուածոց փոյթ յանձին չկամիցին ունել, որչափ վնաս անձանց կուտիցեն:

ՅՈՎՆԱՆՆԷՍ ԾՈՐԾՈՐԵՑԻ

Դարձեալ՝ նման է արքայութիւնն երկնից ուռկանի արկելոյ ի ծով եւ յամենայն ազգաց ժողովելոյ: Զոր՝ իբրեւ լցաւ, հանեալ ի ցամաք՝ եւ նստեալ ժողովեցին զբարի բարին յամանս եւ զխտրանն ի բաց ընկեցին (Մաթթ. ԺԳ. 47-48):

Որ նախ քան զայս առակք էին կոչման հեթանոսաց ի հաւատս եւ վարդապետութեան Աւետարանին էին ապացոյցք, իսկ այս առ

հանդերձեալն հայի ընտրութիւնն, որ ո՛չ հաւատոց, այլ գործոց է քննութիւն: Վասն որոյ յետ ուռկանի Աւետարանին արկելոյ ի ծով աշխարհիս եւ յամենայն ազգաց հրէից եւ հեթանոսաց ժողովելոյ ի հաւատս, եւ կամ զբազմադիմի յաւժարութիւնս մարդկան ի մի վայր հաւաքելոյ եւ լնլոյ կենցաղոյս, միանգամայն եւ զհեթանոսաց եկեղեցի, յայնժամ այլ իմն ահագին ընտրութիւն լինելոց է համեստ եւ հաստատ ատենիւ. զստուգապէս բարիս, որք սկսան զհաւատս եւ կատարեցին գործով, յամանս արքայութեանն ժողովել եւ խոտանիցն բացընկեցիկ լինել, որք եկին ի հաւատս եւ ուրացան եւ կամ գործովք ընկղմեցան:

Այնպէս եղիցի ի կապարածի աշխարհիս. ելցեն հրեշտակք եւ մեկնեցեն զչարս ի միջոյ արդարոց: Եւ արկցեն զնոսա ի հնոց հրոյն. անդ եղիցի լալ եւ կրճել արամանց (ԺԳ. 49-50):

Ձայս առակ առանց հարցանելոյ ինքն մեկնէ եւ մասամբ զամենայն յայտ առնէ եւ բացերեւակի զտանջանս ցուցանէ, զի մի՛ յորժամ բացընկեցիկ լինիցին, անպարտական զկորուստն համարեսցին: Դարձեալ՝ ուսուցանէ, թէ յայսմ կենցաղի ո՛չ է խտրոց արդարոց ի մեղաւորաց, քանզի իրաւունքն Աստուծոյ ո՛չ որոշեալ բաժանէ զնոսա ի միմեանց. մի՛ զի թերեւս զղջասցին, եւ երկրորդ՝ զի պիտանացու են աշխարհիս իբր ցանկ այգւոյ եւ կամ տերեւ խաղողոյ: Իսկ յորժամ դարձուցանէ զիրաւունս յարդարութիւն, յայնժամ զուտ ընտրութեամբ տրոհէ ո՛չ միայն զմարդ ի մարդոյ, այլ եւ զխորհուրդ ի խորհրդոյ եւ զարժանաւորն հատուցանէ զատաստանի՝ ըստ իւրաքանչիւր գնացիցն նոցա:

ԳՐԻԳՈՐ ՏԱԹԵՒԱՅԻ

- Ասեմք Ժ. (10) կերպիւ.
- Ա. Նախ՝ ուռկանն գործի[ք] է որսոյ, եւ Աւետարանն՝ մարդկան:
- Բ. Երկրորդ՝ յայլմէ ձգի, եւ նա ի Քրիստոսէ:
- Գ. Երրորդ՝ ի մէջ ծովու է պիտանի, եւ նա ի ծովի կենցաղոյս:
- Դ. Չորրորդ՝ ի ցամաք ձգէ, եւ նա յարդարութիւն եւ յերկինս հանէ:
- Ե. Հինգերորդ՝ յանկարծակի ձգի, եւ նա յանկասկած ժամու:

- Զ. Վեցերորդ՝ ըմբռնէ, եւ Աւետարանն՝ զմարդիկ:
- Է. Եւթներորդ՝ հաւաքէ, եւ Աւետարանն՝ յեկեղեցիս:
- Ը. Ութերորդ՝ բաժանէ յայլ ձկանց, եւ նա՝ յանհաւատից:
- Թ. Իններորդ՝ զբազումս ըմբռնէ, եւ բազում են հաւատացեալք:
- Ժ. Տասներորդ՝ անխտիր ժողովէ, եւ նմա չիք խտիր ոչ հրէի, եւ ոչ հեթանոսի (տե՛ս Գաղ. Գ. 27-28) եւ այլն:

Եւ դարձեալ ասացաւ վասն ուռկանի եւ կարթի յառաջագոյն յերկրորդ հատորն՝ յԲ. (Չրդ) համարն տես¹:

- Հարց. Զի՞նչ է «բարի՛ բարին յամանս» (ԺԳ. 48):
- Պատասխանի. Կրկին է ընտրութիւնն.
- Ա. Նախ՝ ուռկանաւ, որ ի ծովէ աշխարհի մտին ի հաւատս սուրբ:
- Բ. Երկրորդ՝ որ ընտրին ուղղափառք եւ չարափառք, արդարք եւ մեղաւորք, որք սկսան ի հաւատս եւ կատարեցան ի գործս բարիս, նոքա մնան յեկեղեցի: Եւ որք թիւրեցան ի հաւատոց կամ ի գործոց, արտաքսին յեկեղեցոյ, ըստ այնմ՝ «Որ երախայք էք, եւ թերահաւարք եւ անմաքուր, ելէ՛ք», գոչէ սրբազանն ձայն²:

- Եւ որպէս աստ կրկին է ընտրութիւնն, այսպէս եւ անդ:
- Ա. Նախ՝ յետ մահու հոգոց:
- Բ. Երկրորդ՝ ի կատարածի հոգւոց եւ մարմնոց:
- Եւ դարձեալ՝ որք աստ յեկեղեցոյ արտաքսին, եւ անդ՝ յարքայութեանցն Աստուծոյ, զի պատկեր է եկեղեցի վերնոյն Սիոնի:
- Հարց. «Դպիր աշակերտեալ» (ԺԳ. 52):
- Պատասխանի. «Տանուկերն» (ԺԳ. 52) Քրիստոս է՝ Տէր երկնի եւ երկրի, եւ ունի զՆոր եւ զՀին գանձս կտակաց: Եւ ամենայն, որ

¹ Գ Տե՛ս հատոր Բ. Վասն ուռկանի:
 «Հարց. Զի՞նչ կարթն եւ զի՞նչ ուռկանն:
 Պատասխանի. Վեց իրաւքն զանազանին.
 Ա. Նախ՝ ծածուկ ուսուցանելն կարթ է, եւ յայտնից՝ ուռկան:
 Բ. Երկրորդ՝ մերձաւորն՝ կարթ, եւ հեռաւորն՝ ուռկան:
 Գ. Երրորդ՝ որ յինքեանց խաւսիցն՝ կարթ, եւ որ յԱւետարանցն՝ ուռկան:
 Դ. Չորրորդ՝ միոյն քարոզն՝ կարթ, եւ բազմացն՝ ուռկան:
 Ե. Հինգերորդ՝ նախքան զխաչն՝ կարթ, եւ յետոյ՝ ուռկան:
 Զ. Վեցերորդ՝ ի հրեայսն կարթ, եւ ի հեթանոսս՝ ուռկան», էջ 68աբ:
² Տե՛ս Պատարագամատոյց ըստ արարողութեան Հայաստանեայց առաքելական սուրբ եկեղեցւոյ, Գ. կանոն սրբոյ պատարագի (պատարագ հաւատացելոց). հմմտ. «Մի՛ ոք յերախայից, մի՛ ոք ի թերահաւատից, եւ մի՛ ոք յապաշխարողաց եւ անմաքրից մերձեցի խորհուրդս». համացանցային կայք՝ <http://www.sourphagop.org/books/Surb%20Patarag.pdf>

դպիր է եւ իմաստուն, յորժամ արքայութեանն աշակերտէ, լինի տանուաէր՝ եւ Նոր, եւ Հին գանձուցն հանող, որպէս վարդապետն Քրիստոս:

Եւ յայցանէ արտաքոյ են տգէտք, որ ոչ զՀինն գիտեն եւ ոչ զՆորս: Ոչ գիտեն եւ ոչ յայլմէ ուսանին եւ լինին սովամահ, ըստ որում. «Տաց ձեզ սով լսելոյ զԲանն Աստուծոյ» (հմմտ. Անովս. Ը. 11): Եւ դարձեալ՝ հերձուածողք, որպէս մանիքեցիք զՀինն ուրանան եւ մարկիոնացիք՝ զՆորս:

Եւ այժմ այլ ազգիք զՀինն եւ զՆորս ուրանան, զի որ զմինն ոչ ընդունի, եւ ոչ գերկուսն, զի Հինն եւ Նորս կապեալ են ընդ միմեանս գրկախառն, միաշունչ եւ միադէմ, վասն որոյ Աստուածաշունչ կոչի՝ ի միոյ Հոգոյ շնչեցեալ:

Այսքան առ այս:



ԱՌԱԿ ՆԱՐԻԻՐ ՈՉԽԱՐԱՅ

Մաթթ. ԺԸ. 12-14

ԱՐԻՍՏԱԿԷՍ ԵՒ ԵՓՐԵՄ

Զիա՞րդ թուի ձեզ, թէ լինիցի ճ. (100) ոչխար, եւ մուրիցի մի ի նոցանէն, ո՞չ ապաքէն թողուցու զՂ. (90) եւ զինն: Եւ խնդրիցէ զմուրեալն եւ որ զկնի (հմմտ. Մաթթ. ԺԸ 12):

Տեսանե՞ս՝ որպիսի իրաւք յորդորէ զմեզ՝ ունել խնամ տկար եղբարց: Արդ, մի՛ ասիցես, թէ այս անուն դարբին է եւ այս անուն՝ կոշկակար, եւ միւսն՝ Հողագործ եւ արհամարհիցես, զի մի այնպիսի ինչ աղտ ախտանայցես: Տե՛ս, զիա՞րդ զգուշացուցանէ՝ խոնարհել եւ տանել դարման այնպիսեացն եւ ի հասարակաց սովորութենէ, յորժամ թողեալ հովուին՝ զայլսն՝ երթեալ զկորուսեալն խնդրիցէ: Թէ գտանիցէ զմուրեալն, ուրախ առնի յոյժ ընդ զիւտ եւ ընդ ապրել կորուսելոյն: Եթէ Աստուած այնպէս ուրախ լինիցի ընդ զիւտ միոյ ուրուք ի փոքրկանց, դու զիա՞րդ արհամարհիցես, զոր Աստուծոյ այնչափ փոյթ իցէ, յորոց վերայ զանձնն եւս պարտ էր դնել, թէ ասիցէ՝ տկար եւ անարգ իցէ: Վասն այնորիկ իսկ պարտ է խնամ ունել, զի զնա կեցուցանել կարիցես: Քանզի եւ ինքն իսկ եթող զՂ. (90) եւ զինն ոչխարսն եւ եկն եւ չկարաց բազմաց փրկութիւնն խաղաղել զմիոյն կորուստ: Իսկ Ղուկաս ասէ, թէ ի վերայ ուսոցն եւս եբարձ (տե՛ս Ղուկ. ԺԵ 5): Եւ մեծ ուրախութիւն եղեւ ի վերայ ապաշխարութեան՝ միոյ մեղաւորի, քանզի ի վերայ Ղ. (90) եւ ինն արդարոցն եւ ի թողլոյ զապրեալսն եւ ի խնդալ ընդ զիւտ կորուսելոյն, բազում եցոյց զխնաման:

ԵՓ Ընդէ՞ր լինի ուրախութիւնն վասն մեղաւորացն, զի ապաշխարեն առաւել քան զարդարոցն, զի ոչ մեղան, այլ քանզի ուրախութիւն զկնի տրտմութեան լինի: Եւ զի՞ եղեւ նոցա տրտմութիւն. զի մեղան. լինի ուրախութիւն, յորժամ ապաշխարեն: «Ուրախ լինել, - ասէ, - պարտ էր, զի եղբայրս քո այս մեռեալ էր եւ եկեաց» (հմմտ. Ղուկ. ԺԶ. 32) եւ այլ եւս: Եւ ահա ուրախութիւն եւ տրտմութիւն հոգւոյ չարչարանք են: Զիա՞րդ ի յերկինս տրտմեցուցանեն եւ ուրախ առնեն,

¹ Ա հուվիմ, Բ հովվիմ

² Ա > ապաշխարութեան

այլ դատապարտեցան ի մեզս: Անուանեցաւ տրտմութիւնն ի վերինսն, զի մեք լիցուք չարչարեալք, զի զհրեշտակս տրտմեցուցին մեզք մեր, քանի՜ եւս արժան է մեզ ապաշխարել:

ՅՈՎՆԱՆՆԷՍ ԾՈՐԾՈՐԵՑԻ

Զիս՝րդ թուի ձեզ. եթէ լինիցի մարդոյ հարիւր ոչխար, եւ մոլորիցի մի ի նոցանէ, ո՞չ թողուցու զիննսուն եւ զինն ոչխարն ի լերինս եւ երթայցէ խնդրիցէ գմոլորեալն (Մարթ. ԺԸ. 12):

Ընդել աւրինակաւս ցուցանէ ո՞չ վայրապար լինել զիւրն գալուստ, այլ կարի յարմար եւ մոլորելոյն հարկի, որպէս զի յորդորէ զմեզ ըստ նմին աւրինակի խնամ տանել տկար եղբարց, քանզի եւ զհոփիւն ոչ կարէ խաղաղացուցանել բազմացն զիւտ վասն միոյն կորստեան: Այսպէս եւ դու մի՛ զոք արհամարհիցես, թէ այս անուն հողագործ է, կամ այն անուն՝ դարբին, այլ խոնարհութեամբ դարման տանել այնպիսեացն եւ առաւել փոյթ վասն մոլորելոցն ունել, քան փրկելոցն, քանզի փրկեալքն ամրացեալք են ի հաւատն իբր ի լերինս, իսկ մոլորեալն յածի եւ գազանակուր լինի, վասն այսորիկ պարտի խնդրել: Բայց ի հարիւր ոչխար առակեաց զբանականութեանս լրումն՝ զհրեշտակաց եւ զմարդկան, զի անմեղք եւ անմահ կենդանիք յԱստուծոյ ստեղծան, իսկ մինն մոլորեալ եղեւ յանմեղութենէն, միանգամայն եւ յանմահութենէն, որով համեմատ վերին բանականացն էր, եւ պակասեաց ի կատարեալ թուոյն՝ ըստ Սողոմոնի, թէ՛ «Պակասեալն ոչ կարէ ի թիւ անկանի» (Ժող. Ա. 15), զի որպէս ոչխար ի գաւթէ պակասի, եւ Ադամ՝ ի դրախտին փառաց, վասն այնորիկ մի ասէ: Ուստի գթացեալ արարիչն ի խնդիր ել՝ թողեալ անմոլար զինն դասս հրեշտակացն, զոր իննսուն եւ իննիւն նշանակեաց, ի լերինս, այսինքն՝ յերկինս, եւ եկն ի մահ վասն միոյ մոլորելոյն: Նաեւ այսու այլ իմն յայտ առնէ, թէ որպէս մին առ հարիւրն ունի զանազանութիւն, այսպէս մարդկային բնութիւնս առ հրեշտակացն բազմութիւն, քանզի հազարաց հազարք են եւ բիւրուց բիւրք են: Եւ որպէս ի դրամոցն թիւ մի ի տասանցն էր, որով զնոյն բանական պատկեր ունել ցուցանէր, այսպէս եւ յոչխարացն մի ոչխար էր, որ զնմանութիւն անմահութեանն յանձին բերէր:

³ Ա քանզի

Եւ եթէ լինիցի գրանել զնա, ամէ՛ն ասեմ ձեզ, զի ուրախ լինի ի վերայ նորա առաւել քան ի վերայ իննսուն եւ ինունցն, որ չիցն մոլորեալ (ԺԸ. 13):

Տակաւին յաւրինակն գայ. բայց դու ինձ զճշմարտութիւնն իմա, քանզի զ«եթէ» բառը ոչ եթէ ըստ կարծեացն դնէ, որ ճշմարտապէսն գտաւ, այլ գայն յայտ առնէ, եթէ ո՞չ հարկիւ եւ բռնութեամբ է ազատութիւնն մեր, այլ կամաւք եւ յաւժարութեամբ, յորժամ նա այց առնիցէ, եւ մեք ի գիւտն եկեսցուք: Քանզի լինի եւ այն, զի նա խնդրիցէ, եւ մեք ապստամբեալ ի բաց հետիմք, բայց յորժամ գտանիցեմք, կարի իմն ուրախացուցանեմք զնա, որով յայտ է, թէ կորուսանելովն տրտմեցուցանեմք: Արդ, եթէ ուրախանայ Տէր յարարածս իւր ըստ երգոյն (տես՝ Մաղմ. ՃԳ. 31) այնքան, մինչ զի ի վերայ ուսոց բառնայ՝ ըստ Ղուկայ (տես՝ Ղուկ. ԺԵ. 5), ապա դու ընդէ՞ր տրտմիցիս: Եւ թէ ընդէ՞ր ի վերայ գտանելոցն առաւել ուրախանայ, քան ի վերայ անմոլարիցն: Ըստ սովորութեան վարի, զի ուրախութիւնն զկնի տրտմութեանն է, զի տրտմեցան ընդ մեզս մարդկան, ուրախանան, յորժամ ապաշխարեն մարդիկ՝ ըստ այնմ. «Պարտ է ուրախանալ, զի եղբայրս այս մեռեալ էր եւ եկ[ե]աց, կորուսեալ էր եւ գրաս» (Ղուկ. ԺԵ. 32): Արդ, եթէ ի մեղս գոլով մեր՝ տրտմին նոքա, իբր այն՝ «Ձղջացայ, զի արարի գմարդն» (հմմտ. Ծննդ. Զ. 7), քանի՛ առաւել պարտ է տրտմութիւն զգնուլ մեզ ի մեղս գոլով եւ յապաշխարութիւնն փութալ:

Այսպէս ո՞չ են կամք առաջի հար իմոյ, որ յերկինս է, եթէ կորիցէ մի ի փոքրկանցս յայցանէ (ԺԸ. 14):

Կա՛մ թէ՛ գայս առաջին կամք ասէ Հաւր, զի ոչ կամի բնաւին զկորնչիլն՝ ըստ այնմ, թէ՛ «Ոչ խնդայ Աստուած ի կորուստ կենդանեաց» (Իմաստ. Ա. 13), եւ այս երկրորդ՝ ի մեղացն դառնալ եւ զնա ուրախացուցանել: Կա՛մ թէ՛ ոչ են կամք Հաւր իմոյ, թէ՛ ոք ի մեղս լինիցի եւ նովաւ զկորուստն ժառանգէ, այլ զդառնալն եւ զփրկութիւնն՝ ըստ այնմ. «Ոչ կամիմ գմահ մեղատրին, այլ զդառնալ նորա ի չար ճանապարհէն եւ զկեալն» (Եզեկ. ԺԸ. 32): Բայց այսու ամենայնիւ զնոսա, որք հանդերձեալ են յերկինս ելանել, մանուկ լինելովն՝ զամբարտաւանութիւնն առ ոտն հարկանել եւ առ գայթազեցուցիչսն արթունս լինել:

ԳՐԻԳՈՐ ՏԱԹԵԲԱՅԻ

Հարց. Զի՞նչ է «հարիւր ոչխարն» (Մաթթ. ԺԸ. 12):

Պատասխանի. Ա. Նախ՝ զմարդիկ ընդ հրեշտակացն թուէ հաւասար պատուով եւ կատարեալ թուով: Դարձեալ՝ Հարիւրն Ժ. (10) Ժ. (10) է, ցուցանէ Թ. (9) դասք հրեշտակացն եւ զմարդկան Ժ. (10) դար ի վերայ նոցա: Եւ յայտ է ի Ժ. (10) կորուսեալ դրամէն:

Եւ յորժամ մարդն մոլորեցաւ, «Թ. (9)»՝ զդասս հրեշտակացն ասէ եւ «իննսուն», զի կատարեալք են եւ նուիրեալք Աստուծոյ: Իսկ «ոչխար» կոչին առհասարակ ԲԺ.ն (12) յատկութեամբ.

Ա. Նախ՝ զի սուրբ են:

Բ. Երկրորդ՝ պատարագելիք:

Գ. Երրորդ՝ ծնընդկան բարեաց:

Դ. Չորրորդ՝ քաղցր կաթամբ սնուցանեն:

Ե. Հինգերորդ՝ ունին նիւթ լուսոյ՝ զիմաստութիւն:

Զ. Վեցերորդ՝ զինքեանս ծածկեն:

Է. Եւթներորդ՝ զայլս զգեցուցանեն:

Ը. Ութերորդ՝ միմեանց հովանի լինին:

Թ. Իններորդ՝ հովուելիք են:

Ժ. Տասներորդ՝ զգաւն են:

ԺԱ. Մետասաներորդ՝ աւճահալածք են:

ԺԲ. Երկոտասաներորդ՝ պարկեշտ են, որպէս ասացաւ յառաջին Համարն:

Հարց. Զի՞նչ է «լերինս ասելն» (ԺԸ. 12):

Պատասխանի. Կամ զերկինս է իմանալ կամ զհրեշտակս վասն չորից.

Ա. Նախ՝ զի բարձր են բնութեամբ:

Բ. Երկրորդ՝ հեռացեալք ի մէնջ:

Գ. Երրորդ՝ անշարժ հաստատեալք:

Դ. Չորրորդ՝ ամրացեալք ի թշնամեաց:

Հարց. Որպէ՞ս «մոլորեցաւ մինն» (Խմմր. ԺԸ. 12):

Պատասխանի. Չորիւք.

Ա. Նախ՝ ի հովուէն:

Բ. Երկրորդ՝ ի հաւտէն:

Գ. Երրորդ՝ ի փարախէն:

Դ. Չորրորդ՝ ի ճանապարհի պատուիրանէն, որպէս ասէ Դաւիթ. «Մոլորեցայ ես որպէս զոչխարն կորուսեալ» (Մաղմ. ՃԺԸ. 176):

ԱՌԱԿ ԵՐԿՈՒՅ ՊԱՐՏԱՊԱՆԱՅՆ

Մաթթ. ԺԸ. 23-35

ՍՏԵՓԱՆՈՍ ՍԻՒՆԵՅԻ

Վասն այնորիկ նմանեցաւ արքայութիւն Երկնից առն թագաւորի (Մաթթ. ԺԸ. 23), եւ որ ի կարգին է:

Միտք առակիս այս են. ուսուցանել մեզ, թէ պարտիմք զյանցանս մարդկան, որ առ մեզն լինին, թողուլ նոցայ պարտական ամենայնի մարդկան ձեռն, եւ յետ սորա յարտաքինսն բանսարկուն. եւ կամ որ ունի ինչ ի յաւիտենէս յայսմանէ քանքար բարի մարդիկ, որով մեծանուն լինէր Աբրահամ եւ այլք սուրբք. քանքար հար որ ի կապարոյ, յորոյ վերայ] նստէր կինն անիրաւ, զոր ետես Զաքարիաս (Կեն Զար. Ե. 7):

Նրամայեաց զնա վաճառել փէրն եւ զկինն նորա եւ զորդիս (ԺԸ. 25):

Հրամայէ Աստուած հրեշտակաց եւ այլոց սպասաւորաց տալ ցտանջաւղսն. «տանջաւղքն»՝ հրեշտակք ի դատաստանի հանդերձելումն:

ԱՐԻՍՏԱԿԷՍ ԵՒ ԵՓՐԵՄ

Եւ յառաջ մատուցեալ՝ մտադրութեամբ լսիցեմք զառակն.

Մաքուցաւ, - ասէ, - առ նա պարպապան մի բիր փաղանդոյ եւ զի ո՛չ գոյր հաքուցանել, հրամայեաց զնա վաճառել զկին եւ զորդիս (Խմմր. Մաթթ. ԺԸ. 25):

Մի՞թէ յանգորոյն եւ յանողորմ ինչ մտաց. ա՛ւն անդր, այլ զարհուրեցուցանել կամի զնա սպառնալեաւքն, զի յաղաչանս ածիցէ եւ ո՛չ զի վաճառիցէ, զի թէ զայն կամէր, յորժամ աղաչեացն, չանսայր, եւ ոչ զայնչափ պարտսն շնորհէր: Եւ ընդէ՞ր ո՛չ յառաջ, քան զհամարսն եթող նմա զպարտսն. ցուցանել կամեցաւ, թէ յո՛րչափ պարտուց արար զնա ազատ:

«Երկայնամիտ լեր, - ասէ, - առ իս, եւ զամենայն հապուցից քեզ»:
Եւ զթացեալ փէրն արձակեաց զնա եւ զպարսսն երթող (ԺԸ. 26-27):

Տեսանես դարձեալ զմարդասիրութեանն առաւելութիւնն. ժամանակ միայն խնդրեաց ծառայն, եւ նա եւս մեծ քան զոր¹ խնդրեացն, ետ. զամենայն պարտսն, ասէ, շնորհեաց նմա յաւժար եւ յառաջնունմն իսկ էր թողուլ: Եւ ոչ կամեցաւ, թէ իւր միայն իցէ ձիրն, այլ զի եւ նա եւս նպաստ լիցի աղաչանաւքն եւ մի՛ առանց պսակելոյ զնասցէ: Եւ զի նորա էր ամենայն, թէպէտ եւ անկաւ ծառայն եւ աղաչեաց, պատճառս թողութեան զգթալն ցուցանէ: «Գթացաւ», ասէ եւ «թող նմա»², «եւ ելեալ» վաղվաղակի. ոչ յետ բազում ժամանակի, այլ անդրէն վաղվաղակի, մինչդեռ զերախտիսն ի ձեռին ունէր, ի չարիս վարէր պարգեւաւն եւ զազատութիւնն, զոր առ ի Տեսառնէն, մոռացաւ:

Եգիտ,- ասէ,- զմի ի ծառայակցացն, որ պարտ էր, ճ. (100) դահեկան, խեղդէր զնա եւ ասէր. «Նապոյ, զոր պարտիսն» (ԺԸ. 28):

Տեսե՞ր զՏեսառն մարդասիրութիւնն, տես՛ս եւ զծառային խստութիւնն եւ զանմարդի բարիսն: Եւ նա ասէ. «Երկայնամիտ լեր, եւ հապուցից քեզ» (Մաթթ. ԺԸ. 26): Եւ նա ոչ զբանսն յիշէր, որովք ինքն ապրեցաւ ի պարտուցն բիւր տաղանդաց: Եւ ո՛չ զնաւահանգիստն զմտաւ ածէր, որ ի կարէ ձմեռն ձմերայնոյն փրկեցաւ, եւ ո՛չ կերպարանք աղաչանացն յիշեցուցանէին նմա զՏեսառն մարդասիրութիւնն, այլ զայն ամենայն առ խստութեան եւ ազահութեան եւ ռիսակալութեան սրտին մոռացեալ, քան զգազանս եւս վայրենիս վայրենագոյն լեալ³, խեղդէր եւ պնդէր զծառայակիցն եւ չածէր այնպիսի ինչ զմտաւ եւ ոչ յիշէր զիւր տաղանդացն, թէպէտ չէին զոյգ նորա պարտքն եւ սորայ, զի մին վասն բիւր տաղանդաց եւ միւսն վասն ճ. (100) դահեկանի աղաչէր, մին՝ զծառայակիցն եւ միւսն՝ զտէրն, մին՝ կատարեալ թողութիւնս առնոյր բիւրուցն եւ միւսն՝ ժամանակ խնդրէր սակաւուցն, եւ ոչ լսէր ոք:

Տարաւ Էարկ,- ասէ,- զնա ի բանդ, փեսին ծառայակիցքն եւ եկին պարսսնցին փեսանն (հմմտ. ԺԸ. 31):

¹ Բ գորս

² Ա > եւ թող նմա

³ Ա > քան զգազանս եւս վայրենիս վայրենագոյն լեալ

Մարդկան անգամ հաճոյ չէին իրքն, թող թէ Աստուծոյ, վշտակիցք¹ լինէին, որ չէին ինչ պարտականք, արդ, զի՞նչ ասիցէ տէրն.

«Ծառայ չար,- ասէ,- զայն ամենայն պարսսն թողի քեզ, չէ՞ր պարտ եւ քեզ՝ ողորմել քում ծառայակցին, որպէս եւ քեզ ողորմեցայ» (հմմտ. ԺԸ. 32-33):

Տես՛ս դարձեալ զհեղութիւն Տեսառնն. դատ դնէ եւ իրաւունս տայ, թէպէտ հանելոց էր զպարգեւսն, մանաւանդ, թէ ոչ նա իսկ է², որ հանիցէ, այլ որ առն անդրէն դարձուցանէ, թէ՛ «զայնչափ պարսսն թողի քեզ, չէ՞ր պարտ եւ քեզ՝ ողորմել քում ծառայակցին»: Թէպէտ եւ իրքն ծանր³ թուին քեզ, այլ ի շահսն պարտ էիր նայել, որ ինչ յինէն քեզ եղեւ, եւ դու ըստ քեզ այլում պարտ էիր առնել: Եւ զայն, զի ասիցես, եթէ նա զքեզ տրտմեցոյց, դու ի՛սկ զԱստուած բարկացուցէր, եւ դոյզն աղաչանաւք հաշտեցուցեր, եւ թէ զայդ եւ զայն առ միմեանս եղեալ էր, ապա իմանայիր, թէ ո՛յր ծանրագոյն էր. մինչ զբիւր տաղանդն պարտ էր, ո՛չ ինչ թշնամանեաց եւ ո՛չ «ծառայ չար» կոչեաց, այլ ողորմեցաւ: Իսկ յորժամ առ ծառայակիցն անգորոյն գտաւ, ապա ասէ՛ «ծառայ չար»:

Եւ մարտեաց,- ասէ,- զնա փանջանաց, մինչեւ հապուցէ (ԺԸ. 30):

Այսինքն՝ զյաւիտենից տանջանսն, զի չիցէ երբեք ժամանակ, յորում հատուցանել կարիցէ. «Չեղեր,- ասէ,- պիտանի երախտեաւքն, ածից յուղղութիւն տանջանաւքն»:

Նոյնպէս եւ Նայր իմ, որ յերկինս է, արասցէ ձեզ, եթէ ոչ թողուցուր ի սրբէ զյանցանս եղբարց ձերոց (հմմտ. ԺԸ. 35):

Ոչ ասէ, թէ՛ «Նայրն ձեր», այլ թէ՛ «Նայրն իմ». չառնէ այնուհետեւ արժանի զայնպիսի զչարսն եւ զմարդատեացսն անուանել «Որդիս Աստուծոյ»:

Այսու Բ.ս (2) ինչ իրս խնդրէ. նախ՝ զի զանձանց մեղս ըստգտանիցեմք եւ ապա՝ զի զայլոց եւս թողուցումք ոչ բանիւք միայն, այլեւ ի սրտէ եւ ի մտաց:

¹ Ա վշտակից

² Ա իցէ] իսկ է

³ Ա ծարր

ՅՈՎՆԱՆՆԷՍ ԾՈՐԾՈՐԵՑԻ

Վասն այսորիկ նմանեցաւ արքայութիւն երկնից առն թագաւորի, որ կամեցաւ համար առնուլ ի մէջ ծառայից իւրոց (Մաթթ. ԺԼ. 23):

Բաղդատութեամբս ուսուցանէ, թէ իւրաքանչիւր Հանդերձեալ է հաշիւ տալ գործոց իւրոց, մասնաւոր՝ յայսմ աշխարհի, եւ ընդհանուր՝ յորժամ բեմ դնի եւ դատաստան կազմի: Եւ երկրորդ՝ յիշեցուցանէ, թէ ոչ միայն դատաւոր է, այլեւ ստեղծաւոր, որ իբր զծառայս ստացաւ զսոսա արարչութեամբ՝ ըստ մարգարէին, թէ՛ «Ամենայն ծառայք քո են» (Մաղմ. ԸԺԸ. 91), եւ սոքա զբիւր երախտիսն առեալ՝ ապստամբեցին, ուստի եւ ի համար կոչին՝ ըստ տիրական իշխանութեան դատաստանին: Եւ երկրորդ՝ ո՛չ վայրապար թագաւորի նմանեցուցանէ զարքայութիւնն երկնից, այլ զի ցուցցէ, թէ թագաւոր ստեղծաւ մարդն ի պատկեր նորին, եւ թէպէտ յանցեաւ, սակայն նոյն ցանկութեամբն վառեալ՝ թագ եղին ոմանք եւ տիրեցին բազմաց: Եւ չորրորդ՝ զգաւրութիւն իւր յայտ առնէ, թէ յորում ժամանակի կամի, կարաւոր է քննութիւն պահանջել՝ թէ՛ յայսմ կենցաղի, թէ՛ ի հանդերձեալն:

Եւ իբրեւ սկսաւ առնուլ, մաքուցաւ առ նա պարփապան մի բիւրքանքարոյ (ԺԸ. 24):

Տաղանդն «քանքար» ասի՝ ըստ եբրայեցւոցն, որ է հարիւր եւ քսան եւ չորս լիտր եւ ըստ կղզոյ՝ ինն հազար դահեկան: Արդ, ասէ. «Մաքուցաւ առ նա պարփապան մի». ուստի՞ յայտ է. ի հրեշտակաց, որ միջնորդ եւ վկայք են գործոց մարդկան, որպէս բարեաց, նոյնպէս եւ չարեաց: Կամ ի գործոց իւրոց ցուցաւ, քանզի քանքարն առ բարիսն բարի է եւ առ չարսն՝ չար՝ ըստ ծանրութեան կղզոյ կապարի, որպէս ետեսն Զաքարիաս (տե՛ս Զաք. Ե. 7-8)՝ երգէ եւ Դաւիթ, թէ՛ «Ասարէնութիւնք իմ... որպէս բեռն ծանր ծանրացան ի վերս իմ» (Մաղմ. ԼԷ. 5): Քանզի որպէս հարիւրն, այսպէս եւ բիւրն զկատարելութիւն մեղացն նշանակէ: Բայց տեսցուք եւ զպարտսն, քանզի փոխատու Աստուած է, որ ի պատկեր անապականութեան իւրոյ գոյացոյց զմարդն եւ զթագաւորութիւնն իւր իբր զկնիք եղ ստեղծուածին եւ զիւր բարութեանն սերմանս առ նմին եւ զգաւրութիւն գործոյն, զոր քանքարն նշանակէ, յաւել յայս եւ զայլ եւս զերախտիսն, զի

զամենայն երեւելիս վասն մեր ստեղծ՝ զերկին, զերկիր, զերկրային, զծովային, զաւղային, զլուսաւորս, զգրախտն եւ զայլ եւս բարիս, զոր Աւրինաւք եւ նախ քան զԱւրէնսն շնորհեաց: Յետ այսր եւ զՈրդին միածինն ետ, որով որդիս արար վերստին ծննդեամբն, զչորդին հեղլով՝ զմեզս շնորհեաց եւ բիւր բարութիւնս տալ խոստացաւ, յաղագս որոյ պարտ էր վասն նորա զաւրհանապագ մեռանել, իսկ նա ո՛չ զայս, այլ զղիւրինն պահանջեաց, զանոխակալութիւնն ասեմ: Այլ մեք ոչ միայն զայս ոչ առնեմք, այլեւ յաւելուք մեզս ի վերայ մեղաց, զի յորժամ մարդ տեսանեմք, ցածնումք ի մեղաց, իսկ Աստուած տեսանէ միշտ, եւ մեք ոչ դադարեմք, եւ զի տակաւին վայելեմք ի բարիսն, որով առաւել սաստկանան մեղք եւ ծանրանան պարտք: Ահա այսորիկ են քանքար պարտուցն:

Իբրեւ ոչ ունէր հաքուցանել, հրամայեաց զնա վաճառել փէրն նորա եւ զկին նորա, եւ զորդիս եւ զամենայն, որ զինչ եւ ունիցի, եւ հաքուցանել (ԺԸ. 25):

Կամ ըստ հաւատոցն գործ ցուցանել ոչ ունէր, կամ զբոլոր գոյս տալ ըստ իմաստուն վաճառականին (տե՛ս Մաթթ. ԺԳ. 45-46) եւ զարարիչն ճանաչել, զոր Տէր կամէր՝ ո՛չ առնէր: Եւ ա՛յլ ազգ. հրամայելն վաճառել ո՛չ յանագորոյն եւ յանողորմ մտաց է, ա՛ւն, անդր ի բա՛ց տար, այլ զարհուրեցուցանէ սպառնալեաւք, զի յաղաչանս ածիցէ եւ զիւր մարդասիրութիւնն ցուցանէ, զի թէ զայն կամէր, յորժամ աղաչեացն, չանսայր եւ ո՛չ զայնքան պարտսն շնորհէր: Իսկ թէ ոք ասիցէ, ընդէ՞ր ոչ յառաջ քան զհամարսն եթող նմա զպարտսն. ասասցուք՝ ցուցանել կամեցաւ, թէ յո՛րչափ պարտուց արար զնա ազատ: Բայց զի՞նչ վաճառելն իցէ. ինձ թուի՝ բառնալ ի կենաց հրամայէ զկին եւ զորդիս եւ ի պէսպէս փորձութիւնս եւ յաղքատութիւնս ձգել, որպէս բազմաց պատահէ ըստ թգեհնոյն առակի (տե՛ս ԺԳ. 6-9), քանզի այս է հատուցումն մեղաց, որ ասէ մարգարէն, թէ՛ «Ընկալաք ի ձեռանէ Տառն գհաքուցումն» (հմմտ. Ես. Խ. 2), զի թերեւս զգաստացի, որպէս եղեն, քանզի յաղաչանս եկն:

Եւ անկեալ ծառայն երկիր պագանէր նմա եւ ասէր. «Երկայնամի՛ր լեր առ իս, եւ զամենայն հաքուցից քեզ» (ԺԸ. 26):

Թուի այսու ի հաւատս գոյ նշանակէ, եւ գործոց մաքրութիւն ստանալ մաղթէր ի ձեռն երկայնմտութեանն՝ ըստ մշակին աւրինի,

քանզի որպէս այլք այլոց, այսպէս եւ իւրաքանչիւր ոք անձին իւրոյ մշակ է, զոր աղաչանաւք ի հաւանութիւն ածէ: Քանզի բնաւորեալ է այս՝ ի նեղութեան յիշել զԱստուած եւ ներուծն յերկայնամտութենէ նորա խնդրել, որոյ տիպ՝ բիւր քանքարոյ պարտականիս՝ Հեթանոսք եղեն, թէ կամիս ընդարձակութիւն տալ բանիս:

Գթացեալ ւեր ծառային այնորիկ՝ արձակեաց զնա եւ զփոխն եթող նմա (ԺԸ. 27):

Ծառայն մի ինչ խնդրեաց՝ երկայնամտութիւն, իսկ նա երկու մեծ իմն շնորհէ. մարդասիրութեամբ զպարտսն թողու եւ ի կապանաց արձակէ: Եւ զայս յառաջնումն կամէր, բայց զի մի՛ իւր միայն լինիցի ձիրն, այլ զի եւ նա եւս նպաստ լիցի աղաչանաւք եւ մի՛ առանց պսակելոյ գնասցէ, թէպէտ իւր էր ամենայն: Յայտ ի զթութենէն է, քանզի այսպիսի է մարդասիրութիւն նորա, ի միոյ ձայնէ թախանձանաց բազում անգամ հրաժարէ ի տանջանաց, որպէս պոռնիկին եւ մաքսաւորին եւ աւազակին եւ այլոց բազմաց, յորմէ եւ մեք վարժիմք, զի թէպէտ եւթանասուն անգամ թողուցումք, իբր զկաթ մի ջրոյ առ ծով մի մեծ հաշուիցիմք՝ մերձ զնեւով զգթութիւն նորա:

Եւ ելեալ ծառայն՝ եգիտ զմի ի ծառայակցաց իւրոց, որ պարտ էր նմա հարիւր դահեկան, եւ կալեալ զնա՝ խեղդէր եւ ասէր. «Նապո՛ ինձ զոր պարտիս» (ԺԸ. 28):

Ո՛չ յետ բազում ժամանակի, այլ անդէն մինչդեռ զերախտիսն ի ձեռին ունէր, ի չարիս վարէր պարգեւաւն, քանզի եգիտ, ասէ, զմի ի ծառայակցացն եւ խեղդէր, զի ո՛չ զբանսն յիշէր, որով ինքն ապրեցաւ, եւ ո՛չ զնաւահանգիստն, որով փրկեցաւ: Այլ զայն ամենայն խստութեամբ եւ ազահութեամբ եւ յիսակալութեամբ սրտին մոռացեալ՝ քան զգազանս վայրենագոյն լեալ՝ խեղդէր զծառայակիցն յաղագս հարիւր դահեկանի, այսինքն՝ վասն փոքունց սխալանաց միմեանց, որ յաչս մարդկան մեծագոյն թուի, ըստ հարիւրին: Զի կամ զբոլումն ընչից է, կամ բամբասանք լեզուի, կամ հարուած ձեռին եւ այլ սոյնպիսինք, զոր ոչ կամիմք ներել միմեանց՝ ըստ առաքելոյ (Վն՛ն Կողոս. Գ. 13), այլ ծանրացուցանեմք զվիշտն՝ չար փոխանակ չարի չափելով:

Արդ, անկեալ ծառայակցին առ ոքս նորա՝ աղաչէր զնա եւ ասէր. «Երկայնամի՛տ լեր առ իս եւ հապուցից քեզ»: Եւ նա ոչ կամէր, այլ չոգաւ արկ զնա ի բանտ, մինչեւ հապուցէ զպարտսն (ԺԸ. 29-30):

Զոր ինչ ինքն տեսն արար, ի ծառայէն նմին պատահեցաւ եղեալ, բայց նա ոչ զգաստացաւ եւ այն, զի յոլովս ունէր զանազանութիւն, զի անդ գտէր աղաչէր եւ աստ առ ծառայակիցն մաղթէր: Ինքն ի տեսնէ մարդասիրութիւն գտեալ եւ առ ընկերն խստութիւն ցուցեալ, նորայն բիւր տաղանդ եւ սորայն՝ հարիւր դահեկան, եւ սա ժամանակ միայն խնդրէր, իսկ նա զկատարեալ թողութիւնն առնոյր, վասն որոյ արժանի է գանի, զի զոր ետեսն՝ չվարդապետացաւ, եւ զոր ոչ ետես՝ արար, որպէս ասէ. «Չոգաւ,- ասէ,- արկ զնա ի բանդ»: Ինձ թուի՝ զկապանաց եւ զբանադրանաց որոշումն նշանակէ, որ վասն սակաւ յանցանաց եղբարց, զանճառելի նզովս արտաքս ժայթքեն անդուռն բերանով անգութք ի մարդկանէ, եւ բազումք այն են, որ նովիմք կապանաւք վախճանին եւ ոչ առնեն թողութիւն:

Իբրեւ փեսին ծառայակիցքն նորա որ ինչ եղեւն, փրկմեցան յոյժ եւ եկեալ ցուցին փեսոն իւրեանց զամենայն, որ ինչ եղեւն (ԺԸ. 31):

Մարդկան անգամ չէին հաճոյ իրքն, թող թէ Աստուծոյ, քանզի վշտակից լինին այնպիսեացն արք չափաւորք եւ բողոքեն առ Աստուած, կամ վասն սակաւ պարտուցն, զորս ոչ շնորհեն, այլ խեղդեն, կամ վասն նզովիցն, որպէս ասացաւ: Դարձեալ՝ թէ ոք զհրեշտակս ասիցէ ծառայակից մեզ, ո՛չ իւրք ի ճշմարտութենէն սխալէ, քանզի հոգիք են հարկաւորք՝ առաքեալք ի սպասաւորութիւն՝ ըստ առաքելոյ (Վն՛ն Եբր. Ա. 14), եւ ընդ այսպիսի իրս մարդկան տրտմին՝ որք ի զարձն եւ ի փրկութիւնն ուրախանան եւ ցուցանեն Տեսոն իւրեանց զեղեալն, ըստ Կուռնելեայ իրացն (Վն՛ն Գործք Ժ), ոչ թէ Աստուած ոչ գիտէ, քա՛ւ լիցի, այլ զի ձեւով բանիս ի ձեռն նոցա պաշտպանութեան զստուգութիւն իրացն կամի նշանակել եւ սոցին վկայութեամբ հաստատուն ցուցանել զեղեալն, քանզի նոցին միջնորդութեամբ՝ խորհրդոց եւ բանից եւ գործոց ամենայնի քննութիւն լինի:

Յայնժամ կոչեաց զնա ւերն իւր եւ ասէ. «Ծառայ՛ չար, զամենայն զպարտսն թողի քեզ, վասն զի աղաչեցեր զիս»: Իսկ արդ,

ո՞չ էր պարզ եւ քե՛զ ողորմել ծառայակցին քում, որպէս եւ ես քեզ ողորմեցայ» (ԺԸ. 32-33):

Յորժամ վկայիւքն կնքեցաւ, յայնժամ կոչեաց՝ առ ի վարդապետութիւն մեզ: Բայց կոչելն կամ Գրոց դաստիարակութիւնն է, որով զամենեսեան առ ճշմարտութիւնն կոչէ եւ յԱստուծոյ Հաճութիւնն, կամ աւրհասական մահն, որով ի կենացս արտահանէ՝ ըստ երգոյն՝ «Դարձ, անձն իմ, ի հաւգիսր քո, զի Տէր կոչեաց զքեզ» (Մաղմ. ԾԺԴ. 7): Այլ դու տե՛ս դարձեալ զհեզութիւնն, զի թէպէտ կոչեաց, ո՛չ ըստ իշխանութեանն դատ տայ, այլ իրաւունս դնէ, թէպէտ հանելոց էր զպարզելն, մանաւանդ թէ ո՛չ նա իցէ, որ հանիցէ, այլ որ առն՝ անդրէն դարձուցանէ: Դարձեալ՝ կոչեաց ո՛չ ի հարցումն, այլ ի գանս եւ ի ձաղանս, որպէս ասէ. «Ծառայ չար»: Յորժամ զիւր պարտսն պահանջէր՝ զբիւր քանքարն, ո՛չ այսպիսի անուամբ կոչեաց, իսկ յորժամ զընկերն տազնապեաց, այսպիսի անուամբ անուանէ, քանզի վասն մեր վրէժխնդիր լինի եւ զմերն զամենայն իւր համարի, որպէս զբարիսն, այսպէս եւ զչարիսն: «Ծառայ չար»՝ ո՛չ բնութեամբ, այլ յաւժարութեամբ. յայտ յաջորդէս է, զի զայնքան պարտսն թողի քեզ, ասէ, եւ դու ոչ կամեցար զսակաւն շնորհել, եւ այն՝ ծառայակցին, ապա ուրեմն յիրաւի ասաց այլուր, թէ՛ «Երանի՛ ողորմաձագ, զի նոքա ողորմութիւն գրցեն» (Մապրթ. Ե. 7):

Եւ բարկացեալ փէրն նորա՝ մաքրեաց զնա դահճաց, մինչեւ հապուսցէ զամենայն զպարսուն (ԺԸ. 34):

Յայսմանէ ուսանիմք, թէ շնորհ եւ ողորմութիւն միանգամ է, իսկ յետ այնորիկ ի նոյն չարիս գտեալ՝ նախանձ հրոյն է, որ ուտէ զհակառակորդն՝ ըստ սրբոյն Յովհաննու, թէ՛ «Գիտեցեալ զնա, ի նմանէ ողորմութիւն գտեալ՝ նոյնպէս վարիք, եւ զառաջինն եւս համարեսցի ձեզ, եւ ո՛չ ընկալլիք զողորմութիւն ի նմանէ»¹: Վասն որոյ յետ զթութեանն ետես զնա յանգթութիւն վարակեալ, բարկացաւ նմին՝ ո՛չ ըստ բնութեան, որ անախտանալին է, այլ ըստ տպաւորութեան ձեւանայ, որպէս զի զանձանց մերոց յանցանս ծանիցուք, թէ ո՛րքան ծանրագոյնք են, մինչ զի զանբարկանալին ի բարկութիւն շարժէ:

«Մաքրեաց,- ասէ,- զնա դահճաց», այսինքն՝ սպասաւոր հրեշտակաց, որք «հնձաւոր» անուանեցան եւ չար գործոց մարդկան դատիչ

եւ կշտամբիչ, կամ բանսարկուին կամաց, որ ի սկզբանէ մարդասպանն է (փնս Յովհ. Ը. 44): Նոցին բարկութեան տանջանացն եւ զսամատնեալ հաւասարեաց՝ ըստ այնմ. «Երթայք ի հուրն, որ պարսապեալ է սաքանայի եւ հրեշտակաց նորա» (հմմտ. Մապրթ. ԻԵ. 41), զի երախտեաւքն չեղեւ պիտանի, զեթ տանջանաւքն զգաստացի: «Մինչեւ հապուսցէ, - ասէ, - զամենայն զպարսուն»: «Մինչեւ» ո՛չ ժամանակական է, այլ յաւիտենական, իբր այն՝ «Ոչ ելցէ անրի, մինչեւ հապուցանիցէ գյերին բնիոնն» (հմմտ. Ղուկ. ԺԲ. 59), այսինքն՝ զբիւր պարտս քանքարացն՝ զերախտեացն համայն եւ զմեղացն, զխորհրդոց եւ զբանից եւ զգործոց, նաեւ զծառայակցացն խոշտանկանաց պատիժս:

Նոյնպէս եւ Նայր իմ, որ յերկինս է, արասցէ ձեզ, եթէ ոչ թողուցուք իւրաքանչիւր եղբար իւրում ի սրբից ձերոց զյանցանս նոցա (ԺԸ. 35):

Պարզեաց զառական, թէ յաղագս որո՛յ իրաց արկ առաջի, որպէս զի իւրաքանչիւր ոք ի մէնջ թողուցումք ընկերին զյանցանս նոցա զբազմապատիկսն եւ զանչափսն, քանզի ո՛չ աւտարի, այլ եղբաւրն թողուցումք, որպէս զի մի՛ երկնառաք բարկութեանն մատնիցիմք: Բայց զի՞նչ է, թէ՛ «Նայր իմ, որ յերկինս է»: Թուի, թէ ո՛չ արժանի համարեցաւ զայնպիսի մարդատեացսն Որդի Աստուծոյ կոչել եւ ասել «Նայր ձեր», այլ թէ՛ «Նայր իմ», զի որդի հարազատ, զնմանութիւն հաւրն բերէ, զի ողորմածն՝ ողորմածին որդի, եւ բարին՝ բարւոյն: Իսկ ասելն՝ «ի սրբից ձերոց զյանցանս նոցա»՝ զի մի՛ յետ թողութեանն բանիւ՝ չարայուշ լինիցիմք մտաւք որպէս բազումք, այլ ի սրտէ թողուցումք: Նախ զիւրն, զի սիրտն է աղբիւր ամենայն չարեաց, որպէս զի առանց ըստգտանաց լինիցի, որով համարձակ առ Աստուած մատչիմք՝ ըստ Յովհաննու, եւ ապա զընկերացն, որպէս զի նա զմերն թողցէ զբիւրապատիկն եւ զծանրագոյնն: Տե՛ս եւ այսպէս. թագաւոր զԱստուած ըստ՝ Դաւթի. «Թագաւոր մեծ ի վերայ ամենայն երկրի Աստուած է» (հմմտ. Սաղմ. ԽԶ. 3), բայց որչափ խնամէ զմարդ, իբրեւ զհայր է, իսկ յորժամ սկիզբն զատման առնէ, որպէս զթագաւոր է եւ արքայ երկնից, զի զարքայութեանն նմանութիւն աստ դատողութեամբն ցուցանէ: Իսկ պարտական բիւր քանքարոյ՝ հոգի, զի անձնիշխան կամաւք աղբիւր է չարեաց, եւ ծառայակից՝ մարմինն, եւ այսպէս ըստ կարգի կազմեա զբանդ, եթէ կամիցիս:

¹ Հանգիստ սրբոյն Յովհաննու առաքելոյ եւ աւետարանչի, 9

ԳՐԻԳՈՐ ՏԱԹԵԻԱՅԻ

Ոմն պարտ էր բիւր տաղանդ, եւ ոմն՝ Ճ. (100) դահեկան (Մապրթ. ԺԸ. 24, 28):

Վասն բազում պատճառի զայս առակ ասաց.

Ա. Նախ՝ զի մի կարծեսցեն, թէ մեծ եւ ծանր հրամայեաց Հ.իցն (70) է. (7) թողուլ. աստ «բիր փաղանդ» ասաց:

Բ. Երկրորդ՝ զի [յ]որդորիցէ զմեզ ի թողութիւն ընկերին եւ երկնչել ի պատժոյն:

Գ. Երրորդ՝ զի մի մեծամտեսցին, որ թողուն ընկերին, զի եւ ինքեանք բազում թողութեանց կարաւտին:

Դ. Չորրորդ՝ եցոյց, թէ ոչ են ծանր թողութիւնք, այլ յոյժ դիւրին, յորժամ սէր ունիցին:

Ե. Հինգերորդ՝ եցոյց զառաւել մարդայսիրութիւնն Աստուծոյ, թէպէտ մեք զամենայն մեղս ընկերին շնորհեմք, այլ անբաւ է մարդասիրութիւն նորա, որպէս մեծ ծով առ կաթ մի ջրոյ:

Զ. Վեցերորդ՝ եցոյց այսու, թէ ոչ միայն շնորհաւք, այլ գատաստանաւ համար առնու ամենայն գործոց մարդկան՝ բարեաց եւ չարեաց:

Է. Եւթներորդ՝ ցուցանէ, թէ որչափ առաւել բազում է տաղանդ, քան զդահեկան եւ բիւր քան զՃ. (100), այնքան առաւել եւ բազում է մեղանչումն մեր առ Աստուած, քան ընկերին առ մեզ:

Ը. Ութերորդ՝ ցուցանէ, թէ բազում պարտուց մեր աղաչելովն զԱստուած թողութիւն գտանեմք աստ: Եւ առաւել, քան զոր խնդրեմքն, տայ:

Թ. Իններորդ՝ ցուցանէ, թէ հրեշտակք հանապազ տեսանեն զգործս մեր՝ զբարիս եւ զչարս, եւ մատուցանեն Աստուծոյ, որպէս ասացն. «Տրեշտակք ւոցա փեսանեն գերեսս Նար իմոյ» (հմմտ. Մապրթ. ԺԸ. 10):

Ժ. Տասներորդ՝ ցուցանէ, թէ զառաջին պարգեւքն, որ եթող, դարձեալ պահանջէ ի մէնջ, յորժամ մեք ոչ թողումք ընկերին եւ կամ յառաջին մեղսն անգեղջ մնամք, որպէս ասէ Ննջումն Յոհաննու՝ «Եւ գառաջինն ես պահանջեցաք ի ձեւջ» եւ այլն:

ՎԱՍՆ ՄԵԾ ՄԵՂԱՅ

Հարց. Որքա՞ն է առաւել մեղանչումն առ Աստուած, քան առ մարդիկ:

Պատասխանի. Թէպէտ ամենայն մեղք յանցումն է հրամանին Աստուծոյ, այլ առ Աստուած առաւել մեղանչեմք, քան առ մարդոյ: Եւ յայտ է ի չորից.

Ա. Նախ՝ ի կերպարանացն. որքան մեծ է Աստուած, քան զմարդ, այնքան մեծ է Աստուծոյ մեղանչել, քան մարդոյ:

Բ. Երկրորդ՝ ի բազմութենէն. որ յաճախ մեղանչեմք Աստուծոյ, եւ սակաւ՝ մարդոյ:

Գ. Երրորդ՝ յակնածելոյն, զի յորժամ տեսանէ մարդ, դադարեմք ի մեղաց, եւ Աստուած հանապազ տեսանէ, եւ ոչ դադարեմք:

Դ. Չորրորդ՝ ի բազում երախտեացն սաստկանան մեղք, զի բազում ունիմք երախտիք Աստուծոյ, եւ լինիմք պակարխտ եւ յանցաւոր նմա: Իսկ ի մարդկանէ սակաւ երախտիս ունիմք:

Նմանեցաւ արքայութիւնն երկնից թագաւորի, որ արար համարս (հմմտ. ԺԸ. 23):

Այս ութերորդ կամ իններորդ նմանութիւնն արքայութեանն ըստ կարգի առաջի սերմանացանին եւ այլոց: Գիտելի է, զի աստ ի ժամանակիս յայսմ գործն է եւ անդ ի յաւիտենին հատուցումն գործոց: Ոչ աստ հատուցումն գոյ եւ ոչ անդ՝ գործ: Այլ թէ ուր ուրէք երեւի, խրատէ եւ առհաւատչեայ անդ ի հատուցմանն: Վասն որոյ երկուցն ի միասին զաւրինակդ դնէ:

Հարց. Որպէ՞ս «առնէ համարս» (տես ԺԸ. 23):

Պատասխանի. Որպէս թագաւորք երկրի երիւք առնուն զհամարս. կամ վասն բանից, կամ գործոց, կամ ընչից, այսպէս եւ ամենայնի թագաւորն յայնմ աւուր.

Ա. Նախ՝ որ բանիւ ետ զաւրէնս:

Բ. Երկրորդ՝ որ գործով ետ իշխանութիւնս:

Գ. Երրորդ՝ որ ետ մեծութիւն:

ՎԱՍՆ ԲԻՐ ՓԱՊԱՆՈՒԹԻՒՆ

Հարց. Զի՞նչ է «բիր փաղանդն» (հմմտ. ԺԸ. 24):

Պատասխանի. Տաղանդն կշռոյ անուն է, որպէս ասեն՝ ՃԻԵ. (125) լիտր, եւ լիտրն ՀԲ. (72) դահեկան եւ կամ քանքար եւ մնաս լսի: Իսկ բիւրն Դ. (4) գլխաւոր թուով կատարի, որ է Ժ. (10), Ճ. (100), Բ. (1000) եւ բիւր:

Ա. Նախ՝ նշանակէ զայնոսիկ, որ յանցանեն մարմնով եւ հոգով եւ մտաւք: Որք մարմնով մեղանչեն, Ժ.ին (10) են պարտական, զի կրկին է զգայութիւնք մարմնոյ, եւ որք հոգով՝ զձ. (100), եւ կամաւորքն՝ Ռ. (1000), եւ անզեղջն բիւր ունի զպարտս:

Բ. Երկրորդ՝ որք չորք հասակաւն յանցանեն, այսինքն՝ տղայութեամբ, երիտասարդութեամբ, կատարեալ հասակաւ եւ ծերութեամբ:

Գ. Երրորդ՝ չորք են աւրէնք, այսինքն՝ բնական, բանական, գրաւոր եւ Աւետարանն:

Դ. Չորրորդ՝ չորից երախտեացն նախասացեալ, որք յանցաւոր գտանին, բիւրուց են պարտական:

Եւ «կշիռն»՝ զծանրութիւն մեղացն, եւ «քանքարն» զարծաթ շնորհացն ցուցանէ:

Հարց. Վասն է՞ր զկին եւ զորդիսն վաճառէ (հմմտ. ԺԸ. 25):

Պատասխանի. Ա. Նախ՝ ոչ թէ անգթութիւն է, այլ սպառնալիք, զի յաղաչանս յածիցէ: Ուստի յայտ է, յորժամ աղաչեաց, լուաւ եւ զպարտսն շնորհեաց:

Բ. Դարձեալ յիրաւի, զի նոքաւք յանցեաւ, նոքաւք եւ պատժեցի, որպէս տանուտէրն ընդանեաւք եւ առաջնորդն՝ հետեւողաւք:

Գ. Եւ դարձեալ՝ զհոգի եւ զմարմին եւ զգայութիւնսն նշանակէ: Իսկ «վաճառելն» է, որ աստ ապաշխարութեամբ քաւեմք:

Հարց. Վասն է՞ր ոչ յառաջ, քան զհամարսն եթող (հմմտ. ԺԸ. 27):

Պատասխանի. Ա. Նախ՝ զի ցուցցէ, թէ որչափ պարտուց ազատեաց զնա:

Բ. Երկրորդ՝ «համար» զխոստովանութիւնն նշանակէ:

Հարց. Վասն է՞ր յետ աղաչելոյն շնորհեաց նմա (հմմտ. ԺԸ. 26-27):

Պատասխանի. Եւ յառաջ, քան զաղաչելն կամի գտալն, այլ վասն երից կամի գաղաչելն:

Ա. Նախ՝ որ փոքր աղաչելովն մեծ պարգեւէ:

Բ. Երկրորդ՝ զի եւ մեք նպաստ լիցուք թողութեան մերում¹:

Գ. Երրորդ՝ զի եւ յետ թողութեան զպսակն առցուք: Այլ ամենայն ձիր եւ շնորհք ի գթութեանց նորա է: Վասն այն ասէ. «Գթացաւ եւ եթող զպարտսն» (հմմտ. ԺԸ. 27):

¹ Գ մերում թողութեամբ (Գ՝ լս. թողութեան մերում)

Վասն հարիւր դահեկանին

Հարցումն. Զի՞նչ է «ճ. դահեկան» (ԺԸ. 28):

Պատասխանի. Պարտք ընկերին փոքր է, քան զպարտս Աստուծոյ, որպէս ձ. (100) դահեկանն առ բիւր տաղանդն: Զի երիւք է պարտական մարդոյ, այսինքն՝ բանիւ կամ գործով կամ ընչիւք:

Եւ նշանակէ նիւթ արծաթոյն՝ զբանն, եւ վեց դանգն՝ զգործն, եւ դահեկանն՝ զինչս: Եւ հարիւրն, զի Ժ. (10) զգայութեամբ եւ կատարեալ մեղանչեմք:

Հարց. Վասն է՞ր ոչ լուաւ (ԺԸ. 30):

Պատասխանի. Ա. Նախ՝ վասն խստութեան սրտին:

Բ. Երկրորդ՝ վասն ազահութեան արծաթոյն:

Գ. Երրորդ՝ վասն ռիսակալ մտացն:

Եւ ոչ էր հաւասար երկուց պարտապանացն.

Ա. Նախ՝ ի տիպքն. զի մին բիւր տաղանդ, եւ միւսն՝ ձ. (100) դահեկան:

Բ. Երկրորդ՝ ի դէմքն. մինն՝ տէր, եւ մինն՝ ծառայակից նմա:

Գ. Երրորդ՝ ի շնորհքն. միոյն կատարեալ թողաւ, եւ մինն ժամանակ խնդրէր եւ ոչ գտաւ, քան զգազանս առաւել գտաւ՝ խեղդելովն: Եւ «արկ ի բանտ», որ է անարժան կապանք:

Իսկ «ծառայակիցք» հրեշտակք են՝ պատմողք նմա. «Նրեշտակք ևնցա փեսանն զերեսս հար» (հմմտ. Մարթ. ԺԸ. 10), ասէ:

Կոչեաց զնա եւ ասէ՝ ծառայ չար (ԺԸ. 32):

Առաջին կոչելն աստ է, իսկ վերջինս՝ ի դատաստանն: Քաղցրաբար է, եւ այս՝ խստութեամբ: Տե՛ս, զի դատաստանաւ եւ իրաւամբ հանէ ի նմանէ զամենայն պարգեւան: Մանաւանդ, թէ ինքն, որ է առն, նա դարձուցանէ, որպէս զքանքարն, որ ոչ շահեցաւ:

Հարց. Զի՞նչ է «ծառայ չար»:

Պատասխանի.

Ա. Նախ՝ Ընդդէմ բարոյն:

Բ. Երկրորդ՝ թշնամեաց է:

Գ. Երրորդ՝ խիստ եւ բարկացողն է:

Դ. Չորրորդ՝ ստուգաբանի՝ ծառայ չոր եւ անպտուղ:

Տե՛ս, մինչ բիւր տաղանտ պարտէր, ոչ կոչէր «չար», այլ զի ոչ ողորմեցաւ. այս է, զի անողորմն եւ ռիսակալն առաւել չար է, քան զմեղաւորն:

Եւ մատնեաց զնա յաւիտենից տանջանացն: Տե՛ս, զի Դ. վնաս եղեւ յոչ ողորմելոյն.

Ա. Նախ՝ զթողեալ պարտսն խնդրեաց:

Բ. Երկրորդ՝ ծառայ չար կոչեցաւ:

Գ. Երրորդ՝ տանջանեաց մատնեաց:

Դ. Չորրորդ՝ յորդիութենէն Աստուծոյ զրկեցաւ, զի Հայր իմ կոչեաց եւ ոչ ձեր, վասն զի բարերար եւ մարդասէր է Հայրն, եւ չարն եւ մարդատեացն նմա որդի ոչ կոչի:

Եւ այսու Բ. (2) իրս խնդրէ ի մէնջ.

[Ա.] Նախ՝ զանձանց մեղս ըստգտանել եւ զղջանալ:

[Բ.] Երկրորդ՝ զայլոց մեղս թողուլ ի սրտէ եւ ոչ միայն ի լեզուէ:

Այսքան առ այս:



ՎԱՍՆ ԱՅԳԻՈՅՆ ԵՒ ՄՇԱԿԱՅ

Մաթթ. Ի. 1-16

ՍՏԵՓԱՆՈՍ ՍԻՒՆԵՅԻ

Նման է արքայութիւնն Աստուծոյ մարդոյ փանուրեան (Մաթթ. հմմտ. Ի. 1):

«Մարդ» Աստուած ասի ի բազում Գիրս Աստուածայինս, վասն զգեներոյն Որդւոյն Աստուծոյ զպատկեր մարդկան, եւ «փանուրէր» է տանս այսմիկ, զորմէ առաքեալն ասաց. «Մովսէս հաւաքարիմ է յամենայն փան նորա, այլ Քրիստոս իբրև որդի ի վերա[յ] փան իւրոյ, որոյ փուն մեր եմք» (հմմտ. Երբ. Գ. 5-6):

ԱՐԻՍՏԱԿԷՍ ԵՒ ԵՓՐԵՄ

[Քանզի նման է արքայութիւն երկնից առն փանուրեան, որ ել ընդ առաւապս ի վարձու ունել մշակս յայգի իւր] (Մաթթ. Ի. 1):

Այր ոմն փնկեաց այգի (Ի. 9):

«Այգի» զհրամանն Աստուծոյ կոչէ եւ զպատուիրանն եւ ժամանակ գործոց զկեանս աշխարհիս: «Մշակս»՝ զազգի ազգի կերպարանս կոչեցելոցն ի հրամանս, իսկ «երեք ժամուն» (Մաթթ. Ի. 3) եւ ի հասարակ աւուրն եւ «Թ. ժամուն», որ այլ եւ այլ տիս հասակացն մատչիցին եւ ընտիրք գտանիցին: Եւ է՞ր վասն արդեւք զամենեսեան միանգամայն վաղվաղակի ոչ կալաւ ի վարձու, զի յորժամ հաւանելոց էին, յայնժամ կոչեաց զնոսա, որպէս եւ զՊաւղոս, յորժամ հաւանելոց էր, յայնժամ կոչեաց (փնս Գործք Թ. 1-19): Եւ զի՞ զամենեսին ի առաջին հասակէն կամի ձգել առ ինքն. զայն առակս յայտ առնէ:

«Ել,- ասէ,- ընդ առաւապս ունել մշակս ի վարձու» (Ի. 1):

[Յ]այտ իսկ է, թէ անդրատին յառաջին հասակին կոչէ, այլ զայս առակ, որ երեր ի մէջ, զի մի ոք ասիցէ, թէ ոչ կոչեցա ես, մինչ տղայն էի, չեմ այսուհետեւ ընդունելի: Յայտ արար, թէ՛ յորժամ դառնայ մարդ, յամենայն ժամ ընդունելի լինի: Եւ զի՞ ոչ սկսաւ տալ նախ առաջնոցն, զի յուսացեալ էին վասն վարձուց իւրեանց.

զի մի՛ թուի վերջնոցն, թէ՛ «պակաս ինձ առնուցուն», սկսաւ տալ նախ վերջնոցն:

Դարձեալ, զի ել նա ընդ առաւապն, եւ յերրորդն եւ ի Զ. (6)ն եւ յերթն եւ ի ԱԺ. (11)ն (հմմտ. Ի. 6):

Լսի վասն ի սկզբան քարոզութեան նորա, իբրեւ կարգելով մինչեւ ի խաչելութեան անդ, զի ի ԱԺ. (11) ժամու անդ եմուտ աւագակն յաղին զրախտն, եւ զի մի պատուհասեալ լիցի վասն այսր, յայտ արար զկամս իւր, զի թէ է՛ր ուրուք ի վարձու կալեալ զնայ, վաստակէր նա: Ո՛չ ոք, ասէ, կալաւ զմեզ ի վարձու, որպէս տուաք մեք աստուածութեանն, որ ինչ խոնարհագոյն է, քան զնա, տայ նա մեզ, ինչ որ վերագոյն է քան զմեզ: Վարձեցեալ եղաք ի գործ վաստակոց ըստ զաւրուութեան մերում, այլ հրաւիրեալ եզաք ի հատուցումն վարձուց աւելի, քան զզաւրութիւն մեր: Այլ ի վաղջան կատարածի տացեն նմա փառս հաւատացեալք՝ ըստ զաւրութեան իւրեանց, եւ ապստամբքն ըստ բռնութեանն, որ կայ ի վերայ նոցա: Ի գործ այգւոյն ո՛չ ողորմութիւն նորա պատուհասեցաւ եւ ոչ ստուգութիւն նորա եպերեցաւ, ստուգութեամբ իւրով ետ որպէս եւ ուխտեացն եւ ողորմութեամբ իւրով զթացաւ, որպէս եւ կամեցաւ: Այլ վարանք այն են, թէ յայնչափ վաստակոց վերայ մաւտ ի սպառ յախտէ նախանձու վնասեցին ոմանք, իբրեւ տեսին, ասէ, թէ ի բարութիւնս վայելէին, ուստի իւրեանց չէր ինչ վնաս լինելոց, եւ ոչ նոքաւք իւրեանց վարձն նուազէր ինչս: Չար էին եւ խանդային ընդ այլոցն բարութիւնս, որ նախանձու միայն եւ չարակնութեան նշանակ էր: Եւ այլ զինչ աւելի քան զայն խնդրիցես, յորժամ եւ տանուտէրն իսկ վասն նոցա իրաւունս տացէ:

Ո՞չ, ասէ. «Դէնար ի միոջ հարէր գվարձն: Առ զքոյդ եւ գնայ» (հմմտ. Ի. 13-14):

Եւ «առ». այս զի՞նչ իցէ ասել: Չիք ոք, որ այնպէս իրաւունս կամի ցուցանել կամ մեղադիր լինել յարքայութեանն երկնից, զի սուրբ է ի նախանձու եւ ի չարակնութենէ այն բնակութիւն, զի թէ աստ են իսկ սուրբք եւ զանձինս եւս անգամ զնէին ի վերայ մեղաւորաց, որ չափ եւս առաւել էր անդ: Եւ է՞ր վասն այնպիսի կերպարանաւք յարգարեաց զբանն, զի յաւժարութիւնս յորդորիցէ զայնոսիկ, որք ի վաղջանի եւ ծերութեան իցեն: «Դառնալ» եւ լինել

պիտանիս. եւ մի այնպէս կարծել, թէ ընդ վայր հարեալ իցեն, եւ չիցէ ինչ հնար ուղղութեան:

Այսպէս,- ասէ,- եղիցին առաջինք յեփինք, եւ յեփինք՝ առաջինք, զի բազումք են կոչեցեալք եւ սակաւք են ընտրեալք (Ի. 16-17):

Թուի ինձ, թէ զհէլիցն իսկ ակնարկիցէ եւ զհաւատացելոց, որք յառաջնումն պայծառագոյնք երեւեցան եւ յետոյ ծուլանայցեն եւ յետս երթիցեն եւ զայլոց, որ ի չարեացն զերծանիցին եւ անցուցանիցեն ընդ բազում առաքինութեամբ: Եւ Տէր մեր վասն այնորիկ առակեաց զառակն.

«Մի՞թէ չունիմ իշխանութիւն գործել ի քան իմում զինչ եւ կամիցիմ» (հմմտ. Ի. 16):

Զի թէ ի վերայ դարու եւ ի վերայ վաղջանի կատարի, վասն է՞ր եմուտ այս, զի ասէ, թէ.

«Ակն քո չար է» (Ի. 15):

Ո՞ ետ թոյլ վերջին արդարոցն կեալ որպէս եւ առաջինքն, եւ ո՛չ վաստակեցին. կամ ի նոսին իսկ յայնոսիկ, որ եղենն կալեալ ի վարձու ընդ առաւաւտս, ո՛չ գոյին ի նոսա, որ տղայք մեռան: Ահաւասիկ՝ Աբէլ. առաջին տղա մեռաւ, տրտնջէ վասն նորա Սէթ, որ եղեւ փոխանակ նորա (տես Ծննդ. Դ. 25):

ՅՈՎՀԱՆՆԷՍ ԾՈՐԾՈՐԵՅԻ

Քանզի նման է արքայութիւն երկնից առն փանուրեառն, որ ել ընդ առաւապս ի վարձու ունել մշակս յայգի իւր (Մաթթ. Ի. 1):

Դէմք առակի ոչ տան ամենայն իրաւք զտեսութեանն լրումն, այլ միայն առաջնորդ մտացն լինիցին, զոր եւ մեք արասցուք՝ հետամուտ լինելով բանիցս, թերեւս ըստ կարգի լուծանել մարթասցուք: Արդ՝ «տուն» անուանէ զաշխարհս եւ «տէր փանս»՝ զԱրարիչն սորին՝ ըստ առաքելոյ. «Մովսէս հաւաքարիմ ի վերայ քան նորա» (հմմտ. Եբր. Գ. 5), իսկ Որդին տէր է տան աշխարհիս, քանզի որպէս յայլում տեղու զ«մեծատուն» զինքն անուանեաց եւ զընդ ձեռամբ անկեալսն «տնտես» կոչեաց (Ղուկ. ԺԶ. 1-8), աստ «փանուրէր» եւ «մշակ» յորջորջէ: «Ել ընդ առաւապս ի վարձու ունել մշակս յայգի

իւր»: «Առաւապ» կամ զսկիզբն արարչութեանն ասէ, յորում ստեղծաւ լոյս եւ փարատեցաւ խաւար, եւ վարձեցաւ Ազամ աւրինաւք ի դրախտին, կամ յԱզամայ մինչեւ ի Նոյ, զի սկիզբն էր աշխարհի, եւ կամ զառաջին գալուստն, որ առաւաւտ ծագեցաւ մեզ յետ նսեմութեան գիշերոյ Աւրինացն եւ մեղացն, ուստի ել յարեւելից ի Հաւրէ փեսայաւրէն ձեւով, այսինքն՝ մարմնական գեղով, եւ երեւելով լուսաւորեաց զմեզ, կամ զլինելութիւն իւրաքանչիւր մարդոյ ծննդեամբ յաշխարհս: Իսկ «այգի»՝ զհրամանս Աւրինացն կամ զժողովուրդն, ըստ մարգարէին, թէ՛ «Այգի եղեւ» (Ես. Ե. 1), այլեւ զսուրբ եկեղեցի, յորմէ բղխէ զգինի զմայլեցուցիչ երկհամ՝ բաւական գոլ յուրախութիւն երկնաւորաց եւ երկրաւորաց:

Եւ «մշակ»՝ զարդարսն, որ եղեն առաջնորդ ժողովրդեանն, կամ զսոսին իսկ զմարդիկ՝ զկոչեցեալս յաւրէնս ի սկզբանէ մինչ ի կատարած աշխարհի, եւ զայս ոչ առանց վարձու, այլ նախ եւ առաջին վարձ՝ նոյն ինքն հանդէսն, զի որ արասցէ զայս, կեցցէ սոքաւք: Եւ երկրորդ՝ հարիւրապատիկն, զորս ընդունին կատարիչք աւրինացն, որպէս հինն Իսրայէլ՝ զպարգեւական երկրին ժառանգութիւնն, եւ սուրբք ամենայն՝ զբարգաւաճիլն ի մարդկանէ: Եւ երրորդ՝ զմշտնջենաւոր կենացն վայելչութիւն, ըստ այնմ՝ «Արձաք ձեր բազում են յերկինս» (Մատթ. Ե. 12): Եւ չորրորդ՝ զճմարիտն ասել զբանական հոգւոյն պայծառութիւն, զոր «գահեկան» ասէ, զի ամենայն աւրէնք յաղագս այնորիկ եղան, զի զաղտեղեալ պատկեր հոգւոյն վերստին ձուլեցցեն եւ կատարեալս ցուցցեն զմարդն ըստ Աստուծոյ: Եւ հինգերորդ՝ իւրաքանչիւր առաջնորդի կամ մարդոյ կամք եւ գիտաւորութիւն, զոր ինչ խնդրեաց հոգեւոր կամ մարմնաւոր՝ բարի:

Եւ արկ վարձս մշակացն աւուրն դահեկան եւ առաքեաց գնոսա յայգի իւր (Ի. 2):

«Աւր»՝ զբովանդակ կենցաղս մարդկան ասէ, որ ի ծննդենէ մինչեւ ի մահ ընթանամք: Եւ ո՛չ վայրապար «աւր» ասէ, այլ քանզի աւրինաւքն Աստուծոյ լուսաւորեալ է իբր արեգակամբ ճանապարհս մեր՝ բնականաւն եւ գրաւորականաւն եւ աւետարանականաւն: Քանզի աւրն լոյս ասի՝ ըստ այնմ. «Պապուիրանք Տեան լոյս են եւ լոյս րան աչաց» (Մաղմ. ԺԸ. 9), եւ «Ճրագ են բանք քո ուրից իմոց» (Մաղմ. ՃԺԸ. 105), եւ «լոյս եւ ճանապարհ կենաց» (Առակ. Զ. 23), եւ թէ՛ «Լոյս

են հրամանք քո ի վերայ երկրի» (Ես. ԻԶ. 9): Բայց դու տե՛ս զմարդասիրութիւնն, զի նախ զվարձս մշակացն դնէ եւ ասպ յայգի Աւրինացն առաքէ եւ կամ ի վերակացութիւն ժողովրդեանն, որպէս զի վարձուցն ակնկալութեամբ թեթեւագոյն զճգունսն բերիցեն, եւ տքնեալ վասն ոգւոց: Եւ վարձս՝ որպէս ասացաք, է հոգւոյն մաքրութիւն, որ եւ երանութիւն է ըստ Դաւթայ, թէ՛ «Երանեալ է այր, որ ոչ գնաց ի խորհուրդս ամբարշտաց... այլ յարէնս Տեան են կամք նորա... եղիցի նա որպէս ծառ, որ րնկեալ է ի գնացս ջուրոց» (Մաղմ. Ա. 1-3), կամ բաղձանք մտաց, զոր խնդրեաց ոք յԱստուծոյ:

Եւ ելեալ զերորդ ժամու՝ երես այլս, զի կային դափարկք ի հրապարակս: Ասէ եւ ցնոսա. «Երթայք եւ դո՛ւք յայգի իմ, եւ որ ինչ արժան իցէ, փաց ձեզ»: Գնացին եւ նոքա (Ի. 3-5):

Պէսպէս ժամուքս, զոր առադրէ, կամ զազգի ազգի հասակս ասէ, կամ զպէսպէս կերպարանս կոչեցելոցն, կամ զայլեւայլ ժամանակս, յորում կոչեցան եւ ստոյգ ի Նոյէ մինչեւ ցԱբրահամ իմա՛, զորս քննելի է, թէ ընդէ՞ր ոչ զամենեսեան միահաղոյն կալաւ ի վարձու: Գիտելի է, զի յորում ժամանակի եւ յեղանակի եւ ի հասակի հաւանելոց էին, յայնժամ կոչեաց զնոսա, որպէս զՊաւղոս, քանզի տանուտէրն յառաջին հասակէն եւ ի ժամանակէն կամէր յինքն ձգել զմենեսեան, յայտ է յառաւաւտուն ելանելոյն, սակայն եկեալքն այնպէս գային: Այլեւ զայն ասելի է, զի ո՛չ ամենեքին միանգամայն ծնանին յաշխարհի, այլ ըստ կարգի. այսպէս եւ կոչումն լինի: Բայց զի՞նչ է այն՝ «զի կային,- ասէ,- դափարկք ի հրապարակս»: Թուի զնոսա ասել, որ ոչ չարեաց ընդունակք էին, այլեւ ոչ աւրէնս ունէին, բայց միայն ի հրապարակս աշխարհիս դեղերեալք կային՝ հայելով ի լուսաւորս եւ յաստեղս եւ յայլ տարերս՝ զցանկութիւն Աստուծոյ ունէին եւ ոչ գտանէին, որպէս Աբրահամն այն, վասն որոյ յորժամ կոչեցաւ, յաւժարութեամբ եկն, եւ ըստ արժանաւորութեան հաւատոյն ընկալաւ զարդարութիւն հանդերձ իւրայնովքն: Կամ զուխտ թլփատութեանն ասէ:

Եւ դարձեալ ելեալ զվեց ժամու եւ զինն ժամու՝ արար այնպէս (Ի. 5):

Այսու զկոչումն, որ մինչ ի Մոսէս եւ ի Դաւիթ եղեւ, նշանակէ եւ ի Դաւիթ հանդերձ մարգարէիւքն մինչ ի ծնունդ Բանին, վասն այնորիկ ոչ բաժանէ զժամսն, այլ առ ընթեր միմեանց կարգէ, զի

Աւրէնք եւ մարգարէք ոչ են զատուցեալք ի միմեանց: Քանզի յԱբրահամէ եւ ի Մոսիսէ սկսեալ մինչ ի Յովհաննէս Մկրտիչ ոչ պակասեաց աստուածապաշտութիւնն կոչմամբ մարգարէիցն՝ ըստ այնմ. «Աւրէնք եւ մարգարէք մինչեւ ցՅովհաննէս» (Մաւրթ. ԺԱ. 13):

Եւ զմեքասաներորդ ժամու ելեալ՝ եգիտ այլս, զի կային դաբարկք. Ասէ ցնոսա. «Ընդէ՞ր կայք աստ զարս ցերեկ դաբարկք»: Ասեն ցնա. «Զի ոչ որ կալաւ զմեզ ի վարձու»: Ասէ ցնոսա. «Երթայք եւ դուք յայգին, եւ որ ինչ արժան է՝ առնուցուք» (Ի. 6-7):

Թէպէտ ժամուցս բաժանմամբ զհասակն ասիցէ որ յարմարագոյնս լինել, իբր թէ ոմանք ի տղայութեան կոչեցան իբր Տիմոթէոս, առ որ գրեաց Պաւղոս, թէ՛ «Ի մանկութենէ գիտես զԳիրս Սուրբս» (Բ. Տիմ. Գ. 15), եւ այլք ի պատանեկութեան, եւ կէսք յերիտասարդութեան, եւ ոմանք ի կատարելութեան, եւ ի մետասան ժամուս, որ ասացաւ՝ ի ծերութեան, որպէս աւագակն ի խաչելութեան նորա: Բայց ինձ զժամանակն հաճելի է, որպէս ասացի, քանզի մետասան ժամաւս յայտնապէս զգալուստն իւր ցուցանէ, որ ի լրման ժամանակի կենցաղոյս, ըստ առաքելոյ՝ յայտնեցաւ մարմնով (Կրնս Գաղ. Դ. 4), ելեալ ի Հաւրէ եւ եկեալ յաշխարհս, որ մետասան ժամ անուանի մինչ ի կատարած աշխարհի: Վասն որոյ ասէ՝ «եգիտ այլս». այսինքն՝ աւտարացեալս յԱւրինացն, որք են հեթանոսք, զորս եգիտ՝ ըստ այնմ. «Եղբայրս քո մտեալ էր եւ եկ[ե]աց, կորուսեալ էր եւ գրաս» (Ղուկ. ԺԵ. 32): Եւ «զի կային դաբարկք», որպէս Կուռնելիոսն այն (տե՛ս Գործք Ժ. 1), եւ կամ այլք իբրեւ զնա, որք թէ յետոյ կոչեցան, բայց զի զանցեալ ժամանակն ոչ ի չարիս պարապեցան, այլ դատարկք ի մեղաց մնացին, զորս կոչեաց՝ ասելով, թէ՛ «Ընդէ՞ր կայք աստ զարս ցերեկ դաբարկք»: Կամ թէ՛ զգործոյ ժամանակս դատարկ անցուցիք, կամ թէ՛ անցեալ է կենցաղս՝ ուսուցանէ. «Այժմ մինչ զլոյս ընդ ձեզ ունիք, գնացէք ի յոյս» (հմմտ. Յովհ. ԺԲ. 35) հաւատոյ եւ աւրինաց:

Ասեն ցնա. «Զի ոչ որ կալաւ զմեզ ի վարձու»: Զի մի՛ պատուհասեցին, յայտ արարին զկամս իւրեանց, զի թէ ուրուք ի վարձու կալեալ էր, վաստակեալ էին եւ նոքա, բայց վասն պակասութեան ուսուցչացն, ոչ եկին ի կատարելութիւն, քանզի «զիա՛րդ հաւարացն, - ասէ, - եթէ ոչ լուիցեն» (հմմտ. Հոռմ. Ժ. 14), ուստի յայտ է, թէ ունէին զյաւժարութիւնն եւ կոչողի սպասէին: Որոց ասէ. «Երթաք եւ դուք

յայգին, եւ որ ինչ արժան է, առնուցուք»: Որպէս զի մի՛ ոք ասիցէ, թէ՛ ոչ կոչեցայ ես մինչ տղայն էի, այժմ ոչ եմ ընդունելի, յայտ առնէ այսու, թէ՛ յորում ժամու եւ զառնայ ոք, ընդունելի է Աստուծոյ, քանզի արդար դատաւոր է Աստուած՝ հատուցանել իւրաքանչիւր ըստ արժանեաց իւրեանց: Զի յորժամ ընծայեմք մեք աստուածութեանն, որ ինչ խոնարհագոյն է, քան զնա, տայ նա մեզ որ ինչ վերագոյն է քան զմեզ եւ վարձեալ եղաք ի գործ վաստակոյ ըստ զաւրութեան մերում, այլեւ հրաւիրեցաք ի հատուցումն վարձուց աւելի, քան զզաւրութիւն մեր:

Եւ իբրեւ երեկոյ եղեւ, ասէ փեր այգւոյն ցգաւառապետ իւր. «Կոչեա՛ զմշակսն եւ փո՛ւր նոցա վարձս՝ սկսեալ ի յեքնոցն մինչեւ ցաւառաջինսն» (Ի. 8):

Երեկոյ ոմանք զաւրհասական մահն իւրաքանչիւր ումեք ասեն, յորում ոչ է այլ ժամանակ գործոյ, եւ զի ի վախճանին զհատուցումն իւր տեսանէ ամենայն ոք: Բայց ինձ թուի, թէ լրումն յաւիտենի կենցաղոյս ասէ, յորում իւրաքանչիւր ումեք արժանիքն հատուցանին, ըստ առաքելոյ՝ «Աստուծոյ լաւագոյն համարեալ, զի մի՛ առանց մեր կարարեցին» (Եբր. ԺԱ. 40): Իսկ «գաւառապետ» կամ զհրեշտակս ասէ, որոց միջնորդութեամբն զԱւրէնսն ընկալաք՝ ըստ այնմ՝ «Առէք զԱւրէս ի հրամանս հրեշտակաց եւ ոչ պահեցէք» (Գործք Է. 53), կամ զառաքեալս եւ զմարգարէս, որք պատգամաւորք եւ վերակացուք կտակարանացն եղեն: «Կոչեա՛, - ասէ, - զմշակսն», այսինքն՝ ի մարմնոյ կամ ի հոգոյ, քանզի «Ինքնին Տէր հրամանաւ հրեշտակապետի ի ծայն փողոյ իջանէ, եւ մտեալք ի Քրիստոս յարիցեն յառաջագոյն» (հմմտ. Ա. Թեա. Դ. 15), եւ թէ՛ «Առաքեսցէ զհրեշտակս իւր, եւ ժողովեցեն զընտրեալս նորա ի ծագաց երկկից մինչեւ ի ծագս նորա» (հմմտ. Մաւրթ. ԻԴ. 31):

«Տուր նոցա, - ասէ, - վարձս՝ սկսեալ ի յեքնոցն մինչեւ ցաւառաջինսն»: Աստի ուսանիմք, թէ ամենայն տուրք բարիք թէպէտ յԱստուծոյ իջանէ (Կրնս Յակ. Ա. 17) ի մարմնի եւ զկնի, սակայն ըստ կարգի ի ձեռն հրեշտակաց ի մարդիկ իջանէ, քանզի եւ նոքա են, որ զորոմունս խրճունս կապեն եւ ի հուր արկանեն (Կրնս Մաւրթ. ԺԳ. 30): Բայց ընդէ՞ր ի յետնոցն սկսեալ. զի առաջինքն յուսացեալ էին վարձուց իւրեանց, արդ, զի մի՛ թուեսցի վերջնոցն, թէ պակաս ինչ առնուցուն, նախ զնոցայն ետ: Եւ ա՛յլ ազգ. ցուցանէ զպատիւս վերջնոցն, որք ի Քրիստոս հաւատացին, քանզի մարմին եւ անդամք

նորա եղեն՝ ըստ այնմ, թէ՛ «Փոքրիկն մեծ է յարքայութեանն» (հմմտ. Մարթ. ԺԱ. 11): Քանզի առաջինքն խորհրդով միայն միացան ի Տէր մեր եւ աւրինակաւ, իսկ վերջինքն՝ եկեղեցի հեթանոսաց՝ խորհրդով եւ բանիւ եւ գործով եւ ճշմարտութեամբ, այլեւ արեամբ եւ վկայական նահատակութեամբ, որպէս եւ գրեալ է. «Բազում դարերք սրացան մեծութիւն... բայց դու առաւել եղեր եւ անցուցեր զամենեքումբք» (Առակ. ԼԶ. 29): Ետես եւ Յովհաննէս, զի կային առաջի աթոռոյն եւ դառինն՝ արկեալ զինքեամբ արկանելի սպիտակ (տնն Յայտ. Է. 9), նաեւ Պաւղոս ընդարձակս իմաստասիրէ վասն գերազանցութեան հեթանոսաց (տնն Տոմ. Գ. 29, 24-30, Ժ. 12): Դարձեալ՝ սկսանելն ի յետնոցն զողորմութիւնն Աստուծոյ յուշ առնէ, զի հեթանոսք վասն ողորմութեան փառաւոր առնեն զԱստուած, քանզի ի գործ այգւոյն որպէս ստուգութիւնն ոչ եպերեցաւ՝ տալով առաջնոցն որպէս ուխտեաց, այսպէս ողորմութիւնն նորա ոչ պատուհասեցաւ զթալով ի յետինսն նախ՝ որպէս կամեցաւ, քանզի «ողորմութիւնք եւ ճշմարտութիւնք գնան առաջի երեսաց նորա» (հմմտ. Սաղմ. ԶԼ. 15):

Իբրեւ եկին որք զմերասաներորդ ժամուն, եւ առին մէն մի դահեկան (Ի. 9):

Նախ՝ զի մի՛ առաջինքն մեծամտիցեն՝ նախատելով զվերջինսն, եւ մի՛ սոքա վհատիցին, այլ զի ուսցին, թէ՛ գոյ կարողութիւն վերջին մտելոցն յայգի Աւրինացն եւ հաւատոյն՝ ըստ ժամանակի կամ ըստ հասակի ի սակաւ ժամանակս զբովանդակ մաքրութիւն հոգւոյ ստանալ իւրաքանչիւր ոք առանձին, զոր «դահեկանն» նշանակէ, որով ի տեսութիւնն Աստուծոյ ձգի մաքուր սրտիւ: Եւ երկրորդ՝ զի որ առաջինքն Աւրինաւքն սրբեցան, նա աւանիկ յետինքն ի մետասան ժամու մկրտութեամբն պայծառացան: Եւ երրորդ՝ ուսուցանէ, թէ՛ ի հանդերձեալն նախ արդարքն զփառս իւրեանց ժառանգեն եւ ապա մեղաւորք՝ զտանջանս՝ ըստ առաքելոյ, զի ասէ. «Փառք եւ պարիս ի վերայ ամենայնի, որ գործէ զբարի, եւ նեղութիւն եւ անձկութիւն, որ գործէ զչար» (հմմտ. Տոմ. Բ. 7-9), որպէս զի կրկին լիցի յանցաւորացն պատիժ. մի՛ ի տեսլենէ արդարոցն փառաց, թէ՛ յորպիսի իրաց զրկեցան եւ ապա՝ զկորուստ անձանցն, զոր պատրաստեցին յաւժարութեամբ:

Եկեալ եւ առաջինքն՝ համարէին, թէ՛ աւելի առնուցուն, եւ առին մէն մի դահեկան եւ նորա (Ի. 10):

Որք յԱւրէնս եկին կամ ի հաւատս նախ քան զայլս ժամանակաւ եւ կամ հասակաւ, ընկալան բարիս ըստ Աւրինացն խոստման, սակայն նախանձու ախտիւ ախտացան, որպէս զբազումս է տեսանել, մանաւանդ զկուսանս եւ զճգնաւորս, որք այսպիսի ախտիւ յզփանան՝ հայելով յընկերացն յառաջատուսն եւ ի շնորհս՝ ի հոգեւորս կամ ի մարմնաւորս, եւ բորբոքին մախողական յաչաղմամբ եւ կարծեն զինքեանս մեծագոյն փառաց հասանել վասն սրբութեան կուսութեանն եւ կամ այլ առաքիլութեանն, ժառանգել աստ զփառս ի մարդկանէ եւ անդ զպսակն առ ի Հաւրէ: Իսկ արդար դատողութիւնն Աստուծոյ՝ ըստ չափոյ սրբութեանն զմարմնական հանգիստ եւ զփառս պատրաստէ նոցա ըստ իւրեանց ախորժակացն որպէս կամին, բայց վասն նախանձուն առ այլս, յանտի փառացն տարազիր առնէ, որպէս զյիմար կուսանսն: Եւ զի այսպէս է՝ յաջորդս ցուցանէ: Կամ՝ առաջին դարուն մարդիկն, որ յուրմաս պարեցան, կարծէին աւելի առնուլ զփառս, բայց ի մետասան ժամու, որ սակաւ ապրին յետ Քրիստոսի, առաւելուն փառաւք քան զնոսա, զի նոքա կենաւք, իսկ սոքա՝ շնորհաւք:

Իբրեւ առին, արքանջէին զպանուրեառնէն եւ ասէին, թէ՛ «Դորա յեփինք մի ժամ գործեցին, եւ հասարակո՞րդս մեզ արարեր զդոսա, որ զձանրութիւն արուրն բարձաք եւ զպաւթ» (Ի. 11-12):

Թէպէտ ոմանք ասեն առակ միայն գոյ զիրս եւ ո՛չ ճշմարտութեամբ այնպէս լինել, քանզի այն դաւառ ազատ է ի բամբասանաց եւ ի մախանաց, զի թէ՛ աստ սուրբքն զանձինս վասն մեղաւորաց բաշխեն, անդ զիա՞րդ ընդ այլոց շնորհս մախան, այլ զի յորդորագոյնս առնիցէ զվերինս, այնպէս յորդորեաց զբանն՝ դառնալ ի ձերութեանն եւ պիտանի լինել այնքան, մինչ զի զբազումս ի նախանձ շարժեցէ, որպէս մուտն անառակին՝ զերէց որդին (տնն Առակ. ԺԵ. 11-32): Իսկ մեզ ասելի է, թէ՛ ստուգապէս զչար էին եւ խանդային ընդ այլոց բարիս, յորմէ ինքեանք ոչ նուազ էին, բայց ո՛չ անդ ի հանդերձեալն, այլ յայս կենցաղի: Զի որ ինչ անդր հասուցանի, աստէն գործոց է հատուցումն, վասն որոյ զբանն եւ զգործն ձեւացուցանէ, որպէս զի յիրաւի եւ արդար դատաստանն Աստուծոյ կարծեցեալ լինի, վասն զի ախտ տրտնջման եւ նախան-

ձու ոչ ի մարդիկ միայն ձգի, այլեւ յԱստուած, թէ ընդէ՞ր զայս աշուպէս արարեր, կամ նորա զայս իշխանութիւն ընձեռեցեր եւ կամ զսա յայնպիսի փառաց զրկեցեր, որպէս տեսանեմք այժմ եւ լսեմք զայսպիսի բարբանջանս ի բազմաց, որպէս եւ ասէ. «Տրտնջէին զտանուտեառնէն եւ ասէին, թէ՛ «Դորա յեփինքդ մի ժամ գործեցին, եւ հասարակո՞րդս մեզ արարեր զդուս»: Քանզի բազմաց պատահէ, որք ազգաւ կամ հասակաւ յետինք են, սակայն շնորհաւքն Աստուծոյ յառաջնն յաստիճանս կամ ի մարմնական փարթամութիւնս, կամ ի մեծագոյն իշխանութիւնս եւ ի պատիւ, որպէս Դաւթի յառաջանալն, որ յետին էր ազգաւ եւ հասակաւ, եւ Սաւուղի նուազիւն, ընդ որս մախար միշտ եւ սպանանել ձեռնարկէր (տես Ա. Թագ. ԺԶ-ԻԵ), սոյնգունակ եւ այլոց յոլովից լինիցի այս:

«Որ զճանրութիւն ատուրն բարձար եւ զփարթ»: «Ար»՝ զբոլոր կենցաղս իւր անուանէ, իսկ «ճանրութիւն»՝ զառ ի սա եղեալ փորձութիւնքն, պէսպէս խաղաղութիւն եւ պատերազմ, աղքատութիւն եւ փարթամութիւն, առողջութիւն եւ հիւանդութիւն, ազատութիւն եւ ծառայութիւն: Եւ «փարթ»՝ զգիւական տապն ասէ, յորում վշտանան հոգիք մարդկան յայլանդակ խորհրդոցն ձանձրութենէ, ի բարկութենէն ասեմ եւ ի ցանկութենէն, ի տրտմութենէն եւ յերկիւղէն եւ յայլ համազգի ախտիցն: Այսմ ամենայնի համբերեցաք, ասեն, եւ զսոսա հաւասար մե՞զ պսակես: Դարձեալ՝ տրտնջելն այնոցիկ է, որ ի մարմնաւոր իրս վաստակին, զի մարմնաւորն առանց աշխատանաց եւ տրտնջման ոչ լինի, որպէս Մարթայ տրտնջեաց ի մարմնաւոր գործն զբաղեալ, իսկ զբարին, որք բառնան կամաւք՝ թեթեւ է, ըստ Տեառն. «Լուծ իմ քաղցր է, եւ բեռն իմ՝ փոքրոզի» (Մարթ. ԺԱ. 30), վասն այնր տրտունջ ոչ լինի: Իսկ սոքա տրտնջեցին վասն մարմնոյ աշխատութեանցն, որ ի տուէ եւ հոգւոյ զբաղմանցն, որ ի գիշերի, քանզի այս է աւրն՝ տիւ եւ գիշեր:

Նա պապասխանի եր միում ի նոցանէ եւ ասէ. «Ընկեր, չգրկեմ զքեզ, ո՞չ դահեկանի միոջ սակ արկեր ընդ իս: Ա՞ն զքոյդ եւ ե՞րթ» (Ի. 13-14):

Ո՞վ արդար դատաւորութեանն, քանզի ոչ գոյ այլ աւելի իրաւունք, յորժամ ինքն իսկ տանուտէրն վասն նոցա իրաւունս զնէ դատաստանաւ եւ ո՞չ սաստիւ: Եւ ասէ «միում ի նոցանէ». զի՞նչ է «միումն». իբր թէ ամենայնքն զմի բարք ունէին նախանձութիւն:

«Ընկեր», այսինքն՝ հակառակ ինձ եւ ընդդիմացաւ աւրինաց իմոց, քանզի հաւասար ինձ դատաւոր եղեր եւ զիմսն ընդ քննութեամբ արկանէիր, թէ ընդէ՞ր այս անուն պատուեցաւ յետին գոլով, կամ այն անուն նուագեցաւ՝ առաջին լինելով: «Չգրկեմ զքեզ». զնոսա քեզ հասարակորդս առնելով՝ չէ՛ ինչ զրկութիւն, այլ արգարութիւն, զի գլխտնոցն յաւժարութիւնն ի բարին՝ զոր ունէին, յառաջագոյն եւ զցանկութիւնն կշռելով ընդ քո առաքինութիւնն հաւասարեալ, ուստի եւ զվարձն համեմատեցի, մանաւանդ, զի ոչ ի քոյոցն ետու, այլ զքոյն քեզ շնորհեցի եւ յիմոյն անձախապէս նմա պարգեւեցի: «Ո՞չ դահեկանի միոջ սակ արկեր ընդ իս», այսինքն՝ մարմնական փառաց, որում ըրձացար եւ երկրաւոր հանգստեան. ո՞չ զայդ աւասիկ հատուցի անպակաս, զի դիտաւորութիւն քո այն էր, եւ ես լցի, քանզի ո՞չ զայդ աւրէնքն, այլ հոգւոյ մաքրութիւնն ուսուցանէր, իսկ դու զայն թողեալ՝ մարմնական բարութեան հաշիւ պահանջէիր յինէն, զոր ետու իսկ: «Ա՞ն զքոյդ,- ասէ,- եւ ե՞րթ». այն իսկ, թէ՛ ի դասս տրտնջողացն ընկալար զբարեաց քոց փոխարէն ի կեանս քո, այժմ երթ ի տանջանս ի դասս վասն նախանձուն, որ առ բազումս, զի թէ զայս ախտ ոչ էիր ախտացեալ, հանդերձեալ էի պարգեւել զկնի հարիւրապատիկն եւ զյաւելտեանական կենացն ժառանգութիւն, բայց զի յաչաղկոտ եղեր, ըստ չափոյ բարեացն, զոր ունէիր, առեր զմարմնական բարիսն եւ փոխանակ նախանձուն՝ երթ ժառանգեա զգեհնին պատիժս, որ պատրաստեալ է սատանայի եւ հրեշտակաց նորա, քանզի որ նախանձի ընդ եղբաւրն՝ վատթարագոյն է, քան զվատսն, որ բնաւին բարիս ոչ արարին, զի Գիրք սովորութիւն ունի ընդ սպանման կարգել զնախանձն (տես Յոր Ե. 2, Նոմ. Ա. 29, Գաղ. Ե. 20-21):

Եթէ կամիմ յեփնոցս փալ որպէս եւ քեզ, եթէ չիցէ՞ ինձ իշխանութիւն յիմսս առնել զինչ եւ կամիմ (Ի. 15):

Յառաջագոյն գլխտնոցն յաւժարութիւնն՝ առաջնոց գործոցն բաղդատեաց եւ եցոյց, թէ չէ զրկութիւն, այլ յիրաւի հաւասարեցան, իսկ այժմ այլազգ յանդիմանէ՝ զողորմութիւնն յուշ առնելով եւ զառատութիւնն, քանզի «ողորմեցայց որում ողորմեցայց եւ գթացայց յորս գթացայց» (Ելք ԼԳ. 19), «քեզ զի՞ փոյթ է, միթէ ասէ՛ կալ ցբուրն» (հմմտ. Նոմ. Թ. 20-21),- ասէ առաքեալ: Բայց թուի, թէ՛ զի յետինքս առանց տրտնջման մնացին, տաց զհարիւրապատիկն, որպէս նոցա, տայ

եւ գլաւխտենական փառան, որպէս զի ուսցուք ո՛չ յոք նախանձել, թէպէտ եւ առանց վաստակոյ ի շնորհս վայելիցէ: Յիրաւի՛ ապա այսպիսիքս առնուն վարձս ըստ գործոց, առնուն եւ պսակս շնորհաց, ըստ կամաց ողորմութեանն Աստուծոյ:

Կամ թէ ակն քո չար է, զի ես առաքս եմ (Ի. 15):

Այս կարի յանդիմանութիւն է եւ նախատինք նախանձոտացն, զի գրեթէ ասէ՝ յիւրոց բարեաց, թէ ոք ոչ մատակարարէ այլոց, ունի տեղի նախանձու, զի զիւրն այլոց ոչ կամի, իսկ զայլոց բարիս այլոց յաչազելն մեծագոյն չարութիւն է եւ անհրաժեշտ բարկութեան առիթ: Բայց «ակն» զմիտան ասէ, յորս բազմացեալ ախտ նախանձուն վասն բունանալոյն ի նմա չարին՝ գայ եւ ի տեսանելիս եւ ըստ ոչ կամեցողութեան բանսարկուին գործի առեալ զաչս մարդկան՝ չարակնէ զբազումս, ուստի եւ վնասէ իսկ, որպէս ասեն ոմանք: Դարձեալ՝ «ակն քո չար է», այսինքն՝ թէ մտաւք քո զայն խնդրեցէր, որ քեզ չար եղեւ, ինձ զի՞նչ փոյթ է, «զի ես առատս եմ» եւ ի տալն զխնդիրն ես բարի եմ: Կամ թէ՛ «ես առաքս եմ», այսինքն՝ զի որ յինէն զբարին խնդրեաց, ես նմա զայն պարգեւեցի, զբարին գործել եւ վասն իմ աշխատել, որ եւ զգործաւդսն պահեաց առանց աշխատութեան, որ ոչ ձանձրացան եւ տրտնջեցին իբրեւ զքեզ:

Այնպէս եղիցին յեփինք առաջինք, եւ առաջինք՝ յեփինք, զի բազումք են կոչեցեալք, եւ սակաւք են ընտրեալք (Ի. 16):

Նախ, որպէս ասացաք, վասն հրէից յառաջ կոչեցելոց ասէ եւ ո՛չ հաւատացելոց, եւ հաւատացելոց յառաջելոց քան զնոսա, եւ ապա վասն ամենեցուն կանխաւ ծագելոցն առաքինութեամբ, եւ յետոյ հեղգացելոց եւ յետս ընկղմելոց, եւ որք ի չարեացն զղջացան եւ զբազմաւք գերագանցեցին՝ է փոփոխմունս: Լսի եւ այսպէս, թէ ամենեքեան են ստեղծուածք Աստուծոյ, բայց որք Աստուծոյ են՝ սակաւք են ընտիրքն, որք իմաստութեամբ ի մարմնոյս ի բաց որոշեցան եւ առ ճշմարիտ եւ ականակիտ լոյսն հայեցան: Իսկ բազումքն, որք զկնի կաւոյն ցնդեցան՝ ոչ կարացեալք ի վեր յառել, [յ] Աստուծոյ են, բայց ո՛չ Աստուծոյ:

Բայց զի՞նչ այն, թէ՛ «բազումք են կոչեցեալք, եւ սակաւք են ընտրեալք»: Եթէ այդպէս իցէ, ապա ընդէ՞ր եւ կոչեցան իսկ. կոչեցան՝ զմարդասիրութիւնն ցուցանէ, իսկ յընտրութիւնն ոչ ժամանեալք, զնոցա հեղգութիւնն, որպէս ասաց այլուր, թէ՛ «Սակաւք

են, որ ապրելոց իցեն» (Մաւրթ. Է. 14, Ի 16, Ղուկ. ԺԳ. 23-30), ուսկանն զամենայն ազգս ժողովեաց, բայց զբարի բարին միայն յամանս հաւաքեաց (տնն Մաւրթ. ԺԳ. 48), եւ ի հարսանեացն զաղտեղեալն հանդերձիւ արտաքս հանին (տնն Մաւրթ. ԻԲ. 11-13), եւ Յուդաս կոչեցաւ ընդ նոցին, բայց յետոյ Սատանա եղեւ: Գրէ եւ Պաւղոս, թէ զորս յառաջագոյն ճանաչէր կերպարանակից լինել պատկերի Որդւոյ իւրոյ, զնոսին եւ կոչեաց եւ արդարացոյց եւ փառաւորս արար (տնն Վոռմ. Ը. 29-30), ուստի յայտ է, թէ միայն կոչումն չէ բաւական ի փրկութիւն, եթէ ոչ արժանի գնացս կոչմանն ցուցանիցեմք՝ ըստ առաքելոյ, թէ՛ «Յոր կոչումն կոչեցաւ, ի նմին մնասցէ» (Ա. Կոր. Է. 20), զի մի՛ յընտրութենէն վրիպեցիմք՝ յետինք լինելով, եւ ի փառացն անկանիցիմք: Ո՛չ վայրապար եւ զայն եւս ասէ, թէ՛ «Եղիցին յեփինք առաջինք», զի նախ ասաց, թէ բազումք եղիցին առաջինք յետինք, եւ աստ՝ զընդդէմն, զի ցուցցէ, թէ նախ առաջինքն արտաքս ելին եւ յետինք եղեն, եւ ապա յետինքն մտեալ՝ առաջինք եղեն:

ԳՐԻԳՈՐ ՏԱԹԵԲԱՅԻ

Նմանեցաւ արքայութիւնն առն փանուրեառն (Ի. 1):

Այս թ. (9) կամ Ժ.(10) երորդ ւերինակ արքայութեանն:

«Այգի» կոչէ զհրամանս եւ զպատուիրանս Աստուծոյ: Եւ այլք ասեն՝ այգի է եկեղեցի սուրբ, ըստ այնմ. «Այգի եղև սիրելոյն» (Ես. Ե. 1): Եւ նոյն է միտք երկոցունց: Եւ ժամանակ գործոյ է կեանք աշխարհիս, զի ահայ ժամանակ ընդունելոյ եւ այլն:

Եւ «մշակք» են զանազան դէմք՝ քահանայք, վարդապետք, առաքեալք, մարգարէք, մարտիրոսք, կուսանք եւ այլք: Սոքա են ժողովեալք ի յեկեղեցի եւ զհրամանս Տեառն կատարեն:

Վասն ժամուց կոչմանց (տնն Ի. 5):

Հարց. Զի՞նչ է զանազան ժամք կոչեցելոցն:

Պատասխանի. Զորիւք է իմանալ.

Ա. Նախ՝ հասարակ՝ իւրաքանչիւր մարդոյ առաւաւտն՝ տղայութիւն, մինչ ի Է. (7) ամն մասն ունի տգիտութեանց: Երրորդ ժամն պատանեկան, մինչ ի ԺԴ. (14) սոյնպէս լինի կատարեալ: Վեց ժամն՝ երիտասարդն երեսնամեայ. ամենայն ինչ ջերմ է եւ զաւրաւոր: Թ. (9) ժամն խոնարհի արեգակի, ԽԵ. (45) ամն պաղի

ամենայն ինչ մեր: Մետասաներորդ ժամն, որ մտանէ արեգակն, Կ. (60) ամեայ ծերութիւնն մերձ ի մահն:

Բ. Երկրորդն՝ յառաջին դարուն մինչ ի Քրիստոս: Առաւաւտն՝ Աղամ, որ հրամայեաց գործել եւ պահել (հմմտ. Ծննդ. Բ. 15): Երրորդն՝ Նոյ, որ էտո զաւրէնս: Հասարակն՝ Աբրահամ, որ ել յերկրէ եւ յագգէ իւրմէ: Ինն ժամն Մովսէսիւ կոչեցաւ: Մետասաներորդ՝ ի վերջին ժամուս, Բանն մարմնացեալ կոչեաց զհեթանոսս:

Գ. Երրորդ՝ ի ծննդեանէ Փրկչին մինչ ի խաչն: Առաւաւտ՝ սկիզբն քարոզութեան, եւ սքանչելիքն, եւ այլակերպելն, եւ զալն յերուսաղէմ: Եւ խաչն, որ ի մետասան ժամուն էա՞ծ զաւագակն ի դրախտն:

Դ. Չորրորդ՝ յառաջին գալստենէն ի միւսանգամ գալն: Առաւաւտ՝ քարոզութիւնն: Երրորդ ժամն՝ իջումն Հոգւոյն: Հասարակն՝ առաքելոցն քարոզութիւն: Ինն ժամն՝ վարդապետացն: Մետասանն՝ Եղիայ եւ Ենոփք կոչեն:

Այսպէս չորքդիմի է տեսութիւն առակիս, զոր մեկնիչդ զերկուն կամի:

Արդ, գիտելի է, զի Ժ. (10) ինչ ցուցանէ բան առակիս.

Ա. Նախ՝ ցուցանէ զփոյթ տանուտեառն, որ միշտ ի վարձու ունի զմշակս այգոյն:

Բ. Երկրորդ՝ ցուցանէ զպատշաճ ժամս կոչման, զի յորժամ հաւանին, յայնժամ կոչէ զնա, որպէս զՊաւղոս:

Գ. Երրորդ՝ ցուցանէ, թէ յառաջին հասակէն կոչէ, վասն այն ասէ՝ «Ել ընդ առաւարս»:

Դ. Չորրորդ՝ յոյս տայ ամենայն մարդկան, զի յորժամ եւ դառնամք ի մեղաց, ընդունելի է, թէ մինչ ի վերջին շունչն:

Ե. Հինգերորդ՝ ցուցանէ, թէ ի վերջնոցն սկսանի տալ վարձս առաջնոցն, զի առաջինքն յուսով հաստատեալք էին, եւ վերջինքն մի թուլացին:

Զ. Վեցերորդ՝ մեք տուաք, որ ինչ խոնարհ է քան զաստուածութիւն նորա, այսինքն՝ զպաշտաւնսն, եւ նա տայ, որ ինչ վերագոյն է, քան զմեզ, այսինքն՝ զտեսութիւնն իւր, զոր «ղահեկան» կոչէ (Բ. 2):

Է. Եւթներորդ՝ ցուցանէ, որ ի վաստակն ըստ զաւրութեան մերում վարձեցաք, որ ինչ արժանն է, ասէ՝ «Վրաց» (Բ. 4), այլ ի հատուցումն վարձուցն առաւել քան զգործն առաք:

Ը. Ութերորդ՝ ցուցանէ, թէ ի վաղջանի կենաց հաւատացեալքն զփառս տան կամաւ, եւ ապտամբքն ի բռնութենէն, որ կայ ի վերայ նոցա դառնան. վասն այն եւ ասեն. «Ոչ ոք կալաւ զմեզ ի վարձու» (Մաթթ. Բ. 7):

Թ. Իններորդ՝ ի գործ այգոյն, ոչ արդարութիւնն զողորմութիւնն զրկեաց, եւ ոչ ողորմութիւնն՝ զարգարութիւնն: Արդարութեամբ ետ գործողացն յայգին, եւ ողորմութեամբ՝ որ ի վերջին ժամն ուղղեցաւ: Վասն այն ի յայլ թարգմանս Աւետարանացն, որ ընդ առաւաւտս ել, նոցա արկ մին դահեկան վարձ, եւ որ ի յերից ժամն, եւ ի վեցն եւ ի յինն, ասաց՝ «Որ ինչ արժան է, տաց» (Բ. 7): Եւ որ ի մետասանն, ասէ՝ «Երթ եւ գործեա՛ յայգուօքն», եւ ոչ այլ ինչ ասաց, զի ողորմութեամբ ետ նմա:

Ժ. Տասներորդ՝ ցուցանէ, թէ ոմանք յառաջին մշակացն նախանձեցան եւ կորուսին զվարձս իւրեանց, վասն այն ասացաւ նմա՝ «Ընկեր սատանայի, առ զքոյդ եւ երթ» (հմմտ. Բ. 14-15), զի արքայութիւն իմ սուրբ է ի նախանձուէ:

Հարց. Ո՞վ է «փանուրերն» (տե՛ս Բ. 8):

Պատասխանի. ԶՀայր Աստուած նշանակէ: Եւ «գաւառապետ» (Բ. 8)՝ զՔրիստոս, զի նա է պետ ամենայն իշխանութեանց եւ պետութեանց եւ իշխան ամենայն երկրի:

Հարց. Զի՞նչ է «երեկոյ» (տե՛ս Բ. 8):

Պատասխանի. Ըստ չորից իմացմանցն.

Ա. Նախ՝ երեկոյ է կենաց լրումն:

Բ. Երկրորդ՝ ժամանակ գալստեանն:

Գ. Երրորդ՝ խաչելութիւնն:

Դ. Չորրորդ՝ կատարած աշխարհի:

Հարց. Զի՞նչ է «ղահեկան» (Բ. 2):

Պատասխանի. Չորս ինչ նշանակէ.

Ա. Նախ՝ զպայծառութիւն պատկերին, զոր կորուսաք Աղամաւ եւ գտաք Քրիստոսիւ, զի պատկեր է կայսեր:

Բ. Երկրորդ՝ զտեսութիւնն Աստուծոյ, զի գիր ունի զԱստուծոյ:

Գ. Երրորդ՝ զկատարեալ պսակն, զի վեց դանկ է:

Դ. Չորրորդ՝ զանապական ժառանգութիւնն ըստ նիւթոյն:

Հարց. Զի՞նչ է «սկսեալ յեպոնոցն մինչեւ ցառաջինսն» (Բ. 8):

Պատասխանի. Չորս է իմացումն.

Ա. Նախ՝ ի վերջին արդարոցն սկսանի զվարձն, ըստ այնմ. «Ասարուծոյ վասն մեր լաւագոյն համարեալ, զի մի առանց մեր կապարեացին» (Եբր. ԺԱ. 40):

Բ. Երկրորդ՝ նախ՝ զաւագակն եմոյժ ի դրախտն եւ ապա՝ զԱդամ եւ զայլ սուրբսն:

Գ. Երրորդ՝ նախ՝ աղքատացն եւ ապա՝ սիրողաց:

Դ. Չորրորդ՝ ի վերջին եւ նուազ գործոցն սկսանի Հատուցանել, մինչեւ ցմեծամեծս:

Հարց. Վասն է՞ր սոցա Հասարակ տայ զվարձն, որք յառաջին ժամէն եւ ի վեցն, եւ ի յինն, եւ ի վերջին ժամն գործեցին:

Պատասխանի. Որպէս ասացաք ի Հարիւր, վաթսուս եւ երեսնաւորն.

Ա. Նախ՝ զառատ բարութիւնն եւ զողորմութիւնն Աստուծոյ ցուցանէ:

Բ. Երկրորդ՝ արդարութեամբ է, զի թէպէտ ի վերջին ժամն մտին, այլ ըստ իւրաքանչիւր կարողութեան եւ ըստ թուոյ կենաց իւրեանց Հաւասար գործեցին, յիւրաւի Հաւասար պատուեցին:

Գ. Երրորդ՝ ասեն ոմանք, թէ դահեկան զտեսութիւնն Աստուծոյ կոչէ, զոր Հասարակ տեսանեն ըստ կարողութեան, այլ զպսակ արդեանցն՝ առաւել եւ նուազ, որպէս «Ասորք քան զասորք առաւել է փառաք» (Ա. Կոր. ԺԵ. 41), ասէ առաքեալ:

Դ. Չորրորդ՝ եւ ստոյգ, թէպէտ ամենեքեան տեսանեն անընդմիջաբար զԱստուած, այլ առաւել եւ նուազ ըստ սրբութեան իւրեանց, որպէս աչք մարդկան զարեգակն առաւել եւ նուազ տեսանէ, ըստ պարզութեան իւրեանց:

Հարց. Որպէ՞ս նախանձին արդարքն անդ:

Պատասխանի. Անդ ոչ է նախանձ արդարոցն, այլ եւ ոչ աստ, զի զանձինս դնեն ի վերայ միմեանց: Այլ այնպէս կազմէ զբան առակին, զի մեք մի նախանձեացուք աստ, վասն այն մեկնիչդ ի վերայ տիոց Հասակիս մեր մեկնէ զառակդ, եւ ոչ ի վերայ դարու եւ կատարածի աշխարհի:

Այսքան առ այս:

ՎԱՍՆ ԱՆԻԾԵԱԼ ԹՁԵՆԻՈՅՆ

Մարթ. ԻԱ. 18-20

ԳՐԻԳՈՐ ՏԱԹԵԻԱՅԻ

Այգուցն քաղցեալ (հմմտ. ԻԱ. 18):

Երեք անպատշաճութիւն երեւի.

Ա. Նախ՝ զի այգուցն քաղցեալ, զի բնական է ի Զ. (6) ժամն քաղցնուլ:

Բ. Երկրորդ՝ զի կրկին անգիտացաւ. մին՝ զպտուղն եւ միւս՝ զժամանակն, զի նիսան եւ մարտի ժամանակ ոչ է պտղի:

Գ. Երրորդ՝ զի անմեղ անէժ զթգեներն:

Քաղցն է ցանկութեանն, անգիտանալն Բանին մասին, անիծանելն ցասմանն: Առաջինն ցուցանէ, զի կամաւ քաղցեալ, որպէս յորժամ Խ. (40) աւր պահեաց: Նոյնպէս եւ միջինն, զի կամաւ անգիտացաւ, որպէս Հայր ասէր ցԱդամ՝ «Ո՛ր ես» (Ծննդ. Գ. 9), եւ ցԿայեն. «Ո՛ր է եղբայր քո» (Ծննդ. Դ. 9), եւ ցՄովսէս. «Զի՞նչ է ի մեռիս քո» (հմմտ. Ելից Դ. 2):

Իսկ վասն վերջնոյն բազում դնեն պատճառս վարդապետք, զոր ժողովեացուք մեք ԺԵ. (15) գլուխս:

Ա. Նախ՝ վասն աշակերտացն, զի քաջալերեաց զնոսա, զի ունէին երկիւղ եւ տրտմութիւն. ովսաննայիւն զտրտմութիւնն մերժեաց եւ թգենեաւն զերկիւղ հրէիցն փարատեաց:

Բ. Երկրորդ՝ կրկին զաւրութիւն է Աստուծոյ, այսինքն՝ արարչական եւ արքունական, որ է բարերարել, որ զբազումս արար, եւ աստ պատժէ, զի մի՛ ասիցեն, թէ ոչ կարաց զանձն փրկել՝ ըմբռնեցաւ:

Գ. Երրորդ պատճառաւ անէժ զթգեներն, զի ազդումն աստուածութեան իւրոյ ետ ամենեցուն, բարեկամացն նշան բերկրութեան, եւ թշնամեացն՝ երկիւղ, աշակերտքն Հաստատեցան եւ աւտարքն զարմացան:

Դ. Չորրորդ՝ զի ցուցցէ զխոնարհութիւն եւ զքաղցրութիւն առ նենգաւորսն իւր, որ զանշունչ տունկն ցամաքեցոյց, կարէր զնոսա սատակել:

Ե. Հինգերորդ՝ որ կամէր բառնալ զպատիժ մարդկան Գ. (3) ինչ պատժեաց, այսինքն՝ զվէման փշրեալ, եւ զխողան հեղձեալ, եւ զտունկն գոսացուցեալ, զի վիմովն պատառեսցին սիրտք անհաւատից եւ խոզիւքն հեղձցին մոլար խարէութիւնք չարին եւ անմեղ տնկովն Երուսաղէմ դաւսասցի, վասն խաչի յանցանաց իւրոց, ըստ որում ձայնն ի տաճարին, գնամք աստի, գնամք եւ այլ ոչ դառնամք, եւ որպէս պատմէ Յովսէպոս¹:

Զ. Վեցերորդ՝ աւրէն էր հրէից՝ «զայգի եւ զճառս ոչ ամեղ ճառքաղ, եւ թէ զեզերս արփի թո մի քաղեսցես» (հմմտ. Ղևտ. ԺԹ. 10): Եւ Տէր ծառոյն անարգեալ զաւրէնս արար ճռաքաղ, վասն վրէժխնդրութեանն աւրինացն անէծ գտունկն:

Է. Եւթներորդ՝ գերգեսացիքն կամաւ ոչ ելին առ Քրիստոս, կոտորեաց զխոսքսն եւ ակամայ եկին: Այսպէս եւ տէր թղենոյն վասն ազահութեան ոչ գայր առ Քրիստոս, զի մի յանդիմանեսցի: Յանդիմանեաց գտունկն եւ ի հարկէ եկն:

Ը. Ութերորդ՝ զի յորժամ մեղաւ Ադամ եւ մերկացաւ ի փառաց եւ թղենեաւ ծածկեաց զմերկութիւնն, եկն Տէրն եւ վճարեաց զպարտս նորա եւ չորացոյց զթղենին, զի ոչ է պիտոյ Տէր եւ նորա ծածկոյթ Ադամայ, զի դարձաւ նայ յառաջին փառս իւր:

Թ. Իններորդ՝ անէծ զթղենին ոչ վասն քաղցի, այլ վասն աշակերտացն զարմանալոյ, զի նոր իմն էր նշանն ի թղենին, որ դալարագոյն է, քան զամենայն տունկ, որպէս ասէ հետակայ. «Ոչ միայն թզենոյ, այլ թէ լերինդ ասիցէք՝ ելցի» (հմմտ. ԻԱ. 21):

Ժ. Տասներորդ՝ զի ցուցցէ, թէ Արարիչ է բնաւից. կարէ տնկել եւ խլել:

ԺԱ. Մետասաներորդ՝ յաւրինակ հրէիցն, որ զուարճէին աւրինացն ձեւով եւ դատարկ ի գործոց, վասն որոյ խլեաց զնոսա, եւ չորացան յարմատոց:

ԺԲ. Երկոտասաներորդ՝ թղենին՝ դառն, եւ անիծաւ: Այսպէս եւ դառնացեալքն մեղաւք չորասցին եւ սատակեսցեն յերկրէն կենդանեաց ի միջոյ արդարոց:

ԺԳ. Երեքտասաներորդ՝ յաւրինակ կեղծաւորաց, որք միայն ունին զձեւ առաքինոյ եւ ոչ զպտուղ, զոր զկարի մեղաւորսն ընդ

¹ Գ Յաւսեպոս

մէջն՝ կտրել հրամայէ եւ զբաժինն ընդ կեղծաւորսն դնել: Թեւեւ ոմանք վասն սատանայի ասեն այս կեղծաւոր:

ԺԴ. Չորեքտասաներորդ՝ ասին, թէ աւձն արտաքոյ դրախտին ել ի ծառ թղենի եւ պատրեաց զԵւայ. անէծ զայնպիսի ենթակայ եւ պատճառ խարէութեան մարդոյն:

ԺԵ. Հնգետասաներորդ՝ ասեն ոմանք, թէ պտուղն, զոր կերաւ Ադամ, այդ էր, վասն այն Քրիստոս անէծ, զի եղեւ պատճառ եւ առիթ անկման մերոյ ի դրախտէն: Անէծ գնա, զի վերստին տալոց էր գերագոյն փառք, քան զդրախտին:

Հարց. Որպէ՞ս չորացաւ:
Պատասխանի. Ա. Նախ՝ ամենայն տունկ յերկար ժամանակաւ չորանայ: Իսկ այս՝ յանկարծակի:

Բ. Երկրորդ՝ զի ի տերեւոյն եւ ի ստեղանցն թառամի, եւ սայ յարմատոյն չորացաւ:

Գ. Երրորդ՝ զի կեղեւն սպիտակացեալ, որպէս զաստղ փայլէր, վասն որոյ զարմացան:

Իսկ որ ասէ աւրինակաւ լերին ի դէմս հպարտացեալ լերինն է իմանալ, որպէս ասացաւ յայն մասին ի համարն:



ԱՌԱԿ ԵՐԿՈՒՅ ՈՐԴԻՈՅՆ

Մապթ. ԻԱ. 28-32

ՍՏԵՓԱՆՈՍ ՍԻԻՆԵՅԻ

«Զի՛նչ թուի ձեզ. այր մի ուներ երկուս որդիս» (հմմտ. Մապթ. ԻԱ. 28):

«Այրն»՝ Քրիստոս, եւ «երկու որդիքն»՝ երկու ժողովուրդք՝ հրէայք եւ հեթանոսք, որ ասաց, եթէ՛ «երթամ Տէր»՝ հրէական ժողովուրդն, որ ասաց՝ եթէ՛ «երթամ»՝ յայգին ի գործ ուրախութեան, եւ «ոչ գնաց», եւ երկրորդն՝ հեթանոսական ժողովուրդն, որ ասաց «ոչ երթամ, եւ յեւոյ զղջացեալ գնաց յայգեստանն» (տե՛ս ԻԱ. 30):

ԱՐԻՍՏԱԿԷՍ ԵՒ ԵՓՐԵՄ

Արդ, ասէ առակ ինչ.

Առն միոջ,- ասէ,- էին Բ. որդիք (ԻԱ. 28):

«Երկու որդիքն» Բ. (2) ինչ իրս յայտ առնեն, որ ի հրէայս եւ ի հեթանոսս գործեցան, զի սոքա նախ չառնին յանձն եւ ոչ ունկնդիրք իսկ եղեն աւրինացն: Եւ նոքա ասէին, թէ՛ «Ջամնայն, գոր ինչ եւ ասիցէ մեզ Աստուած, արասցուք եւ լուիցուք» (Ելից ԻԴ. 7): Եւ յետոյ արդեամբք իսկ անհնազանդք եղեն, զի մի կարծիցեն, թէ՛ աւրէնքն ինչ աւգնիցեն նոցա: Յուցանէ, թէ՛ աւրէնքն իսկ դատախազ են նոցա, վասն այնորիկ զի անձամբ զանձինս դատապարտիցեն, ի նոցանէ իսկ կամի հանել զվճիռն: Եւ քանզի զուղղորդն չախորժեցին յանձն առնուլ, ասպա առակաւքն անէ զնոսա յայն, զոր կամին, զի առ չիմանալ բանիցն ետուն զպատասխանին, անձամբ անձանց հատին զվճիռն, ասպա ինքն իսկ յայտնէ:

Մաքսաւորք եւ պոռնիկք,- ասէ,- յառաջեսցեն քան զձեզ յարքայութիւնն երկնից (ԻԱ. 31):

Զի թէ լոկ ասացեալ էր զայս, ծանր թուէր նոցա բանն, բայց զի յետ նոցա զվճիռն տալոյ անձանց ասէ, ո՛չ այնպիսի ինչ տաղտկալի թուէր, վասն այնորիկ եւ զպատճառսն առընթեր դնէր:

«Եկն,- ասէ,- առ ձեզ Յովհաննէս ճանապարհաւ արդարութեան» (հմմտ. ԻԱ. 32):

Այսինքն, զի ոչ յափշտակեաց նա անձին իւրոյ զպատիւ տեառն իւրոյ, այլ իբրեւ կարծէին վասն նորա՝ Քրիստոսն իցէ: Ասաց նոցա. «Թէ եւ ո՛չ զխրացս կաշկաց նորա արժանի եմ բառնալ» (հմմտ. Մարկ. Ա. 7, Յովհ. Ա. 27):

«Եկն,- ասէ,- առ ձեզ Յովհաննէս» եւ ոչ առ նոսա: Եւ ոչ այսչափ միայն, այլ եւ զարդարութեան ճանապարհն: Քանզի եւ ոչ այնպէս իսկ մեղ կարէին դնել, եթէ ծոյլ ինչ ոք էր եւ չառնէր փոյթ զուժեքէ, այլ եւ վարս անարատս ունէր եւ խնամս կարի իսկ յաճախագոյնս, եւ սակայն ոչ անսացէք նմա, եւ այնու եւս կշտամբիք, զի մաքսաւորքն անսացին, եւ դուք՝ ոչ ընդ նոսա եւ ոչ յետ նոցա: Ամենեւին իսկ վրիպեալ էք ի ներելոյ եւ ի թողութենէ: Նոցա՛ կարի իսկ պարծանք են եւ զձէնջ յոյժ ամբաստանութիւն². առ ձեզ եկն, եւ ոչ համարեցայք ինչ, եւ առ նոսա ոչ չոգաւ, եւ ընկալան, եւ դուք զնոսա եւս չկարացէք առնել անձանց վարդապետս: Ապա ուրեմն ոչ միայն ըստ շնորհացն հմուտ մաքսաւորացն եւ պոռնկաց, այլ ըստ արդարութեան, զի ոչ նոյնպէս պոռնիկ[ք] կացին եւ մտին, այլ լուան եւ հաւատացին, եւ սրբեցան, եւ փոփոխեցան, եւ մտին:

ՅՈՎՆԱՆՆԷՍ ԾՈՐԾՈՐԵՅԻ

Բայց զիա՛րդ թուի ձեզ. առն միոջ էին երկու որդիք, եւ մաքսուցեալ առ առաջինն՝ ասէ. «Որդեա՛կ, երթ այսաւր գործեա՛ յայգւոջ»: Նա պապասխանի ետ եւ ասէ. «Երթամ, քէ՛ր, եւ ոչ չոգաւ»: Մաքսու եւ առ միւսն եւ ասէ նոյնպէս: Նա պապասխանի ետ եւ ասէ. «Ոչ կամիմ», բայց յեւոյ զղջացաւ եւ չոգաւ յայգին:

Արդ, ո՞ յերկոցունց արար զկամս հարն: Ասեն՝ յեփինն (Մապթ. ԻԱ. 28-31):

«Երկու որդի»՝ զհրէայս եւ զհեթանոսս առակէ, որով զուռուցեալ միտս նոցա զնստուցանէ, որք յԱւրէնսն յեցեալ էին եւ յԱբրահամ պանծային. ցուցանէ, թէ՛ եւ հեթանոսք ստեղծուածք են Աստուծոյ եւ ծնունդք բանի նորա: Իսկ «այր»՝ զԱստուած վասն ներգործական եւ կատարուն զաւրութեանն, կամ վասն մարմնազգեցութեանն, որ եղեւ մարդ ի զանգուածէն Ադամայ: Իսկ «մաքսելն» զմարդասիրութիւնն Աստուծոյ քարոզէ, որ խոնարհեցաւ առ Աբրահամ եւ էջ ի Քորէք եւ ի Սինա, եւ ետ զԱւրէնսն եւ ասաց զգուանաւք. «Որդեա՛կ, երթ այսաւր, գործեա՛ յայգւոջ»: «Այգի» զԱւրէնսն ասէ, զի

¹ Բ Գոցա] Գոքա
² Բ ամբաստանութիւն] ասպատանութիւն

ցուցցէ, թէ քաղցր է պտուղ Աւրինացն եւ կցորդի գործոցն, այլ եւ կատարելագործ է եւ իմաստնագործ եւ լուսաւորիչ, զոր «աւրն» նշանակէ՝ ըստ Դաւթի՝ «Յայտնութիւն բանից քոց լուսաւորէ եւ իմաստուն առնէ զբողայս» (Մաղմ. ՃԺԸ. 130): Կամ թէ «աւր» զբովանդակ կենցաղս ասէ՝ կալ յԱւրէնսն որչափ կենդանի է, զի կեանք մարդկան իբր զմի աւր է: Իսկ նա վասն սաստիկ տեսեան ծնողին պատասխանի ետ, թէ՝ «Երթամ, փէր», այս է, զի ասացին. «Չամենայն զոր ինչ ասասցէ Տէր Աստուած մեր՝ լուիցուր եւ արասցուր» (հմմտ. Ելք ԺԹ. 8), եւ յետոյ արդեամբք իսկ յետս կացին՝ ըստ այնմ. «Գիրացաւ եւ կիցս ընկեց, եւ յետս եկաց յԱստուծոյ փրկչէն իւրմէ» (հմմտ. Բ Ար. ԼԲ. 15): Դարձեալ՝ եւ յերկրորդ տնտեսութիւնս զնոյն արար, զի նախ առ նոսա մատեաւ վասն սիրոյ Հարց, եւ մարմին ի նոցանէ էառ՝ ըստ այնմ. «Ոչ ուրեք առաքեցայ, եթէ ոչ առ ոչխարս կորուսեալս փանն Իսրայէլի» (Մաղթ. ԺԵ. 24), եւ կոչեաց զնոսա ի Հնազանդութիւն եկեղեցւոյ այգւոյ եւ ինքեան, որ որթ եղեւ ճշմարիտ (տե՛ս Յովհ. ԺԵ. 1), վարդապետութեամբ Աւետարանին գործել մի՛ զկորստական կերակուրն, այլ զայն, որ տանի ի կեանսն (տե՛ս Յովհ. Զ. 27), եւ նոքա վասն սքանչելեացն, զոր զկոյրս լուսաւորէր եւ զանդամալոյծս առողջացուցանէր, զգիւրաւ Հարս բժշկէր, զմեռեալս յարուցանէր եւ սակաւ Հացիւ զբազումս յագեցուցանէր, յանձն առին Հաւատալ ի նա, բայց ոչ Հոգան գործով, քանզի ո՛չ ի սրտէ, այլ վասն Հրաշիցն յայն գային՝ ըստ այնմ, թէ՝ «Բազումք հաւաքացին ի նա, բայց ինքն Յիսուս ոչ հաւաքայր զանձն նոցա, զի գիտէր զինչ կրէր ի մարդն» (հմմտ. Յովհ. Բ. 23-25), եւ թէ՝ «Խնդրէք զիս, իբր ոչ եթէ նշանս ինչ փեսէք, այլ զի կերայք ի հացէ անփի եւ յագեցարուք» (Յովհ. Զ. 26): Ա՛յս է ասելն «Երթամ, տէր», եւ ոչ Հոգաւ»: Եւ զի նախ նոցա ասաց, յայտ առնէ եւ զինքեանն մարդասիրութիւնն, միանգամայն եւ զպատճառն Հատանէ, զի ճշմարիտ լիցի եւ յողթաւզ ի դատելն (տե՛ս Մաղմ. Ծ. 6), եւ զայս ոչ միայն անձամբ, այլ եւ առաքելովքն, որպէս ասէր Պաւղոս. «Ձեզ բանս այս փրկութիւն առաքեցաւ..., որովհետեւ ոչ ընդունիք, դատամք ի հեթանոսս» (հմմտ. Գործք ԺԳ. 26, 46). վասն այսորիկ ասէ, թէ՝ «Մարեաւ եւ առ միւսն», իբր ի Հարկէ:

Բայց ե՛րբ մատեաւ՝ քննելի է: Կամ բնականն աւրինաւք, որ է մտացն խիղճ, զոր եզ Աստուած ի նոսա, կամ այն, զի գրեաց ի վերայ բռեայ սեղանոյն զԱւրէնսն յանցսն Յորդանանու, կամ մարգարէիւքն, եւ նոքա հրաւիրեցան. յայտ ի բանից նոցա է, որպէս Յոնան անձամբ իսկ Հոգաւ ի Նինուէ (տե՛ս Յովհ. Գ. 3): Բայց ճշմարտապէս այսպիսի է. զի առաքելովք կոչեաց՝ ըստ այնմ. «Երթայք

աշակերպեցէք զամենայն հեթանոսս» (Մաղթ. ԻԸ. 19): Եւ նա յառաջագոյն ըմպահկեալ՝ ըստ անառակին իրաց, ապա յետոյ եկեալ ի միտս՝ զղջացաւ եւ եմուտ յեկեղեցի (տե՛ս Ղուկ. ԺԵ. 11-32) եւ ծառայեաց Որդւոյն երկնաւորի, որպէս տեսանեմք այժմ:

«Արդ, ո՞ յերկոցունց արար զկամս հաւրն», - Հարցանէ: Աստի ուսանիմք զաւանդութիւն իմն գեղեցիկ, զի թէպէտ եւ բանն է ընդ պատժաւք եւ ընդ պսակաւք, սակայն ոչ այնքան, որպէս եւ գործն: Է՞ր վասն. զի մարդ յերկուց է՝ ի Հոգւոյ եւ ի մարմնոյ, եւ ծնաւդ բանին Հոգին է, եւ ի լրութիւն ածաւդ՝ մարմինն: Արդ, յորժամ խոկայ միտքն եւ կամ խաւսի լեզուն զսխալն, թէպէտ յանցաւոր է, սակայն ոչ կատարելապէս, զի առանց մարմնոյ է, իսկ յորժամ մարմինն եւս աւժանդակէ գործով, կատարելապէս կշտամբի կամ փառաւորի՝ ըստ առաքելոյ, թէ՝ «Իւրով մարմնովն ժառանգէ զբարի կամ զչար» (հմմտ. Բ Կոր. Ե. 10): Վասն այսորիկ ոչինչ գրեաց զՀնչումն ձայնին, այլ զարդիւնս. ասաց. «Ո՞ արար զկամս Հաւրն», այսինքն՝ գործեաց զփրկութիւն անձինն: «Ասեն՝ յեփինն». զի մի՛ կարծիցեն, թէ Աւրէնքն ինչ աւզնիցեն նոցա, ցուցանէ, թէ նա՛ է դատախազ նոցա, յորժամ ոչ գործեն զնոսա՝ ըստ այնմ. «Գոյ որ դարի զձեզ, Մոսէս, յոր դուք յուսացեալ էք» (հմմտ. Յովհ. ԺԲ. 48), այսինքն՝ Աւրէնքն, եւ թէ՝ «Բանն, զոր խաւսեայ՝ նա դարի զնոսա» (հմմտ. Յովհ. ԺԲ. 48): Վասն այսորիկ ի նոսա ձգեաց, եւ նոքա անձամբ զանձինս դատապարտեցին՝ ի վերայ ինքեանց ձգելով զվճիռն, եւ զանձինս աւտար ի կամացն Աստուծոյ ցուցին:

Ասէ ցնոսա Յիսուս. «Ամէն ամէն ասեմ ձեզ, զի մաքսաւորք եւ պոռնիկք, յառաջեսցեն քան զձեզ յարքայութիւն Աստուծոյ» (ԻՒՒ. 31):

Տեսանե՞ս, թէ՛ ո՛րպէս յայտնեաց, զոր թէ նախ էր ասացեալ. ծանր թուէր նոցա բանն եւ տաղտկալի, բայց յորժամ զվճիռն ետուն անձանց, ապա ի մէջ բերէ զայս, թէ ճշմարիտ այդպէս է, որպէս ասացիք, «զի մաքսաւորք եւ պոռնիկք յառաջեսցեն քան զձեզ յարքայութիւնն Աստուծոյ»: Ո՛չ յայտնապէս ասաց «Հեթանոսք», զի մի՛ ամենեւին վհատիցին, այլ թէ՛ «մաքսաւորք եւ պոռնիկք»: Այսու ցուցանէ նախ՝ թէ ի Հրէից բազումք Հաւատացին եւ Հաւատալոց էին, որպէս Մատթէոս մաքսաւոր եւ Ղեւի Ալփեայ եւ Պաւղոս, եւ ի պոռնկաց եւս, որպէս կինն այն, որ արտասուլաւքն զոտս նորա լուանայր եւ հերովն մաքրէր եւ իւղովն աւժանէր (տե՛ս Ղուկ. Է. 37-38): Եւ երկրորդ՝ զՀեթանոսս յա՛յս առակէ «մաքսաւոր»՝ զառ ի

միմեանց յանցանսն ասէ, իսկ «պոռնիկ»՝ զհեռանալն յԱստուծոյ եւ զշնալն ընդ քարի եւ ընդ փայտի (տնն Երեմ Գ. 9), սոքա թարց Աւրինաց՝ միայն ի հաւատոցն արդարութենէ յառաջեցին յարքայութիւնն Աստուծոյ: Եւ դարձեալ՝ «յառաջելն» ասել՝ ոչ թէ սոքա երթիցեն եւ նոքա՝ զկնի, այլ զի նախանձ արկցէ նոցա, թէ կամեացին հաւատալ, զի ոչինչ այնպէս յորդորական առնէ զթանճրամիտն, որպէս նախանձն, վասն այսորիկ հանապազ ասէր, թէ՛ «Եղիցին առաջինք յեփինք, եւ յեփինք՝ առաջինք» (Մարթ. ԺԹ. 30, Ի. 16): Հանդերձ այսու եւ այլ իմն ուսուցանէ, թէ մուտ յարքայութիւնն է Աւրինաց պահպանութիւնն, զի որք զղջանանն ի մեղաց եւ մտանեն գործեն յայգի նորա՝ խոստովանութեամբ եւ ապաշխարութեամբ քաւել զյանցանսն, թէպէտ եւ յոյժ ծանրագոյն իցեն մեղաւք, վերին կենացն իրցին ժառանգք՝ ըստ այնմ. «Թէ անարեւն դարձցի յանարեւութենէ իրմէ, կեցցէ» (հմմտ. Եզեկ. ԺԸ. 21), որպէս եւ ընդդէմ այսր. «Արդարն էթ դարձցի յարդարութենէ իրմէ, մի՛ յիշեսցի արդարութիւն նորա, գոր արար, այլ ի մեղս իր մեղցի» (հմմտ. Եզեկ. ԺԸ. 24), ապա ուրեմն ամաչեսցեն յոյժ որք զապաշխարութիւնն խոտեն:

Զի եկն Յովհաննէս ճանապարհաւ արդարութեան, եւ ո՛չ հաւաքացէք նմա, եւ մարսաւորք եւ պոռնիկք հաւաքացին նմա, եւ դուք քեզք եւ ո՛չ զղջացարուք յեփոյ հաւաքալ նմա (ԻԱ. 32):

Դարձեալ՝ այսու զառաջինն հաստատէ. զի որպէս Տէրն առ ձեզ մատեալ նախ, այսպէս եւ ծառայն, զի առ ձե՛զ եկն Յովհաննէս եւ ո՛չ առ նոսա ընթացաւ, եւ ո՛չ այսչափ միայն, այլ եւ «արդարութեան ճանապարհաւ», քանզի ոչ կարէք մեղ զնել նմա, թէ ծոյլ ոք էր կամ ոչ առնէր փոյթ զուժեքէ, եւ կամ արտաքոյ Աւրինացն ընթանայր, այլ զի վարս անարատս ունէր՝ եւ խնամս կարի յաճախագոյնս: Նա՛ զի եւ ոչ յափշտակեաց զպատիւ Տեառն իւրոյ, այլ իբրեւ կարծէին վասն նորա, թէ նա իցէ Քրիստոսն, ասաց, թէ՛ «Եւ ոչ զխրացս կաշկից նորա արժանի եմ բաճնալ» (հմմտ. Մարթ. Գ. 11), որ եւ մեծ արդարութիւն է, սակայն ո՛չ անսացիք նմա, որ է յոյժ կշտամբանք անձանց ձերոց, զի այնպիսում առն ոչ հաւատացէք: Եւ ա՛յս եւս կրկին տանջանք. զի մաքսաւորքն անսացին եւ մկրտեցան, եւ դուք ո՛չ ընդ նոսա եւ ո՛չ յետ նոցա, որ ամենեւին անարգանք են ձեզ եւ նոցա՝ պարծանք, զի առ ձեզ եկն եւ չհամարեցայք ինչ, եւ առ նոսա ոչ չոգաւ եւ ընկալան, եւ դուք ոչ նախանձեալ ընդ նոսա եւ անձանց ձերոց վարդապետ ստացեալ փարթար յետին լինել

նոցա, թէ եւ ոչ առաջին: Վասն այսորիկ վրիպեալ էք ի ներելոյ եւ ի թողութենէ դուք, եւ նոքա ոչ միայն ըստ շնորհաց մտին, այլ եւ ըստ արդարութեան, զի ո՛չ նոյնպէս պոռնիկ կացին եւ մտին, այլ լուան եւ հաւատացին եւ սրբեցան եւ փոխեցան, եւ ապա՛ մտին՝ ըստ երգոյն, թէ՛ «Րախար պոռնիկն եւ բարելոնացին եւ հնդիկն եւ այլագոյնքն անդ էին» (հմմտ. Սաղմ. 29. 4):

ԳՐԻԳՈՐ ՏԱԹԵՒԱՅԻ

Այս մետասան առակն է արքայութեան:

«Այր» (Մարթ. ԻԱ. 28) կոչի Աստուած.

Ա. Նախ՝ արի եւ զաւրաւոր է:

Բ. Երկրորդ՝ առնող եւ արարիչ է: Եւ մի է աստուածութիւնն եւ բնութիւնն:

Եւ «Բ. որդիք» (ԻԱ. 28)՝ հրեայք եւ հեթանոսք: Այլ եւ արդարք, որպէս փարիսեցիք եւ մեղաւորքն, որպէս մաքսաւորք:

Յայսմ առակէ Զ. (6) իր ուսուցանէ.

Ա. Նախ՝ թէ հաւասար որդիք են հրեայք եւ հեթանոսք ըստ արարչութեան:

Բ. Երկրորդ՝ առաջին են հրեայք ըստ Աւրինաց:

Գ. Երրորդ՝ նոքա բանիւ հնազանդ եւ գործով՝ ոչ, եւ սոքա բանիւ ոչ հնազանդեցան, այլ գործով:

Դ. Չորրորդ՝ զի ոչ ինչ աւգնէ աւրէնքն բանիւ, այլ դատախազ լինի:

Ե. Հինգերորդ՝ զի անձամբ դատապարտեցին զինքեանս:

Զ. Վեցերորդ՝ զի մեղաւորք արդարացան զղջմամբն եւ հաւատով, եւ նոքա անգեղջ եւ անհաւատ կացեալ՝ կորեան:

Վասն Յովաննու

Հարց. Յովաննէս եկն ճանապարհաւ արդարութեան (ԻԱ. 32):

Պատասխանի. Չորս ինչ ցուցանէ աստ արդարութիւնն.

Ա. Նախ՝ խոնարհութիւն, որ ոչ ընկալաւ զպատիւ Տեառն իւրոյ, ասէ. «Չեմ արժանի լուծանի զխրացս նորա» (հմմտ. Յովհ. Ա. 27):

Բ. Երկրորդ՝ արդար քարոզութեամբ:

Գ. Երրորդ՝ անարատ ի վարս:

Դ. Չորրորդ՝ ամենեցուն խնամարկու:

Եւ ամենայն քարոզողի պարտ է զչորեսինս զայս ստանալ:

ՎԱՍՆ ԱՅԳԻՈՅՆ

Մապթա, ԻԱ. 33-46

ՍՏԵՓԱՆՈՍ ՍԻԲՆԵՑԻ

Այլ առակ լուարուք. Այր փանուպեր փնկեաց այգի եւ շրջագայեաց ցանգ եւ փորեաց հնձան (հմմտ. Մապթա, ԻԱ. 33):

«Այգի»՝ առաջին ժողովուրդն, «ցանգ»՝ պահպանութիւնն Աստուծոյ, «աշտարակ»՝ տաճարն, «հնձան»՝ տեղի պատարագացն եւ նուիրացն, «մշակք»՝ հրէայքն եւ իմաստունք ժողովրդեանն, զնալ Տեառնն՝ ոչ եւս երեւիլ նոցա ի հրեղէն ամպ, ժամանակ մերձեցեալ եւ ծառայք, մարգարէիցն առաքումն, ու որդի Քրիստոս.

Մա է ժառանգն, եկայք սպանցուք զսա եւ կալցուք զժառանգութիւն սորայ (ԻԱ. 38):

Որպէս Հերովդէս լուեալ վասն գալստեան նորա կոտորեաց զմանկտին Բեթղազէմի, կամելով զնա կորուսանել (տն՝ Մապթա. Բ. 16), գանեցաւ Միքիա, ապտակեալ ի Սեղեկիայէ (տն՝ Բ. Մնաց. ԺԸ. 23): Սպանին զՋաքարիաս ի մէջ տաճարին եւ սեղանոյն (տն՝ Մապթա. ԻԳ. 35), քարկոծեցին զԵրեմիաս (տն՝ Երեմ. ԼԸ. 6) եւ զՋաքարիաս զորդի Յովիդայայ (տն՝ Բ Մնաց. ԻԴ. 20-21):

ԱՐԻՍՏԱԿԷՍ ԵՒ ԵՓՐԵՄ

Այլ միւս եւս առակ լուարուք զայգոյն եւ զտնկողէն եւ զնորին խնամոցն եւ զաչաղկոտ մշակացն, որք վասն չտալոյ զպտուղն սպանին զծառայսն, ապա եւ զհարազատ որդին եւ զժառանգ այգւոյն (տն՝ Մապթա. ԻԱ. 33-43):

«Այգի»՝ այն իսկ է, զոր յԵգիպտոսէ փոխեաց, սատակեաց զհեթանոսս եւ զնոսս տնկեաց, «ցանկով պարսպեաց» (ԻԱ. 33) զնա Աւրինաւքն: Եւ գուր «հնձան փորեաց» ի նմա (ԻԱ. 33)՝ զտաճարն. եւ «շինեաց աշտարակ» (ԻԱ. 33)՝ զսեղանն: Եւ «եպ զնա ցմշակսն» (ԻԱ. 33)՝ զառաջնորդսն ասէ: Եւ «գնաց», ասէ (ԻԱ. 33), այն իսկ է, զոր երկայնամիտն իսկ եղեւ եւ ո՛չ անդէն առ ետեղ, էած զպատիժսն: Բայց

դու տես աստ զնորա կարեւոր խնամսն եւ զնոցա զանչափ վատութիւնսն, զի եւ զմշակացն գործ ինքն գործեաց՝ զցանկն անկողի եւ զայգին տնկելով եւ զայլն ամենայն կազմելով: Սակաւ ինչ յանձնարար նոցա՝ դարմանել եւեթ զտնկեալն եւ պահել, եւ չէր ինչ պակաս, այլ ամենայն ինչ կազմ եւ կատարեալ, սակայն այնպէս ինչ չաւգտեցան:

Եւ առաքեաց առ նոսա զԺառայս իւր (հմմտ. ԻԱ. 34):

Ջմարգարէսն՝ առնուլ զպտուղս նորայ՝ զհնազանդութիւնն եւ զգործոցն զհանդէս, սակայն եւ այնմ եւս զչարութիւն ցուցանէին. ո՛չ միայն զպտուղն չտալովն, որք յայնչափ խնամս վայելեցին, այլեւ զժկամակ լինէին ընդ ծառայսն, որ զնային եւ արեամբ եւս զձեռս լնուին՝ ինքեանք վրիժապարտք, եւ յայլոց վրէժս պահանջէին: Նմին իրի եւ երկիցս եւ երիցս առաքեաց (տն՝ Մապթա. ԻԱ. 35, 36, 37), զի եւ առաքչին մարդասիրութիւնն երեւեսցի, եւ նոցա՝ հետտութիւնն:

Յեպոյ,- ասէ,- առաքեաց զորդի իւր (հմմտ. ԻԱ. 37):

Եւ է՞ր վասն յառաջ ո՛չ առաքեաց զորդին, զի յիրացն, որ ընդ ծառայսն անցուցին, ստգտանիցեն զանձինս եւ ի ցասմանէն ցածնուցուն եւ ապա յայնմ, որ եկն, զանգիտեսցեն եւ ամաչեսցեն, զի՞նչ իցէ, թերեւս ակն ածիցեն. ոչ եթէ առ անգէտս ինչ ասիցէ. ա՛ւն անդր քաւ լիցի, այլ առ ի ցուցանել, թէ կարի իմն չարիք եւ պատասխանի տալոյ չի՞ք ինչ հայթիթանք: Այլ ինքն զիտէր, թէ սպանանելոց էին, եւ առաքեաց, զի թերեւս ակն ածեսցեն. զոր ինչ պարտ էր նոցա առնել, պատմէ, թէ ակն ածել պարտ էր եւ ո՛չ յանդգնել: Եւ արդ զի՞նչ գործեցին, որոց ընդ առաջ՝ պարտ էր իսկ երթալ եւ թողութիւն վասն առաջին յանցանացն խնդրել, նոցա եւս քան զեւս գուն գործեալ յառաջին պղծութիւնսն յաւ[ել]ուին:

Տեսին,- ասէ,- զորդին եւ ասեն. «Եկայք սպանցուք զսա» (հմմտ. ԻԱ. 39):

է՞ր վասն եւ վասն որո՞յ իրաց:

«Մա է ժառանգն,- ասեն,- սպանցուք, եւ մեր լիցի ժառանգութիւն» (հմմտ. ԻԱ. 39):

¹ Ա պարտ էր իսկ

Որպիսի ինչ մեղ¹ կամ ի մեծ կամ ի փոքու կարիցէք ղնել, այլ զի թերեւս պատուեացն զձեզ, այնու մեղադիր լինիք, եւ կամ զի Աստուածն է եւ վասն ձեր մարդ եղեւ եւ բազում եւ մեծամեծ սքանչելիս արար:

ԵՓ Իսկ յետոյ առաքել զՈրդին. ոչ թէ, զի վերջին էր նա, այլ յետոյ երեւեցաւ, այն, որ երբեմն էր իսկ, որպէս եւ վկայեաց Յովհաննէս, թէ՛ «Որ գալոցն է զկնի իմ, առաջի իսկ է» (հմմտ. Յովհ. Ա. 29): Տե՛ս ընդ ամբարշտութեանն եւ զկարի անմտութիւնն եւ զպատճառս սպաննութեանն. «Եկայք, ասեն, սպանցուք»:

ԵՓ Զնա սպանին, եւ ժառանգութիւնն նոցա բարձաւ եւ տուաւ Հեթանոսաց:

Կ Տեսանես՝ զի արդ յառաջագոյն մարգարէանա, եւ զտեղին եւ ուր սպանանելոց էին, յայտ առնէ:

Նանին,- ասէ,- արտաքոյ այգւոյն եւ սպանին (ԻԱ. 40):

Մուծանէ զնա ի դատ առաջի նոցա եւ ասէ, որում արժանի են մշակքն. հատին ինքեանք զվճիռ ի վերայ անձանց իւրեանց եւ ասեն.

«Զչարսն չարաւ կորուսցէ, եւ զայգին րացէ այլոց մշակաց» (ԻԱ. 41):

Եւ ո՛չ այսու զՀեթանոսաց մուտն կարի քաջ յայտնեաց, զի մի՛ ամենեւին պատճառս տացէ նոցա, այլ ականարկեաց միայն, թէ տացէ այլոց եւ զմարգարէութիւնն ի մէջ բերէ եւ պատկառելով սաստէ.

«Զիցէ,- ասէ,- ընթերցեալ ձեր: Թէ՛ Զվէմն, զոր անարգեցին շինողքն» (հմմտ. ԻԱ. 42):

ԵՓ Ո՞ր «վէմ». այն, որ աղամանդն կոչի, զի ահաւասիկ ասէ. «Դնեմ ես աղամանդ ի մէջ որդոցն Իսրայէլի» (հմմտ. Նաւ. Դ. 7):

Կ Իսկ «Չինողս» զհրէից վարդապետսն կոչէ, որպէս եւ Եզեկիէլ ասէ, թէ՛ «Շինէին զորմնն եւ ձեպիւն փորիս առանց միջ ամուր առնելոյ» (հմմտ. Եզեկ. ԺԳ. 10): Եւ զիա՞րդ «անարգեցին», զի ասէին, թէ՛ «Սա չէ յԱստուծոյ եւ մոլորեցուցանէ զժողովուրդս»:

¹ Ա մեզ] մեղ

Ի Տեսածն եղեւ այս եւ է սքանչելի յաչս մեր (ԻԱ. 42):

Զի ամենեւին յայտ առնիցէ, թէ նոքա վասն թերահաւատութեանն ելանելոց են, եւ Հեթանոսքն՝ հաւատովք մտանելոց: Եւ զայս քանանացովն եւ իշովն եւ ձ. (100) ապետիւն յայտ արար. ածէ եւ զսովիմբ եւ զպատիժսն:

Եթէ ամենայն, որ ընդ հարցցի ընդ վիմիս ընդ այսմիկ, փշրեսցի, եւ յոյր վերայ անկցի, մանրեսցէ զնոսա (հմմտ. ԻԱ. 44):

Երկուս կորուստ սպառնացաւ աստ՝ մի՛ ի զթելոյն եւ ի գայթակղելոյն:

ԵՓ Զի՞ մարտեան ընդդէմ նորա իշխանք ժողովրդեանն եւ կամեցան շիջուցանել զնա. զի ոչ քաղցրացաւ նոցա ուսումն վարդապետութեան նորա, զայն յայտ առնէ՝ ասելովն, թէ՛ «Որ անկցի ի վերայ վիմիս, փշրեսցի»:

Եւ միւսն՝ ի պաշարմանէն եւ յառնելոյ զքաղաքն եւ ի՛ բնաջինջ առնելոյ, զորս կարի իսկ յայտնագոյնս գուշակեաց, եթէ «հոսեսցէ զնա». զի վէմն, ասէ, որ հարկանէր զպատկերն, եղեւ լիառն մեծ, եւ լցաւ ի նմանէ ամենայն երկիր, եւ զի խափանեաց նա զկոոցն պաշտամունս այլովքն հանդերձ:

Կ Եւ արդ, իբրեւ լուան զայս ամենայն, պարտ էր երկիր պազանել եւ յերկիւղէ պատժոցն, զոր լուան, ականածել եւ ցածնուլ:

Այլ նոքա, իբրեւ լուան, գիպացին, թէ առ նոսա ասաց: Եւ խնդրէին ունել զնա, բայց ի ժողովրդենէն երկեան (հմմտ. ԻԱ. 45-46):

Զգային տակաւ, թէ զնոցանէ խաւսի առակաւ, բայց նոքա ո՛չ ի բազմացն երկեւղէ ցածնուին եւ ոչ ի բանիցն ասացելոց, եւ ոչ ի մարգարէիցն վկայութենէ, եւ ոչ յայնմանէ ինչ ականածէին, զի ինքեանք իսկ անձամբ անձանց ետուն զվճիռն, քանզի անդէն զմաւտաւորս եւեթ խնդրէին, զի չիք ինչ, որ այնպէս գլխիվայր կործանէ եւ դարահոս եւ քարավէժ առնիցէ, որպէս յորժամ աստէն ոք ընդ ժամանակեա կեանս բեւեռեսցի: Եւ չիք ինչ, որ յայսմ ամենայնի տացէ վայելել, որպէս որ միշտ զանտիսն ոք նախամեծար առնիցէ. «Խնդրեցէք, - ասէ, - նախ զարքայութիւնն Ասորո՞յ, եւ այս ամենայն յաւելցի ձեզ» (Մաթթ. ԺԲ. 31):

¹ Ա > ի

ՅՈՎՆԱՆՆԷՍ ԾՈՐԾՈՐԵՑԻ

ԱՅՂ առակ լուարուք (Մաթթ. ԻԱ. 33):

Ընդէ՞ր միշտ առակ կարգէ. զի զարտաքինսն յոյժ հաւանեցուցանեն առակաւոր խաւսք եւ վարդապետութիւնք, այլեւ զմարգարէութիւնն լնու: Բայց զի՞նչ է, թէ՛ «ԱՅՂ առակ լուարուք»: Կամ թէ՛ ի վերայ առաջնոյն կրկին յանդիմանութիւն, կամ այն՝ յաղագս արտաքսելոյն, եւ այս՝ յաղագս նորա երախտեացն եւ նոցա անշնորհութեանն եւ չար փոխանակ բարւոյն հատուցանելոյ:

Այր մի էր փանուփէր, որ փնկեաց այգի եւ ցանգով պարեաց գնա, եւ փորեաց ի նմա հնձան, եւ շինեաց աշտարակ, եւ ետ գնա ցմշակս եւ զնաց ի փար աշխարհ (ԻԱ. 33):

Մարդասիրի Աստուած ի բազում գիրս աստուածայինս «տանուտէր» կոչիլ. կամ վասն դատողական իշխանութեան տան աշխարհիս եւ ինքնատէրութեանն, կամ վասն զգեցելոյ Որդւոյն Աստուծոյ զպատկեր մարդկան, ըստ առաքելոյ՝ «Մոսէս հաւարարիմ է ի վերայ փան նորա, այլ Քրիստոս Տէր է փան իւրոյ, որոյ փունն մեք իսկ եմք» (հմմտ. Երր. Գ. 5-6): Արդ, սա տնկեաց «այգի», կամ զգրախտն ձեռաւք իւրովք եւ լուսով՝ իբր ցանկով, պատեաց եւ զատոյց յայսմ աշխարհէ, եւ փորեաց ի նմա հնձան՝ յամենայն ծառոց ուտելն, այլեւ մտացն խորութեամբ ճմլել զիմաստս Հաւրն, յորմէ ուրախութեան գինին արտաքս հոսէր: Եւ «աշտարակ» ի գիտութեան փայտէն հրաժարեցուցանելն, եւ ետ գնա ի մարդն՝ գործել եւ պահել ըստ աւրինի մշակաց՝ կրկին տածամար: Իսկ «գնալն» զաներեւոյթ լինելն Աստուծոյ նշանակէ, քանզի ընդ մարմին եւ ընդ անմարմին կարի իմն յոյժ է միջոցն:

Եւ կամ՝ «այգի»՝ զոր ի ձեռն Մոսիսի տնկեաց՝ խլելով զքանանացիս եւ տնկելով զիսրայէլացիս՝ ըստ Դաւթայ. «[Այգի] յեգիպոստ փոխեցեր, հաներ զհեթանոսս եւ զլոսսա փնկեցեր» (Մաղմ. ՆԹ. 9), եւ Եսայի, թէ՛ «Այգի զարութեանց փունն Իսրայէլի» (հմմտ. Ես. Ե. 7), իսկ «ցանկ»՝ զխնաման սաէ յեգիպոստ եւ այսր, կամ զԱւրինացն զգուշութիւն, որով որոշեալ ի հեթանոսական պաշտամանցն: Եւ «հնձան» զտեղի զենմացն սաէ եւ «աշտարակ»՝ զսեղանն քաւութեան, յորում ոչ ոք իշխէր մտանել, բայց միայն քահանայապետն, եւ զայն միանգամ ի տարւոջն (տն՛ս Ելք I. 10), որ ըստ բարձրագոյն խորհրդոցն, որ ի սեղանն կատարէր, զխաչին ասեմ հնձան, «աշտարակ» կոչեաց. կամ

վասն, տաճարին ասաց զայս: Իսկ «մշակ» զառաջնորդս եւ զգպիրս ժողովրդեանն սաէ, յորս ետ գործել զայգին, այսինքն՝ վարդապետել եւ դաստիարակել առ ի հաւատս ըստ Աւրինացն, որք գուշակք էին Աւետարանին աւետեաց:

«Եւ գնաց,- սաէ,- ի տար աշխարհ»: Կամ՝ զի երկայնամիտ եղեւ եւ ոչ անդէն էած զպատիժն, յորժամ յանցեան, կամ՝ այլ ոչ եւս երեւեցաւ նոցա հրեղէն ամպով, որպէս ի Սինէական լերինն (տն՛ս Ելք ԺԹ.): Բայց դու տե՛ս ինձ աստ զնորա կարեւոր խնաման, զի զմշակացն զծանրագոյն գործն ինքն գործեաց՝ զտնկելն, զպատկելն, զշինելն, եւ նոցա զարմանել եւեթ յանձն արար եւ պահել, եւ չէր ինչ պակաս, այլ ամենայն ինչ կազմ էր, սակայն եւ ոչ այնպէս աւգտեցան:

Իբրեւ մերձեցաւ ժամանակ պարոյ, առաքեաց զճառայս իւր առ մշակսն՝ առնուլ զպարուս նորա (ԻԱ. 34):

Ո՛չ իսկոյն մինչգեռ նորատունկք էին, զի մի՛ դժուարեցին, այլ յորժամ ժամանակ պտղոյն մերձեցաւ, այսինքն՝ զի կերակրեաց յանապատին մանանայիւն եւ սնոյց վիմաբուղխ ջրովն (տն՛ս Ելք ԺԶ., ԺԷ.) եւ շնորհեաց զպարգեւական երկիրն՝ հանգչելով ի նոսա եւ զարգացոյց պէսպէս տրաւք, եւ զաւելորդ բողբոջս ուռոց նոցա խանգարիչս յապաւիչս՝ զամեղեկացիսն եւ զքանանացիս, զեաւթն ազգս զաւրաւորս քան զնոսա քանցեաց եւ ապա առաքեաց զճառայս իւր առ մշակսն, զմարգարէսն առ քահանայսն եւ առ իշխանսն՝ խնդրել հաւատս եւ գործս բարիս ի ժողովրդենէն եւ կամ զհնազանդութիւն Աստուծոյ: Եւ թէ ընդէ՞ր զմարգարէսն «ճառայս», իսկ զքահանայս «մշակ» կոչէ, զի մարգարէքն զկամս Աստուծոյ միայն պաշտէին առանց վարձու, իսկ քահանայքն վասն վարձուց տասանորդին մշակ էին ժողովրդեան:

Եւ կալեալ մշակացն զճառայս նորա՝ զոմն փանջեցին, զոմն սպանին, զոմն քարկոծեցին (ԻԱ. 35):

Տէ՛ս զչարութիւն նոցա, ոչ միայն զպտուղն չետուն՝ որք յայնչափ խնամս վայելեցին, այլեւ զժկամակ լինէին ընդ ճառայսն եւ արեամբ զձեռսն լնուին, ինքեանք վրիժապարտք էին եւ յայլոց վրէժս խնդրէին: «Զոմն փանջեցին», - սաէ: Գանեցաւ Միքիա յԱքայարէ եւ ապտակեցաւ ի Սեղեկիայէ (տն՛ս Գ. Թագ. ԻԲ.), սպանաւ

Ջաքարիա ի մէջ տաճարին եւ սեղանոյն (տե՛ս Մապթ. ԻԳ. 35), եւ սղոցեցաւ Եսայիաս, քարկոծեցին զԵրեմիա եւ զմիւս Ջաքարիա՝ որդի Ամովթայ:

Դարձեալ առաքեաց այլ ծառայս բազում քան զառաջինսն, եւ արարին նոցա նոյնպէս (ԻԱ. 36):

Այսու զմարդասիրութիւնն իւր ցուցանէ եւ զնոցա հաստութիւնն, բայց «բազում ծառայս» ասելով կարի զպատիժս նոցա ծանրացուցանէ, զի ոչ ի ծառայիցն Աստուծոյ ակն ածեցին եւ ոչ ի բազմացն աչառեցան, այլ սպանին եւ զնոսա եւ չարչարեցին եւ նախատեցին, որպէս զԵղիա եւ զԵղիսէոս եւ զերկոտասան մարդարէսն եւ զայլս բազումս:

Յեփոյ առաքեաց առ նոսա զորդի իւր եւ ասէ. «Թերեւս ամաչեացն յորդոյ աստի իմմէ» (ԻԱ. 37):

է՞ր վասն յառաջագոյն ոչ առաքեաց զՈրդին. զի յիրացն, որ անցուցանէին ընդ ծառայսն, ըստգտանիցեն զանձինս եւ ցածնուցուն ի ցասմանէն, եւ ապա յայնմանէ, որ եկն, զանգիտեցեն եւ ամաչեցեն: Եւ դարձեալ՝ յետոյ առաքեալ զՈրդին, ո՛չ եթէ վերջին էր նա, այլ յետոյ երեւեցաւ մարմնով, որ ըստ աստուածութեանն նախ էր, քան զյաւիտեանս՝ ըստ Յովհաննու, թէ՛ «Որ գալոցն է զկնի իմ, նախ քան զիս է» (հմմտ. Յովհ. Ա. 15): «Առաքեաց,- ասէ,- առ նոսա զորդի իւր»՝ զհամագոյակիցն իւր եւ զհարազատ սիրելին, որպէս վկայեաց ի Թաբոր եւ ի Յորդանան (տե՛ս Մապթ. ԺԳ. 5, Գ. 17): Եւ «առաքեաց» ասելն, զմարդկութիւնն նշանակէ, կամ իբրեւ զԱստուած՝ զի զհաճութիւն Հաւրն ցուցցէ առ որս զիւրն զամենայն զբանս եւ զգործս վերաբերէր:

«Թերեւս,- ասէ,- ամաչեացն յորդոյ աստի իմմէ»: Ո՛չ թէ երկբայութեամբ զ«թերեւս»ն դնէ, ա՛ւն անդր ի բաց տար. որ զիտէ զամենայն նախ քան զլինելն իւրեանց, զիտէ՛ր, թէ սպանանելոց են եւ զնա, այլ ցուցանէ, թէ կարի մեծ չարիք գործեն, եւ պատասխանի տալոյ չիք հայթհայթանս, զի զիտացին, թէ Որդի է, նախ ի մարգարէիցն եւ ի բերանոյ նորա լուան եւ ի գործոցն ճանաչեցին, զի ոչ հանգոյն ծառայիցն, այլ տիրաբար հրաման տայր տարերց, եւ հնազանդէին, եւ զմեղս թողոյր եւ ազատէր, յորոց ծանեան, թէ Տէր է եւ Որդի Աստուծոյ, բայց յանդգնեալ սպանին, որոց ակն ածելն

էր անկ եւ ամաչելն: Իսկ եթէ ոք ընդդէմ դնիցէ, թէ որովհետեւ զիտէր, թէ սպանանելոց են, ընդէ՞ր իսկ առաքեաց, եւ թէ առաքեաց, ասէ ոք, վասն բարութեանն, եւ նոքա սպանին եւ զգիտութիւնն Աստուծոյ կատարեցին, զի մի՛ անգէտ կարծիցի, է՞ր վասն մեղադրէ նոցա եւ տանջէ: Առ այս նախ զՊաւղոսին ասասցուք, թէ՛ «Դու ո՛վ ես, մարդ, որ պարասխանի քաս Աստուծոյ» (Տոմ. Թ. 20): Եւ երկրորդ՝ զի զիտէր Աստուած, թէ սպանանելոց են զՈրդին՝ յայտ է ահա, բայց նոքա, որ սպանին, ո՛չ յաղագս այնորիկ սպանին, զի զկամս Հաւրն արասցեն, եւ զգիտութիւն նորա լցցեն, այլ առ նախանձու մատնեցին եւ սպանին, որպէս վկայէ աւետարանիչն (տե՛ս Մատթ. ԻԷ. 18), վասն այնորիկ տանջեցին, զի զգիտութեամբն՝ յառաջագործութիւնն Աստուծոյ հաստատեցի եւ սպանումն տոյժք նոցին եղիցի, որպէս ինքն ասաց, թէ «Որդի մարդոյ ըստ սահմանելոյն ի կամս Հաւր երթայ, որպէս եւ գրեալ է, բայց վայ՛ յոր ձեռն մարմնեցի» (հմմտ. Դուկ. ԻԲ. 22):

Իսկ մշակքն իբրեւ փեսին զորդին, ասեն ընդ միփս. «Սա՛ է ժառանգն, եկայք սպանցուք զսա եւ կալցուք զժառանգութիւն սորա»: Եւ առեալ՝ հանին զնա արքայոյ քան զայգին եւ սպանին (ԻԱ. 38-39):

Յայտ առնէ այսու զնոցա լրբութիւնն, միանգամայն եւ զինքեան աստուածական զաւրութիւնն, որ ծանեաւ զխորհուրդ մտաց նոցա, քանզի իբրեւ տեսին, ասէ, այսինքն՝ զանմարմին Բանն Հաւր՝ զանտեսն աչաց, մարմնով երեւեալ յերկրի՝ ըստ մարգարէին (տե՛ս Բարութ Գ. 38), եւ ծնեալ Որդի ի կուսէն՝ ըստ Դաւթի, ասացին ի միտս. «Սա է ժառանգն», ապա ուրեմն ո՛չ յանգէտս սպանին: Տես եւ զմի՛ւս եւս չարութիւն, զոր պարտ էր ընդ առաջ երթալ եւ ներումն հայցել վասն առաջին յանդգնութեանն, նոքա գուն եղեալ եւ զայս յառաջին պղծութիւնն յաւելուին՝ «Սա է ժառանգն, եկայք սպանցուք»: Է՞ր աղագաւ եւ կամ վասն որո՞յ իրաց. թերեւս յանցա՞նք ինչ իցեն մեծ կամ փոքր, թերեւս պատուե՞աց զձեզ կամ վասն ձեր մա՞րդ եղեւ եւ բազում սքանչելի՞ս ի ձեզ ներգործեաց: Ո՛չ ասեն, այլ զի «կալցուք զժառանգութիւն սորա»: Այս կարի անմտութիւն է զկնի լրբութեանն եւ ամբարշտութեանն, որպէս նախ Հերովդէս խորհեցաւ կոտորել զմանկունսն՝ կամելով կորուսանել զնա (տե՛ս Մապթ. Բ. 16-18) եւ ոչ կարաց, նոյնպէս եւ նոքա խորհեցան՝ որում ոչ հանդիպեցան, զի որք ուտէին զԻսրայէլ, բերանալիր

բերանով մինչեւ ի սպանումն նորա, յետ սպանման նորա՝ բարձաւ ժառանգութիւնն նոցա եւ տուաւ Հեթանոսաց՝ ըստ Դաւթի. «Տագ զհեթանոսս ի ժառանգութիւն եւ զամենայն ծագս» (հմմտ. Սաղմ. Բ. 8): *Քանզի յիրաւի ասացեալ է, թէ՛ ոգիք ըմբռնեալ ի մեզս՝ ի մտաց եւս անկանին, զի ընդունայն եղեւ խորհուրդ նոցա եւ ըմբռնեցան ի գիտութեանն իւրեանց, որպէս ասացին մարգարէքն* (տե՛ս Սաղմ. Ե. 11, Ես. Ը. 10, ԽԴ. 25, Երեմ. ԽԹ. 7, Աբդիու 6): «**Եկայր սպանցուք զսա,- ասեն,- եւ կալցուք զժառանգութիւն սորա**»: *Որպէս ասացաք, յայտնի եղեւ այսու, թէ՛ վասն ազահութեան եւ նախանձու ի սպանումն եկին ժառանգին Հաւր եւ ո՛չ ի կամացն Աստուծոյ լրումն փութացան:*

«**Նանին գնա,- ասէ,- արքայոյ [թաղաքին] քան զայգին եւ սպանին**»: *Յառաջագոյն մարգարէանայ վասն մահուն, միանգամայն եւ զտեղին յայտնապէս ցուցանէ, զոր յետ բազում նշանացն հանեալ արտաքոյ քաղաքին, զոր առակաւ «այգի» ասէ, խաչեցին՝ ըստ առաքելոյ, թէ՛ «Արքայոյ դրանն չարչարեցաւ»* (Եբր. ԺԳ. 12): *Այլեւ արտաքոյ Աւրինացն սպանին, զի հրամայէր ոչ միւս զձեռն յարիւն անպարտ* (տե՛ս Բ. Ար. ԺԹ. 10, ԻԱ. 8), *եւ նոքա «որսացան զանձն արդարոյ»* (Սաղմ. ԴԳ. 21): *Նաեւ այսու զկամաւորն նշանակէ մահ*:

Արդ, յորժամ եկեսցէ փեր այգոյն, զի՞նչ արասցէ մշակացն այնոցիկ (ԻԱ. 40):

Որպէս երբեմն ասէր մարգարէիւն. «Զի՞նչ ինչ առնելոյ էր այգոյ իմում, եւ ես ոչ արարի» (Ես. Ե. 4). *նոյնպէս եւ աստ զգատաստանն առ նոսա ձգէ, թէ՛ ի՞մ իմիք արժանի են մշակքն: Բայց զի՞նչ է, թէ՛ «Յորժամ եկեսցէ փեր այգոյն»:* *Կամ յերկայնմտութենէն զարթչի եւ վրէժխնդիր լինի արեանն Որդւոյ, կամ յորժամ փառաւքն Հաւր յերկնից եկեսցէ հատուցումն առնել իւրաքանչիւր գործոց, զի՞նչ արասցէ նոցա, այսինքն՝ թէ՛ որք անձամբ սոսկ սխալեցան, ո՛չ կարիցեն ասրել ի բարկութենէն, իսկ որք յարիւն Որդւոյն Աստուծոյ ձեռնամուխ եղեն, զի՞նչ արասցեն*:

Ասեն ցնա. «Զչարսն չարաւ կորուցէ եւ զայգին փացէ այլոց մշակաց, որք փայցեն նմա զպարուս ի ժամու իւրեանց» (ԻԱ. 41):

Յակամայ կամս հատին ի վերայ անձանց զվճիռն, թէ՛ դատապարտելոց են, որ եղեւ իսկ ստուգութեամբ, զի թշնամեացն վկայութիւնն լի է ճշմարտութեամբ: «**Զչարսն,- ասեն,- չարաւ կորուցէ**»:

Երկնակի լսի այս: Կամ թէ՛ զոր ինչ արարին նոքա ընդ ծառայսն Աստուծոյ չարութիւնն, եկեսցէ հոռոմայեցին եւ արասցէ ընդ նոսա կորուստ եւ սպանութիւն, որ հանգոյն նոցա եւ չարք են նոքա: Եւ կամ թէ՛ զչարութեամբ զչարացեալսն կորստեան մատնէ, այլեւ զչարագործսն հանդերձ չարութեամբն իւրեանց կորուսանէ, որպէս զսողոմայեցիսն, զի ոչ զնոսա միայն տանջէ, այլեւ զտեղիս նոցա բնաջինջ աւերէ (տե՛ս Ծննդ. ԺԹ.):

«**Եւ զայգին փացէ այլոց մշակաց, որք փայցեն նմա զպարուս ի ժամու իւրեանց**»: *Այս զհեթանոսաց մուտն յայտնապէս նկարէ, զի «այլն» զի՞նչ յայտնէ, քան թէ՛ զազգս աւտարս հեթանոսաց, որոց տնկեցաւ փոխանակ հին այգոյն՝ նոր ժողովուրդ հաւատացելոց ի Քրիստոս եւ ցանկեցաւ առաքելովք եւ մարգարէիւք, այլեւ բարեպաշտ թագաւորաւք: Եւ փորեցաւ հնձան խաչին, յորմէ վտակք կրկնակի աղբեր կայլակնացեալ հրաշիւք բղխէ եւ յաներեւոյթս զբանաւոր անդաստանս ոռոգէ, կանգնելով աշտարակ զմարմինն տէրունական՝ շինեալ ի հողւոյ եւ ի մարմնոյ եւ ի մտաց, միացեալ լրմամբ աստուածութեանն եւ բարձրացեալ ի խաչին, որոյ մշակ՝ Հայրն է երկնաւոր եւ կամաց նորին հետեւաւղք՝ աստուածային որեարք, որք տան զպտուղն կենաց ծառոյն, «որ փնկեալ է ի գնացս ջուրց»* (Սաղմ. Ա. 3), *ի ժամու մաքրութեան սրբազան ժողովրդոց զմարմին եւ զարիւն Որդւոյն Աստուծոյ, այլեւ զաւանութիւնս ուղիղս ի Հայր եւ յՈրդի եւ ի Հոգին Սուրբ, նաեւ ի տնաւրէնութիւն Բանին, եւ գործս մտաւորս եւ կատարեալ բանական պաշտաւնս ի ժամու կենցաղոյս, որ ժամանակ է ընդունելի եւ աւր փրկութեան՝ ըստ Պաւղոսի* (տե՛ս Բ. Կոր. Զ. 2), *նաեւ խոստովանութիւն յետ յանցանացն եւ «պարուս արժանի ապաշխարութեան»* (Մարթ. Գ. 8) *ծաղկեաց բարեաց գործովք ի ժամու զղջմանն եւ ըստգտանաց սրտին՝ ի փառս Աստուծոյ Հաւր եւ Որդւոյ նորա եւ Հոգւոյ Սրբոյ այժմ եւ յաւիտենից յաւիտեանս. ամէն*:

Ասէ ցնոսա Յիսուս. «Չիցէ՞ երբէք ընթերցեալ ձեր ի Գիրս. «Զվճն, զոր անարգեցին շինաւորն, նա եղեւ գլուխ անկեան: Ի Տեառնէ եղեւ այս, եւ է սքանչելի յասս մեր» (ԻԱ. 42):

Զի՞նչ զայս ասէ առ կարգ բանին՝ տգէտս լինել առ մարգալտութիւնն Դաւթի (տե՛ս Սաղմ. ԾԺԷ. 22-23): *Թուի ինձ յայսմ տեղւոջ համառաւտ անցանել աւետարանչիս, քանզի ասէ Ղուկաս, թէ՛ յորժամ*

վճիռ եհատ վասն չար մշակացն, թէ զնոսա կորուսցէ եւ զայգին այլոց տացէ (տն՛ս Ղուկ. Ի. 16), որպէս եւ ինքեանք իրաւ համարեցան՝ ըստ Մատթէոսի, ապա իմացեալ, թէ վասն անձանց է այն, ասացին՝ քա՛ւ լիցի զայդ առնել, եւ նա, հայեցեալ ի նոսա՝ ասաց, այսինքն՝ ակնարկեաց, թէ՛ լինելո՛ց է, ապա թէ՛ ոչ՝ զիա՞րզ արդարանայ գրեալն, թէ՛ «Ձվէմն, զոր անարգեցին շինաղբ, նա եղև զլուխ անկեան»։ «Վէմ՝ զինքն ասէ՛ ըստ Եսայեայ, թէ՛ «Դնեմ ի հիմուն Սիոնի վեմ ընտրի» (Ես. ԻԸ. 16), զլուխ անկեան ազամանդեայ, որպէս ասաց Ամովս (տն՛ս Ամովս Է. 7-8)։ Նախ՝ վասն անմալելի եւ անխորտակելի գոլոյ։ Եւ երկրորդ՝ վասն կուսածնութեանն, որպէս եւ ետես Դանիէլ՝ «վեմ հապեալ առանց ձեռին» (Դան. Բ. 34)։ Եւ երրորդ՝ վասն անշարժութեանն։ Եւ չորրորդ՝ վասն մշտնջենաւորութեանն, զի յաւիտեանական ունի գէտութիւնն։ Եւ հինգերորդ՝ վասն բղխելոյ զաստուածահրաշ վարդապետութիւնն համաքատակ վիմին, որ յանապատին (տն՛ս Ելք ԺԷ. 6), որպէս գրեաց եւ Պաւղոս, թէ՛ «Վեմ էր ինքն Քրիստոս» (Ա. Կոր. Ժ. 4), որ արբուցանէր կանխաւ զՋուրն՝ աւրինակ տալով ժողովրդեանն։ Եւ վեցերորդ՝ վասն միացուցանելոյ զհին եւ զնոր Աւրէնս, որոց եղև զլուխ անկեան՝ ըստ վիմի Աւրինի, որպէս ասէ ինքն Տէրն, զոր անարգեցին ի ժամանակի հաւատոցն, թէ՛ չէ՛ դա յԱստուծոյ, այլ մոլորեցուցանէ զժողովուրդն (տն՛ս Յովհ. Է. 12, Ժ. 16)։ «Շինաղ»՝ վարդապետքն եւ քահանայքն հրէից՝ ըստ եզեկիէլի, թէ՛ «Շինէին որս եւ ձեփէին առանց խճելոյ» (հմմտ. Եզեկ. ԺԳ. 10-11), զի որք կարգեցան զժողովուրդս առ Աստուած ածել, նոքա պատրաստեցան ի բաց կացուցանել։

«Նա եղև զլուխ անկեան»։ Աւրինակաւ ասէ, թէ՛ որպէս վէմ, յանհմտութենէ շինողաց յետս ձգեալ, յետոյ անկիւնաքար լինի եւ զերկոսին որմունս ի միասին կցեսցէ, այսպէս եւ նա զերկոսին ազգս՝ զհրէայս եւ զհեթանոսս, զմարդիկ եւ զհրեշտակս, զհոգի եւ զմարմին, ի միասին պատկանեաց, որք յոյժ հեռագոյնք եւ հակառակք էին միմեանց՝ հաւատովք եւ գործովք եւ ցանկութեամբ։ «Ի Տեառնէ եղև այս, եւ է սքանչելի յաջս մեր»։ ցուցանէ, թէ՛ նոքա վասն թերահաւատութեան ելանելոց են, եւ հեթանոսք հաւատով մտանելոց, որպէս քանանացւովն եւ իշովն եւ հարիւրապետիւն յայտ արար (տն՛ս Մարթ. ԺԵ. 22-28, ԻԱ. 1-7, Ը. 5-13), եւ զի յԱստուծոյ է այս՝ ելն հրէից եւ մուտն հեթանոսաց, սքանչացաւ Դաւիթ ի տեսու-

թիւնս իւր (տն՛ս Սաղմ. ՆԹ. 9), ոչ ընդ փոխումն այգւոյն, զի ըստ արժանեացն էր այն, այլ ընդ կանխատեսութիւնն Աստուծոյ։

Վասն այսորիկ ասեմ ձեզ, զի բարձցի ի ձէնջ արքայութիւն Աստուծոյ եւ փացի ազգի, որ առնիցէ զպտուղս նորա (ԻԱ. 43)։

«Վասն այսորիկ»՝ վասն մարգարէական կանխութեանն եւ ի վերուստ վճռին։ Բայց զի՞նչ է այն, զի նախ «այգի» ասաց եւ այժմ «արքայութիւն» անուանէ։ Կամ թէ՛ դուռն արքայութեանն Աւրէնքն է, զոր «այգի» ասաց, իսկ յորժամ ոք զԱւրէնսն ոչ գործիցէ, եւ ոչ յարքայութիւնն մտանել կարէ, կամ թէ՛ ա՛յլ ազգ. զի որչափ ոք զաւրէնս թագաւորի արասցէ, հնազանդ է թագաւորին այնմիկ եւ ասի, իսկ յորժամ աւրինացն ապստամբէ, եւ ի թագաւորութենէ նորա արտաքս ելանէ, զի ոչ ասի նա նոցա թագաւոր, վասն զի ոչ առնեն զհրամանս նորա։ Զա՛յս նշանակէ ասելն, թէ՛ «Բարձցի ի ձէնջ արքայութիւն Աստուծոյ եւ փացի ազգի», այսինքն՝ հեթանոսաց, որք գործեն զգործս նորա։

Եւ որ անկցի ի վերայ վիմիս այսորիկ, փշրեսցի, եւ յոյր վերայ անկցի, հոսեսցէ գնա (ԻԱ. 44)։

Եւ զի «վեմ» ասաց զինքն, այժմ զկարծիս նոցա լուծանէ, որ խորհեցան սպանանել զնա, զի թէպէտ մարտեան ընդ նմա իշխանք ժողովրդեանն, այս է անկանելն ընդ վիմին, եւ կամեցան շիջուցանել զնա ի ձեռն խաչին, ինքեանք իսկ խորտակեցան յահաւոր զաւրութենէն եւ ի նշանացն եղելոց, եւ բարձաւ թագաւորութիւն նոցա, եւ եղծաւ կարգ պատարագացն, եւ ցրուեցան ընդ ոլորտս երկրի, զոր աւրինակ աման խեցի, յորժամ հարկանիցի ի վիմի, քանզի դժուարին ասացաւ ընդդէմ խթանի աքացել (տն՛ս Գործք ԻԶ. 14) եւ կամ ընդ վիմի նետաձիգ լինել, զի զանձի՛նս հարկանիցեն այնպիսիքն։ «Եւ յոյր վերայ անկցի, հոսեսցէ զնա»։ այս զինքեան վրէժխնդրութիւնն ասէ, զոր էառ ի նոցանէ պաշարմամբ քաղաքին՝ բնաջինջ առնելով զնոսա, ըստ Դաւթի, թէ՛ «Փշրեսցէ գնոսա գաւազանս երկաթեալ» (հմմտ. Սաղմ. Բ. 9), եւ՝ «Իբր գլիոշի, զի հողմ հոսէ ի վերայ երեսաց երկրի» (Սաղմ. Ա. 4)։ Եւ դարձեալ՝ փշրեաց վէմն այն զգեւս եւ հոսեաց զկռապաշտութիւնն ի մտաց մարդկան։ Եւ դարձեալ՝ զՅովհաննէս հաստատէ (տն՛ս Մարթ. Գ. 12), զոր ի յերկրորդն գալուստ սրբէ զկալ աշխարհիս եւ հոսէ ընտրութեամբ դատաստանին զթեթեւամիտ

յարգան՝ զհրէայս անհաւատս եւ զհերձուածաւդս, որք են ճախակողմեանքն, ի հուրն անշէջ, որ պատրաստեալ է սատանայի եւ հրեշտակաց նորա:

Իբրեւ լուան քահանայապետքն եւ դպիրք եւ փարիսեցիք զառակս նորա, գիտացին, թէ վասն նոցա ասաց: Եւ խնդրէին զնա ունել, բայց երկեան ի ժողովրդոցն, զի իբրեւ զմարգարէ ունէին զնա (ԻԱ. 45-46):

Իբրեւ լուան զայս ամենայն, պարտ էր երկիրպագանել եւ յերկիւղէ պատժոցն, զոր լուան, ակն ածել եւ ցածնուլ: Նոքա զընդդէմն արարին, զի յորժամ գիտացին, թէ վասն նոցա ասաց, կամեցան ըմբռնել եւ սպանանել, բայց երկեան՝ ո՛չ յԱստուծոյ կամ ի բանիցն ասացելոց, կամ ի մարգարէիցն վկայութենէն, այլ ի բազմամբոխ խուժանէն, զի մարդահաճոյք էին, վասն այնորիկ «ցրուեցան ոսկերք նոցա մերձ ի դժոխս» (հմմտ. Սաղմ. ԸՆ. 7): Դարձեալ՝ տես եւ զա՛յն, զի ժողովուրդքն թէպէտ ոչ կատարելապէս զնա ծանեան, բայց ի բանիցն եւ ի գործոցն հրաշից գէթ իբր զմարգարէ ունէին, իսկ նոքա, որ զԱւրէնսն ընթեռնուին, իբր զմահապարտ դատապարտէին: Է՞ր վասն. զի զմատաւորս եւեթ խնդրէին, զի չիք այլ ինչ, որ զահապէժ առնէ եւ դարահոս գործիցէ, որպէս ընդ ժամանակեայս բեւեռելն, եւ չիք ինչ, որ յայսմ ամենայնէ զերձուցանէ եւ զմերձակայս եւս վայելել տացէ, որպէս այն, զի զանտիտն նախամեծար առնիցէ՝ ըստ այնմ՝ «Խնդրեցէք զարքայութիւն նորա, եւ այդ ամենայն յարեցի ձեզ» (հմմտ. Մատթ. Զ. 33), զորս նոքա ոչ ունէին, եւ ոչ աշակերտել կամէին, որոց յաւելու միւս եւս առակ:

ԳՐԻԳՈՐ ՏԱԹԵԻԱՅԻ

Այս երկոտասան առակ արքայութեան: Այսմ առակաւս Ը. (8) իրս ուսուցանէ.

Ա. Նախ՝ զի այգի է ժողովուրդն, ըստ Եսայայ. «Այգի եղև սիրեցեալ յանկեան Իսրայէլ» (Ես. Ե 1):

Բ. Երկրորդ՝ տնկողն եւ խնամողն Աստուած է:

Գ. Երրորդ՝ մշակ զառաջնորդն ասէ:

Դ. Չորրորդ՝ վասն պտուղ խնդրելոյ:

Ե. Հինգերորդ՝ զծառայան անարգելոյ:

Զ. Վեցերորդ՝ զորդիսն սպանանելոյ:

Է. Եւթներորդ՝ ի դատաստան ինքեան ետուն զվճիռն:

Ը. Ութերորդ՝ բարձաւ ի նոցանէ արքայութիւնն եւ տուաւ հեթանոսաց:

Հարց. Վասն է՞ր այգի կոչէ զժողովուրդն:

Պատասխանի. Վասն Ի. (20) պատճառի.

Ա. Նախ՝ զի տեղեաւ փոփոխեալ տնկի. «Այգի յեգիպոստ փոխեցի» (Սաղմ. ՆԹ. 9), ասէ:

Բ. Երկրորդ՝ փուշքն խլի. «Նանէր գեթանոսս եւ գնոսս փնկեցեր» (Սաղմ. ՆԹ. 9):

Գ. Երրորդ՝ տեղիք պարարտ խնդրէ, յանկեան ի տեղոջ պարարտութեան:

Դ. Չորրորդ՝ նախ՝ հաստատի արմատն. «Նապապրեցեր զարմարս նորա ի հաւարն» (հմմտ. Սաղմ. ՆԹ. 10), ասէ:

Ե. Հինգերորդ՝ տարածէ շառաւիղս. «Եւ բազմացաւ ժողովուրդն մինչև ի ծովս» (հմմտ. Սաղմ. ՆԹ. 12), ասէ:

Զ. Վեցերորդ՝ կանաչ է սաղարթն՝ զուարճացեալ ի միտս:

Է. Եւթներորդ՝ անուշահոտ ծաղիկ՝ յոյսն անմահութեան:

Ը. Ութերորդ՝ գնդակն՝ կապեալ սիրով:

Թ. Իններորդ՝ ողկոյց քաղցր, գործք բարեաց:

Ժ. Տասներորդ՝ գինին իմաստութիւն եւ ուրախութիւն հրեշտակաց եւ մարդկան:

ԺԱ. Մետասաներորդ՝ ի բազմացն մի այգի եւ մի եկեղեցի կոչի:

ԺԲ. Երկոտասաներորդ՝ ումեմն է այգին եւ ժողովուրդն Աստուծոյ:

ԺԳ. Երեքտասաներորդ՝ յերեք ամն տայ պտուղ, որ է Գ. (3) հասակն:

ԺԴ. Չորեքտասաներորդ՝ յօտելն խոստովանութեամբ:

ԺԵ. Հնգետասաներորդ՝ գողձն (°), կուռքն կամ հերձուած:

ԺԶ. Վեշտասաներորդ՝ «ցանգն» (ԻԱ. 33), աւրէնքն, որ յօտաբաց պարսպէ եւ որոչէ:

ԺԷ. Եւթն եւ տանսներորդ՝ զուփ «հնձան» (ԻԱ. 33)՝ տաճարն, յորում ամենայն բարութիւնք մեր հաւաքին, եւ որ ի նմանէ շնորհք բաշխին:

ԺԸ. Ութ եւ տասներորդ՝ «աշտարակ» (ԻԱ. 33)՝ սեղանն քաւութեան:

ԺԹ. Ինն եւ տասներորդ՝ «ձողին»՝ իշխանքն ըստ մարմնոյ:
Ի. Քսաներորդ՝ «մշակք»՝ առաջնորդքն ըստ հոգոյ, սոքա հարկաւորք են այգոյ:

Հարց. Զի՞նչ է «Գնաց ի փար աշխարհ» (ԻԱ. 33), այսինքն՝ զի երկայնամիտ լինէր եւ ոչ ի նոյն ժամն պատժէր:

Հարց. Զի՞նչ գործ է մշակին:

Պատասխանի. Չորս.

Ա. Նախ՝ բրելն խրատով:

Բ. Երկրորդ՝ աղբ՝ ապաշխարութեանն:

Գ. Երրորդ՝ ջուր գիտութեան:

Դ. Չորրորդ՝ պահեալն աղաւթիւք:

Վասն պրդոյ այգւոյն

Հարց. Զի՞նչ է «պրուղն խնդրել» (ԻԱ. 34):

Պատասխանի. Վեց ինչ.

Ա. Նախ՝ ըստ պատուիրանին՝ գհնազանդութիւնն:

Բ. Երկրորդ՝ ըստ զանազան խնամոցն:

Գ. Երրորդ՝ ըստ ժամանակին՝ յերկար եւ նուազ:

Դ. Չորրորդ՝ ըստ իւրաքանչիւր դիմաց՝ ծեր եւ տղայ:

Ե. Հինգերորդ՝ ըստ աստիճանաց՝ մեծ եւ փոքր:

Զ. Վեցերորդ՝ ըստ զանազան մասանց՝ հոգոյ եւ մարմնոյ զգայութեանց խնդրէ զանազան պտուղ: Նոցա խնդրողքն մարգարէքն էին եւ ի մէնջ հրեշտակք Աստուծոյ, որ զաղաւթս եւ զամենայն գործս բարիս մատուցանեն Աստուծոյ:

Եւ Դ. (4) է յանցումն նոցա.

Ա. Նախ՝ զի պտուղ ոչ ետուն:

Բ. Երկրորդ՝ զծառայսն անարգեցին եւ սպանին:

Գ. Երրորդ՝ ինքեանք էին վրիժապարտք եւ զայլս պարտաւորէին:

Դ. Չորրորդ՝ հանապազ եւ անզեղջ կամաւք:

Վասն որդւոյ

Հարց. Վասն է՞ր «Յեղոյ առաքեաց զորդին» (ԻԱ. 37):

Պատասխան. Վասն չորից.

Ա. Նախ՝ զի յառաջին գործոցն, որ ծառայիցն արարին, զղջացին:

Բ. Երկրորդ՝ զի երկիցեն ի բարկութենէ նորա:

Գ. Երրորդ՝ զի ամաչեացեն ի բարութենէ հաւրն:

Դ. Չորրորդ՝ զի յառաջին յանցանացն թողութիւն խնդրեացեն:

Հարց. Վասն է՞ր ասէ. «Թերևս ամաչեացն» (ԻԱ. 37), միթէ՞ անգէտ էր նոցա:

Պատասխանի. Ոչ էր անգէտ, զի գիտէր որ սպանանէին, եւ նայ առաքեաց ի սպանումն: Այլ զայն պատմէ, զոր պարտն էր առնել եւ ոչ ամաչել, եւ նոքա ոչ արարին, այլ առաւել չարացան:

Հարց. Զի՞նչ է առաւելութիւնն:

Պատասխանի. Չորս ինչ.

Ա. Նախ՝ անդ զծառայսն սպանին եւ աստ՝ զտէրն եւ զսիրելի որդին:

Բ. Երկրորդ՝ անդ վասն պտղոյ, եւ աստ՝ վասն այգոյն:

Գ. Երրորդ՝ զնոսա ի ներս, եւ զսայ արտաքոյ այգոյն:

Դ. Չորրորդ՝ զնոսա սպանին, եւ զսայ խաչեցին:

«Սա է ժառանգն» (ԻԱ. 38):

Կրկին ասեն զպատճառն.

Ա. Նախ՝ զի սա ժառանգ է, սպանցուք:

Բ. Երկրորդ՝ վասն ժառանգութեանն, զի մեր լիցի (հմմտ. ԻԱ. 38):

Վասն առաջնոյն չուսին ինչ մեղադիրք.

Ա. Նախ՝ զի պատուեաց զնոսա եւ ետ զայգին:

Բ. Երկրորդ՝ զի Աստուածն մարդ եղեւ եւ վասն փրկութեան նոցա:

Գ. Երրորդ՝ զի բազում բժշկութիւնս արար:

Դ. Չորրորդ՝ զաստուածգիտութիւն քարոզեաց:

Վասն երկրորդին՝ ժառանգութիւնն բարձաւ ի նոցանէ եւ տուաւ հեթանոսաց վասն չորից.

Ա. Նախ՝ զի թշնամիք եղեն սպանութեամբն, զայս ի նետ թշնամեաց նոցա:

Բ. Երկրորդ՝ զի նոքա ոչ սպանին զոր:

Գ. Երրորդ՝ զի ետուն զպտուղն:

Դ. Չորրորդ՝ զի անփոփոխ կացին, զանփոփոխ ժառանգութիւնն նոցա ետ:

Նանին արտաքոյ եւ սպանին (ԻԱ. 39):

Չորս ինչ մարգարէանայ.

Ա. Նախ՝ զսպանումն:

Բ. Երկրորդ՝ զտեղին:

Գ. Երրորդ՝ զպատճառն:

Դ. Չորրորդ՝ զկերպն:

Հարց. Վասն է՞ր արտաքոյ քաղաքին:

Պատասպանի. Վասն չորից.

Ա. Նախ՝ զի արտաքսեցին յայգոյն:

Բ. Երկրորդ՝ զի ընդ չարագործս համարեցան:

Գ. Երրորդ՝ զի զողջակէզն արտաքոյ սպանէին:

Դ. Չորրորդ՝ զի արտաքոյ է աշխարհ վերնոյն Երուսաղէմի. աստ մեռաւ եւ անդ սրբեաց եւ եհան զմեզ:

Վասն չարաց

Հարց. Զի՞նչ է «չարն չարաւ կորուսցէ» (ԻԱ. 41):

Պատասխանի. Այսինքն՝ զչար գործողքն չար մահուամբ, որպէս այն, որ «Սուր ւածցէ, սրով անկցի» (Մապթ. ԻԶ. 52): Կամ ի ձեռն չարաց կամ զչար տանջանացն ասէ:

Եւ գիտեալ է, զի զչարն չարաւ եւ զբարին բարեաւ՝ արդարութեանն է, զչարն բարեաւ՝ ողորմութեանն է, զբարին չարեաւ՝ ներողամտութեանն է Աստուծոյ:

Վասն վիմի

ՎԷՄՆ, զոր անարգեցին (ԻԱ. 42):

Հարց. Վասն է՞ր «վէմ» կոչի Քրիստոս:

Պատասխանի. Բազում են պատճառք, եւ ասեմք Ի. (20) գլխովք. Ա. Նախ՝ «վէմ» կոչի, զի կուսածին է, որպէս «Ի լեռնէ վէմն առանց ձեռին հարեալ» (Դանիէլ Բ. 45), ասէ:

Բ. Երկրորդ՝ Ադամ «հող» կոչեցաւ (Ծննդ. Բ. 6), եւ Քրիստոս՝ «վէմ» (Ա. Կոր. Ժ. 4) վասն անապական մարմնոյն:

Գ. Երրորդ՝ վէմ աղամանդեայ, զի անգծելի է չարին:

Դ. Չորրորդ՝ զի առ ինքն քարչէ զսեւացեալս եւ զծանրացեալս մեղաւք:

Ե. Հինգերորդ՝ նշան բարձրութեան եւ խստութեան, որպէս վէմն յուսանոց քահանային:

Զ. Վեցերորդ՝ զի կարծրացեալ է հրով աստուածութեանն:

է. Եւթներորդ՝ զի ծանր է խոնարհութեամբ:

Ը. Ութերորդ՝ ցամաք է յաշխարհական ցանկութեանց:

Թ. Իններորդ՝ ի հովիտս դաղարի, այսինքն՝ ի խոնարհս հանգչի:

Ժ. Տասներորդ՝ հաստատ է. որ յենուն ի նա, հաստատին:

ԺԱ. Մետասաներորդ՝ անշարժ է. ի գետոց եւ ի հողմոց ոչ շարժի:

*ԺԲ. Երկուտասաներորդ՝ ուժով է. որ կրէ զամենայն զաւրու-
թեամբ իւր:*

*ԺԳ. Երեքտասաներորդ՝ սեղմ է մասնկունքն, այսինքն՝ անբա-
ժանելի է միաւորութիւնն:*

*ԺԴ. Չորեքտասաներորդ՝ անփոփոխելի է, այսինքն՝ աստուա-
ծութեամբն եւ մարմնովն նոյն:*

ԺԵ. Հնգետասաներորդ՝ զի հիմն է եկեղեցոյ:

*ԺԶ. Վեցտասաներորդ՝ եւ անկիւնաքար, որ զերկու որմունս ի
մի կապեաց:*

ԺԷ. Եւթն եւ տասներորդ՝ եւ գլուխ, որ կատարումն է ամենայնի:

ԺԸ. Ութն եւ տասներորդ՝ զի գլորէ եւ կործանէ զանհաւատս:

ԺԹ. Ինն եւ տասներորդ՝ խորտակէ զդիմահարս եւ զահաւիթէ:

*Ի. Քսաներորդ՝ յորոյ վերայ անկցի, հոսէ եւ ցրուէ զզաւրու-
թիւնս թշնամոյն, որպէս՝ «Վէմն, որ եհար զպարկերն եւ փշրեաց, եւ ինքն
ելից զպիեզերս» (հմմտ. Դանիէլ Բ. 34):*

Եւ զլուխ անգեան (ԻԱ. 42):

Ա. Նախ՝ հրէից եւ հեթանոսաց:

Բ. Երկրորդ՝ երկուց կտակարանաց:

Գ. Երրորդ՝ հոգւոյ եւ մարմնոյ:

Դ. Չորրորդ՝ երկնի եւ երկրի:

Ե. Հինգերորդ՝ հրեշտակաց եւ մարդկան:

*Եւ «շինալ» (ԻԱ. 42) կոչէ զվարդապետս, որ զուսմունս Հին աւրի-
նաց եւ գծողվուրդն շինէին եւ փորիւ ձեփէին, այսինքն՝ ի ցոյցս
մարդիկ եւ դատարկ ի հաւատոց, կամ սէրն է ամբուլթիւն եւ կապ ի
մէջ որմոյն, զոր ոչ ունէին:*

Դարձեալ՝ «վէմ անարգեալ» (ԻԱ. 42) զհեթանոսս նշանակ է, որ անարգէր համարել նոցա եւ յետոյ կատարեալք եղեն հաւատով եւ գլուխ անգեան:

Եւ գիտելի է, զի պարտ էր երկրպագել Քրիստոսի եւ հնազանդել վասն չորից:

Ա. Նախ՝ երկնչել ի բազում ժողովրդոցն:

Բ. Երկրորդ՝ ի սպառնալեացն Քրիստոսի:

Գ. Երրորդ՝ ի բանից մարգարէիցն:

Դ. Չորրորդ՝ ի վճռէն իւրեանց չարացն կուրուստ:

Հարց. Վասն է՞ր, որ զաշխարհս ըմբռնէ, յերկուցն գրկի: Եւ որ զհանդերձեալն խնդրէ, զերկուքն վայելէ:

Պատասխանի. Չորս պատճառս ասեն.

Ա. Նախ՝ զի աշխարհս այս ստուեր է, եւ այն՝ որպէս մարմին, որ գմարմին ըմբռնէ, նայ ունի եւ զստուերն, այլ որ զստուերն, զոչ ոքն ունի:

Բ. Երկրորդ՝ այս աւրինակն է, եւ այն՝ ճշմարտութիւնն:

Գ. Երրորդ՝ այս անցաւորն է, եւ այն՝ անանցն:

Դ. Չորրորդ՝ այս փոքր է, եւ այն՝ մեծ, որ զմեծն ունի եւ զփոքրն, վասն այն խրատէ. «Խնդրեցէք նախ զարքայութիւնն, եւ այդ ամենայն յաւելի» (Մարթ. 9. 33):

Այսքան առ այս:

Մարկ. ԺԲ. 1-11

ԲԱՐՍԵՂ ՄԱՇԿԵԻՌՅԻ

Եւ սկսաւ խաւսել ընդ նոսա առակաւք եւ ասել: Այր մի փնկեաց այգի եւ ւծ շուրջ զնովա ցանգ եւ գուր հնձան փորեաց եւ շինեաց աշտարակ եւ ետ զնա ցմշակս եւ գնաց ի փար աշխարհի (Մարկ. ԺԲ. 1):

ՄԵԿՆՈՒԹԻՒՆ

Կարի իմն հպարտ եւ փառասէր է ազգ մարդկան, վասն որոյ զժուարի եւ տաղտապի ընդ լուր նախատանաց անձին, թէ եւ արժանի եւս իցէ պատժոց եւ տանջանաց, այլ ոչ այնպէս ի զաւտա-

րացն՝ լսել զանարգանս, զի առ ինքն մոռանայ զիրաւն, իսկ վասն այլոց զարգարութեան տայ վճիռ:

Յաղագս այսորիկ առակաւք խաւսին Գիրք, որպէս զի այնու մեղուցեալքն յանգէտս եւ յակամայ կամս պարտաւորեացն զինքեանս եւ հեռացին ի չարեացն, ըստ որում տեսանեմք զսոյն կատարեալ առ Դաւիթ ի ձեռն առակին Նաթանայ (տես Բ. Թագ. ԺԲ. 1-14):

Եւ յաղագս այսորիկ Քրիստոս այժմ առակաւք սկսանի խաւսել ընդ նոսա, զի թէ զղջացին իբրեւ զԴաւիթ եւ ապաշաւեացն, թողութիւն գտցեն, որպէս եւ նա, ապա թէ ոչ՝ անձամբ զանձինս դատապարտեցեն:

Այր մի,- ասէ,- փնկեաց այգի (ԺԲ. 1):

Բազումք ի մարգարէիցն յայգի աւրինակեն զժողովուրդն, ըստ այնմ. «Այգի յեզրպտոսէ փոխեցեր, սատակեցեր զհեթանոսս եւ զնոսա տնկեցեր» (Սաղմ. ԿԹ. 9), եւ Ովսէէ ասէ. «Այգի տաշտաւոր պողալից Իսրայէլ» (Ովսէ Ժ. 1), եւ Երեմիա՝ «Ես տնկեցի զքեզ այգի ճշմարիտ, ամենեւին պողաբեր» (հմմտ. Եր. Բ. 21), եւ Եսայի՝ «Այգի Տեառն զաւրութեանց տունն Իսրայէլի է, եւ մարդն Յուդա նորատունկ սիրելի» (Ես. Ե. 7):

Եւ ընդէ՞ր առակեն «այգի». վասն բազում պատճառաց: Նախ՝ վասն գեղեցկութեանն, զի գեղեցիկ եւ վայելուչ է այգին, որպէս ասէ Եսայի. «Այգի վայելուչ եւ ցանկալի» (Ես. ԻԷ. 2), եւ Դաւիթ՝ «Կին քո որպէս [գ]այգի վայելուչ» (Սաղմ. ԾԻԷ. 3):

Այսպէս եւ մարդն վայելուչ եւ գեղեցիկ ստեղծաւ յԱստուծոյ, զի խառնուած է եւ ոչ պարզ եւ միատեսակ, որպէս հրեշտակքն, եւ վայելուչ են ի խառնուածոց եւ յազգի ազգի գունոց շէնքն, քան զպարզ եւ զմիատեսակ կերպն, ըստ որում ոսկին եւ ակունքն ըստ ինքեանց գեղեցիկք են, այլ եւս գեղեցիկք երեւին, յորժամ ի միմեանս ընդելուզին:

Այսպէս եւ մարդն գեղեցիկ գտաւ, քան զայլս ի ստեղծուածոց, զի զամենայն արարածական բնութիւնս յինքն ժողովեաց՝ զիմանալիս եւ զզգալիս, զշնչաւորս եւ զանշունչս, եւ ոչ ինչ եթող արտաքոյ ինքեան, ուստի այսու աւրինակաւ առաւել ասի մարդն պատկեր Աստուծոյ, քան թէ վասն մտացն:

Ձի եթէ վասն մտացն, եւս առաւել զհրեշտակսն պարտ էր պատկեր Աստուծոյ կոչել, բայց զի չգտանի ի գիրս ուրեք ասացեալ, թէ հրեշտակքն ըստ պատկերի Աստուծոյ եղեն: Յայտ է, թէ վասն այնորիկ ասէ զմարդն պատկեր Աստուծոյ (տն՝ Ծննդ. Ա. 27), զի զամենայն արարածս յինքն բերէ զգալապէս, որպէս Աստուած իմանալաբար:

Եւ զի զայս՝ զպատկեր լինելն Աստուծոյ, աւելի ունէր, քան զհրեշտակսն, յաղագս այսորիկ անհնարինքն հրեշտակաց հնարաւորք եղեն սմա: Ձի նոքա յետ յանցանացն ոչ կարացին արդարանալ, իսկ սոքա արդարացան, զորոց եւ Քրիստոս վկայեաց՝ ասելով, թէ՛ «Իմաստնագոյնք են որդիք աշխարհիս այսորիկ, քան զորդիս լուսոյ յազգս իւրեանց» (Ղուկ. ԺԶ. 8). այսինքն՝ մարդիկ քան զհրեշտակս:

Եւ ո՞վ ոք արդեալք ասել կարիցէ զայսր կենդանւոյ զառաւելութիւն, ընդ լայնութիւն ծովու անցանէ, ընդ երկինս գնայ տեսութեամբ, զաստեղացն շարժմունս եւ զչափս նկատէ, զպտուղս երկրի եւ ծովու վայելէ, ի հեռաստանէ ի ձեռն գրոյ յաշխարհէ յաշխարհ ընդ որս կամի, իսաւսի, ամենայնի իշխէ, ընդ հրեշտակաց եւ ընդ Աստուծոյ եւս իսաւսակցի, դիւաց սաստէ, զսատանայ նուաճէ, տուն եւ տաճար Աստուծոյ լինի, յանմահական կեանս ժառանգէ զարքայութիւն:

Երկրորդ՝ զի որպէս այգին յուր ունի պէտս դարմանի եւ խնամոց, քան զայլս ի պտղաբերացն, զի այլքն ոչ ունին պէտս յամենայն ամի յատանելոյ եւ այնքան կակղելոյ զարմատն, նաեւ ոչ այլոցն պտղոց այնքան երկիրդ է ի վնասակար թռչնոց եւ ի զազանաց, որպէս պտղոյ այգւոյն: Այսպէս եւ մարդն յուր ունի պէտս խնամոց եւ պահպանութեան, որքան բազում ունի եւ թշնամիս ներքոյ եւ արտաքոյ ի սիրելեաց եւ յընտանեաց, զի «թշնամիք, ասէ,- առն ընտանիք իւր» (Մատթ. Ժ. 36): Ձի որքան պատուական է, այնքան եւ բազումս ունի թշնամիս եւ զվնասիչս իւր, զի անարգ եւ արհամարհ իրացն ոչ ոք դնէ ակն, իսկ գեղեցկին եւ պատուականին՝ ամենեքեան են ցանկացող տեսութեան:

Երրորդ՝ զի որպէս այլքն ի պտղաբերաց յորժամ անպտուղք լինին, գան ի պէտս ինչ շինութեան, իսկ այգին ոչ այնպէս, զի ոչ գայ ի պէտս յաղագս շինութեան, որպէս ասէ Եգեկիէլ. «Մի թէ առնուցո՞ւն յայգւոյ փայտ մի, առնել զործի ինչ կամ ցից մի կա-

խել գնմանէ անաւթ ինչ» (Եզկ. ԺԵ. 3), թէ եւ ողջոյն հատանիցի, չէ ինչ պիտոյ ի գործ, բայց թէ հրոյ ճարակ լինիցի ի սպառ:

Այսպէս եւ մարդն յորժամ անպտուղ գտանի ի գործոց բարեաց եւ յառաքինութեանց, յետ այնքան գեղեցիկ շինուածոցն եւ ազգի ազգի խնամոցն Աստուծոյ եւ պահպանութեան, յայնժամ չգայ, այլ ինչ իրաց ի պէտս, բայց միայն զի ճարակ եւ այրելիք լինիցի հրոյ գեհնին:

Այր մի,- ասէ,- տնկեաց այգի (ԺԲ. 1):

«Այր մի». այսինքն՝ Հայր Աստուած, որ կոչի մարդ վասն զթութեան իւրոյ եւ մարդասիրութեան, զի որպէս զթայ Հայր յորդիս եւ կին ի ծնունդս որովայնի իւրոյ, այսպէս եւ զթայ Աստուած յազգս մարդկան, ասեն մարգարէքն Դաւիթ եւ Եսայի (տն՝ Սաղմ. ԸԲ. 13, Ես. ԽԹ. 15):

«Տնկեաց այգի». այսինքն՝ զժողովուրդն իսրայէլացւոց, զոր եհան յեզրիպտոսէ եւ բնակեցոյց ի գաւառն Պաղեստինոյ ի պարարտ երկրի, ըստ այնմ՝ «Այգի եղեւ սիրեցելոյն յանկեան ի տեղւոջ պարարտութեան» (Ես. Ե. 1):

Եւ ամ շուրջ գնովաւ ցանգ (ԺԲ. 1):

«Ցանկ»¹ զաւրէնսն ասէ կամ պարիսպ, զի աւրէնքն քան զպարիսպս ամրածածուկ պահէին զնոսա, այլեւ զվերակացութիւն եւ զպահպանութիւն հրեշտակացն կոչէ «ցանկ»:

Ձի որպէս այգի, ցորքան ամրացեալ է ցանկով եւ պահապանաւք, անվնաս կայ ի զազանաց եւ ի յափշտակողաց, այսպէս եւ մարդն. ցորքան ամրացեալ է աւրինաւքն Աստուծոյ՝ կատարելով զնոսին, որով պահեալ լինի եւ ի հրեշտակաց, անվնաս կայ եւ ի յախտից հոգեկանաց եւ ի փորձութենէ յանմարմին թշնամւոյն, այսինքն՝ ի սատանայէ եւ ի դիւաց:

Եւ գուր հնձան փորեաց (ԺԲ. 1):

Այսինքն՝ զսեղանն եւ զգանձարանն, կամ «հնձան» ասէ՝ զպէսպէս եւ զազգի ազգի մկրտութիւնսն, որովք սրբեալք լինէին ի մեղացն մարմնականաց, որպէս եւ մեք սուրբ աւագանաւն՝ ի հոգեկանացն եւ ի մարմնականացն:

Եւ շինեաց աշտարակ (ԺԲ. 1):

¹ US > ցանկ

Զտաճարն ասէ, որ կանգնեցաւ յերուսաղէմ իբր զդեակ թագաւորի ի բնակութիւն Աստուծոյ, զի յորժամ ի կարիս ինչ հասցեն, դիւրաւ գտցեն զնա, եւ խնդրեսցեն զաւգնականութիւն ի նեղութեանն:

Եւ եր գնա ցմշակս (ԺԲ. 1):

Այսինքն՝ ի քահանայսն եւ ի վերակացուս ժողովրդեանն, զի ետ զժողովուրդն յիշխանութիւն նոցա՝ գործել ընդ նոսա որպէս եւ կամին՝ եթէ չար եւ եթէ բարի, որպէս այգեգործ մի զայգին իւր պահպանէ:

Եւ գնաց ի փար աշխարհ (ԺԲ. 1):

Ոչ եթէ փոփոխումն տեղեաց ի տեղիս, զի յամենայն տեղիս է Աստուած եւ զամենայն լնու, ըստ այնմ. «Ո՞չ զերկինս եւ զերկիրս ես լնում, ասէ Տէր» (Երեմ. ԻԳ. 24): Եւ թէ՛ «Աստուած մերձաւոր եմ ես եւ ոչ հեռաւոր» (Երեմ. ԻԳ. 23), եւ թէ՛ «Հողի Տեառն ելից գտիեզերս» (Իմաստ. Ա. 1), եւ թէ՛ «Եթէ ելանեմ յերկինս, դու անդ ես, եւ թէ իջանեմ ի դժոխս եւ անդ մոտ ես» (Սաղմ. ՃԼԸ. 8), «առ ի զիս յետս դարձուցանել եւ յեզերս ծովու գտի զքեզ» (Նմմր. Սաղմ. ՃԼԸ. 9):

Ապա ուրեմն «գնալն ի հեռաւոր աշխարհ» զհամբերելն եւ զերկայնամտելն Աստուծոյ ասէ, զի ոչ փոյթ ընդ փոյթ խնդրէ զբարիսն եւ կամ պատժէ զչարիսն, այլ՝ երկայնամիտ լինի առ երկոսին, որպէս եւ ի թզենին ուսար:

Զի թէպէտ յառաջին ամն չեզիտ պտուղ, այլեւ ոչ յերկրորդն, որ է առաջին եւ միջին հասակ մարդոյն կամ ժամանակի անցեալն եւ ներկայն եւ չցասեալ, իսկ յերրորդն՝ ապա ցասեալ, որ թէպէտ եւ մնաց, սակայն աղաչանաւք այգեգործին:

Եւ ո՞ր են «հասակքն»:

Առաջինն՝ ի միոյն, մինչ ի տասն եւ չորս ամն, յորժամ կարէ զաւակ սերմանել եւ միջինն ի տասն եւ հինգ ամէն մինչեւ յերեսունն, յորժամ եւ իւր որդին որդիս ծնանի, որ է երրորդ հասակն եւ ժամանակին՝ անցեալ, ներկայ եւ ապառնի:

Եւ թէ՛ յայս երիս ժամանակս չպտղաբերիմք, հատանիմք եւ ի հուր արկանիմք, այլ աղաչեսցուք զՏէր, զի զմեզ արասցէ հաղորդս աստուածային պարգեւաց, թողութեան մեղաց եւ ընդունելութեան Հոգւոյն Սրբոյ:

Վասն զի մինչեւ ցայս վայր քաղցրութեամբ ներէ, թերեւս գտցէ բարիս, իսկ յետ այսորիկ թէպէտ եւ ներէ, սակայն ցասմամբ եւ տրամութեամբ:

Զսոյն ուսանիմք եւ ի մարգարէէն. «Կացի, մնասցի, ասէ, զի բերցէ ինձ զխաղող» (հմմր. Ես. Ը. 17)՝ զգործս բարիս եւ «եբեր զփուշս» (Ես. Ը. 17) եւ զտատասկս՝ զգործս չար: Զի ոչ միայն գործք աղտեղիք խղճիւ մտաց չարչարեն զմարդն ի թմրութիւն, այլեւ, զի տրամեցուցանեն մեղք մեր զԱստուածն բարերար, որպէս փուշք՝ զմեզ:

Վասն որոյ ըստ Պաւղոսի. «Երկիր գործեալ, որ ըմպէ զանձրեւս եւ ծնանիցի փուշս, մերձ է յանէծս եւ յայրուան, այսպէս եւ մարդն» (հմմր. Եբր. Զ. 7-8):

Եւ առաքեաց առ մշակսն ի ժամանակի ծառայ մի, զի ի մշակաց անրի առցէ ի պրոյոյ այգւոյն: Եւ նոցա կալեալ, գան հարին գնա եւ արձակեցին ունայն (ԺԲ. 2-3):

Յառաջ առաքեաց զՄովսէս, զի զպտուղ աւրինացն, զոր ետ ի մշակացն խնդրիցէ, եւ նոքա «գան հարին գնա» եւ վիրաւորեցին, որպէս ասէ սաղմոսն. «Բարկացուցին զՄովսէս ի բանակի եւ զԱհարոն Սուրբ Տեառն» (Սաղմ. ՃԵ. 16): Եւ թէ՛. «Չարչարեցաւ Մովսէս վասն նոցա» (Սաղմ. ՃԵ. 32), զի դառնացուցին զողի նորա» (Սաղմ. ՃԵ. 33):

«Եւ արձակեցին ունայն», զի չունէին զպտուղ աւրինացն, այլ ունայն էին ի բարեաց:

Դարձեալ առաքեաց (առ նոսա) այլ ծառայս, եւ գնա կառափնափեցին եւ արձակեցին անարգեալ (ԺԲ. 4):

ԶԴաւիթ ասէ եւ զայլ սաղմոսասացսն, որք առաքեցան յետ Մովսէսի, զի զարթուցեն զմշակսն ի սէր բարեգործութեան, իսկ զայն Դաւիթ, որ էր գլուխ սաղմոսողացն, քաղցր երգով ի յաղբերէ Հոգւոյն Սրբոյ լուսաւորեալ, ի բաց ընկեցին՝ ասելով. «Ո՞վ է Դաւիթ կամ ո՞վ է Որդին Յեսեայ, զի՞նչ մասն է մեր ընդ Դաւիթի կամ զի՞նչ ժառանգութիւն ընդ որդւոյն Յեսեայ» (հմմր. Գ. Թագ. ԺԲ. 16):

Եւ դարձեալ՝ այլ առաքեաց, եւ գնա սպանին եւ զրազումս այլս, զոմանս հարկանէին եւ զոմանս սպանանէին (ԺԲ. 5):

Զդասս մարգարէիցն ընկերաւք նոցա, որ քարոզութեամբն եւ վկայութեամբն իւրեանց յանդիմանէին զժողովուրդն եւ զչարիսն, որ գալոց էին, յառաջագոյն խաւսեցան:

Միտ դիր չարութեան մշակացն, զի եւ ոչ յետ ժամանակի պտղաբերք լինէին, զի լսողութեան պտուղն ոչ կարաւտանայ ժամանակաց եւ եղանակաց, որպէս զայլս ի սերմանց եւ ի պտղոց:

Զի կարողութիւն է եւ ի միում աւուր ընդ արկանել սերմանցն եւ զհասկն առնուլ, որպէս առ Կանդակայ եթովպացին (տե՛ս Գործք Ը. 27) եղեւ եւ առ այլս բազումս, իսկ նոքա եւ ոչ յետ յաղով ժամանակաց պտղաբերեցին:

Նաեւ ոչ միայն զպտուղն չտալով, որք յայնչափ խնամս բազում ժամանակս վայելէին եւ այնչափ ի վատութիւնս հասեալ, այլ եւ դժկամակս լինէին ընդ ծառայսն, որ գային:

Զի թէ չգոյր ուստեք հատուցանել զպարտսն, չէք պարտ ցասնուլ եւ անարգել, այլ աղաչել եւ ներողութիւն խնդրել, իսկ նոքա ոչ միայն անարգէին, այլեւ արեամբ եւս զձեռս լնուին: Թէպէտ եւ առաջին իսկ զայն պատուիրան առեալ էին, թէ մի սպանանիցես (տե՛ս Ելք Ի. 12) եւ թէ որ հեղու զարիւն մարդոյ, փոխանակ արեանն նորա, հեղցի արիւն նորա (տե՛ս Ծննդ. Թ. 6), ինքեանք վրիժապարտք եւ յայլոց եւս վրէժս պահանջէին:

Որպէս ոք ի բանտի գոլով եւ ի կապանս հանէ զերկաթսն յոտիցն եւ այնու զբանդապահսն սպանանէ, որ է կարի անմտութեան գործ:

Եւ նմին իրի իսկ եւ երկիցս եւ երիցս առաքեաց, զի եւ առաքիչն մարդասիրութիւն երեւեսցի եւ նոցին հետութիւն եւ յամառութիւն:

Այս երեք կարգ ծառայիցս ամենայն ուսուցիչքն, որ ի ներքոյ աւրինացն էին, իմացեալ լինին, որ յայլում տեղւոջ գրեալ է, զոր ասէ Ղուկաս, թէ. «Պարտ է լնուլ ամենայն գրելոցն յաւրէնսն Մովսէսի եւ ի սաղմոսսն եւ ի մարգարէսն վասն իմ» (Ղուկ. ԻԴ. 44):

Յետ այսց բանից եւս գրէ Ղուկաս, ասէ. «Տէր այգւոյն զի՞նչ արարից» (Ղուկ. ԻԱ. 40):

Յերկուս դէմս լսի ասացեալս, թէ՛ «զի՞նչ արարից». մի՛ թէ որ պարտ էր լինել, եղեւ, եւ չէ ինչ թերի եւ պակաս, այլ այն ամենայն լիով կատարեալ է, ըստ որում ասէր մարգարէիւն. «Զի՞նչ պարտ էր առնել այգւոյ իմոյ, զոր եւ ես ոչ արարի» (հմմտ. Ես. Ե. 4), եւ միւս

եւս փարակուսանք է: Որպէս չար վէրս յիմաստուն բժշկէ բազում դեղաւք ծառայեալ եւ ոչ ողջացեալ, տարակուսի եւ ասէ. «Զի՞նչ դեղ կազմեցից սմա, զի զոր ինչ գիտի, սպառեցաւ, եւ այլ ոչ եւս գոյ»: Այսպէս եւ Աստուած յետ զամենայն ինչ գործելոյ եւ նոքա ի նոյն չարիս մնացին, տարակուսի, թէ «զի՞նչ արարից»: Ըստ այնմ, թէ. «Զիք սպեղանիք. ոչ ձեթ եւ ոչ պատանս: Զայս եւ յովսէիւ ասէր, թէ. «Պաշարեաց զիս ստութեամբ եփրեմ եւ ամբարշտութեամբ տունն Իսրայէլի եւ Յուդա (Ովսէ, ԺԱ, 12), «պաշարելն» նեղել եւ սղարել ասէ» (հմմտ. Ես. Ա. 6):

Եւ արդ, որպէս սղարեալ նեղի ի թշնամեաց իւրոց, տագնապի եւ վշտանայ, այնպէս եւ Աստուած գանգատ առնէ զնոցանէ, թէ այնքան անեցուցին զչարիսն մինչ զի ի պաշարումն:

Ըստ որում եւ աստ ասէ, թէ «զի՞նչ արարից», զի պաշարելոցն է ձայնս այս, զի յորժամ ոչ գտանեն հնարս ելի եւ փախստեան, ասեն, թէ զի՞նչ արասցուք:

«Եւ զի անհնարինքն մարդկան հնարաւորք են Աստուծոյ» (Ղուկ. ԺԸ. 27), խորհեցաւ տալ զորդին, որպէս եւ ասէ աւետարանիչս:

Ապա՛ որդի մի էր իւր սիրելի, գնա առաքեաց առ նոսա յեփոյ եւ ասէ. «Թերեւս ամաչեացեն յորդոյ աստի իմմէ» (ԺԲ. 6):

«Ապա՛ որդի մի էր իւր սիրելի». զմեծ եւ զանպատմելի սէրն իւր առ ազգս մարդկան ցուցանէ Աստուած:

Զի ոչ եթէ բազում որդիս ունէր եւ ընտրեաց ի բազմացն գատելին միայն, այլ մի էր Որդին, եւ այն՝ հաճոյ եւ սիրելի, որ է Քրիստոս միածին Որդին, որում վկայեաց ի Թաբոր եւ ի Յորդանան, ասելով, թէ՛ «Դա է որդի իմ սիրելի, ընդ որ հաճեցայ» (Մարկ. Թ. 6):

«Զնա առաքեաց առ նոսա յետոյ». Ոչ եթէ վերջին էր նա, այլ զի յետոյ երեւեցաւ մարմնով, այն, որ միշտ էր, որպէս վկայեաց Յովհաննէս, թէ. «Զկնի իմ գայ այր, որ յառաջ իսկ էր, քան զիս» (Յովհ. Ա. 30): Եւ Պետրոս, թէ. «Որ որ էրն նախքան զսկիզբն աշխարհի, այժմ երեւեցաւ» (Ա Պետր. Ա. 20). եւ հրեշտակն, թէ՛ «Որ այժմ ծնաւ ձեզ փրկիչ, որ է աւծեալ Տէր» (հմմտ. Ղուկ. Բ. 11): Եւ Պաւղոս, թէ՛ «Յորոց եւ Քրիստոս ըստ մարմնոյ, որ է ի վերայ ամենեցուն Աստուած» (Ղոսմ. Թ. 5):

«Զի Բանն ի սկզբանէ էր» ըստ Յովհաննու (Յովհ. Ա. 1), եւ ի վեր եւ բարձրագոյն, քան զամենայն, իսկ զմարմինն յետոյ զգեցաւ,

ըստ մարգարէին, թէ՛ «Սա Աստուած մեր, ընդ որում ոչ համարեսցի այլ» (Բարութ Գ. 36). «Յետ այսորիկ յերկրի երեւեցաւ եւ ընդ մարդկան շրջեցաւ» (Բարութ Գ. 38):

Ուստի յայտ է, թէ՛ «յեփոյ» ասելս վասն մարմնոյն է եւ ոչ յաղագս աստուածութեանն եւ ոչ եթէ չէր նա գիտակ, զի ոչ էին կարաւղ առաջինքն փրկել զմարդիկ եւ արդարացուցանել, այլ զի բարձցէ ի միջոյ գյամառութիւն մարդկան: Զի յոյժ հպարտ է ազգ մարդկան, եւ ոչ հաւանի բանիւք, եթէ ոչ նախ իրաւքն զփորձ առցէ, սորին աղագաւ ներեաց եւ երկայնմտեաց մինչ ի վախճան ժամանակի:

Զի թէ՛ յառաջ ինքն էր եկեալ, ասէին մարդիկ, թէ՛ հնար գոյր աւրինաւքն եւ ընտանի մերով ուղղութեամբքն ապրել, վասն այսորիկ եկաց, մինչ ամենեքեան ընդ մեղաւք անկան, հրէայք եւ հեթանոսք, եւ գիտացին զինքեանս ի վերջին տկարութիւնն եւ ի վտանգս հասեալ, ըստ որում եւ ողբալով ասէին. «Զարթո՛ զգաւրութիւնս քո եւ ե՛կ ի կեցուցանել զմեզ» (Սաղմ. ԿԹ. 3), զի «Խոնարհ եղեն մինչեւ ի հոդ անձինք մեր, եւ յերկիր կցեցան մէջք մեր» (Սաղմ. ԽԳ. 25): Եւ թէ՛ «Ծանեաք Տէր զմեզս մեր» (Երեմ. ԺԴ. 20), եւ «Զանաւրէնութիւնս մեր մեք մեզէն գիտեմք» (Ես. ԾԹ. 12):

Եւ դարձեալ՝ զի միանգամ մատուցանելոց էր Քրիստոս զանձն պատարագ վասն մեղաց, սակայն ի սկզբանն ոչ եթէ զամենայն մեղս գտին մարդիկ, զի Ադամ զգատապարտութիւն մահու միայն եզիտ, եւ մինչեւ ի ժամանակս ջրհեղեղին գուսանական երգն եւ պոռնկութիւնն եւ ազգի ազգի գունովք զարդարելն զդէմս միայն յայտնեցան եւ յետ ջրհեղեղին, ապա արեցութիւնն եւ կռապաշտութիւնն եւ արուագիտութիւնն եւ ի գալ աւրինացն եւս բազմացան, զի պատճառս առին մեղքն զպատուիրանն եւ շարժեցին զմարդիկ յամենայն ցանկութիւնս:

Եւ զի չէր նմա հնար երկրորդ անգամ մեռանել, վասն այսորիկ եկաց մինչեւ ի բուսանել մեղացն ամենեցունց եւ ապա եկն:

Զի թէ՛ նախ քան զկատարումն մեղացն լեալ էր գալուստն Քրիստոսի, մեղքն, զոր յետոյ գտանելոց էին, անբժշկելի մնայր եւ ամենայն ինչ անաւգուտ գործէր:

Արդ, զորաւրինակ իմաստուն երկրագործ կայ մնայ մինչ ի բուսանել ամենեցուն փշոցն վնասակարաց եւ ապա սկսանի սրբել զանդաստանն, այսպէս եւ Քրիստոս եկաց՝ ըստ Դանիէլի. «Մինչ ի

վախճանել մեղացն եւ ի կատարել անաւրէնութեանցն» (հմմտ. Դան. Թ. 24), եւ ապա եկն եւ մեռաւ եւ մեռոյց զմեզսն:

Վկայէ այսմ եւ Պաւղոս, զի նախ ասէ, թէ՛ «Լցան ամենայն անիրաւութեամբ, պոռնկութեամբ, չարութեամբ» (հմմտ. Կորն. Ա. 29) եւ այլովքն, զորս թուէ եւ ապա ի վերայ ասէ, թէ՛ «Յայտնեցաւ արդարութիւնն Աստուծոյ ի ժամանակիս յայսմիկ» (Կորն. Գ. 26) եւ այլն տես:

Ասէ եւ Ժողովողն. «Որ լինելոցն էր արդեն իսկ եղեւ, եւ Աստուած խնդրեսցէ զհալածեալն» (Ժող. Գ. 15):

Երրորդ՝ նա թէ՛ եւ ի սկզբանն եղեալ էր այս, ոչ այսպէս սքանչելի եւ հրաշափառագոյն երեւէր, յորժամ ամենայն բժշկութեան աւրինակք յանդիմանեցան: Եւ տես զայս ամենայն ուրեք լեալ յԱստուծոյ, նախ՝ թոյլ տայ յանդիմանել տկարութեան մարդկան եւ ապա՝ յայտնի առնէ զգաւրութիւնն իւր: Որպէս առ փարաւոնիւ նախ ամենեքեան յանդիմանեցան եւ ոչ կարացին յայտնել զերազն եւ ապա ի ձեռն Յովսէփու ծանոյց նոցա (տես Ծննդ. ԽԱ. 15):

Եւ առ Նաբուքոդոնոսորաւն նախ թոյլ ետ զտկարութիւն խոստովանել զիւթացն եւ մոգուցն, որով ի միտ առին յետ մեկնութեանն, թէ՛ աստուածային է գործն (տես Դան. Բ. 24): Նոյն գտանի եւ առ Բալտասարաւ, նմանապէս եւ առ մարգարէիւքն. նախ ասէին սուտքն յինքեանց եւ ապա՝ ճշմարիտ մարգարէն ի յԱստուծոյ եւ յետ այնորիկ ելք իրացն վկայութեամբ: Եւ զի մեծ եւ սքանչելի էր այս յետ տկարութեան բնութեանս եւ աւրինացն յայտնի առնել զգաւրութիւնն իւր, վասն այսորիկ յետ մարգարէիցն առաքէ զՈրդին, ըստ որում եւ ասէ. «Ապա՛ որդի մի էր իւր սիրելի. զնա առաքեաց առ նոսա յետոյ»: Որպէս զի յիրացն, զոր ընդ մարգարէսն անցուցին, ըստգտանիցեն զանձինս եւ ի ցասմանէն ցածնուցուն եւ ապա յայնմանէ, որ եկն, զանգիտիցեն եւ ամաչեսցեն, վասն որոյ ասէ. «Թերես ամաչեսցեն յորդոյ աստի իմմէ»: Որ էր հակառակն, զի չէին ամաչելոց, ոչ եթէ չգիտէր, թէ՛ զինչ լինելոց էր, ոչ վասն անգիտութեան ասէ ինչ, որ զամենայն գիտէ, այլ յամենայն ժամ յերկուս դէմս խաւսի զիր զազատութիւն, ինքնիշխան կամաց մերոց ցուցանելով, որպէս զայն, զի ասաց, թէ՛ «Ո՛ր եւ Ադամ» (Ծննդ. Գ. 9). եւ թէ՛ «Աղաղակ Սողոմոնացոցն յաճախեաց առ իս (հմմտ. Ծննդ. ԺԸ. 20), արդեաք իջեալ քեսից, թէ՛ ըստ աղաղակի նոցա վճարիցեն ինչ առ իս, ապա թէ ոչ զի զփրացից» (հմմտ. Ծննդ. ԺԸ. 21) եւ այլուր, թերեւս լուրի-

ցեն: Որ ամենայնք անգիտութեան իմն բանք թուին, բայց ոչ թէ առ ի չգիտել ասաց զայն, այլ որպէս մատակարար է իմն, որ իւրն վայելէ: Առ Ադամաւ, զի զնա յաղերս իւրոց մեղացն ածիցէ, առ սողոմայեցեովքն, զի զմեզ խրատիցէ, չտալ վճիռ մինչեւ յիրացն վերահասու լեալ իցեմք, առ մարգարէիւն, զի մի կարծիցեն զկանխասացութիւնն անմիտքն, բռնադատիչ ստունկանութեանն: Իսկ աստ թէ զայս պարտ էր առնել եւ ակնածել յորդուոյն, զի թէ առ ծառայան անհնազանդք գտան, սակայն յորդուոյն պատուոյ պատկառել պարտ էր:

Հարցցուք զԱրիոս եւ զԵւնոմիոս, զի ահա Հայր յայտ առնէ, եթէ անգէտ էր Հարցանելով ցԱդամ եւ յապաղէր զՍողոմայեցեոցն դատաստան եւ ըստ մարդկային կարծեաց, թուի, թէ ի սուտս ել յասելն թէ՛ «Ամաչեսցեն յորդոյն աստի իմմէ»: Ջոր ինչ պատասխանեն վասն հաւրն, պատասխանեսցուք նոցա, զի զոր ասեն՝ յասել Որդուոյ, թէ ոչ ոք գիտէ զժամն եւ զժամանակն. ո՛չ Հրեշտակք երկնից եւ ո՛չ Որդի, բայց միայն Հայր (տես Մարթ. ԻԴ. 36). անգէտ ասեն զՈրդի եւ փոքր, քան Հայր, ապա աստ անգէտ ասեն զՀայր եւ փոքր՝ քան զՈրդի, որով սուտ լինին:

Իսկ մշակքն իբրեւ փեսին զնա զի գայր, ասեն ցմիմեանս. «Մա է ժառանգն. եկայք սպանցուք զսա, եւ մեր լիցի ժառանգութիւնն». եւ կալեալ զնա՝ սպանին եւ հանին արտաքոյ այգւոյն (ԺԲ. 7-8):

Փոխանակ զի պարտ էր առաջի անկանել եւ թողութիւն խնդրել, զոր առ ծառայան յանցեան, նոքա եւս մեծագոյն չար ձեռնարկեն, զի որչափ մեծ է տէր, քան զծառայ. մանաւանդ, թէ Աստուած քան զմարդ, այսպէս մեծ եւ ծանր էր սպանութիւնն Քրիստոսի, քան զմարգարէիցն:

Տեսին, ասէ, զնա, զի գայր, ասեն ցմիմեանս. «Մա է ժառանգն, եկայք սպանցուք զսա»: Առ որս պարտ է ասել, թէ ընդէ՞ր սպանանէք զնա, այլ թերեւս զի պատուեաց զձեզ եւ կամ զի Աստուած էր եւ վասն ձեր մարդ եղեւ եւ բազում սքանչելիս արար՝ զբորոտս սրբեաց, զանադամալոյծս առողջացոյց, զմեզս եթող եւ յարքայութիւնն կոչեաց:

Ոչ վասն այսր ասեն, այլ զի. «մեր լիցի ժառանգութիւնն»: Որ թէ պահեալ էին զպատուիրանս նորա, եղբարք եւ ժառանգակիցք

Քրիստոսի լեալ էին՝ ըստ Պաւղոսի (տես Կորն. Ը. 17), իսկ այժմ ամենեւին տարագիրք եղեն՝ զայս գործելով:

«Իսկ մշակքն իբրեւ փեսին զնա, զի գայր». ի ձեռն ասացելոցս յայտնէ զիշխանացն Հրէից, թէ ոչ վասն անգիտութեան զՔրիստոս խաչեցին, այլ իմացան, թէ նա է, զորմէ ասաց Դաւիթ՝ «Խնդրեա՛ յինէն եւ տաց քեզ զհեթանոսս ի ժառանգութիւն» (Մաղմ. Բ. 8):

Ջի յորժամ ժողովեցան ի խորհուրդ, ասէին. «Տեսանէք, զի ոչինչ աւգտիք, ահա աշխարհ ամենայն զկնի նորա զնաց» (Յովհ. ԺԲ. 19). թէ՛ «Թողումք զնա, ամենեքեան հաւատան ի նա» (Իմմպ. Յովհ. ԺԱ. 48):

Ժառանգութիւն Որդուոյն Աստուծոյ տուեալ է ամենայն հեթանոսաց եկեղեցւոյ, զոր իւրով արեամբն զնեաց եւ յարութեամբն տիրեաց, զոր չար բնակիչքն զնա խաչելով՝ յափշտակել կամէին զայս ժառանգութիւն, զոր տուաւ նմա եւ զհաւատս նորա խափանել եւ զարդարութիւն աւրինացն Մովսէսի յառաջել ջանային:

Ջի ազգին Ղեկայ բաժին տուան զենմունք պատարագացն, եւ գիտացին, թէ խափանելոց են զենմունքն ի ձեռն Քրիստոսի, եւ հոգեւոր պատարագն յեկեղեցի հաստատեսցի: Մեռցի, ասեն, ապա Քրիստոս, զի մնացեն կաթսայք եւ զենմունք խոյոց եւ զուարակաց, որպէս եւ էին:

Եւ կալեալ զնա, սպանին եւ հանին արտաքոյ այգւոյն (ԺԲ. 8):

Մատթէոս եւ Ղուկաս ասեն, թէ՛ «Հանին զնա արտաքոյ, քան զայգին եւ սպանին» (Մարթ. ԻԱ. 39, Ղուկ. Ի. 15), որ ցուցանեն զտեղին, թէ արտաքոյ քաղաքին կամեցան սպանանել զնա, որպէս եւ եղեւ իսկ:

Իսկ Մարկոսի ասելս, թէ «կալեալ զնա սպանին» նախ եւ ապա «հանին արտաքոյ այգւոյն», զայն յայտնէ, որ ոչ թէ միայն ի ժողովրդեանէն արտաքս ելցէ, զի մի տիրեսցէ նոցա, այլեւ յանուանէ հրէութեանն զրկեալ գտանցի, ըստ որում եւ ասէին. «Սամարացի ես դու եւ ոչ հրէայ իսրայէլացի, եւ դեւ գոյ ի քեզ» (Յովհ. Ը. 48) եւ ոչ Հոգի Սուրբ, որպէս ի մարգարէսն:

Եւ միտ դիր չարութեան նոցա, զի ոչ միայն առ կենդանութեամբն եւ մինչ ի խաչին էր, նախատէին զնա, այլեւ մինչ ի գերեզմանին էր, որպէս եւ ասէին առ Պիղատոս. «Տէ՛ր, յիշեցաք, զի մողորեցուցիչն այն ասէր, մինչ կենդանին էր» (Մարթ. ԻԷ. 63), այլեւ

առ քարոզութեամբ առաքելոցն. եւ այսպէս որչափ կարողութիւն իւրեանց էր, յիւրեանց սահմանացն ի բաց հանին եւ ետուն ընդունել հեթանոսաց:

Արդ, զի՞նչ արասցէ փեր այգւոյն. եկեսցէ եւ կորուսցէ զմշակսն եւ փացէ զայգին ի ձեռս այլոց (ԺԲ. 9):

Մատթէոս ասէ, թէ ինքեանք ասացին, թէ՛ «Ջչարսն չարաւ կորուսցէ, եւ զայգին տացէ այլոց մշակաց, որք տայցեն նմա զպտուղս ի ժամու իւրեանց» (Մաւրթ. ԻԱ. 41):

Որ ցուցանէ, թէ ինքեանք հատին զվճիռ ի վերա ինքեանց, որ է յոյժ ճշմարտութիւն դատաստանի, յորժամ ինքեանք, որ պատժելոց իցեն, անձամբ անձանց¹ տայցեն վճիռ:

Իսկ աստ Մարկոս ասէ, թէ ինքն ետ զվճիռն. եւ չեն հակառակ միմեանց, զի երկոքեան եղեն. նախ՝ զի ինքեանք հատին զվճիռն եւ ապա՝ ինքն Քրիստոս վճռեաց, ըստ որում. «Յորժամ զխտացին զբանն, թէ վասն նոցա էր, ասեն, քաւ մի լիցի», որպէս ասէ Ղուկաս (Ղուկ. Ի. 16):

Վասն որոյ եւ մարգարէիւն հաստատէ, թէ ստուգապէս առանց ամենայն պատճառի լինելոց է տալ այլոց վաստակաւորաց զայգին, այսինքն՝ հեթանոսաց, որ գալոց են յարեւելից եւ յարեւմտից, ի հիւսիսոյ եւ ի հարաւոյ՝ բազմիւ ընդ Աբրահամու եւ ընդ Իսահակայ եւ ընդ Յակոբայ յարքայութեանն երկնից (փնս Մաւրթ. Ը. 11), եւ թէ՛ «Բարձցի ի ձէնջ արքայութիւնն Աստուծոյ եւ տացի ազգի, որ առնիցէ զպտուղս նորա» (Մաւրթ. ԻԱ. 43):

«Եկեսցէ եւ կորուսցէ զմշակսն եւ փացէ զայգին ի ձեռս այլոց». զտուրս շնորհացն, զոր ամբարտաւանն արհամարհէ, տացէ խոնարհին, ըստ այնմ, թէ. «Որ ունիցի, տացի նմա եւ յաւելցի եւ որ ոչն ունիցի, եւ զայն, զոր յափշտակեաց, հանցեն ի նմանէ» (հմմտ. Մաւրթ. ԺԳ. 12, հմմտ. Ղուկ. ԺԹ. 26): Եւ այս Աստուծոյ էր սահմանեալ, որում մարգարէական աւրինակքն վկայեն՝ ասելով.

Եւ ոչ զգիրն զայն իցէ ընթերցեալ ձեր, թէ զվէմն, զոր անարգեցին շինաւորն, նա եղև զլուխ անկեան: Ի փեռոնէ եղև այս, եւ է սքանչելի յաչս մեր (ԺԲ. 10-11):

¹ ՍՏ անձիս

Որպէս թէ ասիցէ, զի՞նչ այլով իւրիք ընուին զիրք, եթէ ոչ այս, այսպէս լինիցի, խոտիլ հրէիցն եւ ընտրիլ հեթանոսացն, զի զոր նոքա զՔրիստոս իբրեւ զքար ինչ անպիտան ի բաց ընկեցին յինքեանց, հեթանոսք ընդ առաջ եկին եւ իբրեւ զքար իմն մեծագին եւ պատուական թագ ի վերայ զլիսոց իւրեանց եղին ըստ այնմ, թէ՛ «Եղ ի գլուխ իւր պսակ ի քարէ պատուականէ» (հմմտ. Մաւրթ. Ի. 5):

«Չվէմն, զոր անարգեցին շինաւորն». «Շինաւոր»՝ զհրէից վարդապետսն կոչէ, իսկ «վէմ»՝ զՔրիստոս, զոր արհամարհեցին շինաւորքն, որք զանձինս իւրեանց եւ զայլոց պարտ էին արժանաւոր տուն եւ բնակութիւն շինել Աստուծոյ: Եւ այս լինելոց էր հնազանդութեամբն Քրիստոսի, զոր նոքա ոչ կամեցան եւ այլոց արգել եւ խափան լինէին, ըստ այնմ, թէ՛ «Վայ ձեզ՝ դպրաց եւ փարիսեցւոց, զի փակէք զարքայութիւնն երկնից առաջի մարդկան, դուք ոչ մտանէք, եւ որք մտանենն, չտայք թոյլ մտանել» (Մաւրթ. ԻԳ. 13):

«Նա եղև զլուխ անկեան». որպէս որ զանդամանդ հարկանէ, ինքն ցաւեցեալ լինի, այսպէս եւ որ ընդ Աստուած մարտնչի, ինքն մանաւանդ վնասեալ լինի:

Զի թէ սիրելիքն Աստուծոյ մարդիկք ցաւելի բնութեամբ, որչափ առաւել անարգեցան, այնքան առաւել պատուականք երեւեցան, ապա զի՞նչ պարտ է ասել յաղագս Աստուծոյ, զոր եւ այժմ ի մարգարէական բանիցս ուսանիմք, զի իշխանք հրէիցն չկամէին միոյ ազգին եւ փոքու ժողովրդեանն Իսրայէլի տիրել եւ իշխել Քրիստոսի, նա աւանիկ ամենայն հեթանոսաց, եւ որք ի հրէիցն հաւատացին, զամենեսեան ի մի խառնեաց իբրեւ զվէմ ինչ անկիւնակալ: Զի որպէս մի եւ նոյն քար զերկու անկիւնս միաւորէ յինքեան, այսպէս եւ Քրիստոս յերկու ժողովրդեանն՝ ի հրէից եւ ի հեթանոսաց, մի տուն եւ մի տաճար շինեաց ի բնակութիւն աստուածութեանն:

Որպէս եւ յերեկոյի ընթերցեցն ժամանակի զերկու ուխտսն ի մի խառնեալ՝ միացոյց, զի ի միում սեղանի կատարեաց զհիւնն եւ սկսաւ զնոր խորհուրդ մարմնոյ եւ արեան իւրոյ (փնս Մաւրթ. ԻԶ. 17-30):

«Նա եղև զլուխ անկեան: Ի փեռոնէ եղև այս, եւ է սքանչելի յաչս մեր». «նա»՝ այսինքն՝ նախատեալն եւ անարգեալն, խաչեալն ընդ չարագործս եւ թաղեալն, զոր եւ Պետրոս ի հրապարակախաւսութեանն վասն ի ծնէ կաղին բժշկութեանն ասէր, թէ՛ «Նա է վէմն

անարգեալ ի ձէն՝ շինողաց, որ եղեւ զլուխ անկեան (Գործք Դ. 11), եւ չիք այլով իւրիք փրկութիւն» (Գործք Դ. 12):

Եւ զի այս այնչափ զարմանալի էր, ասէ. «Ի Տեառնէ եղև այս», զի այս միայն Աստուծոյ վայելէր, որում ամենայն դժուարինքն զիւրինք են եւ անհնարինք՝ հնարաւորք, որ զմեզ՝ զգիւց կոխան լեալս եւ զանբանիցն հաւասարեալս, զթշնամիսս եւ զապստամբս, մահուամբ Միածնի Որդւոյն իւրոյ յորդեգրութեան իւրոյ պատիւս վերացոյց եւ յանճառ բարիսն կոչեաց եւ զխորհուրդն, զոր ո՛չ հրեշտակք եւ ո՛չ հրեշտակապետք կարացին իմանալ, հեթանոսք ի ձեռն Քրիստոսի ուսան, նմին իրի ասէ. «Ի Տեառնէ եղև այս», զի եթէ նա չէր գործակից լեալ. «Մեք անձամբք մերովք չէաք բաւական, այլ բաւականութիւնն մեր յԱստուծոյ եղեւ», - ասէ Պաւղոս (հմմտ. Բ Կոր. Գ. 5). եւ Քրիստոս՝ թէ՛ «Ոչ ոք կարէ գալ առ իս, եթէ ոչ Հայրն իմ, որ զիս առաքեաց, ձգեսցէ զնա» (Յովհ. Զ. 44), որպէս եւ աստ ասէ:

«Ի Տեառնէ եղև այս, եւ է սրանչելի յաչս մեր». զի կարի իմն հեռի էին ի միմեանց հրէայք եւ հեթանոսք եւ այժմ, խառնեալք ընդ միմեանս, եղեն մի ի ձեռն հաւատոցն ի Քրիստոս:

Դարձալ՝ զի ել ժողովուրդն, եւ մտին հեթանոսք, եւ ընտանիքն եւ մերձաւորքն աւտարք եւ հեռաւորք եղեն, եւ աւտարքն եւ հեռաւորքն՝ ընտանիք եւ մերձաւորք, սորին վասն ասէ. «Է սրանչելի յաչս մեր»:

Տպագիրոն ակն, որ յեթովպիա գտանի, զարմանալի է ի տեսս, արդ՝ որպէս այն քարն սքանչելի է ի տեսութիւն աչացն, նոյնպէս եւ սա սքանչելի թուի տեսութեան հոգւոց մերոց:

«Է սրանչելի յաչս մեր». այսինքն՝ միայն ի յաչս հաւատացելոց, իսկ յաչս անհաւատիցն՝ ոչ եւս. ըստ այնմ, թէ՛ «Զոր աւրինակ զարմացին բազումք ի վերայ քո» (Ես. ԾԲ. 14), այսինքն՝ հաւատացեալքն, «այնպէս անարգեսցի տեսիլ քո ի մարդկանէ» (հմմտ. Ես. ԾԲ. 14), այսինքն՝ յանհաւատիցն, զի յԱստուծոյ եւ ի հոգեկիր մարդկանէ փառաւորէր, իսկ անարգէր՝ ի նոցանէ, որ մարդ միայն էին՝ զրկեալք ի Հոգւոյն Սրբոյ: Ի սոյն կարգ գրեն Մատթէոս եւ Ղուկաս, թէ՛ «Ամենայն, որ հարցի ընդ վէճս ընդ այս, խորտակես»

ցի, եւ յորոյ վերայ անկցի, հոսեսցէ զնա» (հմմտ. Մարթ. ԻԱ. 44, Ղուկ. Ի. 18):

Յաղագս այսր վիճի ասէ Ամովս ի դիմաց Աստուծոյ. «Ահաւասիկ ես հաստատեցից աղամանդ ի մէջ ժողովրդեան իմոյ Իսրայէլի, եւ ոչ եւս յաւելից անցուցանել զնովաւ, (Ամովս Է. 8) եւ ապականեսցին բազինքն եւ մեհեանքն» (հմմտ. Ամովս Է. 9):

Ամենայն, որ հարցի ընդ վէճս ընդ այս. այսինքն՝ զի ժողովեցան ի վերայ Քրիստոսի զխաւորք ժողովրդեանն եւ կամեցան շիջուցանել զնա ի ձեռն խաչին, զի ոչ քաղցրացաւ նոցա ուսումն վարդապետութեան նորա, սակայն նմա ոչինչ կարացին ստնանել, այլ ինքեանք իբրեւ զայլիս ծովու ընդ վէճն հարեալ՝ փշրեցան, այսինքն՝ զրկեալք եղեն ի հոգեւոր եւ ի մարմնաւոր բարութեանցն, զի յետ խաչին եւ ի գերութիւն վարեցան:

Եւ յորոյ վերայ անկցի, հոսեսցէ զնա, այսինքն՝ ի վերայ մեղացն եւ սատանայի, զի որպէս առիւծ անկանի ի վերայ որսոյ ինչ եւ զէշ պատառէ զնա, այսպէս եւ Քրիստոս ի ձեռն խաչին յարձակեցաւ ի վերայ սատանայի եւ կռապաշտութեանն եւ եհար սատակեաց եւ կործանեաց զնոսա:

Յաղագս որոյ եւ մինչ ի խաչին էր, առիւծաբար գոչեաց, զարհուրեցուցանելով զմահ եւ զիշխանն նորա, որով խափանեցան եւ պաշտամունք կոտցն եւ աւերեցան մեհեանք նոցա:

Վկայէ այսմ եւ ասացեալն ի Դանիէլէ, զի. «Վէճն, որ հատաւ ի լեռնէ առանց ձեռին մարդոյ (հմմտ. Դան. Բ. 34) եւ եհար զպատկերն եւ մանրեաց զնա իբրեւ զփոշի կալոյ ամարայնոյ եւ առ զնոսա սաստկութիւն հողմոյ եւ տեղի ոչ գտանէր նոցա: Եւ վէճն, որ եհար զպատկերն, եղեւ լեռն մեծ եւ ելից զամենայն երկիր» (Դան. Բ. 35): Վասն զի յետ խաչին ընդ ամենայն տիեզերս սփռեցան առաքեալքն՝ խլելով զկռապաշտութիւնն եւ սերմանելով զաստուածապաշտութիւնն:

Եւ արդ, յորժամ զայս ամենայն լուան զառակս եւ զվկայութիւն մարգարէիցն եւ զիւրսն եւս, ո՛չ ապաքէն պարտ էր ակնածել եւ լուել ի չարութենէն, սակայն յետ այսր ամենայնի ասէ Մարկոս.

Եւ խնդրէին զնա ունել եւ երկեան ի ժողովրդենէ անփի (ԺԲ. 12):

Որպէս թէ ստեաց ընդդէմ ինքեան, որով առաւել հաստատէին, թէ ճշմարիտ ասաց, զի ինքն էր ժառանգ այնոցիկ չար մշակացն:

¹ US անարգիր

Դարձեալ՝ ի հաւատս ամենեքեան եղբարք են, որք ոչ սիրեն զմիաւորութիւն եւ զխախտողութիւն եկեղեցւոյ, յորժամ կամին չար առնել եւ վասն բազմութեանն երկիւղի կամ առ ամաւթոյ արգելեալ լինին, իսկ յորժամ ժամանակ գտանեն, հալածեն զեկեղեցին, խաչել զՔրիստոս, որպէս խաչաւղ Քրիստոսի:

Զի գիտացին, թէ առ նոսա ասաց զառակն (այսինքն՝ վասն նոցա) եւ թողին զնա եւ զնացին (ԺԲ. 12):

Որ սակաւ մի մնայ, շատ յամէ, արդ՝ եթէ մնաց առ ժամն, երկարեաց ժամանակն:

Երբեմն կալեալ ընդ մէջ նոցա էանց, եւ ոչ տեսին. երբեմն երեւէր եւ զչարութիւն նոցա արգելոյր, զի ասէին. «Ո՞չ սա է Յիսուս եւ ահա յայտնապէս խաւսի եւ ոչ ասէ ոք ինչ» (հմմտ. Յովն. Է. 26):

Իսկ աստ, զի յերկիւղէ բազմացն զարհուրեալ էին, զայն բաւական համարի եւ չառնէ նշան ինչ, զի ոչ կամէր զամենայն ի վերջան զմարդ գործել:



ՎԱՍՆ ՍԵՂԱՆԻՆ ՆԱՐՍԱՆԵԱՅ

Մարթ. ԻԲ. 1-14

ՄՏԵՓԱՆՈՍ ՍԻՒՆԵՅԻ

Դարձեալ պատասխանեալ՝ Յիսուս ասէ նոցայ առակաւք. «Նմանեցաւ արքայութիւնն երկնից առն թագաւորի, որ արար հարսանիս որդոյ իւրոյ» (Մարթ. ԻԲ. 1):

Յառաջին առակիդ առն տանուտեառն ասաց, իսկ այժմ առն թագաւորի. վասն զի յառաջնումն ոչ էր յիշելոց զառաքումն զաւրականացն, իսկ աստ յիշելոց էր: «Նարսանիս արար» Հայր Աստուած Որդւոյ իւրոյ փեսայի Քրիստոսի եւ հարսին՝ եկեղեցական հոգւոյ, որ ոչ ապականի, այլ զանապականութիւն ի նորայ միաւորութենէն եւ ի հաղորդութենէն ընկալաւ. ծառայս կոչէ զՄովսէս եւ զմարգարէսն:

Եւ նորա ոչ կամեցան զալ (հմմտ. ԻԲ. 3):

Ոմանք վասն փութոյ կենցաղոյս այսորիկ եւ աղտեղութեան:

Եւ դարձեալ առաքեաց այլ ծառայս (ԻԲ. 4):

Զամենայն վարդապետսն եւ զհայրապետսն:

Ահա ճաշ իմ պատրաստեալ է, զուարակք եւ պարարակք իմ զենեալ (ԻԲ. 4):

«Ճաշ»՝ սեղան իմաստութեան եւ գիտութեան աստուածայնոյ, ցուլք մեծ՝ աստուածաբանութիւնք ուրախարարք, «պարարակք»՝ քաղցր վարդապետութիւնք, որ պարարէ զոգիս:

Լուեալ թագաւորին բարկացաւ, յղեալ զաւրականս, կորոյս զսպանողսն զայնոսիկ եւ զքաղաքն նոցա հրկէզ արար (ԻԲ. 8):

«Չարական»՝ Աստուծոյ հրեշտական այսպես զաւրութիւնքն եւ ապա Վեսպասիանոս, եւ «զաւրականն», որ եկեալ կորոյս զՀրէաստան յետ խաչելութեանն Քրիստոսի եւ զքաղաքս նոցա հրով վիպանեաց:

Յայնժամ ասէ թագաւորն ծառայից իւրոց (հմմտ. ԻԲ. 8):

«Ծառայ»՝ աստ առաքեալքն եւ հրեշտակք կարգեալք ի կոչումն հեթանոսաց. ասացին իսկ առաքեալքն ցՀրէայսն, ձեզ հարկաւոր էր նախապատմել զբանն Աստուծոյ, բայց զի անարժան զձեզ արարէք յաւիտենականի կենացն, վասն այնորիկ երթամք ի հեթանոսս (տրն Գործք ԺԸ. 6):

Եւ ելեալ ծառայիցն ի ճանապարհս ժողովեցին զամենեսեան, զորս գտին զչարս եւ զբարիս (հմմտ. ԻԲ. 10):

Զչարս ժողովեցին, զի մոռացին զչարութիւն իւրեանց եւ զգեցցին հանդերձ հարսանեաց եւ զկերակուր աստուածային ունիցին. եւ զբարիան կոչեցին եւ հեթանոսք էին. ապա զիա՞րդ բարիք: Բարիս զայնպիսիսն լսելի է, որք մեղմագոյն էին ի չարութեանն եւ բնութեամբ զաւրինացն գործէին:

Եւ մտեալ թագաւորն տեսանէր (ԻԲ. 11):

Եմուտ թագաւորն յառաջ քան զուրախութիւնն, զի տեսանիցէ՞ ո՞վ իցէ արժանաւոր ուրախութեան, եւ ով ոչ իցէ:

Ետես անդ այր մի, որ ոչ էր զգեցեալ հանդերձ հարսանեաց (ԻԲ. 11):

Վասն զի չէր մերկացեալ զչարութեանն եւ զգեստ ամպարչտութեանն, այլ դեռ եւս զգեցեալ ունէր եւ միայն նենգութեամբ եւ խորամանկութեամբ մտեալ էր, այսինքն՝ անաստուածութեամբ եւ ամպարչտութեամբ ոչինչ բերելով ի պատուիրանէն Քրիստոսի եւ յառաքինութենէ, վասն այնորիկ եւ կարկեցաւ, զի ոչ ունէր պատասխանի: Կապեն հրեշտակք զձեռս եւ զոտս եւ հանեն ի տանջանն զոտս զգնացս, ձեռս՝ զազդողական զաւրութիւնսն:

ԱՐԻՍՏԱՎԷՍ ԵՒ ԵՓՐԵՍ

Դարձեալ առակ հարսանեացն զայնչափ խնաման, զոր միւս անգամ ունելոց էր, հրէիցն առնէ յայտ, զի յառաջնումն առակին այսպէս երեւի, թէ յառաջ, քան զխաչելութիւնն կոչեաց զնոսա եւ աստ՝ յետ սպանանելոյն փութա ձգել զնոսա առ ինքն: Եւ յորժամ զանհնարին պատիժսն աւրէն էր կրել նոցա, յայնժամ առ հարսանիսն կոչէ զնոսա եւ առաւել պատուով պատուէ (տրն Մարթ. ԻԲ. 5):

Եւ արդ ո՞րք կայցէ քան զնոսա ապախտաւոր եւ թշուառական, զի եւ ի հարսանիս կոչէալք փախչէին: Ո՞րք կամիցի ի հարսանիս չերթալ եւ յարքայի եւ յարքայորդուոյ ի հարսանիս: Եւ է՞ր վասն ասեն «հարսանիք կոչեցան» (ԻԲ. 3), զի ուսանիցիս զԱստուծոյ խնաման եւ զգուլթ, եւ զիրացն զպայծառութիւն, զի չիք տրտմական եւ տխրական, այլ ամենեւին ամենայնն լի է հոգեւոր ուրախութեամբ, վասն այնորիկ եւ «փեսայ» իսկ կոչէ զնա Յովհաննէս (Յովհ. Գ. 29): Եւ է՞ր աղագաւ Հաւր չի խաւսի ի հարսն, այլ որդուոյ, զի յառաջին առակն զմահուանէն ճառեաց եւ աստ ցուցանէ, թէ յետ մահուանն լինելոց են հարսանիքն, յայնժամ լինելոց է փեսայ, յորժամ ի մեռելոց յարիցէ: Այլ նոքա եւ այնպէս չէին պիտանիք, զի քան զայն, զինչ կայցեն¹ անհնարին աղէտք, զի այս երեքկին իսկ ամբաստանութիւն է, նախ՝ զի մարգարէսն իսկ կոտորեցին, ապա՝ զի զՈրդին իսկ սպանին, երրորդ անգամ՝ զի ի հարսանիս Որդուոյն, զոր սպանին, կոչեցան եւ չկամեցան գալ, այլեւ պատճառս եւս յաւրէին զհարկիս եզանց եւ զագարակս եւ զկանայսն, թէպէտ եւ ի դէպ ինչ պատճառքն կարծիցին, այլ անտի իսկ ուսանիցիմք, թէ եւ կարի ինչ կարեւոր պէտք ի վերայ կայցեն, քան զամենայն նախամեծար մարթէ զհոգեւորսն համարել եւ ոչ յանկարծակի ինչ եւ փութանակի կոչէ, այլ յառաջ քան զբազում ժամանակս:

«Ասացէք,- ասէ,- ցկոչնականսն»: Եւ դարձեալ՝ եթէ. «Կոչեցէ՛ք զիրաւիրեալսն» (հմմտ. ԻԲ. 3-4):

Որ կարի աճեցուցանէ զամբաստանութիւնն, երբեմն կոչեաց մարգարէիւքն ամենեքումք եւ ի ձեռն Յովհաննու, որ առ նոյն յորդորէր եւ ասէր, թէ՛ «Նմա պարտ է աճել եւ ինձ՝ մեղմանալ» (Յովհ. Գ. 30): Եւ դարձեալ Որդուովն, որ ասէր. «Եկայք առ իս, ամենայն աշխարհայք եւ ծանրաբեռիք, եւ ես հանգուցից զձեզ» (հմմտ. Մարթ. ԺԱ. 28), եւ ոչ միայն բանիւք, այլեւ արդեամբք իսկ կոչէ զնոսա, եւ յետ վերանալոյն Պետրոսիւ, այլովք առաքելովն: Եւ քանզի իբրեւ զՈրդին տեսին, ըմբոստացան² եւ սպանին, ապա եւ ծառայիւքն միւս անգամ կոչէ՝ ոչ յաշխատութիւնս ինչ եւ ի քրտունս, այլ յուրախութիւն եւ ի փափկութիւն:

¹ Ա կայցէ

² Ա ըմբոստացան

«Զուարակք իմ,- ասէ,- եւ պարարակք զենեալ են» (ԻԲ. 4):

Տեսանես՝ որպիսի բարեկենդանք էին եւ որպիսի խրախուժիւնք, սակայն եւ ո՛չ այնպէս ինչ պատկառեցոյց զնոսա, այլ որչափ առաւել երկայնամիտ լինէր, նոյնչափ կարի իսկ քան զնոյն խստանային, ոչ առ չպարապել ինչ, այլ¹ առ ծուլութիւն:

Յուլացան,- ասէ,- եւ ո՛չ կամեցան (հմմտ. ԻԲ. 5):

Եւ ոչ միայն այն չարիք են, զի ո՛չ կամեցան գալ, այլեւս անհնարին եւ մոլեկան աւճիրք այն էին, զի զհրաւիրականսն թշնամանէին եւ կոտորէին, եւ նոքա ի հարսանիս փեսային, որ ի նոցանէ սպանաւ, կոչեցեալ հրաժարէին եւ զվերջին եւս զհրաւիրականսն կոտորեցին, զի՞նչ այլ ինչ հանգոյն, կայր այնպիսիս կատաղութեան, որում եւ Պաւղոս մեղադիր լինի, որքան զՏէրն ասէ. «Սպանին եւ զիրեանց մարգարէսն եւ զմեզ, - ասէ, - հալածեցին» (հմմտ. Ա թ-եսաղ. Բ. 15): Եւ արդ, զի՞նչ գործիցէ յետ այնր ամենայնի:

Նրծիք առնէ զբաղաքսն եւ առաքէ զարսն՝ կոտորել զնոսա (հմմտ. ԻԲ. 7):

Զայս ասելով՝ զայն հարուածս յայտ առնէ, որ առ Տիտոսիւ եւ Վիսիպիանոսիւ հասին ի վերա նոցա, թէ՛ «Եւ զՀայր բարկացուցին՝ նմա չհաւատալովն, եւ ինքն իսկ ել յայտ² առնելով զվրէժիւնդրութիւնն», վասն այնորիկ ոչ անդրէն վաղվաղակի իբրեւ սպանին զորդին, առին զքաղաքն, այլ ետ Խ. (40) ամի, զի ցուցցէն իւր յերկայնմտութիւնն յետ քարկոծելոյն զՍտեփաննոս (տես Գործք Է. 57-59) եւ սպաննելոյն զՅակոբոս (տես Գործք ԺԲ. 1-2) եւ թշնամանելոյ զառաքեալսն:

Տեսն՞ր զիրացն ճշմարտութիւն եւ զվաղվաղակի զպատժոցն ի վերայ հասանելոյ. մինչդեռ Յովհաննէս կենդանի էր, եւ այլք բազումք, որ ընդ Քրիստոսի շրջէին, ելին իրքն ի գլուխ, եւ վկայք իրացն գործելոց լինէին, որք ի նմանէն իսկ լուան զայն, վասն այսորիկ եւ ինքն իսկ ասէ:

Նարսանիքս պապրասր էին, եւ հրաւիրեալքն չէին արժանի (ԻԲ. 8):

¹ Ա > այլ
² Ա յայց] յայտ

Զի մի՛ կարծիս ինչ յամառութեան նոցա թողուցու. նախ առ նոսա առաքեաց, եւ ինքն առ նոսա եկն, զի զնոսա կարկեսցէ եւ զմեզ խրատեսցէ, թէ՛ նա զիւրն զամենայն կատարեաց, թէ՛պէտ եւ չիցէ ոք, որ շահիցի ինչ, զի նոքա չէին արժանի:

«Ելէք,- ասէ,- ընդ ամենայն ճանապարհս, եւ զոր ոք զպանիցէք, կոչեսցջիք զանարգս եւ զարհամարհեալս» (հմմտ. ԻԲ. 10):

Յուցանէ, թէ՛եւ այս եւս յիրաւի լինելոց է, որ կարի իսկ կսկծեցուցանէր զհրէայսն եւ քան ընդ կործանումն քաղաքին իւրեանց ընդ մուտն հեթանոսաց կարի իմն մորմոքէին: Բայց զմի ոք ի հաւատս ապաստան եղեալ, ապա եւ զգատաստանէն իսկ ճառէ, որ վասն չար գործոցն լինելոց է, զի առ այն, որ չեւ իցեն հաւատացեալ. վասն հաւատոց եւեթ ճառէ եւ առ հաւատացեալսն զվարուց փոյթ յանձին ունելոյ, զի «հանդերձ հարսանեաց» զվարս եւ զգործան կոչէ: Եւ եթէ շնորհացն իցէ կոչումն, է՞ր վասն այսպէս ճշտիւ զհանդերձս մաքուրս պահանջիցէ: Վասն զի կոչելն եւ սրբելն այն շնորհացն է՛ եւ սուրբ եւ մաքուր պահել զհանդերձս այն կոչնականացն: Իսկ կոչումն, ոչ¹ ըստ արժանաւորութեան կոչեցելոցն եղեւ, այլ ըստ² շնորհացն պարզեւաց, եւ պարտ էր այսուհետեւ երախտեացն երախտիս հատուցանել եւ մի՛ այնչափ չարութիւն ցուցանել յետ այնպիսի պատուոյ, զի որպէս նոքա ո՛չ գալովն թշնամանեցին, նոյնպէս եւ դու, յորժամ անառակ վարուք անցեալ բազմեսցիս, զի աղտեղի հանդերձիւքն մտանելն այն իսկ է, յորժամ անսրբական վարուք երթիցես աստի անդր:

Քանզի եւ պապանձեցաւ, ասէ ի հարցանելն (հմմտ. ԻԲ. 12-13):

Տեսանես, զի թէպէտ եւ իրքն յայտնի կան, ո՛չ պատժէ եւ ո՛չ նախ ինքն տացէ զվճիռն վնասակարացն, յորժամ չգիտիցէ՝ ուստէք իրաւունս ցուցանել, ապա այնուհետեւ յանհնարին տանջանս մատնիցի³, զի մի յորժամ խաւար լսիցես, այսպիսի ինչ անլոյս միայն համարիցիս զտեղիս տանջանաւորացն, այլեւ զայն լսիցես, եթէ՛

Եղիցի լալ եւ կրճել արամանց (ԻԲ. 13):

Զի այնու զանժուժկալական դաժանութիւն ցաւոց տանջանացն յայտ առնիցէ:

¹ Ա որ] ոչ
² Ա > ըստ
³ Բ մատնիցտ

Լուսարուք զայս, որ ի խորհրդականան վայելիցէք եւ աղտեղի հանդերձիւ[ք] յայնպիսի տեղի զայցէք, տեսէք՝ ուստի կոչեցարուք ի ճանապարհաց եւ այն, զի կաղքն եւ հաշմեալք իսկ էիք հոգւով. ոչ եւս չար, քան զմարմնոց խեղութիւնս է, ակն ածեսցուք ի մարդասիրութենէ այնորիկ, որ կոչեացն, եւ մի ոք ի նոյն աղտեղի հանդերձս կացցէ հանապազ, այլ իւրաքանչիւր ոք ի ձէնջ քննեսցէ եւ լուսացի խոստովանութեամբ եւ արտասուաւք զպատմուճան հոգւոյն:

ՅՈՎՀԱՆՆԷՍ ԾՈՐԾՈՐԵՅԻ

Դարձեալ պապասխանի եր Զիսուս եւ ասէ ցնոսա առակար. «Նմանեցաւ արքայութիւնն երկնից առն թագաւորի, որ արար հարսանիս որդւոյ իւրում: Եւ առաքեաց զժառայս իւր կոչել զհրաւիրեալսն ի հարսանիս, եւ ոչ կամեցան գալ» (Մարթ. ԻԲ. 1-3):

Յառաջնումն առակին «փանուփեր» ասաց եւ աստ՝ «թագաւոր», քանզի ո՛չ իսկոյն վրէժխնդիր լինելոց էր, այլ յետոյ. յորժամ հրաժարէին ի հարսանեացն՝ հանդերձեալ էր զաւրականս առաքել: Վասն այսորիկ «թագաւորի» նմանեցաւ, «որ արար,- ասէ,- հարսանիս որդւոյ իւրում». թէպէտ յետո՛յ եղեւ հարսանիքն Որդւոյ, սակայն նախ քան զյաւիտեանս սահմանեալ էր՝ ըստ առաքելոյ (Կրն Ա Կոր. Բ. 7): Իսկ «հարսանիք» է, նախ առաջին՝ խառնումն Բանին ընդ բնութիւնս մարմնոյ միութեամբ, եւ ապա՝ եկեղեցական հոգւոց՝ ըստ Յովհաննու, թէ՛ «Որ ունի հարսն, նա է փեսայ» (Յովհ. Գ. 29), եւ Պաւղոս, թէ՛ «Խորհուրդս այս մեծ է, բայց ես ասեմ ի Քրիստոս եւ յեկեղեցի» (Եփես. Ե. 32), եւ զարձեալ թէ՛ «Ձձեզ զամենեսեան խաւսեցայ իբր զկոյս մի սուրբ յանդիման կացուցանել Քրիստոսի» (հմմր. Բ Կոր. ԺԱ. 2), յորոյ հաղորդութենէն զանապականութիւնն ընկալաւ. մարմինն Տեառն՝ արդեամբք եւ եկեղեցի սուրբ՝ յուսով աւետեաց: Եւ վասն է՞ր «հարսանիս» անուանէ. զի ուսանիցիս զիրացն պայծառութիւնն, թէ չիք տրամական ինչ, այլ ամենայնն լի է հոգեւոր ուրախութեամբ: Եւ է՞ր աղագաւ Հաւր ոչ խաւսի հարսն, այլ Որդւոյ. զի յառաջին զմահուանէ Որդւոյ ճառեաց, աստ ցուցանէ, թէ յետ մահու լինելոց է հարսանիքն, եւ յայնժամ լինելոց է փեսայ, յորժամ ի մեռելոց յարիցէ, զի զամենեսեան առ ինքն ձգէ (Կրն Յովհ. ԺԲ. 32): «Առաքեաց,- ասէ,- զժառայս իւր». այսու զանչափ խնաման, զոր առնելոց

էր հրէիցն, յայտ առնէ, զի յառաջնումն առակին այսպիսի երեւի, թէ յառաջ քան զխաչն կոչեաց զնոսա, իսկ աստ՝ յետ սպանանելոյն փութայ ձգել առ ինքն, զի յորժամ զանհնարին պատիժս աւրէն էր նոցա կրել, ի հարսանիս կոչէ եւ առաւել պատուով պատուէ: Եւ արդ, ո՞ ոյք այնքան ապախտաւոր իցէ եւ թշուառական, զի ի հարսանիս կոչիցի յարքայորդւոյ եւ յարքայէ եւ փախչիցի ի նմանէ: «Առաքեաց զժառայս իւր կոչել զհրաւիրեալսն ի հարսանիսն, եւ ոչ կամեցան գալ»: «Ծառայս» զՄոսէս ասէ եւ զմարգարէսն կամ զՅովհաննէս զհրաւիրեալն ի մարգարէիցն: Կոչեաց ի վայելս, եւ ոչ կամեցան՝ ասէ, զոր չիք այլ ինչ անհնարին աղէտ քան զայս, զի այս երեքկին ամբաստանութիւնն է. նախ՝ զի զմարգարէս կոտորեցին, եւ ապա զՈրդին իսկ սպանին, եւ երրորդ՝ ի հարսանիսն Որդւոյ, որ սպանաւ, կոչեցան եւ ոչ կամեցան:

Դարձեալ առաքեաց այլ ծառայս եւ ասէ. «Ասացէք հրաւիրելոցն. «Ահաւասիկ զճաշ իմ պապրասպեցի, զուարակք իմ եւ պարարակք զենեալ են, եւ ամենայն ինչ պապրասպ է, եկայք ի հարսանիսս» (ԻԲ. 4):

Կարի աճեցուցանէ զամբաստանութիւնն, զի երբեմն կոչեցան մարգարէիւքն, հրաւիրեաց եւ Յովհաննէս, թէ՛ «Նմա պարս է անել եւ ինձ՝ մեղմանալ» (Յովհ. Գ. 30), կոչեաց եւ ինքն, թէ՛ «Եկայք առ իս, ամենայն աշխարեալք, եւ ես հանգուցից զձեզ» (հմմր. Մարթ. ԺԱ. 28), եւ նոքա ըմբոստացան: Ապա եւ առաքելովքն միւսանգամ կոչէ, այլեւ հայրապետաւքն եւս, ոչ յապաշխարութիւնն եւ ի քրտունս, այլ յուրախութիւնն եւ ի վայելս, սակայն եւ ոչ այն պատկառեցոյց զնոսա, զի որչափ երկայնամիտ լինէր, այնքան ախտանային: «Ահաւասիկ զճաշ իմ պապրասպեցի»՝ սեղան լի իմաստութեամբ եւ գիտութեամբ աստուածայնոյ՝ զմարմինն տէրունական եւ զարիւնն իւր սուրբ՝ քաղցր ճաշակողացն եւ ախորժ քան զմեղր եւ զխորիխս: Ե՛ւ ոչ վայրապար սա «ճաշ» եւ Ղուկաս «ընթրիս» ասէ (Ղուկ. ԺԳ. 16), այլ նշանակէ «ընթրիսն», զի ի լրման կենցաղոյս եւ երեկոյացեալ դարուս բաշխեաց զմարմինն եւ զարիւնն աշակերտացն ի վերնատանն, իսկ «ճաշ»՝ զի ժամ էր երրորդ, յորժամ բեւեռեցաւ ի խաչին՝ տալոյ քաղցելոց մտաց զկերակուրն անմահացուցիչ եւ զգիտութիւնն իւր ըստ Դաւթի, թէ՛ «Պապրասպ արարեր առաջի իմ զսեղան» (Մաղմ. ԻԲ. 5), որպէս եւ զՀոգին Սուրբ՝ ի սոյն ժամու: Այլեւ զաստուածային

գիտութեան իմաստն ի ձեռն բանից վարդապետութեան, որ քաղցր է ի կոկորդոս քննողացն՝ ըստ այնմ, թէ՛ «Քաղցր են ի քիմս իմ բանք քո՝ քան զմեղր քերանոյ իմոյ» (Սաղմ. ԾԺԸ. 103), զոր «ճաշն» ասաց, նաև զսեղան Հաւր, յորս բազմեցուցէ եւ անցեալ պաշտեցէ (Կրնս Ղուկ. ԺԲ. 37), որ է նորա վարդապետելն եւ մեր ուսանելն: Զոր պատրաստեցի, ասէ, քանզի յառաջագոյն կազմեալ է զարդարոցն փառս, որպէս զերկիրն պարզեւական, որ բղխէր զկաթն եւ զմեղր հին ժողովարանին՝ ասելով. «Տարայց զքեզ յերկիրն, զոր պարտաստեցի քեզ» (հմմտ. Ելք ԻԳ. 20), զոր վասն սննդագործ զաւրութեանն եւ կատարելագործ իմաստութեանն՝ «կաթն եւ մեղր» անուանեաց եւ աստ «ճաշ» կոչէ, որում ըզձացաւ տարփաւ չողին, թէ՛ «Երանի, որ կերիցի: ճաշ յարբայ յութեանն Աստուծոյ» (Ղուկ. ԺԴ. 15):

«Զուարակք իմ եւ պարարակք զենեալ են», - ասէ: Հանգոյն այսմ եւ Ղուկաս ասէ, թէ՛ «Զենեք զեզն պարարակ» (հմմտ. Ղուկ. ԺԵ. 23), որով զխրախոսութիւն բարեկենդանութեանն նշանակէ, զի գալուստ Տեառն. տարեկան ընդունելի քարոզեցաւ ի մարգարէիցն (Կրնս Ես. ԿԱ. 2): Բայց «զուարակ» զմարմինն իւր կոչէ՝ զհեզն միանգամայն եւ զերկրավաստակ, որով զբանական երկիրս մեր գործեաց՝ պտղաբերս առնելով Աստուծոյ աւրինակաւ մարմնոյ իւրոյ: Իսկ «պարարակ» զգէրն ասէ եւ զ«ուղղալիցն»՝ ըստ մարգարէին (Սաղմ. ԿԵ. 15), պարարտացեալ աստուածութեանն աւծամբ, զորոյ ասէ, թէ՛ «զենեալ են»: Զայս զխաչէն ասէ՝ կանխաւ յառաջաձայնեալ, որպէս զի ցուցցէ, թէ նա՛խ սահմանեալ էր մահն Որդւոյ ի փրկութիւն եւ յուրախութիւն բանականաց՝ ըստ այնմ. «Զոր եղ յառաջագոյն ի փրկութեան յոյսն լուսն ժամանակաց» (Եփես. Ա. 9), միանգամայն եւ զկամաւորն նշանակէ:

Եւ զարձեալ՝ զի բազմաւորական ասէ՝ կամ թէ՛ ոչ միայն մարմնով, այլեւ հոգևով եւ մտաւք պատարագեցաւ, զոր «իմ» ասէ, քանզի արդարեւ Բանին էր մարմինն՝ ըստ առաքելոյ, թէ՛ «Երեսցաւ մարմնով եւ արդարացաւ Նոզով» (Ա Տիմ. Գ. 16), եւ համարձակիմ ասել, թէ աստուածութեամբն եւս վասն առ մարմին ներմիութեան տնաւրինաբար, կամ թէ՛ ոչ միայն փեսայն զենաւ, այլեւ բարեկամք փեսային եւ հարսն եւ որդիքն խողխողեցան՝ առաքեալք եւ մարգարէք, պարարակք հոգելիցք վասն մարդկան, որպէս եւ Տէրն, զանձինս իւրեանց պատարագեցին: Եւ զարձեալ՝ զուարակք մեծամեծք եւ պարարակք զենեալք՝ աստուածաբանութիւնք ուրախարարք եւ

քաղցր վարդապետութիւնք նորա, որ պարարեն զհոգիս՝ ուսուցանելով զզենուամն Որդւոյ, միանգամայն եւ ի նոյն յորդորեն: Իսկ ասելն՝ «եւ ամենայն ինչ պարտաստ է»՝ զհոգեւոր ուրախութիւնն ասէ յեկեղեցի եւ մեղաց թողութիւնն, եւ զորդէգրութեան շնորհն, եւ զարքայութեանն յոյս, եւ զայլ սոյնպիսիս:

Եւ նորա յուլացեալ՝ գնացին ոմն յագարակ իւր, եւ ոմն՝ ի վաճառ իւր: Եւ այլք կալան զճառայս նորա, թշնամանեցին եւ սպանին (ԻԲ. 5-6):

Պատճառս յաւզէին, որպէս Ղուկաս ասէ, զհարկիս եզանց եւ զագարակս եւ զկանայս (Կրնս Ղուկ. ԺԴ. 18-20), զի թէպէտ ի դէպ ինչ պատճառքն կարծիցին. այլ մեք անտի ուսանիմք՝ թէպէտ եւ կարի ինչ կարեւոր պէտք ի վերայ կայցեն, քան զամենայն ինչ նախամեծար զհոգեւորն պարտ է համարել: Իսկ «յուլացան» ասելն զպղերգութիցն եւ զծուլիցն նշանակէ, եւ «ագարակ» ան՝ զերկրասիրացն եւ զագահացն, իսկ «եզամբքն»՝ զզգայութեանցն պատրանս եւ «վաճառ» ան՝ զվաճառականացն եւ զխաբեբայիցն, որք զրկութեամբ յափշտակեն զայլոց արարս, յայնժամ հրէյաքն, որք ոչ հետեւեցան Աւետարանին՝ քարոզութեամբն, եւ այժմ ապիրատքն եւ անհաւատքն, որք ի նոյն ախտս վարակեալք են: Իսկ կարի չարքն, որք զճառայսն՝ զառաքեալս նորա, թշնամանեցին եւ զանեալ սպանին, զի ոչ միայն ոչ կամեցան գալ ի հարսանիսն, այլեւ մոլեկան ոճիրս գործեցին, զի զհրաւիրական խողխողեցին, որոց եւ Պաւլոս մեղադրէ, թէ՛ «Տէրն սպանին եւ զմարգարէսն եւ զմեզ հալածեցին» (Ա Թես. Բ. 15): Տեսանե՞՞ զզանազանութիւն ախտիցն, թէ՛ որպէ՛ս հաւասար վերջացուցանէ հարսանեացն, զի ոմանք ծուլութեամբ, եւ ոմանք՝ մարմնասիրութեամբ, եւ այլք հակառակութեամբ ի բաց հետին ի հոգեւոր ուրախութեանն:

Իսկ թագաւորն իրրեւ լուաւ, բարկացաւ եւ առաքեաց զգաւրս իւր եւ սպարակեաց զսպանաւոսն զայնոսիկ եւ զքաղաքն նոցա այրեաց (ԻԲ. 7):

Յիրաւի բարկացաւ, զի բազում ժամանակս ներեաց՝ թերեւս ի զղջումն գայցեն, իսկ նոքա ի չարութիւն վերջին թեւակոխեցին եւ զերկայնմտութիւն նորա պատճառ խստութեան անձանց արարին եւ բարկութեան անաւթ զանձինս պատրաստեցին, որպէս

փարաւոն, կամ թէ չհաւատալովն յՈրդի՝ զՀայր բարկացուցին, վասն որոյ ի հարուածս գայ, որպէս ասէ, թէ՛ «Առաքեաց զգաւրս իւր»: Զայս զՏիտոսէ եւ զՎեսպիանոսէ ասէ, եւ թէ «իւր» ասէ, մի՛ զարմանար, քանզի եւ զՆաբուքոդոնոսոր բաժակ ոսկի ի ձեռին իւր կոչեաց (տե՛ս Երեմ. ԾԱ. 7) եւ զմարախ զոր իւր ասէ (տե՛ս Յովել Բ. 25), վասն զի զկամս նորա պաշտեն: Նոյնպէս եւ զսոսա, զի զվրէժ Որդւոյ իւրոյ առին, թէպէտ ոչ անդէն վաղվաղակի, յորժամ սպանին, այլ յետ քառասուն ամի, յորժամ եւ զհարիւրակսն զոմն գլխատեցին, որպէս զՅակոբոս, զոմն քարկոծեցին, որպէս զՍտեփաննոս, եւ զայլսն թշնամանեցին, որպէս զի ներելովն զերկայնմտութիւնն ցուցցէ եւ վրէժխնդրութեամբն՝ զգաւրութիւնն: Քանզի տակաւին Յովհաննէս կենդանի էր, եւ այլք բազումք, որք ընդ Քրիստոսի էին, տեսին զաւերն Երուսաղէմի, որպէս լուան ի Տեառնէ, զի եկեալ հռոմայեցւոցն՝ բարձին զիշխանութիւն նոցա, զորս սպանին եւ զմանկունս եւ զկանայս գերի վարեցին եւ զքաղաքս նոցա հրով այրեցին, որպէս պատմէ Յովսէպոս¹:

Յայնժամ ասէ ցճառայս իւր. «Նարսանիքս պապրասսսր են, եւ հրաւիրեալքն չէին արժանի: Արդ, երթայք ի յանցս ճանապարհաց եւ զորս միանգամ գրանիցէք՝ կոչեցէք ի հարսանիսս» (ԻԲ. 8-9):

Նախ առ նոսա առաքեաց, եւ ինքն առ նոսա եկն, զի մի՛ կարծիս ինչ յամառութեան թողուցու, որպէս ասէ, թէ՛ «հրաւիրեալքն չէին արժանի», այսինքն՝ թէ եւ անգամ հրաւիրելոյ չէին արժանի, թող թէ կոչելոյ, բայց զի մի՛ բարուրս դիցեն, այլ զի նոքա ըմբերանեցին, եւ մեք խրատեսցուք, եւ ապա ի հեթանոսս առաքէ: Բայց եթէ զլինելոցս իբր զեղեալ ճառէ, մի՛ ինչ սքանչանար, զի այս նորա սովորութիւն էր, զի «յորժամ լինիցի,- ասէր,- հաւարասցիք, եթէ ես եմ» (Յովի. Մապթ. ԻԸ. 19): Իսկ «ճառայս» դարձեալ զառաքեալսն ասէ, որք հրեշտակք կարգեցան ի կոչումն հեթանոսաց. «Երթայք աշակերտեցէք զամենայն հեթանոսս» (հմմտ. Մապթ. ԻԸ. 19), եւ Պաւղոս ասէր հրէիցն, թէ՛ «Նախ ձե՛զ պարս է պարսել գրանն Աստուծոյ, բայց զի անարժան զնեզ արարէք, երթամք ի հեթանոսս» (հմմտ. Գործք ԺԳ. 46):

«Նարսանիքս պապրասսսր են». կազմ է առաջաստս ընդունել զեկեալսն, եւ հրէայքն մարգարէիւք հրաւիրեալք՝ կամաւ անար-

ժանք եղեն երկնաւոր խնջոյիցս: «Երթայք,- ասէ,- ի յանցս ճանապարհաց». կամ զանարգս եւ զարհամարհեալս, որք ի վերայ ճանապարհին նստին, զխեղս եւ զկոյրք, որպէս Ղուկաս ասէ (Ղուկ. ԺԴ. 21), որք են հեթանոսք խեղք հոգւով եւ կոյրք ի գիտութենէ տեսեան նոցա կռապաշտութեամբ, կամ որք անց են եւ ճանապարհ՝ կոխանք լեալք դիւաց ճիւղաց, կամ որք յանցաւորք եղեն ի շաւիղս ճանապարհի աւրինացն Աստուծոյ: «Եւ զորս միանգամ գրանիցէք, կոչեցէք ի հարսանիսս». զի հասարակաց եղեւ շնորհ մարդասիրութեանն Քրիստոսի՝ հրէից եւ հեթանոսաց եւ բարբարոսաց, որով կարի իմն կակծեցուցանէր զհրէայսն, զի քան ընդ քաղաքին կործանումն՝ ընդ մուտն հեթանոսաց մորմոքէին, իսկ «կոչելն» զհաւատովն ձգելն ի նա նշանակէ:

Եւ ելեալ ճառայքն ի ճանապարհս՝ եւ ժողովեցին զամենեսեան զոր եւ գրին՝ զգարս եւ զբարիս, եւ լցան հարսանիքն բազմակաւաւք (ԻԲ. 10):

Զսփռել աշակերտացն ասէ, որք ճանապարհորդեցին ընդ ոլորտս տրեզերաց եւ ժողովեցին ի փարախ հաւատոյ զբնաւ ազգս մարդկան, զորս գտին, այսինքն՝ որք հաւատացին յանուն նորա եւ ի կորստական գործոցն ի գիւտն ժամանեցին: Իսկ զի՞նչ այն, թէ՛ «զգարս եւ զբարիս»: Զարք, որ կարի կռամուքն էին եւ կախարդասարքն եւ այլ եւս օճրագործքն, որպէս զի զհարութիւնն մոռացին եւ հանդերձ հարսանեաց զգեցցին, եւ կերակուրս աստուածայինս ունիցին: Իսկ բարի, որք մեղմագոյնք էին ի չարիս կամ որք բնութեամբ զաւրինացն գործէին: «Եւ լցան հարսանիքն բազմականաւք». Ղուկաս «տունն» ասէ (Ղուկ. ԺԴ. 24), որ զաշխարհս նշանակէ լցեալ հաւատացելովք՝ ըստ այնմ. «Քարոզեսցի Աւստրալիս ընդ ամենայն երկիր» (հմմտ. Մապթ. ԻԴ. 14). կամ թէ՛ զայն, թէ՛ «Ի վան Նար իմոյ աղթուանք բազումք են» (Յովի. ԻԴ. 14): Իսկ Մատթէոս, զի զհարսանիսն ասէ լնուլ, զի հարսանիք ուսաք զԲանին խառնումն առ մարմնոյն միութիւն, որ եղեւ գլուխ եկեղեցւոյ, եւ եկեղեցի սուրբ յօղմամբ հաւատոյ միացաւ ի գլուխն իւր, որով լրացաւ մարմին նորա բազում անդամաւք, յորմէ եւ ի գլխոյ անտի աճէ զաճումն իւր սուրբ՝ լցեալ շնորհաւք նորա: Այլեւ զտեղի անկելոյն լցին զհարսանարանն վերին բազմականքն ի դեղանն Հաւր, որպէս ասաց:

¹ Գրեա պատմիչ Հովսէպոս Փլավիոսն այս դեպքերը նկարագրում է «Գրեական պատերազմ» երկում. տե՛ս ծնթ. կազմողի, էջ 473:

Եւ մտնալ թագաւորն հայել զրազմականաւրն՝ ետես անդ այր մի, որ ոչ էր զգեցեալ հանդերձ հարսանեաց (ԻԲ. 11):

Թէպէտ զայս վասն առակին յաւգացուցանէ, սակայն հաւատամբ ճշմարտապէս ընդ մեզ լինել՝ ըստ իւր իսկ ասիցն, թէ՛ «Ընդ ձեզ եմ գամենայն ատուրս կենաց» (հմմտ. Մաւրթ. ԻԸ. 20), եւ թէ՛ «Ուր երկու եւ երեք ժողովեալ են յանուն իմ, անդ եմ ես ի մէջ նոցա» (Մաւրթ. ԺԸ. 20): Արդ, նախ քան զուրախութեանն վայելս՝ մտանէ զիտել՝ ո՛վ արժանաւոր իցէ ուրախութեանն եւ ո՛վ՝ ոչ: «Ետես անդ այր մի,- ասէ,- որ ոչ էր զգեցեալ հանդերձ հարսանեաց»: Զայս կամ [վասն] հերձուածողացն ասէ, որք թէպէտ եկին ի հաւատս, սակայն չար ազանդոցն որոմամբ ներկեցին զանձինս, վասն զի զհանդերձ հարսանեաց փեսային, այսինքն՝ զմարմին Բանին, զոր զինուորքն ոչ պատառեցին, սոքա պատառեալ յանձնէ ի բաց ձգեցին պէսպէս հերձուածովք, զի ոմն երկու որդիս ասաց, եւ ոմն՝ ի յերկնից բերեալ զմարմինն, եւ այլք ի Մարիամայ զսկիզբն մուծին, եւ կէսք շփոթումն բնութեանցն տուին, եւ այսպէս մերկք եւ խայտառակք մնացին, եւ զի թէպէտ հակառակք աղանդաւք վարեցան, բայց յամբարշտութիւնն հաւասարք գտան, վասն այսորիկ իբրեւ զմի այր ասաց: Կամ վասն գործոց ասէ զայս, զի բազումք հաւատացին, բայց վարս անարժանս հաւատոյն ցուցին, քանզի այնպիսեացն եւ հաւատն իսկ առանց գործոց մեռեալ է: Արդ, զի մի՛ ի հաւատս միայն ապաստան լիցին, զիրս դատաստանին ի մէջ բերէ, որ վասն չար գործոցն լինելոց է, զի ո՛չ ասաց, թէ չունէր հանդերձ, այլ թէ՛ հարսանեաց ոչ ունէր:

Քանզի հանդերձ երկու գիտեմք հոգւոյ. մի՛՝ զառաքինութեանն ծածկոյթ, որ պանծալի զգեցեալն ցուցանէ, որպէս ինքն զգեցաւ Բանն հանդերձ մարմնովն, զարդարութիւն ասեմ եւ զայլ առաքինութիւնն, եւ միւս՝ զչարութեանն թաւուս (տրոփ^օ), որ նախատելի ցուցանէ, որպէս զՅուդաս, որ փոխանակ աւրհնութեանն հանդերձի, զոր մաքրութիւնն շնորհէ, զանէծս զգեցաւ իբրեւ զհանդերձ, զոր չարութիւնքն ընձեռեցին եւ տարագիր ի հարսանեաց փեսային արարին եւ ի բազմականացն աթոռակցութենէ մերժեցին: Իսկ թէ ոք ասիցէ՛ է՞ր այսպիսի ճշդիւ զհանդերձս պահանջէ, ասասցուք, թէ կոչել եւ սրբել, եւ այն՝ զոչ արժանաւորս, ըստ շնորհացն է, եւ շնորհ միանգամ է, իսկ սուրբ եւ մաքուր պահել զհանդերձս՝ այն կոչնականացն է եւ երախտեացն եւ երախտիս հատուցանողացն, քանզի ոչ է պարտ այնչափ չարիս ցուցանել յետ այնպիսի

պատուոյ: Զի որպէս նոքա, ոչ գոլովն թշնամանեցին, նոյնպէս եւ դու, յորժամ աղտեղի հանդերձիւք եւ անսրբական վարուք աստի անդր երթիցես, մանաւանդ զի նա ոչ գիտէր զաղտեղի պատմուճանն անարժանս գոլ հարսանեաց, իսկ դու ուսար եւ վարդապետեցար:

Բայց են ոմանք, որ «հանդերձ հարսանեաց» զմկրտութիւնն ասեն՝ ըստ առաքելոյ, թէ՛ «Որք ի Բրիսպոս մկրտեցայք, գ-Բրիսպոս զգեցեալ էք» (Գաղ. Գ. 27): Արդ, ասէ՛ թէպէտ բազում ազգք ի պէսպէս պատճառս ճանաչեցին զԱստուած, բայց որք զզգեստ անապականութեան կնքոյն եւ զծածկոյթ ամաւթոյ մերկութեանն ոչ առին, ո՛չ են ժառանգելոց զարքայութիւնն Աստուծոյ՝ ըստ Տեառն, թէպէտ եւ բազում գործս բարութեան յանձինս ցուցանեն, զի այնպիսիք կուրացեալք անձամբ՝ ո՛չ ի փառս Աստուծոյ, այլ ի փառս անձին առնիցեն զայն, ի զէպ ելցէ նոցա բանն, թէ՛ «Այն իսկ են վարձք նոցա» (Մաւրթ. Զ. 2):

Եւ ասէ ցնա. «Ընկե՛ր, զիա՞րդ մտեր այսր, զի ոչ ունէիր հանդերձ հարսանեաց». եւ նա պապանձեցաւ (ԻԲ. 12):

Այսինքն՝ հակառակ կրաւնից եւ աւրինաց իմոց՝ զիա՞րդ իշխեցեր մտանել. ո՛չ զչարութիւն եւ զամբարշտութիւնն մերկացեալ, այլ տակաւին զգեցեալ ունիս, այսինքն՝ նենգութեամբ եւ խորամակութեամբ եւ անաստուածութեամբ մտեր, ոչինչ զգենլով ի պատուիրանացն, որ զառաքինութիւնն բազմատեսակս անկանէ, զի թէ անլուայ ոտիւք եւ առանց լողարանաց ոչ մտանէին ի բակս մեհնիցն, քանի՛ աւելի ի տէրունեանն ընթրիս: Լուիցեն զայս, որք ի խորհրդական սեղանն մատչին աղտեղի հանդերձիւք, քանզի նոյն բան ահաւոր է անարժանիցն, վասն որոյ պարտ է ակնածել ի մարդասիրէն, որ կոչեացն, եւ այն՝ ի «ճանապարհացն անցից», եւ զպատմուճանս հոգւոյն լուանալ խոստովանութեամբ եւ ապաշխարութեամբ, եւ զարդարել զանձինս առաքինութեամբ, եւ ապա՛ ի սեղանն մատչել, ուր հրեշտակք են բազմեալ պայծառ հանդերձիւք, որպէս ի խաչին եւ ի գերեզման փրկչին յայտնապէս տեսին, քանզի ճշմարտապէս խաչին է խորհուրդ եւ գերեզմանին նշանակ:

«Եւ նա պապանձեցաւ», - ասէ. որպէս Զաքարիաս, ոչ հաւատացեալ բանից հրեշտակին, եղեւ համբ եւ կայր պապանձեալ (տես Ղուկ. Ա. 20), նոյնպէս եւ այրս այս, անհաւատ եղեալ պատուրանաց փրկչին,

եւ անմաքուր վարուք սպասաւորէ երկնաւոր Հացին, պապանձի, զի ոչ ունի պատասխանի: Իսկ նորա այն՝ նշանի վասն, իսկ սորա՝ յաղագս պատժոց, վասն որոյ նորայն լուծաւ, իսկ սորայն ե՛ւս պնդեցաւ, քանզի ո՛չ գոյ այլ ինչ, որ կարկեցուցանէ զբերան եւ կապէ զձեռս եւ զոտս, որպէս մեղացն շղթայք՝ ըստ այնմ՝ «Ի գործս ձեռաց իրեանց կապեցին մեղաւորք» (Մաղմ. Թ. 17), որպէս ցուցանէ:

Յայնժամ ասէ թագաւորն ցապասաւորսն. «Կապեցէ՛ք զդորա զոյրս եւ զձեռս եւ հանէ՛ք զղա ի խաւարն արփաքին. անդ եղիցի լալ եւ կրճել արամանց (ԻԲ. 13):

Տեսանե՞ս, զի ո՛չ յառաջագոյն տանջէ, մինչեւ ինքն, որ մեղաւն, զվճիռն իւր հատանիցէ: Քանզի յորժամ պապանձեցաւ, ապա՛ «ասէ թագաւորն ցապասաւորսն»: Յորժամ զբարիսն շնորհէր, ինքն առանց միջնորդի գիրախուժիւնն կազմեաց եւ այժմ ի տանջանս սպասաւորաւք վարի՝ հրեշտակաւք, որպէս զի իմասցուք, թէ ի կամացն կեանք են՝ ըստ մարգարէին (սրբն Մաղմ. ԻԹ. 6), իսկ ի տանջելն՝ ի մէ՛նջ բռնադատի: «Կապեցէ՛ք զդորա զոյրս եւ զձեռս». «ոյրք»՝ զգնացս, իսկ «ձեռս»՝ զազդողական զաւրուժիւնն, զի յորժամ տանջէ Աստուած, այլ ո՛չ է ժամանակ գործելոյ կամ խորհելոյ աստ, նմանապէս եւ անդ՝ ըստ այնմ. «Գործել ոչ կարեմ, մտրանալ ամաչեմ» (Ղուկ. ԺԶ. 3):

Եւ ա՛յլ ազգ. կապել ձեռացն եւ ոտիցն՝ զշնորհաց առնումն նշանակէ եւ զպատկերին պարգեւն, զոր ետ առաջին եւ վերջին փչմամբն՝ ըստ այնմ, թէ՛ «Կտրեցէք զղա ի մէջ» (հմմտ. Մապրթ. ԻԴ. 51), զի որպէս ի մէջ կտրեալն անշարժ է, այսպէս եւ կապեալն, զի շնորհաւք նորա եմք, զինչ եւ իցեմք, զոր ի բաց առեալ զայն՝ զմարդն հանդերձ չարութեամբն խաւարին մատնէ, որպէս ասէ. «Եւ հանէք զղա ի խաւարն արփաքին, ուր լալ աչացն է եւ կրճել արամանց»: Յաղագս սոցա ասացեալ է յառաջագոյն, այլ աստ այնչափ, զի որպէս յաւուրս Նոյի ոչ միայն եբարձ զհոգին ի մարդկանէ վասն լինելոյ նոցա մարմին (սրբն Ծննդ. Զ. 3), այլեւ ջրով հեղեղեաց. այսպէս եւ յերկրորդն գալուստ ոչ միայն զիւրն առնու շնորհս, այլեւ ի խաւարն առաքէ եւ անբուժելի ցաւոցն՝ լալ աչացն եւ կրճել ատամանցն մատնէ: Են ոմանք, որ «խաւար» եւ «ծուխ» եւ «ցուրփ» զբանսարկուն ասեն եւ զդեւն, վասն զի խաւար է բանսարկուն, որ հալածեցաւ ի լուսոյն եւ ծուխ եղեւ կուրացուցիչ՝ մտաց մերոց, այս

է աչացն լալ, եւ ցուրտ՝ կրճել ատամանցն, այսինքն՝ պոռնկութեամբ եւ պէսպէս հայհոյութեամբ ցրտացուցին զմարմինս մեր. նոցա տանջանացն կցորդս առնէ, զորոց զկամսն կատարեցին:

Զի րագումք են կոչեցեալք եւ սակաւք ընտրեալք (ԻԲ. 14):

Հանգոյն (ինձ թուի) ուռկանին առակի ասացեալս, զի որպէս անդ հասարակ ի ծովէն ուռկանեցին եւ յետոյ հանեալ ի ցամաք՝ զբարի բարին յամանս ժողովեցին եւ զխոտանն ի բաց հանին, այսպէս եւ աստ: Զի թէպէտ ամենեքեան կոչեցան, բայց որք ի վերայ բարի կոչմանն հիման հաւատոյն զբարի գործս շինեցին ոսկի ընտիր եւ ակունս պատուականս (սրբն Ա. Կոր. Գ. 12), յըշտեմարանս երկնից հաւաքեցան եւ առագաստի հարսանեացն արժանաւորք գտան, սակաւքն, որք նեղ ճանապարհաւն ընթացան. իսկ յուրքն, որք ի լայնն փութացան, արտաքս ի բաց ընկեցան: Յորմէ փրկեսցէ զհաւատացեալսն անուան իւրոյ Քրիստոսն մեր եւ Աստուած եւ արժանաւորս արասցէ երկնաւոր առագաստին՝ մաքուր պատմուճանաւ մտանել ի հոգեւոր հարսանիսն ընդ բազմելոց անդ արդար հոգւոցն: Որում փառք եւ պատիւ ընդ Հաւր եւ Սուրբ Հոգւոյն այժմ եւ միշտ եւ յաւիտեանս յաւիտենից. ամէն:

ԳՐԻԳՈՐ ՏԱԹԵՒԱՅԻ

Նման է թագաւորութիւնն երկնից հարսանեաց (հմմտ. ԻԲ. 2):

Այս երեքտասան առակն է արքայութեան: Դէմք առակիս. նախ՝ առ հրէայս է, եւ ապա՝ առ հեթանոսս, եւ առ արդարս, եւ առ մեղաւորս: Եւ Ը. (8) իրս ուսուցանէ.

- Ա. Նախ՝ վասն հարսանեաց խաւսի:
 - Բ. Երկրորդ՝ վասն բազում կոչողաց:
 - Գ. Երրորդ՝ կոչեցելոց՝ հրէից եւ հեթանոսաց:
 - Դ. Չորրորդ՝ որք հրաժարեցան յուրութեամբ:
 - Ե. Հինգերորդ՝ որք անարժան մտին:
 - Զ. Վեցերորդ՝ պ[ա]տիժ մարմնական:
 - Է. Եւթներորդ՝ դատաստան քննութեան:
 - Ը. Ութերորդ՝ տանջանք յաւիտենից:
- Եւ տե՛ս զառաւել խնամս, զոր ունէր հրէիցն նախքան զխաչն, եւ յետ խաչին, եւ յայտ է յերից.

եւ անմաքուր վարուք սպասաւորէ երկնաւոր Հացին, պապանձի, զի ոչ ունի պատասխանի: Իսկ նորա այն՝ նշանի վասն, իսկ սորա՝ յաղագս պատժոց, վասն որոյ նորայն լուծաւ, իսկ սորայն ե՛ւս պնդեցաւ, քանզի ո՛չ գոյ այլ ինչ, որ կարկեցուցանէ զբերան եւ կապէ զձեռս եւ զոտս, որպէս մեղացն շղթայք՝ ըստ այնմ՝ «Ի գործս ձեռաց իրեանց կապեցին մեղաւորք» (Մաղմ. Թ. 17), որպէս ցուցանէ:

Յայնժամ ասէ թագաւորն ցապասաւորսն. «Կապեցէ՛ք զդորա զոքս եւ զձեռս եւ հանէ՛ք զղա ի խաւարն արփաքին. անդ եղիցի լալ եւ կրճել արամանց (ԻԲ. 13):

Տեսանե՛ս, զի ո՛չ յառաջագոյն տանջէ, մինչեւ ինքն, որ մեղաւն, զվճիռն իւր Հատանիցէ: Քանզի յորժամ պապանձեցաւ, ապա՛ «ասէ թագաւորն ցապասաւորսն»: Յորժամ զբարիսն շնորհէր, ինքն առանց միջնորդի զխրախուժիւնն կազմեաց եւ այժմ ի տանջանս սպասաւորաւք վարի՛ հրեշտակաւք, որպէս զի իմասցուք, թէ ի կամացն կեանք են՝ ըստ մարգարէին (սրբն Մաղմ. ԻԹ. 6), իսկ ի տանջելն՝ ի մէ՛նջ բռնադատի: «Կապեցէ՛ք զդորա զոքս եւ զձեռս». «ոքք»՝ զգնացս, իսկ «ձեռս»՝ զազդողական զաւրուժիւնն, զի յորժամ տանջէ Աստուած, այլ ո՛չ է ժամանակ գործելոյ կամ խորհելոյ աստ, նմանապէս եւ անդ՝ ըստ այնմ. «Գործել ոչ կարեմ, մտրանալ ամաչեմ» (Նուկ. ԺԶ. 3):

Եւ ա՛յլ ազգ. կապել ձեռացն եւ ոտիցն՝ զշնորհաց առնումն նշանակէ եւ զպատկերին պարգեւն, զոր ետ առաջին եւ վերջին փչմամբն՝ ըստ այնմ, թէ՛ «Կտրեցէք զղա ի մէջ» (հմմտ. Մապթ. ԻԴ. 51), զի որպէս ի մէջ կտրեալն անշարժ է, այսպէս եւ կապեալն, զի շնորհաւք նորա եմք, զինչ եւ իցեմք, զոր ի բաց առեալ զայն՝ զմարդն Հանդերձ չարութեամբն խաւարին մատնէ, որպէս ասէ. «Եւ հանէք զղա ի խաւարն արփաքին, ուր լալ աչացն է եւ կրճել արամանց»: Յաղագս սոցա ասացեալ է յառաջագոյն, այլ աստ այնչափ, զի որպէս յաւուրս Նոյի ոչ միայն եբարձ զհոգին ի մարդկանէ վասն լինելոյ նոցա մարմին (սրբն Ծննդ. Զ. 3), այլեւ ջրով հեղեղեաց. այսպէս եւ յերկրորդն զալուստ ոչ միայն զիւրն առնու շնորհս, այլեւ ի խաւարն առաքէ եւ անբուժելի ցաւոցն՝ լալ աչացն եւ կրճել ատամանցն մատնէ: Են ոմանք, որ «խաւար» եւ «ծուխ» եւ «ցուրփ» զբանսարկուն ասեն եւ զգեւսն, վասն զի խաւար է բանսարկուն, որ հալածեցաւ ի լուսոյն եւ ծուխ եղեւ կուրացուցիչ՝ մտաց մերոց, այս

է աչացն լալ, եւ ցուրտ՝ կրճել ատամանցն, այսինքն՝ պոռնկութեամբ եւ պէսպէս Հայհոյութեամբ ցրտացուցին զմարմինս մեր. նոցա տանջանացն կցորդս առնէ, զորոց զկամսն կատարեցին:

Զի րագումք են կոչեցեալք եւ սակաւք ընտրեալք (ԻԲ. 14):

Հանգոյն (ինձ թուի) ուռկանին առակի ասացեալս, զի որպէս անդ Հասարակ ի ծովէն ուռկանեցին եւ յետոյ Հանեալ ի ցամաք՝ զբարի բարին յամանս ժողովեցին եւ զխոտանն ի բաց Հանին, այսպէս եւ աստ: Զի թէպէտ ամենեքեան կոչեցան, բայց որք ի վերայ բարի կոչմանն հիման Հաւատոյն զբարի գործս շինեցին ոսկի ընտիր եւ ակունս պատուականս (սրբն Ա. Կոր. Գ. 12), յըշտեմարանս երկնից Հաւաքեցան եւ առագաստի Հարսանեացն արժանաւորք գտան, սակաւքն, որք նեղ ճանապարհաւն ընթացան. իսկ յողովքն, որք ի լայնն փութացան, արտաքս ի բաց ընկեցան: Յորմէ փրկեսցէ զհաւատացեալսն անուան իւրոյ Քրիստոսն մեր եւ Աստուած եւ արժանաւորս արասցէ երկնաւոր առագաստին՝ մաքուր պատմուճանաւ մտանել ի հոգեւոր Հարսանիսն ընդ բազմելոց անդ արդար հոգւոցն: Որում փառք եւ պատիւ ընդ Հաւր եւ Սուրբ Հոգւոյն այժմ եւ միշտ եւ յաւիտեանս յաւիտենից. ամէն:

ԳՐԻԳՈՐ ՏԱԹԵՒԱՅԻ

Նման է թագաւորութիւնն երկնից հարսանեաց (հմմտ. ԻԲ. 2):

Այս երեքտասան առակն է արքայութեան: Դէմք առակիս. նախ՝ առ հրէայս է, եւ ապա՝ առ հեթանոսս, եւ առ արդարս, եւ առ մեղաւորս: Եւ Ը. (8) իրս ուսուցանէ.

- Ա. Նախ՝ վասն Հարսանեաց խաւսի:
 - Բ. Երկրորդ՝ վասն բազում կոչողաց:
 - Գ. Երրորդ՝ կոչեցելոց՝ հրէից եւ հեթանոսաց:
 - Դ. Չորրորդ՝ որք հրաժարեցան յուլութեամբ:
 - Ե. Հինգերորդ՝ որք անարժան մտին:
 - Զ. Վեցերորդ՝ պ[ա]տիժ մարմնական:
 - Է. Եւթներորդ՝ գատաստան քննութեան:
 - Ը. Ութերորդ՝ տանջանք յաւիտենից:
- Եւ տե՛ս զառաւել խնամս, զոր ունէր հրէիցն նախքան զխաչն, եւ յետ խաչին, եւ յայտ է յերից.

Ա. Նախ՝ որ ետ զառաջին այգին:

Բ. Երկրորդ՝ ներեաց զյանցանս խաչին:

Գ. Երրորդ՝ կոչեաց ի Հարսանիս, եւ նոքա ամենայնի ապերախտ եղեն եւ հրաժարեցան.

Ա. Նախ՝ ի Հարսանեաց:

Բ. Երկրորդ՝ ի թագաւորութենէն:

Գ. Երրորդ՝ յՈրդոյ թագաւորին:

Դ. Չորրորդ՝ ի Հարսանութենէն:

Հարց. Վասն է՞ր «հարսանիք» կոչէ (ԻԲ. 2, 3 եւ այլք):

Պատասխանի. Երբեմն «գող» (Ղուկ. ԺԶ. 22-23) կոչէ վասն Հանգստեան, երբեմն՝ «ղրախտ» (Ղուկ. ԻԳ. 43) վասն վայելչութեան, երբեմն՝ արքայութիւն վասն պատուականութեան (տես Մարթ. Ե. 3) եւ այլին:

Եւ աստ «հարսանիք» կոչէ վասն չորից.

Ա. Նախ՝ վասն առաւել սիրոյ:

Բ. Երկրորդ՝ վասն պայծառութեան:

Գ. Երրորդ՝ վասն ուրախութեան:

Դ. Չորրորդ՝ վասն միաւորութեան, վասն որոյ «փեսայ» կոչէ զնա Յովաննէս (Յովհ. Գ. 29):

Հարց. Որպէ՞ս է միաւորութիւն անախտ Հարսանեաց:

Պատասխանի. Որպէս զանագանի լոյս ի խաւարէ եւ անուշ հոտ ի գարշութենէ:

Եւ յայտ է ի չորից.

Ա. Նախ՝ զի հոգեւոր է:

Բ. Երկրորդ՝ անապական:

Գ. Երրորդ՝ միշտ:

Դ. Չորրորդ՝ որքան յերկարի, առաւելու սէրն, իսկ այս ամենայնին ընդդէմ:

Այլեւ գերազանց է քան զհրեշտակաց միաւորութիւնն երիւք.

Ա. Նախ՝ անդ, որպէս տէր ընդ ծառայ, եւ աստ՝ որպէս գլուխ յանդամս միաւորի:

Բ. Երկրորդ՝ անդ այլ ընդ այլոյ, եւ աստ՝ ընդ բնութենակից միաւորի:

Գ. Երրորդ՝ զի Քրիստոսիւ ընդ Հաւր միաւորի եւ լինի Աստուածս ընդ Աստուած միացեալ, որպէս. «Ղու, Նայր, ի յիս, եւ նոքա ի մեզ իցն» (Յովհ. ԺԷ. 21) եւ այլն:

Եւ աստ չորս ինչ հարցանելի է.

Ա. Նախ՝ թէ որքա՞ն է Հարսանիք Քրիստոսի:

Բ. Երկրորդ՝ թէ ո՞ր լինի:

Գ. Երրորդ՝ թէ ե՞րբ:

Դ. Չորրորդ՝ վասն է՞ր Որդի միայն է փեսայ, եւ ոչ՝ Հայր կամ Հոգի:

Ա. Վասն առաջնոյն գիտելի է, զի Գ. (3) կերպիւ ասի «Հարսանիք».

ա. Նախ՝ այն, որ Բանն Աստուած միացաւ ի մարմնի:

բ. Երկրորդ՝ որ միացաւ հոգով ընդ եկեղեցի:

գ. Երրորդ՝ յորժամ յարուցանէ մարմնով:

Բ. Վասն երկրորդին. թէ ո՞ր, այսինքն՝ առաջինն՝ յարգանդի կուսին, միջինն՝ ի ստորինս Երուսաղէմ, վերջինն՝ ի վերինս Երուսաղէմ:

Գ. Վասն երրորդին. թէ՛ ե՞րբ. այսինքն՝ ի կէտ յղութեանն, եւ ի ժամ խաչին, եւ ի միւսանգամ գալուստն:

Դ. Եւ չորրորդն. թէ վասն է՞ր Որդի միայն է փեսայ:

Պատասխանի. Ասեմք վասն չորից.

ա. Նախ՝ զի Որդի միայն փեսայացաւ յարգանդի:

բ. Երկրորդ՝ Որդի միայն պսակեցաւ խաչիւ, ըստ Սողոմոնի. «Տեսէ՛ք զպսակն արքայի» (Երգ երգոց, Գ. 11) եւ այլն:

գ. Երրորդ՝ Որդի բխեաց զկողահոս աղբերն ուստի շինեցաւ եկեղեցի: Ջրովն սրբի, զարիւնն ըմպէ:

դ. Չորրորդ՝ Որդի էջ ի դժոխս վասն Հարսանեաց հոգւոց, եւ յորժամ յարեաւ նոքաւք, յայնժամ եղեւ Հարսանիք:

Ի յայս խորհուրդս յետ յարութեանն Գ. (3) աւր կաթողիկէք ոչ ընթեռնուս եւ Ն. (40) աւր ընդ մեզ է փեսայն. ոչ պահեմք սուգ:

Դարձեալ հարցումն, թէ՛ որպէ՞ս հարսնանայ եկեղեցի:

Ասեմք, թէ մկրտութիւն եւ դրոշմ նշան է Հարսին եւ մահն կոչումն է ի Հարսանիս, եւ յարութիւնն միաւորի ընդ փեսային:

Դարձեալ՝ այժմ հաւատով եմք հարսնացեալ եւ յետ մահու՝ յուսով եւ յետ յարութեան՝ սիրով միացեալ, որպէս ցուցաւ:

Իսկ թէ վասն է՞ր Քրիստոս «փեսայ» կոչի եւ եկեղեցի սուրբ՝ «հարսն», ասացեալ է ի Մեկնութիւնս Երգոյ երգոցն՝ գտցես եւ

¹ Չեռ. Գմր 1200. «Հարց. Վասն է՞ր փեսայ կոչի Քրիստոս: Պատասխանի. Վասն Ժ. (10) պատճառի: Նախ՝ զի գերագանց է եւ ջերմ սերն ընդ եկեղեցի, որ փեսայի առ

զմեղաւորս յիշեսցես առ Տէր:

հարսն: Երկրորդ՝ վասն առաւել միաւորութեանն, որ ասացաք: Երրորդ՝ միայն փեսայն է տէր հարսինն. եւ Քրիստոս միայն է Տէր եւ զլուխ եկեղեցւոյ, զի ունի զբնութիւնս մեր: Չորրորդ՝ միայն փեսայն է թագ եղեալ ի մէջ բազմութեան. եւ Քրիստոս միայն է թագաւոր անվախճան: Զինգերորդ՝ թագ դնէ եւ հարսինն հաւասար իւր. եւ Բանն Աստուած, ընդ բնութիւնս միանալով, եղեւ առեալն մարմինն...: Վեցերորդ՝ փեսայն ցանկայ միշտ զկատարումն կամացն, եւ Քրիստոս՝ զփրկութիւն մարդկան: Եւթներորդ՝ վասն որդեծնութեան լինի. եւ ծնաւ Քրիստոս զհաւատացեալս աւագանան: Ութերորդ՝ սերմանող է փեսայն. եւ Քրիստոս զբոլոր բարութիւնս սերմանեաց ի մեզ: Իններորդ՝ քաղցր է ծայն հարսինն փեսային, եւ լսէ նմա. եւ քաղցր է երգն եկեղեցւոյ Քրիստոսի, եւ տայ զխնդրելին: Տասներորդ՝ փեսայն թողութիւն զհայրն եւ զմայր եւ երթայ զհետ հարսինն Ադամայ. եւ Քրիստոս եթող անբաժանաբար զՄայրն ի յերկինս եւ զմայրն տրտմագին յեկեղեցի եւ եկն մարմնով ի մահ եւ հոգւով ի դժոխս եւ ազատեաց զհոգին մարդկան: Յաղագս այսր Փեսայ կոչի Քրիստոս», էջ 379ա:

«Չարց. Վասն է՞ր կոչի հարսն եկեղեցի սուրբ, որ ասէր Յովհաննէս. «Որ ունի հարսն, նա է փեսայ» (Յովհ. Գ. 29): Պատասխանի. եւ այս վասն ժ. (10) պատճառի: Նախ՝ որ փեսայն խաւսի զհարսն եւ երթայ առ նա. նոյնպէս Բանն Աստուած նախ սիրեաց զեկեղեցի եւ եկն յերկիր, ըստ այնմ՝ «Ոչ զի մեք սիրեցաք զնա, այլ նա նախ սիրեաց զմեզ» (Յովհ. Ա., Դ. 10), ասէ: Երկրորդ՝ զի զարդարեալ է հարսն զարդուք փեսային եւ եկեղեցի սուրբ զարդարեալ է աստուածային եւ մարդկային առաքիմութեամբն եւ ի նմանէ է զզեցեալ՝ ըստ այնմ. «Ցնծասցէ անծն իմ ի Տէր, զի զզեցաւ հարդերծ փրկութեան եւ պատմուճան ուրախութեան, որ հարսն զարդու զարդարեաց զիս» (Ես. ԿԱ. 10): Երրորդ՝ հարսինն նշան դնի եւ ապա՝ պսակ. նոյնպէս եւ եկեղեցւոյ. ինամախաւսք եկին մարգարէքն եւ առաքեալք, եւ նշանեցաւ հաւատովն եւ սրբեցաւ աւագանան աստ եւ կոչի յուսովն յետ մահու եւ պսակի սիրովն ի հանդերձեալն ընդ իմաստուն կուսանացն մտեալն յառազաստն: Չորրորդ՝ թագուհի կոչի հարսն, որ յար անուամբ ի թագաւորէն թագուհի եւ փեսայուհի: Այսպէս եւ եկեղեցի սուրբ ի Քրիստոսէ քրիստոնեա եւ ի փրկչէն փրկեալ կոչի: Զինգերորդ՝ մի է հարսն ի բազմութեանց եւ մի է ընդհանրական եկեղեցի սուրբ, որ ընդ ոլորտս տիեզերաց յառաջին մարդոյն մինչեւ վերջինն, որք հոգւով եւ հաւատով հարսնացան Քրիստոսի: Վեցերորդ՝ մի՛ է կամք եւ սիրտ եւ մարմին հարսինն ընդ փեսային եւ եկեղեցի սուրբ մի է կամաւք եւ հոգւով եւ մարմնով ընդ Քրիստոսի, այսու, զի ունի զմարմինն մեր եւ զհոգի եւ մի ենք ընդ նմա մեր մարմնով, նաեւ հոգւով, զի «որ միանայ ի Տէր, մի հոգի է», - ասէ առաքեալ: Նաեւ ըստ աստուածութեանն պատկեր ենք նմա: եւ յայտ է կատարեալ միաւորութիւնն ի ճաշակումն հաղորդութեան մարմնով եւ արեամբ, միանամք ի մարմին եւ ի հոգին Քրիստոսի. եւ զի Աստուծոյ է մարմին եւ արիւն, միաւորիմք ընդ աստուածութիւն նորա: Այսպէս կատարեալ միաւորութիւնն եկեղեցւոյ, որ ինքն ասաց. «Չա՛յր, դու յիս, եւ ես ի քեզ» (Յովհ. ժԷ. 21): Եւ նոքա ի մեզ իցեն, զի եղիցին կատարեալք ի մի: Եւթներորդ՝ կոյս է հարսն եւ կոյսն զանապական եւ զսուրբ լինելն եկեղեցւոյ նշանակ է: Ութերորդ՝ հարսն ցնծութեան է կոչումն, եւ դարձաւ սուզն եկեղեցւոյ յուրախութիւն Քրիստոսի, զի բարձաւ արտասուր յամենայն աչաց: Իններորդ՝ կրաւղ է սերման. եւ կրէ սուրբ եկեղեցի զամենայն սերմանս բարութեան ի Քրիստոսէ, որ ասացաւ: Տասներորդ՝ աճեցուցանէ հարսն. եւ եկեղեցի սուրբ միշտ աճէ ծննդեամբ, այլեւ աճէ արդեամբ զՃ.(100)աւորն, զԿ.(60)աւորն եւ զԼ.(30)աւորն պտղաբերեալ: Յաղագս այսորիկ հարսն կոչի եկեղեցի սուրբ, որ ի զիրս Երգոյ երգոցն», էջ 379բ:

ԼՈՒԾՔԱՆՔ

Հարց. Զի՞նչ է լուծք եզանց եւ ազարակն եւ այլ (տես՝ Ղուկ. ԺԴ. 16-24):

Պատասխանի. Հինգ լուծք եզանցն՝ Ե. (5) զգայութիւնս մեր մարմնոյ, զի կրկին է աչք եւ ականջք եւ այլն: Իսկ «ազարակն»՝ սէր աշխարհիս, ընչից, եւ հայրենեաց, եւ կինն՝ փափկութիւն մարմնոյ: Զայսցանէ ասէ Յոհաննէս կաթողիկէքն. «Յանկութիւն աչաց եւ ցանկութիւն մարմնոյ եւ ամբարաբաւանութիւն աստի կենաց» (Ա. Նովի. Բ. 16):

Ա. Նախ այս է միտքն՝ թէպէտ կարեւոր պատճառք լիցի, պարտ է զհոգեւոր գործն նախամեծար առնել, քան զմարմնոյն:

Բ. Երկրորդ՝ փոխանակ եզանց, ասէ. «Եզն պարարակք զենեալ են» (ԻԲ. 4) եւ վասն ազարակին՝ զարքայութիւնն, եւ փոխանակ կնոջն՝ հարսանիք խոստանայ:

ՎԱՍՆ ԿՈՉՈՂԱՅ

Հարց. Ո՞րք էին կոչողք հրէից:

Պատասխանի. Ա. Նախ՝ մարգարէքն ամենայն:

Բ. Երկրորդ՝ Յովաննէս:

Գ. Երրորդ՝ ինքն Քրիստոս. «Եկայք առ իս ամենայն աշխարեալք» (Իսմիր. Մարթ. ԺԱ. 28), ասէ:

Դ. Չորրորդ՝ առաքեալքն, որ յետ յարութեանն: Նոյնպէս եւ զհեթանոսս կոչեցին առ Քրիստոս:

Հարց. Այժմ մեզ ո՞վ է կոչող:

Պատասխանի. Չորեք դիմի է կոչնակք մեր:

Ա. Նախ՝ նոյն ինքն մարգարէից եւ առաքելոց եւ Աւետարանին սուրբ:

Բ. Երկրորդ՝ վարդապետք, քարոզք եւ մեկնիչք:

Գ. Երրորդ՝ հրեշտակք ծածկապէս:

Դ. Չորրորդ՝ ժամահարն, որ կոչէ զմեզ հանապազ ի հարսնաբանս սուրբ՝ ի տեղի ազաւթից եւ ի ճաշ:

Զի աստ մտաւք միաւորիմք, եւ յետ մահու՝ հոգով, եւ յետ յարութեան՝ բոլորիւ:

ՎԱՍՆ ԶԵՆՄԱՆՑ

Հարց. *Զի՞նչ է «ճաշն» եւ «ընթրիսն»* (ԻԲ. 4):

Պատասխանի. Աստ մարմնոյ եւ արեան ճաշակումն ճաշ կոչի, եւ անդ՝ ի հանդերձեալն՝ ընթրիս:

Հարց. *Զի՞նչ է «եզն պարարակ»* (ԻԲ. 4):

Պատասխանի. Մարդկութիւնն՝ Քրիստոսի պարարեալ աստուածութեամբն: Դարձեալ մարմինն, որ կերակրէ եւ արիւնն զմայլէ:

Հարց. *Վասն է՞ր բազմաւրինակի ասէ. «գուարակք իմ եւ պարարակք զենեալ են»* (ԻԲ. 4):

Պատասխանի. Երիւք տեսանի.

Ա. Նախ՝ զի ի բազում տեղիս պատարագի:

Բ. Երկրորդ՝ զի բազում աւուրս բաշխի:

Գ. Երրորդ՝ զի բազում աւգտութիւնն, որպէս մանանայն ըստ ախորժակացն, բազում որակս տայր, այսպէս ըստ կամաց բազում շահս շնորհէ կերողացն զնա:

Բարկացաւ թագաւորն եւ կոտորեաց (հմմտ. ԻԲ. 7):

Ա. Նախ՝ ցուցանէ, թէ բարկանայր վասն չհաւատալոյն ի Քրիստոս:

Բ. Երկրորդ՝ զի ինքն ել ի վրէժխնդիր ի ձեռն Տիտոսի եւ Վէսպրիանոսի: Յետ և. (40) ամի ելին յերուսաղէմ ի տաւնի Զատկին, եւ պաշարեցին եւ Զ. (6) բիւր սովով սատակէր ի քաղաքն, եւ ՃԻ. (120) բիւր՝ սրով, եւ Մ. (50) բիւր գերի վարեցին եւ զքաղաքն ի հիմանէ կործանեցին, որպէս պատմէ Յովսէպոս:

Հարց. *Վասն է՞ր յետ և. (40) ամի եւ ոչ անդէն առ խաչիւն:*

Պատասխանի. Ա. Նախ՝ զի ցուցցէ զերկայնատութիւնն իւր:

Բ. Երկրորդ՝ զի աղաւթեաց ի վերայ խաչողացն:

Գ. Երրորդ՝ զի ներեաց Հայր վասն Որդոյն, այլ ոչ վասն առաքելոցն. զԱտեփաննոս քարկոծեցին (տես Գործք Է. 57-59) եւ զՅակովբոս գլխատեցին (տես Գործք ԺԲ. 1-2) եւ արկին ձեռս յառաքեալս, վասն որոյ խնդրեաց վրէժս:

Յանցս ճանապարհաց (ԻԲ. 9)

Զհեթանոսաց ասէ, որք աղքատ եւ անարգ եւ անձանաւթք էին եւ զանազան չարեաց ճանապարհ եղեալ:

Իսկ «կոչելն» (հմմտ. ԻԲ. 9). նախ որ ի հաւատս կոչեցան եւ ապա ի զանազան աստիճանս, զոր բազմելն ցուցանէ:

Իսկ «մտնալ թագաւորն» (հմմտ. ԻԲ. 11)

Զգալն ի դատաստան: Ըստ Դանիէլի՝ «հինաւուրցն նստաւ» (Դանիէլ Է. 9), եւ Պաւղոս՝ «մուծցէ զանդրանիկն յաշխարհս» (Եբր. Ա. 6):

«Նայելն» քննելն է դատաստանաւ:

Եւ վասն հաւաքոց եւ գործոց

Հարց. *Վասն է՞ր ըստ հաւատոցն եւ գործս խնդրէ:*

Պատասխանի. Վասն Դ. (4) պատճառի.

Ա. Նախ՝ զի հաւատովք զշնորհն առնումք աստ, եւ գործովք՝ զփառքն:

Բ. Երկրորդ՝ հաւատովն կոչիմք եւ սրբիմք, եւ գործովք պահեմք զկոչումն եւ զսրբութիւն:

Գ. Երրորդ՝ գործքն տեսակ եւ կեանք է հաւատոյն, որպէս ասէ Յակոբոս. «Հաւաքք առանց գործոց մտեալ են» (Յակոբ Բ. 26):

Դ. Չորրորդ՝ հաւատքն ի հոգւոյն է մասն, եւ գործքն՝ ի մարմնոյն, զի այս է տեսականն, եւ գործնականն՝ ի մեզ կատարել:

Նոյնպէս եւ շնորհք եւ գործք, զի շնորհաւք կոչիմք, կոչիմք ի հաւատս կամ յաստիճանս, եւ ոչ ըստ արժանեաց եւ շնորհաւքն Աստուծոյ սրբիմք ի մեղաց, այլ գործաւք պահեմք զկոչումն եւ զսրբութիւնն, այլեւ գործաւքն շնորհացն Աստուծոյ երախտահատոյց լինիմք: Ապա թէ ոչ, չար գործաւք թշնամանեմք զշնորհքն եւ զտուողն:

Վասն հանդեմից (ԻԲ. 11)

Վեց իրս հարցանելի է.

Ա. Նախ՝ թէ զի՞նչ է հանդերձ հոգւոյ:

Պատասխանի. Որպէս գործք ձեռաց լինի հանդերձ մարմնոյ, այսպէս ամենայն գործք մեր հանդերձ է հոգւոյն:

Բ. Երկրորդ հարցումն. Վասն է՞ր ասի՝ «հանդերձ» (ԻԲ. 12):

Պատասխանի. Վասն չորից.

Ա. Նախ՝ որպէս զգեստն այլ է ի զգեցողէն, նոյնպէս այլ է գործն ի գործաւղէն:

Բ. Երկրորդ՝ փոփոխելի է, նոյնպէս եւ գործք:

Գ. Երրորդ՝ ծածկէ զմարմինն, եւ գործք՝ զհոգին:

Դ. Չորրորդ՝ հանդերձիւ ճանաչի մարդ, եւ գործովն՝ հոգին:

Երրորդ հարցումն. Որքա՞ն է հանդերձ հոգոյ:

Պատասխանի. Երեք, այսինքն՝ բնական, շնորհաց եւ փառաց: Բնական զմարմինս ունիմք ի ծնողաց, զշնորհացն ի յեկեղեցի, զփառացն ի հանդերձեալն: Այս յատուկ ընտրելոցն միայն:

Դարձեալ՝ բնական, պատահական եւ հատուցման, այս հասարակաց՝ չարեաց եւ բարեաց:

Չորրորդ հարցումն. Զի՞նչ է «հանդերձ հարսանեաց» (ԻԲ. 12):

Պատասխանի. Մարմնապէս երեք է, այսինքն՝ սպիտակ, եւ նոր, եւ ազգի ազգի գունով: Սուրբ Հոգոյն սպիտակ անմեղութիւնն է, որպէս ասէ Սողոմոն. «Եղիցի յամենայն ժամ հանդերձ քո սպիտակ» (հմմր. Ժ. 8):

Եւ զանազան գոյն՝ ազգի ազգի առաքինութիւնք, որպէս պահք, աղաւթք, ողորմութիւն, ճգնութիւն, մարտիրոսութիւն եւ այլն: Եւ նորն, զի նորոգիմք աւր ըստ աւրէ՝ յառաջեալ ի բարին:

Իսկ սեաւն եւ աղտեղի եւ հին ոչ է հանդերձ հարսանեաց, այսինքն՝ անզղջութիւն եւ սովորութիւն եւ յուսահատութիւն ի մեղս:

Հինգերորդ հարցումն. Զի՞նչ է հանդերձ այժմու հարսին:

Պատասխանի. Որպէս հարսին Դ. (4) հանդերձ է մարմնոյ եւ Գ. (3)՝ գլխոյն, այսպէս եւ հարսնացեալ եկեղեցի Գ. (3) առաքինութեամբ ծածկեն զհոգի, որ է հաւատ, յոյս եւ սէր: Եւ Դ. (4) առաքինութեամբ՝ զմարմին, որ է խոհեմութիւն, արիութիւն, ողջախոհութիւն եւ արդարութիւն, եւ այս է հանդերձ շնորհաց ի Բրիստոսէ. «Որք ի Բրիստոս մկրտեցարուք, գ-Բրիստոս զգեցեալ էք», ասէ (Գաղ. Գ. 27):

Վեցերորդ հարցումն. Զի՞նչ է հանդերձ փառաց ի հանդերձեալն:

Պատասխանի. Եւթն զարդ յարուցելոցն, այսինքն՝ երեք՝ հոգւոյն, որ է զէմ յանդիման՝ տեսութիւնն եւ անմոռացութիւնն եւ անտրտում ուրախութիւնն: Եւ Դ. (4)՝ զարդ մարմնոյ, այսինքն՝ անչարչարութիւնն, պայծառութիւնն, թեթեւութիւն, թափանցութիւն: Սոքա են է.(7)եկի շնորհք, զոր Ազամ կորոյս է.(7)եակ յանցանաւք եւ յարութեանն ըստանան ընտրեալքն, զորմէ ասէ Նայիր.

«Յնձացաւ անձն իմ ի Տէր, զի զգեցոյց ինձ հանդերձ փրկութեան եւ պարմունան ուրախութեան» (Ես. ԿԱ. 10) եւ այլն:

Այսքան վեց հարցումն վասն հանդերձին:

Հարց. Վասն է՞ր ասէ. «Եպես այր մի» (հմմր. ԻԲ. 11):

Պատասխանի. Երեք է տեսութիւնն.

Ա. Նախ՝ ցուցանէ առանձին քննութիւն լինել:

Բ. Երկրորդ՝ զի որոշող է չարութիւնն:

Գ. Երրորդ՝ ի մէջ եկեղեցոյ սակաւ են առանց գործոց:

Հարց. Վասն է՞ր ասէ «ընկեր» (ԻԲ. 12):

Պատասխանի. Ա. Նախ՝ ընկեր ես հաւատոց եւ ոչ գործոց:

Բ. Երկրորդ՝ չարին սատանայի ընկեր:

Գ. Երրորդ՝ ընկեր ես հրէից անհաւատից. նոքա հաւատս ոչ ունին եւ դու՝ գործս:

Եւ յայսմանէ յայտ է.

Ա. Նախ՝ զի յառաջ քան զաւր դատաստանին ոչ պատժէ, այլ նախ հարցանէ եւ ապա հատուցանէ:

Բ. Երկրորդ՝ նախ ինքն տայ զվճիռն, ըստ այնմ՝ «Զչարսն չարաւ կորուսցէ» (ԻԱ. 41):

«Եւ նա պապանձեցաւ» (ԻԲ. 12)

Ա. Նախ՝ յերկիւղէ թագաւորին:

Բ. Երկրորդ՝ զի ոչ գտանէ իրաւունս կամ պատճառ: Զայսմանէ ասէ՝ Բանք լուել եւ գործք թագաւորել: Տե՛ս, զի ոմանք պապանձին եւ ոմանք պատասխանեն. «Երբ փեսաք քաղցեալ» (Մապթ. ԻԵ. 37): Եւ ոմանք պատճառեն. «Այր խխար ես» (Մապթ. ԻԵ. 24) եւ այլն:

ՎԱՍՆ ՏԱՆՉԱՆԱՑ

Հարց. Զի՞նչ է «կապեցէք զձեռս եւ զոտս» (ԻԲ. 13):

Այն է, որ ասէ. «Ի գործս ձեռաց իրեանց կապեցին մեղաորք» (Մաղմ. Թ. 17): Եւ թէ՛ «Չոր կապիցէք յերկրի, եղիցի կապեալ յերկին» (Մապթ. ԺԶ. 19):

Եւ չորս ինչ ցուցանէ.

Ա. Նախ՝ թէ՛ յայնժամ անլոյծ կապի:

Բ. Երկրորդ՝ զի մի փոխիցէ եւ գործիցէ:

Գ. Երրորդ՝ զի ինքն կապեաց ընդդէմ բարւոյն. կապեցի ի բարեաց:

Դ. Չորրորդ՝ զի կապեաց ի մէղս, յիրաւի կապեցի ի պատիժս:

Հարց. Ջի՞նչ է «խաւարն արտաքին» (ԻԲ. 14):

Պատասխանի. Ա. Նախ՝ արտաքոյ է այսմ խաւարիս, որ է պակասութիւն, այլ այն խաւարն պակասութիւն է բարեաց:

Բ. Երկրորդ՝ զի արտաքոյ է այցելութեանն Աստուծոյ:

Գ. Երրորդ՝ զի խաւարն լինի յաւոյ, եւ այն՝ ի հրոյ:

Դ. Չորրորդ՝ այս խաւար՝ երբեք եւ ուրեք, եւ այն՝ միշտ եւ ամենեցուն:

Լալ աչաց եւ կրճել արամանց (ԻԲ. 13):

Ա. Նախ՝ ցուցանէ զգաժան, անժուժութիւն ցաւոցն:

Բ. Երկրորդ՝ զներքին եւ զարտաքին կիրք, խաւարն եւ լալ աչացն յայտնէ:

Գ. Երրորդ՝ ամենայն զգայութեանց տանջանք:

Դ. Չորրորդ՝ ի հորից տարեբացն տանջանք ցուցանէ:

Իսկ թէ, որպէս ջերմ եւ ցուրտ ի միասին տանջէ, ասացեալ է ի Չորրորդ մասին Ը. Համարն¹:

Հարց. Ջի՞նչ է «Բազումք կոչեցեալք եւ սակաւք ընտրեալք» (ԻԲ. 14): Իսկ առաքեալ ասէ. «Չորս կոչեաց, արդարացոյց եւ փառատր արար» (հմմտ. Առ Վոմ. Ը. 30):

Պատասխանի. Չորիւք տրամատի.

Ա. Ոմանք կոչին եւ ընտրին՝ հնազանդեալք, որպէս սուրբքն ամենայն: Բ. Ոմանք կոչին եւ ոչ ընտրին՝ չար կամաւք, որպէս հրեայք: Գ. Ոմանք ոչ կոչին եւ ընտրին՝ բարի կամաւք: Դ. Ոմանք ոչ կոչին եւ ոչ ընտրին, որպէս խոտեալք:

Արդ, առաքեալ զհնազանդեալսն ասէ, եւ Տէր՝ զհակառակեալս կամաւք:



¹ Տե՛ս ձեռ. Գ, Դ. հատոր, վասն դժոյցոյ, էջ 193ա:

ՎԱՍՆ ԹՉԵՆԻՈՅՆ

Մարթ. ԻԴ. 32-35

ՍՏԵՓԱՆՈՍ ՍԻՒՆԵՑԻ

«Ի թզենոյ անփի ուսարուք գառակն» (Մարթ. ԻԴ. 32):

«Թզենի» այժմ կամ զամենայն աշխարհս աւրինակեալ նշանակէ, որում կատարած լինել մարգարէանայ, կամ զամենայն մարդ, որ զնայ ըստ երանելի կենդանութեանն եւ ցանկա[յ] տեսանել զԲանն Աստուծոյ, զի ուրախացի, քանզի որպէս թզենիդ ի ձմերանի զաւրութեամբ ունի յինքեան զծաղկելն, նոյնպէս եւ առաքինութեամբ զարդարեալն՝ ի յանցաւոր յաշխարհիս. վասն զի դեռեւս չէ հասեալ աւետեաց պսակին, այլ յուսայ եւ որպէս ընդ հայէլի տեսանէ զբարիսն խոստացեալ. իսկ ի գալստեան արդար դատաւորին՝ յորժամ հասանէ աւետեացն, յայնժամ յայտնապէս եւ ոչ յուսով, որպէս թզենոյն պտուղն, որ ի ձմերանի աներեւոյթ է, իսկ յամարանի՝ երեւելի ամենեցուն:

Յորժամ նորայ ոստքն կակղացին եւ փերեն ցցուեսցի (հմմտ. ԻԴ. 32):

Մինչդեռ ձմեռային ժամանակ է, եւ ոստն խոստացեալ է, եւ տերեւն ոչ է ցցուեալ, իսկ յորժամ ի ձմերայնոյս յամառայինն երթայ, յայնժամ ոստքն կակղանան եւ ցցուին, նոյնպէս եւ որ յաշխարհէս յառնէ՝ ի խոսովութենէս յալեկոծեալ, ճանապարհորդէ ի խաղաղական յաւիտեանն. բերէ ոստս կակղացեալ՝ զսիրտն մարմնեղէն եւ ոչ քարեղէն տերեւս եւ ապա՝ պտուղ կատարեալ:

Ամէն ասեմ ձեզ՝ ոչ անցէ ազգս այս, մինչեւ այդ ամենայն եղիցի» (հմմտ. ԻԴ. 34):

«Ազգս այս» լսելի է, որպէս Նորոյ Կտակարանաց. Ազգս այս, ասէ, մի՛ անցցէ, եւ ոչ եկեսցէ յաւետիսն խոստացեալ, եթէ ոչ այդ ամենայն, զոր խաւսեցայդ, եղիցի, նեռինն դալուստն, կատարած եւ կորուստ ամենայն աշխարհիս այսորիկ ի լաւագոյն տեսակս:

ԱՐԻՍՏԱՎԷՍ ԵՒ ԵՓՐԵՄ

Ի թղենևոյ անտի ուսարուք, յորժամ իսկ եւ իսկ ոստքն նորա կակղանայցեն այլովքն հանդերձ, քանզի ասաց, թէ՛ «Վաղվաղակի յետ նեղութեան ատլրցն այնոցիկ]» (Մապթ. ԻԴ. 29): Եւ նոքա զայն խնդրէին, թէ՛ յետ որչափ ժամանակաց եւ զաւրն եւս ճշգրտիւ ցանկային լսել, վասն այնորիկ եւ զաւրինակ թղենևոյն ի միջի դնէ՝ յայտ արարեալ, թէ՛ ո՛չ բազում ժամանակք են¹ ի միջի, այլ անդրէն վաղվաղակի եւ գալուստն պատահիցի, զոր ոչ միայն առակաւս, այլեւ այլովք բանիւք, որ յետ սոցին է, գուշակեաց:

«Գիպասջիք,- ասէ,- զի մերձ է առ դուրս (հմմտ. ԻԴ. 33):

Այսու եւ այլ իմն ամառն հոգեւոր մարգարեանայ եւ ջեր[մ] եւ անքոյթ լինել յաւուրն յայնմիկ արդարոցն ի յայտնի ձմերայնոյն եւ մեղաւորացն՝ նմին հակառակ, ձմեռն յամարանին, զոր եւ յաջորդաւքն յայտ արար, թէ՛ մինչ գեռ ի բարեկենդանութեան² իցեն, հասանիցէ ի վերայ նոցա աւրն: Ո՛չ յայն սակս ինչ միայն եզ գառակ թղենևոյն, եզ ի միջի, զի զանջրպետութիւն ժամանակացն ցուցանիցէ, զոր մարթէր եւ այլազգ յայտ առնել, այլ զի գոնեայ այնու հաւատարիմ զբանն առնիցէ, թէ՛ արդար եւ այնպէս ելանելոց է ի գլուխ, որպէս եւ այսմ հարկ է լինել, նոյնպէս եւ այնմ:

Այլ դարձեալ վասն զի ի լուծանել զպատուիրան նախաստեղծին ճաշակմամբ պտղոյն, թղենևոյն սազարթիւքն ծածկէր զինքն առնթեր նորա գոլով, նշանակելով, թէ՛ զնովաւ աւձն թիւրապատեցաւ, զոր ու նախամայրն զնոյնս փածաւ ծածկոյթ մերկութեանն ի մերկանալ զփառսն: Վասն այնորիկ եւ զնա ցամաքեցոյց, ասելովն, թէ՛ «Մի՛ լիցի ի քեզ պտուղ յախրեան» (հմմտ. Մապթ. ԻԱ. 19): Այսինքն՝ ըստ յառաջին յանցանացն, որով մահ թագաւորեաց, արդ, յորժամ տեսանիցէք զնոյն չարութիւն, դարձեալ պտկեալ³ եւ դալարացեալ, գիտասջիք, թէ՛ մերձ է իմ գալուստն:

Ոչ,- ասէ,- անցցէ ազգս այս, մինչեւ այս ամենայն եղիցի (ԻԴ. 34):

Կ Որ երուսաղէմի վիշտքն պատերազմացն, սովոյն, ժանդիցն, սրոյն եւ սասանութեանն, սուտ Քրիստոսացն, սուտ մարգարէիցն

¹ Բ լիցից
² Բ բարեկեցութեան] բարեկենդանութեան
³ Ա պրկեալ] պտկեալ, Բ՛ պտկեալ

ընդ, բնաւս տարածանել Աւետարանիս ամբոխքն ու խոտովութիւնքն: Իսկ ասելովն, թէ՛ «ազգս այս». ո՛չ զնոցանէ, որ յայնժամն էին, ասէ, այլ զհաւատացելոցն: Քանզի գիտէ ազգ, ոչ¹ ի ժամանակացն միայն դրոշմել, այլեւ ի կրաւնիցն եւ յառաքինութեանն աւրինակ է: Դարձեալ ստէպ իմն զնոսա ի հաւատս յորդորէ:

«Երկինք եւ երկիր,- ասէ,- անցցին, եւ բանք իմ մի՛ անցցեն» (ԻԴ. 35):

Այսինքն՝ թէ՛ հաստատելոցդ եւ անշարժիցդ² դիւրին է³ եղծանել, եւ ոչ իմոց բանիցս ի գետին անգանել, միանգամայն իսկ եւ արարիչ ամենեցուն ցուցանէ զանձն, քանզի վասն կատարածին խաւսեցաւ յաղագս այնպիսիս իրաց, որում բազումք չհաւատացին. «Գերկինս եւ գերկիր» ի մէջ եբեր՝ զանբաւ զաւրութիւնն յայտարարեալ. «Ընդ բազում իշխանութեամբ ցուցանէ, թէ՛ Տէր է ամենայն երկրի» (հմմտ. Յուդիթ Բ. 5):

ԳՐԻԳՈՐ ՏԱԹԵՒԱՅԻ

Հարց. Վասն է՞ր ի թղենոյ ասէ զառակն:

Պատասխանի. Վասն Ժ. (10) պատճառի.

Ա. Նախ՝ զի յերուսաղէմ բազում են թղենիք, կամի յընդել իրացն բերել զաւրինակ, զի դիւրալուր լիցի բանքն:

Բ. Երկրորդ՝ զի ասաց վաղվաղակի յետ նեղութեան աւուրցն, եւ նոքա խնդրէին զժամանակն, թէ՛ ե՞րբ լինիցի, վասն որոյ զթղենին աւրինակ տայ վաղվաղակի գալստեանն յետ նեղութեան նեռինն, զի յետ ձմերան վաղվաղակի կանաչի:

Գ. Երրորդ՝ զի այլ իմն ամառն ցուցանէ արդարոցն, ի ձմերան՝ մեղաւորցն, եւ հակառակ նմին⁴ ձմեռն մեղաւորաց ի մէջ ամարան նոցա:

Դ. Չորրորդ՝ որպէս հարկիւ գայ ամառն յերեւել թղենոյն, այսպէս հարկիւ գայ Քրիստոս՝ յերեւել նեռին:

Ե. Հինգերորդ՝ որպէս թղենին ունի յինքեան զգաւրութիւն ծաղկելոյ, այլ պահէ ի ձմերանն մի[ն]չ ի գարունն, նոյնպէս եւ

¹ Ա որ] ոչ
² Ա անլուծիցդ] անշարժիցդ
³ Բ իցէ
⁴ Գ՛ լս. Գմից

արդարքն յաշխարհիս յայսմիկ, ոչ են հասեալ խոստացեալ պսակին, այլ յուսով ակն ունին, զի յորժամ հոգեւոր դարուեն լինի, պայծառասցին պսակաւք եւ պտղովք իմաստութեանն Աստուծոյ, որ միշտ հեղու ի նոսա:

Զ. Վեցերորդ՝ որպէս թղենին յինքեան ծածկեալ ունի զղալարութիւնն, զոր յետոյ յայտնի, նոյնպէս եւ սուրբք ի հոգիս իւրեանց ծածկեալ ունին զգործս բարիս, զոր յետոյ ի մարմինս իւրեանց յայտնեսցի:

է. Արդ, զայսոսիկ ամենայն ծառ ցուցանէ, եւ նշենին նախ ծաղկի, քան զթղենին, վասն որոյ եւթներորդ պատճառաւ աւրինակ տայ զթղենին, զի յորժամ մերկացան նախաստեղծն, թղենեալ ծածկեցան: Եւ կարծեմ, թէ արտաքոյ դրախտին ընդ թղենին թիւրապատեցաւ աւճն եւ պատրեաց զԵւայ, վասն որոյ Տէրն անէծ զթղենին՝ ասելով. «Մի լիցի այլ պտուղ ի քէն» (Մաթթ. ԻԱ. 21, հմմտ. Մարկ. ԺԱ. 14), այսինքն՝ խափանեսցի պատրանքն սատանայի, որ ի քէն եղեն: Ասէ՛ Յորժամ տեսանիցէք զնոյն թղենին դարձեալ դալարեալ ի ձեռն նեոխնն, յայնժամ լինիցի գալուստն Որդոյ Մարդոյ:

Ը. Ութերորդ՝ նախ տերեւն երեւի թղենոյն, եւ ապա՝ պտուղն: Նոյնպէս նեոն. նախ՝ զսաղարթն իւր արձակէ, որք են կարապետ նեոխնն, եւ յետոյ ինքն որպէս պտուղ կսկծեցուցանող, որ չարչարէ զսուրբս:

Թ. Իններորդ՝ որպէս զտապ ամարանոյ ի սիրոյն Աստուծոյ ցամաքեցուցանէ եւ քաղցր բանիւ հաւանեցուցանէ ի կամս իւր:

Ժ. Տասներորդ՝ որպէս զթղենին նախ անէծ, եւ յետոյ աւրինակ տայ, այսպէս նախ անէծ զմեղս եւ կարճեաց եւ յետոյ թանձրացաւ եւ զաւրացաւ ի մարդիկ, եւ գործք բարիք սպառեսցին, մինչ միայն աստուածապաշտութիւնն մնայ առ ոմանս, ըստ որում Որդի մարդոյ թերեւս գտցէ հաւատս յերկրի:

Իսկ որ ասէ. «Մերձ է ի դուրս» (ԻԴ. 33), ցուցանէ, թէ զհետ նեոխնն յանկարծակի երեւի գալուստն Քրիստոսի, որպէս գող ի տուն մտեալ եւ առ պահն տան տէրն ի դուրս հասեալ, ըմբռնէ զնա ի վնասն եւ սատակէ, այսպէս եւ Տէրն զնեոն առնէ, ըստ Պաւղոսի՝ «Ձոր Տէր Յիսուս սաբակեսցէ զնա» (Բ Թեսալ. Բ. 8): Եւ դառնալ, մինչ մեծամեծս բարբառէր եղջիւրն, որ է նեոն, բարձաւ գազանն եւ կորեաւ:

Այսքան առ այս:

Ոչ անցցէ ազգս այս (ԻԴ. 34):

Չորիւք իմանի.

Ա. Նախ՝ զազգն հրէից ասէ՛ ոչ անցցէ, մինչեւ կրեսցեն զայս ամենայն պատուհասս եւ զվիշտս Երուսաղէմի:

Բ. Երկրորդ՝ վասն առաքելոցն ասէ. ոչ անցցեն ամենեքեան, մինչեւ տեսցեն զկործանումն նոցա:

Գ. Երրորդ՝ վասն հաւատացելոցն ասէ, թէ յայսպիսի նեղութեանցս եւ վշտացս, որ գալոց են, ոչ կարեն անցուցանել եւ պակասիլ զնոսա, զի ոչ միայն լեզուաւ եւ ժամանակաւ է ազգն, այլեւ հաւատով եւ առաքինութեամբ ազգ կոչին:

Դ. Չորրորդ՝ նոյն ինքն ազգն հրէից մնայ մինչ ի գալուստ նեոխնն:

Երկինք եւ երկիր անցցն (ԻԴ. 35):

Ա. Նախ՝ վասն ճշմարտութեան եւ հաստատութեան¹ իւր բանին ասէ, թէ հնար է դոցայ անցանել, զոր Սողոմոն յատակն ասէ (Իսմաւր. ԺԹ. 7), եւ ոչ իմ բան ի յերկիր անկանել (Կրն՝ Մաթթ. ԻԴ. 35):

Բ. Երկրորդ՝ ցուցանէ զինքն Տէր եւ Արարիչ երկնի եւ երկրի, եւ փոփոխող:

Գ. Երրորդ՝ զայն ասէ «անցանել», որ նորոգութիւն ստանան՝ ըստ մարգարէին, թէ. «Եղիցի երկին նոր եւ երկիր նոր» (Ես. ԿԵ. 17):

Դ. Չորրորդ՝ զի ամենայն ստեղծական իր պարտի եւ զապակա՛նութիւն ստանալ, եւ զի ոչ անցանին դոքայ, իմ բանիւ, ասէ, մնան (հմմտ. Մաթթ. ԻԴ. 35, Մարկ. ԺԳ. 31, Դուկ. ԻԱ. 33):

Մարկ. ԺԳ 28-31

ԲԱՐՍԵՂ ՄԱՇԿԵՒՈՐՅԻ

Բայց դուք ի թզենոյ անքի ուսջիք գառակն, յորժամ փակաւ ոսպրն նորա կակղանայցեն, եւ փերել արձակիցի ի նմա, գիփէք, թէ մերձ է ամառն: Նոյնպէս եւ դուք, յորժամ փեսանիցէք զայս ամենայն եղեալ, գիփասջի՛ք, թէ մերձ է առ դուրս (Մարկ. ԺԳ. 28-29):

Նմանութիւնն թղենոյ մարգարէութիւնն է, տերեւն արձակեալ՝ է այժմու խաւսք, եւ ամառն մերձեալ՝ է աւր դատաստանին:

Յայնժամ ամենայն ծառ յայտնելոց է, զոր ունի ի ներքոյ, եթէ ի ներքոյ չորացեալ է, այրեն եւ եթէ դալար իցէ, բերեն յԵղեմ, որ է

¹ Գ հաստատութեան եւ ճշմարտութեան (Գ՝ ճշմարտութեան եւ հաստատութեան)

զրախտն: Եւ տնկեն ընդ հովանեաւ ծառոյն կենաց, քանզի տերեւ այն ծառոյն է բան փրկութեան մարդկան, որ ասելոց է. «Եկայք աւրհնեալք Հաւր իմոյ» (Մաթթ. ԻԵ. 34):

Յորժամ թզենւոյն տերեւն ցցուի, «գիպէք, թէ մերձ է ամառն»: Այսպէս եւ յորժամ տեսանիցէք զայս, զոր ինչ գրեալ է, մի՛ կարծէք, թէ առ ժամայն կատարումն է, այլ իբրեւ զկարապետս, որ գան յառաջ, ցուցանեն, թէ մերձ է կատարումն աշխարհիս:

Դարձեալ՝ ոչ միայն յայն սակս ինչ էած ի մէջ զառակիս, զի գանջրպետութիւնն ժամանակացն ցուցանիցէ, այլ զի գոնէ այնուհաւատարիմ զբանն առնիցէ, թէ արդարեւ այնպէս ելանելոց է ի գլուխ:

Դարձեալ՝ զի ի լուծանել նախաստեղծին զպատուիրանն, որով աւտարացաւ յԱստուծոյ, թզենւոյն սաղարթիւք զինքն ծածկէր, զոր խորհրդապէս յաւրինակ մեղացն չորացոյց Տէրն:

Արդ, այժմ ասէ, թէ յորժամ զնոյն չարութիւն պտկեալ տեսանիցէք, այսինքն՝ ի բաց քարչեալ զմարդիկ յԱստուծոյ եւ ծածկեալ հեշտութեամբ մեղացն, որպէս յառաջ տերեւով թզենւոյն ի յայնպիսի անաւրէնութեան բազմանալն իմացիք, թէ մերձ է գալուստն, որպէս յայլուր ասաց. «Որդի մարդոյ եկեալ՝ գտցէ հաւատս յերկրի» (Ղուկ. ԺԸ. 8), զի գործքն ամենեւին սպառեալ լինին, եւ հազիւ թէ գտանիցի ուրեք հաւատք, զի սատանայ յորժամ իմանայ զմերձիլ գալստեանն, առաւել կատաղի արկանել զմարդիկ ի չարիս եւ խոտորեցուցանել յԱստուծոյ, սակայն ոչ յերկարի, այլ արագ ի վերայ գայ կատարածն, ըստ առակիս, զոր ի մէջ էած: Դարձեալ՝ այս թզենի աւրինակէ զժողովարանն, ընդ որ գալով առ նա, Տէրն մեր ոչ եգիտ պտուղ ի նմա, բայց միայն տերեւ, զի չունէր պտուղ իրաւանց եւ դատապարտեցաւ յաւիտենական ամլութեամբ, այլ կուրութիւնն փոքր ի շատէ եղեւ Իսրայէլի, մինչեւ լրումն հեթանոսաց մտցէ եւ ապա ամենայն Իսրայէլ կեցցէ. «Ճառն թզենի»՝ հրէիցն ժողովարանն, որ երկար եկաց ցամաք եւ անպտուղ, «փայ պտուղ»՝ զոր ուրացաւ:

Վասն որոյ ասէ Յոր. «Զի գոյ յոյս ծառոյ, զի թէպէտ եւ կտրեսցի ի հոտոյ ջրոյ, դարձեալ ծաղկեսցի» (հմմտ. Յոր ԺԴ. 7):

Յորժամ փեսանիցէք զայս ամենայն եղեալ, գիպասջիք, թէ մերձ է աւր դափաստանին: Ամէն ասեմ ձեզ, թէ ոչ անցցէ ազգս այս, մինչ-

չեւ այս ամենայն եղիցի: Երկինք եւ երկիր անցցեն, եւ բանք իմ ոչ անցանիցեն (ԺԳ. 29-31):

«Ազգ» զհաւատացեալսն կոչէ, ըստ այնմ, զի ոչ յաղթեցան՝ ոչ ի սովոյ, ոչ ի սրոյ, ոչ ի մահուանէ (Կրնս Հոռմ. Ը. 35-39) եւ ոչ ի սուտ Քրիստոսէն, եւ ոչ ի մարգարէիցն ստոց, եւ ոչ կորնչին մինչեւ այսն ամենայն կատարի: Վասն որոյ յերկրորդ գալստեանն բազում եւ անթիւ գտանին հաւատացեալք, որք համբերեն նեղութեանց վասն Քրիստոսի:

Դարձեալ՝ «ազգ» ասէ զամենայն ազգ մարդկան, եւս առաւել՝ զհրէիցն, ասէ ժողովողն. «Ազգ գայ եւ ազգ երթայ, եւ երկիր յաւիտեան կայ» (Ժող. Ա. 4): Նոյնպէս եւ «Երկինք եւ երկիր անցցեն»՝ ըստ արտաքին պատկերի կերպարանացն, եւ մնան յամենայն ժամանակս ըստ բնութեանն:

Դարձեալ՝ «երկին» ասէ զաւղս, վասն որոյ թռչունք, որ յաւղս, «թռչունք երկնից» կոչին:

Ասէ Պետրոս, թէ՛ «Երբեմն աշխարհ ջրհեղեղաւ ապականեալ կորեաւ, եւ այժմ երկինք եւ երկիր նովին բանիւ գանձեալ կան՝ հրոյ պահեալք» (Բ Պետր. Գ. 6-7):

Ցուցանէ յայտնապէս, թէ այլ երկինք ոչ անցանի հրով, այլ այն, որ կորեաւ ջրով:

Զի այն երկին, որ դատարկ է յաստեղաց եւ լի ամպովք, նա է անցանելոց եւ ոչ այն, որ աստեղաւք մոլորականաւք եւ անմոլորիւք զարդարեալ է: Զուր հեղեղին միայն հնգետասան կանգուն բարձրացաւ, քան զբարձրութիւն լերանց, եւ ոչ անց մինչեւ ի սահմանս, ուր միաբանի հուրն եւ աւղն: Նոյնպէս եւ հուրն ոչ բարձրանայ աւելի, քան զոր բարձրացաւն ջուրն, զի վարդապետք ասեն, թէ՛ «Մաքրելոց է աւղն մինչեւ ցայն վայր, ուր ելեալ է ծուխ զոհիցն»:

«Երկինք եւ երկիր անցցեն». դարձեալ՝ անմարմինք են երկինքն եւ հրեշտակք, եւ դեւք, եւ հոգիք մարդկան եւ ոչ անցանեն յաւիտեան: Եւ հուրն եւ աւղ, եւ ջուր, եւ երկիր ոչ անցանեն, սակայն ոչ ջեռուցանեն եւ ոչ ցրտուցանեն, ոչ բուսուցանեն եւ ոչ աճեցուցանեն, այլ մնան անկիրք եւ անգործ:

Մարմինք մարդկան նորոգին եւ մնան յաւիտեան եւ անվախճան, անասունք եւ զեռունք եւ թռչունք խափանին, եւ ծառք անցանեն եւ կորնչին եւ խառնին ի տարերս, ուստի գոյացան: Արեգակն եւ լուսին եւ աստեղք լուծանին եւ անցանեն յիւրեանց

զրախտն: Եւ տնկեն ընդ հովանեաւ ծառոյն կենաց, քանզի տերեւ այն ծառոյն է բան փրկութեան մարդկան, որ ասելոց է. «Եկայք աւրհնեալք Հաւր իմոյ» (Մաթթ. ԻԵ. 34):

Յորժամ թղենւոյն տերեւն ցցուի, «գիպէք, թէ մերձ է ամառն»: Այսպէս եւ յորժամ տեսանիցէք զայս, զոր ինչ գրեալ է, մի՛ կարծէք, թէ առ ժամայն կատարումն է, այլ իբրեւ զկարապետս, որ գան յառաջ, ցուցանեն, թէ մերձ է կատարումն աշխարհիս:

Դարձեալ՝ ոչ միայն յայն սակս ինչ էա՞ծ ի մէջ զառակիս, զի գանջրպետութիւնն ժամանակացն ցուցանիցէ, այլ զի գոնէ այնուհաւատարիմ զբանն առնիցէ, թէ արդարեւ այնպէս ելանելոց է ի գլուխ:

Դարձեալ՝ զի ի լուծանել նախաստեղծին զպատուիրանն, որով աւտարացաւ յԱստուծոյ, թղենւոյն սաղարթիւք զինքն ծածկէր, զոր խորհրդապէս յաւրինակ մեղացն չորացոյց Տէրն:

Արդ, այժմ ասէ, թէ յորժամ զնոյն չարութիւն պտկեալ տեսանիցէք, յայսինքն՝ ի բաց քարչեալ զմարդիկ յԱստուծոյ եւ ծածկեալ հեշտութեամբ մեղացն, որպէս յառաջ տերեւով թղենւոյն ի յայնպիսի անաւրէնութեան բազմանալն իմացիք, թէ մերձ է գալուստն, որպէս յայլուր ասաց. «Որդի մարդոյ եկեալ՝ գտցէ հաւատս յերկրի» (Ղուկ. ԺԸ. 8), զի գործքն ամենեւին սպառեալ լինին, եւ հազիւ թէ գտանիցի ուրեք հաւատք, զի սատանայ յորժամ իմանայ զմերձիլ գալստեանն, առաւել կատաղի արկանել զմարդիկ ի չարիս եւ խոտորեցուցանել յԱստուծոյ, սակայն ոչ յերկարի, այլ արագ ի վերայ գայ կատարածն, ըստ առակիս, զոր ի մէջ էա՞ծ: Դարձեալ՝ այս թղենի աւրինակէ զժողովարանն, ընդ որ գալով առ նա, Տէրն մեր ոչ եզիտ պտուղ ի նմա, բայց միայն տերեւ, զի չունէր պտուղ իրաւանց եւ դատապարտեցաւ յաւիտենական ամլութեամբ, այլ կուրութիւնն փոքր ի շատէ եղեւ Իսրայէլի, մինչեւ լրումն հեթանոսաց մտցէ եւ ապա ամենայն Իսրայէլ կեցցէ. «ժառն թզենի»՝ հրէիցն ժողովարանն, որ երկար եկաց ցամաք եւ անպտուղ, «սրայ պտուղ»՝ զոր ուրացաւ:

Վասն որոյ ասէ Յոր. «Զի գոյ յոյս ծառոյ, զի թէպէտ եւ կտրեսցի ի հոտոյ ջրոյ, գարձեալ ծաղկեսցի» (հմմտ. Յոր ԺԴ. 7):

Յորժամ փեսանիցէք զայս ամենայն եղեալ, գիպասչիք, թէ մերձ է ար դարաստանին: Ամէն ասեմ ձեզ, թէ ոչ անցցէ ազգս այս, մինչ

ջեւ այս ամենայն եղիցի: Երկինք եւ երկիր անցցեն, եւ քանք իմ ոչ անցանիցեն (ԺԳ. 29-31):

«Ազգ» զհաւատացեալսն կոչէ, ըստ այնմ, զի ոչ յաղթեցան՝ ոչ ի սովոյ, ոչ ի սրոյ, ոչ ի մահուանէ (Կրն՝ Վոմ. Ը. 35-39) եւ ոչ ի սուտ Քրիստոսէն, եւ ոչ ի մարգարէիցն ստոց, եւ ոչ կորնչին մինչեւ այսն ամենայն կատարի: Վասն որոյ յերկրորդ գալստեանն բազում եւ անթիւ գտանին հաւատացեալք, որք համբերեն նեղութեանց վասն Քրիստոսի:

Դարձեալ՝ «ազգ» ասէ զամենայն ազգ մարդկան, եւս առաւել՝ զհրէիցն, ասէ ժողովողն. «Ազգ գայ եւ ազգ երթայ, եւ երկիր յաւիտեան կայ» (Ժող. Ա. 4): Նոյնպէս եւ «Երկինք եւ երկիր անցցեն»՝ ըստ արտաքին պատկերի կերպարանացն, եւ մնան յամենայն ժամանակս ըստ բնութեանն:

Դարձեալ՝ «երկին» ասէ զաւղս, վասն որոյ թռչունք, որ յաւղս, «թռչունք երկնից» կոչին:

Ասէ Պետրոս, թէ՛ «Երբեմն աշխարհ ջրհեղեղաւ ապականեալ կորեաւ, եւ այժմ երկինք եւ երկիր նովին բանիւ գանձեալ կան՝ հրոյ պահեալք» (Բ Պետր. Գ. 6-7):

Յուցանէ յայտնապէս, թէ այլ երկինք ոչ անցանի հրով, այլ այն, որ կորեաւ ջրով:

Զի այն երկին, որ դատարկ է յաստեղաց եւ լի ամպովք, նա է անցանելոց եւ ոչ այն, որ աստեղաւք մոլորականաւք եւ անմոլորիւք զարդարեալ է: Զուր հեղեղին միայն հնգետասան կանգուն բարձրացաւ, քան զբարձրութիւն լեռանց, եւ ոչ անց մինչեւ ի սահմանս, ուր միաբանի հուրն եւ աւղն: Նոյնպէս եւ հուրն ոչ բարձրանայ աւելի, քան զոր բարձրացաւն ջուրն, զի վարդապետք ասեն, թէ՛ «Մաքրելոց է աւղն մինչեւ ցայն վայր, ուր ելեալ է ծուխ զոհիցն»:

«Երկինք եւ երկիր անցցեն». դարձեալ՝ անմարմինք են երկինքն եւ հրեշտակք, եւ դեւք, եւ հոգիք մարդկան եւ ոչ անցանեն յաւիտեան: Եւ հուրն եւ աւղ, եւ ջուր, եւ երկիր ոչ անցանեն, սակայն ոչ ջեռուցանեն եւ ոչ ցրտուցանեն, ոչ բուսուցանեն եւ ոչ աճեցուցանեն, այլ մնան անկիրք եւ անգործ:

Մարմինք մարդկան նորոգին եւ մնան յաւիտեան եւ անվախճան, անասունք եւ զեռունք եւ թռչունք խափանին, եւ ծառք անցանեն եւ կորնչին եւ խառնին ի տարերս, ուստի գոյացան: Արեգակն եւ լուսին եւ աստեղք լուծանին եւ անցանեն յիւրեանց

երեւակայութենէն եւ դառնան ի լոյսն յայն, յորմէ շինեցան եւ ստեղծան ի սկզբանն, զի լոյս իւրեանց դառնայ ի լոյսն, եւ մարմինք իւրեանց յայն, յորմէ շինեցան:

«Եւ րանք իմ ոչ անցանիցեն». այսինքն՝ Հանգիստ եւ փառք արդարոցն եւ արքայութիւնն երկնից անանցանելի մնան յաւիտեան, նոյնպէս եւ տանջանք մեղաւորացն, զոր պատմեաց, եւ գեհնն սատանայի ոչ անցանեն, եւ այլ ամենայն բանքն, զոր ասաց վասն Հանգերձելոցն, անանցանելի մնան:

«Երկինք եւ երկիր անցցեն». ոչ զի անցանեն, ասէ, այլ ցուցանէ, թէ դիւրին է, զի սոքա անցանեն, որք անշարժք եւ մնացականք, քան թէ անկանի մին յայսցանէ ասացելոցս:

Ղուկ. ԺԳ. 29-33

ՍԱՐԳԻՍ ԿՈՒՆԴ

Ասաց եւ առակ մի նոցա. Տեսէք զթզենիդ: Յորժամ ոստքն կակղանայ եւ փերեւն ցցուի (հմմտ. Ղուկ., ԻԱ. 29-30):

ԿՐ Վասնզի յանցանել նախաստեղծին զպատուիրանաւն թզենոյն սաղարթովն ծածկէր զմերկութիւն[ն], որ աւճն պատեցաւ: Արդ, մի՛ լիցի ի քեզ պտուղ յաւիտեան, որ մահացաւ մարդկան ազգ: Քանզի եկի, զի խաչիւ եւ լեղոյն ճաշակմամբն ջնջուամ մեղաց ար[ար]ից՝ առ ի դարձուցանել զազգ[ս] մարդկան ի կռապաշտութենէ զիւաց, զոր աւտարացոյց ի դրախտէն ազգի ազգի չարիւք եւ գրաւեաց զմարդիկ: Արդ՝ զկնի իմոյ գալստեանս մի՛ լիցի ի քեզ այնպիսի պտուղ: Եւ թզենոյն ցամաքութեամբն զզիւական պաշտաւնն ցամաքեցոյց:

Յորժամ փեսանիցէք, զի ոստքն կակղանայ, ճանաչէք թէ մերձ է ամառն (ԻԱ. 30):

Յորժամ տեսանէք զթզենիդ սաղարթաւորեալ կրկին անգամ, այսինքն՝ զայսպիսի պտուղ՝ զկռապաշտութեան ընձուղեալ ի մարդիկ:

ՍՊ. Եւ դարձեալ. ի նոյն կռապաշտութեան պատրէ զմարդիկ խաբող առաջին նշանաւք՝ ստաւք:

ՍՏ Քանզի թզենի եւ այլ ծառք ի ձմերանի խոտացեալ ոստքն ո՛չ ունին զաւրութիւն կակղանալոյ՝ ոստաւք ցուցանել ծաղիկ:

Նոյնպէս եւ առաքինիքն յաշխարհի, վասն զի ո՛չ են հասեալ աւետեաց պսակին, այլ յուսով որպէս ընդ հայելի տեսանեն զբարինս խոստացեալ: Իսկ ի մերձիլ ամարանին կակղանայ եւ ցցուի:

Նոյնպէս եւ դուք, յորժամ փեսանէք զայս ամենայն եղեալ, գիտասօժիք, թէ մերձ է արքայութիւն Աստուծոյ (ԻԱ. 31):

Արդ, ի գալ արդար դատաւորին հասանեն պսակին յայտնապէս, եւ [ի] յառնել խռովութեանց աշխարհիս՝ ի խաղաղ նաւահանգիստն յաւիտեանական ճոխանան: Եւ կակղանայ քարացեալ սիրտ մարմնեղէն, եւ ցուցանեն գոյնս գոյնս ծաղկաց, որ փթթին վայելչացեալ գեղեցկապէս, եւ պտուղս կատարեալս ըստ զանազան առաքինութեանց, որ վաստակեցին ի սակաւ ժամանակ կենցաղոյս:

Ոչ անցցէ ազգս այս, մինչեւ այս ամենայն եղիցի (ԻԱ. 32):

ԿՐ Թէպէտ զվիշտս եւ զնեղութիւնս հրէիցն ի ձեռն սովոյ եւ սրոյ, գերութեամբ ի Տիտոսէ եցոյց (տնն Բ. Մակար. ԺԱ. 1-38), այլ առաւել զյիտին ժամանակացն ասէ, որ կրելոցն են ի նեռնէն, զի հաւանեալքն նմա զանհնարին տանջանսն կրեն: Զի որպէս ընդ առաքելոցն ասաց Քրիստոս. «Մինչ ի կատարած աշխարհի» (Մակար. ԻԸ. 20) լինել զինքն իմանի եւ որք ի նոցանէ աշակերտեալք են: Այսպէս եւ՝ ըստ մեղաւորացն Հետեւմանց: Արդ՝ մեղաւորք՝ ազգացն զիւաց եւ այլ մոլորութեանց միեւնոյն ազգ ասաց: Արդարեւ ո՛չ անցանէ ազգ մարդկային ընողընանս մինչ ի գալուստն Քրիստոսի, յորում առհասարակ փոփոխին արարածք ամենայն:

ՍՊ. Կամ ազգս այս ասի Նոր Կտակարանս. «Մի՛ անցցէ, մինչեւ եկեսցէ աւետիսն խոստացեալ» (հմմտ. Եբր. Զ. 13): Եւ ամենայն, զոր ասաց, ի նեռինն գալուստն է եւ ի կատարածի աշխարհիս: Եւ կորուստ այսորիկ ի լաւագոյն տեսակս փոխել՝ նորոյ երկնի եւ նորոյ երկրի:

Երկինք եւ երկիր անցցեն, եւ րանք իմ մի՛ անց[անիցեն] (ԻԱ. 33):

ԿՐ Զերկինս եւ զերկիր եցոյց, ըստ արարածոց գոլոյն փոփոխումն առնուլ, գոյացուցիչն երկնի եւ երկրի: Իսկ աստուածային բանիցն ո՛չ եւս անցանել, որ արար զնա, զի ո՛չ ընդ նիւթականաց գրաւի:

ՏԱՆՈՒՏԷՐ ՈՒ ՏՆՏԵՍ

Մարթ. ԻԴ. 42-51

ՍՏԵՓԱՆՈՍ ՍԻԲՆԵՑԻ

Արթուն լերուք, [զի] ոչ գիտէք յորում ժամու Տէրն ձեր գայ (ԻԴ. 42):

Զայս ոչ միայն վասն կատարածի աշխարհիս ասաց, այլ եւ վասն կատարածի իւրաքանչիւր մարդկան. «արթուն լերուք» գործովք բարւոք, զի ոչ գիտէք զաւր վախճանի ձերոյ, յորժամ կոչէ Տէրն ձեր զողիդ ի մարմնոյդ:

Ո՛վ իցէ արդեւք ծառայ հաւաքարիմ եւ իմաստուն (հմմտ. ԻԴ. 45):

Հաւատք եւ իմաստութիւն, յորժամ որպէս առաքինութիւն տեսանի, զհետ երթան միմեանց, այսինքն՝ Հաւատարիմն եւ իմաստութիւնն. եւ որ իմաստուն, նաեւ Հաւատարիմ. իսկ որ ունի զիմաստութիւնն որպէս խորամանկութիւն, մարթի ոչ Հաւատարիմ լինել այնպիսոյն, որք են իմաստունք հանգոյն աւձին եւ տնտեսին անիրաւութեան. արդ, որ Հաւատարիմ է եւ իմաստուն, որպէս Պաւղոս եւ Պետրոս եւ նոցին նմանողք, որք տային զկերակուր զվարդապետութիւնս իւրեանց ի ժամու արժանաւորաց, զայնպիսի ծառայս իւր, զոր կացոյց ի վերայ տան իւրոյ աշխարհիս, եկեալ Քրիստոս ի գալստեան իւրում, երանելիս ցուցանէ:

Իսկ եթէ ասիցէ ծառայն չար ի սրբի իւրում (հմմտ. ԻԴ. 48):

Ապա եթէ ոչ իցէ ծառայն «իմաստուն եւ հաւաքարիմ», այլ չար եւ յիմար, եւ արասցէ չարութեան եւ յիմարութեան գործս, եկեալ Տէր, յերկուս հատցէ զնա:

ԱՐԻՍՏԱԿԷՍ ԵՒ ԵՓՐԵՄ

Արթուն լերուք, զի ոչ գիտէք (հմմտ. ԻԴ. 42):

Ոչ ասաց, թէ՛ «Ոչ գիտեմ», այլ թէ՛ «Ոչ գիտէք»¹, քանզի կասկածագոյնս կամի լինել նոցա ցանկ, յայտարարեալ, թէ նմին իրի չասաց, նոցա զայն:

Զայս գիտասօիք. եթէ գիտէր փանուրէրն՝ յորում պահու գող գայ, հսկէր եւ չփայր ական հաւրանել (հմմտ. ԻԴ. 43):

Յայն սակս չասաց² զաւրն եւ զժամ, զի արթունք լինիցին. «Յորժամ չունիցիք,- ասէ,- ական, յայնժամ,- ասէ, - եկեսցէ»: Եւ զոր ասեն այսպիսի ինչ է, թէ գիտէին բազումք, թէ երբ մեռանիցին, ընդ այն ժամանակս եւեթ պնդէին, վասն որոյ եւ զիւրաքանչիւր վաղճան կենաց անյայտ արար: Եւ թուի ինձ, թէ եւ զծոյլսն պատկառեցուցանէ, թէ ո՞րչափ ընչիցն փոյթ անձին ունին կասկածք³ ի գողոցն, եւ այնչափ եւս անգամ չտանին դարման ոգւոց իւրեանց, նոքա յորժամ կասկածիցեն, հսկեն եւ չտան ինչ ի ներքուստ գողոցն հանել: Եւ դուք, թէպէտ եւ գիտէք, զի գալոց է, եւ արդարեւ իսկ գալոց է, եւ չկայք արթունք եւ չլինիք պատրաստականք, այլ անպատրաստ գնալ աստի, վասն այնորիկ⁴ ի սատակումն քնէածիցն⁵ գալոց է աւրն: Զոր աւրինակ եւ նա, թէ գիտէր, փախչէր, նոյնպէս եւ դուք, թէ [է]իք պատրաստք, ապրէիք: Եւ քանզի զգատաստանէն յուշ արար, այնուհետեւ առ վարդապետս շրջէ զբանն եւ զտանջանաց եւ զպատուոց խաւսի:

«Ո՛վ իցէ, - ասէ, - հաւաքարիմ ծառայ եւ իմաստուն, զոր կացուցէ փէր ի վերայ փան իւրոյ» (ԻԴ. 45):

Եւ զայս ո՛չ միայն վասն ընչից ասէ, այլեւ վասն բանին եւ վասն զաւրութեան եւ վասն ամենայն տեսութեան, որում իւրաքանչիւր ինչ ումէք յանձն⁶ լինիցի, զի իւրաքանչիւր զինչ եւ ունիցի⁷, ի Հասարակաց աւզուտ պարտի ի կիր արկանել, եթէ իմաստութիւն իցէ եւ թէ իշխանութիւն եւ թէ մեծութիւն եւ թէ զինչ եւ իցէ: Մի ի վնաս ծառայակցացն եւ մի յանձին կորուստ: Նմին իրի իսկ զերկու-

1 Ա > ոչ ասաց, թէ ... գիտէք
2 Բ չասէ
3 Բ կասկածանք
4 Բ այսորիկ
5 Բ քնածիցն
6 Բ յանձին
7 Ա > զի իւրաքանչիւր զինչ եւ ունիցի

ՏԱՆՈՒՏԷՐ ՈՒ ՏՆՏԵՍ

Մապթ. ԻԴ. 42-51

ՍՏԵՓԱՆՈՍ ՄԻԲՆԵՅԻ

Արթուն լերուք, [զի] ոչ գիպեք յորո՛ւմ ժամու Տէրն ձեր գայ (ԻԴ. 42):

Ջայս ոչ միայն վասն կատարածի աշխարհիս ասաց, այլ եւ վասն կատարածի իւրաքանչիւր մարդկան. «արթուն լերուք» գործովք բարւոք, զի ոչ գիտէք զաւր վախճանի ձերոյ, յորժամ կոչէ Տէրն ձեր զոգիւղ ի մարմնոյդ:

Ո՛վ իցէ արդէք ծառայ հաւաքարիմ եւ իմաստուն (հմմտ. ԻԴ. 45):

Հաւատք եւ իմաստութիւն, յորժամ որպէս առաքինութիւն տեսանի, զհետ երթան միմեանց, այսինքն՝ հաւատարիմն եւ իմաստութիւնն. եւ որ իմաստուն, նաեւ հաւատարիմ. իսկ որ ունի զիմաստութիւնն որպէս խորամանկութիւն, մարթի ոչ հաւատարիմ լինել այնպիսոյն, որք են իմաստունք հանգոյն աւձին եւ տնտեսին անիրաւութեան. արդ, որ հաւատարիմ է եւ իմաստուն, որպէս Պաւղոս եւ Պետրոս եւ նոցին նմանողք, որք տային զկերակուր զվարդապետութիւնս իւրեանց ի ժամու արժանաւորաց, զայնպիսի ծառայս իւր, զոր կացոյց ի վերայ տան իւրոյ աշխարհիս, եկեալ Քրիստոս ի գալստեան իւրում, երանելիս ցուցանէ:

Իսկ եթէ ասիցէ ծառայն չար ի սրբի իւրում (հմմտ. ԻԴ. 48):

Ապա եթէ ոչ իցէ ծառայն «իմաստուն եւ հաւաքարիմ», այլ չար եւ յիմար, եւ արասցէ չարութեան եւ յիմարութեան գործս, եկեալ Տէր, յերկուս հատցէ զնա:

ԱՐԻՍՏԱԿԷՍ ԵՒ ԵՓՐԵՍ

Արթուն լերուք, զի ոչ գիպեք (հմմտ. ԻԴ. 42):

Ոչ ասաց, թէ՛ «Ոչ գիտեմ», այլ թէ՛ «Ոչ գիպեք»¹, քանզի կասկածագոյնս կամի լինել նոցա ցանկ, յայտարարեալ, թէ նմին իրի չասաց, նոցա զայն:

Ջայս գիպասջիք. եթէ գիպեք փանուպերն՝ յորում պահու գող գայ, հսկեր եւ չփայր ական հապանել (հմմտ. ԻԴ. 43):

Յայն սակա չասաց² զաւրն եւ զժամ, զի արթունք լինիցին. «Յորժամ չունիցիք,- ասէ,- ական, յայնժամ,- ասէ, - եկեսցէ»: Եւ զոր ասեն այսպիսի ինչ է, թէ գիտէին բազումք, թէ երբ մեռանիցին, ընդ այն ժամանակս եւեթ պնդէին, վասն որոյ եւ զիւրաքանչիւր վաղճան կենաց անյայտ արար: Եւ թուի ինձ, թէ եւ զծոյլսն պատկառեցուցանէ, թէ ո՞րչափ ընչիցն փոյթ անձին ունին կասկածք³ ի գողոցն, եւ այնչափ եւս անգամ չտանին դարման ոգւոց իւրեանց, նոքա յորժամ կասկածիցեն, հսկեն եւ չտան ինչ ի ներքուստ գողոցն հանել: Եւ դուք, թէպէտ եւ գիտէք, զի գալոց է, եւ արդարեւ իսկ գալոց է, եւ չկայք արթունք եւ չլինիք պատրաստականք, այլ անպատրաստ գնալ աստի, վասն այնորիկ⁴ ի սատակումն քնէածիցն⁵ գալոց է աւրն: Չոր աւրինակ եւ նա, թէ գիտէր, փախչէր, նոյնպէս եւ դուք, թէ [է]իք պատրաստք, ապրէիք: Եւ քանզի զգատաստանէն յուշ արար, այնուհետեւ առ վարդապետս շրջէ զբանն եւ գտանջանաց եւ զպատուոց խաւսի:

«Ո՛վ իցէ, - ասէ, - հաւաքարիմ ծառայ եւ իմաստուն, զոր կացուցէ փեր ի վերայ փան իւրոյ» (ԻԴ. 45):

Եւ զայս ո՛չ միայն վասն ընչից ասէ, այլ եւ վասն բանին եւ վասն զաւրութեան եւ վասն ամենայն տեսութեան, որում իւրաքանչիւր ինչ ումէք յանձն⁶ լինիցի, զի իւրաքանչիւր զինչ եւ ունիցի⁷, ի հասարակաց աւգուտ պարտի ի կիր արկանել, եթէ իմաստութիւն իցէ եւ թէ իշխանութիւն եւ թէ մեծութիւն եւ թէ զինչ եւ իցէ: Մի ի վնաս ծառայակցացն եւ մի յանձին կորուստ: Նմին իրի իսկ գերկո-

1 Ա > ոչ ասաց, թէ ... գիտեք
2 Բ չաստ
3 Բ կասկածանք
4 Բ այսորիկ
5 Բ քնածիցն
6 Բ յանձին
7 Ա > զի իւրաքանչիւր զինչ եւ ունիցի

սեանն պահանջէ ի նմանէ, «հաւաքարիմ» կոչէ զնա, զի ոչ խորեաց ինչ եւ ո՛չ ընդ վայր գտէրունիսն ծախեաց: Եւ «իմաստուն», զի գիտաց յաւգուտ մատակարարեալ գտուեալսն, նաեւ երկոցունց իսկ պետք են մեզ՝ եւ չգողանալ գտէրունիսն, եւ յաւգուտ մատակարարել:

«Ամէն ասեմ ձեզ, զի ի վերայ ամենայն ընչից իւրոց կացուցէ զնա» (ԻԴ. 47):

Զի՞նչ այնմ պատուոյ զուգական կայցէ, որ բան զայն մեծաբանան յանդիման կացուցէ՝¹ գերանութիւնսն, զբարութիւնսն, յորժամ երկնից թագաւորն, որ զամենայն ի ձեռին ունի, զմարդ ի վերայ ընչից իւրոց կացուցանիցէ: Վասն որոյ եւ «իմաստուն» իսկ կոչէ զնայ, զի բարուք միտք ի փոքունց մեծամեծաց արժանի առնեն. զգաստացար աստ՝ երկնից արքայութեանն արժանի լինելոց ես:

Ապայ թէ ասիցէ ծառայն չար ի սրբի իւրում. «Յամէ փեր իմ ի գալ» (հմմտ. ԻԴ. 48):

Եթէ ասիցէ ոք՝ տեսե՞ր՝ որպիսի խորհուրդք մտին վասն յայտ աւուրն չլինելոյ, քանզի ասէր՝ «Տէր իմ յամէ», ասասցուք առ այնս, թէ ոչ վասն յայտնի լինելոյ աւուրն, այլ վասն չարութեան ծառային, ապա թէ ոչ՝ յիմաստունսն եւ ի հաւատարիմն ընդէ՞ր ոչ մտին յայսպիսի միտք: Ասես, եթէ՝ «Յամէ փեր իմ ի գալ», ո՞ հեզդ՞² եւ թշուառականդ ապաքէն ունիցիս ակն գալոյ, ընդէ՞ր չհոգայցես: Եւ այսու ուսանիմք, թէ յամէ իսկ ոչ, եւ այս ոչ եթէ տէրն, այլ չար ծառային մտաց է վճիռս: Վասն այնորիկ իսկ պատուհասի:

Եւ սկսանի հարկանել զծառայակիցսն իւր (ԻԴ. 49):

Թուի ինձ, թէ զայս զթշնամանողացն եւ զազահիցն ասիցէ՝ ակնարկելով, եւ բազում ամբաստանութիւն ցուցանէ, յորժամ զոր կերակրելն առեր հրաման՝ փոխանակ կերակրելոյն գան հարկանես: Թուի ինձ, թէ զբարեկեցացն ակնարկիցէ զայս, քանզի եւ ընդ բարեկեցութեանն մեծամեծ տանջանք կան:

Զի ուրիցէ եւ ըմպիցէ ընդ արբեցողս (ԻԴ. 49):

¹ Բ կացուցանել կարասցէ
² Ա հեզք

Զոր կորստութենէն գուշակէ. ո՛չ վասն այնորիկ առեր, զի ի բարեկեցութիւն վատնիցես, այլ զի յողորմածութիւն ծախեսցես, զի թէ զքո ի՞նչ ունիցիս, թէպէտ եւ յարդար վաստակոց իցէ, կամ ի հայրենի ժառանգութենէ ստացար: Վասն աղքատացն հաւատացաւ քեզ այն, յանաւթ ետ քեզ զայն, զի այնու առաքինանայցես¹. արդ, տուր զնորայն նորա: Վասն որոյ եւ զգասուամն յայտ արարեալ՝

Կարել զնա ըմդ մէջն (հմմտ. ԻԴ. 51) հրամայեաց:

Նմին իր[ի] եւ զսէրն ծանուցիչ իւրոց աշակերտացն արար: Քանզի ամենեւին հարկ է այնմ, որ սիրեն, զայնմանէ, զոր սիրիցեն, հոգալ: Եւ արդ, զայն ճանապարհ կալցուք. քանզի այն իսկ է, որ յերկինս տանի եւ Քրիստոսի նմանողս առնէ եւ Աստուծոյ, ըստ կարի մերում:

ՅՈՎՀԱՆՆԷՍ ԾՈՐԾՈՐԵՑԻ

Արթո՛ւն կացէք, զի ոչ գիպէք՝ յորում ժամու Տէրն ձեր գայ (Մաւրթ. ԻԴ. 42):

Զայս կամ վասն կատարածի աշխարհիս ասաց, կամ վասն իւրաքանչիւր ուրուք վախճանի: Եւ արթուն ո՛չ ի քնոյ հրամայէ լինել, զի այս անհնար է՝ որք ընդ մարմնոյ կապեալ են եւ հաղորդեալ կերակրոյ, այլ բարի գործովք պատրաստ լինել, ասէ, եւ սպասել միշտ գալստեան նորա, «զի ոչ գիպէք՝ յորում ժամու Տէրն ձեր գայ»: Ո՛չ ասաց, թէ՝ ոչ գիտեմ, այլ թէ՝ ոչ գիտէք, որպէս զի ցուցցէ, թէ վասն այսորիկ ոչ ասեմ զաւրն, զի արթուն լինիջիք: Եւ արթնութիւնսն կրկին է, որպէս եւ քունն. ի զարթման գոլով եւ ոչ գործել, զի են ի քուն՝ որ յաստիս միայն հային, եւ են, որ ի հանդերձեալն հային, սակայն ծուլացեալ զհանդերձելոյն՝ ոչ գործեն: Արդ, պարտ է ըստ երկուցս արթուն լինել, զանտիսն նկատել եւ ի ճգունս անխոնջ վաստակել եւ յայսպիսի գոլով՝ կացէք կասկած ցանկ, որպէս գրէ Պաւղոս՝ «Մարան արթայ» (Ա Կոր. ԺԶ. 22), այսինքն՝ Տէր գալոց է, զգո՛յճ կացէք:

Զայն գիտասցիք, եթէ գիպէր փանուփերն՝ յորում պահու գող գայ, հսկէր՝ եւ ոչ փայր թոյլ ական հաւրանել զփանն իւրոյ (ԻԴ. 43):

¹ Բ առաքինայցես

Այսինքն՝ յաշխարհական իրաց առէք ապացոյց, այս է՝ «զայն գիտասլիք», ըստ առաքելոյ, թէ՛ «Զայն խորհեցի» (Բ Կոր. Ժ. 7, 11): Զ«պահն» կրկի՛ն իմա. կամ վասն Հասարակաց, կամ մասնաւոր կատարածի. եւ «զող» վասն յանկարծութեանն ասէ եւ ծածուկ ի մարդկանէ լինելոյն՝ ըստ այնմ, թէ՛ «Ար Տեսոն իբրեւ զգող եկեալ է» (հմմտ. Բ Պետ. Գ 10, Ա Թեա. Ե 2): Քանզի, թէ գիտէին բազումք զաւրհաս մահու իւրեանց, ընդ այն ժամանակս եւեթ պնդէին, իսկ այժմ, զի անյայտ մնաց, արթուն լինիցին, որպէս տանուտէրն, ասէ, թէ զժամանակ զալոյ գողոյն գիտեցէր, յայն ժամանակին միայն հսկէր եւ ոչ տայր վնասել տան իւրոյ, իսկ որովհետեւ զայն ժամանակ ոչ գիտիցէ, պարտի զգիշերն ողջոյն արթուն լինել, զի մի՛ գողանայցեն զինչս նորա: Ահա եցոյց զշահն, թէ է՛ր վասն ոչ յայտնեաց զաւրն:

Դարձեալ՝ եւ զծոյլսն պատկառեցուցանէ այսու, թէ նոքա ո՛րչափ վասն ընչիցն հոգան եւ կասկածեն ի գողոց, եւ այն վասն երկրայ իրացն, քանզի բազում անգամ պատահէ ոչ զալ գողոց, իսկ զուրք գիտէք, զի զալոց է, եւ ոչ կայք արթունք: Եւ վասն ական հատանելոյն ասացեալ է յառաջագոյն: Դարձեալ՝ գող է սատանայ, որ միշտ գողանայ զմեզ ի Տեսունէ, քանզի սպրդելով մտանէ ի միտս մեր՝ զայսաւրն իւր հայցելով եւ զվաղիւն Աստուծոյ նուրբելով, այլեւ զչարն բարի գունելովն գողանայ ի մէնջ, զոր պարտ է տանուտեառն, մտացն ասեմ վերակացուի գիտել եւ հսկաւզս լինել ի ձեռն Գրոց վարդապետութեան եւ միշտ ընդդէմ դենել խորհրդոց նորա, զի մի՛ հատցէ ի ձեռն խորհրդոց գտունս մեր յաւարի, այսինքն՝ զմարմինս ի պէսպէս խտրիցն լրմունս:

Վասն այսորիկ եւ դո՛ւք եղերուք պարրաստք, զի յորում ժամու ոչ ակն ունիցիք, գայ Որդի մարդոյ (ԻՊ. 44):

Վասն որո՞յ իրաց եղերուք պատրաստք: Վասն ժամո՛ւն ասէ, զի ոչ գիտիցէք. քանզի յեղակարծում ժամանակի հասցէ ի վերայ, զի մի՛ խռովիցիք, ըստ մարգարէին, առանց պատրաստութեան լինել (տես Ես. ԺԳ. 6-9, ԻՊ. 19), որպէս քնած էին հասանէ սատակումն, վասն զի առանց պատրաստութեան են՝ ըստ յիմար կուսանացն (տես Մարթ. ԻԵ. 1-13). բայց պատրաստութիւն զգործոցն ասէ, զի մաքուր եւ կազմ լինիցին վարուք: Նմանապէս եւ մահուանն պարտ է սպասել, զի ոչ ոք գիտէ զժամանակ մահուանն իւրոյ, որ է նշանակ ընդհանրական փոփոխմանն:

Իսկ ո՞վ իցէ հաւաքարիմ ծառայ եւ իմաստուն, զոր կացոյց փեր իր ի վերայ ծառայից իւրոց՝ փայ նոցա կերակուր ի ժամու (ԻՊ. 45):

Նախ զնեղութեանցն յուշ արար, եւ ապա զայն փութանակի գալստեամբն մխիթարեաց: Զի մի՛ կարծիցեն, թէ զալուստ նորա ամենեցուն է փրկութիւն, այսուհետեւ վասն հաւատոցն եւ գործոցն վարդապետէ: Կամ զի ասաց՝ երկու յանդի եւ յերկանի եւ ի մահիճս, եւ մին ի սոցանէ առեալ, եւ միւսն՝ թողեալ, ասէ այժմ, թէ ո՛յք են առաքեալքն, եւ ո՛յք՝ թողեալքն: «Իսկ ո՞վ իցէ հաւաքարիմ ծառայ եւ իմաստուն». «Իսկն» ստուգութեան է տարացոյց, եւ «ո՞վն»՝ ո՛չ հարցման, այլ հիացման աւերինակ՝ ըստ այնմ. «Ո՞վ է, որ դիմեալ գայ յեղովմայ» (Ես. ԿԳ. 1), եւ թէ. «Ո՞վ է սա, որ ելանէ յանապափէ» (հմմտ. Երգ Գ. 6), որպէս թէ ասել՝ որ ճշմարիտ հաւատարիմ եւ իմաստուն ծառայ է, զարմանալի է բազմաց: Եւ է այս նախ առ վարդապետսն եւ որ ունին բանի զաւրութիւն, եւ առ իշխանսն հոգեւորս եւ մարմնաւորս, միանգամայն եւ առ ընչեղս, եւ ապա իւրաքանչիւր ումեք, որ ունիցի առանձին շնորհս, յայտ արար: Արդ, ի սոցանէ՛, որ ոք գտանի հաւատարիմ եւ իմաստուն, քանզի ծառայք ամենեքեան ըստ արարչութեանն, որպէս ասէ Դաւիթ (տես Սաղմ. ԾԺԸ. 91), միանգամայն ըստ տնտեսութեանն՝ ըստ առաքելոյ, թէ՛ «Ո՛չ էք անձանց փեարք, քանզի զնոց զնեցայք» (Ա Կոր. Զ. 19-20): Բայց աստ ծառայ՝ զի զկամս տեառն իւրոյ առնիցէ, լինելով «հաւաքարիմ» եւ «իմաստուն». հաւատարիմ, զի ոչ խորէ եւ գողանայ կամ ընդվայր գտերունիսն ծախէ, իսկ իմաստուն՝ զի յաւգուտ այլոց գիտիցէ մատակարարել եւ ո՛չ ի վնաս ծառայակցաց: Քանզի լինին բազումք եւ ո՛չ իմաստունք, որպէս այն, որ զմի քանքարն է առ եւ ոչ յայլս իմաստութեամբ անեցոյց, եւ են, որք յայլս տնաւրինեն եւ զանձանց անփոյթ առնեն: Վասն այսորիկ ասաց՝ «հաւաքարիմ ծառայ եւ իմաստուն»:

Կամ՝ զ«հաւաքարիմն» վասն հաւատոյն իմա, իսկ «իմաստունս»՝ սակս գործոյն, քանզի որ հաւատայ եւ գործէ, կատարեալ է, ապա թէ ոչ՝ երկոքեան մեռեալ եւ դատարկք են՝ ըստ առաքելոյ (տես Յակոբ Բ. 14-26): Կամ՝ հաւատք, որ է պարզամտութիւն՝ ըստ այնմ, թէ՛ «Պարզամիտն հաւաքայ ամենայն բանի» (հմմտ. Առակ. ԺԴ. 15), իսկ իմաստութիւն՝ առանց խորամանկութեան եւ նենգութեան խառնեալ ընդ միմեանս է գեղեցիկ առաքինութիւն, որպէս այլուր ասաց. «Եղերուք խորագեարք իբրեւ զաւս եւ միամիտք իբրեւ զաղաւնիս» (Մարթ. Ժ. 16), որպիսի

ոք էին Պետրոս եւ Պաւղոս եւ այլք նմանազօր նոցին. քանզի վասն աղաւնի գոլոյն վշտացն համբերէին եւ ի վարդապետութենէն ոչ կային ի բաց եւ վասն իմաստութեանն, ըստ ժամանակի եւ տեղոյ եւ երեսաց, զհոգեւոր կերակուրն ջամբէին: «Զոր կացոյց,- ասէ,- տէր իւր ի վերայ ծառայից իւրոց»: Առկաս «գերդաստանաց» ասէ (Ղուկ. ԺԲ. 42), որ է ընչից եւ ստացուածոց, եւ զայս յայտ առնեն զանազան ասացեալքս, թէ ո՛չ տեարք ծառայիցն են եւ ո՛չ ընչիցն, զոր սեփհականեն, այլ հազարապետք եւ վերակացուք նորայնոցն, յորոց խնդիր լինելոց է՝ ըստ Պաւղոսի. «Խնդիր է ի մէջ հազարապետաց, եթէ որ հաւարարիմ գրցի» (Ա Կոր. Դ. 2):

Երանի իցէ ծառային այնմիկ, զոր եկեալ փերն գրանիցէ արարեալ այնպէս: Ամէ՛ն ասեմ ձեզ, զի ի վերայ ամենայն ընչից իւրոց կացուցէ զնա (ԻՂ. 46-47):

Զի՞նչ այսմ պատուոյ հանգոյն կացցէ, կամ ո՞ր բան զմեծարանս զայս յանդիման կացուցանել կարէ, զոր ամենեցունց Տէրն ի գալստեանն իւրում յերանութիւնսն գրէ, քանզի այս է առեալն յանդէն եւ յերկանէն: Բայց ո՛չ սոսկ առնիցէ զհրամայեալսն, այլ այնպէս, որպէս ասացի, քանզի բազումք ոչ առնեն եւ այլք թէպէտ առնեն, այլ կամ ի փառս մարդկան, կամ ի հպարտութիւն անձանց: Արդ, զի առնեն լինիցի, եւ ի փառս Աստուծոյ առնեն, եւ յորժամ զամենայնն առնիցեն, ասիցեն, թէ՛ «Ծառայք անպիտանք ենք» (Ղուկ. ԺԷ. 10). ա՛յս է «այնպէսն»: Յայնժամ «ի վերայ ամենայն ընչից իւրոց կացուցէ»: Տես, զի սակաւ զգաստութիւնն աստ յո՛րպիսի թագաւորութիւնս հանէ, իբր այն. «Թէ ի սակաւուն հաւարարիմ է եւ ի բազմին հաւարարիմ է» (հմմտ. Ղուկ. ԺԶ. 10): Կամ աստ որպէս զՄոսէս, որ ընչից Աստուծոյ, այս է՝ ի վերայ ստացուածոց նորա հրամանատու կարգեցաւ՝ որպէս զԱստուած, եւ կամ անդ՝ զոր ինչ ունի Աստուած, ժառանգէ եւ նա՛ թագաւորութիւն, անմահութիւն, պայծառութիւն, վայելչութիւն, մշտնջենաւոր ցնծութիւն, անվախճան հանգիստ եւ այլ սոյնպիսիս:

Ապա թէ ասիցէ ծառայն չար ի սրբի իւրում. «Տէր իմ յամէ զգալ» (ԻՂ. 48):

Այս նոքա են, որ թողան, եւ զի մի՛ ակնառութեամբ կարծիցի թողուլն, խայտառակէ զչարիսն: Եւ «չար» վասն այն կոչէ, զի

անհաւատ է եւ յիմար, եւ յիմարութիւն՝ ըստ այնմ, զի ոչ խորհի ոչ գալ, այլ թէ՛ «յամէ զգալ», յորմէ ուսանիմք, թէ ըստ կարծեաց նորա՛ յամէ, իսկ ըստ ճշմարտութեանն՝ եւ ո՛չ յամէ իսկ: Իսկ թէ ասիցէ ոք, թէ այսպիսի խորհուրդք վասն ոչ գիտելոյ զաւրն մտին խորհի, ասացուք, թէ ո՛չ աւուրն անյայտութիւն, այլ ծառային չարութիւնն եղեւ պատճառ, ապա թէ ոչ՝ յիմաստունն եւ ի հաւատարիմն ընդէ՞ր ոչ մտին այսպիսի խորհուրդք, այլ ի չարն, թէ՛ «փեր իմ յամէ զգալ»: Իսկ զի՞նչ այն, թէ՛ «ի սրբի իւրում». ցուցանէ, թէ բազումք երեւին յաջս մարդկան առաքիլիք, այլ մտաւք հայհոյիչք են, զոր եւ Աստուած գիտէ, որ զերիկամունսն քննէ (փն՝ Սաղմ. Է. 10, Երեմ. ԺԱ. 20), եւ յաղագս այնորիկ դատէ:

Եւ սկսանիցի հարկանել զծառայակիցս իւր (ԻՂ. 49):

Տես, թէ խորհուրդք սրտին յո՛րպիսի ապիրատութիւնս ձգեաց, յորմէ ուսանիմք, թէ աղբիւր չարութեան գործոյն սիրտն է՝ ըստ Տեառն բանին (Մատթ. ԺԵ. 19), որպէս ասէ եւ Դաւիթ, թէ յորժամ անզգամեցաւ ի սրտի իւրում, ապականեցաւ գործով (Սաղմ. ԺԳ. 1): Իսկ հարկանել ծառայակցացն՝ կրկին չարութիւն ցուցանէ եւ երեքկին, նախ՝ զի հարկանէ, եւ այն՝ զծառայակիցսն, եւ զորս կերակրել հրաման էա՞ն՝ զնոսին գանէ, որ է յոյժ չարութիւն, եւ «հարկանել» զթշնամանելն ասէ եւ զագահելն:

Ուրիցէ եւ ըմպիցէ ընդ արբեցալոս (ԻՂ. 49):

Դարձեալ եւ ա՛յս երկպատիկ չարութիւն, զի զոմանց յափշտակէ եւ զայն ընդ շռայլս վատնէ, որ նշանակէ զբարեկեցիկսն եւ զորկորաժէտսն, որք մեծամեծ տանջանաւք տանջին, որպէս մեծատունն՝ ո՛չ ըստ այնմ, յոր վայելեաց, այլ զի եւ ոչ յողորմութիւնն ծախեաց, թէպէտ յարդար վաստակոց եւ կամ թէ ի հայրենական ժառանգութենէ ունէր զմեծութիւնն. ապա զի՞նչ արասցեն՝ որք այլոց արարովք շուայտին:

Այլ դու եկ ինձ իմա զկարգս հոգւոյն մասանց, թէ ո՛րպէս առ հասարակ չարացան ի ծառայն չար, որ մարմնոյ ծառայեաց. քանզի նախ զբանականն ախտացոյց՝ թիւր խորհելով ի սրտին եւ զկնի այնմ՝ զցասմականն, որով ի հարուածս ծառայակցացն եկն, յետ որոյ եւ ցանկութեամբն վատնեցաւ՝ ուտելով եւ ըմպելով ընդ արբեցալոս, որոյ լծակից գիտեմ զվաւաշոտս եւ զպէսպէս օճրա-

գործութիւնս: Եւ այսպէս զբնական ուղղութիւնն ի միում վայրկե-
նի կործանեաց անմտութեամբն տնտեսի յաւթարամտութիւնն, եւ
գովի, զի դարմանէ զծառայսն տեառն ի ձեռն հակառակացն մեռե-
լութեան, քանզի նոցա ապականութիւն՝ կերակուր եւ բարեկար-
գութիւն լաւացն է: Եւ չարախաւսի չար ծառայն, որ յաղագս ընդ
արբեցաւդսն լինելոյ վիրաւք տանջէր զԱստուծոյ ծառայսն, վասն
զի վէրք են ճշմարտապէս ընդդէմ առաքինութեանն՝ չարութիւնն,
որպէս եւ Դաւիթ ի քաղաքի Տեառն սպանանէր զմեղաւորս (տնս
Մաղմ. Ճ. 8), այսինքն՝ ի քաղաք հոգւոյն զխորհուրդ չարութեանն,
որ գործաւնեայք են անաւրէնութեանն, սատակէ, ուստի կեանք լի-
նի վեհագունիցին՝ ըստ այնմ. «Ես սպանանեմ եւ ես կեցուցանեմ»
(Բ Ար. ԼԲ. 39):

Գայցէ ւրէր ծառային այնորիկ յաւուր, յորում ոչ ակն ունիցի, եւ ի
ժամու, յորում ոչ գիտիցէ, եւ կտրեսցէ զնա ընդ մէջ եւ զբաժին նո-
րա ընդ կեղծաւորս դիցէ. անդ եղիցի լալ եւ կրճել արամանց (ԻԴ.
50-51):

Թէպէտ բազում անգամ վրէժխնդիր լինի Աստուած արքունա-
կան դատողութեամբ ի մարմնական կենցաղս այնպիսեացն, զոր
«գալուստ» ասէ, որպէս բազմաց պատահեաց՝ չար եւ վատ ծառա-
յից, բայց մեք ըստ կարգի բանիս ի հանդերձեալն իմանամք զասա-
ցեալս, որ ոչ միոյ, այլ հասարակաց չարաց ծառայից լինելոց է:
«Գայցէ,- ասէ,- ւրէր ծառային այնորիկ». եզակի դնէ՝ կամ թէ ամենե-
քեան միապէս չարք գտան ի տէրունիսն, թէպէտ յիւրաքանչիւր
վարս ի հոգեկանս կամ ի մարմնականս չարացան կամ թէ զի մի՛
ոք կարծիցէ՝ որպէս աստ, նոյնպէս եւ անդ սպրդեալ դաւղիցի, յա-
տուկ իւրաքանչիւր ումեք դատաստան լինելոց է: «Յաւուր յորում ոչ
ակն ունիցի, եւ ի ժամու յորում ոչ գիտիցէ»: Յեղակարծում ժամու, ասէ,
հասանէ, մինչդեռ ի մանկութեան գոլով աւուր կամ ի փարթամու-
թեան լինելով ժամու՝ ոչ ակն ունէր վրէժխնդրութեան եւ տանջա-
նաց, այլեւ ոչ էր պատրաստեալ զանձն բարի գործովք՝ գալստեան
նորա, եւ կամ մտածութեամբ միայն: Տես եւ զայն, զի զանգիտու-
թիւնն մեզ միշտ դնէ, զի արթունք լինիցիմք:

«Եւ կտրեսցէ զնա ընդ մէջ եւ զբաժին նորա ընդ կեղծաւորս դիցէ».
առանց հարցաբնութեան, քանզի գործք նորա դատեն զնա յայն-
պիսի ցասումն արկանել: Իսկ զի՞նչ ընդ մէջ հատանելն իցէ. կամ

թէ զիւր ինքեան զշնորհսն առնուցու՝ զուսմանց, կամ զարուես-
տից, կամ զիշխանութեանց՝ հոգեւորաց եւ մարմնաւորաց, զի որ-
պէս թագաւորք յորժամ զառ ի յինքեանց պատուեալն ըստ ապե-
րախտութեանն դատեն, նախ մերկանան զպարզեւսն եւ ապա
տանջեն, այլեւ զպատկերին պատիւն առնու եւ իբր զանբանս
տանջէ, զի ոչ ի բարին զխորհուրդն, այլ ի չարն ծախեաց, որպէս
ոք ումեք սուր տայցէ վասն պիտոյից, եւ նա արիւն հեղու, իսկ
նա ոչ միայն զսուրն առնու, այլեւ զնա սպանանէ: Կամ թէ՛ հո-
գին եւ մարմինն տանջի՝ ըստ առաքելոյ. «Իւրաքանչիւր մարմնով
ժառանգէ՝ եթէ բարի եւ եթէ չար» (Խմնք. Բ Կոր. Ե. 10), քանզի հա-
ւասարք էին ի չարքն, զոյգ եղիցին եւ անդ, ուր լալ աչացն է եւ
կրճել ատամանցն. ա՛յս է «մէջն». քանզի երկու բաժինն տանջի, եւ
դատաստանն որպէս մարմնոյն, այսպէս եւ հոգւոյն հատանի: Իսկ
«կեղծաւոր» կամ զնոյն ինքն զբանսարկուն ասէ, որ խաւար է եւ
լոյս կերպարանի, կամ զայլս ի մարդկանէ, որպիսիք էին դպիրքն
եւ փարիսեցիքն: Նոցա տանջանացն բաժանակից առնէ, ասէ, ո՛չ
վայրապար, այլ քանզի եւ ինքն կեղծաւոր էր, զի քարոզէր այլոց
զգալուստն եւ կամ զմահն եւ ինքն ի սրտին խորհէր յամել զգալն
եւ զմահն:

ԳՐԻԳՈՐ ՏԱԹԵԲԱՅԻ

- Ո՞վ իցէ հաւատարիմ եւ իմաստուն տնտես (տնս Մաթթ. ԻԴ. 45):
- Այս ժԴ. (14) առակն է արքայութեան եւ կուսանացն՝ ժԵ. (15)
եւ քանքարացն՝ ժԶ. (16):
- Բովանդակ ամենայն առակք ժԶ. (16) են, յորժամ զմաճն թուես-
ցես: Ապա թէ ոչ՝ հնգետասանք են: Եւ կարգ Գ. (3) առակացս հայի
ի կարգ ազարակի եւ մահճաց եւ երկանի, որ նախասացաւ:
- Եւ Դ. (4) ինչ ուսուցանէ.
- Ա. Նախ՝ զտնտեսն ամենայն բանի եւ ընչից՝ իշխանութեանց,
արուեստից եւ այլն:
- Բ. Երկրորդ՝ զգալ դատաւորին:
- Գ. Երրորդ՝ զպատիւ բարեաց:
- Դ. Չորրորդ՝ զպատիժ չարեաց:
- Հարց. Զի՞նչ է «հաւապարիմն» (ԻԴ. 45):
- Պատասխանի. Ա. Նախ, որ ոչ գողանայ:

Բ. Երկրորդ՝ որ ոչ ընդ վայր կորուսանէ, զի միապէս չար է եւ պինդն եւ շռայլն:

Հարց. Զի՞նչ է «իմաստունն» (ԻՂ. 45):

Պատասխանի. Ա. Նախ՝ որ ընտրէ զղէմքն:

Բ. Երկրորդ՝ գտեղին:

Գ. Երրորդ՝ զժամանակն:

Դ. Չորրորդ՝ զբարին, եւ ապա ի գործ ածէ:

Հարց. Զի՞նչ է բարին:

Պատասխանի. Ա. Նախ՝ որ հասարակաց հաղորդէ:

Բ. Երկրորդ՝ որ ինքեան եւ այլոց է աւգուտ, որպէս յայտ է ի լուսաւորս, յամպս, ի բոյսս եւ յայլն: Իսկ ընդդէմ այսմ չար է.

Ա. Նախ՝ որ անհաղորդն է:

Բ. Երկրորդ՝ որ վնաս է ինքեան եւ այլոց:

Հարց. Զի՞նչ է «ամենայն ինչքն» (ԻՂ. 47):

Պատասխանի. Այն է, որ ասաց. «Ամենայն, որ ինչ քո է, իմ է» (հմմտ. Յովհ. ԺԷ. 10): Զայն խոստանայ բարեաց: Եւ չորիւք յատկանայ անդ ի բարութիւնն.

Ա. Նախ՝ զի բոլոր է, եւ այս՝ մասնաւոր:

Բ. Երկրորդ՝ երկնային, եւ այս՝ երկրային:

Գ. Երրորդ՝ անմարմին, եւ այս՝ մարմնաւոր:

Դ. Չորրորդ՝ անանց, եւ այս՝ անցաւոր:

Հարց. Տէր իմ յամէ ի դալ (ԻՂ. 48):

Պատասխանի. Կրկին է գալն.

Ա. Նախ՝ մահուամբ գայ:

Բ. Երկրորդ՝ դատաստանաւ: Այս՝ մասնաւոր, եւ այն՝ հասարակ:

Նարկանէ գծառայս (ԻՂ. 49):

Որ բանիւ թշնամանէ զայլս, կամ որ զհարկն պահանջէ տանջանաւք, ցուցանէ զայն, որ ի բարեկեցութեան կայ՝ ուտելով եւ ըմպելով:

Հարց. Զի՞նչ է «ընդ մէջ կպրելն» (հմմտ. ԻՂ. 51):

Պատասխանի. Չորս է իմացումն.

Ա. Նախ՝ որ զհոգի եւ զմարմին բաժանէ:

Բ. Երկրորդ՝ զհոգին ի կայեանս անհաւատիցն դնէ:

Գ. Երրորդ՝ ի դատաստանին ի ձախակողմ բաժանէ:

Դ. Չորրորդ՝ ի կենդանեաց հատեալ ի հուրն առաքէ:

Հարց. Վասն է՞ր:

Պատասխանի. Վասն չորից.

Ա. Նախ՝ զի անհաւատ եղեւ:

Բ. Երկրորդ՝ զի հարկանէ զծառայս:

Գ. Երրորդ՝ զի որ կորստութեամբ հեշտանայր:

Դ. Չորրորդ՝ զի անհաղորդ էր աղքատաց:

Մարկ. ԺԳ. 33-37

ԲԱՐՍԵՂ ՄԱՇԿԵԻՈՐՑԻ

Զգոյշ եղերոյք, հսկեցէք եւ կացէք յաղաթս, զի ոչ գիտէք, երբ ժամանակն իցէ (Մարկ. ԺԳ. 33):

Կարի իմն սիրելի եւ ցանկալի է մարդկան, միշտ եւ հանապազ գիտաւղ եւ ծանաւթ լինել անյայտից եւ ծածկեցելոց իրաց, եւ այս ի յանկատար եւ ի յանհաստատ մտաց պատահէ լինել, այլեւ ի հոգ յանձին չունելոյ եւ ի դատարկութենէ, որպէս տգէտք ի մանկաւոյ չդադարեն թախանձել զծնաւդս եւ զդայեակս ի հարցուածոց, թէ զի՞նչ է այս եւ կամ զի՞նչ՝ այն: Ուստի եւ բազումք ի կատարելոցն հասակաւորք տղայք են բարուք, ի վերա հասանել վախճանին ժամանակի փութան:

Եւ զի՞նչ զարմանք են, եթէ ընդ հասարակաց մարդկան այսպիսի անցք անցանեն, զի եւ սուրբ առաքեալքն իսկ գլխովին յաճախազոյն զսոյն կրեցին, որպէս ի սկիզբն այսր Աւետարանի մատուցեալ հարցանէին ցՔրիստոս. «Ասա մեզ՝ ե՞րբ լինիցի այս, եւ զի՞նչ նշան իցէ քոյոյ գալստեանդ եւ վախճանի աշխարհիս» (Մարկ. ԻԴ. 3): Եւ յետ յարութեանն ի մեռելոց ասէին, թէ՛ «Ասա՛ մեզ ի ժամանակի աստ յայսմիկ հասուցանելոց իցե՞ս զարքայութիւնն Իսրայելի» (հմմտ. Գործք Ա. 6). իսկ յետ զՀոգին Սուրբ ընդունելոյ ոչ միայն ինքեանք չհարցանէին, այլեւ զայլս, որք զնոյն արտանային, կարճէին, որպէս գրէ Պաւղոս առ թեսաղոնիկեցիսն, թէ՛ «Վասն ժամուց եւ ժամանակաց եղբարք չէ ինչ պիտոյ գրել առ ձեզ» (Ա. Թես. Ե. 1). «Զի դուք ինքնին ստոյգ գիտէք, թէ՛ աւր Տեառն, իբրեւ զգող գիշերոյ, այնպէս հասանէ» (Ա. Թես. Ե. 2):

Իբրեւ զաւելորդ եւ զանաւգուտ խնդիր, արգել, զի չասաց, թէ ոչ ոք գիտէ, եւ ոչ ումեք յայտնեցաւ, այլ թէ՛ «Զէ ինչ պիտոյ գիտել

ձեզ», որովք եցոյց, թէ ինքն գիտէ, որպէս եւ աստ Քրիստոս չասաց, թէ ոչ գիտեմ, այլ թէ՛

«Ոչ գիտէք՝ երբ ժամանակն իցէ» (ԺԳ. 33):

Եւ արդ, ասա, զի՞նչ աւգուտ իցէ. համարեաց, եթէ յետ քսան ամի լինի վախճան կամ յետ երեսնոյ եւ կամ հարիւրոյ, զի՞նչ շահ անտի մեզ գործէր, ո՞չ ապաքէն իւրաքանչիւրոյ վախճան իւրոյ կենացն կատարած է, զի՞ քննես զհասարակաց վախճանէն:

Այլ, զոր ինչ յայլսն կրեմք, զանձանց թողումք եւ զհասարակաց քննեմք եւ հոգամք, եթէ այս անուն պոռնիկ է եւ շնացաւդ եւ միւսն՝ ազահ եւ յափշտակաւդ. եւ զիւրոցն ոք փոյթ յանձին չունի: Նոյնպէս եւ աստ թողեալ ընդ իւրաքանչիւր վախճանի հոգալն զհասարակացն կամին ուսանել:

Ընդէ՞ր նեղիս վասն այնր, եթէ զայս վախճան առաքինութեամբ կատարեսցես, ոչինչ անտի վնաս կրեսցես, համարեաց, եթէ հեռի իցէ եւ եթէ մաւտ, չէ ինչ մեզ աւգուտ, եւ վասն այնորիկ Քրիստոս չասաց: Այլ երբեմն գողոյ, երբեմն որոգայթի նմանեցուցանէ, ըստ այնմ, թէ՛ «Յանկարծակի հասանիցէ ի վերայ ձեր աւրն այն իբրեւ զորոգայթ» (Ղուկ. ԻԱ. 35). եւ թէ՛ «Արթուն լերուք՝ ոչ գիտէք յորո՞ւմ ժամու գող գայ» (հմմտ. Մատթ. ԻԴ. 42-43):

Եւ թէ վասն է՞ր իբրեւ զորոգայթ եւ իբրեւ զգող գիշերոյ ծածկեցաւ ի մէնջ ժամն հասարակացն եւ առանձինն, ասացից, զի եթէ յայտնի էր ժամանակ մեռանելոյն, ոչ ոք զառաքինութեանն փոյթ յանձին ունէր, այլ զամենայն աւուրս կենաց իւրոց ի չարիս անցուցանէր եւ ի ժամ մերձեալ մահուն սկիզբն առնէր առաքինութեանն: Զի թէ այժմ անյայտութեան ասն տագնապէ զմեզ, բազումք մինչ ի վերջին շունչն սպասեն եւ ապա զղջանան, յովովք եւ առանց զղջման եւ խոստովանութեանն գնացին:

Եթէ զայն եւս երկիւղ ի միջոյ բառնայր, ո՞ ոյք լինէր ցածուն. ոչ ոք երբէք:

Արդ, զի մի այս լինիցի, նմին իրի ոչ զհասարակաց ժամն եւ ոչ զիւրաքանչիւր առանձինն յայտնեաց, զի կամի, թէ ցանկայցեն այնմ եւ ակն ունիցին, եւ միշտ փութայցեն գործել զբարիս:

Եւ այլ ազգ եւս, կէսք մահու ցանկան եւ կէսք՝ կենաց, եւ նա, որ զմահն կամէր, յորժամ գիտէր, թէ վաղիւն մեռանելոց է, եւ զթագաւորն եւս արհամարհէր եւ ոչ հրաժարէր, զորս կամէր սպանանել՝

վրէժինդրելով ի թշնամեաց եւ բազումս եւս այլ չարիս գործէր. նախ՝ զկամս սրտին կատարելով եւ ապա՝ ընդունէր զվախճան, եւ նա, որ զկեանս կամէր, առ տրտմութեանն յանկարծակի սատակէր:

Զի եթէ ոք յերիտասարդացն եւ ի զարդասէր աղջկանց, գիտէին, եթէ վաղիւն մեռանելոց էին, իբրեւ զազանք չարք, յորժամ ըմբոնիցին, յահէն սատակին, նոյնպէս եւ նոքա յառաջ, քան զժամանակն անհարեկեալ մեռանէին:

Նաեւ արք բարիք ոչինչ վարձս գործոց բարեաց ընդունէին, եթէ գիտէին, թէ յետ երից աւուրց երթալոց էին:

Զի թէպէտ եւ ինքեանք զանձինս ի վիշտս արկանէին, ի դէպ էր այլոց ասել ցնոսա, եթէ՛ գիտէ՞ք, զի յետ երիս աւուրց մեռանելոց էք եւ վասն այնորիկ տայք զանձինս ի վիշտս: Իսկ որ չգիտցէ զմահն եւ տայ զանձն ի վիշտս, զայս ոչ ոք կարէ ասել ցնա:

Յայտնեցից զսոյն եւ աւրինակաւ, եթէ յառաջագոյն գիտացեալ էր Աբրահամու, եթէ չէ սպանանելոց զորդին, զի՞նչ վարձք էին նմա. եւ կամ Պաւղոսի, եթէ յառաջագոյն գիտացեալ էր, զի չէր մեռանելոց եւ արհամարհէր զմահն, ո՞ւր երեւէր զարմանալի, զի եւ քան զամենեսեան վատն զայս գործէր, որպէս ցուցաւ վերագոյն:

Տեսանե՞ս՝ որչափ շահ է ի չգիտելոյ զվախճանն, վասն այնորիկ իբրեւ զգող գիշերոյ հասանէ, զի մի ի չարիս գրաւեսցուք զանձինս եւ մի ի ծուլութիւնն, զի մի եւ վարձքն մեր նուազեսցին:

«Արթո՛ւն՝ եղերուք, աստ, հսկեցէք» (ԺԳ. 33):

Զի առ արթունսն թէպէտ եւ լինի մուտ գողոյ, ոչինչ վնասել կարիցէ, այլ գնոսա, որք ի քունն կայցեն, յամենայնէ մերկացուցեալ՝ գնայցէ:

Եւ քուն զմեղսն կոչեն Գիրք, որպէս եւ արթնութիւնն՝ զառաքինութիւն. եւ ընդէ՞ր քուն կոչեն զչարիսն, զի նախ խափանեալ յառաքինութենէ, ապա գործէ զչարիսն:

Այլեւ, որպէս երազովք, ցնորեալք անառակ գործովքն, զի այնպիսիք են վայելք աշխարհիս, երազ է մեծութիւնն եւ փառքն եւ ամենայն ինչ նոյնպիսիք:

Եւ որպէս որ ի քունն կայցէ, չճանաչէ զճշմարիտն եւ զսուտն, այլ ընդ չգոյն իբրեւ ընդ գոյ ցնորեալ շրջի, նոյնպէս եւ որք չարեալք կեան, չտեսանեն զէսն եւ զմնացականսն, որ են գործքն

¹ US գոյջ] արթուն

բարիք եւ առաքինութիւնք, այլ զսահելիս եւ զանցաւորս՝ զվայելս եւ զհեշտութիւնս աշխարհիս:

Արթո՛ւն՝ եղերուք, ասէ (հմմտ. ԺԳ. 33):

Եւ չէ բաւական միայն արթուն լինել, այլ եւ պարտ է եւ զինեալս գտանիլ, զի թէ արթուն ոք իցէ եւ զէն չունիցի, վաղվազակի հասեալ գողոց, զձեռուն ի գործ արկցեն ի նա, նոյնպէս եւ մեք, թէ եւ արթունք լինիմք, այսինքն՝ ուղիղ հաւատով եւ անզէն, եւ մերկ կայցեմք յառաքինութենէ, ոչ ինչ արգելու զսատանայ յագեցուցանել ի մեզ զսուրն:

Վասն որոյ Պաւղոս յետ արթուն լինելոյն խրատէ եւ ասէ, թէ՛ «Զգեցցուք զգրահան հաւատոյ եւ սիրոյ եւ զիցուք զսաղաւարտն յուսոյ եւ փրկութեան» (Ա. Թեսալ. Ե. 8): Որովք զգործսն եւ զհաւատսն ականարկեաց, ոչ զվայրասպար հաւատոց ասէ, այլ իբրեւ զգրահաս, զոր ոչ ինչ կտրիցէ վաղվազակի, այլ իցէ ամուր պարիսպ բոլոր մարմնոյն:

Նոյնպէս եւ դու զհաւատսն եւ զսէր վառեալ զոգւովդ, եւ չիցէ ինչ ի հրեղէն նետից սատանայի, որ ի քեզ դամազիւտ կարիցէ լինել, զի որ զոգին իւր սիրոյն զինու վառեալ իցէ, ընդ վայր աշխատին նենգագործքն, ոչ նախանձ, ոչ բարկութիւն, ոչ ցանկութիւն եւ ոչ այլ ինչ կարէ վնասել այնպիսի ոգւոյ:

Եւ զիցուք զսաղաւարտն յուսոյ եւ փրկութեան, զի որպէս սաղաւարտն զգլուխն պահիցէ յամենայն կողմանց, նոյնպէս եւ յոյսն չտայ մտացն զլորել, այլ կանգուն կացուցանէ: Զի որ այնպիսի զինուք վառի, ոչ երբէք անկանի, զի կան մնան հաւատք, յոյս եւ սէր (Կրն Ա. Կոր. ԺԳ. 13), եւ ապա ցուցանէ, թէ ուստի՞ ծնանին սոքա:

«Զի ոչ ետ՝ զմեզ Աստուած, - ասէ, - ի բարկութիւն, այլ ի փրկութիւն կենդանութեան ի ձեռն Տեառն մերոյ Յիսուսի Քրիստոսի (Ա. Թեսալ. Ե. 9), որ մեռաւն վասն մեր» (Ա. Թեսալ. Ե. 10):

Տես, թէ որպէ՞ս ցանկացեալ էր մեր փրկութեանն, մինչ զի եւ զՈրդին իւր ետ վասն մեր, ոչ վայրասպար, այլ ի մահ: Մի՛ դանգիտեր, ապա մերձենալ առ Աստուած եւ մի զմտաւ ինչ ածեր վասն մաւտաւոր վշտացս եւ նեղութեանց, զի որ զմիածինն ետ, զի փրկեսցէ, յի՞նչ այլ ինչ վասն քոյոյ փրկութեան խնայիցէ: Զի եթէ

1 ԺՊԲ. 1
2 US եղ

առ դատաւորն երթայաք, որ դատելոց էր զմեզ, եւ նա այնչափ սէր ցուցեալ վասն մեր, մինչեւ զՈրդին իւր սպանանել. կասկածէա՞ք ինչ: Հաւատասցուք յաւերինակ սիրոյն եւ ականակցուք բարութեանցն մեծամեծաց, զի զառհաւատչեայն ընկալաք: Զի կարի անմտութիւն է զայսպիսի երախտաւոր չսիրել:

«Արթո՛ւն՝ եղերուք, հսկեցէք», զի մարթի արթնոյն ննջել եւ չգործել ինչ բարիս, վասն այնորիկ նովիմք զմտաւ ածէ, թէ եւ «հսկեցէք» եւս, այսինքն՝ թէ եւ մտաւք եւս արթուն լերուք: Զի եթէ մարմնովն ոք արթուն է եւ մտաւքն ննջէ, ընդ վայր լինի աշխատելն, յաղազս այնորիկ չէ պարտ մարմնով միայն աղաւթել եւ լեզուաւ սաղմոսել, այլ եւ մտաւքն կցորդ գտանել ասացելոցն, ըստ այնմ, թէ՛ «Սաղմոս ասացից (Սաղմ. Ը. 1) եւ ի միտ առից» (Սաղմ. Ը. 2). եւ թէ՛ «Սաղմոս ասացից Հոգւով եւ մարմնով» (հմմտ. Ա. Կոր. ԺԴ. 15):

Զի մարմին յորժամ ննջէ, տիրէ ի վերայ նորա բռնութիւն բնութեանն եւ ոչ ըստ կամաց մերոց ներգործէ ի մեզ: Եւ Հոգի, յորժամ թագաւորէ ի վերայ նորա քուն ձանձրութեանն, այսինքն՝ կարճմտութիւն եւ տրտմութիւն², տիրէ ի վերայ նորա թշնամին եւ գործէ նովաւ ինչ, զոր ոչ կամի նա: Տես՛ս, թէ որքա՛ն մեծ վնաս է ննջելն Հոգւոյն, քան մարմնոյն, ուստի յայտ է, թէ զարթուն կալն, զոր ասաց Տէրն, առաւել վասն Հոգւոյն ասաց, քան թէ մարմնոյն, իբրեւ զայն, զի ասէ. «Միտփեցարուք արդարութեամբ» (Ա. Կոր. ԺԵ. 34). եւ՝ «Զարթեայ, եւ ես ընդ քեզ եմ» (Սաղմ. ԸԼԸ. 18): Եւ վասն այնորիկ ոչ ձանձրանամք ի պաշտաւնս յայս:

«Արթո՛ւն՝ եղերուք, հսկեցէք եւ կացէք յաղալթս». եցոյց, թէ աղաւթքն զաւրութիւն ունի փրկել յայնմ աւուր երկիւղէն, որպէս գրէ Ղուկաս, թէ՛ «Յամենայն ժամ աղաւթս արարէք, զի արժանի լինիցիք զերժանիլ յայնմ ամենայնէ, որ լինելոցն է եւ կալ առաջի Որդւոյ մարդոյ» (Ղուկ. ԻԱ. 36): Ի սոյն տեղւոջ յիշեն Մատթէոս եւ Ղուկաս, թէ՛ «Որպէս էին յաւուրսն Նոյի եւ Ղովտայ, եւ ոչ գիտէին, մինչեւ եկն ջրհեղեղն եւ անձրեւն հրեղէն եւ երարձ զամենայնսն: Նոյնպէս եւ եղիցի յաւուրսն Որդւոյ մարդոյ» (Մատթ. ԻԴ. 38-39, հմմտ. Ղուկ. ԺԷ. 27):

1 US զգոյձ
2 US > եւ սրտմտութիւն
3 US զգոյձ] արթուն

Որ եւ այսու եւս ցուցանէ, թէ եւ զառաջինսն ինքն արար: Տայ եւ այլ եւս նշանս, որով յայտ առնէ, թէ չէ անտեղեակ աւուրն:

Եթէ երկու իցեն յագարակի եւ եթէ ի մահիճս, եւ եթէ աղայցեն ի մի երկանս, մինն առցի եւ միւսն՝ թողցի (հմմտ. Մաթթ. ԻԴ. 40):

Ջնոյն յայտ առնեն եւ այս աւրինակք, զի այնպէս յանպատրաստս մինչ ոչ ակն ունիցին եւ ոչ զմտաւ ածիցեն, հասանիցէ ի վերա նոցա:

Նա զի եւ ծառայքն եւ տեարք եւս վարին եւ մնան, եւ որք ի դիւրութեանն իցեն եւ որք յաշխատութեան, որպէս եւ ի հնումսն ասէ, թէ՛ «Յայնմանէ, որ յաթոռն արքունի նստէր, մինչեւ ցայն, որ ի յերկանսն կայր, զի ասաց, թէ դժուարաւ ապրին մեծատունք» (հմմտ. Մաթթ. ԺԹ. 23, Մարկ. Ժ. 25). ցուցանէ, թէ ոչ նոքա ամենեքեան կորնչին եւ ոչ աղքատքն ամենեքեան ապրին:

Թուի, թէ այսու եւ զայն ինչ յայտ առնիցէ, թէ դիւրաւ լինելոց է գալուստն, զի կէսք յանդաստանի եւ կէսք՝ ի ջրաղացս, եւ կէսք յանկողինս գտանիցին յանհոգս:

Տեսնե՞ս՝ զի ա՞րդ զամենայն ստոյգ գիտէ, յաղագս որոյ ասէ.

«Ձգոյ՛ լոկերուք, հսկեցէք եւ կացէք յաղալթս». դարձեալ մերժէ ի հարցուածոյն, զի կասկածագոյնս կամի լինել նոցա եւ միշտ կազմ գտանել գործովք բարեաց, ըստ որում այլուր ասէ. «Եղիցին գաւտիք ձեր պնդեալ ընդ մէջ» (Ղուկ. ԺԲ. 35), այսինքն՝ զի պատրաստիցիմք սրբութեամբ, «եւ ճրագունք ձեր լուցեալք» (Ղուկ. ԺԲ. 35), զի աշխարհս իբրեւ գիշեր է եւ կարաւտ լուսոյն արդարութեան:

«Ձի ոչ գիտէք, երբ ժամանակն իցէ». զո՞ր ժամանակ՝ զգատաստանին, եւ ոչ ասաց, թէ՛ «Ոչ գիտեմ», այլ թէ՛ «Ոչ գիտէք», զի թէ գիտէին բազումք, թէ երբ մեռանիցին, ընդ այն ժամանակս եւեթ պնդէին:

Արդ, զի մի՛ յայն ժամանակ միայն պնդիցին, նմին իրի իսկ ոչ զհասարակաց ժամն ասէ եւ ոչ զիւրաքանչիւր առանձինն, զի կամի, թէ ցանկ այնմ ակն ունիցին եւ միշտ զբարիս գործիցեն, վասն որոյ զերկոսինն անյայտ արար:

Որպէս այր մի գնացեալ ի փար աշխարհ՝ թողուցու գտուն իւր եւ փացէ ծառայից իւրոց իշխանութիւն եւ իւրաքանչիւր զգործ իւր. եւ դոնապանին պափուէր փայցէ, զի արթուն լինիցի (ԺԳ. 34):

«Այր մի» զանձն իւր անուանէ: «Գնացեալ», որ կատարեաց զամենայն տնաւրինական գործս իւր՝ զծնունդն, զմկրտութիւնն, զխաչն, զյարութիւնն եւ համբարձաւ յերկինս:

«Գնացեալ ի փար աշխարհ». յատուկ եւ առանձին տեղի մարմնոյն՝ հողն է, ըստ այնմ, թէ՛ «Հող էիր եւ ի հող դարձցիս» (Ծննդ. Գ. 19), իսկ մարմինն՝ Քրիստոսի ոչ ետես զսպականութիւն, վասն որոյ եւ ոչ դարձաւ ի հող, այլ զնաց յաւտար աշխարհ, այսինքն՝ ի ձեռն փրկչին մերոյ Բանին Աստուծոյ, յերկինս եղեւ տարեալ՝ ի նոր եւ յանսովոր տեղի:

«Թողուցու գտուն իւր», որ է եկեղեցի, «եւ փացէ ծառայից իւրոց իշխանութիւն». ըստ Մատթէոսի՝ «ութ տաղանդ» (տես Մաթթ. ԻԵ. 14-30) եւ ըստ Ղուկասու՝ «տասն մնաս» (տես Ղուկ. ԺԹ. 11-27) է իշխանութիւնն, զոր ետ, որ են հաւատքն եւ ազգի ազգի շնորհքն, որ կատարելագործի ի մէջ եկեղեցւոյ:

«Եւ իւրաքանչիւր զգործ իւր». այսինքն՝ զի ոչ եթէ որպէս զչար Տէր եւ զանիմաստ վերակացու, որ զայն գործ յանձնէ ծառայից իւրոց, զոր ոչ կարեն կատարել, այլ նա քաղցրութեամբ եւ իմաստութեամբ բաժանեաց զգործսն՝ ըստ ուժոյ եւ զաւրութեան, որպէս զի հեղգացեալքն դատապարտեսցին:

Յաղագս այսորիկ ումեմն՝ հինգ, ումեմն՝ երկուս եւ ումեմն՝ մի ետ զքանքարսն, իւրաքանչիւր ըստ իւրում կարի:

Ձի եթէ նմա, որում զմի քանքարն ետ, զհինգն էր տուեալ, կարէր պատճառել զծանրութիւն գործոյն եւ արդարանալ, իսկ զի ըստ կարողութեանն կարգեալ էր նմա զգործն, յաղագս այսորիկ ոչ պատճառեաց զտկարութիւն կամ զծանրութիւն, այլ զհեղգութիւնն, որով եւ դատապարտեսցաւն իսկ:

Ապա ումեմն ամենայն աւրէնք եւ պատուիրանք, զոր կարգեաց Քրիստոս, կարելիք են եւ հնարաւորք, թէպէտ ծուլից եւ հեղգացելոց անկարելիք եւ անհնարինք թուեցեալք լինին, ըստ որում եւ ասէ. «Եւ իւրաքանչիւր զգործ իւր». այսինքն՝ ի գործ եւ ի վաստակ, յոր ախորժեաց, ետ նմա զաւրութիւն բարեգործել, ըստ այնմ, թէ՛ «Աւրէնսգէտ առնես զնա ի ճանապարհի, յոր եւ հաճեցաւ» (Սաղմ. ԻԴ. 12). որպէս եւ Յովհաննէս զգիշուորսն եւ զմաքսաւորսն եւ զայլսն խրատէր, թէ զինչ պարտ էր առնել (տես Ղուկ. Ժ. 10-14):

Եւ դոնապանին պափուէր փայցէ, զի արթուն լինիցի (ԺԳ. 34):

«Դոնապան» կոչէ զքահանայս, զվարդապետս եւ զեպիսկոպոսս, զի սոցա ասաց Քրիստոս, թէ՛ «Տաց ձեզ զփականս արքայութեանն երկնից, եւ զոր միանգամ կապիցէք յերկրի, եղիցի կապեալ յերկինս, եւ զոր արձակիցէք յերկրի, եղիցի արձակեալ յերկինս» (Մաթթ. ԺԶ. 19):

Այսինքն՝ դուք դոնապանք արքայութեանն, զի զորս կամիք, ածէք յարքայութիւնն, եւ զորս ոչ կամիք ի բաց հալածէք, ըստ որում եւ այլուր զծոյլս ի քահանայիցն, որք չարութեամբ իւրեանց արգելք եղեն ոմանց՝ մտանել յարքայութիւնն, ասէր. «Վայ ձեզ, քահանայիցդ, որ փակէք զարքայութիւնն երկնից առաջի մարդկան, դուք ոչ մտանէք, եւ որք մտանենն, չտայք թոյլ մտանել» (հմմտ. Մաթթ. ԻԳ. 13):

Եւ զիս՞րդ փակէ քահանայն զարքայութիւնն իւր եւ այլոց. ի ձեռան գործոցն չարեաց, զի բազումք ի ժողովրդեանէն, որ ատեցաւք են չարի, յորժամ տեսանեն զքահանայն ի չարիս, յաւժարին եւ ինքեանք գնոյն գործել, մանաւանդ՝ թէ եւս չար լինին քան զնոսա, զի յորժամ զայնպիսի քահանայն տեսանիցէ ժողովուրդն, եւս չար ի յռութիւնս հաստատի: Զի յորժամ առաքինի իցէ վարդապետն, նմանաւ եւեթ լինի նմա, իսկ յորժամ անպիտան, անցուցանէ չարութեամբն վասն դիւրութեամբ ի չարն միտելոյ:

Եւ դոնապանին պատուէր ետ արթուն լինել, որպէս եւ առ Եզեկիէլ ասաց. «Որդի մարդոյ, դէտ կացուցի զքեզ ի վերա ժողովրդեանդ (Եզեկ. Գ. 17), եթէ ոչ զգուշացուցանիցես զամբարիշտն դառնալ ի ճանապարհէ իւրմէ չարէ, զարիւն նորա, որ է մեղքն եւ չարիքն, ի քէն պահանջեցից» (Եզեկ. Գ. 18):

Զգուշացուցանելս ոչ միայն բանիւ ասէ, այլ գործով, որ է գիւրագոյն ուսումն, որպէս եւ վասն Քրիստոսի ասէ, թէ՛ «Ակաւ Յիսուս առնել գործով եւ ապա ուսուցանել բանիւ» (հմմտ. Գործք Ա. 1): Եւ յորժամ յայտնեաց զմեծութիւն գործոյն եւ զձանրութիւն վտանգին, ապա ի վերայ երբ, թէ՛

Արդ, արթուն կացէք, զի ոչ գիտէք՝ երբ փեր փանն գայցէ (ԺԳ. 35):

Այսինքն, թէ՛ միտ դիք եւ տեսէք, թէ յի՞նչ կոչեցեալ էք եւ կամ որպիսի՞ քննութիւն լինելոց է ձեզ, զի քահանայքն՝ ասէ, հզաւրագոյն պահանջեցին, քանզի զգործոց ամենեցուն, որ հաւատացան ձեզ՝ զարանց եւ զկանանց, նաեւ զմատաղ մանկուտոյ եւ զփոքր

աղջկանց, համարս տալոց էք, վասն որոյ ասէ. «Արթո՛ւն կացէք»։ Զի թէ որք անբան ոչխարաց հաւտից հովիւք եւ վերակացուք են, այնքան հոգան եւ խնամ տանին ի գիշերի եւ ի տունջեան՝ պահել ի գողոց եւ ի գազանաց։

Որպէս ասէր առ Լաբան Յակոբ, թէ՛ «Ի գիշերի ցրտակէզ լինէի եւ ի ցերեկի արեւու այրեցեալ լինէի, եւ զգողունին յանձնէ տուժէի, եւ զգազանաբեկ ոչ բերէի» (հմմտ. Ծննդ. ԼԱ. 38-41):

Ապա որչա՞փ պարտին հոգալ եւ խնամ տանել այնոքիկ, որ բանական հաւտի վերակացուք են, զոր գնեաց Քրիստոս արեամբն իւրով։

Որպէս ասաց Պաւղոս առ երիցունսն եփեսացւոց. «Զգոյշ լեռուք յորում եղ զձեզ Հոգին Սուրբ տեսուչս՝ հովուել զժողովուրդս Տեառն, զոր գնեաց արեամբն իւրով» (հմմտ. Գործք Ի. 28):

Արթո՛ւն կացէք, զի ոչ գիտէք՝ երբ փեր փանն գայցէ՝ յերեկորեայ, եթէ ի մէջ գիշերի, եթէ ի հաւախաւսի, եթէ ընդ առաւալսս (ԺԳ. 35):

Թէպէտ եւ զիւրաքանչիւրսն ի ժամուցն ընդ անգիտութեամբ փակեաց, սակայն ի մէջ գիշերին ի դէպ է իմանալ զգալուստն լինել։ Զի ի մէջ գիշերին սպանան անդրանիկքն Եգիպտոսի (Կեն Ելք ԺԲ. 29) եւ ի մէջ գիշերի ասէ՛ եղեւ բարբառ. «Ահա փեսայ գայ, արիք ընդ առաջ նորա» (Մաթթ. ԻԵ. 6). եւ «Յայնմ գիշերի, եթէ իցեն երկու ի մի մահիճս, մին՝ առցի եւ միւսն՝ թողցի» (Լուկ. ԺԷ. 34): Ապա ուրեմն ի գիշերի լինի յարութիւնն ի ժամուն, յորում յարեաւ Քրիստոս ի գերեզմանէն, եւ յայտ է, թէ ի գիշերի միշաբաթուն, զի ի սոյն գիշերի ստեղծ Քրիստոս գերկինս եւ գերկիր, եւ ի սոյն գիշերի յարեաւ։ Արդ, զի ի գիշերի լինելոց է յարութիւնն եւ ի միաշաբաթին գիշեր, գայս յայտնեցին Գիրք, ապա թէ յորո՞ւմ միաշաբաթուջ, գայս յայտնեցին։

Գուցէ եկեալ յանկարծակի՝ զփանիցէ զձեզ ի քուն (ԺԳ. 36):

Այսինքն՝ ի հոգս եւ ի զբաղմունս աշխարհի եւ աշխարհայնոցս, որ է սուտ եւ սնտոսի, զի որպէս այնոքիկ, որ ի քուն են, ոչ տեսանեն զիրս ճշմարիտս, այլ զփորձնական երեւմունս եւ զառաջաւք տեսութիւնս, որք յորժամ զարթին, ոչինչ է, զոր տեսինն։

Նոյնպէս եւ այնոքիկ, որք զհեշտութիւն աշխարհի սիրեցին եւ վեյելից սորա պարապեցին ի կեանս յայտ, յորժամ ի ձեռն մահու ի

բաց ելանեմք յաշխարհէս, ապա ստուգապէս տեսանեմք, թէ ոչինչ է վայելչութիւն աշխարհիս, մանաւանդ, թէ ոչընչին ոչինչ, ըստ ժողովողին, թէ՛ «Ունայնութիւն ունայնութեանց, ամենայն ինչ սնտաի է եւ ընդունայն» (Ժող. Ա. 2):

Բայց գոր ձեզդ ասեմ, ամենեցուն ասեմ՝ արթուն կացէք (ԺԳ. 37):

Ի յայս կատարումն փակեաց զբանն, որպէս հասարակաց պատուիրան ի վերայ ամենայնի, որով յետինքն լուիցեն առաջնոցն, որպէս զի լիցի¹ համանգամայն հասարակաց բարի եւ ոչ միոյ անձին:

«Ամենեցուն ասեմ՝ արթուն կացէք». ոչ միայն վերակացուաց եւ առաջնորդաց եկեղեցւոյ հրամայէ արթուն կալ, այլեւ ամենայն հաւատացելոց, որք հրաման ընկալան՝ ամենայն պահպանութեամբ պահել զգրուես սրտից, զի բնաւ չար փորձութիւն թշնամւոյն մի՛ մտցէ ի ներքս, եւ Տէր մեր մի՛ գտցէ զմեզ ի քուն, որպէս ասէ Պաւղոս. «Արթուն լերուք եւ մի՛ մեղանչէք» (Ա. Կոր. ԺԵ. 34):

«Ամենեցուն ասեմ՝ արթուն կացէք». զի մի՛ ոք պատճառիցէ, եթէ չուսոյց ոք եւ կամ թէ զեղծ ինչ էին վարք վարդապետին, վասն այնորիկ ոչ զգուշացայ անձին, սորին վասն զպատճառս զայս բառնալով, ամենեցուն պատուիրէ խնամ տանել առաքինութեան եւ արթուն պահել զմիտս եւ զգայութիւնս: Զի ոչ եթէ անբան եւ անմիտ կենդանի ես, այլ իմաստուն եւ հանճարեղ, զի այնպէս ստեղծ զքեզ Աստուած, զի եւ առանց աւրինաց եւ վարդապետաց եթէ կամիս, կարաւ իս զործել զբարիս, որպէս յայտնի է ի բազմաց: Ըստ որում գրէ Պաւղոս, թէ՛ «Հեթանոսք, որք զաւրէնս ոչ ունին, ի բնութենէն խրատեալք, զաւրինացն գործէին, որք ընթեռնուն զբանս աւրինացն գրեալ ի սիրտս իւրեանց» (հմմտ. Կորն. Բ. 14-15):

Զի որպէս հրէայքն ի գրոյն ուսանէին զարժանն, այսպէս եւ հեթանոսք ի սրտէն եւ ի մտացն խղճէ: Ասէ եւ մարգարէն, թէ՛ «Եղիցին ամենայնքն ուսեալք յԱստուծոյ, եւ մի եւս ուսուցանիցէ իւրաքանչիւր զեղբայր իւր եւ ասիցէ, թէ՛ ծանի՛ր զՏէր, զի ամենեքեան ծանիցեն զիս՝ ի փոքրկանց մինչեւ ցմեծամեծս» (հմմտ. Երբ. Լ. 10-11):

¹ US մի [hgh] lghh

Չունիս առաքինի վարդապետ, այլ ունիս զըուն վարդապետն՝ զՔրիստոս. ի նմանէ ուսիր, որ ասաց. «Ուսարուք յինէն, զի հեղեմ» (Մաթթ. ԺԱ. 29) եւ մի՛ նայիր ընդ այժմու վարդապետսն, այլ ընդ նա եւ ընդ նորին աշակերտսն:

Որպէս եւ Պաւղոս գրէ, ոչ միայն կորնթացւոցն, այլեւ ամենայն հաւատացելոց, որք՝ յայնժամ եւ որք՝ այժմ, թէ՛ «Նմանաւորք եղերուք ինձ, որպէս եւ ես՝ Քրիստոսի» (Ա. Կոր. ԺԱ. 1):

ՍԱՐԳԻՍ ԿՈՒՆԴ

Եւ դուք նմանողք մարդկան, որ ակն ունիցին փետոն, թէ երբ զայցէ ի հարսանեաց (Ղուկ. ԺԲ. 36):

Իգ. Զգուշացուք զալստեան նորա, որպէս զիմաստուն կուսանսն, որք պայծառ լապտերաւք պատրաստ մտին յառազաստ Տեառն իւրեանց վաղվաղակի (փնս Մաթթ. ԻԵ. 1-13):

Զի գաւրի ընդ մէջ ածիցէ եւ բազմեցուցէ (ԺԲ. 37):

US Ըստ ասացելումն. «Զգեցաւ Տէր զաւրութիւն՝ ընդ մէջ իւր ածաւ» (Սաղմ. ՂԲ. 1): Եւ է արգարութեամբ պնդեալ զմէջ իւր, որով զիւրաքանչիւր ոք ըստ արժանեաց բազմեցուցէ եւ ըստ արժանեաց սպասաւորէ:

ԻԳ Ո՛վ քանի՞ անչափ է մարդասիրութիւն նորա, զի զոր առնու, բազմապատիկ հատուցանէ: Առնու զապականացու ողորմութիւնն կարաւտելոցն եւ տայ զանապական կեանսն:

Եւ անցեալ՝ պաշտիցէ գնոսա (ԺԲ. 37):

US Արդ՝ զանց արարեալ Տեառն զերեւելաւքս սպասաւորէ այնոցիկ, որ արթունք են յիմանալիսն:

ԻԳ Զի զոր մեք գաւտի ածեալ ծառայեցաք կամաց նորա, զոր պատուիրեաց, ծառայէ եւ նա մեզ: Զամենայն կամս մեր կատարէ եւ զցանկութիւնս մեր ընու, եւ ամենայն աստուածային խորհրդոցն տեղեակ առնէ զմեզ: Այսպէս սպասաւորիմք ի Տեառնէ: Թէ յառաջնում պահուն:

US Առաջին եւ երեկոյին պահ մարդոյն մանկութեանն հասակն է:

Եթէ երկրորդ (ԺԲ. 38):

ՍՏ Երիտասարդականն է:

Երրորդ (ԺԲ. 38):

Ծերականն է:

ՍՏ Արդ՝ Հրամայէ արթուն կալ յամենայն Հասակի, զի արժանացին բազմեալ եւ սպասաւորեալ ի Տեառնէ:

ԻԳ Մի՛ ծախել զժամանակս ամենայն Հեղգութեամբ եւ յոչ ժամու սպասաւորել, զի որ այսպիսի խորհրդով վարին շուայտել:

Եթէ գիտէր փանուփէրն յորում պահու գող գայ (ԺԲ. 39):

Այսինքն է՝ եւ ո՛չ դուք զժամ մահուն եւ ո՛չ զիմ գալըստեանն:

ՈՍԿ Զի թէ գիտէին բազումք, եթէ երբ մեռանիցիմք, ընդ այն ժամանակս եւեթ պնդէին: Վասն որոյ զիւրաքանչիւր ժամանակ կենացն վախճանի ո՛չ արար յայտ, զի արթունք լիցին: Թուի, թէ զծոյլսն պատկառեցուցանէ. որչափ ընչիցն հոգան ի գողոցն, այնչափ հոգոց իւրեանց դարման ո՛չ տանին:

Դուք եղերուք պապրասպք, զի յորում ժամու ո՛չ ակն ունիցիք, գայ Որդիի մարդոյ (ԺԲ. 40):

ՍՏ Ո՛չ լինիցիք պատրաստականք, այլ իբրեւ անզգայք գնալիք աստի: Վասն այսորիկ ի սատակումն քնածիցն գալոց է աւրն այն: Զոր աւրինակ, թէ նա գիտէր՝ փախչէր, նոյնպէս եւ դուք, եթէ էիք պատրաստականք՝ ապրէիք: Զայս ո՛չ միայն վասն կատարածի աշխարհի ասաց, այլեւ վասն կատարածի իւրաքանչիւր մարդկան: Արդ՝ արթուն լերուք ի գործս բարիս, յորժամ Տէրն ձեր կոչէ զոգիսդ ի մարմնոյդ:

Ասէ Պեպրոս. Առ մե՞զ է առակդ, եթէ՞ առ ամենեսեան (ԺԲ. 41):

ԻԳ Կամեցաւ ուսանել զխորհրդոյն զապրութիւնն, թէ ամենեցուն է պատուէրս եւ Հատուցումն, թէ նոցա, որ յայնժամ լսէին:

Ասէ Տէր. «Ո՛վ է հաւաքարիմ եւ իմաստուն փոքրս, գոր կացուցէ փեր ի վերայ ծառայից իւրոց՝ փալ կերակուր ի ժամու» (ԺԲ. 42):

ՍՏ Զի ո՛չ խորեաց ինչ եւ գողութեամբ ո՛չ ընդ վայր գտերունիսն ծախեաց: Հաւատք եւ իմաստութիւն, յորժամ զառաքինի ոք գտանէ, զհետ երթան միմեանց, զի որպէս Պաւղոս եւ Պետրոս եւ նո-

ցին նմանողքն, որք տան կերակուր զվարդապետութիւնս իւրեանց ի ժամու արժանաւորացն: Իսկ որ ունի զիմաստութիւն խորամանկութեամբ, ո՛չ հաւատարիմ է այնպիսի: Եւ ո՞րք են իմաստունք հանգոյն աւճին եւ տնտեսուն անիրաւութեան: Վասն պաշտաւն եւ Հնազանդութեան սրբոցն, զի սպ[աս]աւորէ, ծառայէ Աստուծոյ, որպէս Մովսէս պաշտաւնեայ, ծառայ Աստուծոյ ասի (փէս Ելք ԺԴ. 31), եւ Աստուած տեսող լինի ծառայից իւրոց:

Երանի ծառային այնմիկ, զոր եկեալ փեր իւր գրանիցէ արարեալ այնպէս: Ի վերայ ինչից իւրոց կացուցէ գնա (ԺԲ. 43-44):

ՍՏ Զի՞նչ այնմ պատուոյ զուգական կայցէ: Ո՞ր բան գայն մեծարանս կարէ յանդիման կացուցանել զերանութիւնսն եւ զբարութիւնսն, յորժամ երկնից թագաւորն, որ զամենայն ի ձեռին ունի, գմարդ ի վերայ ինչից իւրոց կացուցանէ:

Ապա թէ ասիցէ ծառայն չար ի սրբի իւրում. «Յամէ փեր գալ» (ԺԲ. 45):

ՍՏ Ո՛հ հեզ եւ թշուառական ծառային. ապաքէն ունիս ակն, ընդէ՞ր ո՛չ հոգայցես:

Մար. Զի չար եւ յիմար ասէ, որ արասցէ ըստ յիմարութեան եւ զգործսն վատթարութեան:

Սկսանիցի հարկանել զծառայակիցսն իւր (ԺԲ. 45):

ՈՍԿ Թուի ինձ, եթէ գայս զթշնամանողացն եւ զազահացն ասէ, եւ ամբաստանութիւնս բազում[ս] ցուցանէ զնոցանէ, որ փոխանակ կերակրելոյ գան:

Հարկանէ ուրել եւ ըմպել եւ արբենալ (ԺԲ. 45):

Թուի ինձ զբարեկամացն ակնարկէ աստ. ընդ որկորստութեանն մեծամեծ տանջանք կան, զոր գուշակեաց: Ո՛չ վասն այնորիկ առեր, զի ի բարեկեցութեան վայելեսցես, այլ զի յողորմութիւն ծախեսցես: Թէպէտ եւ յարդար վաստակոց է կամ ի հայրենեաց, վասն աղքատաց հաւատացաւ քեզ այն:

Եկեալ փեր ծառային այն՝ կտրեսցէ գնա ընդ մէջն (ԺԲ. 46):

Վասն որոյ զցասուամն յայտ արար: Ձի զսէրն ծանոյց աշակերտաց իւրոց, քանզի այն իսկ է, որ յերկինս տանի եւ Քրիստոսի նմանողս առնէ ըստ կարի մերում:

Եւ ծառայ, որ գիտիցէ զկամս փեռն իւրոյ եւ ո՛չ ըստ կամացն պարրաստե[ս]ցէ, արբցէ գան բազում (ԺԲ. 47):

ԻԳ. Գիտութեամբ չափով կշռէ: Վասնզի որ գիտութեամբ արհամարհոտ գտաւ պատուիրանին, աններելի ունի զդատաստանս:

Եւ որ ոչն գիտէ, եւ արժանի գանի գործէ (ԺԲ. 48):

Իսկ որ առ տգիտութեանն յանցեալ, կրեսցէ սակաւ պատուհասայլ ներելով, զի արդար է ի դատաստանի Աստուած: Իմ եթէ չէր եկեալ եւ խաւսեալ ընդ նոսա, մեղ ինչ ո՛չ գոյր նոցա: Բայց արդ՝ չի՛ք պատճառս վասն մեղաց իւրեանց:

Ամենայնի, որում շար փուաւ, շար պահանջեսցի ի նմանէ (ԺԲ 48):

ՍԳ. Ո՛չ է հաւասար ամենեցուն տուեալ եւ ո՛չ հասարակ ամենեցուն աւանդեալ ի Քրիստոսէ:

Եւ որում բազում փուաւ, առաւել խնդրեսցի (ԺԲ. 48):

Աւանդեալ Պետրոսի եւ Ղուկասու, բայց ո՛չ հաւասարապէս: Ուստի եւ առաւելագոյն խնդրեսցէ ի Պետրոսէ:



ԱՌԱԿ ՏԱՄՆ ԿՈՒՍԱՆԱՅ

Մարթ. ԻԵ. 1-13

ՍՏԵՓՆՈՍ ՍԻՒՆԵՅԻ

Յայնժամ նմանեսցի արքայութիւնն երկնից Ժ. կուսանացն (Մարթ. ԻԵ. 1):

«Ժ. (տասն) կուսանք»՝ Ժ. (տասն) զգալութիւնքս են ի մեզ. Հինգ հոգեւորք եւ Հինգ՝ մարմնաւորք, եւ են մարմնաւորք՝ տեսանելիք, լսելիք, հոտոտելիք, ճաշակելիք, շաւշափելիք. նոյն աւրինակ եւ հոգեղէնն: «Արդ, որ ետես զիս, ետես զՆայր իմ» (հմմտ. Յովի. ԺԴ. 9), ասէ. մարմնոյ աշաւք եւ Հրէայքն տեսին զՔրիստոս, բայց զՆայր ոչ տեսին. ապա ուրեմն զՀոգւոյն տեսանելեաց ասէ, նոյնպէս եւ լսել եւ հոտոտել եւ ճաշակել եւ շաւշափել. արդ, որ հոգւոյ զգալութեամբք ծառայեսցուցանէ զմարմնական զգալութիւնս, որպէս Սաղմոսարանով տասնաղեալ սաղմոսեցից զքեզ (տես Սաղմ. ճեսԳ. 9), այնպիսին իմաստուն է, վասն զի Հինգ իմաստուն զգալութեամբքն վարեցաւ, իսկ որ միայն մարմնեղէն զգալութեամբք, այնպիսին յիմար, քանզի ոչինչ զանազանի յանասնոց: Ղամպարս ասէին ունել եւ սոքայ, որպէս եւ իմաստունքն, վասն զի հոգի ամենեցուն հաւասար եւ վարդապետութիւն առաքելոցն եւ այլոց վարդապետացն:

Յիմարքն առեալ զլապտերսն իւրեանց, եւ ձեթ ոչ առին ընդ ինքեանս (հմմտ. ԻԵ. 3):

«Ձեթ»՝ բանն առաքելական եւ մարդարէական, զայսպիսոյ ձիթոյ պարարտութիւն ոչ ունէին հեղեալ յոգիս իւրեանց:

Եւ ի յամել փեսային, ննջեալ ամեներեան քուն իցին (հմմտ. ԻԵ. 5):

Ներէ դեռեւս Քրիստոս եւ յամէ հասուցանել իւրաքանչիւր ումեք ի մէջը. ննջեն, վասն զի դեռ եւս յաշխարհիս եւ ամենեքին:

Ի մէջ գիշերին ձայն եղեւ. «Ահա փեսայ գայ, արիք» (հմմտ. ԻԵ. 6):

Ի ննջել ամենեցունց, հրեշտակք գոչեն մեծ ձայնիւ եւ ի լսելիս ննջեցելոցն, եւ լինի յարութիւն ամենեցունց:

«Պատրաստքն» (տե՛ս Մապթ. ԻԵ. 10) կեցեալք հոգեղէն զգայութեամբք մտանեն ընդ Յիսուսի յարքայութիւնն, իսկ յիմարքն արտաքսին յարքայութենէն:

Եւ իմաստունքն պապասխանեցին եւ ասեն. «Գուցէ ոչ իցէ բաւական մեզ եւ ձեզ» (ԻԵ. 9):

Յորժամ ժամանակ էր ուսանելոյ, չուսայք. արդ, ժամանակիս վարդապետութիւնն անցեալ է, ոչ մեք ուսուցանել բաւական եմք եւ ոչ դուք ուսանել. լսելի է եւ այսպես ի վերջին հասակի ծերութեան եւ ի հիւանդութեան ոք եթէ կամիցի ըստ մարմնեղէն զգայութեանց չվարիլ, ոչ կարէ. ապա թէ եւ կամիցի ուսանել եւ կեալ ըստ հոգեղինացն, յանկարծակի հասանէ վախճանն, որպէս եւ բանս ցուցանէ եւ փակի որպէս դուռն ի վերայ նորայ:

ԱՐԻՍՏԱՎԷՍ ԵՒ ԵՓՐԵՄ

Յայնժամ նմանեալ լիցի արքայութիւնն երկնից փասն կուսանաց (հմմտ. Մապթ. ԻԵ. 1):

Եւ արդ, է՞ր վասն ի կուսանաց դէմս հանէ զառական. ո՛չ վայրապար ինչ ճառէ վասն մեծամեծ երեսացն, յորժամ զկուսութենէ խաւսեցաւ, ասէ. «Են ներքինիք, որ զանձինս իրեանց արար ներքինիս վասն արքայութեանն երկնից: Եւ որ կարողն է փանել, փարցի» (Մապթ. ԺԹ. 12): Քանզի գիտէ իսկ զբազումս ի մարդկանէ, թէ մեծ իմն փառս անտի ունին, եւ արդար եւ մեծ իսկ են իրքն: Եւ յայտ անտի է, զի ոչ ի հնումն ի նախնեացն ի սրբոց արանցն պահանջեցաւ այս ուղղութիւն եւ ոչ ի նորումն եմուտ ընդ հարկաւ աւրինաց, քանզի ո՛չ եթէ հրաման ինչ ետ, այլ ի կամս լսողացն ապաստան արար¹. նմին² իրի եւ Պաւղոս ասէր, թէ՛ «Վասն կուսանաց հրաման ինչ ի Տեսուի ո՛չ ունիս» (Ա. Կոր. Է. 25): Եւ քանզի մեծ էին իրքն, եւ բազում փառք թուէին անտի բազմաց, զի մի, որ զայն ուղղիցէ, զամենայն ուղղեալ համարիցի եւ զայլոցն եւս անփոյթ առնիցէ, զնէ զայն առակ

¹ Ա ապաստ արար] ապաստան արար
² Ա Ծման] Ծմին

ի միջի, որ կարող է¹ հաւանեցուցանել, զի թէ զայլն ամենայն ունիցի զկուսութիւնն եւ յողորմութեան ե[ւ]ղոյն² լոկ իցէ, ընդ պողոնկին արտաքս ելցէ³ եւ ընդ տմարդիսն եւ ընդ անողորմսն կայցէ: Նմին իրի եւ յիմարս կոչէ զնոսա, զի որք զմեծամեծ վաստակսն կրեցին յանձինս, ի փոքունս յոռացան եւ մատնիչք եղեն:

Իսկ իմաստութիւն ոչ զկուսութիւն նոցա կոչէ, զի ահաւասիկ ամենիքեան նոքա կուսանք էին, այլ զգործս նոցա բարիս անուանէ⁴ «իմաստութիւն»: Նաեւ Եւայ ի կուսութեանն իւրում ամբարիշտեցաւ եւ անկեալ մերժեցաւ ի դրախտէն փափկութեան, զի թէ սրբութեան հրեշտակաց նմանող լինի կուսութիւն քո, տես դու, զի եւ հրեշտակք սուրբ են⁵ ի նախանձուէ այլովքն հանդերձ, եւ զոր աւրինակ ո՛չ պարտաւորեցար դու ի շնութենէ, սոյնպէս մի պարտաւորեսցիս դու ի սրտմտութենէ եւ ի բարկութենէ:

Ա «Լապտերս» աստ զկուսութեան շնորհսն կոչէ եւ զսրբութեան յստակութիւն: «Իւղ»՝ զմարդասիրութիւնն եւ զողորմութիւնն եւ զկարաւտելոցն աւգնութիւն (տե՛ս Մապթ. ԻԵ. 3):

Ի յամել փեսային, նիրհեցին ամենիքեան եւ ի քուն մտին (ԻԵ. 5):

Յուցանէ, թէ ո՛չ ժամանակք անցին ի միջի, եւ այսու դարձեալ զաշակերտսն եւս մերժէ առ ի չունելոյ իսկ եւ իսկ ակն արքայութեան նորա: Քանզի այնպէս իմն սպասէին, վասն այնորիկ իսկ ստէպ նահանջէ⁶ զնոսա յայնմ ակնկալութենէ, հանդերձ այնու եւ զայն եւս յայտ առնէ, թէ՛ քուն է մահն, քանզի «ննջեցին», ասէ (տե՛ս Մապթ. ԻԵ. 5):

Ի հասարակ գիշերի բարբառ եղև (հմմտ. ԻԵ. 6):

Կամ թէ առակին այն պատշաճէր, եւ վասն այնորիկ⁷ ի նոյն յարէ եւ կամ դարձեալ ցուցանէ, թէ ի գիշերի լինելոց է յարութիւնն՝ ըստ⁸ բարբառոյն Պաւղոսի յայտ արարեալ՝ ասէ, թէ՛ «Տրամանաւ ի ձայն հրեշտակապետի ի փող յերին իջանէ յերկնից» (հմմտ. Ա. Թեսալ. Դ. 15):

¹ Բ բաւական է
² Ա դեղոցն] եւղոյն
³ Բ ելանէ
⁴ Բ անուանեաց
⁵ Ա հրեշտակացն սուրբ է] հրեշտակք սուրբ են
⁶ Ա պահանջէ] մահանջէ
⁷ Բ այնորիկ իսկ
⁸ Բ > ըստ

Եւ զի՞նչ յայտ՝ «փողքն առնիցեն», կամ զինչ «աղաղակն», թէ՛

Փեսայ գայ: Եւ իբրեւ կազմեցին զլապտերսն, ասեն յիմարքն զիմաստունսն. «Տուք մեզ յեղոյոյ ձերմէ» (ԻԵ. 6-8):

Դարձեալ զնոսա «յիմարս» կոչէ, յայտ արարեալ, թէ՛ չիք ոք յիմարագոյն քան զնոսա, որ յինչսն յօլովիցեն եւ անդը մերկ երթայցեն, ուր մարդասիրութեան պետք իցեն եւ բազում եւզոյ: Եւ ո՛չ այսու միայն յիմարք էին, այլ զի եւ անդ ակն ունէին առնուլ յընկերացն եւ յայնժամ ժամանակի խնդրէին¹, եւ քան զայն կուսանսն չէ՞ր ոք առաւել մարդասէր, որք այնու առաքինացան. եւ սոքա ո՛չ զամենայն խնդրեցին.

«Տուք մեզ,- ասեն,- իւղոյոյ ձերմէ» (ԻԵ. 8). զկարեւոր պիտոյիցն յայտ առնէ:

«Շիջանին,- ասէ,- լապտերքս մեր» (ԻԵ. 8):

Սակայն եւ այնպէս վրիպեցան, զի ո՛չ նոցա մարդասիրութիւնն, յորոց խնդրէինն եւ ոչ սոցա ժտութիւնս, որք յուզէինն², եւ ոչ պէտքն եւ կարիքն արարին նոցա հասանել յայնմն, զի ուսանիցիմք անտի, թէ ոչ ոք կարիցէ մեզ անդ աւզնական լինել, ո՛չ զի չկամիցի³, այլ զի չէ իսկ ձեռնհաս:

«Երթայք,- ասէ,- առ այնոսիկ, որ գնոյն փան, եւ գնեցիք» (հմմտ. ԻԵ. 9):

Եւ ո՞վ իցեն⁴, որ «գնոյն փան». աղքատքն՝ բանաւոր ծիծառունք: Եւ ո՞ւր իցեն՝ աստ, ի դրունս եկեղեցւոյ նստին, որք զհոգեւոր դարունն մեզ մարգարէանան. աստէն պարտ է խնդրել եւ ո՛չ յայնմ⁵ ժամանակի. աստէն պարտ է եւզ ժողովել, զի անդ լինիցի պիտանացու:

Եւ իբրեւ լուան,- ասէ,- գնացին [գնել]. Եկն փեսայն, եւ պապրաստքն մփին ընդ նմա, այլքն արփարոյ մնացին (հմմտ. ԻԵ. 10):

Յետ բազում վաստակոց, յետ այնչափ քրտանց եւ անհնարին պատերազմին յաղթութեան՝ նշանակ մոլեգին բնութեանն կանգ-

¹ Ա > խնդրիցն
² Բ խնդրիցն] յուզէինն
³ Ա չի կամեցի] չկամիցի
⁴ Բ > ով իցեն
⁵ Ա յայն

նելոյ, ամաւթալից մնացին եւ շիջելաւք լապտերաւք գնացին զլխարկեալք¹ եւ կորացեալք, զի չիք ինչ մթազոյն քան զկուսութիւնն, որ առանց եւզոյ իցէ: Արդ, զի՞նչ աւզուտ ի կուսութենէն եղեւ, յորժամ զփեսայն ո՛չ տեսին եւ բախելն զդուրսն չվճարեաց² ինչ, այլ զահագին բանսն լուան, թէ՛

«Երթայք ի բաց, չգիտեմ զձեզ» (հմմտ. ԻԵ. 12):

Յորժամ նա զայն ասիցէ, չիք այլ գեհեան չար քան զայն, ե՛ւ ոչ անհնարին տանջանք, մանաւանդ, թէ եւս դժնդակագոյն քան զգեհեն իցէ բանն, քանզի եւ որոց գործէին զանաւրէնութիւն, զնոյն ասաց:

«Արթուն լերուք, զի ոչ գիտէք զաւրն եւ ոչ՝ զժամն» (հմմտ. ԻԵ. 13):

Տեսանես, զիա՞րդ ստէպ զայս եւեթ ասէ, կարի իմն աւզուտ ցուցանէ զանգիտութիւն ելանելոյն մերոյ աստի:

Այս առակ յընչիցն ողորմութիւնս առնելոյ, վասն առնելոյ ասացեալ է եւ զմիւսն, որ զհետ նորին, առ այնոսիկ³, որ ո՛չ ընչիւք, եւ ո՛չ բանիւք, ե՛ւ ոչ վերակացութեամբ, ե՛ւ ոչ այլիւք կամիցին աւզուտ լինել ընկերաց, այլ զամենայն թագուցանիցեն: Եւ է՞ր վասն այս⁴ առակ թագաւոր ընձայեցուցանէ եւ նա փեսայ, զի ուսանիցիս, թէ զիարդ ընդանութեամբ է Քրիստոս, ընդ այնպիսի կուսանս, որք զինչսն ի բաց մերկանայցեն:

ՅՈՎՀԱՆՆԷՍ ԾՈՐԾՈՐԵՅԻ

Յայնժամ նմանեցի արքայութիւն երկնից փասն կուսանաց, որոց առեալ զլապտերս իրեանց՝ ելին ընդ առաջ փեսային եւ հարսին (Մապթ. ԻԵ. 1):

Յառաջ ասացելոցն աւրինակ կարգէ, զի որպէս իւրոյ զալստեանն՝ զթգենին, այսպէս իմաստուն եւ չար ծառայիցն՝ զկուսանսն: Եւ թէ ընդէ՞ր ի կուսանս առակէ ի տասն: Նախ՝ զի մեծագոյն են իրք կուսութեանն. յայտ յայնմանէ է, զի ասաց. «Են ներ-

¹ Բ՝ զլխակորք
² Բ վճարեցաւ
³ Ա > առ այնոսիկ
⁴ Ա > այս

քինիք, որ զանձինս իրեանց արարին ներքինիս վասն արքայութեանն Ասործոյ, եւ որ կարողն է փրանել՝ փարցի» (Մարթ. ԺԹ. 12), եւ Պաւղոս, թէ՛ «Վասն կուսութեան հրամանս ի Տեառնէ ոչ ունիմ» (հմմտ. Ա. Կոր. Է. 25), եւ ի նախնումն ոչ պահանջեցաւ այս ուղղութիւն: Եւ արդ, զի մեծ են եւ առանց հարկի եղաւ, զի մի՛, որ զայն ուղղիցէ, զամենայն կատարեալ կարծիցէ եւ զայլոցն անփոյթ արասցէ, ցուցանէ աստ, թէպէտ զայլն ամենայն ունիցի կուսութիւն եւ զողորմութեանն իւր ոչ ունիցի, ընդ պոռնիկան եւ ընդ տմարդիսն արտաքս անկանիցի: Եւ երկրորդ՝ զի ո՛չ զամենայն հոգւոց ասէ, այլ զհաւատացեալ ուղղափառաց, եւ «կոյս», զի պարկեշտութեամբ վարեցան ի կենցաղս, որպէս աւրէն է քրիստոնէից, զի որպէս կոյս ասի, որ անփորձ է ամուսնութեան, նոյնպէս եւ զգայութիւն սոցա ոչ փորձեաց սատանայ զտասուենսն:

Իսկ «փրասն» ասէ զկուսանսն կամ վասն տասն զգայութեանց հոգւոյ եւ մարմնոյ, զորս սուրբս պահեցին, քանզի տասն սուրբ է, կամ զտասն բան Աւրինացն, եւ զհաւատոյ, եւ զաղաւթիցն: Այլեւ աշխարհս տասն է, որով նոքա վարեցան: Կամ զերկու կողմանց՝ զիմաստնոցն եւ զյիմարացն զգայութիւնսն ասէ, քանզի ամենայն հոգի ի մարմին է, եւ զգայութիւն հինգ են հոգւոյն, որով ներգործէ ի մարմինն, զորս խառնեալ յիրեարս՝ տասն ասաց զկուսանսն եւ ապա յետոյ յերկու հինգ բաժանէ: Դարձեալ՝ տասն զբովանդակ բնութիւնս մարդկան կոչէ, քանզի յետ ինուոցն՝ տասն սոքա են՝ ըստ դրամին (Մարթ. ԺԸ. 12-14, Ղուկ. ԺԵ. 8-9) եւ ոչխարին (Ղուկ. ԺԵ. 8-10): Կամ՝ տասն կատարեալ թիւ է, զկատարեալ բնութիւնս Ազամայ նշանակէ, իսկ զսոսա յերկու հինգ բաժանէ, զի իւրաքանչիւր ոք ի մարդկանէ հինգ զգայութեամբ վարի, եւ հինգ զգայութիւնս տասն է, զի իւրաքանչիւր զգայութիւն երկու է, որպէս երկու աչք եւ զոյգ լսելիք եւ հոտոտելիք, եւ ճաշակելիք եւ շաւշափելիք, վասն այսորիկ «փրասն» ասէ եւ ի հինգ բաժանէ: Եւ «կոյս» դնէ, զի սոքա նախ անփորձ էին ի մեղաց, կամ զի զգայութիւնք առանց յիրելոյ ի զգալիսն՝ անվնաս է եւ անարատ: Իսկ «իմաստուն» եւ «յիմար»՝ զի ոմանք ուղիղ վարին զգայութեամբն, եւ ոմանք՝ թիւր:

«Որոց առեալ զլապտերս իրեանց՝ ելին ընդ առաջ փեսային եւ հարսին»: Նախ զհաւասարութիւնն ասէ կուսանացն եւ ապա զզանազանութիւնն, քանզի կոյս լինել եւ զլապտերս ունել եւ ընդ առաջ ելանել՝ հասարակք հաւասարք էին, այսինքն՝ սուրբք եւ հաւա-

տացեալք ամենեքեան, որպէս ասացաք, կամ թէ՛ կուսանք իսկ էին: Իսկ լապտերաւքն կամ զշնորհս կուսութեանն յայտ առնէ, որպէս ոմանք ասեն, կամ զբարի գործն, զի ամենեքեան ունէին՝ ըստ այնմ. «Լուսաորեսցէ լոյս ձեր առաջի մարդկան», եւ «Ոչ լուսանն ճրագ եւ դնն ընդ գրուանաւ», եւ «Տեսցեն զգործս ձեր բարիս» (Մարթ. Ե. 15, 16). քանզի տեսանել աչացն է, եւ սա ի լոյսն հայի: Կամ զլուսաւորութիւն վարդապետութեան առաքելոցն եւ վարդապետացն «լապտերք» կոչէ, քանզի եւ յայս՝ հասարակաց վայելիցին: Եւ ելիւքն եւս հաւասարք են, քանզի ամենեքեան յանդիման լինելոց են Քրիստոսի՝ ըստ առաքելոյ (Կրն Բ Կոր. Ե. 10), եւ թէ՛ «Ջձեզ գմաննեսեսան իբրեւ զկոյս մի խաւսեցայ յաւղիման առնել Քրիստոսի» (հմմտ. Բ. Կոր. ԺԱ. 2): Կամ՝ «ելին ընդ առաջ» ասելն զայն ցուցանէ, զի նախ քան զգալուստ փեսային բարձրացան առաքիլութեամբ՝ պատրաստելով զինքեանս գալստեանն նորա: Եւ ա՛յլ ազգ. զի բազումք յառաջ ելին ի կենցաղոյս նախ քան զգալուստ բանին:

Իսկ զի ասէ «փեսային եւ հարսին», կամ զընտանութիւնն Քրիստոսի, որ առ կուսանսն, յայս համեմատէ, կամ «փեսայ» զբանն ասէ եւ «հարսն»՝ զմարմինն, քանզի յոր միացաւն, նովին միութեամբ եւ յերկնից գայ, որպէս եւ երթն: Կամ «փեսայ»՝ զՔրիստոս, եւ «հարսն»՝ զնախայարուցեալ սուրբսն եւ զյափշտակեալսն, զոր «եկեղեցի անդրանկաց» ասէ Պաւղոս (Եբր. ԺԲ. 21), այլեւ զհրեշտակսն իմա, քանզի եւ նոքա մերձաւորք են Քրիստոսի:

Հինգն ի նոցանէ յիմարք էին, եւ հինգն՝ իմաստունք (ԻԵ. 2):

Բաժին մի, ասէ, ի բոլորիցն, որ զհինգ զգայութիւնս ունէին, յիմարք էին, եւ մասն մի նովիմբք զգայութեամբք՝ դարձեալ իմաստունք, քանզի եւ այսու հասարակք էին: Եւ «յիմարս» ասէ զհինգն՝ կամ թէ՛ ի մեծամեծսն վաստակեցին եւ ի փոքունս յոռացան եւ մատնիչք եղեն, քանզի զի՞նչ քան զայս յիմարութիւն կայցէ՝ յինչս յաւելուլ եւ անդր մերկ ընթանալ, ուր բազում մարդասիրութեան պէտք են եւ իւրոյ: Կամ թէ՛ մարմնեղէն զգայութեամբ միայն վարեցան յաստիս, որպէս զանասունս, զորս եւ «յիմարս» կոչէ: Այլեւ բարեգործք էին եւ կոյսք, սակայն փառս ի մարդկանէ պահանջէին, զորս յիրաւի «յիմարս» ասաց: Իսկ «հինգն՝ իմաստունք»՝ իմաստութիւն ո՛չ զկուսութիւնն ասէ, որպէս ոմանք կարծեն, քանզի ամենեքեան կուսանք էին եւ ոչինչ աւգտեցան, որպէս Եւա ի կուսու-

թեան իւրում ամբարշտեցաւ եւ ի դրախտին փառացն զրկեցաւ: Այլ կամ զբովանդակ սրբութիւնն ասէ, որպէս հրեշտակք ունէին, մինչ զի ի տրտմութենէ եւ ի բարկութենէ սուրբս լինել եւ ի նախանձուէ եւ ո՛չ միայն ի պոռնկութենէ, կամ թէ՛ բարեգործ եւ ողորմած, եւ զայն ի փառս Աստուծոյ, եւ ի վերին կենացն հայեցումն իմացաւդ եւ տեսաւդ, կամ թէ՛ զգաստ գոլով զմարմնոյն զգայութիւնն ծառայեցուցանեն զգայութեան հոգւոյն՝ «իմաստուն» անուանեցան:

Յիմարքն աօին զլապտերսն եւ ձէթ ընդ իւրեանս ոչ բարձին: Իսկ իմաստունքն աօին ձէթ ամանաւք ընդ լապտերս իւրեանց (ԻԵ. 3-4):

Աստ ընդ հասարակութեանն դնէ եւ զզանազանութիւնն, քանզի ձէթ, ասէ, ոչ բարձին յիմարքն իբրեւ զիմաստունսն. իսկ «իմաստունքն աօին,- ասէ,- եւ ձէթ ամանաւք»: «Իսկ յիմարքն աօին զլապտերս իւրեանց», այսինքն՝ զկուսութիւն առանց ողորմութեան կամ զհաւատս առանց գործոց, կամ զբարի գործոց փոխարէնս զփառս ի մարդկանէ, զոր ժողովեցին ի միտս իւրեանց: Իսկ ձէթ՝ զանտի կենացն պայծառութիւնն եւ զլոյս փառաց անմատչելի լուսոյն ոչ ունէին յինքեանս: «Իսկ իմաստունքն աօին,- ասէ,- եւ ձէթ ամանաւք ընդ լապտերս իւրեանց»: Զփառացն գեղեցկութիւն ժողովեցին իբր յաման ի միտս իւրեանց՝ խառնելով ընդ վարս կենաց իւրեանց, որ պայծառ էր իբրեւ զլոյս, զոր «լապտեր» ասէ, կամ ընդ հաւատոցն եւ զգործն լծեցին: Այլեւ ընդ կուսութեանն զողորմութիւնն եւ զմարդասիրութիւնն զգեցան՝ վարժեալք ի լուսաւոր բանից առաքելական եւ մարգարէական վարդապետութեանց, զոր ի ձէթ առակէ, եւ զի հեղին զսոսա ի յաղքատս, զոր «աման» կոչէ, զի յորժամ պակասիցէ այս, ընկալցին զնոսա:

Քննելի է եւ այն, թէ ընդէ՞ր նախ յիմարքն աօին զլապտերս առանց իւղոյ եւ ապա՛ իմաստունքն: Կամ թէ՛ մարմնական ախտ, զորս յիմարութիւն ասէ, ի ծննդենէ նախ ի զգայութիւնս ընդելանայ, եւ ապա յետոյ անձնիշխանական պայծառանայ ի ձեռն տեսութեանն, կամ թէ՛ յիմարացն նախ քարոզեցաւ բան հաւատոյն, որպէս հրէից երբեմն եւ ապա հեթանոսաց, եւ թէ՛ «Ոչ եկի կոչել զարդարս, այլ զմեղատրս յապաշխարոյթին» (Ղուկ. Ե. 32): Յորս հայեցեալ ոմանք՝ զառակս կուսանացս վասն հրէից եւ հեթանոսաց ասեն ասացեալ, յիմար՝ զհրէայսն, որպէս Մոսէս ասաց, թէ՛ «Ազգ

մի խորհրդակորոյս եւ նոքա եւ ժողովորդ յիմար եւ ոչ իմաստուն» (հմմտ. Բ Ար. ԼԲ. 28), եւ իմաստուն՝ զհեթանոսս, որ Հոգւովն իմաստնացան, եւ «լապտեր»՝ զԱւրէնսն, զոր բարձին առանց շնորհաց, եւ հեթանոսք ընկալան զգիրն հանդերձ Հոգւովն, քանզի «ոչ եկի լուսանել, այլ լնուլ» (Մարթ. Ե. 17), յայտ է՝ իւղով: Արդ, թէպէտ այս յարմար թուի, բայց ճշմարիտ առաջինն է, քանզի ի հինն ոչ եղեւ կուսութիւն, որպէս ասացաք:

Եւ ի յամել փեսային՝ նիրհեցին ամենեքեան եւ ի քուն մտին (ԻԵ. 5):

«Յամել» կամ զվրէժխնդրութեան ներումն ասէ յանցաւորացն, առ որով ոչ միայն ծուլանան յիմարքն, այլեւ իմաստունքն, զի գոյ եւ քուն իմաստնոյն՝ ըստ գրեցելումն, այսինքն՝ կարծիք գայթաղութեան, որպէս ասէ Դաւիթ, թէ՛ «Նախանձեցայ ես ընդ անարէնս» (Սաղմ. ՀԲ. 3), եւ՝ «Փոքր միս ես՝ սասանեալ էին գևացք» (հմմտ. Սաղմ. ՀԲ. 2), գայթաղեցան եւ աշակերտքն, էանց սուր եւ ընդ կուսին անձն. այս է ամենեցուն ի քուն մտանելն: Կամ «յամել»՝ զգալստեանն ասէ ժամանակ, յորում հարսնացեալ հոգիքն սպասեն անմահ փեսային: «Եւ նիրհեցին ամենեքեան եւ ի քուն մտին»՝ ընտրեալքն եւ մեղաւորքն: «Նիրհել»՝ վասն հիւանդութեանն, եւ «քուն»՝ վասն մահուանն ասէ: Կամ զնիրհելն արդարոցն իմա, զի մահ նոցա ոչ է քուն, այլ նիրհումն, զոր Պաւղոս «ննջել» ասէ (Ա. Կոր. ԺԵ. 6, 18), իսկ մեղաւորացն՝ քուն՝ վասն խոր թմբրութեանն եւ յիմարութեանն: Եւ դարձեալ՝ յամելն ցուցանէ, թէ ոչ բազում ժամանակք անցանն ընդ մէջ, այլ սակաւ ինչ յամումն է եւ յապաղումն, որով մերժէ զաշակերտսն՝ առ ի չունելոյ ակն արքայութեան նորա:

Բայց գոյ ի տեղիս տարակուսանս, թէ ընդէ՞ր աստ յամել ասէ փեսային, եւ Պաւղոս գրէ, թէ՛ «Տէր մերձ է» (Փիլիպ. Դ. 5), եւ այլուր, թէ՛ «Ոչ յամեցուցէ Տէր զաներիս իր» (Բ. Պետ. Գ. 9), իսկ Յակոբոսս, թէ՛ «Դարաստանն առ դուրս կայ» (հմմտ. Յակոբ. Ե. 9): Ա՛յս իսկ է լուծումն. զի որ ի յաւիտենական հայի, Տէր մերձ է եւ առ դուրս, իսկ որ ի կենցաղս՝ յամել թուի վասն հեշտութեանն: Եւ ա՛յլ ազգ. զի «մերձ եւ առ դուրս» ասելն զբազում անգամ այցելութիւն առնելն նշանակէ՛ ըստ այնմ. «Ես ընդ ձեզ եմ զամենայն աուրս մինչեւ ի կապարսաւ աշխարհի» (Մարթ. ԻԸ. 20), իսկ «յամելն»՝ վասն հանդերձեալ գալստեանն ասէ:

Տեսցուք եւ զայն, թէ է՞ր վասն ի քուն մտին: Եւ ասեմք. նախ՝ վասն բնութեանն, զոր եւ ինքն կրեաց վասն Ադամայ վճռին՝ թէ. «Նող էիր եւ ի հող դարձցիս» (Ծննդ. Գ. 19), զի դեռ յաշխարհիս են ամենեքեան, եւ երկրորդ՝ զի ըստ չորս պատճառաց ննջէ մարդ, եւ զմենեսեան սոքա կրեցին: Մի՛ յորժամ ոք նստեալ ի ճանապարհի եւ սպասէ ընկերին գալստեան եւ ի յամել նորին ննջէ. մնացին եւ սոքա եւ ի յամելն ննջեցին, որպէս ասաց: Եւ երկրորդ՝ վասն աշխատութեանն, որպէս գրեալ է Յուդիթն, թէ՛ «Ի ճանապարհին աշխարհացայ եւ մրեալ ի քունն ննջեցի» (հմմտ. Յուդիթ ԺԲ. 4). վաստակեցան եւ սոքա՝ յայտ է ահա: Եւ երրորդ՝ ի տրտմութենէ, որպէս աշակերտքն տրտեալ վասն մահուն Յիսուսի՝ ննջէին, որոց ասաց Տէր, թէ՛ «Ո՛չ կարացէք ժամ մի արթուն կալ» (Մատթ. ԻԶ. 40). կրեցին եւ կուսանքն տրտմութիւն, որպէս Դաւիթ եւ Պաւղոս՝ «Զարիանապագ քրտում գնայի» (Սաղմ. ԼԷ. 7), եւ թէ՛ «Տրտմութիւն կալա զիս ի վերայ մեղատրաց» (Սաղմ. ԾԺԸ. 53), եւ թէ՛ «Տրտմութիւն է ինձ եւ անպակաս ցար սրտի իմոյ» (հմմտ. Նոսմ. Թ. 2): Եւ չորրորդ՝ ի չարչարանաց, որպէս Պետրոս ննջէր ի մէջ երկուց զինուորաց (տես Գործք ԺԲ. 6), եւ Եղիա ի ներքոյ ցրդենւոյն վասն չարչարելոյն յԱքաաբէ (տես Գ. Թագ. ԺԹ. 3-5): Զորս յուրվս կրեցին յանձինս չարչարանք յիմարքն՝ Համանգամայն եւ իմաստունքն, վասն այսոցիկ պատճառաց ննջեցին եւ ի քուն մտին:

Եւ ի մէջ գիշերի եղև բարբառ. «Ահա փեսայ գայ, արի՛ք ընդ առաջ նորա» (ԻԵ. 6):

Ըստ առակին պատշաճի գայս դնէ, թէ՛ «ի գիշերի». կամ ցուցանէ, թէ ի գիշերի լինելոց է յարութիւնն, որպէս ազատութիւնն Իսրայէլի ի գիշերի, եւ մահ անդրանկացն, եւ որպէս ծնունդն եւ յարութիւնն Քրիստոսի: Իսկ «ի մէջ գիշերի», զի անգիտելի է, քանզի որպէս ի մէջ գիշերի ոչ ոք գիտէ զինչ գործէ ընկեր նորա, նոյնպէս եւ զալուստ նորա: Եւ դարձեալ՝ գիշեր վասն կուսապաշտութեանն եւ մեղացն եւ կախարդութեանն ասէ՛ ըստ մարգարէին, թէ՛ «Գիշեր լիցի ձեզ ի քնելնէ, եւ երեկոյացի յղձութենէ» (հմմտ. Միք. Գ. 6). արդ, յորժամ այսոքիկ դարձեալ գաւրանան, լինի գալուստ նորա: «Եղև բարբառ,- ասէ,- «Ահա փեսայ գայ, արիք ընդ առաջ նորա»»: Զայս եւ Պաւղոս ասէ, թէ՛ Հրամանաւ ի ձայն Հրեշտակապետի եւ ի փող յետին իջանէ յերկնից (տես Ա. Թեսաղ. Դ. 15), քանզի «փող» զբարբառն

ասէ, թէ «Ահա փեսայ գայ»: Վասն է՞ր յառաջագոյն ասաց, թէ՛ «ընդ առաջ ելին փեսային եւ Հարսին», եւ այժմ, թէ՛ «փեսայ գայ»: Կամ գլխովն եւ զանդամն նշանակէ, կամ նախ փեսայ գայ ի բարբառն առաջին, եւ սուրբքն ելանեն ընդ առաջ յաւդս, եւ ապա կրկին բարբառ, յորում ամենեքեան, որ ի հող մահու ննջեալք են, յառնեն Հաւասար ի մեծաձայնութենէ Հրեշտակագոչ փողոյն, որպէս ասէ.

Յայնժամ յարեան ամենայն կուսանքն եւ կազմեցին զլապտերս իւրեանց (ԻԵ. 7):

Ի մահահանգիստ քնոյն միահամուռ յառնեն արդարքն եւ մեղաւորքն՝ ի ձայնէ բարբառոյն գաւրացեալք, քանզի ձայն Տեսուն ձայն գաւրութեան է՛ ըստ մարգարէին (տես Սաղմ. ԻԸ. 4). իսկ կազմելն զլապտերսն՝ գործոց իւրեանց համար եւ հաշիւ առնելն է եւ զհատուցումն պատրաստեալ ընդունել:

Ասեն յիմարքն ցիմաստունսն. «Տո՛ւք մեզ յիւղոյդ ձերմէ, զի ահա շիջանին լապտերքս մեր» (ԻԵ. 8):

Ա՛յս իսկ կարի յիմարութիւն էր, թող զառաջինն, զի յայնժամ ժամանակի խնդրէին եւ ակն ունէին առնուլ, եւ թէպէտ մարդասէրք էին կուսանքն, ոչ ետուն, եւ այն՝ զի ոչ զամենայնն, այլ մասնաւոր խնդրեցին՝ ըստ այնմ. «Էարբ Նոյ ի գիւտոյն» (Ծննդ. Թ. 21)՝ ո՛չ զամենայն, որպէս եւ ոչ Աբրահամն կաթիւ ջրոյ գովացոյց զպապակ մեծատանն (տես Ղուկ. ԺԶ. 24-26): «Տուք մեզ,- ասեն,- յիւղոյդ ձերմէ», այսինքն՝ աւգնեցէք մեզ բարի գործովք եւ աղաւթիւք ձերովք: «Ահա շիջանին լապտերքս մեր». քանզի որպէս ասացաք, զբարի գործսն «լապտեր» ասէ, եւ այն դատարկ էր, զի յոյս նոցա յանցաւոր աշխարհիս էր, եւ ի փառս մարդկան արարին, իսկ մարդկան գովութիւն չիջաւ յետ մահուանն, քանզի անցաւոր էր, զի թէ ի մարմնաւորս, մինչդեռ կենդանի է, պակասի գովութիւնն, զի՞նչ ասես յետ մահու: Եւ զիա՞րդ պակասէ՛ ասացէ ոք. քանզի մարդ առաւել խնդրէ զգովութիւնն, եւ որքան ի գործն է՛ գովեն, եւ նա ի գովութիւնն յեցեալ՝ աւր ըստ աւրէ պղերգանայ, եւ ի թուլանալ գործոյն՝ դադարէ եւ գովութիւնն. ապա ուրեմն յիրաւի ասացին, թէ՛ «Շիջանին լապտերքս մեր»: Կամ թէ՛ կազմութիւն լապտերացն կուսութեան շնորհն է, եւ որք ոչ ունին գողորմութեանն իւղ՝ շիջաւ փառք կուսութեանն, քանզի ոչինչ աւգտեցան յայնմանէ, թէ՛-

պէտ ողորմութիւն խնդրէին, քանզի ողորմածացն ողորմութիւնն սասցեալ (Կրն՝ Մարթ. Ե. 7):

Պապասխանի եփուն իմաստունքն եւ ասեն. «Գուցէ ոչ իցէ մեզ եւ ձեզ բաւական, այլ երթայք ի վաճառականս եւ գնեսջի՛ք ձեզ» (ԻԵ. 9):

Թէ կուսանք էին եւ զլապտեր գործոցն ունէին եւ ոչ առին, ապա զի՞նչ գործեսցեն, որ ոչ են կոյսք՝ ոչ հոգևով եւ ոչ մարմնով եւ ոչ զգայութեամբք, եւ ոչ ունին լապտերս գործոց բարեաց: Ինձ թուի, թէ այնպիսիքն ոչ յառնեն ի դատաստան, այլ ի կորուստ եւ յապականութիւն եւ ի մահուանէ ի մահ փութացեալք, քանզի սասցին, թէ՛ «գուցէ ոչ իցէ մեզ եւ ձեզ բաւական»: Ո՛չ սասցին ոչ տալ, որ տմարդութեան նշանակ էր, այլ թէ՛ «ոչ է մեզ եւ ձեզ բաւական», զի ոչ նոցա մարդասիրութիւնն եւ ոչ սոցա ժտութիւնն եւ ոչ հարկաւոր պիտոյիցն կարիք արժանացոյց զնոսա խնդրոյն: Է՞ր վասն վասն անբաւականութեանն, յորմէ ուսանիմք, թէ ոչ ոք է անդ ձեռնհաս ումեք, ո՛չ զի ոչ կամիցի, այլ զի ո՛չ կարիցէ, որպէս ասէր Աբրահամ, թէ՛ «Վիհ մեծ է» (Ղուկ. ԺԶ. 26), եւ այլ ոմն՝ «Թէ իցեն անդ Յոք եւ Նոյ եւ Դանիէլ, զանձինս իրեանց միայն ապրեցուցանեն» (հմմտ. Եզեկ. ԺԴ. 14), եւ թէ՛ «Արդարն հազի կեցցէ» (Ա. Պեպ. Դ. 18):

Եւ ա՛յլ ազգ. յորժամ ժամանակ էր ուսանելոյ, ոչ ուսայք, արդ, ժամանակ վարդապետութեան անցեալ է, ո՛չ ումեք ուսուցանել կարեմք, եւ ոչ դուք՝ ուսանել: Եւ զարձեալ՝ ցուցանէ, թէ անյագ է մարդկային հոգին աստուածային փառացն, վասն այսորիկ ասէ Դաւիթ, թէ՛ «Յագեցայց յերեւիլ երեսաց փառաց քոց» (Մաղմ. ԺԶ. 15)՝ զիտելով, թէ հոգի ոչ երբէք լրանայ յանտի փառացն տեսութենէ: «Երթայք,- ասէ,- ի վաճառականս եւ գնեսջի՛ք». այսինքն՝ երթայք ողորմութիւնն արարէք եւ գնեցէք ի բանաւոր աղքատացն եւ ի հոգեւոր ծիծռանցն, որք զհոգեւոր գարունն մեզ մարգարէանան՝ ի դրունս եկեղեցւոյ նստելով. ա՛նդր պարտ է ժողովել, զի աստ պիտանացու լինիցի: Կամ՝ երթայք ի վաճառականսն՝ ի մարդիկ, որոց զկուսութիւնն եւ զայլ բարեգործութիւնն վաճառեցէք եւ զգովութիւնն առէք, քանզի «այն իսկ են վարձք նոցա» (Մարթ. Զ. 2):

Իբրեւ նոքա գնացին գնել, եւ եկն փեսայն, եւ պապրասպքն մփին ընդ նմա ի հարսանիսն, եւ փակեցաւ դուռնն (ԻԵ. 10):

Ոչ եթէ յետս դարձան յաշխարհ գնել, քանզի այն անհնար էր՝ ըստ այնմ, թէ՛ «Նոզի, որ ելանէ, այլ ո՛չ ես դառնայ» (Մաղմ. ՆԷ. 39), այլ ա՛յս իսկ է, զի գնացին ի միտս իւրեանց, որպէս Պետրոս երբեմն, իմանալ զփառս գործոցն, զոր ի մարդկանէ ըմբոշխնեցին, եւ զի այն շիջեալ էր, եւ մինչ յայս տարակոյսս կային, թէ զի՛նչ առնիցեն, եկն փեսայն եկեղեցւոյ՝ փառաւքն Հաւր, եւ ժողովեցան առ նա հարսուքն, որք պատրաստեալ էին զանձինս նմա՝ ի փառս Աստուծոյ առնելով զգործս իւրեանց, եւ մտին յերկնաւոր առագաստն՝ միանալով ընդ Բանին ի հոգեւոր եւ յանձառ խրախութիւնն: «Եւ փակեցաւ դուռնն». այսինքն՝ ողորմութեանն դուռն, որ բաց է աստանաւր, եւ մարդասիրութեանն գուլթ, կամ գործոյ ժամանակն, որպէս տնտեսն ասէր, թէ՛ «Գործել ոչ կարեմ, մութանալ ամացն» (Ղուկ. ԺԶ. 3), քանզի յոյժ ամաւթ է խնդրելն եւ ոչ առնուլն, որպէս սոքա: Տես եւ զա՛յն, զի որպէս նախքան գննջելն ունէին երիս հասարակութիւնս եւ մի զանազանութիւնս, այսպէս եւ յետքնոյ մահուն գտաւ ի նոսա երիս հասարակութիւնս եւ մի զանազանութիւնս, քանզի ննջելն եւ յառնելն եւ կազմելն զլապտերսն հասարակաց էր, իսկ մտիլն ընդ փեսային եւ նոցա արտաքոյ մնալ՝ որիչ եւ զանազան, որ նշանակէ, թէ հոգևով եւ մարմնով եւ մտաւք հաւասարք էին, այլեւ զաւրէնսն՝ զբնականն եւ զգրաւորականն եւ զաւետարանականն, հանգոյն ընկալան, բայց ի պաշտաւնն Աստուծոյ բաժանեցան, զի ոմն ի փառս Աստուծոյ, իսկ ոմն ի փառս մարդկան, վասն այսորիկ եւ անդ որոշեցան: Եւ աստ զարձեալ ցուցանէ, թէ նախ արդարքն մտանեն ի փառս, եւ ապա մեղաւորքն արտաքսին ի տանջանս, որպէս ասէ.

Յեփոյ գան եւ այլ կուսանքն եւ ասեն. «Տէ՛ր, Տէ՛ր, բա՛ց մեզ»: Նա պապրասխանի եփ եւ ասէ. «Ամէ՛ն ասեմ ձեզ, եթէ ո՛չ գիտեմ զձեզ» (ԻԵ. 11-12):

Դէմք է այս առակիս, զի այսպէս կարգէ, կամ թէ՛ այնպես պատահէ լինել, որպէս այնոքիկ, որք ասէին, «Ո՞չ յանուն քո զաւրութիւնս արարաք եւ դեւս հանաք, եւ ի հրապարակս մեր ուսուցեր», առ որս ասաց, թէ՛ «Ոչ գիտեմ զձեզ» (հմմտ. Մարթ. Է. 22, 23): Ինձ թուի, թէ որ ինչ աստ կատարի, անդ պատկեր եւ ձեւ առնու, զի սոքա առանց ողորմութեան էին: Եւ կամ, որպէս ասացաք, զգործս իւրեանց եւ զվաստակս ի գովեստ մարդկան ծախեցին, եւ բազում

անգամ յողորմութիւն յորդորէր Գիրք, եւ թէ՛ «Տէր ցրուէ գոսկերս մարդահաճոյից» (Մաղմ. ԾԲ. 6), եւ թէ՛ «Մի՛ առնէք ի ցոյցս մարդկան» (հմմտ. Մալթթ. Զ. 1), քարոզէին միշտ, եւ նոքա զայս լուեալ՝ յետս ձգէին եւ ոչ անսային, այլ կախեալ զողորմութենէն Աստուծոյ կային եւ ի գործս իւրեանց վստահանային, զոր Գիրք ոչ գիտէր զաւրէնս զայստսիկ, վասն այսորիկ յորժամ անդր ընթացան, զնոյն տեսին, զոր աստ գործեցին:

Եւ կամ այլ ազգ ցուցանէ ասելն, թէ՛ «յեպոյ գան». զի թէպէտ մարդասէր լինի ոք յետ անդր գնալոյն, ոչինչ շահի եւ կամ ի պատժոցն զերծանի, քանզի աստ ոչ չոգաւ: Բայց կարի աղէտ ինձ թուի եւ դառնագոյն տանջանք, զի յետ այնքան պատերազմացն յաղթութեան եւ գործոցն երկասիրութեան՝ ի բաց վարեցան, որք շիջեալ լապտերաւք եւ ամալթալից եւ զլիսարկեալ կորանաւք յետս չոգան՝ ոչինչ աւգուտ գտեալ ի կուսութենէն, որ առանց իւզոյ էր, եւ ոչ ի գործոցն, որ ի փառս աշխարհի ներգործեալ կատարէր՝ զահագինն զայն լսելով բարբառ, թէ՛ «Ո՛չ գիտեմ զձեզ», այսինքն՝ ի փառս իմ ճգնեալ եւ կամ արինաց իմոց հետեւաւղ եղեալ: Որ ինձ յոյժ չար եւ անհնարին տանջանք եւ դժնդակագոյն քան զգեհեանն թուի, հեռանալ ի վայելչութենէ փառացն, որոյ գեղեցկութեանն ոչ գոյ չափ, եւ մերձաւորս լինել զիւաց, որոց կորուստն է պատրաստեալ: Յորոց փրկեցէ զմեզ Քրիստոսն մեր եւ Աստուած, որում փառք եւ պատիւ վայել է միշտ ընդ Հաւր եւ Հոգւոյն իւրոյ, այժմ եւ յանբաւ յաւիտեանս յաւիտենից. ամէն:

Արթոն կացէք, զի ո՛չ գիտէք զաւրն եւ ոչ զժամն (ԻԵ. 13):

Աստանաւր յայտնապէս դնէ զչահ անգիտութեան աւուրն, զի բազում աւգուտս գործէ՝ արթունս առնելով զմեզ եւ զգաստս՝ պատրաստել աներեկ աւուրն՝ բարի գործովք, զի մի՛ մնացուք արտաքս ըստ շիջման հինգ կուսանացն:

ԳՐԻԳՈՐ ՏԱԹԵՒԱՅԻ

Նմանեսցի արքայութիւնն Ժ. կուսանաց (Մալթթ. հմմտ. ԻԵ. 1):

Յայսմ առակէ Զ. (6) իրս ուսուցանէ մեզ.

Ա. Նախ՝ «կոյս» կոչէ զազգ մարդկան:

Բ. Երկրորդ՝ «յիմար» եւ «իմաստուն» ասէ (ԻԵ. 2):

Գ. Երրորդ՝ «փեսայ» կոչէ զինքն եւ Հարսն՝ «գեկեղեցի» (ԻԵ. 5):

Դ. Չորրորդ՝ զժամ յարութեանն ասէ:

Ե. Հինգերորդ՝ զբարբառ հրեշտակացն:

Զ. Վեցերորդ՝ զառագաստն բացեալ եւ փակեալ ոմանց:

Հարց. Վասն է՞ր ի դէմ կուսանացն առակէ:

Պատասխան. Ա. Նախ՝ զի մեծ պատիւ է կուսութեան: Եւ յայտ է ի չորից.

Ա. Առաջին՝ զի ի մէջ մարդկան փառաւոր էր, որպէս յայտ է ի ներքինեացն, որ ի մարդկանէ լինին: Եւ «ոմանք» վասն արքայութեան ասաց Տէրն:

Բ. Երկրորդ՝ զի ի հինն եւ ի նորս սակաւք եղեն, որպէս Եղիայ եւ Իեղիսէոս եւ Մկրտիչն եւ աւետարանիչն:

Գ. Երրորդ՝ զի ոչ հրամանաւ եղ, այլ ըստ կարողութեան. ասաց. «Որ կարողն է փանել, փարցէ» (Մալթթ. ԺԹ. 12):

Դ. Չորրորդ՝ ասէ առաքեալ. «Վասն կուսանաց հրաման ի Տեսնել ոչ ոմին» (Ա. Կոր. Է. 25), այլ գովեմ, թէ՛ «լինին իբրեւ զիս» (հմմտ. Ա. Կոր. Է. 7):

Բ. Երկրորդ՝ զի մի, որ զկուսութիւն ունին, միայն բաւական համարեսցին եւ ծուլացին:

Գ. Երրորդ՝ ուսուցանէ, թէ որ կոյսն է եւ յիմար, ընդ պոռնիկն արտաքս ելցէ: Եւ յայտ է յԵւայէ, որ կուսութեամբ մեղաւ եւ ել ի դրախտէն: Եւ հրեշտակք կոյսք էին եւ ամբարշտութեամբ դեւք եղեն:

Հարց. Ո՞րք են «Ժ. կուսանք» (ԻԴ. 1):

Պատասխանի. Ա. Նախ՝ ամենայն ազգ մարդկան՝ չարք եւ բարիք, որպէս Ժ. (10) զրամն եւ զմինն կորուսեալ:

Բ. Երկրորդ՝ ամենայն հաւատացեալք՝ արդարք եւ մեղաւորք, որպէս Ժ. (10) մնասն (Ղուկ. ԺԹ. 11-27) եւ քանքարն (Մալթթ. ԻԵ. 14-30):

Գ. Երրորդ՝ իւրաքանչիւր մարդ. Ժ. (10) զգայութեամբ, Ե.ն (5) Հոգոյն իմաստունք են եւ քննողք, եւ Ե.ն (5)՝ մարմնոյն յիմարք, զի ամենայն ինչ հեշտանան, որպէս Ժ. (10) քաղաք, ասաց, ունել (Ղուկ. ԺԹ. 17):

Հարց. Վասն է՞ր «փասն» (ԻԵ. 1) ասաց:

Պատասխանի. Վասն Դ.ից (4).

Ա. Նախ՝ զի Ժ. (10) թիւն կատարեալ է եւ նուէր Աստուծոյ: Յուցանէ, որք կատարեալ են կուսութեամբ, նոքա նուիրին Աստուծոյ:

Բ. Երկրորդ՝ Ժ. (10) են մասունք արարածոց եւ Ժ. (10) երկինք, որպէս է. (7) դաւտիք եւ հաստատութիւնն եւ ջրեղէնն եւ հրեղէնն ցուցանէ, թէ տեղիք կուսանաց հրեղէն երկինքն է:

Գ. Երրորդ՝ Թ. (9) դասք հրեշտակաց են եւ մարդն՝ Ժ.(10)երրորդ: Ցուցանէ, թէ կուսանքն միայն դասեսցին ընդ հրեշտակս, զի կուսութիւնն գործ հրեշտակաց:

Դ. Չորրորդ՝ Ժ. (10) զգալութիւնք է մեր, որպէս ասացաւ: Ցուցանէ, որք կոյսք լինին եւ սուրբք մարմնով եւ հոգով եւ մտաւք, նոքա են արժանի առադաստին:

Հարց. Վասն է՞ր նախ զյիմարսն դնէ: Պատասխանի. Վասն չորից. Ա. Նախ՝ զի յոռութեանց նոցա զպատիւ իմաստնոցն ցուցանէ:

Բ. Երկրորդ՝ նախ՝ յիմարեցաւ բնութիւնս եւ յետոյ իմաստնացաւ: Գ. Երրորդ՝ նախ՝ հեթանոսք էին եւ ապա՝ ի հաւատս եկին:

Դ. Չորրորդ՝ նախ՝ ի հասարակ կենաց ի ճգնութիւն ելանեմք: Հարց. Ե՞րբ ելին կուսանք ընդառաջ փեսային (հմմտ. ԻԵ. 6): Պատասխանի. Այսպէս թուի, թէ յետ մահուն կամ յորժամ ի գերեզմանէն ելանեմք: Այլ Ոսկէրեանն ասէ. «Յորժամ յաշխարհական վարուց ելին»: Յորժամ գնեղ եւ զանձուկ ճանապարհն ընտրեցին, յայնժամ ելին ընդ յառաջ Քրիստոսի:

Վասն լապտերաց եւ իւղոց

Հարց. Զի՞նչ է «լապտերն» (ԻԵ. 3): Պատասխանի. Զկուսութեան շնորհան նշանակէ: Եւ այս վասն չորից.

Ա. Նախ՝ զի սուրբ եւ յստակ է ջահն, եւ կուսութիւնն սրբէ զհոգի եւ զմարմին: Բ. Երկրորդ՝ լուսատու է, եւ կուսութիւնն պայծառ եւ լուսաւոր առնէ զմիտս:

Գ. Երրորդ՝ զխաւար մեղաց եւ զտգիտութեան փարատէ: Դ. Չորրորդ՝ զճանապարհս ցուցանէ, եւ կուսութիւնն՝ զերկնից ճանապարհն:

Հարց. Զի՞նչ է «իւղն» (ԻԵ. 8):

Պատասխանի. Եւղ զմարդայսիրութիւն եւ զողորմութիւնն ասեն ամենայն վարդապետք: Եւ այս վասն չորից.

Ա. Նախ՝ զի նիւթ է լուսոյ, եւ ողորմածութիւնն նիւթ է մշտնջենաւոր կենացն եւ լուսոյ:

Բ. Երկրորդ՝ յամենայն իրաց գլուխն ելանէ, եւ ողորմութիւնն բարձր ի գլուխ պարծի առ դատաստանաւն:

Գ. Երրորդ՝ իւղ զուարթ առնէ, եւ ողորմութիւնն պարարէ եւ զուարթացուցանէ զհոգին:

Դ. Չորրորդ՝ անարգել յամենայն ինչ մտանէ եւ յինքն ինչ ո՛չ մտանէ: Այսպէս ողորմածութիւնն մտանէ առ Աստուած եւ առ հրեշտակս եւ առ սուրբս եւ զամենայն մեղս ծածկէ, եւ ինքն ի մեղաց ոչ ծածկի. «Զմնդս քո ողորմութեամբ քաւեսցես», ասէ (Դանիէլ Դ. 24):

Դարձեալ լապտերն յերից վառի, եւ թէ մինն պակասէ, շիջանի, այսինքն՝ լոյսն, իւղն եւ պատրոյգն: Եւ հոգւոյն լապտերն, այսինքն՝ կուսութիւնն, ողորմութիւնն եւ զիտաւորութիւնն, զի կուսութիւնն լոյս է եւ ողորմութիւնն՝ եւղ եւ ճիշտ զիտումն՝ պատրոյգն ի միջի, զի զկուսութիւնն եւ զողորմութիւնն վասն արքայութեանն եւ սիրոյն Քրիստոսի արասցէ: Նոյնպէս եւ հաւատք եւ յոյս ի սէրն են կապեալ:

Հարց. Զի՞նչ է «նիրհեցին եւ ի քուն մտին» (ԻԵ. 5): Պատասխանի. Երեք ինչ ցուցանէ. Ա. Նախ՝ թէ բազում ժամանակք անցան են ի միջի:

Բ. Երկրորդ՝ ի դէմս աշակերտացն, զի մի՛ փութով խնդրեսցեն զարքայութիւնն ի կեանս այս:

Գ. Երրորդ՝ թէ քուն է մահն, որպէս ասեն իմաստունք: Նինջն մահ է առժամանակեայ եւ մահն՝ քուն յաւիտենից:

Հարց. Վասն է՞ր զմահն «քուն» կոչեն զիրք: Պատասխանի. Ա. Նախ՝ զի երկոքին խափանեն զգալարանս: Բ. Երկրորդ՝ զի յերկոսին յառանձնանայ հոգին ըստ ինքեան:

Գ. Երրորդ՝ որպէս ի քուն զիւրազարթն ունի ձայնէ, այսպէս եւ Քրիստոս զիւրաւ ձայնիւ միայն յարուցանէ է զմեռեալս ամենայն, որպէս զՂազար՝ ըստ նմա. «Մտեալք, լսիցն ձայնի Որդոյն [Ասարուոյ, եւ որք լսիցն], կեցցն» (Յովհ. Ե. 25):

Հարց. Զի՞նչ է «Ի մէջ գիշերի» (ԻԵ. 6): Պատասխանի. Կամ առական այնպէս պատշաճէր. կամ ի գիշերի լինելոց է յարութիւնն, զժամն ուսուցանէ ի մէջ գիշերի յաւուր

կիրակէի, յորում ժամու ինքն յարեալ է գերեզմանէ: Եւ որպէս յայնժամ լերինն Սինեայ՝ հրով եւ միգով եւ փողով, գայցէ ի նոյն աւրն ի դատեալ: Տե՛ս, զի պարտ է կանանց ի մէջ գիշերի յառնել եւ զլապտերս մտաց պատրաստել աղաւթիւք եւ թէ ոչ հանապազ պարտ է ի կիրակէն ի մէջ գիշերի կանխել, ըստ Դաւթի (Կրն՝ Սաղմ. 1Ա. 4):

Հարց. Զի՞նչ է փողն յետին, որ ասէ առաքեալ (Կրն՝ Ա. Կոր. ԺԵ. 52):

Պատասխանի. Առաջին փող մարգարէքն էին, միջին՝ առաքեալք եւ վարդապետք, վերջինն՝ հրեշտակք: Սոքա կոչեն յԱւրէնս եւ ի շնորհս եւ ի փառս:

Հարց. Զի՞նչ է բարբառ փողոյն:

Պատասխանի. Այսինքն՝ «ահա փեսայ գայ, արիք ընդ առաջ նորայ» (Մարթ. ԻԵ. 6):

Վեց բան է կատարեալ:

Վասն փեսայի եւ հարսին

Հարց. Վասն է՞ր «փեսայ» կոչի Քրիստոս (ԻԵ. 6):

Պատասխանի. Վարդապետք ասեն վասն Ժ. (10) պատճառի.

Ա. Նախ՝ վասն ջերմ սիրոյն, որ ունի առ հարսնացեալ եկեղեցի:

Բ. Երկրորդ՝ վասն գերազանց միաւորութեանն, որ ցուցաւ նախ:

Գ. Երրորդ՝ փեսայն միայն է Տէր հարսինն, եւ Քրիստոս միայն է գլուխ եկեղեցոյ:

Դ. Չորրորդ՝ փեսայն միայն ունի զթագ, եւ Քրիստոս միայն է թագաւոր ամենայնի:

Ե. Հինգերորդ՝ եւ հարսին թագ դնէ, յորժամ գայ Աստուած ի մէջ աստուածացելոց:

Զ. Վեցերորդ՝ փեսայն միշտ ցանկայ զկատարումն կամաց, եւ Քրիստոս միշտ ցանկայ զփրկութիւն մարդկան:

Է. Եւթներորդ՝ ծնաւ ի զաւակաց, եւ Քրիստոս ծնանի աւագանաւն զմեզ:

Ը. Ութերորդ՝ սերմանո՞ղ է փեսայն, եւ Քրիստոս զամենայն բարիս սերմանեաց ի հոգիս:

Թ. Իններորդ՝ քաղցր է ձայն հարսին փեսային, եւ քաղցր է երգն եկեղեցոյ Քրիստոսի:

Ժ. Տասներորդ՝ փեսայն թողեալ զհայրն եւ զմայրն՝ ընթանայ զհետ հարսինն՝ ըստ Ագամայ, եւ Քրիստոս՝ անբաժանաբար թողեալ զՀայր ի յերկինս եւ զմայր ի յերկրի, եւ եկն ի խաչ վասն մեր:

Այսպէս եւ եկեղեցի «հարսն» կոչի՝ ըստ այնմ. «Որ ունի հարսն, եւ է փեսայ» (Յովհ. Գ. 29): Եւ այս ցուցաւ ի Մեկնութիւնս Երգոց, Գ. (3) համարն տե՛ս¹:

Վասն իմաստութեան կուսանաց

Հարց. Զի՞նչ է իմաստութիւն կուսանացն (ԻԵ. 2):

Պատասխանի. Հինգ ինչ.

Ա. Նախ՝ զի զմարմինն եւ զհոգին սուրբ պահեն:

Բ. Երկրորդ՝ ընդ կուսութեան եւ զիւզն ողորմութեան խառնեն:

Գ. Երրորդ՝ զհաւատս եւ զգործս ստանան:

Դ. Չորրորդ՝ զձայն փեսային ի միտ պահեցին, որ ասէր. «Ձողորմութիւն կամիմ եւ ո՛չ զգոհ» (Մարթ. Թ. 13):

Ե. Հինգերորդ՝ զի նախ զիւզն պատրաստեցին ըստ մարգարէին. «Պարրապրեցայ եւ ո՛չ խռովեցայ» (Սաղմ. ԾԺԸ. 60):

Հարց. Զի՞նչ է յիմարութիւն կուսանաց:

Պատասխանի. Հինգ ինչ.

Ա. Նախ՝ ընդդէմ իմաստնոցն զմարմին կոյս պահեն եւ ոչ զհոգին:

Բ. Երկրորդ՝ որ զմեծամեծս վաստակեցին եւ ի փոքունս ընչասիրութեամբն յոռի գտան:

Գ. Երրորդ՝ որ աստ զինչս ժողովեցին եւ անդ՝ մերկ երթան:

Դ. Չորրորդ՝ աստ ընկերացն ոչ ետուն եւ անդ կամին առնուլ:

Ե. Հինգերորդ՝ որ անժամ խնդրեցին:

Եւ գիտելի է, զի Դ. (4) իրաւք ոչ առնումք զխնդրելին:

Ա. Նախ՝ թէ ո՛չ խնդրեմք, եւ սոքա խնդրեցին:

Բ. Երկրորդ՝ թէ ուրիշքն տուողք, եւ իմաստունքն ողորմածք էին:

Գ. Երրորդ՝ թէ զամենայն խնդրեն, եւ սոքա՝ «տուք մեզ իւրոյդ», ասեն, «մասն ինչ» (Խմմտ. ԻԵ. 8):

Դ. Չորրորդ՝ թէ չլինի կարիք, եւ սոքա ասեն՝ «շիջանին լապտերք» (ԻԵ. 8):

¹ Տե՛ս ձեռ. Գմբ 1200, էջ 379աբ:

Ապա՝ յայտ է, զի ո՛չ վասն անգթութեան ոչ տուին, այլ զի ոչ էին ձեռնհաս: Եւ Աբրահամ ողորմածն էր քանանացւոց. մեծատանն կաթիլ մի ջրոյ ոչ ետ (Կրն՝ Ղուկ. ԺԶ. 25):

Յայսմանէ յայտ է, զի ոչ գոյ անդ աւգնութիւն մարդկան՝ ո՛չ տալ, ո՛չ առնուլ, ո՛չ գտանել եւ ոչ այլ ինչ:

Գնացէք ի վաճառականքն եւ գնեցէք, ուստի մեր գնեցաք (ԻԵ. 9):

Հարց. Եւ ո՞րք են իւղաւաճառք, այսինքն՝ աղքատք, կոյրք, կաղք եւ այլք: Նոքա են բանաւոր ծիծուռնք, որ զղէմս Քրիստոսի ունին եւ գյարութիւն գուշակեն եւ ի դրունս եկեղեցոյ են նստեալ եւ վաճառեն զիւղն մեզ:

Եկն փեսայն, եւ պարտաստան մտին (ԻԵ. 10):

Այսինքն՝ եկն խնդութիւնն, եկն արդարոցն պարծանքն, եկն ի գիշերի լոյս եւ հմոյժ յառազաստն, եւ փակեցաւ դուռն: Վա՛յ իմ մտաց եւ եղուկ լսեսլեաց: Եւ «դուռն» կոչի Քրիստոս, որպէս ասէր. «Ես եմ դուռն» (Յովհ. Ժ. 9) վասն երից.

Ա. Նախ՝ դուռն կոչի մարդկութիւնն, զի նովաւ Աստուած ի յաշխարհս հմուտ:

Բ. Երկրորդ՝ դուռն կոչի եւ մարմինն մեզ, զի նովաւ յաստուածութիւնն մտանեմք:

Գ. Երրորդ՝ դուռն է բոլորն Քրիստոս, զի նովաւ առ Հայր ելանեմք՝ ըստ նմա. «Ո՛չ որ գայ առ Նայր, եթէ ոչ ինեւ» (Յովհ. ԺԴ. 6):

Նոյնպէս «ճանապարհ» կոչի ըստ երիցս այսոցիկ.

Ա. Նախ՝ զի Բանն Աստուած մարմնով եկն առ մեզ:

Բ. Երկրորդ՝ եւ մարմնով առ Բանն ընթանամք:

Գ. Երրորդ՝ եւ բոլորիւն առ Հայր ընթանամք:

Յերոյ գան եւ այլ կուսանքն (ԻԵ. 11):

Յամենայն կողմանց պաշարեալք, ճրագք անցեալ, գլուխ խոնարհեալք, սիրտք տրտմեալք. տեսանէք եղբարք զայն ամենայն վաստակեալք, զմոլեգին պատերազմ բնութեանս յաղթեալք՝ յառազ[աստ] ո՛չ մտին եւ զփեսայն ո՛չ տեսին:

Հարց. Վասն է՞ր ինքն պատասխանեաց՝ չգիտել եւ ոչ հրեշտակք:

Պատասխանի. Ա. Նախ՝ զի մորմոքեացին, յորժամ զձայնն լուիցեն եւ ոչ տեսցեն:

Բ. Երկրորդ՝ ոչ քաղցր ձայն, այլ զբարկութեան լսեն, որ առաւել դժնդակ է, քան զհուր գեհնի:

Գ. Երրորդ՝ զի մի լիցի այլ ոք միջնորդ եւ բարեխաւս. ինքն տայ պատասխանի:

Հարց. Թէ ոչ ունիմք ինչք, ոչ հմք կոյս:

Պատասխանի. Նախ ասեմք, եթէ բազում է իւղն, որպէս գործնականն տեսակն իւղն է, եւ գործքն հաւատոյն իւղ է, եւ սէրն յուսոյն իւղ է, ծուներ եւ արտասուք աղաւթիցն իւղ է, այսպէս եւ աղքատութիւնն կուսութեան իւղ է:

Դարձեալ ասեմք, թէ չունիս ինչք, ունիս մարմին, բան, սիրտ, կամք. դոքաւք սիրեա՛ եւ լե՛ր իմաստուն կոյս:

Հարց. Պա՞րտ է ի մեծի գիշերին Ժ. (10) մոմ վառել եւ հինգն շիջուցանել:

Պատասխանի. Այո՛յ, պարտ է ամէն Աւետարանի կրկին մոմ վառել, որպէս ինքն ասաց. «Ես եմ լոյս աշխարհի» (Յովհ. Ը. 12):

Ա. Նախ՝ զի լոյս է հոգոյ եւ մարմնոյ:

Բ. Երկրորդ՝ լոյս է աստ եւ ի հանդերձեալն:

Գ. Երրորդ՝ զի կրկին հրեշտակն նստէր ի գերեզմանին:

Իսկ յայնմ աւուր պարտ է Ժ. (10) մոմ վառել ի խորհուրդ Ժ. (10) կուսանացն:

Եւ այս վասն Գ. (3) պատճառի.

Ա. Նախ՝ զհանդէսատուրն պատուեալ:

Բ. Երկրորդ՝ զի աչաւք տեսցեն եւ ի միտ առցեն:

Գ. Երրորդ՝ զի բազում խորհուրդ ունի.

ա. Նախ՝ ցուցանէ զփառս եւ զկեանս արդարոց եւ զկորուստ մեղաւորաց:

բ. Երկրորդ՝ զհաւատացեալս եւ զանհաւատս յերկրի:

գ. Երրորդ՝ զի Ե. (5) զգայութիւն հոգ յոսման եւ Ե. (5) ի հոգ լուծանի:

Վասն արթնութեան եւ քնոյ

Հարց. Զի՞նչ է «Արթո՛ւն կացէ՛ք» (ԻԵ. 13):

Պատասխանի. Չորս է արթնութիւն, այսինքն՝ բարի եւ բարեգոյն, չար եւ չարագոյն: Բարի է, որ զգայարանաւք ի գործ աշխատութեան լինի եւ բարեգոյն, որ մտաւքն ի խոկումն մահուն եւ կոտորած լիցի: Եւ չար, որ զգայութեամբն զմեղս զգայ եւ տեսանէ եւ լսէ: Եւ չարագոյն, որ մտաւքն խորհի, կամի զչարն:

Նոյնպէս եւ Դ. (4) է քուն. բարի քուն է, որ զչափաւորն ննջէ եւ բարեգոյն, որ յաշխարհէ անհոգ լիցի, իսկ չար քուն է, որ ծուլութեամբ ննջէ եւ չարագոյն, որ ի մեղս հեշտանայ եւ ննջէ: Վասն սորայ ասէ. «Լոյս փոր, Տէր, աչաց, զի մի՛ [ե]րբէք ննջեցից ի մահ» (Սաղմ. ԺԲ. 3), «Եւ զարթոյ գացս իմ» (Սաղմ. ԾԺԸ. 18):



ԱՌԱԿ ԲԱՆՔԱՐԱՑ

Մարթ. ԻԵ. 14-30

ՄՏԵՓԱՆՈՍ ՍԻՒՆԵՑԻ

Քանզի որպէս այր ի գնալն իրում, կոչեաց զճառայս իւր եւ աւանդեաց նոցա զինչս իւր, ումեմն եր հինգ փաղանդ, ումեմն՝ երկու, ումեմն՝ մի (Մարթ. ԻԵ. 14):

«Տաղանդ» կչռոյ անուն է, որպէս զիտր, մնաս եւ այդպիսիք ինչ, զոր թարգմանեցին առաջին թարգմանիչքն «քանքար»: «Այրն», որ ետ զքանքարն՝ Քրիստոս ուսուցանել զաստուածային բանս. «Ջարձաք իմ ընտրեալ եւ փորձեալ երթնապարիկ ի հողոյ (հմմտ. Սաղմ. ԺԱ. 7), եւ վերացեալ ի հեռաստան աշխարհ, յերկրէ ի յերկիրս: Բայց վասն է՞ր «հինգ» եւ «երկու» եւ «մի» ասին: Որ զհինգն էառ՝ ճշմարտապէս զիտացեալ զվեհագոյն միտս աստուածային գրոց ըստ Սողոմոնի, հինգ աստուածային զգայութեամբք ըստ Պաւղոսի, կրթեալք զգայարանաւքն փոխեցան անտուտ տեսանել զաներեւոյթն, որ ի սկզբանէ աշխարհիս արարածովս իմացեալ, եւ զայլս ուսուցին ամենայն աստուածային վարդապետութեամբ: Իսկ որ «գերկուսն», սմա ոչ պարզեւեցաւ միայն զիրն, այլ եւ զաւրութիւն աստուածային գրոց, թէպէտ եւ ոչ այնպէս կատարեալ, որպէս որ հինգ էառ. այսպեսոյս նախ քննեալ զտեսակս արարածոց Աստուծոյ եւ զհիւթս նոցա, եւ ի սոցանէ փոփոխեալ յարարիչն հիւթոյն եւ ի տեսակացն, յանդրանիկն ամենայն արարածոց, ուսուցեալ եւ զայլս կրկնապատիկ արար գերկուսն: Իսկ որ զմինն էառ, զգիրն միայն որպէս եւ Հրէայքն, եւ միտք գրոյն թաքեան ի նմանէն եւ զայլս ոչ ուսուցին, այլ ի խորութիւն սրտի իւրեանց թաքուցին, զոր պարտ էր արկանել ի սեղանաւորս, ի վարդապետս հմուտս, որք ունէին բարի վարդապետութիւն եւ ի նոցանէ զմիտս գրոյն ուսանել եւ զայլս ուսուցանել. արդ, վասն զի ոչ արար զայդ, զոր պարտ էր առնել, կլանէ ի խաւարն արտաքին. եւ զարմանա՞ս եթէ վասն ոչ ուսուցանելոյ զբանն Աստուծոյ այսպէս պատուհասի: Լո՛ւր Պաւղոսի. «Վայ է ինձ, - ասէ, - եթէ ոչ աւերարանեմ» (հմմտ. Ա. Կոր. Թ. 16): Խաւարն արտաքին է, ուր հոգին ամենեւիմբ խաւարեալ է զառն տրտմութեամբ եւ ոչ է այցելութիւն աստուածային լուսոյ. եւ Փիլոփն Եբրայեցի,

եթէ թու[ի] քեզ այրն ընդունելի զմովսէսական զիրան պատմելով, զխաւարն որ ի վերա[յ] անդնդոց արտաքս քան զբոլոր աշխարհս, ասէ, զինել. եւ տե՛ս, թէ անարժանք աշխարհիս արտաքսին ի բոլոր աշխարհէս, եւ ոչ միայն ի զբախտէն Աստուծոյ:

ԱՐԻՍՏԱԿԷՍ ԵՒ ԵՓՐԵՄ

Իսկ թէ ի Ղուկաս այլազգ կա տաղանդացն առակ (տես Ղուկ. ԺԹ. 11-27), առ այն զայս պարտ է ասել, թէ այլ այս է եւ այլ՝ այն:

Ոմն ասէ, թե՛ հինգ փաղանդ եփուր ցիս, եւ ոմն՝ երկու (Մարթ. հմմտ. ԻԵ. 20):

Յուցանէ, թէ ի նմանէ առին զպատճառս շահաւորութեանն եւ կարի իսկ շնորհ ունին եւ զամենայն նմա համարին եւ առ այն, զինչ ասիցէ Տէրն:

«Քաջդ ծառայ եւ բարեգործ» (հմմտ. ԻԵ. 21, 23):

Եւ այն իսկ է բարեգործին զընկերին իրս տեսանել: Եւ «հաւատարիմ» ասէ (Մարթ. ԻԵ. 21, 23):

«Որովհետեւ ի սակաւուդ հաւարարիմ ես, ի վերայ բազմաց կացուցից զքեզ» (ԻԵ. 21):

Զամենայն երանութիւնս այսու բանիւ յայտ առնէ: Բա[յ]ց միւսն ո՛չ այսպէս, այլ որպէս՝

«Գիպէի,- ասէ,- զի այր մի խիստ ես» (ԻԵ. 24) եւ այլն¹:

Եւ առ այն, զ^օինչ ասիցէ տէրն. պարտ էր, ասէ, տալ զարժաթդ իմ ի տրապիզիտս²: Այսինքն՝ խաւսել պարտ էր, խրատել, թելադիր լինել: Չանսային, ասէ, եւ քո զի^օնչ վնաս էր յայնմ, զի^օնչ այլ հեղութիւն այնպիսի կայցէ, զի մարդիք ոչ առնեն այնպիսիս, այլ զփոխատուսն առնեն պարտապան պահանջելոյն: Իսկ նա ո՛չ այնպէս, այլ քեզ պարտ էր, ասէ, տալ եւ զպահանջելն յիս ապաստան առնել:

«Եւ ես, եկեալ,- ասէ,- փոկոսեալ պահանջէի զայն» (հմմտ. ԻԵ. 27):

¹ Բ եւ որ ի կարգին] եւ այլն
² Բ տրապիզիտս

Զունկնդրութիւն¹ գործոցն հանդէս, քեզ զգիւրագոյնսն պարտ էր առնել, եւ ինձ՝ զգժուարագոյնսն թողուլ, որովհետեւ զայն չարարեր:

«Առէք, - ասէ, - ի դմանէ զփաղանդդ եւ փուր այնմ, որ ունիցի զփասն» (հմմտ. ԻԵ. 28):

Զի^օնչ իցէ այս, որ զշնորհսն բանին վարդապետութեան յաւգուտ ունիցի եւ չարկանէ ի կիր, զշնորհսն կորուսանէ, եւ որ փոյթ յանձին ունիցի մատակարարել, եւս առաւել ամփոփէ յինքն զպարգեւսն, զոր աւրինակ որ էառ եւ չէարկ ի կիր կորոյս: Բայց ոչ մինչ ցայն եւեթ է վնաս վատացելոյն, այլեւ անհնարին տանջանս կրիցէ: Տեսանես, զի ոչ միայն յափշտակողն եւ ազահն, այլեւ որ զբարիսն չգործիցէ, տանջելոց է զանհնարին տանջանսն:

ՅՈՎՀԱՆՆԷՍ ԾՈՐԾՈՐԵՅԻ

Որպէս այր մի, գնացեալ ի փար աշխարհ, կոչեաց զծառայս իւր եւ եր նոցա զինչս իւր (Մարթ. ԻԵ. 14):

Կուսանաց առակն յընչիցն ողորմութիւն առնելոյ վասն ասացեալ եղեւ, եւ կամ որք զգործս ի փառս մարդկան արարին՝ կարգեցաւ այն, իսկ այս՝ որ ոչ ընչիւք եւ ոչ բանիւք եւ ոչ վերակացութեամբ եւ ոչ այլ ինչ իւրիք կամին աւգուտ առնել ընկերացն, այլեւ ոչ իսկ բարեգործք լինիցին, այլ զամենայն թագուցանիցեն: «Որպէս այր մի,- ասէ,- գնացեալ ի փար աշխարհ». «այր»՝ ոչ միայն յաղագս կատարեալ աստուածութեանն, այլեւ յաղագս այրացելոյ Յիսուսի աստուածաստեղծութեանն, որ յաստուածութենէն եւ ի մարդկութենէն մի եղեւ՝ Որդի Աստուծոյ եւ մարդոյ: Զսա՛ ասէ «գնացեալ ի փար աշխարհ». «գնաց»՝ զմահուէն ասէ եւ զչարչարանացն, որ յոյժ միջոց է ընդ կենդանիս եւ ընդ մեռեալս, կամ զգժոխս, որ հեռի եւ անձանաւթ է ի մերմէ բնութենէս, այլեւ զյառնելն ի մեռելոց եւ զնստիլն ընդ աջմէ Հաւր, որով եւ երկայնմտութեամբ ներէ իսկ: Գնալ անուանէ ի տար աշխարհ, քանզի ոտից մարդկան անկոխելի է եւ մտաց եւս անհասանելի, զոր Պաւղոս «ներքին կողմն վարագուրին» կոչէ (Եբր. Զ. 19): «Կոչեաց զծառայս իւր եւ եր նոցա զինչս իւր». ոչ է այս ըստ մշակացն յայգին, այլ ամենեքեան գործաւորք

¹ Բ գունկնդրութիւնս

են, քանզի ոչ եթէ առ իշխանսն միայն եւ կամ ընդ Հրէայսն եւեթ, այլ ընդ ամենեսեան խաւսի՝ կոչելով ի ձեռն առաքելոցն՝ Աւետարանին վարդապետութեամբ ի հաւատս եւ ի գործս, քանզի այս է ինչք նորա: Այլ եւ զշնորհս ասէ զպէսպէս՝ զհոգեկանս եւ զմարմնականս, զի ամենեքեան Աստուծոյ են, զոր Պաւղոս թուէ (Կրն Ա. Կոր. ԺԲ. 8-11), եւ այլուր՝ «Թէ առէր, զի՞ պարծիս իբրեւ չառեալ» (Ա. Կոր. Դ. 7): Նաեւ զխոստումն անճառ բարեացն ինչս իւր անուանէ:

Ումեմն եր հինգ քանքար եւ ումեմն՝ երկուս, եւ ումեմն՝ մի, իւրաքանչիւր ըստ իւրում կարի, եւ գնաց (ԻԵ. 15):

«Տինգ»՝ որ զբնական իմաստութիւնն միայն գիտէ ի ձեռն Հինգ զգայութեան առանց մտաց Գրոց: Եւ որ զերկուն էա՝ նոքա են, որ զբնականն ունին եւ զմիտս Գրոց: Իսկ որ զմին էա՝ նոքա որ զմիտս Գրոց միայն գիտեն: Եւ ի սմանէ առնուլ զմին եւ տալ այնմ, որ զհինգն ունի, այն իսկ է, զի էառ ի նոցանէ զճանալութիւնն մտաց Գրոց եւ ետ բնականացն, որպէս ետ զմեկնութիւն Գրոց Դիոնէսիոսի եւ այլոց՝ ի բաց բառնալով ի հրէից վարդապետաց եւ տալով Հեթանոսաց իմաստասիրաց: Նախ արժան է գիտել, եթէ այս առակ եւ որ ի Ղուկասն կայ ասացեալ վասն տաղանդացն (Կրն Առկ. ԺԹ 12-28), մի՞ են, եթէ զանազան: Արդ, ոմանք ասեն, թէ՛ այլ այս, եւ ա՛յլ է այն, բայց ինձ թուի, թէ մի են: Իսկ թէ ասիցէ ոք, ընդէ՞ր ապա տասն են անդ մնասն, զոր ետ, եւ աստ՝ ութ ի հաշիւ արկանէ. ասացուք, թէ տասն են՝ ըստ Ղուկայ, սակայն զերկունսն ոչ պահանջէ, որպէս աստ ցուցանէ, զհաւատն ասեմ եւ զմկրտութեանն շնորհ, քանզի ձրի ետ, իսկ այլք զբնական աւրէնսն, ասեն, եւ զգրաւորականն յաշակերտաց Աւետարանիս ոչ ինդրէ, քանզի նա զտալն ասէ, եւ սա՝ զխնդրելն:

«Ումեմն եր,- ասէ,- հինգ քանքար»․ տաղանդն «քանքար» ասի ըստ եբրայեցւոցն, որ է ինն հազար դահեկան, եւ ոմանք տասն ասեն, եւ է այս Հինգ շնորհ, զորս թուէ առաքեալ. «Եթէ որ ի ձեռք սաղմոս ունիցի, վարդապետութիւն ունիցի, յայրնութիւն ունիցի, լեզուս ունիցի, եւ եթէ թարգմանութիւն ունիցի» (Ա. Կոր. ԺԴ. 26): Եւ «քանքար»՝ վասն զտեալ եւ փորձեալ աստուածային շնորհին, կամ որ զհինգն առ՝ գիտաց ճշմարտապէս զվեհագոյն միտս աստուածային գործոց ըստ Սողոմոնի, եաւթն աստուածային զգայութեամբք կրթեալ ըստ Պաւղո-

սի՝ յընտրութիւն բարւոյ եւ չարի, զոր «կապարեալս» կոչէ առաքեալ (Յակ. Ա. 17):

Իսկ «ումեմն՝ երկուս»: Զայս Պետրոս ասէ. «Եթէ որ վարդապետ իբրեւ զԱստուծոյ պարգամ, գոր շնորհեաց նմա Աստուած, եւ եթէ որ մաքալարարէ իբրեւ ի զարութենէ Աստուծոյ, գոր րուեալ է նմա» (Խմնք. Ա. Պեպ. Դ. 11), եւ կամ՝ «Տեսնելի է արարծովքս իմացեալ զաներեւոյթ զարութիւնն Աստուծոյ» (Խմնք. Նոմ. Ա. 20)՝ եւ զայս ուսուցին աստուածային վարդապետութեամբ, կամ զհոգեկան եւ զմարմնական առաքինութեան սերմանս ընկալան: Եւ դարձեալ՝ եթէ հոգեւոր իշխան իցէ, ունի առ ընթեր եւ զմարմնաւոր հոգաբարձութեան պայծառութիւն, կամ զՀին եւ զՆոր Կտակարանս, այլեւ աստուածսիրութեան եւ մարդասիրութեան զաւրութիւն, կամ զհաւատոց եւ զգործոց, կամ զտեսական եւ զգործնական: «Եւ ումեմն՝ մի, իւրաքանչիւր ըստ իւրում կարի»․ այսինքն՝ մի շնորհ՝ հոգեւոր կամ մարմնաւոր, հոգեւոր՝ որպէս սարկաւազութիւն, եւ մարմնաւոր՝ որպէս հիւսնութիւն կամ դարբնութիւն, քանզի զայս վասն այնորիկ եզ, զի ցուցանէ, թէ որ յոյժ պակասն է՝ ի միոջ նուազ է, որպէս ասէ, թէ իւրաքանչիւր ըստ իւրում կարի յԱստուծոյ ընկալան եւ ի վերուստ ունին զնպաստաւորութիւն շնորհացն, որով պանծան:

Չոգաւ վաղվաղակի՝ որ առ զհինգն, գործեաց նոքաւք եւ շահեցաւ այլ եւս հինգ (ԻԵ. 16):

Թէ ասիցէ ոք, թէ ընդէ՞ր ոչ առանց նորայոց ինքեանք գործեցին, այլ նորին տրաւքն շահեցան, ասացուք՝ զի մի՛ ի պահանջելն դժուարիցին՝ իբրեւ ոչ տուեալ, եւ մի՛ ի գործելն հպարտացին՝ իբրեւ նոր իմն գործ գործեալ, վասն այսորիկ առեալ զնորայն՝ աճեցուցին, զի մի՛ պակասիցէ առողին բարին քան զտուողին սերմանս: «Չոգաւ,- ասէ,- վաղվաղակի՝ որ առ զհինգն, գործեաց նոքաւք եւ շահեցաւ այլ եւս հինգ»․ կամ զզաւրութիւնն, զոր ստացան, զայն արդեամբք կատարեցին, կամ թէ՛ զառեալ շնորհս ի պէտս այլոց մատակարարեցին: Իսկ «վաղվաղակի» ասելն՝ զի փութով եւ յաւժարութեամբ եւ ո՛չ ի հարկէ եւ բռնադատութեամբ:

Նոյնպէս եւ որ զերկուսն՝ շահեցաւ այլ եւս երկուս (ԻԵ. 17):

Ըստ առաջնոյդ տեսլեան եւ զա՛յս իմա. բայց ասելն, զի այլ է սերմն, եւ այլ է պտուղն, կամ այլ են գործքն, եւ այլ են փառքն՝ զի ոմն՝ ի մարդոյ, իսկ փառքն՝ յԱստուծոյ:

Եւ որ զմին առ՝ գնաց փորեաց զերկիր եւ թագոյց զարծաթ փեան իւրոյ (ԻԵ. 18):

Այսոքիկ նոքա են, որք հաւատացին եւ բնաւին գործոյ փոյթ ոչ արարին, զի կամ ընդ առնուլն մեռան եւ յերկիր թաղեցան, որպէս նոքա ի ժամ մահուն զմկրտութիւնն կամ զհաղորդութիւնն խնդրեն, եւ կամ առեալ՝ երկրասէրք եղեն եւ դարչապարաւք իւրեանց յերկիր խրեցան, եւ զարծաթ շնորհացն ոչ մաքուր գործովք արծարծեցին, այլ չարութեամբ ամփոփեցին եւ զլոյս Հոգւոյն շիջուցին՝ ոչ վարժեալք յառաքելոյ, թէ՛ «Մի՛ շիջուցանէք զՆոզին» (Ա. Թեա. Ե. 19), որով կնքեցարուք յաւուրն փրկութեան: Եւ դարձեալ՝ նոքա են, որ զշնորհս ոչ ի բազմաց աւգուտս մատակարարեցին, այլ ի պէտս անձանց իւրեանց խորեցին, նաեւ այնոքիկ, որք ի գիրն հային եւ ո՛չ ի Հոգին, որպէս հրէայք եւ թանձրամիտք, որք թագուցին զմիտս գրոյն ի խորութիւն սրտից իւրեանց՝ զլուսաւոր բան աւերինացն Աստուծոյ:

Յեր բազում ժամանակի զայ փէր ծառայիցն այնոցիկ եւ առնէ համարս ի մէջ նոցա (ԻԵ. 19):

Յուցանէ, թէ առաջինս շնորհաց էր ժամանակ, իսկ միւսանգամ գալուստն՝ դատաստանի եւ համարս պահանջելոյ: Բայց «յեր բազում ժամանակաց» ասելն ըստ կարծեաց հեշտասիրացն դնէ, ապա թէ՛ ոչ՝ «հազար ամ յաչս Տեան իբրեւ ար երկի է, զի անց» (Մաղմ. 2Թ. 4), իսկ «ի մէջ նոցա առնել զհամարն» զիրաւունս դատաստանին ասէ, զի նոցուն վկայութեամբ կնքի վճիռն գեղեցկացն եւ կամ այլ ազգ ունողացն՝ ըստ այնմ, թէ՛ «Բերանաւք իւրեանց հաճեցին» (Մաղմ. ԽԸ. 14):

Եւ մարտոցեալ, որ զհինգ քանքարն առ, մարտոյց այլ եւս հինգ քանքար եւ ասէ. «Տէ՛ր, հինգ քանքար ետուր ցիս, արդ ահաւասիկ հինգ այլ եւս քանքար ի վերայ շահեցայ» (ԻԵ. 20):

Զհպատակութիւն աշակերտին ցուցանէ, թէ առ ի նմանէ ունի զպատճառ շահաւորութեանն, եւ կարի իսկ շնորհ նմին ունի եւ զամենայն նմա համարի՝ ըստ առաքելոյ, թէ՛ «Ո՛չ ես, այլ շնորհն Աստուծոյ, որ ընդ իս» (Ա. Կոր. ԺԵ. 10), զորս «ընդունայն ոչ վաստակեցի» (Փիլիպ. Բ. 16): Նաեւ այսու այլ իմն նշանակէ, եթէ ոչ միահաղոյն դատաստան, այլ ուրոյն ուրոյն առանձինն հարցաքննութիւն լինելոց է:

Դարձեալ՝ այսոքիկ նոքա են, որ զբազումս առին եւ զբոլորն յաւգուտ այլոց մատակարարեցին, այլեւ յամենայն սրտէ եւ ի զաւրութենէ զԱստուած սիրեցին եւ զհրամանս նորա առանց թերութեան լցեալ կատարեցին, որպիսի ոք էր Պաւղոս, զի ասէր. «Զբարւոք պատերազմ պատերազմեցայ, զընթացսն կատարեցի, զհաւատսն պահեցի», եւ իբր վստահութեամբ ասէ՝ «Այսուհետեւ կայ եւ մնայ ինձ արդարութեան պսակն, գոր հարուցէ Տէր» (Բ. Տիմ. Դ. 7). Եւ է ա՛յս, զոր ասէ:

Ասէ ցնա փէրն իւր. «Ազնի՛ւ ծառայ, բարի եւ հաւաքարիմ, որովհետեւ ի սակաւուղ հաւաքարիմ ես, ի վերայ բազմաց կացուցից զքեզ. մո՛ւտ յուրախութիւն փեան քոյ» (ԻԵ. 21):

«Ազնիւ» ասելովն ինքեան նմանեցուցանէ, զի որպէս այրն «ազնիւ» ասացաւ, որ զքանքարն ետ, նոյնպէս եւ ծառայն, որ զնոյն աճեցոյց, որ քան զայս զի՞նչ երանութիւն կայցէ եւ կամ զարմացումն, յորժամ ծառայն տեսնն հաւասարիցի: Քանզի ամենայն առաքինութեան զլուխ ա՛յս է եւ կատարած՝ առ Աստուած նմանութիւն, ընդ որս հիացեալ ասէ Սողոմոն. «Ծառայ յորժամ թագաւորեսցէ» (Առակ. Լ. 22), եւ Պաւղոս, թէ՛ «Եղիցի Աստուած ի մէջ աստուածացելոց», զի ըստ արարածոյն, որում անկ է ծառայ կոչել, միայն է զանազանութիւն եւ ոչ այլ իւրիք: «Բարի եւ հաւաքարիմ», այսինքն՝ իբր զիս բարեզործ առ ամենեսեան, որ զընկերին կարիսն տեսանելով զթացար: «Եւ հաւաքարիմ», զի ոչ խորեցեր յանձին պէտս եւ կամ յանաւգուտս վատնեցեր, այլեւ հաւատացեր բազմապատիկ փոխարինին:

«Որովհետեւ ի սակաւուղ հաւաքարիմ ես, ի վերայ բազմաց կացուցից». այսինքն՝ որովհետեւ ի յանցաւոր եւ ի սակաւակեաց կեանսդ հաւատարիմ գտար, եկ ժառանգեա զմշտնջենաւորն եւ զանվախճանն, քանզի սակաւ եւ բազում ոչ միայն ըստ փոքրկութեան եւ ըստ մեծութեան գիտէ դնել Գիրք, այլեւ ըստ նուազութեան եւ առաւելութեան, որով ցուցանէ, թէ առաւելագոյն շնորհաւք փառաւորին սուրբքն քան զաստի կենացս պայծառութիւնն, զի սոքա իբր սակաւ սերմանք են առ բազմապատիկ փոխարինին արդիւնսն: «Մո՛ւտ, ասէ, յուրախութիւն փեան քո». զբովանդակ խրախութիւնսն միով բանիւ «ուրախութիւն» անուանէ. զոր տէր ունի՝ եւ քե՛զ շնորհէ, «մո՛ւտ», այսինքն՝ յուսով արդեամբ վայելեա՛լ:

Մաքուցեալ եւ որոյ զերկուս քանքարսն առեալ էր եւ ասէ. «Տէ՛ր, երկուս քանքարս երուր ցիս, ահաւասիկ երկուս եւս այլ քանքարս, զոր ի վերայ շահեցայ» (ԻԵ. 22):

Աստուած ոչ եթէ ի բազմութիւն գործոցն եւ կամ ի մեծութիւն ընչիցն, այլ ի յաւժարութիւն կամացն եւ ի ջերմութիւն բազմանացն հայիցի՝ ըստ առաքելոյ, թէ՛ «Յորժամ կամքն առաջի կայցէ՝ ըստ գոյնի ընդունելի» (հմմտ. Բ. Կոր. Ը. 12), եւ՛ «Նայեցաւ Աստուած ի պարարագն Արելի» (հմմտ. Ծննդ. Դ. 4), եւ ընկալաւ զերկուս լուծալս այրի հոգւոյն (տրն Դուկ. ԻԱ. 2-3): Նոյնպէս եւ հոգիս այս, որ ըստ իւրում կարութեանն, զոր ընկալաւ շնորհս՝ բեղմնաւորեաց եւ աճեցուցեալ շահեցաւ, մատչի պարծելով ի գաւրութիւն նորա, թէ՛ ոչ միայն զոր ետուր՝ ոչ կորուսի, այլեւ կրկնապատիկս արարի յարգմամբ գործոյն՝ առ ի շնորհացն առաւելութիւն:

Ասէ ցնա փէրն իւր. «Ազնի՛ւ ծառայ, բարի եւ հաւաքարիմ, որովհետեւ ի սակաւուդ հաւաքարիմ ես, ի վերայ բազմաց կացուցից զքեզ. մո՛ւտ յուրախութիւն փեռսն քոյ» (ԻԵ. 23):

Այս ո՛չ կրկնաբանութիւն է, այլ մեծ իմաստութեան իմն աւանդութիւն, քանզի զոր աւրինակ այլ փառք է արեգական, եւ այլ լուսնի (տրն Ա. Կոր. ԺԵ. 41), այսպէս եւ պատիւ եւ պսակք արդարոցն՝ ըստ արդար լծոցն Աստուծոյ կշռեալ եւ ըստ արժանաւորութեան բաժանեալ, որպէս զի յատուկ պսակելով գտուրբսն՝ նախ գովութեամբ եւ ապա փառացն վայելչութեամբ, կրկին կսկիծ լինիցի ծուլիցն եւ հեղգացելոցն, զի որպէս հանդէսն՝ զանազան, նոյնպէս դրուատն եւ փառքն՝ զանազան: Բայց թէ ասիցէ ոք, թէ զի՞նչ զանազանի այս յառաջնոյն, զի որպէս զնորայն սակաւ կոչեաց, եւ զսորայն, եւ որով բանիւ զնա պսակեաց, եւ զսա, ասասցուք՝ թէպէտ գործքն առաւել եւ պակաս, առ որով եւ փառքն, սակայն շնորհ՝ մի, զի հաւասար աճեցուցին, զոր զնա ըստ իւր չափոյն, իսկ զսա ըստ իւր արժանեացն պատուեաց: Իսկ զի գերկոսեան «սակաւ» կոչեաց զաստիս, ընդ հանդերձելոյն շնորհն եւ ի փառսն համեմատեաց:

Մաքուցեալ եւ որոյ զմի քանքարն առեալ էր եւ ասէ. «Տէ՛ր, գիփլի, զի այր մի խիստ ես, հնձես՝ զոր ոչ սերմանեցեր, եւ ժողովես՝ ուստի ոչ սփռեցեր» (ԻԵ. 24):

Երկեայ, գնացի եւ թագուցի զքանքարս քո յերկրի. արդ աւասիկ քոյդ՝ ցրեզ» (ԻԵ. 25):

Յնայսմ վայրի ամաչեցոցն պարսաւասէրքն, որք ասեն, թէ ընդէ՞ր ոչ ամենեցուն զոյգ զշնորհս պարգեւէ՛ զհոգեւորս կամ զմարմնաւորս, զի թէ զմի հառ տարտամս այս հոգի եւ զայն ոչ գործեաց, զի՞նչ ասես, թէ բազմաց շնորհաց ընկալուչ եղեալ էր: Նաեւ տուաւ իսկ կարի քաջ գիտէր, թէ չէ բնաւին գործելոց, այլ ետ, զի մի՛ պատճառեցոցն այնոքիկ, որ զպատճառսն կամիցին: «Գիփլի,- ասէ,- զի այր մի խիստ ես». յոյժ կատաղի է յանդգնութիւնն, եւ այնքան, մինչ զի ընդ անձին մարտնչի եւ հակառակ ինքեան խաւսի, որպէս Ադամն առաջին, զի ո՛չ զանձին մեղկութիւն, այլ զԱստուած, որ ստեղծ զկինն, ասաց պատճառ զոլ չարին: Նոյնպէս եւ այրս այս, ո՛չ զվատութիւն ինքեան, այլ զնորին խստութիւնն: «Գիփլի,- ասէ,- զի այր մի խիստ ես», այսինքն՝ բուռն եւ անհաւան: «Ննձես, զոր ոչ սերմանեցեր, եւ ժողովես՝ ուստի ոչ սփռեցեր». «հնձես», այս է՛ շնորհ ոչ ետուր եւ մահուամբ ի դժոխն ամբարեցեր, եւ «ժողովես», այս է՛ յարքայութիւնն ժողովեցեր, որք ոչ շնորհք առին եւ ոչ բարեգործք ցուցան: Առաջնոյն աւրինակ՝ փարաւոն եւ Նաւա (տրն Ծննդ. ԻԵ. 21-26, Ելք Ա. ԺԴ., Մաղ. Ա. 2-3), եւ երկրորդին՝ աւազակն եւ մաքսաւորն (Դուկ. ԺԸ. 10-14, ԻԳ. 39-43). արդ, այսպիսի է անզգամ, զի զաստուծոյն դատէ, որ եւ լուաւ, թէ՛ «Ողորմեցայց, որում ողորմեցայցն, եւ զթացայց, որում եւ զթացայց» (Ելք ԼԳ. 19), իսկ պատասխանի, զի նոքա ոչ արարին զանձինս պատրաստ շնորհացն Աստուծոյ, որպէս փարաւոն, եւ սոքա տեղի ետուն ողորմութեանն Աստուծոյ, որպէս աւազակն եւ այլք, ապա ուրեմն ոչինչ անիրաւութիւն է, որպէս ասաց, թէ՛ «Ննձես՝ զոր ոչ սերմանեցեր, եւ ժողովես՝ ուստի ոչ սփռեցեր»:

Դարձեալ՝ առ յանդգնութեամբն տես եւ զստութիւնն, զի այսպէս ամենայն անիրաւ ի պատասխանին է պատրաստ: Արդ, եթէ ոչ սերմանեաց եւ ոչ սփռեաց, որպէս ասեսդ, ուստի՞ ունիս՝ զոր հատուցանեսդ, թէ՛ «ա՛ո զքոյդ». ապա ուրեմն որով ստեցեր՝ կուտեցեր զչարիս քո ի գլուխ քո: «Երկեայ,- ասէ,- գնացի եւ թագուցի զքանքարս քո». հազիւ ուրեմն զճշմարիտն յայտնեաց, թէ՛ զերկչոտութեան զախտն ախտանայի, վասն այսորիկ ծածկեցի զշնորհս քո ի տղմի: Առ որս ասելի է, թէ ո՛վ ապիրատ, ընդէ՞ր երկեար, միթէ ի բազմաց աւգտութենէ կասկածա՞նս կրեցեր, թէ վարդապետիդ պատուոյ հաւասար լինիցին, քանզի ոչ ունիս ասել, թէ՛ «Երկեայ՝ գուցէ զշնորհսն կորուսանիցն», զի այն ոչ է քում անկ, այլ նորա է հարցաքննութիւն եւ պահանջումն: Ապա ուրեմն առ լրբութեանդ եւ պղերգու-

Թեանդ եւ անբան երկիրդիդ դյաչաղանաց ախտն ախտանայիր, զի ոչ կամեցար զԱստուծոյսն ի յԱստուծոյսն վայելել: «Գնացի եւ թագուցի զքանքարս քո յերկրի»: Բովանդակ կեանքս, ասէ, յորում ընթացայ ծուլութեամբ, վախճանեցի եւ ի ներ հեշտութեան զշնորհս քո ծրարեցի՝ դանդաղկոտ գոլով եւ երկասէր, մինչ ի գերեզման մտիարդ, «առ,- ասէ,- զքոյդ ցրեզ»: Եթէ ոչ համարէր պահանջեալ եւ ոչ յաւր մահուն հասեալ, եւ ոչ զնորայն կամէր նմին աւանդել, այլ ստիպեալ ի մահուն վճռէ եւ ի հաշուոյն այցելութենէ բռնադատեալ, ուր ուրեմն ասէ. «Ա՛ո զքոյդ»:

Պարասխանի եր փերն եւ ասէ ցնա. «Ծառայ չա՛ր եւ վար, գիտէիր, թէ հնձեմ՝ ուստի ոչ սերմանեցի, եւ ժողովեմ՝ զոր ոչ սփռեցի: Պարտ էր քեզ արկանել զարծաթդ իմ ի սեղանաւորս, եւ եկեալ ես՝ փոկոսեալք պահանջէի զիմն (ԻԵ. 26-27):

Տես, թէ ո՛րպիսի մեծ վնաս է վատութիւնն, զի ընդ չարութեանն լծի, քանզի «չարութիւն» գերկու մասին հոգւոյն անզգամութիւնն ասէ, զոր ունէր այրս այս. զնախանձն, որ բանին է, եւ գյանդգնութիւնն եւ գերկիւղն անսուրբ, որ ցասմատեսակին է չարութիւն, զի ոմն ըստ առաւելութեան, եւ ոմն ըստ նուազութեան, որոց կցորդէ եւ զվատութիւնն, որ է ընդդէմ արիութեանն: «Ծառայ չա՛ր եւ վար,- ասէ,- գիտէիր, թէ հնձեմ՝ ուստի ոչ սերմանեցի, եւ ժողովեմ՝ զոր ոչ սփռեցի»: Ղուկաս ասէ. «Ի բերանոյ քումմէ՛ դարեցայց զքեզ» (Ղուկ. ԺԹ. 22), զի եթէ ոչ գիտէիր զիս այսպէս, ունէիր իմն ներումն, իսկ որովհետեւ այսպէս գիտես, ընդէ՞ր ոչ արկեր զարծաթն իմ ի սեղանաւորս. ապա թէ ոչ այսպէս, այլ հեզ, որպէս եւ եմս իսկ, է՞ր վասն յանդգնութեամբ բարբառեցար: Արդ, եթէ այսպէս եւ եթէ այնպէս, «պարտ էր քեզ արկանել զարծաթդ իմ ի սեղանաւորս»: Իսկ զի՞նչ սեղանաւորն. կամ արկանելն է ի տրապիզիտս մտաց, որոց ի խոկմանէ խորհրդոյն հետեւի եւ գործն, որով աճեալ զարգանայ շնորհն Աստուծոյ զաճումն սուրբ Տերմամբ, կամ ըստ մարմնական սովորութեան, եւ զայս յաւրէ յառակս, քանզի գոն յաշխարհի ըստ քաղաքի քաղաքի սովորութիւն՝ տալ զարծաթն ի սեղանաւորս շահի: Զայս աւերնակ, ասէ, եւ քեզ պարտ էր առնել զինչ եւ իցէ շնորհս, ի փոխ տալ այնոցիկ, որ պէտս ունէին, եւ խրատել եւ թելադիր լինել կամ զառաքելոյն առնել՝ աւանդել զշնորհն հաւատարիմ մարդոց, որ կարաւ չին եւ զայլս ուսուցանել ի վարդապետս հմուտս (Կրն

Բ. Տիմ. Բ. 2): Չանսային՝ ասէ, եւ քեզ զի՞նչ վնաս էր յայնմանէ, զի տալն միայն էր քեզ եւ ո՛չ պահանջելն, որպէս ասէ՝ «Եւ եկեալ ես՝ փոկոսեալք պահանջէի զիմն»: Տեսանե՞ս, զի ոչ ասաց նախ, թէ՛ «չեմ խիստ», այլ կամեցաւ գործով զհեզութիւնն յանդիման կացուցանել, եւ զի՞նչ քան զայս այլ հեզութիւն, զի ի մարդիկ ոչ առնին այսպիսի իրք, այլ փոխատուն առնու զպարտսն, իսկ աստ ասէ, թէ՛ քեզ պարտ էր ասել եւ զպահանջեալն յիս ապաստան առնել, դու զդիւրինն գործել եւ զգժուարինն ինձ ներել, եկեալ, ասէ, ես վաշխիւք խնդրէի զիմն, այսինքն՝ զունկնդրութիւն բանին եւ զգործոցն հանդէս, եւ զիմն, զոր ետու, զշնորհս եւ ո՛չ զաւտար ինչ պահանջէի: Ահա յայտ արար, թէ վասն է՛ր տայ զշնորհս. ցուցանէ եւ զայն, թէ մանրամասն քննութիւն ի գալստեան նորա լինելոց է, թէպէտ ոմանց ներէ այժմ:

Արդ, առէք ի դմանէ զքանքարդ եւ փուք այնմ, որ ունիցի զփասն քանքարն (ԻԵ. 28):

Հայեաց եւ ի միտ առ, թէ ո՛րպէս մարդասէր է, զի ի բարեացն տուրս առանց միջնորդի վարեցաւ, իսկ զվրէժինդրութիւնն՝ այլոց հրամայէ՝ սպասաւորակ զաւրութեանց, որպէս ի հինն, զի զհաց երկնից ինքն ետ նոցա ուտել, իսկ յորժամ տրտնջեցին, «սաւրեաց ի նոսա փանջանս ի ձեռն հրեշտակի չարի» (Մաղմ. ՆԷ. 49): Բայց զի՞նչ է առնուլն զքանքարն. այս ինձ թուի, զի որ զշնորհս բանի եւ կամ այլ ինչ իրաց ունիցի եւ չարկանէ ի կիր ինքեան գործով եւ կամ յաւզուտ բազմաց, զնոյն ինքն եւ զշնորհս կորուսանէ, որպէս Յուդային եղեւ: «Տուք,- ասէ,- այնմ, որ ունիցի զփասն քանքարն». աստանաւր յայտ առնէ, թէ վասն անճառ բարերարութեանն ամենեցուն փառս պատրաստեալ է ի սկզբանէ, իսկ յորժամ ոմանք անձնիշխան գիտութեամբ անարժան լինին այնմ գովեստի եւ փառաց, յայնժամ զնոցուն պատիւն արժանաւորացն շնորհէ եւ կատարելոցն, որպէս ել Յուդայ, եւ եմուտ Մատթիա: Եւ չին այս զարմանք, զի թէ անարժանն առ վայր մի ժառանգեաց զպատիւն, թէպէտ ոչ ծանեալ զնորին մեծութիւնն, քանի՞ա՞ն յարմարագոյն է սրբոցն ժառանգութիւն, որպէս ասէ.

Զի ամենայնի, որ ունիցի, փացի եւ յաւելցի, եւ որ ոչն ունիցի, եւ զոր ունիցին՝ բարձցի ի նմանէ (ԻԵ. 29):

Կամ թէ՛ որ փոյթ ունիցի յանձին մատակարարել զշնորհս, ե՛ւս առաւել ամփոփէ յինքն զպարգեւն, որպէս Տիմոթէոս եւ այլք բազումք, ապա թէ՛ ոչ մատակարարէ, եւ զա՛յն եւս կորուսանէ, որպէս ասացաք: Կամ թէ՛ որ ունիցի գործս բարիս, տացի փոխարէնս ըստ վաստակոցն եւ յաւելցի փառս, եւ պսակս անպատուս ձիւր շնորհի, իսկ որ չունիցի գործս բարեաց, եւ զոր ունիցին շնորհս՝ զաւազանին եւ կամ զայլ իմն պարգեւս, մերկացայց ի նմանէ եւ ապա ի տանջանս առաքեցից, զի զիտասցէ, թէ՛ որ արհամարհէ զիւրիք, արհամարհեսցի ի նոցանէ, եւ զի ոչ միայն զրկի ի փառաց, այլեւ ժառանգ լինի տանջանաց ըստ յաջորդիդ: Կամ ա՛յլ ազգ. զի ասէ ի տեսիլն Յովհաննու, թէ՛ «Կա՛յ գոր ունիս» (Յայտ. Գ. 11), նոյնպէս եւ աստ իմա, թէ՛ «Որ ունիցի՝ փացի», այսինքն՝ թէ՛ որ ըմբռնէ զառեալն, ունի եւ վայելէ, իսկ որ ոչ ունի գտուեալն, զերծցի ի նմանէ այն՝ ասէ, եւ է այս՝ կամ ըստ մարմնաւոր տրոց, կամ ըստ հոգեւոր շնորհաց վարդապետութեան, կամ քահանայութեան:

«Եւ զձառայոյ անպիտան հանէք ի խաւարն արփաքին. անդ եղիցի լալ եւ կրճել պրամանց» (ԻԵ. 30):

Յիրաւի՛ անպիտան, զի ո՛չ ինքեան եւ ոչ այլոց աւզուտ արար. «Նանէք,- ասէ,- ի խաւարն արփաքին»: Ոմանք ասեն, թէ՛ ո՛չ վասն ուսուցանելոյ այլոց զբանն այնպէս պատուհասի. ասացուք՝ լո՛ւր Պաւղոսի, որ ասէ. «Կա՛յ է ինձ, եթէ ոչ անպարանեմ» (Ա. Կոր. Թ. 16): Արդ, տես, զի որք յայլս բարի չգործեցին, յարտաքին խաւարն առաքեցան, ապա ո՛ւր երթալոց են յափշտակաւորն եւ ազահքն եւ չարանախանձ յաչաղկոտքն եւ տրտնջաւորն: Իսկ «խաւար արփաքին» կամ զբանսարկուն ասէ, որ արտաքսեաց զինքն ի լուսոյ եւ խաւարեալ է իւրովքն, դառն տրտմութեամբ անդր առաքէ, յորում ոչ առնէ այցելութիւն Տէր լուսով իւրով, կամ խաւարն սկզբնածին, որ ի լուսոյն հատաւ եւ այժմ հատանի եւ հատանէ ի հաստատեալ լուսաւորացդ՝ նորոգութեամբ: Շրջապատեալ խաւարն զբոլոր աշխարհիւս՝ յեզր ելանէ արտաքս քան զերկիրս, յորում է եւ ջուր հրացեալ եւ սառնամանիք անհանդուրժելի: Անդր տանջին մեղաւորքն, զի ոչ միայն յերկնից եւ ի դրախտէն արտաքսին, այլեւս ի բոլոր երկրիս վայելչութենէ, քանզի եւ սա՛ յայնժամ դրախտացեալ զերեսն սուրբ պաշտէ:

ԳՐԻԳՈՐ ՏԱԹԵԻԱՅԻ

Յառաջագոյն ասացելոցս յայտ է եւ միտք առակիս՝ այս:

Հարց. Զի՞նչ է «քանքարն եւ մնաս¹» (Մարթ. ԻԵ. 15, Ղուկ. ԺԹ. 12):

Պատասխանի. Երկրքին զարծաթ նշանակեն եւ ո՛չ զկշիռ: Եւ զիտեալ է, զի այլ է քանքարն, որ աստ ասէ, եւ այլ՝ «մնասն»՝ զոր Ղուկաս (Ղուկ. ԺԹ. 12): Եւ յայտ է ի չորից.

Ա. Նախ՝ ի տեղոյն. այն՝ յերիքով եւ այս՝ ի լեռն ձիթենեաց:

Բ. Երկրորդ՝ ի ժամանակէն. այն՝ նախքան զնստելն յաւանակի եւ այս՝ յետ նստելոյն:

Գ. Երրորդ՝ ի թուոյն. անդ Ժ. (10) թուէ եւ աստ՝ Ը. (8):

Դ. Չորրորդ՝ ի շահելոյն. մնասն արար Ժ. (10) մնաս, եւ արար Ե. (5) մնաս: Եւ քանքարն. Ե. (5) եւ Բ. (2) շահեցաւ:

Հարց. Զի՞նչ է «Այր մի ազնուական» (հմմտ. ԻԵ. 14):

Պատասխանի. «Այր»՝ զմարդացեալն Աստուած կոչէ.

Ա. Նախ՝ վասն արիական զաւրութեանն:

Բ. Երկրորդ՝ զի ծնաւ արու:

Գ. Երրորդ՝ զի մարդեղացաւ հոգւով եւ մարմնով եւ մտաւք կատարեալ:

Իսկ «ոմն» նախ որոշէ ի բազմաց, զի Աստուած է մարդացեալ:

Բ. Երկրորդ՝ անորիչ է բնութեամբ եւ զիմաւք՝ մի Տէր, մի Քրիստոս, մի կամք եւ մի գործ եւ այլն:

«Ազնուական», այսինքն՝ գեղեցիկ եւ պատուական ոչ միայն աստուածութեամբն, այլեւ մարմնովն. «Զի գեղեցիկ էր փեսանելով» (հմմտ. Սաղմ. ԽԴ. 3), ասէ: Եւ «Եղբարորդին կարմիր եւ սպիտակ եւ ընտրեալ ի բիրուց» (Երգ Ե. 10):

Յաշխարհի հեռի (հմմտ. ԻԵ. 14).

Ա. Նախ, զի մարմնով եկն յաշխարհս այս, եւ «թագաւորել» զմարմնանալն ասէ: Եւ այս է «աշխարհի հեռի», ուր կրտսեր որդին վատնեաց զինչս հաւրն (տնս Ղուկ. ԺԵ. 11-34):

Բ. Երկրորդ՝ դժոխքն աշխարհ հեռի յամենայն բարեաց եւ մոռացեալ յԱստուծոյ եւ թագաւորեալ է, որ մեռելոց եւ կենդանեաց տիրեաց:

¹ Գ մնաց] մնաս

Գ. Երրորդ՝ վերին աշխարհին, ուր «համբարձաւ եւ նստաւ ընդ աջմէ Նար» (Մարկ. ԺԶ. 9), եւ գալոց է թագաւոր անդի: «Ակն ունիցիք», ասէ, «թէ երբ դառնայ ի հարսանեաց» (հմմտ. Ղուկ. ԺԲ. 36):

Եւ յայտ է հեռու գոլն ի բազմաց.

Ա. Նախ՝ զի մինն՝ իմանալի եւ մինն՝ զգալի:

Բ. Երկրորդ՝ ապականացու եւ անապական:

Գ. Երրորդ՝ անփոփոխ եւ փոփոխական:

Դ. Չորրորդ՝ վերին եւ ներքին:

Ե. Հինգերորդ՝ լոյս եւ խաւար:

Զ. Վեցերորդ՝ տեղիք արդարոց եւ մեղաւորաց եւ այլ բազում:

Վասն ծառայից

Կոչեաց զծառայս իւր (ԻԵ. 14):

Չորս կերպ է ծառայութեան.

Ա. Նախ՝ որ կամաւ լինի:

Բ. Երկրորդ՝ գնեալ:

Գ. Երրորդ՝ գերեալ:

Դ. Չորրորդ՝ ընդոծին:

Եւ այս Դ. (4) կերպիւս ծառայեմք Քրիստոսի.

Ա. Նախ՝ կամաւ՝ ըստ հաւատոյն:

Բ. Երկրորդ՝ զի արեամբ գնեաց:

Գ. Երրորդ՝ ի գերողէն դարձոյց:

Դ. Չորրորդ՝ ընդոծին արարչութեամբն:

Վասն քանքարաց

Հարց. Զի՞նչ է. «Ումեմն ետ Ե. (5) քանքար, ումեմն՝ Բ. (2), ումեմն՝ Ա. (1)» (ԻԵ. 15):

Պատասխանի. Երեք է իմացումն.

Ա. Նախ՝ բացարձակ: Զամենայն շնորհս նշանակէ՝ հոգեւոր կամ մարմնաւոր՝ քահանայութիւն, իշխանութիւն, ինչք, արուեստ, գեղեցկութիւն, հասակ, ծերութիւն, տղայութիւն եւ այլն, որ ըստ կամաց տուաւ տփօղին, եւ ըստ կարի առողին առաւել եւ նուազ տայ:

Բ. Երկրորդ՝ քանքար է «հինգ», զոր ասէ Պաւղոս ի Ա. Կորնթաց-
ւոց. «Եթէ որ Սաղմոս ունիցի, եթէ՝ մարգարեութիւն, եթէ՝ Յայտնութիւն, եթէ՝ լեզու, եթէ՝ թարգմանութիւն» (Ա. Կոր. ԺԴ. 26), պարտ է զայս ուսանել եւ ուսուցանել:

Իսկ «Բ. քանքար» Պետրոս ի Կաթողիկոսքն ասէ. «Եթէ որ խաւսեցի, իրրեւ զԱստուծոյ պարգամս, եթէ որ մարակարարեաց ի զարութենէ շնորհացն Աստուծոյ» (Ա. Պետ. Դ. 11): «Խաւսիլն» քարոզողաց է եւ «մարակարարեալն»՝ զշնորհս ձեռնադրողաց: Դարձեալ զհոգեւոր եւ զմարմնաւոր շնորհս ասէ՝ խաւսել եւ մատակարարել, այսինքն՝ բանիւ ուսուցանել եւ գործով ցուցանել:

Իսկ «Ա. քանքար» է հաւատք առանց գործոց, զոր առնու ի մկրտութեանն եւ ոչ գործէ եւ շահեցուցանէ, որպէս ասէ Յակոբոս. «Նստարք առանց գործոց դապարկք են» (Յակ. Բ. 20):

Գ. Երրորդ՝ միտք եւս յայտնի. «Ե. քանքարն» է, որ զամենայն շնորհս հոգեւոր Ե. (5) զգայութեամբ ի բարին գործեմք եւ շահիմք՝ թէ վարդապետութիւն, թէ քահանայութիւն կամ այլինչ աստիճան:

Իսկ «Բ.», որ զամենայն շնորհս հոգեւոր եւ մարմնաւոր, հոգեւով եւ մարմնով ի գործ ածեմք թէ՛ զաստուածային առաքինութիւնս՝ հաւատ, յոյս, սէր, թէ՛ զմարդկա[յ]ին՝ խոհեմութիւն, արիւթիւն, ողջախոհութիւն եւ արդարութիւն:

Իսկ «Ա. քանքարն» ըստ միանձնաւորութեան մարդոյ՝ առեալ մին շնորհք կամ հոգեւոր կամ մարմնաւոր կամ զհաւատք կամ զգործն կամ մին արուեստ, կամ մին աստիճան, կամ մին կրաւն: Եւ զայն ոչ ի յինքն գործէ եւ ոչ այլոց ուսուցանէ:

Հարց. Վասն է՞ր, որ զմինն էառ թաքոյց, եւ որ զԲ.ն (2) եւ զԵ.ն (5) գործեաց (տե՛ս ԻԵ. 16-18):

Պատասխանի. Ոչ է Հարկ, թէ ամենայն, որ մին էառ, թաքուցանէ, կամ որ աւելի՛ ի գործ ածէ. այլ բազում անգամ լինի, որ զմեծ աստիճան էառ եւ ոչ գործէ եւ որ էառ զփառքն, գործէ եւ շահի:

Այլ վասն այն դնէ զառակղ, զի ցուցցէ, թէ որք շահին, բազում են, քան որ կորուսին:

Հարց. Զի՞նչ է «մնասն. Ժ. մնաս եւ հինգ այլ եւս» (Ղուկ. ԺԹ. 16-23):

Պատասխանի. Զհոգեւորն Ժ. (10) զգայութեամբ գործեմք եւ զմարմնաւորն՝ Ե. (5):

Եւ «կրկինն» այն է, որ ինքն գործէ եւ այլոց ուսուցանէ: Եւ դարձեալ, որ մարմնով եւ հոգևով ի գործ ածէ:

Հարց. Զի՞նչ է, որ Ժ. (10) մնաս խոստացաւ եւ զուժն ետ:

Պատասխանի. Զերկուքն նախ ինքն յարգեաց, այսինքն՝ մինն անեղին մարդ լինել: Երկու՝ անմահին մեռանել, զոր նմա յանգէ եւ ոչ մեղ:

Հարց. Զի՞նչ է «ագնի ծառայ եւ բարի» (ԻԵ. 21):

Պատասխանի. Զիւրն անուն նմա կոչէ, որ ազնիւ եւ բարերար եւ հաւատարիմ է Տէր: Եւ ապա ի վերա բազում շնորհացն կացուցանէ, որպէս ցուցաւ յառակ տնտեսին (փն՛ս Մապթ. ԻԴ. 45-51):

Մուր յուրախութիւն փեռան քո (ԻԵ. 21):

Նախ որպէս չար ծառայ այն տրտմութեան եւ պատճառ տեառն իւրոյ, նոյնպէս եւ բարին՝ ուրախութեան: Եւ դարձեալ՝ «Մուր զուրախութիւն փեռան քո» փոխանակ տրտմութեանց, զոր կրեցէր յերկրի եւ շահեցար Քրիստոսին:

Տե՛ս, զի ծառայն չար ոչ լինի շնորհակալ, որպէս բարիքն ասացին, թէ՛ «Զքանքարդ դու երուր ցիս, եւ քո է շահն» (հմմտ. ԻԵ. 20):

Այլ զի՞նչ՝ «Գիպեմ, զի այր մի խիստ ես» (ԻԵ. 24). այսինքն՝ դառն եւ բարկացող: «Երկեա», զի երկչոտ է, «եւ թաքուցի յերկիր» (ԻԵ. 25), զի ծուլութեամբ ի մարմինն թաքոյց: Իսկ «ծրարելն ի վարշամակի» (Ղուկ. ԺԹ. 20)՝ զնախանձ եւ զատելութիւն ցուցանէ:

Հարց. Զի՞նչ է «հնձես, զոր ոչ սերմանեցեր» (ԻԵ. 24) եւ այլն:

Պատասխանի. Ա. Նախ այն է, որ Հայր սերմանեաց մարգարէիւքն, եւ Որդին հնձեաց առաքելովք: Եւ Հայր եղ զՀին Աւրէնս, եւ Որդին եբարձ: Եւ Հայր սփռեաց զհեթանոսս, եւ Որ[դ]ին ժողովեաց:

Բ. Երկրորդ՝ հնձաւդ պատուիրանաց լրման եւ բարձաւդ անիծից, զոր Հայր եղ եւ ժողովէ ի դատաստան զամենայն մարդիկ:

Գ. Երրորդ՝ զմահն եբարձ, զհոգիսն ազատեաց եւ ի չարեացն բարի ժողովեաց:

Հարց. Զի՞նչ է «ծառայ չար եւ վար» (ԻԵ. 26):

Պատասխանի. «Չար», այսինքն՝ անհաւատ կամ նախանձոտ, իսկ «վար», այսինքն՝ ծոյլ եւ անարի: Եւ պարտ է արկանել ի սեղան սրտից, եւ Գ. (3) է շահն:

Ա. Նախ՝ այն է, որ ասացն՝ շահիլ:

Բ. Երկրորդ՝ լսաւդն աւգտի:

Գ. Երրորդ՝ քանքարն յաւելու:

Եւ թէ՛ ոչ լսէ, «փոկոսեալք պահանջէք» (ԻԵ. 27):

Իսկ թէ՛ ոչ ուսուցանէ՝ վասն ծուլութեան կամ նախանձու, կամ երկչոտութեան, աստ պակասէ զիտութիւնն, եւ անդ՝ բարձցի շնորհքն եւ փառքն, եւ ինքն տանջանս կրէ:

Իսկ որ շահեցաւ, աստ ուսուցանելով առնու, եւ անդ՝ փառաւք եւ պարգեւաւք:

Տե՛ս, որ զգլուխն դարձոյց ի Տէրն, այնպէս պատժի. մէք, որ զշնորհն եւ զգլուխն կորուսանեմք, զի՞նչ լինիմք:

Տե՛ս դարձեալ, որ ոչ ողորմեցաւ, պատժեցաւ, եւ որք զայլոց զրկեն եւ յափշտակեն, զի՞նչ լինիցին:

Եւ դարձեալ, տե՛ս, զի կրկին է չար. մին՝ որ զչարն գործէ եւ մին՝ որ զբարին ո՛չ առնէ: Եւ կրկին է բարին. մին՝ որ զբարին առնէ եւ մին՝ որ զչարն ո՛չ առնէ:

Հարց. Վասն է՞ր «արծաթ» ասէ զբան (ԻԵ. 27):

Պատասխանի. Ա. Նախ՝ զի բանդն սուրբ է, որպէս զարծաթ:

Բ. Երկրորդ՝ պատուական է:

Գ. Երրորդ՝ պայծառ է:

Դ. Չորրորդ՝ անապական: Եւ այլն ասացաւ վասն դահեկանի: Այսքան առ այս:

Ղուկ. Ի. 9-18

ՍՏԵՓԱՆՈՍ ՍԻՒՆԵՑԻ

Այր ոմն փնկեաց այգի եւ եր մշակեաց եւ գնաց ճանապարհ աուրս քազումս (հմմտ. Ղուկ. Ի. 9):

«Այգի»՝ աստուածական վարդապետութիւնն մարգարէական եւ առաքելական, յորս զայգին ետ, զի պողաբերեցէ հրէական ժողովուրդն. «ճառայք» (փն՛ս Ի. 10)՝ Մովսէս եւ այլ մարգարէքն. «որդին, զոր սպանին» (փն՛ս Ի. 15)՝ Քրիստոս՝ միածին Որդին Աստուծոյ:

ԲԱՐԻ ՍԱՄԱՐԱՅԻ

Ղուկ. Ժ. 29-37

ՍՏԵՓԱՆՈՍ ՍԻՒՆԵՅԻ

Պապասխանեալ Յիսուսի ասաց. «Այր մի իջանէր Յերուսաղեմէ յԵրիքով եւ անկաւ ի ձեռս աւազակաց» (հմմտ. Ղուկ. Ժ. 30), եւ որ ի կարգին է:

«Այրն, որ իջանէր յերուսաղեմէ յԵրիքով»՝ Ադամ, եւ ամենայն մեղուցեալք ըստ նմանութեան յանցուածոցն Ադամայ: Եւ «Երուսաղէմ»՝ դրախտն, յորմէ արտաքսեցան. «Երիքով»՝ աշխարհս, յոր ել ի դրախտէն. «աւազակք»՝ սատանա[յ] եւ գունդք նորայ. «մերկութիւն» (տէն Ժ. 30)՝ ի փառացն եւ յանմահութենէն անկանելն, «վերքն» (տէն Ժ. 30)՝ մեղքն եւ յանցանք ամենայն. «թողուլ կիսամահ» (տէն Ժ. 30), զի մեռաւ մեղաւքն վիրաւորեալ, «կիսամահ» վասն այնորիկ, զի ակնկալութիւնն դալստեան սամարացւոյն, այսինքն՝ Փրկչին, դարձեալ ի կենդանութիւն փոփոխէր. «քահանայ» (Ժ. 31) եւ «ղևւրացի» (Ժ. 32)՝ մարգարէքն, որպէս թուի ինձ, եւ վարդապետքն, որք յառաջ, քան զՔրիստոս. «սամարացի»՝ Քրիստոս. սամարացի կոչեցաւ եւ դիւահար, ասէ Գրիգորիոս, այլ փրկեաց զնա, որ «իջանէրն յերուսաղեմէ յԵրիքով եւ անկաւ ի ձեռս աւազակացն»: «Ձեթ» (Ժ. 34)՝ ողորմութիւնն, զոր արար ի վերա[յ] նորա. «գինին» (Ժ. 34)՝ ուրախութիւն, զոր ի փրկել յաւազակացն պարգեւեաց. «գրաստն» (Ժ. 34), յոր եհան մարմինն իւր, յոր երարձ զմեղս աշխարհի: «Պանդոկին» (Ժ. 34)՝ եկեղեցի Աստուծոյ. «պանդոկապետ» (Ժ. 35)՝ առաքեալքն եւ նոցին նմանողք՝ վարդապետք եկեղեցւոյ. «երկու դահեկանքն» (Ժ. 35)՝ Հին եւ Նոր Կտակարանք. դարձումն սամարացւոյն երկրորդ անգամ (տէն Ժ. 35)՝ երկրորդ գալուստն Քրիստոսի, յորժամ հատուցանէ իւրաքանչիւր ըստ գործոց իւրոց, առաքելոցն եւ այլոց վարդապետաց զպսակն արքայութեան, զի ջանացան եւ վաստակեալ ճգնութեամբ դարձուցին զորդիս Ադամայ ի բարեպաշտութիւն:

ԻԳՆԱՏԻՈՍ

Նա, իբրեւ կամեցաւ զանձն արդարացուցանել, ասէ՝ «Ո՞վ է իմ ընկեր» (Ղուկ. Ժ. 29):

Ոմանց թուեցան բանքս, թէ անբարտաւանութեան իցեն՝ չհամարել ոք ընկեր, այլ ունի այս զցոյց մտացն ի տէրունական բանիցն, զի թէ անբարտաւան ինչ խաւսէր, չտայր այսպիսի բանս պատասխանի: Քանզի յԱւրէնսն գրեալ էր. «Սիրել զսիրելին եւ ի բաց դառնալ ի թշնամոյն» (հմմտ. Առակ. Գ. 17), եւ այսպէս ոչ էր հասարակաց տարածեալ սիրոյն առաւելութիւն, վասն որոյ կամեցաւ ուսանել, թէ առ ո՞րս պարտ էր բաժանել զսէրն, զի գիտութեամբ լիցի հազորդութիւն սիրոյն: Առ այս ասէ Յիսուս.

Այր մի իջանէր յերուսաղեմէ յԵրիքով եւ անկաւ ի ձեռս աւազակաց, որք մերկացուցին զնա եւ վերս ի վերայ եղին, թողին զնա կիսամահ եւ գնացին (Ժ. 30):

Ամենայն ուրեք զանձն իւր աւրինակ տայ մեզ ամենայն բարեաց, զի զոր ինչ ուսոյց, զնոյն եւ գործով ելից: Յորժամ վասն հեղութեան կամեցաւ զբանն հաստատագոյն առնել, ասէ. «Ուսարո՞ք յինէն, զի հեզ եմ եւ խոնարհ սրբիւ (Մարթ. ԺԱ. 29): Եւ դարձեալ՝ «Որդի մարդոյ ոչ եկն պաշտան առնուլ, այլ պաշտել եւ փալ զանձն իւր՝ փրկանս բազմաց» (Մարկ. Ժ. 45): Զայս հցոյց, յորժամ սփածանելով կտաւ, լուաց զոտս աշակերտացն եւ ասէ. «Արինակ մի ելրու ձեզ, զի որպէս ես ձեզ արարի, եւ դուք միմեանց արաջիք» (հմմտ. Յովհ. ԺԳ. 14-15): Անուանէ դարձեալ զանձն «հովիւ քաջ, որ ի վերայ ոչխարաց զնէ զանձն» (Յովհ. Ժ. 11) եւ զնայ զհետ մոլորելոյն եւ գտեալ՝ ի վերա ուսոցն բառնայ: Դարձեալ ասէ. «Սիրեցէք զմիմեանս, որպէս ես զձեզ սիրեցի» (Յովհ. ԺԵ. 12), զի «այսպիսի սէր ոչ ոք ունի, եթէ զանձն իւր զիցէ ի վերայ բարեկամաց» (Յովհ. ԺԵ. 13):

Արդ, ուսուցանէ հովուացն այսպիսի ունել զվերակացութիւնն եւ ոչ նմանել վարձկանացն վատթարութեան, նոյնպէս եւ բարեկամացն՝ զսիրոյն չափ: Արդ, այսպէս եւ առ աւրինականս այս զգործս իւր առակաւ առաջի եզ: Եւ թէ զիա՞րդ ունի այս աւրինակ բանիցս զցոյցս թարգմանութեան խորհրդոյն. «Այր մի իջեալ յերուսաղեմէ յԵրիքով» նշանակ ունի բնութեանս մերոյ, վասն զի առաջին մարդովն ամենեքեան անկան եւ ի մի համարեալ, որք

ի նման է ծննդեամբ յառաջ եկին, իբրև զմի այր անկեալ ի ձեռս աւազակաց, քանզի յաստուածային վայելչութեան փառաց անտի, զոր ունէաք ի դրախտի անդ, սողոսկեալ անկաք ի խոնարհ, ի ստորինս յայս կեանս: Եւ այնպէս, ի բարձրութենէ անտի իջեալ ի խոնարհ, անկաք ի ձեռս առաջին չարին եւ դաւաճանողին զմեզ: Արդ, թէպէտ եւ զառաջին խոցուածս նետից աւազակացն ընկալաք ի դրախտի անդ, որով եւ մերկացաք զփառսն, սակայն մնաց սերմն անապականութեան: Իսկ յետ իջանելոյն ի դրախտէն անտի յայս վայր, ապա ի սպառ անկաք ի ձեռս առաջնորդին կորստեանն եւ յայնժամ կարեվէր խոցեցայք եւ կարի մերկացեալ յաստուածային շնորհէն՝ խայտառակ գտաք, մինչեւ ասել Աստուծոյ. «Ոչ մնաց հոգի իմ ի մարդիկոյ յայդ, վասն լինելոյ դոցա մարմին, եւ զդացայ, զի արարի զմարդն ի վերայ երկրի» (Մենդ. Զ. 6): Դարձեալ եւ որք յետ սատակմանն եւ ջուրցն կորստեան եւս անաւրինագոյնք, քան զնոսա զառաջինսն գտան եւ անկեալք ի ձեռս աւազակաց՝ անխնայ խոցոտեցին զբնութիւնս մեր եւ զամենայն թոյնս դառնութեան իւրեանց հեղին ի մեզ, զի էին ատելիք մեր եւ պատահեցին մեզ՝ յանտես առնելն Աստուծոյ, վասն չար յաւժարութեանն, որ ի մեզ: Որով եւ մեք իսկ ձեռնտու եղաք պատերազմողին եւ սատակչին մերոյ, զի եղաք ուխտ ընդ դժոխս եւ ընդ մահու դաշինս կռեցաք եւ ի ստութեան եղաք զյոյսն մեր՝ ըստ Եսայիայ (տե՛ս Ես. ԻԸ. 15): Արդ, այսպէս ինքնաւրէն յաւժարութեամբ հեռացաք յամենակալ խնամոցն Աստուծոյ եւ անկեալ ի ձեռս աւազակաց՝ վիրաւորեցին զմեզ պէսպէս մեղացն ախտիւք եւ թողին կիսամահ: Եւ զի՞նչ եւս արդեալք «կիսամահն» իցէ: Ասէ զայս վասն այնոցիկ, առ որս մնաց արդարութեանն շունչ կենդանական, զի անուանեաց զծնունդս Աղամայ մի այր եւ անկեալ ի ձեռս սատանայի: Եւ թէպէտ նա չարանախանձ թշնամի գոլով՝ հնարեցաւ զամենայն մարմին մարդկային բնութեանս առհասարակ՝ սպանանել մեղաւք, այլ շնորհքն Աստուծոյ պահեցին արդարս յամենայն դարս՝ ըստ նմանութեան Մելքիսեդեկի (տե՛ս Եբր. Ե. 1-14): Յայս հայեցեալ ասաց՝ «Թողին կիսամահ եւ գնացին»:

Իսկ քահանայն եւ ղեւրացին ընդ նոյն եկեալ, փեսին եւ զանց արարին (հմմտ. Ժ. 31, 32):

Յայտնի է, զի բազում մարգարէք եկեալ նոյն բնութեամբ, զնոյն կարիս ունելով, հազիւ զանձինս իւրեանց զերծուցին ի մահաբեր մեղացն վիրաց, այլ անկելոյն աւզնել ինչ՝ ոչ զաւրեցին, թէպէտ եւ տեսին զծնունդս Աղամայ՝ անկեալ ընդ այսպիսի մահացու ախտիւք, զանց արարին, զի ոչ ունէին, որով փրկէին: Իսկ իբրև ետես ձեռն ամենակեցոյց, թէ չիք ուստեք փրկութիւն, ըստ Եսայիայ՝ «Նայեցայ, եւ ոչ որ էր, որ փրկէր: Զմտաւ ածի, եւ ոչ որ էր, որ ի թիկունս հասանէր: Փրկեաց, - ասէ, - աջ իմ եւ սրբմարտիս իմ միայն զղեմ կալաւ» (հմմտ. Ես. ԿԳ. 5): Այսպէս յայց ել, եկն ընդ նոյն ճանապարհ՝ որպէս հովիւ ընդ հետս մոլորեալ ոչխարին (տե՛ս Յովհ. Ժ. 1-18):

Մամարացի ոմն,- ասէ,- ճանապարհորդեալ, եկն, երես եւ զթացաւ (հմմտ. Ժ. 33):

«Մամարացի» անուանէ զանձն, թերեւս որով նախատէին զնա՝ «սամարացի ես», ասէին: Այլ նա, որ մաքրիչն է, չգարշի յումեքէ, անուանէ զինքն այնպիսի անուամբ: «Եկն» եւ նա, որ կանգնելոց էր զնա, նոյն ճանապարհաւն, այսինքն՝ զի եմուտ նա ի նոյն ինքն ճանապարհ բնութեանս, զի յորմէ սկսանիմք մեք, սկսաւ եւ նա: Եմուտ յորովայն եւ եկն ծննդեամբ յերկիր եւ շրջեցաւ անարատութեամբ եւ եզիտ զկիսամահ բնութիւնս՝ անկեալս մեղաւք, որով վիրաւորեցաք: Եւ թէպէտ եւ ունէր աստուածաբար փրկել՝ ըստ որում՝ «Յամենայնի բաւական է, եւ ամենայն ինչ ամա հնարատր է» (հմմտ. Մարկ. Թ. 22), սակայն իրաւամբք կամեցաւ կեցուցանել. էառ զմերս եւ մերովս հատոյց զմերն պարտիս: Զի, զոր աւրինակ, զանկեալ անասուն ի խորխորատ չկարէ ոք ի վեր բերել, եթէ ոչ ինքն ի խորխորատն իջանիցէ, եւ զմանուկ գլորեալ՝ չկարէ ոք ի վեր առնուլ, եթէ ոչ առ նա խոնարհեցի, զսոյն եւ զայս աւրինակ խնամոց Տէրն եւ Արարիչն եցոյց՝ բնութեանս մերոյ, զի յանկանելն մեր ի խոնարհ յայս վայր, անկաւ եւ նա ի վերայ մեր, զի յարուսցէ զանկեալքս: «Եկեալ,- ասէ,- առ նովաւ, երես եւ զթացաւ եւ պարեաց զվերսն»: Արդ, ահա յայտնի են ցոյցք առաջիկայ բանիս, զի որքան յաճախեաց սատանայ՝ խոցոտել զմեզ, յաճախեաց եւ կենարարն՝ պատել զվէրս մեր, ըստ այնմ՝ «Որ ատաւել եղեն մեղքն, ատաւել եղեն շնորհքն» (Նոտմ. Ե. 20), վասն զի ձրի դեղաւք բժշկեաց զմեզ: Նաեւ սատանայ ձրի հար եւ վիրաւորեաց զմեզ, զի ոչ ինչ վնասեցաք նմա:

Արկ,- ասէ,- ի նա ձէթ եւ գինի (հմմտ. Ժ. 34):

Ձի՞նչ այլ, քան զայս յայտնապէս ցոյցք առականոր բանիս: Յայտ է ահա՝ աւագանին շնորհք եւ աւծումն շնորհի որդեգրութեանն, եւ արիւնն փրկական, որ կենդանացոյց զմեռեալս մեղաւք եւ առողջացոյց զվէրս հոգւոց:

Եդ,- ասէ,- ի վերայ գրաստու եւ ած ի պանդոկի (հմմտ. Ժ. 34):

Երբեմն ի վերայ ուսոյ բառնայ եւ երբեմն ի վերայ գրաստու դնէ, որ ինչ պատշաճի ձեւ կերպարանաց աւրինակին, այնպէս յաւրինէ զբանն: Արդ, շինեալ զեկեղեցի, կարգեաց առաքեալս եւ մարգարէս, հովիւս եւ վարդապետս: Ի սմա ժողովէ յար զանկեալս եւ զվիրաւորեալս յարկածիցն մեղաց, եւ զորս ինքն կենդանացոյց եւ ի վիրացն մաքրեաց, աւրէնս դնէ առաջնորդաց եկեղեցւոյ, զի վերակացու, տեսուչ եւ խնամակալ լիցին, զի մի՛ դարձեալ աւագակք տիրեսցեն զմեզ՝ իսպառ սպանանել:

Եւ երկու դահեկանն (Ժ. 35):

Թերեւս զՀին եւ զՆոր Աւանդութիւնս ակնարկէ: Խոստանայ եւ ի գալստեանն իւրում վարձս: Արդարեւ, մեծ ի վարձուց ընդունակք լինելոց են ի հատուցմանն, եթէ Աւետարան ունիցին զվերակացութիւնն: Ապա թէ վատթարք իցեն, ունին եւ նոքա յարդարադատ իրաւանցն Աստուծոյ զարժանն առնուլ՝ զհատուցումն վրիժուց՝ ըստ այնմ՝ «Երանի՛ իցէ ծառային այնմիկ, զոր եկեալ Տէրն գրանիցէ արարեալ այնպէս» (Մաթթ. ԻԴ. 46): «Այա թէ ասիցէ ծառայն չար յամէ Տէրն զգալն եւ սկսանիցի հարկանել զծառայակիցսն» (հմմտ. Մաթթ. ԻԴ. 48-49): «Եկեցէ Տէր ծառային այնմիկ եւ ընդ մէջն կրրեսցէ զնա՝ բառնալ զիւրն» (հմմտ. Դուկ. ԺԲ. 46): Արդ, այսպէս է նորա հատուցումն պարտեաց՝ ըստ արդարութեան արդարոցն եւ անբարշտութեան՝ անիրաւացն:

Եւ զայս ասացեալ՝ հարցանէ. «Ո՞ թուի քեզ մերձաւոր լինել՝ անկելոյն» (Ժ. 36):

Չնոյն ինքն զնա նստուցանէ դատաւոր եւ ընտրիչ լինել՝ արդարութեան արդարացելոցն: Իսկ նա, վասն զի յայտնի էր առանց քննութեան, ասէ.

¹ ԻՏ լեալ

Որ արար զողորմութիւն ի վերայ նորա: Եւ ասէ ցնա. «Երթ, արա՛ զնոյն եւ կեցցես» (հմմտ. Ժ. 37):

Վասն զի այս ծայրագոյնն է առաքինութեանցն: Չայս ինքն անձամբ ելից եւ զսոյն ուսոյց: Եւ ի հասարակաց քննութեան եւ ի դատելն սոքաւք երկաքանչիւր դասքն բաժանին՝ ոմանք պատուեալ պսակին, փոխանակ զի այցելու եղեն կարաւտելոցն եւ ոմանք՝ արհամարհեալ պատժին, որք անտես արարին զայս աւրինակ բարեգործութեան: Արդ, զի այսքան կարեւոր եւ աւգտակար է այս ուղղութիւն բարեաց, վասն այնորիկ եւ Տէրն նախ աւրինակաւ վարի բանիւն եւ ի գիտութիւն ածեալ ասէ՝ «Երթ, արա՛ եւ դու նոյնպէս եւ կեցցես»:

ՍԱՐԳԻՍ ԿՈՒՆԴ

Իրրեւ կամեցաւ արդարացուցանել զանձն, ասէ. Եւ ո՞վ է իմ ընկեր (Դուկ. Ժ. 29):

Կարծեցաւ ոմանց, թէ ամբարտաւանութեամբ ինչ խաւսեցաւ: Բայց ո՛չ: Ի տերունական բանից անտի յայտ է, քանզի յաւրէնսն գրեալ էր. «Սիրել զսիրելին եւ ի բաց դառնալ ի թշնամոյն»: Եւ այսպէս ո՛չ էր հասարակ տարածեալ սիրոյն առաւելութիւն ի թշնամիսն եւ ի սիրելիսն: Կամեցաւ ուսանել, եթէ որպէս պարտ է բաժանել սիրոյն, զի հազորդեսցի գիտութեամբն:

Եւ Յիսուս ասէ. «Այր մի իջանէր յերուսաղեմէ յերեքով» (Ժ. 30):

ՍՏ «Այրն», որ «իջանէր յերուսաղեմէ», Ադամ եւ ամենայն մեղաւորք ըստ նմանութեան յանցանացն Ադամայ: Յերուսաղեմէ՝ ի դրախտէն, յորմէ արտաքսեցաւ եւ անկաւ ի ստորին բնակութիւնս: Երիքով, որ է կուրութիւն, աշխարհս է, յոր բնակեցաւ յետ դրախտին:

ԻԳ Ամենայն ուրեք զանձն աւրինակ տայ բարեաց, զոր ինչ ուսոյցն. «Ուսարուք յինէն, զի հեզ եմ եւ խոնարհ» (Մաթթ. ԺԱ. 29) **եւ «Որդի մարդոյ ո՛չ եկն պաշտաւն առնուլ, այլ պաշտել»** (Մաթթ. Ի. 28, Մարկ. Ժ. 45) **եւ «Սիրեցէք զմիմեանս, որպէս ես զձեզ սիրեցի»** (Յովհ. ԺԵ. 12):

Անկաւ ի ձեռս աւագակացն (Ժ. 30):

ՍՏ Աւազակք՝ սատանայ եւ դեւք նորա:

ԻՊ Աղամ եւ ամենայն ծնունդք նորա իբրեւ զայր մի՝ անկեալ ի ձեռս նոցա, քանզի յաստուածային վայելչութենէ փառաց զբախտին, զոր ունեաք, սողոսկեալ անկաք ի բարձրութենէն ի խոնարհ՝ իջեալ ի ձեռն դաւաճանողին զմեզ:

Որք մերկացին զնա (Ժ. 30):

ՍՏ ի փառացն եւ յանմահութենէն զանկեալն ասէ:

ԻՊ Եւ մերկացեալ յաստուածային շնորհացն՝ խայտառակ գտաք, մինչեւ ասել Աստուծոյ. «Ո՛չ մնացէ Հոգի իմ ի մարդիկդ յայդոսիկ, վասն լինելոյ դոցա մարմին» (Ծննդ. Զ. 3): Եւ զամենայն զդառնութիւն սատանայի եհեղ ի մեզ վասն չար յուժարութեանն մերոյ եւ անտես առնելոյն Աստուծոյ, վասն զի եղաք ուխտ ընդ զժոխս եւ ընդ մահու դաշինս կռեցաք, եւ եղաք զյոյսն մեր ի խստութիւն: Եւ յուժարութեամբ հերքեցաք յամենակալին խնամոցն:

Վերս ի վերայ եղին (Ժ. 30):

ՍՏ Մեղքն եւ յանցանքն եւ չարաչար կիրքն:

Թողին կիսամահ (Ժ. 30):

Զի մեռաւ մեղաւքն՝ վիրաւորեալ կիսամահ սամարացոյն եւ վասն ակնկալութեան, այսինքն՝ Փրկչաւն ի կենդանութիւն փոխիլ:

ԿՂ Զի ո՛չ կարացին յափշտակել զհոգին ի մարմնոյն ասէ զայս:

ԻՊ Իսկ նախանձ թշնամոյն հնարեցաւ զամենայն բնութիւնս մարդկան առհասարակ սպանանել մեղաւք: Այլ աստուածային շնորհն մնաց յարդարսն յամենայն դարս՝ ըստ նմանութեան Մելքիսեղեկի եւ այլոց արդարոցն:

Քահանայ գայր իջլանելլ (Ժ. 31):

ԿՂ Մելքիսեղեկ ասի [եւ] Ղեւտացի:

ՍՏ Որպէս ինձ թուի՝ մարգարէք եւ վարդապետք աւրինացն, որ յառաջ քան զՔրիստոս:

ԻՊ Բազում մարգարէք եւ քահանայք, զնոյն բնութեանս կիրս ունելով, հազիւ ուրեմն զերծուցին զանձինս ի մահաբեր վիրաց մե-

ղացն: Սակայն անկելոցն աւգնել ո՛չ զաւրեցին, թէպէտ եւ տեսին զծնունդս Աղամայ: Անկեալ ընդ այսպիսի ախտիւք՝ զանց արարին, զի ո՛չ էին կարող փրկել:

Սամարացի ոմն ճանապարհորդեալ՝ եկն ընդ նոյն (Ժ. 33):

ԿՂ Զմարդկային կիրս ասէ:

ԵՓ Արդ՝ Տէր մեր իբրեւ կամեցաւ կեցուցանել զազգս մարդկան, զի ընթացան հրեշտակք անուամբ իւրեանց եւ թագաւորք կոչմամբ իւրեանց եւ մարգարէք նշանաւք իւրեանց եւ քահանայք նուիրականաւք իւրեանց: Եւ մարդիկ ո՛չ փրկեցան, մինչեւ էջ յերկնից այն, որ բուռն հարկանէ եւ յարուցանէ:

ՍՏ Սամարացի՝ Քրիստոս, որ սամարացի կոչեցաւ եւ զիււահար: Որպէս ասէ Գրիգորիոս. «Այլ փրկեաց զազգս մարդկան»:

ԻՊ Եմուտ յորովայն Կուսին եւ եկն ծննդեամբ յերկիր եւ շրջեցաւ անարատութեամբ: Թէպէտ եւ կարող էր աստուածաբար փրկել, զի ամենայն ինչ նմա հնարաւոր է, սակայն իրաւամբք կամեցաւ կեցուցանել: Էառ զմերս եւ հատոյց զպարտիս մեր: Եւ, զոր աւրինակ՝ զանկեալ անասունն ի խորխորատ ո՛չ ոք կարէ ի վեր բերել, եթէ ո՛չ ինքն ի խորխորատն իջանէ, եւ զամնուկ զլորեալ ոք չկարէ ի վեր առնուլ, թէ ո՛չ առ նա խոնարհեսցի, նոյնպէս եւ Տէրն:

Տեսեալ զնա՝ գթացաւ: Եւ պարեաց զվերս նորա (Ժ. 33-34):

ԵՓ Զի որքան յաճախեաց սատանայ խոցոտել զմեզ, յաճախեաց կենարարն պատել զվերս մեր: Ըստ այնմ, եթէ՝ «Ուր առաւել եղեն մեղքն, առաւել եղեն շնորհքն» (Մտմ. Ե. 20), վասն զի ձրի դեղաւք բժշկեաց զմեզ: Եւ սատանայ ձրի եհար եւ վիրաւորեաց զմեզ, զի ո՛չինչ վնասեցաք նմա:

Արկ ի վերայ նորա ձէթ (Ժ. 34):

ՍՏ Տէր «ձէթ» (Ժ. 34) զողորմութիւնն ասէ, զոր արար ի վերայ նորա, «գինի» (Ժ. 34)՝ ուրախութիւն[ն], զոր ի փրկելն յառաջագոյն պարգեւեաց:

ԻՊ Կամ աւազանին շնորհքն՝ զաւժումն որդեգրութեան, եւ զինին՝ արիւնն փրկական, որ կենդանացոյց զմեռեալս մեղաւք եւ առողջացոյց զվերս հոգոց:

Եղ ի վերայ գրասարի իւրոյ (Ժ. 34):

ՄՏ Գրաստ, յոր եհան մարմինն իւր, որով եբարձ զմեզս աշխարհի:

ԻԳ Արդ՝ երբեմն ի վերայ ուսոյ բառնայ եւ երբեմն ի վերայ գրաստի, զի որ ինչ պատշաճի կերպարանն, սոյնպէս ձեւացուցանէ զԲանն:

Աձ զնա ի պանդոկ մի (Ժ. 34):

ՄՏ Պանդոկն՝ եկեղեցի Աստուծոյ, պանդոկապետն՝ առաքեալք եւ նոցին նմանողք՝ վարդապետք եկեղեցոյ:

ԻԳ Ի սմա ժողովէ զանկեալս եւ զվիրաւորեալս յարկածից մեղաց, զոր ինքն կենդանացոյց, զի վերակացուք տեսուչք եւ խնամակալք լիցին, զի մի՛ դարձեալ աւագակք տիրեսցեն:

Նանեալ եք ցպանդոկապետն երկուս դահեկանս (Ժ. 35):

ՄՏ Հին եւ Նոր Կտակարանք:

Զոր ինչ ծախեսցես ի դմա, ի միւս անգամ գալստեանն իմում հապուցից քեզ (Ժ. 35):

ՄՏ Դարձումն սամարացոյն երկրորդ գալուստն Քրիստոսի, յորժամ Հատուցանէ ըստ իւրաքանչիւր գործոց առաքելոցն եւ այլոց վարդապետաց զպսակն արդարութեան, զի ջանացան վաստակեալք ճգնութեամբ եւ դարձուցին զորդիս Աղամայ ի բարեպաշտութիւն:

ԻԳ Ապա, թէ ասիցէ ծառայն չար. «Յամէ տէր իմ զգալն» (Մարթ. ԻԳ. 48, Ղուկ. ԺԲ. 45) եւ սկսանի Հարկանել զծառայակիցսն, եկեսցէ Տէր ծառայիցն այնոցիկ, ընդ մէջ կտրեսցէ զնա բառնալ զիւրսն:

Արդ՝ ո՞ [յ]երիցն թուի քեզ մերձաւոր անկելոյն (Ժ. 36):

ԵՓ Արդ՝ Տէր մեր շամարտացովն զքահանայսն եւ զղեւտացիսն նախատեսաց, զի ո՛չ արարին ողորմութիւն ի վերայ ազգին իւրեանց: Ո՛չ շամարտացի լերուք, ասաց Տէրն, այլ եցոյց զվիրաւոր հրէայն, զի զնոսա յամալթ արասցէ շամարտացովն, որ թշնամի էր: Նաեւ Հեթանոսաւքն, որով առակեաց, որ ո՛չ արարին ողորմութիւն ի վերայ ազգին իւրեանց, զի այլազգի եւ թշնամի էր նոցա:

Եւ նա ասէ. «Որ արար զողորմութիւն ի վերայ նորա» (Ժ. 37):

ԻԳ Վասնզի յայտնի էր եւ առանց քննութեան:

Ասէ ցնա Յիսուս. «Երթ, արա՛ դու նոյնպէս» (Ժ. 37):

ԵՓ Ի վերայ հրէի որդոյ ժողովրդեան քո, զոր հրամայեցին Աւրէնքն զթալ ի վիրաւորն (Կեն Բ. Ար. ԻԱ. 1-8): Եւ դու մի՛ իբրեւ զայնոսիկ, որ ո՛չ արարին ողորմութիւն լինիր, այլ համարեալ լիցի ցաւոտն իբրեւ զմերձաւորն քո, եւ մեծ հոգաբարձութեամբ բժշկել զնա:

ԻԳ Փոխանակ, զի այցելու եղեն կարաւտելոց՝ պսակեալ պատուին, եւ ոմանք՝ արհամարհոտք եւ անգութք պատժին, որք անտես արարին զկարաւտեալսն:

ՄԱՏԹԷՈՍ ԶՈՒՂԱՅԵՅԻ

Այր մի իջանէր յերուսաղեմէ յերիքով եւ անկաւ ի ձեռս լաւագակաց] (Ղուկ. Ժ. 30):

Մքանչանալ պարտ է ընդ կարգաւորութիւն առակաւոր բանիս Տեսուն, զի թէ իմաստակ մարդոյ գոն շարադրութիւն բանից, քանի եւս առաւել մարդացելոյն, որ է Աստուծոյ իմաստութիւն եւ զաւրութիւն: Արդ, սկիզբն առակաւոր բանիցս ի յանկմանէն Աղամայ արար եւ կատարումն՝ ի միւս անգամ գալուստն, անդ ուր ասէ. «Տալ զհամ[ա]ր քանքարին» (հմմտ. Մարթ. ԻԵ. 19), զոր եւ զայս բան սկզբան մանրամասնաբար մեզ քննելի է:

Արդ, «այր» ասէ զԱղամ, իսկ «երուսաղեմ»՝ զգրախտն, զի Երուսաղէմ «գեղ խաղաղութեան» կոչի: Իսկ «երիքով»՝ զաշխարհս, զի Երիքով «լուսին» թարգմանի, որ է փոփոխական, զոր եւ զփոփոխումն սորին յերկարելով բացայայտեցից, մանաւանդ, զի այսոքիկ յերուսաղէմ ոչ գոյին, վասն որոյ «խաղաղութիւն» կոչէ զնա:

Ա. Նախ՝ զի այս երկիր միշտ այլայլի երեսաւք, երբեմն՝ չոր եւ երբեմն՝ գէճ, երբեմն՝ սառեալ, երբեմն՝ ջերմացեալ, կանաչ եւ անբոյս: Եւ այսոքիկ ոչ գոյին ի դրախտին, զի անփոփոխ ունի նա զկայացումն:

Բ. Երկրորդ՝ զի այս երկիրս միշտ փոփոխի եղանակաւքն. ի գարուն յամառն, ի յաշուն ի ձմեռն, եւ այսոքիկ ոչ գոյին ի դրախտին, զի անդ միշտ գարուն էր:

Գ. Երրորդ՝ զի աստ տիւ զգիշերն փոխէ, եւ գիշերն՝ գտիւ, եւ եւս զի գիշերն երբեմն յերկար, եւ երբեմն՝ կարճ, նոյնպէս եւ տիւն: Իսկ յաստուածային վայրն այն ոչ գոյր գիշեր, այլ միշտ՝ լոյս:

Դ. Չորրորդ՝ զի աստ անկանի սաղմն յարգանդ մաւրն, եւ ցաւաւք եւ երկամբք ծնանիմք, որպէս եւ պատիժ եզ Աստուած բնութեանս: Իսկ անդ, եթէ կացեալ էին զուղիղն, ոչ էր մեզ ցաւաւք եւ երկամբք ծնանիլ, այլ անախտաբար, որպէս լոյս՝ ի լուսոյ:

Ե. Հինգերորդ՝ զի տղայ լինիմք, եւ մանկութիւնն զնա փոխէ, եւ երիտասարդութիւն զնա, եւ ծերութիւնն զնա եւ այլն: Իսկ ի լուսեղէն բնակութիւն ոչ գոյր ծերանալ եւ հնանալ, այլ միշտ մանկութիւն, որպէս եւ վայրուցն վայել էր:

Զ. Վեցերորդ՝ զի երբ հիւանդանամք եւ դարձեալ առողջանամք, նաեւ վէրք ընդունիմք ի մեզ, խոց եւ կսկիծ, իսկ յերանեալ տեղիքն եւ ոչ գոյին հիւանդութիւն եւ տկարութիւն, այլ միշտ առողջ եւ զուարճացեալ դիմաւք:

Է. Եաւթներորդ՝ զի աստ երբեմն տրտմիմքք եւ ուրախանամք, եւ պակասին ախորժակքն մեր, եւ զի թշնամիք կեղեքեն, խլեն եւ կողոպտեն: Իսկ ի հրեշտակաց վայրքն ոչ գոյր պակասութիւն ինչ ախորժակացն, ուստի բաղկանայ տրտմութիւն, նոյնպէս եւ ոչ գոյր թշնամի, այլ անձնիշխան կամաւք ընկէց զինքն ի փառաց՝ ըստ այնմ. «Մարդ ի պարտի էր եւ ոչ իմացաւ» (Մաղմ. ԽԸ. 13, 21):

Ը. Ութերորդ՝ զի աստ ոմն՝ աղքատ եւ ոմն՝ մեծատուն, եւ այն, որ մեծատունն է, ոչ միշտ, նոյնպէս եւ աղքատն, իսկ ի փառաւոր տեղիքն ոչ գոյր աղքատութիւն կամ մեծ եւ փոքր, այլ՝ հաւասար ամենեցուն վայելուածք պատրաստեալ է Տէրն:

Թ. Իններորդ՝ զի աստ երբեմն՝ արդար, եւ մին՝ դարձեալ մեղաւոր, եւ ոչ նոյն կացելոցն եւս արդարացեալ եւ միջակ, եւ առաւել, եւ նուազ, իսկ յանմեղութեան տեղիք ոչ գոյր մեղք, վասն որոյ եւ ապաշխարութիւն, այլ արդարութեամբ միշտ ցանկացեալ յաստուածային տեսութեանն:

Ճ. Տասներորդ՝ զի աստ ոչ եմք միշտ կենդանի, այլ մահ փոխէ զմեզ եւ ոչ ի նոյն յամեմք, այլ դարձեալ յառնեմք ի մեռելոց, իսկ անդր ոչ գոյր մահ, եւ յայտ է, զի ի պտղոյն ուտելն եզ զմահ, վասն որոյ եւ յարութեան պիտոյացաւ, այլ միշտ կեանք: Արդ, զայս ամենայն պակասութիւնս երբ բնութեանս մարդկան, իջանելով անձնիշխան կամաւք ի մեղս եւ զրկեաց յանմահ վայրէն, վասն որոյ յիրաւէ ասէ, զի.

Անկաւ ի ձեռս աւագակաց (Ժ. 30):

Զի որ բարութեանն ոչ տանի, յիրաւի չարեաց դիպի:

Եւ զի՞ «գող» սատանայ կոչի եւ «աւագակապեք»: Եւ այս վասն բազում պատճառի:

Ա. Նախ՝ զի գողն ի գիշերի չըջի. այսպէս եւ սատանայ ի խաւարի չըջի՝ ըստ այնմ. «Յիրէ, որ շրջի ի խաւարի» (Մաղմ. Ղ. 6):

Բ. Երկրորդ՝ զի գողն փախչի յիշխանաց եւ ի մեծամեծաց, այսպէս սատանայ՝ [յ]եկեղեցւոյ, յԱւետարանէ եւ ի սրբոցն՝ ըստ այնմ. «Անկցին ի կողմանէ քում[մ]է Ռ. (հազարք)» (Մաղմ. Ղ. 7):

Գ. Երրորդ՝ զի գողն թաքնաբար մտանէ ի տուն՝ հանել զկարասին, մինչ զի ոչ գիտէ տէր տանն. այսպէս սատանայ թաքնաբար մտանէ ի տուն, այսինքն՝ ի սիրտ մարդոյն՝ հանել զբարի գործ առաքինութեան, մինչ զի ոչ իմանայ մարդն:

Դ. Չորրորդ՝ զի գողք եւ աւագակք եթէ ոչ կարեն թաքնաբար առնուլ, բռամբ կամին քակել զտունն եւ զտէր նորա սպանանել. այսպէս եւ սատանայ մինչ ոչ կարէ խաբել զմարդն, յարուցանէ փորձանս ի վերայ մարդոյն, թերեւս կարիցէ աւերել զբարւոք կամս նորա:

Ե. Հինգերորդ՝ զի գողն յորժամ մտանէ ի տունն, նախ՝ շիջուցանէ զգիտութիւն մարդոյն եւ ապա՝ սերմանէ ի նմա զամենայն մեղս:

Զ. Վեցերորդ՝ զի որպէս գողն զազնիւն առնու ի տանէն եւ զվատթարն թողու, այսպէս եւ սատանայ առնու զբարիս մարդոյն եւ զվատթար մեղսն ի նմա թողու՝ սպանանելով զնա:

Է. Եաւթներորդ՝ զի գողն յորժամ մտանէ ի տունն, եթէ ի տունն մի մարդ է, սպանանէ, ապա թէ բազում՝ ոչ կարէ. այսպէս եւ սատանայ, թէ գտանէ ի մարդն մի սրբութիւն, վաղվաղակի սպանցէ զնա, որպէս ասէ. «Վա՛յ միոյն ի ճանապարհի» (հմմտ. Ժող. Դ. 10), եւ «չուան երեքկին մի խզեսցի» (հմմտ. Ժող. Դ. 12):

Ը. Ութերորդ՝ զի որպէս գողն յորժամ ոչ կարէ ընդ նեղ ծերպս ծակուց մտանել, յայնժամ արձակէ անդ մանուկ փոքր եւ մտանէ ի ներքս. նմանապէս եւ սատանայ, յորժամ գայ առ արդարս եւ ոչ կարէ զմահու չափ մեղս մուծանել ի ներքս, յայնժամ հնարի զներելիսն սակաւ սակաւ մատուցանել ի նա, ուստի վարժեալ՝ անկանի ի մեղս մահու չափ:

Թ. Իններորդ՝ զի յորժամ տեսանէ գողն զտէր տանն յարթուն, ոչ կարէ ինչ գողանալ, իսկ թէ ննջէ, ապա առնու: Նմանապէս

սատանայ յորժամ տեսանէ գծիրսն ի բարեգործութեանն, ոչ կարէ քարշիկ զնա ի մեղս, իսկ յորժամ ծուլանան, նմանապէս սերմանէ զչարիս իւր:

Ժ. Տասներորդ՝ զի որպէս գողն ոչ կարէ ուրանալ զսովարական գործն իւր, այսպէս սատանայ ոչ կարէ ուրանալ զչարութիւն իւր, վասն որոյ Ադամայ եւ աստր Հասուցանէ զչարիս իւր, զի նովաւ ոչ բաւականացաւ կամ կորստեան բնութեանս, այլեւ զիւրաքանչիւրսն առանձնակի կորուսանէ ի վիհն յաւիտենական, վասն որոյ ասէ. «Անկա ի ձեռս առագակաց»:

Եւ արդ, ոչ միայն Ադամայ, այլեւ ի մեղ գործէ սատանայ, յորժամ ի մեղս անկանիմք, զայսոսիկ, զոր թուէ Տէրն:

Ա. Նախ՝ զի ի մերձենալն ի մեղս գերի լինիմք սատանայի՝ ըստ այնմ. «Որ առնէ զմեղս, ծառայ է մեղաց» (Յովի. Ը. 34):

Բ. Երկրորդ՝ զի մերկացուցանէ զմեղ, այսինքն՝ զանապականութիւն եւ զանմահութիւն, այլեւ զչնորհս աւաղանին, զաղաւթս եւ զպահս:

Գ. Երրորդ՝ վէրք զնէ ի հոգիսն զխայթոց մահուն յաւիտենական զմեղքն:

Դ. Չորրորդ՝ զի կիսամահ առնէ, այսինքն՝ յորժամ մարդն ի մեղքն է, մեռեալ է հոգին, եւ մարմինն միայն է կենդանի, վասն որոյ «կիսամահ» կոչէ: Եւ զարձեալ՝ առ բնութիւնս գործեաց սատանայ, զի կամեցաւ զբողոքն մեռուցանել: Իսկ նախախնամութիւնն ոչ եթող, այլ յարոյց ի բնութենէս զարդարս՝ զՆոյ եւ զԱբրահամ եւ զայլս, վասն որոյ «կիսամահ» կոչի:

Ե. Հինգերորդ՝ զի անտէր առնէ զմարդն, այսինքն՝ զհրեշտակս պահապանս ի բաց քակէ ի մէնջ եւ ինքն ոչ պահէ, այլ՝ տանջէ:

Իսկ արդ՝ «վերք» զմեղքն ասէ, եւ զմեղքն վիրաց նման է բազում եղանակաւ:

Ա. Նախ՝ զի վէրքն յայլ ումեմնէ լինի, զի թէ թրով հատանեն կամ փայտով հարկանեն. այսպէս եւ մեղքն ի պատճառէ սատանայի լինի, որ կամի միշտ խոց պահել զհոգին՝ ըստ այնմ. «Նախանձ բանարկոյն եմուր մահ յաշխարհ» (Իմաստ. Բ. 24):

Բ. Երկրորդ՝ զի գոյ վէրք, որ յանձնէ մարդոյն յառաջ գայ եւ ոչ ի պատճառէ, այսպէս՝ գոյ մեղք, որ մարդն ինքն խորհելով յառաջն բերէ առանց աւգնականութեան սատանայի, զի միտք մարդկան ի խնամս չարին հաստատեալ են ի մանկութենէ:

Գ. Երրորդ՝ զի վէրն շարաւակալի եւ տուն առնէ. այսպէս եւ մեղքն, ժողովեալ այլեւս աւր ըստ աւրէ բնակութիւն կազմէ իւր զհոգին, եթէ ոչ, մարդն փութով արտաքսէ:

Դ. Չորրորդ՝ զի մի վիրացն պարտին բազում սպեղանիք լինել. այսպէս եւ մեղացն պարտին բազում զղճումն եւ ապաշխարութիւնք:

Ե. Հինգերորդ՝ զի գժուարաւ ողջանան վէրքն, այսպէս եւ մեղքն գժուարաւ ելանէ ի մարդոյն, որք անգեղջք են. «Ձի այս ազգ ոչ խիք ելանէ, եթէ ոչ պահաւք եւ աղաթիւք» (Մարթ. ԺԷ. 20):

Զ. Վեցերորդ՝ զի վէրքն ի մի մասն անդամոյն լինի, բայց զամենայն անդամսն ցաւեցուցանէ. այսպէս՝ մեղքն թէպէտ ի հոգին է, սակայն բոլոր մարդոյն բերէ տանջանք՝ ըստ այնմ. «Վշտանայ ինչ մի անդամ, վշտանան ամենայն անդամքն» (Խմնր. Ա. Կոր. ԺԲ. 26):

Է. Եաւթներորդ՝ ի լինել վիրացն ի մի անդամն ոչ կարէ առնել այլ ինչ գործ, այսպէս մեղաւք լցեալ հոգի ոչ կարէ առնել արդարութիւն ինչ:

Ը. Ութերորդ՝ զի թէ ոչ ելանէ ամենայն փուտ մարմնոյն, ոչ առողջանայ մարմինն, եւ թէ մին մասն մնա, նա զառաջին կերպն ստանայ, այսպէս եւ մեղքն, թէ ոչ հատանէ մարդն ի հոգւոյն, ոչ կարէ ապրել հոգին, այլ զամենայն հանել պարտ է, զի զինչ աւգուտ է զխոտն քաղել եւ զարմատն ի ներքս թողուլ, զի վաղիւն կրկին բուսանի, այլ արժան է զարմատն քակել, զի մի եւս բուսցի:

Թ. Իններորդ՝ զի իմաստուն բժիշկ պիտոյ է, զի զվէրսն բժշկեացէ, այսպէս եւ հոգեւոր բժիշկն պարտի գիտուն լինել, որով կարասցէ զվէրսն հոգւոյն առողջացուցանել՝ ըստ այնմ. «Որ հանճարեղն է՝ զառաջնորդութիւն սրասցի» (Առակ. Ա. 5), զի յիմար բժիշկն առաւել խոցէ զվէրսն:

Ճ. Տասներորդ՝ զի թէպէտ բժշկին վէրքն, սակայն սպիքն մնայ ի նոյն տեղիքն. այսպէս եւ թէպէտ մեղքն սրբին ի մարդոյն, սակայն յիշատակութիւն մեղացն մնան, այսինքն՝ խղճմտանքն, որ է սպի ի հոգին:

Արդ, զայս ամենայն, զոր մեք ի մեղս հանելով ցուցաք, ի յԱդամ գործեցաւ, մինչեւ մերձ եղեւ զժոխոցն: Իսկ ասելն.

Դէպ եղև անցանել ընդ այն դելրացին եւ քահանային եւ զանցարարին (Խմնր. Ժ. 31-3):

Ա. Նախ՝ «ղեւփացի» զՄովսէս ասէ եւ զմարգարէս, զի ոչ ինչ կարացին աւգնել բնութեանս, զի փրկիչն անմեղ պարտի լինել, եւ նոքա, ի մեղաց մարմնոյ ծնեալ, ոչ կարէին ամենեւին անմեղ լինել: Իսկ «քահանայ»՝ զԱհարոն եւ զայլ քահանայսն, որք ոչ կարացին ապրեցուցանել զբնութիւնս, որպէս ասէ Պաւղոս (փն՝ Եբր. Ժ. 11-17): Իսկ յորժամ Տէրն ամենեցուն ետես, եթէ ոչ ոք կարաց աւգնել անկելոցս, ինքն խոնարհեցաւ եւ ծնաւ մարդկապէս եւ փրկեաց զմեզ:

Դարձեալ՝ Համանգամայն «ղեւփացի» եւ «քահանայ» զՀին աւրէնսն է իմանալ, զի գործով ոչ կարաց արդարացուցանել զբնութիւնս, որպէս ասէ Պաւղոս (փն՝ Եբր. Ժ. 11-17): Իսկ «սամարացի» զՆոր աւրէնսն ասէ, որ հաւատով ջանաց եւ ապրեցոյց: Եւ զի Տէր մեր կարաւ չէր զաւրութեամբ բազկի իւր ապրեցուցանել զմեզ, այլ զի կամեցաւ արդար իրաւամբք փրկել, վասն որոյ մարմին էառ¹: Եւ զոր աւրինակ տղայ ոք անկեալ յերկիր՝ ոչ է Հնար կանգնել, եթէ ոչ զրկախառն պատեսցէ եւ բարձրացուցէ. այսպէս՝ Տէր մեր մերձ եղեալ անկելոցս եւ բարձրացոյց զչարհարանս՝ կրելով զչարհարանս վասն մեր, վասն որոյ ասէ.

Սամարացի ոմն եփես եւ գթացաւ (հմմտ. Ժ. 33):

Զի սամարացի կոչեցաւ նա ի հրէիցն:

Արդ, Տէր մեր Ժ. (10) բարութիւնս արար անկելոյն ի ձեռս աւագակաց:

Ա. Նախ եւ առաջին՝ բարութիւն, զոր արար Տէր մեր բնութեանս՝ Հայելն է յանկեալքս, վասն որոյ զսոյն աւրինադրեաց Հայել յաղքատն եւ ի տնանկն՝ ըստ այնմ. «Նիւանդ էի, եւ եկիք առ իս» (հմմտ. Մաթթ. ԻԵ. 36):

Բ. Երկրորդ՝ բարութիւն, զի գթացաւ եւ զսոյն ուսոյց՝ գթալ յաղքատս եւ ի տնանկս եւ ի մեղաւորսն:

Գ. Երրորդ՝ զի «մերձեցաւ առ հիւանդն կիսամահ». այս է «մերձեցալն», զի էառ մարմին ի բնութենէս:

Դ. Չորրորդ՝ զի «պարեաց զվերս նորա». այսպէս Տէրն՝ սուրբ պատուիրանաւ իւրով:

Ե. Հինգերորդ՝ զի «միթով ամ». այսինքն՝ աւծամբ Հոգւոյն Սրբոյ ի մկրտութիւնն:

Զ. Վեցերորդ՝ զի «գինի եհեղ ի վերայ». այսինքն՝ զհաղորդութիւն արեան իւրոյ պարգեւեաց մեզ:

Է. Եաւթներորդ՝ զի «երարծ ի գրաստի». այսինքն՝ զցաւս մեր երարձ ի վերայ խաչափայտին:

Ը. Ութերորդ՝ զի «եհան յանկեալ փեղէն եւ ամ ի պանդոկ». այսինքն՝ եհան ի դժոխոց եւ եղ յեկեղեցի:

Թ. Իններորդ՝ զի «յանձնեաց ի պանդոկապանն». այսինքն՝ յառաքեալսն եւ ի Հայրապետսն, զոր աւրինակ թագաւոր երթեալ ի տար աշխարհ եւ յանձնէ զտուն ի սիրելի բարեկամ իւր (փն՝ Ղուկ. ԺԹ. 12):

Ճ. Տասներորդ՝ զի «եփ Բ. դահեկանս» առ ի դարմանել զհիւանդն. այսինքն՝ զՀին եւ զՆոր Կտակարանսն, որ նոքաւք առողջանա մարդն:

Իսկ զի՞ «պանդոկ» անուանէ զեկեղեցի: Եւ այս վասն բազում պատճառի ըստ Համեմատութեան իմն:

Ա. Նախ՝ զի պանդոկն յոյս է ապաւինութեան տեղւոջ ճանապարհորդաց. այսպէս եւ եկեղեցի յոյս եւ ապաւին է Հաւատացիւց յանակնկալ ի տեղիս յայս կենցաղումնս, յոր ապաւինեալ՝ հասանիմք վերին խորանին:

Բ. Երկրորդ՝ զի հանգիստ է ճանապարհորդաց պանդոկն. այսպէս եւ մեղուցեալ անձանց հանգիստ է եկեղեցի՝ ըստ այնմ. «Եկայք առ իս, ամենայն աշխարհալք եւ ծանրաբեռիք, եւ ես հանգուցից [զձեզ]» (հմմտ. Մաթթ. ԺԱ. 29):

Գ. Երրորդ՝ զի անասուն[ք] եւ մարդիկ ի միասին բնակին ի պանդոկի. այսպէս մեղաւորք եւ արդարք ի միասին հաղորդեն յեկեղեցիս ի սուրբ մարմնոյ եւ արեան՝ ըստ այնմ. «Գայք եւ գառիք ի միասին ճարակեցիս» (Ես. ԿԵ. 25):

Դ. Չորրորդ՝ զի պանդոկն պահէ ի ցրտոյ եւ ի տաւթոյ. այսպէս եւ եկեղեցի ի ցրտութենէ անհաւատութեանն ջերմացուցանէ դաւանութեամբն եւ ի ջերմութենէ մեղաց զովացուցանէ խոստովանութեամբ թողութեան բան՝ ըստ այնմ. «Եթէ ոք ծարաի իցէ, եկեաց առ իս» (Յովհ. Է. 37):

¹ Դ <վասն որոյ մարմին էառ>

Ե. Հինգերորդ՝ զի պանդոկն ի գազանաց անվնաս պահէ. այսպէս եւ եկեղեցի, անվնաս պահէ ի գազանէ սատանայէ՝ ըստ այնմ. «Դրունք դժոխոց զևս մի՛ յաղթահարեսցեն»¹ (Մաթթ. ԺԶ. 18):

Զ. Վեցերորդ՝ զի ի պանդոկն շինեալ են մասնաւոր տունք. այսպէս եւ յեկեղեցի կարգեալ են զանազան առաքինութիւնք՝ եւ բարձր, եւ խոնարհ:

Է. Եաւթներորդ՝ զի զոր, ինչ խնդրէ մարդն, գտանէ անդ, զի պատրաստեն տեարք՝ պանդոկին, այսպէս եւ զոր, ինչ կամի ոք, յեկեղեցւոյ իմաստութիւն եւ գիտութիւն գտանէ:

Ը. Ութերորդ՝ զի պանդոկապան կարգեալ են. այսպէս եւ յեկեղեցի՝ եպիսկոպոս եւ քահանայ:

Թ. Իններորդ՝ զի զինչս ճանապարհորդաց ի պանդոկապանն Հաւատացեալ լինի, այսպէս եւ զգործս մեղաւորաց եւ արդարոց առ քահանայսն է Հաւատացեալ, զի նոյնպէս է պահող եւ կորուսանող:

Ժ. Տասներորդ՝ զի վարձ առնու պանդոկապետն, յորժամ զամենայն կատարէ, այսպէս եւ առաջնորդք եկեղեցւոյ առնուն վարձս յետ ուղղափառ կատարելութեանն, վասն որոյ ասէ Տէրն.

Եր [ցպանդոկապետն] երկու դահեկանս եւ ասէ. «Դարմանեա՛ զդա, եւ ի միւսանգամ գալստեան իմոյ հարուցից քեզ (հմմտ. Ժ. 35):

Վասն որոյ ուրախացեալ առաջնորդք եկեղեցւոյ, ժրացեալք ի գործս բարիս պարտիմք լինել: Զի ահա փոխարէն վաստակոց ձերոց խոստացաւ Տէրն մեր, մի գուցէ ծուլութեամբ եւ զվատթար գործսն առնելով, զրկիցիմք ի յանճառ բարեացն, եւ ոչ միայն զրկիցիմք, այլեւ ի չարիս պահեսցէ զմեզ փոխանակ ուրախութեանն, մանաւանդ զայս աւրինակ ետ մեզ Տէր, զի զթասցուք առ միմեանս եւ զմահ յանձին բերցուք, որպէս նայն, զի եւ նորին տեսութեանն արժանաւորեսցուք շնորհաւք Տեառն մերոյ Յիսուսի Քրիստոսի, որում վայել է փառք:

ԱՌԱԿ ԱՆՄԻՏ ՄԵԾԱՏԱՆՆ

Ղուկ. ԺԲ. 16-21

ԻԳՆԱՏԻՈՍ

Ասէ.

Առն ուրումն մեծապան երուն անդր փոհմականս: Եւ խորիւր ի մտի իւրում եւ ասէր. «Զի՞նչ գործեցից, զի ոչ գոյ փեղի, ուր ժողովեցից զարդիւնս իմ» (հմմտ. Ղուկ. ԺԲ. 16-17):

Զայս առակ եզ առաջի, զի ուսեալ մեր, զանձինս ազատեսցուք ի ծառայութենէ չար ցանկութեանցս այսոցիկ, վասն զի խնամք տեսութեանն Աստուծոյ չառնէ անտես բնաւ զոք: Զի թէ աղքատացուցանէ զմեզ, փորձէ, թէ ե՞մք ժուժկալք եւ Համբերողք, եթէ ոչ ինչ զչարիցիմք ի նեղութիւնս, եթէ կարճամիտք եւ զիւրակործանք: Եւ եթէ մեծութիւն տայ եւ այնու փորձէ, եթէ ոչ ինչ ախտացաք ի գոյս ապականացուս եւ ոչ յաւրացաք ի փառս, որ փախտական է եւ ոչ կայ ի Հաստատութեան, որպէս երեւի: Արդ, են վկայք այսոցիկ առաջինքն, որք փորձեցան եւ ընտիրք գտան: Եւ որք վատթարք եւ խենչք ցուցան, եւ ունիմք այսոցիկ առաջին զԱբրահամ, զոր Հրամանաւ եհան Աստուած ի Հայրենի ժառանգութենէն եւ ած ի յերկիրն Քանանացւոց եւ ասէ. «Քեզ փաց գերկիրս զայս» (հմմտ. Ծննդ. ԺԳ. 7): Եւ փոխանակ երկրին ժառանգութեան, ած ի վերայ նորա վտանգ սովու, զի վասն նեղութեանն այնորիկ հմուտ յեզիպտոս, եւ քան զտազնապ սովուն մեծ էր նմա՝ կնոջն Հանելն ի նմանէ (տե՛ս Ծննդ. ԺԲ. 11-13), սակայն արդարն կայր ամենայնիւ ի Հաստատութեան եւ ոչ տարակուսէր ընդ այն, թէ ոչ լցաւ խոստումն Աստուծոյ, այլ Հակառակքն ընկալան զնա: Ապա փորձ գտեալ եւ անպարտելի ի տրտմականսն, դարձուցանէ այնուհետեւ զփորձութիւնն ի Հեշտալիսն եւ ի փառաւորագոյնսն, զի ետ նմա զկինն բազում ստացուածովք եւ ած զնա դարձեալ ի նոյն գաւառ (տե՛ս Ծննդ. ԺԲ. 20, ԺԳ. 1-3) եւ այնքան մեծացոյց զնա, մինչեւ իւր ծառայիւքն զգերիչսն Սողոմացւոց վանեաց՝ եւ զաւարն դարձոյց եւ ոչ կամեցաւ բնաւ առնուլ ինչ յաւարէ անտի՝ ախտացեալ ի նո-

¹ Դ յաղթահարեսցտ

¹ ԻՏ վարեաց

սա, այլ մնաց անըմբռնելի յայսպիսեաց կրից (տին Ծննդ. ԺԴ. 8-17): Յաղագս որոյ ասէ. «Զգեցից ահա զձեռն իմ առ Աստուած, զի ի շաղամաթէ միոջէ մինչեւ ի խրաց մի կառչկաց ոչ առից» (հմմտ. Ծննդ. ԺԴ. 23): Այսպիսի ոք ցուցաւ եւ Յոր, զի ի փառսն ոչ հեշտացաւ եւ ոչ ամբարտաւանեաց, եւ ի բառնալն ի նմանէ մեծութեանն՝ ոչ զայրացաւ եւ ոչ ետ անզգամութիւն Աստուծոյ, այլ այնպէս երկոքումբք անպարտելի դատաւ (տին Յոր Ա.-ԽԲ.): Են առ այս բազումք, որ ի նեղութիւնս եւ ի դժնդակ իրս¹ հէգս եւ թշուառականս զանձինս համարին, իբրեւ զայնոյս, որոց ոչ իցէ Աստուած: Դարձեալ են, զորս մեծացոյց, եւ նոքա յուսացան ի մեծութիւնս եւ մոռացան, թէ է Աստուած, որ մեծացուցանէ եւ աղքատացուցանէ: Եւ այնքան յաւերացեալ, հարան ի սէր ընչիցն, մինչեւ խաւարեալք յախտիցն ցանկութեանց, անյոյս եղեն յաստուածային փառացն եւ ի մեծութենէ անտի, որ արդարոցն պահեալ կան յերկինս: Չոր աւրինակ այրս այս, զոր առեալ Տէրն, նոպաւ զարհուրեցուցանէ զագահս եւ զարթուցանէ զթմբբեալսն արծաթսիրութեան ախտիւն, եւ իմաստնացուցանէ զյիմարս՝ մի՛ կապել զմիտսն ի յախտս չար ցանկութեանն եւ մի՛ հաստատել զյաւժարութիւն կամացն՝ ի դոյս երեւելիս, որ ոչ կայ ի հաստատութեան, այլ խաբէութեամբ ունի զմեզ: Վասն որոյ ասէ. «Եփուն անդր փոհմականս»: Բազմացոյց Աստուած զսերմանիս նորա, զոր արկ յերկիր, զի ուսցի նմանիլ երկրին բարութեան եւ այնպէս առատացուցանել յինքն Աստուծոյ՝ զպտուղ առաքինութեանն: Չի, ահաւասիկ, եւ մեք երկիր եմք Աստուծոյ, որ՝ «Ընկալար ի նմանէ զսերմանս բանին եւ պարպապան եմք՝ հարուցանել զսերմանողին զպտուղ բարեաց եւ ընդունել առիւնութիւն ի նմանէ» ըստ առաքելոյն (հմմտ. Եբր. Զ. 7): Ապա թէ փշարերք ոմանք իցեմք եւ անպտուղք՝ մերձ են անէծքն եւ վախճանն, այրումն եւ կորուստ, որ ընդունելոց է զայնպիսին յետ աստի հրաժարելոյն (տին Եբր. Զ. 8): Եւ կարի յիրաւի են այս դատաստանքն Աստուծոյ ի վերայ ամբարշտաց, զի յետ այսքանեաց խրատուց եւ այսպիսեաց պարզեւաց եւ առատացուցանելոյ Աստուծոյ զարդիւնսն, ուստի պարտ էր նմա սիրել եւ տալ աղքատաց, զի «արդարութիւնս մնացէ յախտեանս»՝ ըստ երգոյն (հմմտ. Սաղմ. ԸԺԶ. 2), զոր լուաւ: Սակայն նա յայսպիսեաց աստի ինչ ոչ ածէր զմտաւ, այլ լցեալ չար ցանկութեամբ ընչիցն՝ վարանէր

¹ ԻՏ կիրս

խորհրդովք: «Զի՛նչ,- ասէ,- արարից»: Որպէս այնքիկ, որ յոյժ կարի չքաւորեալք յամենայն պիտոյից՝ տարակուսալ ասեն. «Զի՛նչ արարից, ուստի՞՝ հանդերձ, ուստի՞՝ կերակուր»: Ըստ նմին եւ սա, ախտիւ ագահութեանն ըմբռնեալ, ասէ.

Զի՛նչ արարից, զի ոչ գոյ րեղի, ուր ժողովեցից զարդիւնս իմ (հմմտ. ԺԲ. 17):

Արդարացեալ է աստ ասացեալն, եթէ՝ «Նաւարացելոյն ամենայն երկիր լի է սրացուածովք, իսկ անհաւարին՝ եւ ոչ դանգ մի» (հմմտ. Առակ. ԺԹ. 4): Քանզի աղքատ եւ ծարաւ[ի] է ամենայն ոք, որ ախտիւ կապեալ իցէ, թէպէտ եւ ամենայնի Տէր իցէ: Զի զի՛նչ աւագուտ ի փարթամութենէն իցէ, յորժամ ի ցանկութենէ այնմ, որ ոչ ունի՝ իբրեւ զկարաւտ ոք, չարչարիցի: Եւ ստուգապէս ազատ է եւ ամենայնի Տէր, որ զամենայն արհամարհեաց եւ ի վերոյ էանց, քան զերեւելիս. եւ ոչ ի միջէ ըմբռնեալ յախտէ յերանելի կեանս կեայ՝ առանց հոգոց եւ ցաւոց, որ զմիտս չարչարեն: Յորմէ այս այր զանձն ազատել ոչ կամեցաւ, այլ վարակեալ ախտիւն՝ ասէ. «Ո՛ր ժողովեցից զարդիւնս իմ»: Ապա սկսանի տալ զանձն բազում աշխատութեանց եւ ծախուց ընչից եւ չգրէ ինչ զայս, բայց միայն յայն հայի, զի լցցէ զցանկութիւնն, յորում կապեցաւ բնութիւնն: Նաեւ ոչ զայն ած զմտաւ, եթէ ոչ ներէ նմա՝ ժամանակն, այլ վստահացեալ ասէ.

Քակեցից զշրմարանս իմ եւ եւս մեծամեծս շինեցից եւ անդր ժողովեցից զցորեան եւ զամենայն բարութիւնս իմ: Եւ ասացից ցանձն իմ՝ «Անձն, ունիս բազում բարութիւնս՝ համբարեալ բազում ամաց. հանգի՛ր՝ կե՛ր, ա՛րբ եւ ուրախ լե՛ր» (ԺԲ. 18-19):

Ո՛վ մեծի յիմարութեանն, որպէս թէ պակասեաց զաւրութիւնն երկրի եւ այլ ոչ եւս յաւելու տալ զպտուղ, եւ զայն միայն ունի եւ բազում ամաց բաւական է, եւ ամենեքեան, որ ոչ զնոյն համբարեցին, կորնչելոց են, եւ ինքն միայն մնալոց է յերկրի: Պարտ էր զայն զմտաւ ածել, թէ որ զայս ամենայն առատացոյց, մինչ ոչ էր, ունի նա նովին բնութեամբ եւ յառաջիկայ ժամանակն եւս բազմացուցանել զնոյն: Եւ ամենայն ամբ իւրեանց արմտեաւքն չափին եւ լցեալ են եւ չեն կարաւտ փոխ առնուլ ի դրացւոցն, բայց թէ՛

¹ ԻՏ > նմա

իրաւունք աստուածային բարկութեանն շարժեցի՝ վանել զերկիր վասն այսպիսեաց ամբարշտաց: Իսկ սա յայսպիսեաց աստի ինչ ոչ ած զմտաւ, ոչ զչափ պիտոյից բաւականին ունել եւ յաւելորդացն մասնաւորել զկարաւտեալսն, եւ ոչ թէ գոյ նախախնամութիւն Աստուծոյ ի վերայ բնութեանս եւ առնէ բարիս բարեաց եւ տանի զթիւրսն յափշտակութեամբ ի կորուստ: Այլ այնպէս, որպէս թէ եւ ինքն անձին բաւական իցէ, երանէ զանձն եւ ասէ. «Ունիս բազում բարութիւնս, կե՛ր, ա՛րբ եւ ուրախ լե՛ր»:

Ձայսպիսի ախտացեալս Սողոմոն, քան զամենայն վատթարս, եւս վատթարս եւ աղտեղագոյնս կոչէ յասելն. «Որ ի նոցանէ սարկագոյնքն են, զորկոր եւ զորովայն աստուածացոցին (Իմաստ. Բ., Փիլ. Գ. 18): Ձի իբրեւ Աստուծոյ կան ի ծառայութիւն՝ տալ զցանկութիւն անբան մասին բնութեանս, եւ զի մի պակասեցի այն, երկիրդիւ տաղնապին՝ բազում ժամանակաց մթերել, եւ ոչ իմանան եւ ոչ ածեն զմտաւ, թէ ի կէս աւուրց լքցեն զամենայն եւ այնպէս աղքատ, մերկ եւ խայտառակ պատահեցին անտի կենացն: Վասն որոյ ասէ առ նա Աստուած. «Անմի՛ր, յայսմ գիշերի զոգիդ ի քէն ի բաց պահանջիցեն, եւ զոր պարասստեցերդ՝ ո՛ւմ լինիցի» (հմմտ. ԺԲ. 20):

Արդարեւ, անմտութիւն մեծ է, որ իւր ոգւոյն տէր ոչ է՝ ունել կամ արձակել, եւ այսքան զբաղմամբ եւ սիրով հարեալ է յերեւելիս եւ ի հոսանուտս: Առ այսպիսիս հայեցեալ Ամբակում՝ ասաց. «Վայ, որ յաճախէ անձին իւրոյ, որ ոչ իւր իցէ. մինչեւ յե՛րբ ծանրացուցանէ զանոր իւր ծանրութեամբ, զի յանկարծակի յարիցեն կերիչք նորա եւ զարթիցեն դաւանանք նորա եւ եղիցիս նոցա ի յափշտակութիւն: Ձի դու կողոպտեցեր զազգս բազումս, եւ զբեզ կողոպտեցեն մնացորդ ամենայն ժողովրդոց» (Ամբ. Բ. 8): Այսպիսի է եւ ի Տեառնէ ասացեալն. «Յայսմ գիշերի զոգիդ պահանջեն, եւ զոր պարասստեցեր՝ ո՛ւմ լիցի»:

Ո՛վ, որքան է յիմարութիւնս եւ զիս՞րդ զաւրացաւ՝ յաղթել, զի յետ այսքան խրատու սաստոյ եւ յանդիմանութեան տակաւին եւս քարշեալ՝ ձգեն զմեզ ախտիցն ցանկութիւնք եւ, զերեալ, վարեն աւրինաւք մեղացն, եւ ոչ զարհուրիմք եւ ոչ զանգիտեմք ի սպառնալեաց աստի, որ եւ զխրատ լաւագունիցն ցանկութեան ընդ իւր ունի: «Ձորս պարասստեցեր,- ասէ,- ո՛ւմ լիցի»: Ձի ահա աւտարաց թողաք զայն, եւ մեք թափուր գնացաք, եւ որք ժառանգեն զմերն, բազում անգամ յատելեաց հանդիպին լինել եւ ոչ ի սիրելեաց:

Եւ իբրեւ զայրս զայս աւրինակաւ առաջի եդ, ասա դարձուցանէ զբանն առ ամենեսեան, որք զնոյն ախտանան:

«Նոյնպէս, - ասէ, - եւ որ գանձէ անձին, եւ ոչ յԱստուած մեծանայցէ» (ԺԲ. 21):

Ձի մի ոք, որ ի նոյն գործս ամբարշտութեան իցէ, կարծեցէ, թէ անպարտ վճարիցէ¹, այլ գիտել, թէ եւս տոկոսեաւք ի մէնջ պահանջին: Ձի եթէ այս միայն էր դատաստան իրաւանցն Աստուծոյ, յաստի կենացս վրիպել ազահաց եւ աւտարաց տալ զնոցա ժառանգութիւնն եւ յետ սոցին չգոյր ինչ՝ ի վերուստ կարգեալ հուր տանջողական, երանելիք ոմանք էին: Բայց սակայն, զի աստ սիրեցին մեծանալ եւ անձանց զանձեցին եւ առ Աստուած ոչ մեծացան, յանտի ճոխութենէն զրկեալք են: Եւ կայ պահի նոցա, որ ի հասարակաց քննութեան անդ ասացեալ լինի՝ «Ի բաց գնացք յինէն, անիծեալք» (հմմտ. Մատթ. ԻԵ. 41): Եւ յիրաւի, են այս դատաստանք, զի որք զանձինս կամաւ ի բաց փակեցին ի մեծութենէ անտի, որ առ Աստուծոյ է՝ աղքատանալ ի հանդերձեալսն, ժառանգեն զԴաւթայ ասացեալն. «Բաժին ժառանգութեան մեղաւորաց, եւ է նա հուր եւ ծծումբ» (հմմտ. Մաղմ. Ժ. 7)՝ անլոյս խաւարաւ խառնեալ: Արդ, զայս ժառանգեն, զի ունէին մեծանալ յԱստուած եւ ոչ ընտրեցին զայն՝ դնել ի բարեաց մասին: Եւ զայս ասացեալ՝ դարձուցանէ զբանն առ աշակերտսն, ամփոփէ զնոսա եւ ի հարկաւորացն հոգալոյ, զի մի ի ստոյգ հոգւոցն վրիպեցին:

ՍԱՐԳԻՍ ԿՈՒՆԴ

Առն մեծաբան եպոսն անդր փոհմականք (Ղուկ. ԺԲ. 16):

ԻԳ- Ձայս առակ եդ առաջի ամենեցուն, որ մտանեն յաշխարհս, զի ուսեալ ազատեցուք ի չար ծառայութեանց ցանկութեան: Վասնզի տեսչութիւն Աստուծոյ ո՛չ առնէ անտես զոք, զի թէ աղքատացուցանէ՝ փորձէ, թէ համբերեմք եւ ո՛չ տրտնջեմք՝ կարճամտեալք դիւրակործանք: Թէ մեծութիւն տայ՝ փորձէ, թէ ո՛չ յաւրանամք ի փառս: Եւ որպէս Աբրահամ հրամանաւ Աստուծոյ ի հայրենեացն ել եւ եկն յաւտար երկիր, խոստացաւ տալ ի ժառան-

¹ ԻՏ վճարեցի

գուժիւն գերկիրն, եւ ամ սով: Եմուտ յեղիպոսս, հանաւ կինն ի նմանէ: Եւ արդարն եկաց հաստատուն եւ դարձաւ փառաւք, զի ետ զկինն՝ հանդերձ ստացուածաւք, ի տեղի իւր: Եւ մեծացաւ, մինչ իւր ծառայիւքն գերեացն սողոմացիոց դարձ արար եւ ո՛չ առ յաւարէն (տին Ծննդ. ԺԲ. 1-20): Եւ Յոր փառաւքն ո՛չ ամբարտաւանեաց եւ ի բառնալ մեծութեանն ո՛չ զայրացաւ եւ ո՛չ ետ անզգամութիւն Աստուծոյ: Եւ են աղքատք, որ ի նեղութեան[ն] անյոյս եղեն յԱստուծոյ, թէ ո՛չ է Աստուած: Եւ զորս մեծացոյց, մոռացան զԱստուած, որ մեծացոյց զնոսա, եւ ախտիւք ընչիցն յաստուածային փառացն, որ յերկինս պահի արդարոցն՝ անյոյս եղեն:

Եպուն անդր փոհմականք (ԺԲ. 16):

Բազմացոյց Աստուած զսերմանիս նորա, զոր արկ յերկիր, զի ուսցի նմանանել երկրին բարեաց, եւ հոգիս իւր առատացուցանել՝ զպտուղ առաքինութեան[ն] Աստուծոյ: Զի մեք երկիր եմք Աստուծոյ, որ ընկալաք զսերմն Բանին Աստուծոյ, եւ պարտապան եմք սերմանողին հատուցանել զպտուղ բարեաց գործոց: Եւ ըստ առաքելոյ՝ «Ընդունել զաւրհնութիւն: Ապա եթէ փշաբերքն մերձ են յանէծս, եւ վախճանն կորուստ եւ այրումն գեհենին» (հմմտ. Եբր. Զ. 7-8):

Խորհեր ի միփս իւր, թէ զի՞նչ արարից (ԺԲ. 17):

Զի որպէս այնոքիկ, որ յոյժ չքաւորք իցեն եւ տարակուսեալ սսեն՝ ուստի՞ հանդերձ, ուստի՞ կերակուր, այնպէս եւ սա ախտին ազահութեան ըմբռնեալ տարակուսէր:

Ո՛չ գոյ փեղի, ուր ժողովեցից զարդիւնս իմ (ԺԲ. 17):

Հաւատացելոյն ամենայն աշխարհս լի ստացուածովք է, իսկ անհաւատին՝ եւ ո՛չ դանձ մի: Քանզի աղքատ եւ ծառայ է, որ ախտիւ ազահութեամբ կապեալ է, թէպէտ բազումս ունի: Եւ զի՞նչ աւգուտ ի փարթամութենէն իցէ, յորժամ ցանկութեամբ ընչիցն իբր կարաւոս ոք չարչարի: Այլ ստոյգ ազատ, որ զամենայն արհամարհէ եւ վերանայ քան գերեւելիս եւ ո՛չ իւրք ըմբռնի: Այնպիսին [յ]երանելի կեանս կայ առանց ցաւոց եւ հոգոց, որ զմիտսն չարչարէ որպէս մեծատանց:

Քակեցից զշփեմարանս եւ մեծամեծս շինեցից (ԺԲ. 18):

Ո՞վ յիմարութիւն, որպէս թէ երկրի զաւրութիւն պակասեաց եւ այլ ո՛չ եւս տայ զպտուղ, եւ ամենեքին կորնչին եւ ինքեանք միայն մնան յերկրի: Պարտ էր ամել զմտաւ, թէ որ ասաց. «Բ[ղ] խեսցէ երկիր զսերմն սերմանել ի վերայ երկրի» (Ծննդ. Ա. 11): Նոյն եւ յառաջակայ ժամանակս բազմացուցանէ, եւ ամենայն ոք իւրովքն շատանայ եւ ո՛չ կարաւտի փոխ առնուլ ի դրացոյն, բայց եթէ իրաւամբք Տէր զբարկութիւնն շարժէ վասն այնպիսեաց ամպարչտաց:

ՍՏ Ովսէ մարգարէ ասէ վասն ազահաց. «Մեծացայ եւ գտի ինձ ցաւս» (հմմտ. Ովսէ ԺԲ. 8), այսինքն՝ զմամոնայ եւ ամենայն վաստակք իմ մի՛ գտցին վասն անաւրէնութեանց, որ յանց[ե]այ ես նոքաւք:

Ունցիս բարիս՝ կեր, արբ եւ ուրախ լեր (ԺԲ. 19):

ԻԳ. Զայսպիսի ախտացեալսս Սողոմոն քան զամենայն վատթարս եւ աղտեղագոյնս կոչէ՝ յասելն. «Որ ի նոցանէ ստրկագոյնք են, զորորովայնն աստուածացուցին»: Զի իբր Աստուծոյ կան ի ծառայութեան, զի մի՛ պակասեցէ եւ երկի[ւ]ղիւ տազնապին, եւ բազում ժամանակաց մթերս ժողովեն: Եւ ո՛չ իմանան, թէ ի կէս աւուրց լքցեն զամենայն եւ մերկ, իսպտառակ երթան յայն կեանսն: Վասն որոյ առ նոսա ասէ Աստուած.

Անմիփ, յայսմ գիշերի զոգիղ ի քէն ի բաց պահանջեմ (ԺԲ. 20):

Արդարեւ անմտութիւն մեծ է, որ իւր ոգոյն տեղի ո՛չ է ունել: Եւ այսքան զբազմամբ սիրով հարեալ է ի կենցաղս հոսանուտ, զոր եղկէ Ամբակում. «Վա՛յ, որ յաճախէ անձին իւրոյ, որ ո՛չ իւր իցէ» (Ամբակ. Բ. 6): Եւ մինչեւ յե՞րբ ծանրացուցանես զանուր ծանր, զի յանկարծակի յարիցէ գերիչք նորա, եւ զարթիցեն դաւաճանողք նորա, եւ եղէց ես նոցա յափշտակութիւն: Զի դու կողոպտեցեր զբազումս, եւ զքեզ կողոպտեցեն ամենայն ժողովուրդք:

Զոր պապրասպեցեր, ո՞ւմ լիցի (ԺԲ. 20):

Ո՞վ որքան է յիմարութիւն, եւ զիա՞րդ զաւրացաւ յաղթել մամոնայ յետ այսքան խրատու աւրինաց եւ մարգարէից եւ աւետարանչաց եւ հայրապետաց [եւ] վարդապետաց: Եւ ձգէ յախտս եւ գերեալ վարէ աւրինաւք մեղաց, եւ ո՛չ զարհուրիմք: Եւ ո՛չ զանգիտեմք, զի ահա, զոր պատրաստեցեր, ատելիքն վայելեն:

Նոյնպէս եւ, որ գանձէ անձին, եւ ո՛չ յԱստուած մեծանայ (ԺԲ. 21): Զի մի ոք, որ ի նոյն գործ ամպարչտութեան իցէ, կարծէ անպարտ վճարել: Այլ գիտէ, զի տոկոսիւք ի մէնջ պահանջեն, զի Աստուծոյ իրաւունք[ն], զի որ աստ սիրեցին անձանց գանձել եւ առ Աստուած ո՛չ մեծացան, յանտի ճոխութենէն զրկեալք են: Եւ պահի նոցա. «Ի բաց գնացէք յինէն» (Մարթ. Թ. 24)՝ անիծիւք: Եւ տարազրին յերանութենէ աղքատացն, զոր եւ Դաւիթ ասաց. «Ժառանգութիւն մեղաւորաց հուր եւ ծծումբ» (հմմտ. Սաղմ. Ժ. 7): Զի ո՛չ կամեցան յԱստուած մեծանալ:

ՄԱՏԹԷՈՍ ԶՈՒՂԱՅԵՅԻ

Առն ուրումն մեծաբան եպրուն անդք քոռիմականս (Ղուկ. ԺԲ. 16):

Բարերարն մեր եւ ազատիչն յամենայն անաւրէնութեանց Յիսուս զայս արինակ եղ առաջի, զի ուսցուք մեք եւ գանձինս մեր ազատեցուք ի ծանր ծառայութենէ ազահուրթեանն, վասն զի խնամք տեսչութեանն Աստուծոյ չառնէ անտես բնաւ զոք, զի թէ աղքատացուցանէ զմեզ, եւ այն վասն Գ. (3) պատճառի:

Ա. Նախ՝ փորձէ զմեզ, թէ ժուժկալ եմք եւ համբերող[ք] ի յաղքատութիւնն, թէ՛ ոչ:

Բ. Երկրորդ՝ թէ չարանամք ի յաղքատութեան մէջն, թէ՛ ոչ:

Գ. Երրորդ՝ եթէ կարճամիտ եւ դիւրակործան եմք, թէ՛ ոչ:

Նոյնպէս եւ մեծութիւն տայ] /ընկած թերթի բովանդակութիւնը լրացրել ենք ըստ ՍՄ. ձեռ. 2518ի. տե՛ս էջ 31ա-32ա/ եւ այն եւս Գ. (3) պատճառի:

Ա. Նախ՝ փորձէ, թէ չար ինչ գործեմք, թէ՛ ոչ:

Բ. Եւ երկրորդ՝ թէ յինչսն ամբարտաւանիմք, որ փոփոխական է եւ ոչ հաստատուն:

Եւ Գ. երրորդ՝ թէ զԱստուած առնէ ընչիցն տուող, թէ զինքն քաջութիւն:

Արդ, են վկայք բանիցս առաջինք նահապետք, որք փորձեցան եւ ընտիր գտան: Նմանապէս եւ նոքա, որք վատթար գտան եւ տկարք: Եւ ունիմք այսոցիկ առաջին արինակ զԱբրահամ, զոր Աստուած հրամանաւ եհան ի հայրենի ժառանգութենէն եւ ած յերկրին քանանացուց եւ ասէ. «Քեզ տաց զերկիրս զայս» (հմմտ. Ծննդ. ԺԷ. 8), եւ փոխանակ տալոյ [զ] ժառանգութիւն, ած ի վերայ նորա վտանգք սովու, զի վասն նեղութեան մտին յեզիպտոս: Եւ

քանզի զոյգ սովու մեծ վտանգ նմա էր այն, զի զկինն խլեաց փարաւոն, սակայն արդարն կայր ամենայնիւ ի հաստատութեան եւ ոչ տարակուսէր ընդ այն: Դարձոյց այնուհետեւ զփորձութիւնս ի հեշտալիսն եւ ի փառաւորագոյնսն, զի ետ նմա դարձեալ զկինն բազում ստացուածովք եւ ած զնա դարձեալ ի նոյն գաւառս, եւ այնքան մեծացոյց, մինչ զի իւր ընդոծին ծառայիւքն զգերիչս սողոմայեցուց կոտորեաց, եւ զաւարն դարձոյց եւ ոչ կամեցաւ առնուլ բնաւին ինչ ի յաւարէ անտի, այլ մնաց անըմբռնելի յայնպիսի կրից: Յազագս որոյ ասէր. «Զգեցից զձեռն իմ առ Աստուած» (հմմտ. Ծննդ. ԺԴ. 22), զի շաղամաթէ միոջէ մինչեւ ցիրացս կաւչկաց մի ոչ առից: Երկրորդ ունիմք արինակ զՅոբ, զի յայնչափ փառսն առաւել ոչ հեշտացաւ եւ ոչ ամբարտաւանացաւ: Եւ յորժամ եբարձ ի նմանէ զմեծութիւնն եւ զորդիսն, ոչ զայրացաւ կամ երկմտեցաւ եւ ոչ ետ անզգամութիւն Աստուծոյ, այլ այնպէս երկոքումբք անպարտելի մնաց, այսինքն՝ գտաւ, վասն այնորիկ կրկնապատիկ ետ նմա Աստուած զինչսն եւ զչափ որդոցն եւ եւս առաւել բարձրացոյց զնա: Դարձեալ՝ ըստ այսմ արինակի են բազումք, որ ի նեղութիւնս եւ ի դժնդակ կիրս, հէք եւ թշուառական գանձինս համարին, իբրեւ զայնոսիկ որ ոչ իցէ Աստուած: Դարձեալ են, որ մեծացոյց եւ նոքա յուսացան ի մեծութիւնս եւ մոռացան, թէ է Աստուած, որ մեծացուցանէ եւ աղքատացուցանէ, եւ այնքան խրեալք ի սէր ընչիցն, մինչեւ խաւարեալք յախտից ցանկութեանց անյոյս եղեն յաստուածային փառացն եւ ի մեծութենէ անտի, որ արդարոցն պահեալ է յերկինս: Զոր արինակ, այրս այս, զոր Տէրն նովաւ զարհուրեցուցանէ զագահսն եւ զթմրեալսն արծաթասրիութեամբ ախտիւն]:

Եւ գիտելի է, զի ազահուրթիւնն մի է յէ.է (7) մահու չափ մեղացն եւ ոչ միակերպ է ազահուրթիւնն, այլ զանազան եւ բազմապատիկ:

Ա. Նախ՝ կոչի «ագահ», որ զընտանիսն զրկէ ի հայրենեացն ընչից եւ յայլոց նմանեաց:

Բ. Երկրորդ՝ որ զաւտարն զրկէ ի յիւրոց հալալ արդեանցն կամ ի վաճառս եւ կամ յայլ իրս:

Գ. Երրորդ՝ կոչի «ագահ» նա, որ իւր զինչս, որ արդարութեամբ ստացաւ, հաստատէ զմիտսն առ նոսա, թէ՛ այս իմ է եւ այլում ոչ տաց:

Դ. Չորրորդ՝ է «ագահ», որ ի յինչսն յուսայ, իբր թէ ինչքն փրկեսցէ զնա յամենայն որոգայթից, վասն որոյ ասէ Սողոմոն. «Ոչ ազնեսցեն ինչք յաւոր բարկութեան» (Առակ. ԺԱ. 4):

Ե. Հինգերորդ՝ կոչի «ագահ», որ բազում ուտէ եւ քան զչափն ի վեր, վասն որոյ առաքեալն լալով ասէ. «Թշնամիք են խաչին Քրիստոսի» (հմմտ. Փիլիպ. Գ. 18):

Զ. Վեցերորդ՝ գողութիւնն է ազահութիւն, զի զորս ոչ կարաց յայտնի տանել, գաղտնի տանի:

Է. Եաւթերորդ՝ ազահութիւն է, որ շահ առնու ի վերայ փոխոցն, զի ընդդէմ է աստուածային պատուիրանացն:

Ը. Ութերորդ՝ է ազահութիւն մատնելութիւնն, զի կամի զարիւն մարդոյ ըմպել, զի կատարեալ մարդասպանութիւնն է:

Թ. Իններորդ՝ սուտ երդմնաճարութիւնն, որ վասն ընչիցն, վասն որոյ ասէ. «Ամենեւին մի՛ երդնուր» (Մատթ. Ե. 34):

Ժ. Տասներորդ՝ անհանգստութիւնն, որ ոչ կամի հանգչել ի չարչարանաց, այլ յամենայն ժամ կամի ժողովել, կուտել եւ կուռս շինել, որպէս այս այս, որ ասէ.

Որոյ երուն անդր փոհմականք (ԺԲ. 16):

Բայց աստ է տարակոյս ինչ, զի ոմանք ընդդէմ բերեն՝ ասելով, եթէ Աստուած առնէ զբազմութիւն պտղոցն, ապա եւ պատճառնա է ազահութեան ախտին, զի նա բազում տայ, վասն որոյ ժողովէ, զի թէ փոքր էր տուեալ, ոչ անկանէր այրն այն ի մահու չափ մեղս: Զոր պատասխանեսցուք, թէ ի կամսն Աստուծոյ ոչ գոյ նշան չար առնելոյ ամենեւին, զի զամենայն, զոր ինչ առնէ, վասն բարեաց խորհրդոց առնէ՝ ըստ այնմ. «Զամենայն, զոր ինչ արար Աստուած, եւ ահա բարի են յոյժ» (հմմտ. Ծննդ. Ա. 31): Նոյնպէս եւ զբազմացուցանելն արմտեացն առնէ վասն Բ. (2) պատճառի:

Ա. Նախ՝ զի աւրինակ տայ զերկիր, զի որպէս նա զիւր բարութիւնն աճեցուցանէ, նոյնպէս ասէ. «Եւ դուք աճեցուցէք ի ձեզ զբազմապատիկ առաքինութիւնսն», զի եւ մեք երկիր եմք աստուածային Բանին ընդունակութեան՝ ըստ այնմ. «Ել սերմանացան սերմանել» (Ղուկ. Ը. 5), վասն որոյ ասէ մարգարէն. «Տեսէք յերկինս ի վեր եւ յերկիր ի խոնարհ» (հմմտ. Բ. Ար. Դ. 39, հմմտ. Յեսու Բ. 11), զի լինիցիք մշտաշարժ ի բարին, իբրեւ զերկինս, եւ հաստատունք ի նոյն բարիս, որպէս զերկիր: Իսկ մարդիկ, առեալ զմեծութիւնն յԱստուծոյ,

կամակոր մտաւք մերձեանս ի մեղս մահու չափս: Ապա եւ ոչ է պատճառ մեղացն Աստուած, այլ անձնիշխան կամքն մարդոյն:

Եւ երկրորդ՝ զի թէ ոչ տայ Աստուած զաճեցումն պտղոյն, ասեն թերիքն, թէ չկամէ Աստուած, զի ոչ կամի զայլոց զմեծութիւնն, վասն որոյ տայ յաջողումն ամենայն իրաց նոցա, զի ափ ի բերան լինիցին, յորժամ ոչ կարիցեն տանել մեծութեան:

Եւ դարձեալ՝ տայ Աստուած զինչս մարմնականս, զի նովաւ զնեսցեն զարքայութիւնն՝ ըստ այնմ. «Արարէք ձեզ բարեկամս ի մամոնայէ անիրաւութեան» (Ղուկ. ԺԶ. 9), զի յորժամ պակասեսցի այս, ընդունիցին զձեզ յարկսն յաւիտենից: Իսկ այրս այս զղիմակն աստուածային կամացն արար, զի ոչ սփռեաց եւ ետ աղքատաց, զի արդարութիւն նորա մնացեալ էր յաւիտեան:

Այլ ասէր ի միտս իւր՝ զի՞նչ արարից (հմմտ. ԺԲ. 17):

Եւ արդ, տե՛ս, զի աստ հաւասարք են մեծատունք եւ աղքատք, զի աղքատքն հոգան, զի կերակուր գտանիցեն, եւ մեծատունք՝ թէ ո՞ւր ժողովեսցեն զինչսն: Աստ, արդարացաւ ասելն, թէ՛ «Նաւարացելոց ամենայն երկիր լի է բարութեամբ, եւ անհաւարին՝ ոչ դանկ մի» (հմմտ. Առակ. ԺԷ. 4), քանզի աղքատ եւ ծառայ է ամենայն ոք, որ ախտիւ կապեալ իցէ, թէպէտ եւ տէր իցէ ամենայն ընչից՝ ըստ այնմ. «Որ ասնէ զմեղս, ծառայ է մեղաց» (Յովն. Ը. 34): Զի զի՞նչ աւգուտ է ի փարթամութենէն, յորժամ աղքատի նման կարաւտութեամբ չարչարի: Եւ ցուցից, զի աղքատն հանգիստ է, քան զմեծատունն, բազում յեղանակաւ:

Ա. Նախ՝ զի աղքատն վասն մին բերանոյ կերակրոյ հոգայ, իսկ մեծատունն՝ վասն բազմաց:

Բ. Երկրորդ՝ զի աղքատն հարկաւորաւն բաւականանայ, որ զիւրաւ գտանին, իսկ մեծատունն զվայելչականն, որ դժուար կրիւք ժողովէ:

Գ. Երրորդ՝ զի փոքր ունի աղքատն զտկարութիւն մարմնոյ վասն փոքր կերակրոյն, իսկ մեծատունն առաւելէ ախտք եւ ցաւք ի մարմինն կրիս¹ եւ այլք, եւ այն վասն բազում եւ յազ զամենայն ինչ ուտելոյն:

¹ Դ Գկրիս

Դ. Չորրորդ՝ զի աղքատն ոչ հոգայ վասն գողոց, այլ հանգիստ ննջէ, իսկ մեծատունն, ոչ կարէ ճշմարտապէս ննջել վասն երկիրդի գողոցն. թէ յայսմ ժամու կտրեն գտունն, եւ թէ միւսն՝ այլ:

Ե. Հինգերորդ՝ զի աղքատն ինքեամբ միայն կարէ ապրել, իսկ մեծատունն՝ ոչ, այլ պիտոյ է նմա բազում աւգնական, զի ըստ այսմ կոճղ է մեծատունն կամ անդամալոյծ:

Զ. Վեցերորդ՝ զի աղքատն ի նեղութեան ժամանակին հեշտաւ փախչի եւ ի ճանապարհի ոչ վախէ՝ ըստ այնմ. «Մերկք յաւազակաց ոչ երկնչին»: Իսկ ի լինել խռովութեանցն մահն հասեալ է մեծատանն, զի կողոպտեն եւ սպանանեն:

Է. Եաւթերորդ՝ զի աղքատն ի կապանաց ոչ երկնչի, որ վասն ընչից, զի բազում աղքատ ի հանգիստ ի քուն, իսկ զմեծատունն ըմբռնեալ, եւ մինն տանջէ՝ Ռ. (1000) խնդրելով եւ միւսն՝ բեւր եւ այլն:

Ը. Ութերորդ՝ զի աղքատն կարէ. Մ. (50) աւուր ճանապարհ գնալ հետիտս բոկ, իսկ մեծատունն եւ ոչ ժամ մին, թէ պատեհ է գնալ, եւ եւս յայտնագոյնս աստ է տեսանել, զի մեծատունն աղքատին զգեստիւն զերծանի ի թշնամեաց, եւ թէ իւր զգեստիւն կենայ, ըմբռնեալ տանջի, զի մատնիչք են զգեստքն:

Թ. Իններորդ՝ զի ամենայն աւրէնք ի վերայ մեծատանն հակեն. ողորմութիւն, պահք, արտասուք, վասն մեծամեծ մեղաց, շահ առելոյն, զրկելոյն եւ այլոցն: Իսկ աղքատին ոչ գոյ ամենայն, զի միշտ ի պահս է եւ առաքինի եւ ոչ զոք զրկէ եւ կամ ստէ, վասն որոյ եւ արդարոց աւրէնք ոչ գոյ, զի կատարեալ են:

Ժ. Տասներորդ՝ զի աղքատն ոչ ունի երկիրդ այնմ տանջանաց, բայց երանութիւն՝ ըստ այնմ. «Երանի՛ աղքատաց հոգով» (Մարթ. Ե. 3), իսկ մեծատանն՝ գոյ, զի ասէ. «Վայ՛ ձեզ, մեծաբանք, զի ընկալայք գմխիթարութիւն [ձեր]» (Ղուկ. Զ. 24):

Արդ, ահա ճշմարտապէս ցուցաւ, զի աղքատն է ամենայնի տէր, զաշխարհիս ինչս արհամարհեալ է, քանզի ի վեր անցանի այնպիսին, քան զամենայն զգալիսս եւ երանելի կեանս ստանայ առանց հոգոց եւ ցաւոց, որ զմիտս չարչարեն: Իսկ այրս այս ոչ կամեցաւ ազատել զինքն ի չարչարանաց, այլ սկսանի յաշխատանք եւ ի չարչարանք, սկիզբն առնէ մեծամեծ տներ շինել եւ ամբար, զի ժողովեացէ զբազում տարե[ա]ն կերակուր: Եւ զիա՞րդ այրս այս: Այլեւ ի մերում ժամանակի տեսանեմք, զի չգրեն ոչ ինչ զայն

չափ՝ աշխատանք, որ վասն մեղաւոր ցանկութեանց: Իսկ թէ խրատ տամք, թէ մի փող յաղքատաց տուր, եւ ահա մեռանի, եւ թէ եկեղեցի յիշենք, քար քարչեն: Այլ ըստ նմանութեան առնս ասեն ի մտի.

«Գիպեմ՝ զինչ արարից. բակեցից զշտեմարանս իմ եւ այլ եւս մեծամեծս շինեցից (ԺԲ. 18):

Եւ ասացից ցանձն [իմ]. «Անձն [ունիս բազում բարութիւնս համբարեալ ամաց բազմաց. հանգի՛ր՝ կե՛ր, ա՛րբ՝ եւ ուրախ լեր]» (ԺԲ. 19):

Եւ արդ, յիմարութիւն սորայ բազում է:

Ա. Նախ՝ զի խորհեցաւ, թէ պակասեաց յերկրէ զաւրութիւնն, եւ այլ ոչ տա պտուղ, վասն որոյ ասէ՝ «ժողովեցից»:

Բ. Երկրորդ՝ զի ապաւէն ինքեան զայն չափն արար, որ առ ժամն կայր, վասն որոյ ասէ. «Ունիս բազում բարութիւնս»:

Գ. Երրորդ՝ զի ասաց, թէ այս որչափ կենդանի եմ, բաւական է ինձ, վասն որոյ ասէ՝ «ամաց բազմաց»:

Դ. Չորրորդ՝ զի ասաց ի մտի, թէ որք ոչ են ամբարեալ, կորնչելոց են, եւ ես միայն մնալոց եմ, վասն որոյ ասէ. «Կե՛ր, ա՛րբ եւ ուրախ լեր», զի դու յաշխարհի ես մնալոց:

Ե. Հինգերորդ՝ զի ինքն առ ինքն խորհեցաւ, եւ ոչ զԱստուած արար կցորդ իւրոցն խորհրդոյ, վասն որոյ ասէ Աստուած՝ «անմիտ» (Ղուկ. ԺԲ. 20):

Նոյնս է խորհուրդ, որ այժմ յաշխարհի զիրկս արկեալ են եւ զինքեան միայն խնդրեն ի վերայ աշխարհիս մեծ: Իսկ որք կամին զուղիղն ընթանալ ճանապարհ, Բ. (2) ինչ պարտ է առնել:

Ա. Նախ՝ զի զչափ պիտոյիցն հարկաւորաց բաւական ունել ինքեան առ ժամանակին:

Բ. Եւ երկրորդ՝ զաւելորդսն մասնաւորել, կարաւտելոցն ցրուել եւ սփռել՝ ըստ այնմ. «Բրդեաց գիաց կարաւրելոցն, եւ ժողովելոյ գկաղս եւ զկոյրս յընդունելութեանն» (հմմտ. Ես. ԾԸ. 7): Եւ զայս էր, վասն զի ասէ մարգարէն. «Բարի առնէ՛ Տէր բարեաց» (Մաղմ. ՃԻԴ. 4): Իսկ զթեւրսն յագահութեան կորուսանէ ընդ այնոսիկ, որք անհաւատք են եւ անաւրէնք: Իսկ որք ինքեանց միայն գանձեն, ասէ.

«Անմիտ, յայսմ գիշերի զոգիղ [ի քէն ի բաց պահանջիցեն, եւ զոր պարրաստեցերն, յո՛ւմ [ինիցի]» (ԺԲ. 20):

Արդարեւ յիմարութիւն է, զի որ զիւր հոգւոյն համարձակութիւն ոչ ունենայ պահել, այնչափ սիրով յերեւելիսս եւ ի հոսանուտ սխալեալ իցէ, վասն որոյ ասէ Ամբակում. «Վա[յ], որ յաճախէ յանձին իւրոյ, որ ոչ իւր իցէ (Ամբակ. Բ. 6), զի յանկարծակի յարիցեն կերիչք ևոցա, եւ զարթիցեն դաւաճակք ևոցա, եւ եղիցի ևոցա ի յափշտակութիւն (հմմտ. Ամբակ. Բ. 7): Զի դու կողոպտեցեր զագգս բագումս, եւ զքեզ կողոպտեցեն մնացորդք ժողովրդոց» (Ամբակ. Բ. 8): *Նմանապէս եւ զրեցեալս ի Տեառնէ գուշակէ: Եւ արդ՝ տե՛ս զայսմ ժամանակի զյիմարութիւնն, զայսքան խրատս եւ սպառնալիս, եւ մեք յիմարեալք՝ ոչ զարհուրիմք ի սպառնալեաց աստի, զի ահա տկարացաք, թողաք զայն եւ թափուր գնամք յաստի կենացս, եւ որք ժառանգեն զմերն, ատելիքն մեր եւ սիրելիքն, զի որք առնուն յԱստուծոյ զապրանքն, մի՛ իմասցին, թէ ճրի առին, այլ վասն այն, զի շահովն ի տէր ընչիցն դարձուցանեն, զի թէ այս կենացս զրկելն միայն էր պատիժ, երանելի էր: Բայց, սակայն աստ սիրեցին մեծանալ եւ անձանց գանձեցին եւ առ Աստուած ոչ մեծացան: Յանդ ի ճոխութենէն զրկեալք են եւ կայ պահ ի նոցա, որ հասարակ քննութեան նա սխալ լինի. «Գևացէ՛ք յինէն, անիծեալք» (հմմտ. Մատթ. ԻԵ. 41), որոց մի՛ լիցի մեզ նմանել: Իսկ որ արարին զկաման, տե՛ս՝ որպէս խրատէ. «Վաճառեցէ՛ք զինչս ձեր եւ փո՛ք [ողորմութիւն]» (Ղուկ. ԺԲ. 33): Մանաւանդ, զի «հաւտ փոքրիկ» կոչէ (Ղուկ. ԺԲ. 32) զառնաւղս կամաց իւրոց, զի քսակ յերկիրս ունին եւ գանձ անպակաս՝ զԱստուած, որ ոչ հատանեն ուտիչք դժխոցն, եւ դեւք խորել ոչ կարեն ի նմանէ, որոց լիցի եւ մեզ հասանել, ուրախանալ ընդ փեսային յուրախութիւնսն անգրաւ կենաւք, եւ նմա փառք յաւիտեանս:*



ԱՌԱԿ ԱՆՊՏՈՒՂ ԹԶԵՆԻՈՅՆ Ղուկ. ԺԳ. 6-9

ԻԳՆԱՏԻՈՍ

Ապա առակաւ եւս հաւատարմագոյնս դնէ զնոյն: Զայս ամենայն ուրեք առնէ, որպէս յորժամ զգուշացոյց յագահութենէ եւ ապա առակաւ վարի առ այն եւ ի մէջ դնէ զայրն, որոյ բազմացան արմտիքն, եւ նա խորհէր մեծացուցանել զչտեմարանսն ըստ նմին ասէ եւ զայս.

Թճլենի մի էր յայգլոջ ուրումն. եւ եկն ի նա խնդրել պտուղ, եւ ոչ եզիպ (հմմտ. Ղուկ. ԺԳ. 6):

Եւ զի՞նչ արդեաւք պարտ է յառակէս ուսանիլ, եթէ ոչ զմեզ՝ տնկեալ յեկեղեցւոյ Աստուծոյ, որում պարտապան եմք՝ տալ անխափան զպտուղ առաքինութեան՝ փոխանակ ընդ որոյ տնկեաց եւ գործէ, ապա եթէ զլանամք՝ եւ ծուլութեամբ կորուսանեմք զպտուղն, հատանելն առաջի կայ՝ ըստ Յովհաննու, որ ասէ. «Ամենայն ծառ, որ ոչ առնէ պտուղ բարի, հապանի եւ ի հուր արկանի» (Մատթ. Գ. 10):

Եւ աստ ասէ ցայգեգործն. «Ահա երեք ամբ են, յորմէ հեպլ գամ՝ պտուղ խնդրել եւ ոչ գպանեմ. կտրեա՛ գղա, ընդէ՛ր եւ զերկիրդ խափանէ» (հմմտ. ԺԳ. 7):

Այգլոյ առակաւ յորժամ առնու ասել՝ ազգին ամենայնի է նշանակ: Որպէս այն՝ «Տնկեաց այգի եւ եր ցմշակս» (հմմտ. Մատթ. ԻԱ. 33), եւ «Այգի եղև սիրեցելոցն» (հմմտ. Ես. Ե. 1): Իսկ ծառոյ նմանեցուցանելն զիւրաքանչիւր ուրուք զանձն առանձին՝ նշանակէ: Ըստ նմին եւ ի բարեգործելն եւ ի պատուհասելն՝ երբեմն հասարակարար եւ երբեմն՝ առանձնապէս խաւսի: Զնոյն եւ ի հատուցմանն ուսաք, զի է, յորում համաշխարհական ածէ տազնապ, եւ է, զի զմի անձն ուրուք, որպէս կամի, հարկանէ ի խրատ այնոցիկ, որ նովին չափով չարութեամբ վարակեալք իցեն: Զայս աւրինակ եւ աստ ուսանիմք: «Երեք ամբ են,- ասէ,- յորում ոչ եր պտուղ. կտրեա՛ գղա»: «Երեք ամբ» ասելն զայն տայ իմաստս, զի ամենայն աւուրք եւ ժամանակք յե-

¹ ԻՏ > առանձին

րիս որոշմունս բաժանեալ են՝ ի սկիզբն, ի միջոց եւ ի կատարած: Արդ, եցոյց բանիւն, եթէ ոչ ի սկզբանն եզիտ պտուղ եւ ոչ ի միջոցին, սակայն ներեաց երկայնատուութեամբ եւ ոչ ի սկզբան անդ կամեցաւ հատանել: Թէպէտ մինչ ի կատարած զամենայն ինչ զմեր տեսանէ եւ, նախ քան զգալն մեր ծննդեամբ յերկիր՝ ըստ Դաւթայ ասելոյն. «Անկերպարան փեսին զիս աչք թո, հանդերձ ընդ այնոսիկ ամենեսան, որ գրեալ են ի զիրս թո» (հմմտ. Սաղմ. ՃԼԸ. 16): Արդ, այսպէս յայտնի են նմա, սակայն ներէ, զի առանց պատասխանելոյ արգարացի ի դատելն: Վասն որոյ եւ աստ եցոյց զքաղցրութիւնն եւ ապա՝ զբարկութիւնն՝ ասելով. «Կորեա՛ գղա, ընդէ՛ր եւ գերկիրդ խափանէ»: Դարձեալ եւ աստ՝ ընդ բարկութեանն խառնեալ է եւ ողորմութիւն նորա՝ ըստ Ամբակումայ, զի ասէ. «Ի ժամանակի բարկութեան զողորմութիւնդ յիշեսցես» (հմմտ. Ամբ. Գ. 2): Զի թէ կամք էին նորա կտրել, բնաւ զի՞նչ պէտք էին զայգեգործն առ այս գործակիրց ունել եւ ոչ հատանել, այլ հրամայել: Վասն որոյ ուսանիմք աստի, թէ աւրէնս եղ առաջնորդաց՝ բարեխաւս լինիլ եւ ազաւթիւք ի վերայ մեղաւորաց խնդրուածս առնել եւ հաշտեցուցանել զայն, որ ոչ բարկանայ բնաւ երբէք, սակայն ձեւանայ, զի զարհուրեցուցէ, եւ ուսուցանէ զառաջնորդս զարժանն ի ներքս բերել զխնամակալութիւնն: Որպէս յորժամ Մովսէսի ասէր. «Ի բաց կայ, թո՛ղ հարից սափակեցից զդոսա, եւ զքեզ արարից յազդ մեծ» (հմմտ. Թիմ. ԺԳ. 12): Եւ արդ, եթէ կամէր սատակել, զի՞նչ պէտք էր՝ ասել. «Թոյլ տո՛ւր, ի բաց կայց», եւ ո՞վ ոք էր Մովսէս, որ ընդդէմ կայր: Այն, որ բազում մաղթանաւք ընդ Յորդանան ոչ էանց (Բ Արն. Գ. 23): Այլեւ վասն այնորիկ ասէ. «Ի բաց կայց», զի ընդդէմ կացցէ, ասել. «Եթէ թողոս դոցա, թող, ապա թէ ոչ, եւ զիս ջնջեա՛ ի դպրութենէն, յորում գրեցեր (հմմտ. Ելից ԼԱ. 31-32): Այսպէս եւ աստ ասէ՝ «կտրեա՛», եւ ապա զոր պարտ է առնել մշակին, ինքն առաջի դնէ:

Ասէ. «Թոյլ փուր, զի բրեցից եւ արկից աղբ. թերեւս փացէ պփուղ, ապա թէ ոչ՝ յարմափոյ հափցես զդա» (հմմտ. ԺԳ. 8-9)

Արդ, այսոցիկ երկոցունց պարտապան են վերակացուք՝ տքնել եւ ազաւթիւք առ Աստուած միշտ պաղատել: «Նորա, - ասէ, - առաքեալն, փքնին վասն ոգոց ձերոց, զի եւ համարս փալոց են ընդ ձեր» (հմմտ. Եբր. ԺԳ. 17): Իսկ առ մարդիկ զգործս առաքինի մշակաց ցուցանել՝ ըստ այնմ,

¹ ԻՏ էի՛ս

զոր Պաւղոս Տիմոթէի գրեաց. «Սաստեա՛, յանդիմանեա՛, խրապեա՛ ամենայն երկայնամտութեամբ եւ վարդապետութեամբ» (Բ. Տիմ. Դ. 2): Եւ որպէս ինքն իսկ ընդ հիւանդացեալսն հիւանդանայր եւ ընդ գայթակղեալսն տապանայր (փնս Բ. Կոր. ԺԱ. 29), եւ որ առ Եզեկիէլ յԱստուծոյ ասացեալ է, զի զգործ վերակացութեանն լցցէ Աստուծոյ, զի մի՛ արեան ուրուք պարտապան լիցի վասն հեղգութեանն (փնս Եզեկ. Գ. 17): Բազում են առ այս, որ ոք կամիցի մերձ դնել զմարգարէիցն եւ զառաքելոցն զբանս, որով ընդ Աստուծոյ խաւսեցան: Եւ որպէս առ ժողովուրդն զգործս վերակացութեան ցուցին, զի ընդ Աստուծոյ պաղատանաւք խաւսեցան, զի խնայեսցէ ի ժողովուրդն եւ առ նոսա սաստկացուցանէին զսպառնալիսն Աստուծոյ: Որպէս այն, որ ասէ. «Ես՝ հովիւս մեղայ, խաշինքդ զի՛նչ մեղան: Եղիցի սուր թո յիս ի փուն հար իմոյ» (հմմտ. Բ. Թագ. ԻԴ. 17): Իսկ առ ժողովուրդն ասէ. «Ազգ չար եւ դառնացաղ, որ ոչ ուղեաց զսիրս իր» (Սաղմ. ՆԷ. 8): Եւ ահա բազմապատիկ են առ այս սրբոցն բանք, որ խրատեն զառաջնորդս, թէ զի՞նչ պարտ է ասել Աստուծոյ. «Տէ՛ր, թո՛ղ զդա յայս ամ եւս»: Եւ թէ զի՞նչ է «բրելն» եւ «արկանելն աղբ». արուեստք են սոքա երկրագործաց, որով զանբան երկիր ածեն ի պողաբերութիւն: Եւ դիւրին է զայս յեղուլ ի մերս տեսութիւն, թէ զի՞նչ վերակացուք մարդկան ունին բանիւն կակղել զխստութիւն մտաց, իբրեւ բրջաւ եւ զարթուցանել զՉերմութիւն սիրոյն Աստուծոյ հոգիս ըստ զաւրութեան աղբոյն եւ առնել պողաբերս առաքինութեան եւ զերծանել ի հատանելոյ անտի աստուածային սրոյ բարկութեանն եւ մնալ յարժամ ի տանն Աստուծոյ տնկեալս: Իսկ, ի նմին անպտղութեան մնացեալ, ապա իրաւամբք յարմատոյ հաւատոյն եւ ի կենաց աստի կտրել զնա: Իսկ եթէ մշակն եւս չարանայցէ, ունի եւ սա իւր առանձինն զբարկութեանն Աստուծոյ զսաստ. «Զչարսն, - ասէ, - չարսս կորուսցէ, եւ զայգին փացէ այլոց մշակաց» (Մատթ. ԻԱ. 41): Եւ թէ՛ «Զչար հովիւսդ չարաչար կորուսից եւ իմում հաւտիդ, եւ խնամարկեցից» (հմմտ. Եզեկ. ԼԴ. 8-10):

ՍԱՐԳԻՍ ԿՈՒՆԴ

ԹՎԵՆԻ ՄԻ ԷՐ ՓՆԿԵԱՂ ՈՐՈՒՄՆ ԵՅՈՒՄՆ ԵՅՈՒՄՆ (Դուկ. ԺԳ. 6):

ԿՐ Այգուոյն՝ զՀաւրէ գուշակէ, եւ թզենի՝ հրէայքն են, որ յայգի ի Պաղեստին, յորում զնոսա յատուկ տնկեաց: Ըստ այնմ՝ «Այգի յեզիպտոսէ, հաներ զհիթանոսս, զԻսրայելս տնկեցեր» (Սաղմ. ՆԹ. 9):

ԳՐ Ճշգրիտ պատկէր մարդկութեանս է թշուառացեալ: Եկն խնդրել պտուղ եւ ո՛չ եգիտ (ԺԳ. 6):

ԻԳ Զհաւատացեալս յեկեղեցի Աստուծոյ,

կր. Յորում պարտապան եմք տալ զպտուղ առաքինութեան:

ԻԳ Այլ թէ ո՛չ տամք հատանել, որպէս ասաց. «Ամենայն ծառ, որ ո՛չ բերէ պտուղ, հատանեն եւ ի հուր այրի» (Մաւրթ. Գ. 10):

Այս երեք ամբ են, որ գամ խնդրել պտուղ, եւ ո՛չ գպ[անեմ] (ԺԳ. 7):

ԵՓ Վասն երից գերութեան նոցա: Զի խրատեսցին եւ ո՛չ խրատեցան: Ասէ. «Զուր տարապարտուց հարի ես զորդիս ձեր, եւ ո՛չ խրատեցան գալ առ իս»: Ժամանակն եւթանասունեւթներորդացն, քանզի ի ժամանակին անդ՝ դարձին իւրեանց, կատարին երեք ամբն, որ յառաջ քան զնորա գալուստն էր:

«Խնդրեցի ի նոցանէ այր մի խրամակարկապ եւ ո՛չ գպի» (հմմտ. ԺԳ. 7):

Ի Սողոմ տասն խնդրեցաւ: «Երեք ամբ» եցոյց Փրկիչն զանձն իւր նոցա նշանաւքն, որ գործեցաւ, եւ ո՛չ ետուն պտուղ հաւատոյ:

Կր. «Այգեգործ» (ԺԳ. 7)՝ Քրիստոս, «երեք ամբ»՝ որ եկն ի մկրտութիւնն եռամեան դատարկութեամբ:

Գր.(Նարեկ.) Որ զընաւ յաւիտեանս պարունակէ ժամանակ, զանցեալն եւ զնեղկայս, որ զապառնոյն յամայր [յ]ամրութեամբ յերկարաձգելոյ՝ [յ]այգի աշխարհիս արմատացելոյ սին սաղարթիւ պաճուճեալ, զրկեալ ի պտղոյ:

Կպրեա՛ գղա, ընդէ՛ր եւ զերկիրդ խափանէ (ԺԳ. 7):

ԿՐ Զի նոքա միայն էին ի Պաղեստին եւ ո՛չ այլ ոք, յորոց հաւատալոց էին ոմանք:

ԵՓ Զի կամեցաւ Հայր խլել զնոսա: Այն, զի ասաց ցՄովսէս. «Թոյլ տուր ջնջիլ զդոսա» (հմմտ. Ելք ԼԲ. 10-12), զի ետ նմա պատճառ աղաչել եւ խնդրել ի նմանէ:

ԻԳ Արդ՝ թէ կամէր սատակել, զի՞նչ պէտք էին, «թոյլ տուր» (հմմտ. Ելք ԼԲ. 10-12), «ի բաց կաց» (հմմտ. Մաւրթ. ԻԵ. 41, Ղուկ. ԺԳ. 27): Եւ ո՞վ ոք էր Մովսէս, որ ընդդէմ կայր նորա, որ բազում պաղատանաւք ընդ Յորդանան ո՛չ էանց: Աւրէնս եղ առաջնորդաց՝ բա-

րիխաւս լինել աղաւթիւք ի վերայ մեղաւորաց, հաշտեցուցանել զանբարկանալին բնութեամբ: Սակայն ձեւանայ, զի զարհուրեցուցէ զառաջնորդս խնամակալութիւն ի ներս բերել:

Նա ասէ. «Տէ՛ր, թողացոյ եւ զայս ամ եւս» (ԺԳ. 8):

ԵՓ. Յայտ վայրի եցոյց մշակն, թէ կամեցաւ Տէր խլել զնա: Յայտ արար զխնամակալութիւն իւր մշակն եւ զգութն իւր ողորմածն:

Կր. Զժամանակ քարոզութեան աշակերտացն ցուցանէ, յորս բազումք ի նոցանէ հաւատացին:

ԻԳ. Իսկ առ մարդիկ զգործս առին ի մշակացուցանել, որպէս Պաւղոս առ Տիմոթէոս գրեաց. «Սաստեայ, յանդիմանեայ, խրատեայ երկայնմտութեամբ, վարդապետութեամբ» (հմմտ. Բ. Տիմ. Դ. 2): Եւ Պաւղոս ընդ հիւանդացեալսն հիւանդանար, ընդ գայթաղեալսն տապանայր: Եւ ցեզեկիէլ ասէր Աստուած. «Զի մի՛ արեան ուրուք պարտապան լիցիս հեղգութեամբ» (հմմտ. Երեմ. ԽԸ. 10):

ՍՄ. Արդ՝ հրշետակք բարեխաւսք, այլեւ՝ խնամակալք, որք զեզերին հանապազ առ մեզ, ընդ մերումս կարեկցելով՝ բարեմասնութիւնս մերում սպասեն: Եւ յաւիտենական փրկութեան մեր աղերսնն՝ ասելով. «Զգործս ձեռաց քոց մի՛ անտես առնէր» (Սաղմ. ԾԼԷ. 8): Քանզի արդարեւ մեր են աղաչանքս այս՝ ի բարերարէդ Աստուծոյ կարգեալ առ նոսա, զի նոքա բանիւ են ստեղծեալ եւ մեք ձեռաւք բարեգործեալ:

Բրեցից եւ արկից աղբ (ԺԳ. 8):

ԻԳ Արուեստք են երկրագործացն զերկիր ածել ի պտղաբերութիւն, իսկ վերակացուք մարդկան բանիւ զբանաւոր երկիր կակղեն զխստութիւն մտացն իբր բրչաւ՝ զարթուցանել զջերմութիւն սիրոյն Աստուծոյ յոգիս, ըստ զաւրութեան աղբոյն, եւ առնել պտղաբերս առաքինութեամբ, եւ զերծանել ի սրոյ աստուածային բարկութեանն:

Ապա թէ ո՛չ՝ յամէ եւս հաւրցես (ԺԳ. 9):

Կր. Որք ո՛չ արարին պտուղ հաւատոց, ի Տիտոսէ ջնջեցան՝ հատեալք սրով, որպէս անդ հատումն թղենոյն նշանակեաց:

ԻԳ. Իսկ զանպտուղսն յարմատոյ հաւատոյ[ն] եւ ի կենաց աստի կտրէ: Իսկ եթէ զմշակսն չար անուանէ եւ զբարկութիւնն սաստս.

«Ջչարսն չարաւ կորուսցէ» (Մաթթ. ԻԱ. 41): Ջչար հովիւն ի միում հաւտիդ ես խնամարկեցից:

ՄԱՏԹ-ԷՈՍ ՋՈՒՂԱՅԵՑԻ

Թ-գենի մի էր փնկեալ յայգտօջ ուրումն, եւ եկն խնդրել պտուղ լի նմանէ] եւ ոչ [եգիտ] (Ղուկ. հմմտ. ԺԳ. 6):

Ջայսոսիկ խնդրելով՝ զմիտս պարտիմք մաքրել, զի ուղիղ իմաստցուք զառակիս զաւրութիւն: Քանզի «այգի» ասելով զեկեղեցի նշանակեաց, եւ թէ վասն է՞ր «այգի» կոչէ զեկեղեցի, եւ այս վասն բազում պատճառի:

Ա. Նախ՝ զի զայգին նախ փորեն եւ ապա՝ տնկեն. եւ Տէր մեր նախ կակղացոյց քարոզութեամբ Աւետարանին եւ առաքելոցն եւ ապա շինեաց զեկեղեցի:

Բ. Երկրորդ՝ զի զոյգ լինի որթն, որ դնեն յածուսն, մինն՝ յայս կոյս եւ մինն՝ յայն, եւ Բ.(երկ)ոքին ծայրք որթին ի մէջն. այսպէս եւ եկեղեցի տնկեցաւ Հին եւ Նոր կտակարանաւքն, յորոց մինն հայի ի յառաջին արդարսն եւ մինն՝ ի վերջին սուրբսն, եւ երկոքեանն ի մի Քրիստոս նային միաբանութեամբ:

Գ. Երրորդ՝ զի որթն փոքր է քան զամենայն տունկս եւ բարակ, բայց տերեւքն՝ լայն եւ ողկոյզն՝ զանազան. այսպէս եւ եկեղեցի անարգէ ի մէջ ամենայն անհաւատիցն եւ աւր[ը]ստաւրէ նուազի, բայց տերեւ խորհրդոյն լայնատարած եւ պտուղ գործոց առաքինութեանն զանազան ճանապարհաւ տանի ի կեանսն յաւիտենական:

Դ. Չորրորդ՝ զի միայն որթն, ոչ է այգի, վասն զի միայն է եւ ոչ է յարգեալ, զի զպատուականութիւն նորա այլքն ցուցանեն: Վասն որոյ տնկի չըջակայ նորին եւ ի մէջն յայլ պտղոց: Նախ՝ զի աւգնական են մնացականութեան պտղոյ որթոյն, եւ ապա, զի որթն բարձրացեալ անկանի, զնովաւ եւ առաւել զաւրանայ. այսպէս եւ Տէր մեր ոչ զմի ազգս ընտրեաց իւր եկեղեցի, այլ յԲԺ.անից (12) եւ յՀԲ. (72) լեզու, եւ ուղղափառն ի մէջ նոցա սնանի, զի ըստ անուանն, որ Քրիստոսի են, ամենեքեան զմիմեանս պահէն եւ ի միմեանս նախանձելով՝ գործք բարին աճեն: Վասն որոյ Պաւղոս ասէ. «Չորս եղ Աստուած յեկեղեցոջ՝ այս է, նախ զառաքեալս եւ [երկրորդ]

՝ զբազում մարգարէս» (Ա. Կոր. ԺԲ. 28), եւ ապա ասէ. «Նախանձաւոր լերուք շնորհացն» (Ա. Կոր. ԺԴ. 1):

Ե. Հինգերորդ՝ զի մի որթն ոչ այգի է եւ ոչ ի նմանէ հնարի զինի լինել կամ կարաս ընուլ. այսպէս եւ մի ազգ Հայոց, կամ այլոց միայն ոչ է կատարեալ յեկեղեցիսն Աստուծոյ, զի Տէր զսա ժողովեաց ի մի առ ի ընուլ զտեղի անկելոցն, յորոյ մի ազգէ անհնար է ընուլ նա, վասն որոյ եւ յամենայն ազգս շինեաց եկեղեցի եւ ի սոցանէ հազիւ ընուն ի վերինն Երուսաղէմ, զի հակառակն մերձ է:

Զ. Վեցերորդ՝ զի կրկին անուամբ յորջորջի՝ հասարակ եւ յատուկ. հասարակ՝ «այգի» եւ յատուկ՝ «որթ». այսպէս եւ քրիստոնէից աղաւթարանք հասարակ եկեղեցի կոչին, իսկ յատուկ ի նոսա՝ զպտի, հնդի եւ ասորի, հայ եւ հռոմ եւ լատինք եւ այլք:

Է. Եաւթերորդ՝ զի սակաւ խորշակն զայգին անպտուղ գործէ, մանաւանդ մերձ ի հասանելն. այսպէս եւ զհաւատացեալսն, որ յեկեղեցի, եթէ հնար ինչ իցէ եւ զընտրեալսն փոքր ինչ տեսակ մեղացն խանձատէ, եւ առաւել ի ծերութեանն, զի այն է կամք չարին, զի մերձ ի տկարանալ մարդոյն, որ է ծերութիւնն, զիւրաւ սահեցուցանէ, զի տկարացեալ է ամենայն իրաւք, վասն որոյ երանի, որք մանկութեամբ մեռան:

Ը. Ութերորդ՝ զի ի մէջ ամենայն տնկոց այգւոյն առաւել է չարչարանք, զի յաշունն թագուցանեն ընդ հողով ի դաշտավայրն, զի մի չոր ցուրտն ապականէ եւ գարունն յաւտելն եւ կրկին բերել եւ զքոսն քաղել եւ զխոտն, եւ ցանկել յամենայն կողմանց, ուրեմն հազիւ զայ ի կատարումն. այսպէս եւ եկեղեցւոյ Քրիստոսի առաւել է չարչարանք, քան զամենայն ազգաց, զի յաշուն մարդարէիցն թագոյց զհաւատալ նոցա ի բանս նոցա. «Եւ եկեցն արարածիք հովի խաշանց քոց, եւ այլազգիք այգեգործ եւ մաճակալք քո» (Ես. ԿԱ. 5): Իսկ ի գարուն գալուստեան Բանին յայտնի արար. «Գնացէք այստեղեւ, աշակերտեցէք զամենայն հեթանոս, մկրտեցէք զնոսա» (Մաթթ. ԻԸ. 19): Այլեւ եհատ զամենայն յաւելորդս եկեղեցւոյ զկուսապաշտսն եւ զքո՛սն հերձուածողաց քաղեաց եւ ցանկեաց հաւատացեալ թագաւորաւքն, եւ այժմ անաւրէն փշովք պարսպեալ է, զի քրիստանեայք զթութեամբ կակուղ են եւ ոչ վարեն զհակառակսն, զոր անաւրէնն անողորմութեամբ, որպէս փուշս խածանեն զաւտար հակառակսն, եւ ոչ թողուն մերձենալ յեկեղեցին Աստուծոյ:

Թ. Իններորդ՝ զի դառն է եւ թթու պտուղ այգւոյն մինչեւ յաշուն, իսկ աշունն հասանի, վասն որոյ եւ կթի հասարակաբար եւ հնձան արկանի, որ ի մէջ այգւոյն, յորմէ ելանեն նախ՝ քաղցրահամ քաղցու եւ ի լնուլ գկարասն եւ թաղելն յետ ժամանակաց, ապա բանան, եւ է գինի ուրախարար. այսպէս եւ կեանք եկեղեցւոյ եւ հաւատացելոց ի յայս կեանքս դառն է, զի որք կամին աստուածպաշտութեամբ կեալ, ի հալածանս կացցեն, մինչեւ հասանին յաշուն մահուն, որք հատանին յեկեղեցւոյ մահուամբ եւ ժողովին ի գերեզմանս ի դուռն եկեղեցւոյ, յորոց ելանեն կատարեալ զղջումն եւ յոյս առ Աստուած, եւ պատգամ մեռելոց [եւ] աղաւթք, յորմէ լնանի կարաս արքայութեանն ամբարք զղջացելոցն եւ այլ սրբոցն: Եւ յետ այս կենցաղոյս, բանայ Տէրն զկատարելոցն դաս եւ տանի յառազաստ արքայութեանն, մատուցանէ Հաւր զիւրաքանչիւր դասս սրբոց՝ իբր զբաժակ լի անուշահամ գինով, զոր մարդեղութեամբն իւրով վաստակեաց՝ ասելով. «Անասիկ ես եւ մանկուս իմ» (Առ Երր. Բ. 13):

Ժ. Տասներորդ՝ զի այգին քակի նախ ի գազանաց գայլոց եւ աղուեսուց, ըստ Երգոյն (սրն Երգ Բ. 15), եւ ապա ի յոչ լինել այգեգործին եւ դարձեալ ի դառնութենէ ժամանակին, որ ի հեծելոց շարժմանէ, մանավանդ, թէ Տէր այգւոյն մեռեալ լինի կամ գնացեալ: Այսպէս եւ եկեղեցի քակի ի չորից յայսցանէ, նախ՝ ի գազանաց անհաւատից եւ յաղուեսուց հերձուածողաց, եւ առաւելն յոչ լինել ի բարեգործ առաջնորդաց եկեղեցւոյ, որք եմք աստի յայսմ ժամանակիս, վասն որոյ եւ քակեցան եկեղեցիք: Այլեւ ի դառնութենէ հեծելոց, որ իբրեւ «Չծովու խոտութեանց, լելանելոյ ոգոց մարդկան յերկիւղ՝ եւ ի կարծեաց» եկելոց ի վերայ փրեզերաց» (Ղուկ. ԻԱ. 25-26), ասաց Տէրն, մանաւանդ, զի ցամաքեցաւ սէր բազմաց եւ ատելութիւն բազմաց: Եւ ատելութիւն ո՛չ միայն միմեանց, այլեւ աւրինաց ժամատեղաց վանից, բանից եւ առաքինութեանց, զի հաւասար ատեն գամենեսեան, միայն սիրեն զպորտ եւ զորովայն, վասն որոյ եւ քակեցաւ եկեղեցի: Իսկ տէր այգւոյս ոչ թէ մեռեալ է, այլ գնացեալ ի տար աշխարհ, մանաւանդ, զի բարձիթողի արար գմեզ, զի գնացաք ըստ կամս անձաց, վասն որոյ յիմարութիւն է ի մէջ այս ամենայն պակասութեանցս, թէ նստի ոք՝ առնել ինչ:

Իսկ յեկեղեցւոջն տնկեալ զմեզ. եւ զի՞ ծառոյ նմանեցուցանէ զհաւատացեալսն: Եւ այս վասն բազում պատճառի.

Ա. Նախ՝ զի ծառն ի մէջ այգւոյն տնկի եւ ոչ արտաքոյ. այսպէս եւ հաւատացեալք ի յեկեղեցի ի ծոց աւազանին ծնանին՝ ըստ այնմ. «Տնկեալք եղիցին ի փան Տեառն» (Սաղմ. ՂԱ. 14):

Բ. Երկրորդ՝ զի մատղաշ լինի տունկն, յորժամ տնկեն. այսպէս եւ հաւատացեալք, երախայանան, ապա մկրտին, մանաւանդ թէ յերախայութեանն աւրինադրեցաւ մկրտել՝ ըստ այնմ. «Իբրեւ զարդի ծնեալ մանկունս [խաւսուն եւ անխարդախ կաթինն փափաքիցք]» (Ա. Պետ. Բ. 2):

Գ. Երրորդ՝ զի ծառ ջրով աճէ. այսպէս եւ հաւատացեալք՝ բանիւ գետոց աստուածային, որ բղխէ յեկեղեցւոջ՝ ըստ այնմ. «Գետք յորովայնէ ևորա բղխեսցեն ջորք կենաց» (հմմտ. Յովն. Է. 38), եւ թէ՛ «Աղբիւր ի փանէ Տեառն ելցէ եւ արբուցէ [զձորն վիճակաց]» (Յովն Գ. 19):

Դ. Չորրորդ՝ զի ի մի ժամանակա ոչ բերեն ամենեքեան պտուղ. այսպէս եւ հաւատացեալք. ոմանք ի ծերութեանն արդարանան, եւ այլք՝ ի մանկութենէ սուրբք: Եւ դաճեալ՝ յիւրաքանչիւր ժամանակա եղեն առաքինիք եւ արդարք յառաջն եւ յետո:

Ե. Հինգերորդ՝ զի իւրաքանչիւր ծառ իւր պտղովն զարդարի, զոր յինքենէ հանէ. այսպէս եւ ամենայն ոք իւր գործովն պայծառանայ՝ ըստ այնմ. «Յայնժամ ծագեսցին արդարքն յարքայութեան իբրեւ զարեգակ» (հմմտ. Մատթ. ԺԳ. 43):

Զ. Վեցերորդ. զի եւ ոչ մի համ լինի ամենեցունց. այսպէս եւ ոչ ամենայն հաւատացեալք առաքինանան միապէս, զի. «Այլ փառք արեգական եւ [այլ փառք] լուսնի եւ [այլ փառք] աստեղաց» (Ա. Կոր. ԺԵ. 41):

Է. Եաւթներորդ. զի ծաղկին եւ ապա պտուղն երեւի. այսպէս եւ հաւատացեալք նախ ծաղկին սրբութեամբ եւ պտուղ՝ զարքայութիւնն ժառանգեն՝ ըստ այնմ. «Ի գաւիթս Աստուծոյ մերոյ ծաղկեսցին» (հմմտ. Սաղմ. ՂԱ. 14) եւ ես բազումք եղիցին» (Սաղմ. ՂԱ. 15):

Ը. Ութերորդ. զի է ի ծառոցն, որ պտուղ բերեն, եզր՝ քաղցր եւ մէջն՝ դառն, եւ են, որ եզր՝ դառն եւ մէջն՝ քաղցր. այսպէս եւ եկեղեցի. ոմանք կեղծաւորին արտաքուստ ի ցոյցս մարդկան՝ երեւիլ առաքինի, վասն որոյ ասէ. «Նման էք գերեզմանացն բոնոց» (հմմտ. Մատթ. ԻԳ. 27): Իսկ ոմանք խոշոր զգեստիւ պահաւք զառաքինութիւն ի հոգին գործեն՝ ըստ այնմ. «Շրջեցան լեշլ մաշկաք, կարապետաք, նեղեալք» (Երր. ԺԱ. 37), յաղագս որոյ ասէ. «Ճ.(100)պպպպիկ առցեն» (հմմտ. Մատթ. ԺԹ. 29):

Թ. Իններորդ. զի այգեգործն հանապազ խնամէ զծառն եւ խնդրէ պտուղ. այսպէս եւ Տէր մեր, միշտ խնամէ զմեզ եւ պահանջէ պտուղ

առաքինութեան՝ ըստ այնմ. «Ես եմ որք եւ դուք՝ ուս» (Յովհ. ԺԵ. 5): «Եթէ ոչ բերէ պտուղ, [կտրէ գնա]» (Յովհ. ԺԵ. 2): Եւ թէ՛ «Հայր իմ մշակ է» (Յովհ. ԺԵ. 1) եւ այլն:

Ժ. Տասներորդ. զի թէ ոչ բերէ պտուղ, հատանէ զնա տէր այգւոյն, այսպէս եւ թէ ոք ոչ առնէ առաքինութիւն յեկեղեցւոջ, հատանէ Աստուած զնա ի կենաց՝ ըստ այնմ. «Բաղկեցից զգանկ նորա եւ երէ վայրի արածեացի ի նմա» (հմմտ. Մաղմ. ՆԹ. 13-14), եւ թէ՛ «Որ ոչ անէ [զ] պտուղ [բարի], հապանի եւ ի հուր արկանի» (հմմտ. Մաթթ. Գ. 10):

Իսկ զի՞ թղենույ նմանեցոյց եւ ոչ այլ ինչ ծառոց: Եւ այս վասն բազում պատճառի:

[Ա.] Նախ՝ զի յաշխարհն պաղեստին է, եւ ոչ են առաւել ծառք, բայց թղենիք յոլովք զամենեսեան, վասն որոյ եւ զնա եզ աւրինակ, բայց եւ ոչ այս առանց խորհրդոյ:

Բ. Երկրորդ՝ զի թղենին ոչ ունի ծաղիկ, այլ ի բնէ պտուղ: Զնոյնս ինդրէ Տէրն, ոչ սուտ հեթեթանք առաքինութեան, այլ կատարեալ սրբութիւն. «Երանի՛ որ[ք] սուրբք են սրբիք, զի նոքա [զԱստուած փեսցեն]» (հմմտ. Մաթթ. Ե. 8):

Գ. Երրորդ՝ զի կարճ է հասակաւ եւ ոչ կարէ բարձրանալ, որպէս զընկոյզն, եւ թէ բարձրանայ, չորանայ յարմատոցն. այսպէս ուսոյց խոնարհ լինել, զի զնա սիրէ Աստուած՝ ըստ այնմ. «Ես յո՛ հանգեայց, եթէ ոչ ի հեզս եւ ի խոնարհս» (Ես. ԿԶ. 2): Իսկ թէ հպարտանայ, անկանի ի խոնարհ. «Որ բարձրացուցանէ զանձն, խոնարհեացի» (հմմտ. Մաթթ. ԻԳ. 12):

Դ. Չորրորդ՝ զի ի սկիզբն փոթոթէ պտուղ թղենույն եւ յետոյ քաղցրանայ. այսպէս եւ զնեղ եւ զանճուկն այսմ աշխարհիս սիրէ Տէրն, որով կարեմք վերին քաղցրութեանն հասանել, եւ յայտ է, զի տեսանելով զկեանս մեր՝ անաւրէնք թքանեն ի մեզ, վասն որոյ զրէ Պաւղոս. «Բազում նեղութեամբ պարտ է մտանել այն [յարբայութիւն Աստուծոյ]» (Գործք ԺԴ. 21):

Ե. Հինգերորդ՝ զի թէ ոք բազում ուտէ, վնաս առնէ մարմնոյն. այսպէս՝ թէ բազում է առաքինութիւն, վնաս բերէ մարմնոյն, վասն որոյ պիտոյ է ընդ մէջն զնալ ճանապարհ՝ ոչ զհոգին վնասել եւ ոչ՝ մարմինն:

Զ. Վեցերորդ՝ զի ոչ պատուաստի ընդ այլ ծառոյ. այսպէս ուսոյց, թէ առաքինութիւն ոչ միաբանի ընդ աշխարհական պատ-

րանա՝ ըստ այնմ. «Ոչ [որ ծառայ] կարէք երկուց փերանց ծառայել» (Ղուկ. ԺԶ. 13):

Է. Եաւթներորդ. զի են ի թղենեաց, որ ամենեւին դառն բերեն պտուղք, վասն որոյ «ժանդք» կոչին. այսպէս եւ որք ոչ ունին պտուղ արժանի սրբութեան, որզիք «ժանդք» կոչին, որպէս որզիքն Հեղեայ (տե՛ս Ա. Թագ. Դ.):

Ը. Ութերորդ. զի ի մի յարմատոց բազում ճուղք արտաքս գան, նմանապէս, յորժամ ոք զառաքինութիւնն կամի, ինքնին աճեն զայլ ամենայն, քանզի շարեալ են ընդ միմեանս իբրեւ զշղթայսն:

Թ. Իններորդ՝ զի ի մէջ պտղոյն բազում հատիկ լինին եւ սերմ. նմանապէս եւ զայն առաքինութիւնն սիրէ Տէրն, որ բազում աշխատանաւք լինի, եւ ոչ որ դիւրութեամբ՝ ըստ այնմ. «Որ կամիցի գալ զկնի իմ, ուրացի զանձն եւ առցէ զխաչ [իւր] եւ եկեացէ [զհետ իմ]» (Մաթթ. ԺԶ. 24, հմմտ. Մարկ. Ը. 34):

Ժ. Տասներորդ. զի երիս անգամ պտուղ բերէ թղենին, եւ առաջինն ոչ հասանի, եւ վերջինն՝ թերակատար մնայ, իսկ միջինն՝ կատարեալ լինի: Որով եցոյց զերից ժամանակաց ապաշխարութիւն եւ զսրբութիւն, այսինքն՝ [զ]տղայութեանն, զերիտասարդութեանն եւ զձերութեանն: Զի տղայութեանն ապաշխարութիւնն ոչ հասանէ ի կատարումն, զի ոչ ունի անդորր միտք մանուկն, մանաւանդ բարութեամբ ոք երիտասարդականն առաջի կայ: Եւ ձերութեանն թերակատար է, զի ոչ զաւրէ մարմին աղաւթել եւ պահել: Իսկ միջինն հասակին, որ է երիտասարդութիւնն, կարէ ուղղապէս ապաշխարել, զի բաւականանայ աղաւթել եւ պահել, եւ արտասուել եւ հաստատեալ է միտքն յընդունել զապաշխարութիւնն, վասն որոյ Աղամ երեսնամեայ ստեղծաւ, զի այն է ժամանակ զղջմանն եւ սրբութեան: Եւ դարձեալ յերիս ժամանակս ինդրէ պտուղ Տէրն եւ յամենայն ժամու: Եւ թէ ի տղայութեանն ոչ տայ, չկտրէ, զի ի միջին ժամանակն տացէ: Եւ թէ յայն եւս գտանի անպտուղ, խնայէ, թէ ի ձերութեանն զղջացի՛ ըստ այնմ, թէ՛ «Ոչ կամիմ գմահ մեղուցելոց՝ [ասէ Աղովնայի Տէր], այլ զի դարձցի [ի ճանապարհաց իւրոց չարեաց, եւ կեցուցէ զանձն իւր]» (Երեմ. ԺԸ. 32): Իսկ թէ ի ձերութեանն եւս ոչ տացէ, յայնժամ ասէ.

«Այս Գ. ամբ են, յորում ոչ ետ պտուղ, կտրեա՛ զդա, ընդէ՛ր եւ զերկիրդ խափանէ» (հմմտ. ԺԳ. 7):

Եւ զայս է՞ր վասն արար. զի ներեաց մինչեւ ի ծերութիւնն, զի առանց պատասխանոյ արդարացի դատել: Արդ, տես զամենախնամ գութն, զի գործէ Աստուծոյ ի բարկութեանն զողորմութիւնն յիշել, ըստ Ամբակումայ. «Ի ժամանակի բարկութեան գողորմութիւն յիշեսցես» (հմմտ. Ամբակ. Գ. 2): Զոր եւ աստ եցոյց զողորմութիւնն իւր, զի թէ կամք էին նորա կտրելն, զի՞նչ պէտք էր զայգեգործն առ այս գործակից ունել, այլ հատանել առանց հարցանելոյ այգեգործին: Վասն որոյ ուսանիմք աստի, թէ աւրէն եղ առաջնորդացն բարեխաւս լինել աղաւթիւք ի վերայ մեղաւորաց եւ հաշտեցուցանել զայն, որ ոչ երբէք բարկանայ, սակայն ձեւանայ բարկանալ, զի զարհուրեցուցէ զմեզ եւ ուսուցէ զառաջնորդան, զարժանն ի ներքս բերել զխնամակալութիւն: Զոր աւրինակ Մովսիսի ասէր. «Թող հարից եւ սարակեցից գղոսա» (հմմտ. Ելք ԼԳ. 5): Եւ արդ, եթէ կամէր սատակել զնոսա, զի՞նչ պէտք էր ասել. «Թոյլ փութ», այսինքն՝ ի բաց կաց, եւ ո՞վ ոք էր Մովսէս, որ ընդդէմ կայր այն, որ բազում մաղթանաւք ընդ Յորդանանն ոչ անց: Այլ վասն այսորիկ ուսոյց, զի ընդդէմ կացցէ ասել, թէ՛ «թողուս դոցա՝ թող»: Ապա թէ ոչ՝ եւ զիս ջնջեա՛ ի դպրութենէս, յորս գրեցեր: Այսպէս եւ աստ ասէ. «Կարեա՛», եւ ապա, զոր պարտն էր առնել մշակին, ինքն առաջի դնէ: Ասէ.

Թոյլ փութ, զի բրեցից եւ արկից աղբ (հմմտ. ԺԲ. 8):

Արդ, այսոցիկ երկոցունց պարտապան են վերակացուք:

Ա. Նախ՝ տքնել եւ ապա՝ աղաւթիւք առ Աստուած պաղատել, որպէս ասէ Պաւղոս. «Նոքա փրկին վասն ոգոց ձերոց, զի համարս փալոց են ընդ ձեր» (հմմտ. Եբր. ԺԳ. 17):

Բ. Երկրորդ՝ առ մարդիկ զգործս առաքինի մշակացն ցուցանել՝ ըստ այնմ, զոր Պաւղոս Տիմոթէոսի գրեաց. «Յանդիմանեա՛, սաստեա՛ ամենայն երկայնմութեամբ եւ վարդապետութեամբ» (հմմտ. Բ. Տիմ. Դ. 2), եւ որպէս ինքն իսկ Պաւղոս ընդ հիւանդացեալսն հիւանդանայր եւ ընդ գայթակղեալսն տապանայր (փեն Բ. Կոր. ԺԱ. 29): Վասն որոյ Աստուած առ Եզեկիէլիւ ասաց. «Դէր կացուցի զքեզ, փեսանիցես գտուն [նկնալ], զգուշացո մեղաորին, ապա թէ ոչ՝ զարին [նորա] ի ձեռաց [քոց խնդրեցից]» (հմմտ. Եզեկ. ԼԳ. 6-8): Որպէս եւ Դաւիթ ասէր զայս գործ առաքինութեան, առ Աստուած ասէր. «Ես հովիս մեղայ, խաշինքդ զի՞նչ գործե-

ցին, տղիցի սուր քո յիս» (հմմտ. Բ. Թագ. ԻԴ. 17): Իսկ առ ժողովուրդն ասէր. «Ազգ չար եւ դառնացող» (Մաղմ. ՆԷ. 8):

Արդ, բազմապատիկ է այսպիսի բանք ի զիրս աստուածային, թէ զի՞նչ պարտ է առ Աստուած խաւսել եւ որպէս զժողովուրդն խրատել:

Իսկ թէ զի՞նչ իցէ «բրելն եւ արկանել աղբ». սոքա արուեստք են երկրագործաց, որով զանբան երկիրն ածեն ի պտղաբերութիւն: Եւ զիւրին է զայս իմանալ, այսինքն՝ զի բրելն զխրատ վերակացուացն նշանակէ, եւ այս ըստ բազում յեղանակի:

Ա. Նախ՝ զի կոշտ է երկիրն, վասն որոյ բրեն. այսպէս եւ սիրտ մեղաւորին քարացեալ կայ ի մեղքն՝ ըստ այն[մ]. «Նանից զսիրտ[ն] բարեղէն ի մարմնոց ձերոց» (Եզեկ. ԼԳ. 26):

Բ. Երկրորդ՝ զի սակաւ սակաւ բրեն զերկիրն. այսպէս եւ առաջնորդք պարտին սակաւ սակաւ խրատիւ կակղացուցանել զսիրտ մեղաւորին:

Գ. Երրորդ՝ կրկին բրեն, որ ամենայն տեղ հաւասար բրեալ լինի. այսպէս եւ զխրատն պարտ է կրկնել եւ Գ. (3) կրկնել՝ ըստ Տեառն, եթէ. «Ասա յորժամ դու եւ նա միայն իցէք» եւ այլն (Մաթթ. ԺԸ. 15):

Դ. Զորրորդ՝ զի զսէզն եւ զաւելորդն հանեն. այսպէս եւ վերակացուին պարտ է նախ զմեզս ապաշխարութեամբ մաքրել տալ եւ ապա՝ զուղիղ կարգն յաւրինել:

Ե. Հինգերորդ՝ զի յորդոր ջրով զովացուցանէ զբրեալն. այսպէս եւ քահանային պարտ է յորդառատ իմաստիւք զովացուցանել զպասքեալ ոգին՝ ըստ այնմ. «Շրթունք քահանային զգուշացին գիտութեան, եւ արեւք խնդրեցեն [ի բերանոյ նորա]» (Մաղաք. Բ. 7):

Զ. Վեցերորդ՝ զի բրիչն սուր պարտի լինել, որով փորեն. այսպէս եւ բանք քահանային, յաստուածային գրոց պարտի լինել, որ սուր է, քան զամենայն երկսայրի եւ հատանէ մինչեւ ցորոշումն շնչոյ:

Է. Եաւթներորդ՝ զի բռամբ փորեն եւ ոչ ըստ հողին կամաց. այսպէս եւ քահանային պարտ է ջանիւ խրատել, զի մեղաւորն ոչ կամի զխրատելն, վասն զի դժուար թուի նմա, որպէս ասէ. «Փութամ ճեպիմ միշտ զմեզ յորդորն» (Բ. Պետ. Ա. 15):

Ը. Ութերորդ՝ զի աղբ ածեն շուրջ զժառովն, զի ջերմ պահեսցեն զարմատն. այսպէս եւ առաջնորդն պարտի զարթուցանել զջերմ սէրն Աստուծոյ ի սիրտս մեղաւորին, այսինքն՝ յոյս դնել անկեալ եւ բեկեալ սրտին: Այլեւ ինձ թուի «աղբ» աստ զմարմնաւոր ինչսն

ասէ, զոր պարտ է տալ առաջնորդին անզեղ ձեռաւորին, զի գոնեա ի սիրոյ մարմնաւոր տրոցն դարձցի ի մեղաց. զայս կեանքն յայտնի անուն ասեն մարմնաւոր ընչիցն:

Թ. Իններորդ՝ զի աղբն զպտուղն բերէ. այսպէս եւ յոյսն զառաքինութիւնն աճեցուցանէ, որով լինի զերծանել ի հատմանէ կենացն եւ մնալ յարժամ ի տանն Աստուծոյ տնկեալք:

Ժ. Տասներորդ՝ զի զայս ամենայն յամենայն ամի առնեն այգեգործքն: Իսկ թէ ոչ առնեն, ոչ բերէ պտուղ. այսպէս՝ քահանայքն պարտին յամենայն տարի եւ յամենայն ամիս, նա թէ եւ յամենայն աւր խնդիր առնել՝ զբեկեալսն կապել, զխոցելոցն դեղ դնել, զի թէ ոչ դնեն, ոչ կարեն արդարանալ ժողովուրդքն: Իսկ եթէ զայս ամենայն առնեն եւ դարձեալ ի նոյն անպտղութեանն մնան, յիրաւի կտրի ծառն, որպէս ասացաւ: Այսպէս եւ մեղաւորն յետ այսչափ ուսուցանելոյ յամէ ի մեղս եւ ոչ դառնայ իրաւամբք յարմատոյ հաւատոյն, եւ ի կենաց աստի հատանէ զնա Տէրն: Լուարո՛ւք ծէրք, որք զժամանակս ձեր ի մէջ մեղաց էք դեզերեալ, այժմ ահա ժամ է, մի՛ յապաղէք, զի ահա ժամանակ ընդունելի, ահա աւր փրկութեան, մի՛ դնէք պատճառ, զի այլ տղայանալ ոչ կարէք, այլ պատրաստեցէք զձեզ մահու, զի կէս մարմնոյ ձեր ի գերեզմանի կախեալ կայ, զի մի՛ զվերջին հատումն ընդունիցիք, քանզի ասէ. «Ջշարսն չարեաւ կորուսցէ» (Մարթ. ԻԱ. 41): Իմացարուք եւ զայս, քահանայք, որք էք այգեգործ եկեղեցւոյ. մի՛ ծուլացուք եւ մի՛ հեղգացուք ի բժշկելոյ զմեզ եւ զժողովուրդն Աստուծոյ մերոյ: Զի թէ ոչ զգաստանամք՝ ասէ. «Ջշար հովիսն չարաչար կորուսից» (հմմտ. Մարթ. ԻԱ. 41) եւ՝ «Իմում հիւանդին եւ խնամալիկեցից»: Մանաւանդ, թէ կրկին պատժոց դիպիմք, մին՝ վասն մեր մեղացն, եւ մին՝ վասն ժողովրդեանն: Եւ արդ, բաւական է մերն կորուսանել զմեզ, ժրասցո՛ւք, զի մի՛ զնոցա բեռն ի վերայ մեզ դիցի, այլ պատրաստ լինել ընդ շահաւէտ ծառայիցն արժանի լինել՝ այնմ, որ ասէ. «Ծառայ բարի եւ հաւաքարիմ, որովհետեւ ի սակաւոյ [հաւաքարիմ եւ, ի վերայ բազմաց կացուցի գրեզ], մուր յորախորթեան Տեառն» (Մարթ. ԻԵ. 21, հմմտ. Ղուկ. ԺԹ. 17) ի Քրիստոս Յիսուս Տէր մեր, որով եւ ընդ որում Հաւր մի եւ Հոգւոյն Սրբոյ վայել (այսպես). փառք:

ՅԱՂԱԳՍ ԿՈՐՈՒՍԵԱԼ ՈՉԽԱՐԻՆ

Ղուկ. ԺԵ. 3-7

ՍՏԵՓԱՆՈՍ ՍԻՒՆԵՑԻ

Այր ոմն ի ձեռք, որ ունէր ճ. ոչխար եւ կորուսեալ¹ զմինն ի նոցանէն, ո՞չ թողուցու զիննսուն եւ զինն յանապարի եւ երթայ առ կորուսեալն (հմմտ. Ղուկ. ԺԵ. 3):

«Նարիւր»դ է թիւ կատարեալ, հոգւոյ մարդկան նշանակ, իսկ «կորուսեալ ոչխար»ն, որ մեղաւք եւ անաւրէնութեամբ է կորուսեալ, զոր եկն Որդին մարդոյ խնդրել եւ կեցուցանել, եւ «բարձեալ ի վերայ ուսոց իրոց» (տե՛ս ԺԵ. 5), զի անաւրէնութիւնս մեր երարձ եւ զմեզս մարմնով՝ ուսովք իւրաւք յորս զխաչն բարձեալ եւ երթայր ի չարչարանս:

ԻԳՆԱՏԻՈՍ

Մաքսաւորք եւ մեղաւորք, կացեալ առ նմա, վայելեցին յառատ պարգեւս նորա, իսկ դպիրք եւ փարիսեցիք, հեղձեալք նախանձու՝ բանբասէին զբժշկին խոնարհելն առ ախտացեալս եւ զհովուին գնալն զհետ կորուսելոյ ոչխարին (տե՛ս Ղուկ. ԺԵ. 1-7): Այն, որ բազմապատիկ եցոյց զխնամս մարդասիրութեան, մինչեւ ի վերայ ուսոց բառնալ եւ յառաջինն տանել պատիւ եւ ուրախութեամբ հաղորդս առնել զհրեշտակս՝ մերումս երկութեան: Դարձեալ, կրկին առակաւն այլովք զնոյն ցուցանէ, զի «հովիս» զինքն անուանէ, փոխանակ զի պարտ էր նմա չարչարիլ եւ գտանել զկորուսեալ ոչխարս՝ զմեզ, դարձեալ եւ ինքն «ոչխար», զի պատարագեսցի փոխանակ աշխարհի: Եւ աստ՝ տէր դրամին եւ ոչ գարշի յայսպիսեաց անուանց:

ՍԱՐԳԻՍ ԿՈՒՆԴ

Եւ էին մերձ առ նա ամենայն մաքսաւորք եւ մեղաւորք՝ լսել ի նմանէ (Ղուկ. ԺԵ. 1):

¹ ՍՏ կորուսեալ

ԵՓ Ընտրեաց զՅակոբոս մաքսաւոր, զի քաջալերեսցեն ընկերք նորա երթալ ընդ նմա: Բազմեցոյց զնոսա առ ինքն: Այս է տեսիլ սքանչելի, հրեշտակք դողան եւ մերձ են մեղաւորք եւ ուրախ լինին: Զուարթունք զահի հարեալ են ի մեծութենէ նորա, եւ մաքսաւորք ուտեն եւ ըմպեն ընդ նմա: Տեսին վերինք՝ զարմացան, եւ ներքինք յիմարեցան: Սատանայ ապշեցաւ, մահ վա[տ]թարացաւ, ուրախութիւն յերկինս եւ ցնծութիւն հրեշտակաց, զի հնազանդեցան ապստամբք եւ զգաստացան մաքսաւորք եւ արդարացան մեղաւորք:

Տրսնջէին փարիսացիքն եւ դպիրքն. Ընդէ՞ր զմաքսաւորս ընդունի եւ ուրէ ընդ նոսա (ԺԵ. 2):

ԵՓ Փարիսեցիք խռովեցան եւ դպիրք բորբոքեցան հերձեալք ի նախանձուէ, եւ մաքսաւորք եւ մեղաւորք ցնծան ուրախութեամբ:

ԻՊ Բամբասէին զբժիշկն՝ խոնարհեալ առ ախտացեալս, եւ զհոփիւն՝ գնացեալ զհետ կորուսեալ ոչխարին:

Այր ոմն ունէր հարիւր ոչխար, եւ կորուսեալ զմի ի նոցանէ (ԺԵ. 4):

Զի որպէս մարդ զհոգոյն զհրեշտակաց ունի զբնութիւն, այսպէս եւ առ հրեշտակս առակեաց զմարդկային բնութիւնս: Այսպէս եւ իննսուն եւ ինն ոչխար, որ չիցեն մոլորեալ, զհրեշտակաց, բազմութիւն նշանակէ, եւ որպէս ոչխարն ի գաւթէն հեռանալով զմոլորեալ իմանին, այսպէս եւ Ադամ ի դրախտէն:

ՍՏ Հարիւր թիւտ կատարեալ զհոգիս մարդկան նշանակեաց, կորուսեալ ոչխարն՝ որ մեղաւք եւ անաւրէնութեամբ կորեալ:

Եկն ի խնդրել՝ զկորուսեալ ոչխարն բարձեալ ի վերայ ուսոյ իւրոյ (ԺԵ. 5):

Զի զանաւրէնութիւնս մեր երարձ մարմնով ուսով իւրովք, յորոյ զխաչն բարձեալ՝ երթայր ի չարչարանս «Հովիւն քաջ» (Յովհ. Ժ. 11, 14), որ ել զհետ առիւծուն եւ թափեաց աքացս երկուս, այսինքն՝ երկու[ս] ոտս եւ ունկն դրոշմաւոր, լսելիք մարդկան, որ առակի ի մեր բնութիւնս:

ԻՊ Արդ՝ այն, որ բազմապատիկ եցոյց զխնամս մարդասիրութեանն մինչեւ ի վերայ ուսոց բառնալ եւ տանել յառաջին պատիւն, եւ ինքն ոչխար փոխանակ աշխարհի:

ՄԱՏԹԷՈՍ ԶՈՒՂԱՅԵՅԻ

Ո՞վ որ իցէ ի ձեւջ մարդ, որ ունիցի ճ. (100) ոչխար, եւ կորուսանիցէ [զ]մի ի նոցանէ. [ո՞չ] թողուցու զ[ի]ննսունն եւ զինն յանապափի] (հմմտ. Ղուկ. ԺԵ. 4):

Բազմադիմի առակաւք զամենախնամ տեսութիւն աստուածային սիրոյն, զոր ունի առ արարածս, յայտ առնէ: Զի սովորութիւն է բժշկացն առ հիւանդն գնալ. է երբեմն, զի դեղ առնէ վիրացն եւ ցաւոցն, եւ է, զի բանս մխիթարականս խաւսի, եւ է ինչ, զի յոյս դնէ, զայլք աւրինակ տալով, զոր առողջացուցեալ է: Այսպէս եւ Տէր մեր, եկեալ առ հիւանդացեալ բնութիւնս, երբեմն խրատեաց զմեզ վարդապետութեամբ, երբեմն բժշկեաց զախտաժետս մեր, երբեմն յոյս դնէ հոգւոցն, որ ի դժոխս, իրր թէ վասն նոցա է մարմնացեալ, եւ երբեմն՝ մեզ, յետոյ եկեալ, այլ խրատ տայ՝ զործեցեալ զաւրութեամբն, որ ի ձեռն իւր չարչարանացն գտաւ զմարդկային բնութիւնս, վասն որոյ առակաւոր բանիւք ասէ.

Ով որ իցէ ի ձեւջ (ԺԵ. 4):

Աստ տեսանելի է, զի կրկին առակ համանգամայն ասաց աստ վասն մի խորհրդոյ, այսինքն՝ մարդկային բնութեանս, յառաջին՝ զճ. (100) ոչխարն (Ղուկ. ԺԵ. 3-7) եւ զկորուսեալ զրամն (Ղուկ. ԺԵ. 8-10):

Բայց նախ տեսցուք վասն ոչխարացն, եւ զի՞ զհրեշտակաց բնութիւնն եւ զմարդկան ոչխարաց նմանեցուցանէ: Եւ այս վասն բազում պատճառի:

Ա. Նախ՝ զի սուրբ կենդանի է ոչխարն. այսպէս եւ սուրբք էին մարդկային բնութիւնս յառաջին յանմեղութեանն ընդ հրեշտակաց, որպէս եւ հրեշտակք, վասն որոյ ասէ մարգարէն. «Փոքր ինչ խոնարհ [արարեր գնա] քան զհրեշտակս քո, փառաք եւ պարտով [պսակեցեր գնա]» (Սաղմ. Ը. 6):

Բ. Երկրորդ՝ զի ոչխարն ասր սուրբ ունի հանդերձ իւր. այսպէս եւ լուսով պարածածկ էր մարդն, որպէս եւ հրեշտակք, զոր եւ յետ

մեղանչելոյն ասէ. «Ծանեան, զի մերկացեալ[ք] էին ի լուսոյն» (հմմտ. Ծննդ. Գ. 7):

Գ. Երրորդ՝ զի անսխալ ճանաչէ ոչխարն զտէրն իւր. այսպէս եւ յայնժամ զէմ յանդիման տեսանէր մարդն զԱստուած, որպէս Հրեշտակք, զոր պատմէ Մովսէս ի գիրս իւր:

Դ. Չորրորդ՝ զի աւճահալած բնութիւն է ոչխարացն. այսպէս եւ ամենայն ախտք, որ իբրեւ զաւճ խածանեն զմեզ, հալածական լինէր ի մարդոյն, որպէս եւ ի Հրեշտակաց:

Ե. Հինգերորդ՝ զի յոյժ փափագէ ոչխարն աղի եւ փութայ առ նա. այսպէս եւ մարդն Բանին կենաց եւ լուսափայլութեանն միշտ փափագէր ընդ Հրեշտակաց, վասն որոյ ընդ մեղանչելն ասէր. «Մի՛ մնասցէ հոգի իմ ի դոսա, վասն լինելոյ [դոցա] մարմին» (հմմտ. Ծննդ. Զ. 3):

Զ. Վեցերորդ՝ զի ոչխարք ի մէջ գաւթին անմոլարք են. այսպէս եւ յանմահական վայրքն անմոլարք էին մարդիկք ընդ Հրեշտակս:

Է. Եաւթներորդ՝ զի յանկարծակի փողատէ գայլն զոչխարսն, մինչ զի ոչ իմանայ. այսպէս եւ սատանայ խարեաց զմարդն, մինչ ոչ գիտաց նա զխարէութիւն նորա, վասն որոյ ասէ. «Նախանձո՞ւ բանսարկոյն եմուք մահ յաշխարհ» (Իմաստ. Բ. 24):

Ը. Ութերորդ՝ զի այն ոչխարացն, որք են ի գաւթին, ոչ ինչ հոգայ տէրն, այլ վասն կորուսելոցն. այսպէս եւ Աստուած ոչ ինչ հոգայ վասն Հրեշտակացն, զի անմոլարք են, այլ վասն մարդկային հոգւոց, զի հեռացեալ էր ի նմանէ:

Թ. Իններորդ՝ զի տեսարք ոչխարացն խնդիր ելանեն եւ ոչ ծառայքն, զի չէ փոյթ ծառային վասն կորստեան ոչխարին. այսպէս եւ Հրեշտակաց ոչ փոյթ է վասն կորստեան մարդկան: Եւ յայտ է ի զենուժն պարարակին, զի չաղ էին, թէ զմա արարեր եւ մեզ՝ ոչ:

Ճ. Տասներորդ՝ զի քան զամենայն կենդանի սիրեցեալ լինի յաչս տեառն իւրոյ. այսպէս եւ յամենայն կենդանիս, զոր ստեղծ Աստուած, միայն զմարդն սիրեաց, վասն որոյ «մարդասէր» կոչի եւ ոչ Հրեշտակասէր կամ անասնասէր, յաղագս որոյ առակէ Տէրն ի յոչխար զմարդկային բնութիւնն: Իսկ զի՞ ձ. (100) թիւ. այս զկատարեալն ցուցանէ, զի ձ. (100) թիւն կատարեալ է, զի զՃ. (10) Ճ. (10) անգամ պատկեալ լինի, որ է կրկնապատիկ կատարեալ, այսպէս՝ կրկին ստեղծուածոցս կատարելութիւն մարդն է՝ հրեղինաց եւ հողեղինացս: Իսկ զի՞ ձ. (100) թուովն զմինն կորուսեալ եցոյց, զի

մարդովն Ճ. (10) էին՝ ինն դաս հրեշտակ եւ մին՝ մարդ, որ լինի Ճ. (10), վասն որոյ ի կորուսել միոյն, ել ի խնդիր կորուսելոյն:

Եւ զի՞ «անապար» կոչէ զերկինս: Եւ այս վասն բազում պատճառի:

Ա. Նախ՝ զի յանապատին ոչ է գործ մարդոյ, այսինքն՝ վարել եւ ցանել եւ այլն. այսպէս եւ յերկինս ոչ գոյր աշխատանք մարմնականք:

Բ. Երկրորդ՝ զի կենդանիք, որ յանապատի են, առանց վաստակոց ապրին. այսպէս եւ ի դրախտին առանց քրտանց եւ ճգանց ի հանգստեան էր մարդն, զի յորժամ անէժ՝ ասէ. «Քրպամբք երեսաց քոց կերիցես զհաց [քո]» (Ծննդ. Գ. 19):

Գ. Երրորդ՝ զի յանապատի ոչ գործի մեղք. այսպէս եւ երկնայինքն անապատ են ի մեղաց, զի ոչ գոյր անդ ախտակցութիւն ինչ:

Դ. Չորրորդ՝ զի անապատն զհեռաւորութիւնն նշանակէ. այսպէս եւ երկինքն իմանալի հեռի է ի սգայական աշխարհէս՝ ըստ այնմ. «Գևաց յաշխարհի հեռի՛ առնու իւր թագաւորութիւնն» (Ղուկ. ԺԹ. 12):

Ե. Հինգերորդ՝ զի որ յաշխարհի կենան ի մէջ շինութեան, ոչ կարեն բնակել յանապատի վասն անսովոր տեղեացն. այսպէս եւ որք այժմ ոչ սովորին մտաւք յերկինս լինել միշտ, ոչ կարեն բնակել անդ, զի չունին ծանաւթութիւն ի նմա, վասն որոյ եւ Պաւղոս ասէ. «Զվերինն խորհեցարուք, ուր Քրիստոս նսրի ընդ աջմէ Ապուժոյ» (հմմտ. Կորնու. Գ. 1-2):

Զ. Վեցերորդ՝ զի որք կամին, դիւրաւ հասանին յանապատ. այսպէս եւ որք ցանկան ելանել յերկինս, դիւրին է, զի Տէրն ասէ. «Լուծ իմ քաղցր է, եւ բնոն իմ՝ թեթն» (հմմտ. Մատթ. ԺԱ 30), որով գրջիք,- ասէ,- «հանգիստն անձանց ձերոց» (հմմտ. Մատթ. ԺԱ 29):

Է. Եաւթներորդ՝ զի յանապատի սակաւ կենդանիք բնակին. այսպէս եւ յիմանալի խորանսն սակաւք վայելեն՝ ըստ այնմ. «Սակաւք են, որ մտանեն ընդ նա» (հմմտ. Մատթ. Է. 14):

Ը. Ութերորդ՝ զի թէ ոք գնայ յանապատ, ի շինութեանէ տանի հետ իւրն հաց եւ փայտ եւ այլն. այսպէս եւ յաշխարհէ աստ, թէ ելանել կամի՞ք յերկինս, պարտի՞ք հանդերձ զգեհուլ զառաքինութիւն, եւ կերակուր պատրաստել զսրբութիւն: Զի թէ յանկասկած ժամու գնամք, գուցէ ոչ իցէ մեզ տեղիք, եւ յայնժամ սկսանիցի՞մք զյետին տեղին ունել ամաւթով, եւ լսել զձայնն, որ ասէ. «Ընկեր, ընդէ՛ր մտեր

այսր, զի ոչ ունիս հանդերձ հարսանեաց» (Մաւրթ. ԻԲ 12) կամ «իւզ լապտերաց» (տնն Մաւրթ. ԻԵ. 1-13):

Թ. Իններորդ՝ զի «անապատն» «անշէն» ստուգաբանի. նմանապէս եւ յերկինս ոչ գոյ շինութիւն մեղաւորաց, զի որք աստ պատրաստեցին բնակութիւն, անդ ոչ ունին՝ ըստ այնմ. «Ի բաց գնացէր ամենքեան, զի ոչ զիրեմ գծեզ մշակքդ անիրաւութեան» (հմմտ. Ղուկ. ԺԳ. 27):

Ժ. Տասներորդ՝ զի յանապատի գող ոչ գոյ. այսպէս եւ յերկինս ոչ գոյ խաբիչ, պատրիչ, վասն որոյ թողու զհաւտն զուարթնոցն եւ եկն՝ խնդրել զկորուսեալն ոչխար, յաղագս որոյ ասէ Դաւիթ. «Մոլորեցայ եւ որպէս զոչխար կորուսեայ. խնդրեա՛ գծաթայս քո, զի զպարուիրանս քո եւ ոչ մոռացայ» (Սաղմ. ԸԺԸ. 176):

Արդ, եկեալ Տէր մեր եւ ստեղծաւ զեգիտ զմոլորեալ բնութիւնս ի մէջ մեղաց եւ եբարձ ի վերայ ուսոցն զփայտ խաչին, որ գուշակէր զբարձրութիւն մարդկան յապականութենէ մահու եւ մեղաց յանապականութիւն եւ ի կեանս: Այսքան առ այս:



ՎԱՍՆ ԿՈՐՈՒՍԵԱԼ ԴՐԱՄԻՆ

Ղուկ. ԺԵ. 8-10

ՍՏԵՓԱՆՈՍ ՍԻՒՆԵՅԻ

Կամ ո՞վ կին, որ ունիցի դրամս Ժ., եւ եթէ կորուսանիցէ դրամ մի, ո՞չ ապաքէն լուցանէ ճրագ եւ սրբէ զպունն, եւ խնդրէ փութապէս (հմմտ. Ղուկ. ԺԵ. 8):

«Կին» նշանակէ զհոգի մարդոյ, «Ժ. դրամ» նկարագրեալ ի նմա՝ կատարեալ առաքինութիւնք. միաբանութեամբ հին հոգեղէն¹ զգայութեանց ընդ հինգ մարմնեղէն զգայութիւնքս, յորոց եթէ կորուսանիցէ մի յառաքինութեանց, լուցանէ ճրագ, զբանն աստուածային, յորմէ լինի յիշողութիւն աստուածային պատուիրանին. «Մի՛ շնար, մի՛ սպանանէր, մի՛ գողանար եւ մի եղիցին քեզ աստուածք աւարաք» (հմմտ. Բ. Օրին. Ե. 7, 17-18). աւել ածէ², գտուն իւր սրբէ, զմարմինն ի չարութենէն, որ եղեւ ի պատուիրանագանցութենէն. կոչէ զբարեկամս եւ զզրացինս, զհամափառս եւ զգուգահաւատ զհոգիս եւ ասէ ցնոսա. «Ուրախակից լերուք ինձ, զի գտի զկորուսեալ առաքինութիւնն իմ»:

ԻԳՆԱՏԻՈՍ

Ո՞վ իցէ կին, որ ունիցի դրամս փասն. եւ թէ կորուսանիցէ մի դրամ, ո՞չ լուցանէ ճրագ եւ ամէ ամէ ի փան եւ խնդրէ սրբեալ մինչեւ զփանիցէ (հմմտ. Ղուկ. ԺԵ. 8):

Բազմադիմի առակաւք զամենախնամ տեսչութիւն աստուածային սիրոյն, զոր ունի առ արարածս, յայտ առնէ: Զի զոր աւրինակ ի հարիւրերորդ թուոյ անտի, որ ի յերկինս են, մի՛ «ոչխար» անուանէ զմարդիկ, Տէր գոլով ամենեցուն՝ հաւասարէ զարարածական բնութիւնս եւ զինքն «հովիւ» ասէ (տնն Ղուկ. ԺԵ. 1-7), որ զանձն ունայնացոյց՝ զկերպարանս ծառայի առեալ եւ եկն՝ գտանել մերովս զմեզ: Եւ մի ի տասանց անտի կորուսեալս ասէ զմեզ, որ յայց

¹ US հոգեղէն

² US աւելած

եղեալ կորուսելոյ պատկերին, այն, որ ի սկզբան անդ պայծառ եւ անապական ստեղծաւ յամենաբարի Արարչէն, արծաթեղէն եւ պատուեալ, յարմարեալ ըստ իւր պատկերին եւ ի նմանութեան: Քանզի զայս առակաւ դրամին¹ զեկուցանել թուի: Արդ, սա, պակասեալ ի թուոյ տասանցն, զի այսպէս զգասս հրեշտակաց ուսաք ինն գոլով² եւ տասներորդ մերս բնութիւն՝ պակասեալ ի թուոյ անտի: Իսկ եթէ զոչխարսն հարիւր ասաց, նոյն է, վասն զի տասամբք չափեալ է: Արդ, եկն խնդրել զպատկերն իւր, որ անյայտեալ էր խաւարաւ անգիտութեան եւ անհաւատութեան, եւ ծածկեալ աղբով մեղաց եւ անաւրէնութեան, եւ վառէ զմարմինն իւր պայծառ լուսով աստուածային բնութեանն՝ լուծանել զխաւարն անգիտութեան՝ ըստ այնմ, զոր ասէ. «Ես եմ լոյս աշխարհի» (Յովհ. Ը. 12): Եւ Եսայի ասէ. «Ոյք ևսրէին ի խաւարի եւ ի սրուերս մահու, լոյս ծագեցի ձեզ» (հմմր. Ես. Թ. 2): Եւ այս է, զոր ելոյց ճրագ եւ աւագանին շնորհաւք եւ որդեգրութեամբ ի մեղաց հոգւոյն³ մաքրեաց, եւ այս է «տանն աւել ածել»: Եւ եզիտ զիւր թագաւորական պատկերն եւ յառաջին մաքուր արծաթեղէն բնութիւնն զարձոյց եւ ուրախացաւ վասն գտանելոյն զմեզ: Հաղորդս առնէ ուրախութեանն եւ զիմանալի բնութիւնսն:

Ասէ. «Ուրախ լերուք ընդ իս, զի գրի զդրամն իմ, զոր կորուսի» (ԺԵ. 9):

Ո՛վ, որպիսեա՛ց մեզ պէտք են բանից եւ ժուժկալութեան՝ հաւասարեցուցանել շնորհին եւ ուրախութեանն զբանս: Բայց խոստովանեալ է այս ոչ միայն մերում տկարութեանս անմերձենալի գոլ, այլեւ կարի զաւրաւորագունիցն ի բանս, որպէս ահա յայտնի են, որ թափեցին զզաւրութիւնս իւրեանց եւ խոստովան եղեն, թէ ոչ ինչ զաւրեցին ասել: Եւ ի հիացման եղեալ՝ անճառելեացն ետուն եւ ի փառս հանգուցին զբանսն՝ ըստ այնմ. «Ո՛վ խորք մեծութեան եւ իմաստութեան եւ գիտութեանն⁴ Աստուծոյ, զի առանց քննելոյ են դարաստանք ևորա (Նոոմ. ԺԱ. 33): «Արդարեւ, մեծ են գործք քո, Տէ՛ր, - ըսք Դաւթայ, - եւ յոյժ խոր են խորհուրդք քո» (Մաղմ. ՂԱ. 6): Եւ՝ «Այր անզգամ գայս ոչ ծանեալ եւ անմիտն գայս ի միտ ոչ էառ» (Մաղմ. ՂԱ. 7): Թէ զիա՞րդ է՞ջ խոնարհու-

¹ ԻՏ պատկերին] դրամին
² ԻՏ գոլ
³ ԻՏ > հոգւոյն
⁴ ԻՏ > եւ իմաստութեան եւ գիտութեանն

թեամբ եւ «ընդ մեզ Աստուած» (Մապթ. Ա. 23) եղեւ մարդկապէս եւ ստացաւ զմեզ՝ նորոգեալ վերստին եւ զարգարեալ զպատկերն, զոր եզիտ յաղբսն¹ զազրալի գործոց թաղեալ եւ ցնծացաւ արարիչն բնութեանս ի գտանելն զկորուսեալս՝ զմեզ, ցնծութիւն արար երկնաւորացն եւ երկրաւորացս ի միասին: Ուրախ եղեւ եւ Հայրն բոլորեցունց վասն փրկութեան մերոյ, վասն որոյ ասէ.

Ուրախութիւն է առաջի հրեշտակաց Աստուծոյ վասն միոյ մեղաւորի, որ ապաշխարիցէ (հմմր. ԺԵ. 10):

Արդ, զի զամենայն ինչ անձամբ վճարեաց Տէրն մեր եւ զոր ինչ խնամս զթութեան եցոյց առակաւ՝ զանձն յայտնեաց այնու, զի գնաց զհետ մոլորելոյ ոչխարին եւ եզիտ զպատկերն թագաւորական: Եւ զի մի Որդւոյ միայն շնորհապարտ լինիցին արարածք, վասն այնորիկ կարգէ առ նմին եւ զՀաւրն խնամակալութիւն, որ ինչ Հաւր սեպհական է խնամոց եւ զթութեան, քանզի հաճեցաւ Որդւոյն միջնորդութեամբն եւ պատարագաւ հաշտիլ ընդ մարդկան եւ շնորհել զյանցանս եւ տալ զառաջին պատիւն: Արդ, զայս ամենայն թանձր աւրինակաւ բանին ի դէմս տեսութեան ածէ, որով զմերն եցոյց ստահակութիւն եւ զմիտս ապախտաւորս եւ զՀաւրն բարեմտութիւն եւ զանյիշաչարն լինել:

ՍԱՐԳԻՍ ԿՈՒՆԴ

Կամ կին, որ ունիցի դրամս փասն, եւ կորուսանիցէ դրամ մի (Ղուկ. ԺԵ. 8):

ԿՐ Տասն դրամ զեկուցանէ զթիւ տասն դասուց հրեշտակաց, վասն որոյ մի ի դասուցն ասաց զմարդկային բնութիւն: Զի որպէս տասն ամբ ի հարիւր աւարտի, այսպէս եւ միակաւն ի տասն իսկ դրոշմի: Եւ զի որպէս դրամն ունի զթագաւորական տպաւոր[եալ] զպատկերն, այսպէս եւ մարդ զթագաւորական տպաւորեալ զպատկեր ունէր յինքեան: Ըստ Մովսիսի, թէ՛ «Արար Աստուած զմարդն ըստ պատկերի իւրում» (Ծննդ. Ա. 27):

ՍՏ Կին՝ Հոգի մարդոյն, տասն դրամն, որ նկարեալ ի նմա կատարեալ առաքինութիւն՝ միաբանութեամբ հինգ հոգոյն զգայու-

¹ ԻՏ յաղբն
 21 - ԱԻԵՏԱՐԱՆԱԿԱՆ ԱՌԱԿՆԵՐԻ ՄԵԿՆՈՒԹԻՒՆՆԵՐ

Թեամբն ընդ հինգ մարմնոյն զգայութիւնն, յորոց եթէ կորուսանիցէ մի յառաքինութենէն, բազմադիմի առակաւք զխնամ աստուածային սիրոյն յայտնեաց, զոր ունի առ մարդ: Եւ յայց ելեալ կորուսելոյ պատկերին այն, որ յիսկզբանն պայծառ եւ անպական ստեղծաւ ի բարի Արարչէն, արծաթեղէն եւ պատուեալ մարդս է պակասեալ ի տասն դասուց հրեշտակաց: Արդ՝ եկն ի խնդրել զպատկերն իւր՝ անյայտեալ խաւարաւն անգիտութեան եւ անհաւատութեամբ, եւ ծածկեալ աղբով եւ անաւրէն մեղաւք:

Լուցանէ ճրագ (ԺԵ. 8):

ՍՏ ԶԲանն աստուածային, յորում լինի յիշողութիւն աստուածային պատուիրանին. «Մի՛ շնար: Մի՛ գողանար: Մի՛ եղիցին քեզ այլ աստուածք աւտարք» (Ելք Ի, 14, 15, 3):

Իգ. Առ զմարմինն պայծառ՝ աստուածային բնութեամբ միացեալ, լուծանէ զխաւար անգիտութեան: Որպէս ասաց Տէր. «Ես եմ լոյս աշխարհի» (Յովհ. Ը. 12): Եւ Եսայի ասէ. «Որք էիք ի խաւարի եւ ի ստուերս մահու, լոյս ծագեաց ի ձեզ» (Իսմբ. Ես. Թ. 2):

Աձէ աւել ի փանն (ԺԵ. 8):

Ստ. Զտունն սրբէ՝ զհոգին ի չարութենէ, որ եղեւ ի պատուիրանազանցութենէն: Ի մեղաց մաքրեաց՝ շնորհաւք որդեգրութեամբ հոգոյն:

Խնդրէ սփեպ եւ գփանէ (ԺԵ. 8-9):

Զիւր թագաւորական պատկերն, եւ յառաջին մաքուր արծաթեղէն բնութիւնն բարձրացոյց:

Կոչէ զբարեկամս եւ զղրացիս իւր (ԺԵ. 9):

ՍՏ Զհամափառ[ս] եւ [զ]զուգահաւասար հոգիս:

Եւ ասէ ցնոսա. Ուրախ լերուք, զի գփի (ԺԵ. 9):

Զկորուսեալ առաքինութիւնն:

Այսպէս ուրախութիւն եղիցի առաջի հրեշտակաց Աստուծոյ ի վերայ միոյ մեղաւորի, որ ապաշխարէ (ԺԵ. 10):

ԵՓ Ուրախութիւն զկնի տրտմութեանն լինի: Զի եղեն տրտմակից հրեշտակք, զի մեղան մաղիկ: Լինի ուրախութիւն, յորժամ ապաշխարեն: Որպէս ասաց Տէր. «Ուրախ լինել պարտ էր, զի եղբայրս քո մեռեալ էր եւ կենդանացաւ» (ԺԵ. 32): Ահա ուրախութիւն եւ տրտմութիւն հոգեղինաց: Տրտմութիւնք չարչարանք են, զիա՞րդ յերկինս տրտմութիւն եւ ուրախութիւն առնի: Զի պարտաւորեցան մարդիկ ի մեղս, անուանեցաւ տրտմութիւն ի վերինս: Զի թէ զհրեշտակս տրտմեցուցին մեղք մեր, քանի՞ եւս արժան է մեզ ապաշխարել, զի զԱստուած տրտմեցուցաք՝ զԱրարիչ[ն] հրեշտակաց:

ԻԳ Հիացաւ առաքեալն անճառելաւքն եւ ի փառս հանգուցանէ զբանն: Ո՛վ խորք մեծութեան եւ իմաստութեանն Աստուծոյ, զի առանց քննելոյ են դատաստանք նորա: Որպէս ասաց Դաւիթ. «Մեծ են գործք քո եւ յոյժ խոր են խորհուրդք քո» (Սաղմ. ՂԱ. 6): Եւ այր անզգամ զայս ո՛չ ծանեաւ, եւ անմիտն զայս ի միտ ո՛չ առ, եթէ զիա՞րդ էջ խոնարհութեամբ Աստուած եւ եղեւ մարդկապէս ընդ մեզ: Եւ չըջեցաւ Աստուած ընդ մարդկան եւ խոստացաւ զմեզ նորոգել վերստին, եւ զարդարեաց զպատկերն, զոր եզիտ յաղբն զազրալի գործովք թաղեալ: Եւ ցնծացաւ Արարիչն բնութեամբ, ուրախութեամբ երկնաւորաց եւ երկրա[ւորա]ցս ի միասին, Հայրն բոլորեցունց, վասն փրկութեան մարդկ[ան]:

ՄԱՏԹԷՈՍ ԶՈՒՂԱՅԵՑԻ

Իսկ ըստ այսմ յարացուցի յաւել եւ զգրամն Ժ. (10) թուովն, զի թէպէտ Տէր մեր եկն եւ մարմին առեալ եւ զբնութիւն մարդկան հանեալ յերկինս, որպէս ցուցաւ: Այլ յետ մարդեղութեանն մնացեալ որդիքս Ադամայ ծնեալ յաւազանէն, զոր կնոջ անուամբ յորջորջէ՝ եղեալ զպատկեր անմեղութեանն ի սրբեալն է.(7)պատիկ շնորհաւք Հոգւոյն ի հաւատացեալսն: Դեռեւս կորուսանէ եկեղեցի զմի ոք, զի դեռ խաբեութիւն չարին մերձ է եւ մարմին՝ ցանկացող: Վասն որոյ ոչ բաւականացաւ առաջին գտանելովն, զոր ինքն եզիտ, այլ ետ գնոյն գործ գտանելոյն ի ձեռն եկեղեցւոյ, յորժամ մեղանչէ ոք՝ լուցանել ճրագ իմաստութեան, զի առաջին գտմանն ոչ պիտոյացաւ այս, քանզի հոգւով եւ մարմնով կորեալ էր մարդն, վասն որոյ եւ ինքն եկն ի խնդիր, իսկ երկրորդիս միայն գործով

կորուսանէ սատանայ զմարդն, եւ մնայ միտքն եւ զգայութիւնքն, զոր կարողանայ լոյս իմաստութեանն խրատիւ եւ քարոզութեամբ դարձեալ գտանել զնա: Վասն որոյ ասէ:

Ո՞ր իցէ կին, որոյ իցեն դրամք Ժ. (Ղուկ. ԺԵ. 8):

Եւ զի՞ յառաջն գերկուս բնութիւնսն ասաց՝ զհրեշտակաց եւ զմարդկան, վասն որոյ Ճ. (100) ասաց, եւ մի ի նոցանէ մարդն էր, իսկ աստ՝ զմարդկային բնութիւնս միայն ասէ, վասն որոյ Ժ. (10) միայն ասէ, որ ունի Ժ. (10) զգայութիւնս՝ հոգեկանս եւ մարմնականս, յորոց անհնարին է ի միասին կորնչել, բայց մի ի նոցանէ սխալի, քանզի գող է սատանայ այժմ եւ ոչ բռնաւոր, վասն որոյ որպէս գող զմինն տանի, այսպէս եւ սատանայ զմի մարդ կամ զմի ի զգայարանացն պատրէ նախ եւ ապա՝ զայլսն ըստ կարգի:

Եւ զի՞ ի դրամ աւրինակէ զպատկերն իւր, զոր նոր նորոգեաց: Եւ այս եւս ունի պատճառ բազում բազդատութեամբ իմն:

Ա. Նախ՝ զի դրամն արծաթի լինի եւ ունի յինքն ձեւս գրեալ զպատկեր թագաւորի եւ զանունն. այսպէս եւ մարդն է ի մահկանացուածս եւ նկարեալ ունի յինքն զպատկերն Աստուծոյ, այսինքն՝ զանձնիշխանութիւնն եւ զանմահութիւն հոգւոյն:

Բ. Երկրորդ՝ զի անբաժանելի է պատկերն եւ գիրն յարծաթոյն. այսպէս անբաժ է անմահութիւն հոգւոյն եւ անձնիշխան կամքն, վասն որոյ եւ բնաւորեցաւ եւ մարմնոյն զանմահական կեանս ստանալ ի կրկին նորոգմանն:

Գ. Երրորդ՝ զի ժանգ առնու դրամն ի պատճառէ իմիքէ. այսպէս եւ հոգին առնու աղտեղութիւն մեղաց ի ներգործութենէ չարին՝ ըստ այնմ. «Նախանձո բանսարկուին եմուր [մահ յաշխարհ]» (Իմաստ. Բ. 24):

Դ. Չորրորդ՝ զի դրամն անդրադարձեալ «մարդ» կոչի ըստ գրոյն, եւ «մարդն»՝ դրամ. այսպէս եւ Աստուած մարդ եղեւ, եւ մարդն աստուածացաւ, զի անբաժանելի են ի միմեանց այժմ:

Ե. Հինգերորդ՝ զի դրամն տեսեալ ճանաչեմք զթագաւորին պատկերաւն, որ ի նմա, այսպէս՝ «ԶԱստուած չիք տեսալ որ» (հմմտ. Ա. Յովհ. Դ. 12) ըստ աւետարանչին, բայց միաձնաւն, որ է պատկեր աներեւութին Աստուծոյ, ճանաչեմք զԱստուած Հայր, քանզի նա ուսոյց մեզ զնա:

Զ. Վեցերորդ՝ զի զաւրութեամբ ունի արծաթն զանուն թագաւորին, իսկ յորժամ ընթեռնուժք, երեւի ներգործութեամբ. այսպէս

եւ որ յորժամ ի չար գործսն է, ոչ է պատկեր Աստուծոյ, զի զայն անասնոց արար պատկեր եւ զանձնիշխան կամքն ընդ լծով ախտին հնազանդեցուցեալ, յաղազս որոյ ոչ է նա ներգործութեամբ պատկեր Աստուծոյ: Իսկ յորժամ ի բարի գործսն է, յայտնի երեւի ներգործութեամբ ի բարի գործոցն, թէ պատկեր է նա նախատպին, զի այսքան ամենայն բարի են, այս է ընթեռնուլն:

Է. Եւթներորդ՝ զի հող ծածկէ զդրամն, եւ այն է կորնչելն. այսպէս՝ ծուլութիւնն զբարութիւն գործոցն կորուսանէ զպատկերն Աստուծոյ, զի հողոյն յատկութիւն է ծուլութիւնն:

Ը. Ութերորդ՝ զի զարծաթ ի հողէն պարգեն եւ յիստակեն, ըստ մարգարէին (հմմտ. Սաղմ. ԺԱ. 7), եւ ապա յետոյ զպատկերն նկարեն. այսպէս եւ զմարմինս մեր ի հողոյ կազմեալ է Արարիչն, եւ ապա զբանական Հոգին ի նմա եղեալ՝ ըստ այնմ. «Առ Տէր Աստուած հող յերկրէ եւ սրեղծ գմարդն» (հմմտ. Ծննդ. Բ. 7): Եւ կամ. «Նախ ծնանիմք ի մարմնոյ, եւ ապա՝ ի հոգոյն աւազանի» (հմմտ. Մարթ. Ա. 20):

Թ. Իններորդ՝ զի ամենայն դրամ, յորում գործմեալ է պատկերն, միապէս ունի զպատկեր թագաւորին, այսպէս եւ ամենայն հաւատացեալ միապէս պատկեր Աստուծոյ, զի չիք խտիր ոչ արուի եւ ոչ իգի, իսկ անհաւատքն անպատկեր են, զոր այլազգիքն «մուտալաս» կոչեն, այսինքն՝ ձեռով միայն եւ ո՛չ արդեամբք պատկեր Աստուծոյ:

Ժ. Տասներորդ՝ զի արծաթն բնականապէս ունի զպայծառութիւնն իւր, իսկ թէ որ պղինձ խառնէ ի նմա, ապա նուազանայ. այսպէս եւ մարդն բնականապէս անմեղ ստեղծաւ յԱրարչէն, իսկ յազգմանէ չարին խամբացաւ զի խառնեաց զորմն չարութեան ի մէջ ցորենոյն՝ ըստ բանին Տեառն (տրն Մարթ. ԺԳ. 25-30):

ԺԱ. Մետասաներորդ՝ զի բնաւորեալ է արծաթոյ ոչ կարող գոլ թաքուցանել զայն, ինչ որ ի նմա խառնեն՝ պղինձ կամ այլ ինչ. այսպէս եւ ի մարդն եղ բնական Աստուած զիւրից մտացն, որով ոչ կարէ թաքչել մեղք ի մարդումն՝ ըստ այնմ. «Ոչ ինչ է ի ծածուկ, որ ոչ յայրմեսցի, եւ գաղտնի, որ ոչ ծանիցի» (Մարթ. Ժ. 26):

ԺԲ. Երկուտասաներորդ՝ զի հնարեցան մարդիկ զպղնձախառն դրամ ջլէտալ եւ պայծառ երեւեցուցանել. այսպէս եւ մարդս հնարի կեղծաւորութեամբ ծածկել զմեղսն, որ ամբարեալ է ի հոգին ըստ փիլիսոփային՝ աղքատութիւն կեղծաւորել զհարստութիւն եւ դիմակն նոյնպէս:

ԺԳ. Երեքտասներորդ՝ զի թէպէտ զայս Հնարեցան, փութով բացուի այսպէս դրամին, եւ ամենեքեան տեսանեն, եւ է փող. այսպէս եւ մարդն թէպէտ ի կենդանութեան իւրում սակաւ ժամանակս ծածկել զմեղս, սակայն զիպի աւուր, յորում գաղտնիք ամենայն յայտնին՝ ըստ այնմ. «Աթոռք եղան, եւ դպրութիւնք բացան» (հմմտ. Դան. Է. 10), եւ թէ՛ «Մեզ ամենեցուն յանդիման առաջի, զի ընկալցի [իւրաքանչիւր իւրով մարմնով, զոր ինչ գործեաց յառաջ՝ եթէ բարի եւ եթէ չար]» (հմմտ. Բ. Կոր. Ե. 10):

ԺԴ. Չորեքտասներորդ՝ զի զաւեր դրամն ոչ ոք ընդունի, մանաւանդ զայն, զոր թագաւորն հրամայէ ոչ ընդունել. այսպէս եւ ի լինել բազում ամաց ի մեղս մարդոյն եւ ներողութեամբն Աստուծոյ յամեալ յոլով ժամանակս՝ թերեւս դարձցի՝ ըստ մարգարէին. «Ոչ կամիմ զմահ մեղատորին» (հմմտ. Եզեկ. ԺԸ. 32), իսկ յորժամ ոչ կամի դառնալ, յայնժամ շարժի բարկութիւնն Աստուծոյ ի վերայ որդւոցն անհաւանութեան, եւ ամենայն արարածոց ատելի լինի, եւ հրեշտակաց եւ ամենայն սրբոց:

ԺԵ. Հնգետասներորդ՝ զի յորժամ ի հուր անկանի դրամն, ոչ եւս երեւի պատկերն, որ ի նմա, այսպէս եւ մարդն յորժամ ի դժոխքն անկանի, ոչ եւս է ի համարի մարդկան, զի ոչ է խնամքն Աստուծոյ առ նմայ, այլ՝ որպէս ծառայ բորբոք ցանկութեանցն, թողեալ զաստուածային բորբոքումն սիրոյն. այսպէս եւ Տէրն արդար դատաստանաւ հատուցանէ մարդկան, ըստ վկայութեան խղճմտանաց իւրոց: Արդ, այս ամենայն պատահեալ բնութեանս մերում եւ անկեալ ի դժոխս: Իսկ Տէրն մեր եւ թագաւորն Աստուած կամեցաւ նորոգել զպատկերն իւր, խոնարհեալ ած աւել տան աշխարհիս տնաւրէնութեամբ մարդեղութեանն իւրոյ կամ սքանչելագործութեամբն ի մի վայր ժողովեաց եւ, գտեալ զմարդն ժանգոտեալ եւ մեղաւք լցեալ, զոր եւ սրբեալ, մաքրեաց աւագանաւն եւ եհան յառաջին պատիւն ի պատկերակցութեանն իւր, վասն որոյ եւ ուրախակից եղեալ հրեշտակք փառք ի բարձունս առաքեն նմա վասն փրկութեան մարդկան: Այսպէս եւ եկեղեցւոյ ետ զաւրութիւն զհեռացեալն յինքենէ խոնարհութեան աւելաւն՝ ժողովել ի ծոց իւր եւ փութով գտանել ճրագիւ մարմնոյ աստուածութեանն նորայ՝ աւրինակ տալով զնա, որ վասն մեր կրեաց զամենայն, զի դարձցուք եւ կեցցուք:

Եւ քանզի ճրագ անուանէ զմարմին իւր, եւ այս ըստ բազում եղանակի:

Ա. Նախ՝ զի ճրագն է խաւար առանց լուսոյ եւ սեւադէմ. այսպէս եւ մարդկային բնութիւնս, գոյր նախքան զմարդանալն՝ Քրիստոսի խաւարեալ մեղաւք եւ սեւացեալ անաւրէնութեամբ:

Բ. Երկրորդ՝ զի ճրագին մին մասն վառի լոյս. այսպէս եւ Բանն Աստուած, ոչ զբոլոր մարդիկ էառ միաւորութեամբն, այլ՝ մի անհատ մարմին միաւորեաց բանական հոգւովն ընդ լոյս աստուածային բնութեանն:

Գ. Երրորդ՝ զի ճրագն յանկարծակի երեւի ի խաւարեալ տան. այսպէս եւ Բանն Աստուած յանկարծակի եկն եւ մարմնացաւ, եւ զլոյս փառաց իւրոց ծագեաց աշխարհի՝ ըստ այնմ. «Յանկարծակի եկեաց Տէր ի փաճար ուխտին» (հմմտ. Մաղաք. Գ. 1), եւ թէ՛ «Որք նստելին ի խաւարի [եւ ի սրուերս մահու], լոյս ծագեցաւ նոցա» (Մատթ. Դ. 16):

Դ. Չորրորդ՝ զի Տէրն ասէ, թէ ճրագն ի վերայ աշտանակի դնի եւ լոյս տայ ամենեցուն, որ ի տան իցեն. այսպէս եւ Տէր մեր բարձրացաւ ի խաչին, եւ անտի ծագեաց լոյս համապայծառ որդւոց մարդկան՝ ըստ այնմ. «Յորժամ բարձրացայ յերկրէ, զամենեւին ձգեցից առ [իս]» (Յովհ. ԺԲ. 32):

Ե. Հինգերորդ՝ զի ի վառել ճրագին փախչի խաւարն ի տանէ, այսպէս ընդ մարմնանալ Բանին Աստուծոյ փախեաւ սատանայ ի յաշխարհէս՝ ըստ այնմ. «Իշխան աշխարհիս [այսորիկ] ընկեացի արպաքս» (Յովհ. ԺԲ. 31):

Զ. Վեցերորդ՝ զի ի լուսոյն, որ ի տան վառի, ամենեքեան հաղորդին՝ մարդ եւ անասուն եւ գազան. այսպէս եւ ընդ իջանել Տեառն մերոյ ի դժոխս, ոչ ոմանք լուսաւորեցեն, այլ՝ զամենեսեան եհան՝ ըստ այնմ. «Որք ի կապանս էք, ելէք, եւ որք ի խաւարի՝ յայտնեցարուք» (հմմտ. Ես. ԽԹ. 9), եւ թէ՛ «Տեացէ ամենայն մարմին զփրկութիւն Աստուծոյ մերոյ» (հմմտ. Դուկ. Գ. 6):

Է. Եւթներորդ՝ զի մինչդեռ ոչ է վառեալ ճրագ ի տանն, ոչ գիտեն՝ զի՞նչ գործի ի տանն. այսպէս եւ մինչեւ ի մարմնանալ Բանին ոչ կարացին իմանալ զգրեալսն ի մարգարէիցն՝ ըստ այնմ. «Տեսանելով րեացն եւ մի՛ րեացն» (Մատթ. ԺԳ. 14): Իսկ Տեառն մերոյ զալստեամբն յայտնեցան միտք գրոց եւ գործոց, որպէս ասի յԱւետարանին. «Յայնժամ երաց զմիտս նոցա՝ իմանալ զգիրս» (Դուկ. ԻԴ. 45):

Ը. Ութերորդ՝ զի լոյս առանց պատրոյզի ոչ երեւի, եւ պատրոյզ առանց լուսոյ ոչ վառի. այսպէս Բանն Աստուած առանց մարմնոյն

ոչ է Քրիստոս, եւ ոչ մարմինն առանց Բանին միաւորութեանն՝ Աստուած:

Թ. Իններորդ՝ զի նուազ աչքն նուազ տեսանէ զլոյս ճրագին եւ պայծառն՝ առաւել. այսպէս եւ Հերձուածողն նուազ ունի հաւատս, վասն որոյ բաժան կարծէ զԲանն ի մարմնոյն, իսկ ուղղափառ հաւատացեալն ըստ ուղիղ տեսութեան հաւատոյն՝ ուղիղ տեսանէ զԲանն միացեալ ի մարմնի, որպէս եւ է իսկ՝ ըստ այնմ. «Բանն մարմին եղև եւ բնակեաց [ի մեզ]» (Յովհ. Ա. 14):

Ճ. Տասներորդ՝ զի յորժամ իր ինչ կորնչի ի խաւարչտին տեղւոջ, ճրագիւ գտանի. այսպէս եւ մարդկային բնութիւնս կորեալ էր ի խոր խաւարի, վասն որոյ վառեաց զմարմինն Բանն Աստուած պայծառ լուսով աստուածութեամբն եւ ելեալ ի խնդիր եգիտ, որպէս ասացաւ ի վերոյ:

Իսկ թէ զիա՞րդ ի «ճրագ» առակեաց զմարմինն եւ ոչ [յ]արեգակ կամ ի լուսին: Այս է, զի ճրագն մերձ լինի մեզ, վասն որոյ զայն ետ աւրինակ, որ մերձ մեզ էր, իբր թէ ինքն այնպէս մերձ եկեալ, որպէս ճրագն եւ ոչ է հեռու, որպէս արեգակ եւ լուսին: Նմանապէս եւ եկեղեցի վառէ ճրագ զվարդապետսն, յորժամ եւ պիտոյ իցէ, վասն զի մին մասն է ճրագին, որ լուսաւորէ եւ այն առանց տարակուսանաց, այսպէս եւ ի վարդապետսն բանն ուղիղ է, զի թէպէտ եւ ինքն վատթար եւ սեւացեալ լինի գործով, ոչ կարէ զգործն իւր ուսուցանել, այլ զայն լոյս շնորհացն, որ յԱստուծոյ տուեալ է ի բերան նորա:

Իսկ զի՞ տան նմանեցուցանէ զաշխարհս եւ զեկեղեցի, որ ի քարանց: Եւ այս վասն բազում պատճառի:

Ա. Նախ՝ զի տունն չորեքանկիւնի լինի. այսպէս եւ աշխարհս Դ. (4) կողմ ունի. արեւելք եւ արեւմուտք եւ այլն: Եւ ի նոյն ձեւ շինի եկեղեցի:

Բ. Երկրորդ՝ զի ի վերայ հիման շինի տուն, այսպէս՝ լերինք եւ բլուրք հիմունք են երկրի՝ ըստ այնմ, որ ասէ Յոր. «Նիմունք երկրի արսեսցին» (հմմտ. Յոր Թ. 13): Եւ կամ դարձեալ՝ աշխարհ ի վերայ հիման Աստուծոյ է շինեալ՝ ըստ այնմ. «Նասրապետաց գերկիր ի վերայ հասարարութեան իրոյ» (Սաղմ. ԸԳ. 5), եւ եկեղեցի ի վերայ հիման հաւատոյ, զոր ոչ կարացին շարժել հեղեղք:

Գ. Երրորդ՝ զի մասամբ ժողովեալ քար եւ փայտ եւ այլն, եւ ապա կոչի տուն. այսպէս յերկնէ եւ յերկրէ, եւ որ ի մէջ սոցա պա-

րառեալ են զմիմեանց բնութիւնք, է աշխարհ, քանզի այս է սահման սորա՝ ասէ փիլիսոփա. եւ եկեղեցի ի բազում խորհրդոց եւ ի շնորհաց պայծառանայ, վասն որոյ ոչ ունի գեղեցկութիւն եկեղեցի, որ ոչ ունի վարդ եւ զայլսն:

Դ. Չորրորդ՝ զի ի ձեռն ճարտարի շինի տուն. այսպէս եւ ի ձեռն ամենահնար իմաստութեանն Աստուած շինեաց զաշխարհս՝ ըստ այնմ. «Աստուած իմաստութեամբ իրով հիմունս արկ [երկրի]» (Առակ. Գ. 19): Նմանապէս եւ զեկեղեցի նա շինեաց:

Ե. Հինգերորդ՝ զի հաստատ է շինութիւն տանն. այսպէս եւ Աստուած զաշխարհ հաստատեաց, զի «մի սասանեսցի յախրեան», ասաց մարգարէն (Սաղմ. ԸԳ. 5), նմանապէս եւ կազմուածք տաճարին Աստուծոյ:

Զ. Վեցերորդ՝ զի ձեղունք եւ տանիս գոն տանն. այսպէս եւ աշխարհ ձեղունք ունի զէ. (7) գաւտիսն եւ տանիս, զՋրեղէն կամարն՝ ըստ այնմ. «Խորք որպէս [զգետար] վերարկու է նորա» (Սաղմ. ԸԳ. 6), եւ թէ՛ «Արկեր ի վերայ քուրց զվերնայարկս նորա» (Սաղմ. ԸԳ. 3). յայս միտս եւ եկեղեցի շինեցաւ ներքին կամարաւքն եւ վերին գումբեթաւն:

Է. Եաւթներորդ՝ զի տուն կամարածեւ կապի, եւ մարգարէն [ասէ]. «Ձգեցեր գերկինս, որպէս խորան» (Սաղմ. ԸԳ. 2). եւ եկեղեցի ի նոյն ձեւ կիսաբլուր կամար կապի:

Ը. Ութերորդ. զի գտուն վասն հանգստեան շինի, այսպէս եւ աշխարհ վասն բնակութեան կենդանեաց շինեցան:

Թ. Իններորդ. զի ի տունն ննջեն եւ յառնեն մարդիկ. այսպէս եւ յաշխարհի մեռանին մարդիկ եւ աստ դարձեալ յառնեն ի մեռելոց՝ ըստ այնմ. «Խաղաղութեամբ քո յայս եւ ի սոյն ննջեսցուք եւ զարթցուք» (Սաղմ. Դ. 9): Յայս միտս ի դուռնս եկեղեցւոյ թաղուիմք, զի ի նորին խորհուրդ յառնիցեմք:

Ճ. Տասներորդ՝ զի գոյ հնար զհին տունն քակել եւ դարձեալ՝ նորոգել, այսպէս եւ ի հանդերձեալն կրկնակի նորոգեսցէ զաշխարհս Տէրն՝ ըստ այնմ. «Եղիցին երկինք նոր եւ երկիր նոր» (Ես. ԿԵ. 17), զոր Տէր նորոգեսցէ, այսպէս եւ փոխանակ այսմ եկեղեցւոյ՝ վերինն Սիոն նորոգի ի վայելումն արժանաւորաց իւրոց, յորոց յայսցանէ յայտ է ասելն Տեառն, մտանել ի տունս յայս եւ լուսաւորել զմեզ (հմմտ. Եփես. Գ. 9):

Արդ, այսքան բարերարութիւն ցուցեալ Տէրն մեր եւ այլս բազումս, զոր կամիմք յառաջիկայդ ուսանել: Եւ արդ, նա ստեղծաւղ

է գոյիցս, կարող է աւգնական լինել մեզ եւ սրբել զմեզ ի ժանգոյ մեղացն: Զի թէ զբոլոր բնութիւնս ազատեաց ի մեղաց, յայտ է, թէ եւ զմեզ կարող է արդարացուցանել, բայց այսքան եւեթ, զի մեք կամակար մտաւք զանձինս խոնարհեցուցուք ի ներքոյ սրբութեան եւ ապաշխարութեան, զի մինչ դեռ չիք մեր ազաղակել, լուիցէ մեզ, եւ մինչդեռ չիք ինչ գործեալ, նա ձեռնկալու լինի մեզ: Իսկ արդ, այսքան ողորմութեան շնորհք եցոյց մեզ Տէր, զի մի՛ յաւիտենական կորստեանն պատահիցիմք, զի չիք մեր ապաւէն բաց ի նմանէ, վասն զի բազմագուլ է եւ անոխակալ, եւ անյիշաչար եւ բազում անգամ ողորմի, եւ թէեւ Հ.(70)եկին մեղուցեալ իցեմք, զամենայն թողու, վասն որոյ մի զանյիշաչարութիւն նորա պատճառս առնելով անդարձ լիցուք, այլ յիշեսցուք եւ զպատուհասան եւ, երկնչելով ի նմանէ, երկիւղիւ վարեսցուք զկեանս մեր եւ արժանի լիցուք մասին սրբոցն ի Քրիստոս Յիսուս Տէր մեր, շնորհաւք եւ ողորմութեամբ Հաւր նորին եւ Հոգւոյն Սրբոյ, որին փառք [յաւիտեանս. ամէն]:



ՎԱՍՆ ԱՆԱՌԱԿ ՈՐԴԻՈՅՆ

Ղուկ. ԺԵ. 11-32

ՍՏԵՓԱՆՈՍ ՍԻՒՆԵՅԻ

Եւ ասէր. «Այր ոմն ունէր երկուս որդիս, եւ ասէ կրտսերագոյնն ցիւղիւն. «Նա՛յր, փութ ինձ մասն, որ ինչ հասանի յ[ը]նչիցդ»: Իսկ նա բաժանեաց նոցա զգոյսն (հմմտ. Ղուկ. ԺԵ. 11):

Որպէս որ յառաջ երկու առակքն յորդորեն յապաշխարութիւն զմեղուցեալս, նոյնպէս եւ առաջիկայս. իսկ զերիցագոյն որդին եւ զկրտսերագոյն ի յերկուս զաւրութիւնս բանական հոգւոցն բաժանելի է, եւ դեռ եւս ոչ մեղուցեալս զորդին երիցագոյն, իսկ զորդին կրտսերագոյն իմ մեղուցեալս, որք վերջացան ի փառացն Աստուծոյ: Ոմանք ասացին՝ որդի երիցագոյն՝ զփարայեղական ժողովուրդն, եւ որդի կրտսերագոյն՝ զհեթանոսական ժողովուրդն, բայց այս ոչ թուի ինձ ճշմարիտ, քանզի ցերէց որդին ասէ Հայրն որդեսէր.

Եթէ դու, որդեակ, հանապազ ընդ իս ես, եւ ամենայն, որ ինչ իմ է, քո է (հմմտ. ԺԵ. 31):

Իսկ Իսրայելացիք, բազում անգամ յանցուցեալ, ոչ եղեն ընդ Հաւրն, եւ հեթանոսաց ժողովուրդն ո՛չ էր երբէք առեալ մասն ի Հաւրէն եւ կորուսեալ, այլ որպէս ասացին, «երէց որդին» զհոգիս նշանակէ, որք ոչն մեղանն, եւ «կրտսերագոյն»՝ զհոգիսն, որք մեղանն եւ ապաշխարենն: Այլ ասիցէ որք. «Վասն է՞ր կրտսերագոյն ասացան «հոգիք անառակացն», եւ երիցագոյն՝ «հոգիք արդարոցն»: Առ այս ասացից, եթէ վասն անառակութեանն եւ վասն բաժանելոյ յառաքինութենէ եղբաւրն իւրոյ «կրտսեր» կոչեցաւ, այլ ոչ ըստ ժամանակի: Եւ եթէ որպէս որք կարծիցէ ասել, Հա՛յր, այժմ զփրկիչն կարծեմք, որ ասացն ցաշակերտան. «Որդեակք իմ», եւ դարձեալ՝ «Քաջալերեա՛ց դուստր, հաւատք քո կեցուցին զքեզ» (Մաթթ. Ժ. 22):

Գնաց,- ասէ,- յերկիր հեռասփան (հմմտ. ԺԵ. 13):

Ի յարդարութենէ եւ յերկնային կենդանութենէն յերկրային ցանկութիւնս եւ զբաղումն խաւարային աշխարհիս այսորիկ:

Եւ ցրուեաց զամենայն գոյացութիւնս իւր կելով անառակապէս (հմմտ. ԺԵ. 14):

Հայրն աւանդեաց նմա զինչս առաքինութեան, իսկ նորա զհրամանով հաւրն զանց արարեալ, կորոյս զամենայն առաքինութիւնն, որպէս եւ ես որ շարագրեցիս, ուսեալ զամենայն գործ աստուածա[յ]ին առաքինութեանն ի Քրիստոսէ եւ յաշակերտաց նորայ արտաքսեցի անառակական գործովք վարեալ:

Եւ եղև սով սաստիկ ի քաղաքին յայնմիկ (հմմտ. ԺԵ. 14):

«Սով եղև»՝ լսել զբանն Տեառն եւ խնամակալութեանն Աստուծոյ, զի պակասեալ եւ նուազեալ յիւրոցն զարձցի առ Հայրն, ցանկացեալ Հաւրն մարդասէր հեզութեանն:

Եւ նա սկսաւ պակասել (հմմտ. ԺԵ. 14):

Այսինքն՝ եթէ ի մոռացումն եկն իւրոյ ցանկութեանն:

Եւ գնացեալ յարեցաւ ի մի ոմն ի քաղաքացոց գաւառին այնորիկ (հմմտ. ԺԵ. 15):

«Քաղաքացիք գաւառին», որ հեռի է յերկնաւոր գաւառէն՝ սատանայ եւ զաշնաւորք նորայ, ասաց:

Եւ նա յղեաց զնա յանդաստան իւր արածել խոզս (հմմտ. ԺԵ. 15):

«Անդաստան» եւ ազարակ սատանայի, ուր են տունկք, զորս ոչ տնկեաց Հայրն երկնաւոր, եւ «խոզք», որ զմարդարիտն կոխեն եւ անցանեն, նա արածէ խոզս, որ զցանգութիւն մարմնական կատարէ եւ թաւալի ի ժանտահոտութիւնս ախտից մարդկան, այլ եւ այնպիսին, որ պղծովն հոգևով լցեալ է եւ սերմանէ ի մարմին, այլ ոչ ի հոգի:

Եւ ցանգայր յագենալ յեղջերէն, զոր ուրէին խոզքն (հմմտ. ԺԵ. 16):

Բանական հոգի ցանկանայ վարդապետութեան եւ բանից թէպէտ եւ ոչ բարի, սակայն որ եւ իցէ բան վարդապետական. «եղջեր»՝ դայգ պտուղ քաղցր է եւ պարարէ զմարմին, թէպէտ եւ կղկղանաց առնէ արգելումն, եւ նշանակէ զբանս հիւթասիրաց եւ մարմնասիր-

րաց, որք ասեն զմարմնական ցանկութիւնս բարի ըստ մարմաջելոյ լսելեաց իւրեանց:

Եւ ոչ որ փայր նմա (ԺԵ. 18):

Բարեյուզաց զխախտեալ ուսմունս ոչ աւանդե[ցին] յետինք, զի մի յանդիմանեացին:

Եւ յինքն եկեալ՝ ասաց (հմմտ. ԺԵ. 17):

Որպէս թմբրեալ եւ զթմբրութիւն ի բաց ընկեցեալ, յիշէ երանելութեան հաւրն, վարձկան կոչի, որ ծառայէ ումէք կամ Աստուծոյ եւ կամ ա՛յլ ումէք. եւ ծառայէ ոչ վասն սիրելոյ զնա, այլ զի փոխանակ ծառայութեանն վարձուց ակն ունիցի:

Եւ ասացից ցնա. «Նա՛յր, մեղայ յերկինս եւ առաջի քո» (ԺԵ. 18):

Յերկնաւորսն մեղայ, զի թողեալ զերկնաւորացն գործս, յերկրաւորս քարչեցայ. «առաջի քո», զի անցեալ զպատուիրանաւ քով, ընդ սատանայի յարեցայ:

Եւ յարուցեալ զնաց առ հայրն իւր (ԺԵ. 20):

Ընդ ասել բանին եւ զգործսն կատարէր. զվերջինսն մոռացեալ եւ յառաջինսն ձգեալ:

Եւ դեռ եւս նորայ հեռի գոլով փեսեալ հայրն՝ զթացաւ եւ ընդ առաջ ընթացեալ, անկաւ զպարանոցան նորա եւ համբուրեաց (հմմտ. ԺԵ. 20):

Դեռ եւս հեռի էր, վասն զի ի յանցանացն ոչ էր թաւթափեալ. եւ զի զղջացեալ փութայր առ հայրն, տեսանէր զնա եւ անկանէր ի վերա[յ] պարանոցի նորայ, որ ազատեալն էր այն ինչ ի լծոյ սատանայի. տայր նմայ եւ համբոյր, նշանակելով զմիաւորութիւն առ որդին:

Ասէ հայրն ցձառայս իւր. «Վաղվաղակի, հանէք զպարմուճանն առաջին եւ զգեցուցէք դմայ, եւ փուր մաքանի ի ձեռս դորա եւ կաւշիկս՝ յոքս դորայ (հմմտ. ԺԵ. 22):

Առաջին «պարմուճան»՝ զառաջին զարդ հոգւոյն, որով զարդարէ եւ ուրախացուցանէ զհոգիս ապաշաւելոց եւ ի բաց ընկելոց գորտմական անզարդութիւն յանցանաց. «մաքանի»՝ զնկարա-

գիրն, որ զգործական հոգւոյն զարդարէ. «կառչիկս»՝ ոչ զեզիպտացւոցն, զոր հրամայէ ի բաց ընկենուլ այնոցիկ, որ ելանեն եւ գնան ի վերա[յ] սրբո[յ] երկրին, այլ որ ի պատրաստութիւն սրբոյ Աւետարանին կազմեցան:

Եւ ամէք զգուարակն պարարեալ՝ զենէք, զի կերեալ ուրախացուք (հմմտ. ԺԵ. 23):

«Զուարակ պարարեալ» բանն ողջախոհ վարդապետութեան, կամ ինքն իսկ Քրիստոս՝ բան եւ իմաստութիւն Աստուծոյ, որպէս եւ Սողովմոն ասէ. «Իմաստութիւն շինեաց իւր փուն եւ կանգնեաց սինս երթն եւ գեն զգենիս իւր» (Առակ. Թ. 1), եւ որ ի կարգին է:

Իսկ որդի նորա երիցագոյն էր յագարակի (հմմտ. ԺԵ. 25):

«Որդին երեց», որպէս եւ ասացաւ բանական բնութեանս, որ ոչ մեղուցեալ է ի բարի եւ ի պարարտ անդաստանի՝ եղեւ գործաւղ անդաստանի բարւոյ, հակառակ անդաստանին, որ ունէր զխոզսն:

Եւ որպէս գայր մերձեցեալ ի փուն, լուաւ զձայն երգոց եւ պարուց (հմմտ. ԺԵ. 25):

Երգ երաժշտականք են եւ համաձայնք եւ կրկնաձայնք. արդ, պարտ էր ի դառնալ որդւոյն առ հայրն եւ ապաշխարել, երգոց համաձայնից լսել, եւ ոչ հակառակա[ւ] ձայնից. եւ երգք համաձայնք են աստուածաբանութիւնք, գովեստք, աւրհնութիւնք եւ ա՛յլ այսպիսի զանազանս, որ կատարի ի փառս Աստուծոյ:

Ահայ այսչափ ամս ծառայեցի քեզ, եւ ոչ երբէք զհրամանով քո զանց արարի, եւ ինձ երբէք ոչ ետուր ուլ մի (հմմտ. ԺԵ. 29):

Գիտա, զի ոչ է անգործ եւ դատարկ Սուրբ Հոգւոց զաւրութեանցն կենցաղք, այլ ունին ի բնութիւնն իւրեանց պատշաճ ծառայութիւն. «Իսկ ուլ մի ինձ ոչ ետուր». վասն զի զենումն ուլոյ հոգւոյ է բանականի, որ բարձրացուցանէ զմեղուցեալն եւ հանէ ի սուրբ կենդանութիւն. եւ ոչ վասն զի ոչ մեղուցեալ երէց որդին, վասն այնորիկ եւ ոչ ուլոյ պիտենայր ի գոհ եւ ի գենումն:

Իսկ յորժամ եկն որդիս քո այս, որ կերաւ զկեանս քո ընդ պոռնիկս ընկալար (հմմտ. ԺԵ. 30):

Բանքս վստահելոյ են յառաջախորհութիւն. «պոռնիկք»՝ զանազան չարութիւնք նիւթական եւ մարմնական կենցաղոյս:

Որդեակ, դու հանապազ ընդ իս ես (ԺԵ. 31):

Վկայութիւն հաւրն, եթէ երբէք ոչ մեկուսացաւ ի բարւոյն:

Ուրախանալ պարպ է եւ խնդալ, զի եղրայրս քո այս մեռեալ էր եւ եկաց, կորուսեալ էր եւ գրաւ» (ԺԵ. 32):

«Մեռեալ»՝ վասն զի զկենարար գոյացութիւնն ցրուեաց, կիւովն անառակութեամբ. «կորուսեալ», վասն զի ըզլայն եւ ընդարձակ ճանապարհն գնայր, գտարաւղն ի կորուստն. իսկ ի մտաւ ամել գալ առ հայրն, կենդանացաւ եւ գտաւ ի բաց եղեալ զմեռելութիւն եւ զկորուստն:

ԻԳՆԱՏԻՈՍ

Ասէ. «Առն միոջ էին երկու որդիք. Ասէ կրփսերն ի նոցանէ ցիայրն. «[Մայր], փո՛ւր ինձ բաժին, որ անկանի յընչիցդ»: Եւ նա բաժանեաց նոցա զկեանսն (Ղուկ. ԺԵ. 11-12):

Դէ՛մք առակիս առ ամենակալ բնութիւն արարչին Աստուծոյ հայր: Իսկ «առն» անուամբ զնա նշանակել՝ կարգ բանին զայն վայելչական ունի, զի որով արժանացոյց զարարածս որդիս անուանել, նովին եւ զչաւրն ամենակատար բարձրութիւնն խոնարհեցուցանէ ի մերս. «Եւ ասէ. «Առն միոջ էին երկու որդիք»: Եւ արդ զո՞րս պարտ է իմանալ «երկու որդիս»: Ոմանց թուեցաւ զարդարս եւ զմեղաւորս ասել, այլ որ զայս ուղիղ զատեցան ասել համաւրէն՝ ի վերայ ամենայն բանիցն կարգաւ ոչ կացին, առ որս պարտ է հայել անվրէպ, զի ամենայն ասացեալքն պատշաճ ունիցին զթարգմանութիւնն: Իսկ առ արդարս եւ մեղաւորս ասել՝ զի՞նչ յայտնութիւն ունիցի այն, թէ՛ երէց որդին յանդաստանէ եկեալ՝ լուաւ զձայն երգոցն եւ բարկացաւ եւ ասելն ցհայրն, թէ՛

«Երբէք զպափուիրանաւ քո ոչ անցի, եւ ուլ մի ոչ ետուր ինձ եւ անառակիդ զեներ զեզն պարարակ» (հմմտ. ԺԵ. 30-31):

Եւ արդ, ո՞վ ոք յարդարոց իցէ, որ ունիցի ասել Աստուծոյ, թէ՛ «Երբէք զպափուիրանաւ քո ոչ անցի»: Զի ահաւասիկ. «Ամենեքեան մե-

ղան եւ նուագեցան ի շնորհացն Աստուծոյ» (Նոմմ. Գ. 23), ըստ առաքելոյն, եւ ամենեքեան կարաւտ էին Քրիստոսի պատարագին եւ ձրի արդարութեանն: Եւ ո՞վ ոք է յարդարոց, որ իւր ոչ համարի զմահն Քրիստոսի, զի ահաւասիկ, որ կարի արդարս պահեցին զանձինս, առանց պարտեաց ոչ են: Նա, զի եւ դատակնիք յանցանացն ի վերայ ամենեցուն անկաւ՝ ըստ այնմ՝ «Թագաւորեաց մահ յԱդամայ մինչեւ ցՄովսէս եւ ի վերայ ցյանցուցելոցն ըստ նմանութեան յանցումոցն Ադամայ» (Նոմմ. Ե. 14): Արդ, «մինչեւ ցՄովսէս» ասելն զայն յայտնէ, թէ անդ զաւրացան խորհուրդք զալստեանն Քրիստոսի եւ բառնալոյ զթագաւորութիւնն մահու: Այլ պարտիքն Ադամայ էր ի վերայ ամենայն ծննդոց նորա, եւ այսպէս Քրիստոս ի վերայ արդարոց եւ մեղաւորաց մեռաւ: Դարձեալ եւս ասելի է, թէ՛ ահաւասիկ Ադամ առաջին մարդն յանցաւոր գտեալ եւ ոչ ունէր զոք երիցագոյն, քան զինքն յարդարութեան կացեալ, եւ զիս՞րդ առ արդարս եւ մեղաւորս այս տեսեալ ստուգութիւն ունի: Ուստի պարտ է մեղ խնդրել զայն, որ առանց ընդդէմ ինչ լինելոյ տայ զիմաստս թարգմանութեան բանին: Արդ, է ասել զայս առանց ամենայն կարծեաց, թէ ըստ որում առաջին աւերինակաւքն հովիւ զանձն եցոյց եւ ոչ խար՝ զհրեշտակս եւ զմարդկան ազգ, եւ ի թուոյ հարիւրոցն, որ կացին յիւրեանց պատիւն, մոլորեալս զմեզ, եւ դարձեալ՝ զրամս տասն, որ ունէր, զնոյն զհրեշտակսն եւ զմարդիկ, եւ ի տասանցն թուոյ՝ կորուսեալ մարդկան ազգ: Ըստ նմին եւ այսու եւս առակաւ պատիւ դնէ ծառայական բնութեանս եւ անուանէ որդիս Աստուծոյ, այնմ, որ արարիչ է բնութեամբ¹: Եւ երէց են հրեշտակք վասն ժամանակին, զի նախ գոյացան, քան զամենայն երեւելի արարածս եւ վասն պատուոյն բարձրութեան, որպէս եւ գրեալ է վասն մարդկան. «Փոքր ինչ խոնարհ արարիւր զնա, քան զհրեշտակս քո» (Մաղմ. Ը. 6, Եբր. Բ. 7): Արդ, զայս առաջի եղեալ՝ ամենայն ինչ յարմար եւ ուղիղ ունի զտեսութիւնն: Արդ, «Ասէ կրօնքն ցհայրն. «Տո՛ւր ինձ բաժին»: Եւ թէ զի՞նչ խնդրեալն իցէ, ոչ եթէ գոյր ինչ ասել, այլ դէմք են առակի: Եւ այսպէս պահանջէ կարգ բանին, վասն որոյ ինքն ըստ որում արար եւ բաժանեաց, որպէս որդւոց. զամենայն ինչ, զոր ստացաւ արարչութեամբ եւ ետ իմանալեացն զիմանալի աշխարհն՝ ի բնակութիւն եւ ի ժառանգութիւն, իսկ զգալեացս մեզ, որոշեաց

¹ ԻՏ բնութեանս

զդրախտն ի բնակութիւն՝ տեղի ամենարարի, անկարաւտ, անմահ եւ անապական: Արդ, զայս ընկալեալ կրտսերոյն յամենառատ պարգեւատուէն՝ ոչ պահեաց, այլ ի կողմն եղեալ նենգաւոր աւձին, կամեցաւ մեծ ինչ ստանալ եւ, զոր ունէրն, կորոյս: Աստուածանալ ցանկացաւ եւ անաստուած կալ ի դրախտին անդ, եւ ի փառացն, զոր ունէր, մերկացեալ գտաւ:

Եւ այս է, զոր ասաց.

Յեզ ոչ բազում ատուրց, ժողովեալ զամենայն կրօնքոյն, գնաց յաշխարհ հեռի (ԺԵ. 13):

«Յեզ ոչ բազում ատուրց» ասէ՛ յայտ արարեալ, թէ ոչ եկաց ժամանակ ինչ յայնպիսի զրգանս վայելչութեան դրախտին փափկութեան, այլ ի սակաւ աւուրս վաղվաղակի անց զպատուիրանաւն: Եւ այս է «գնալն յաշխարհ հեռի», վասն զի չիք ինչ տեղի բնաւ ուրեք հեռի յԱստուծոյ, զի՛ «Թէ ելանեմ յերկինս, անդ ես, - ասէ, - եւ թէ ի դժոխս իջանեմ, եւ անդ մերձ ես, եւ թէ թեւաք թոյցեալ յեզերս ծովու անկանիցեմ, եւ անդ ձեռն քո փրիւր ինձ» (Մաղմ. ԸԼԸ. 8): Վասն որոյ չիք տեղի, որ որոշէ զմեզ յԱստուծոյ բայց՝ ի մեղաց, ըստ այնմ՝ «Մեղք մեր որոշեն ի մէջ ձեր եւ յԱստուծոյ» (Ես. ԾԹ. 2): Արդ, այսպէս աւտարացաւ յԱստուծոյ, որ աստուածանալն կամեցաւ աւձին գործակցութեամբն եւ մերկացեալ ի լուսոյն, որով ծածկեալ էր, ամաւթալից եղեալ, կորանայր եւ ի մէջ ծառոցն ծածկեալ՝ թաքուցանէր զանձն: Աստանաւր հասանէ ի վերայ նորա դատակնիք մահու եւ, մահկանացու լեալ, եկան, արձակեաց զնա ի տեղւոջէ անմահիցն եւ ընկէց ի տեղիս յայս մահկանացուաց, որք ընդ ապականութեամբ անկեալ են: Արդ, յայս անկեալ, ոչ եկաց ի պարտիս առաջին սխալանացն, այլ յաւել եւս անբարշտել առ բարեգործն Աստուած, մինչեւ, ամենայնիւ յիմարեալք ապշութեամբ, անկաք ի մարդկային եւս մտաց: Արդ, զայս եղաք, զի ընդ ամենայն բնութիւնս ծննդոցն Ադամայ, իբրեւ ընդ միում անձին են բանք, վասն խոտորելոյ յուղիղ աւանդիցն, որ զրութեամբ է եւ ունակութեամբ, որով ոչ հնարեցաւ բերել զաւրէնս արարչին: Յաղագս որոյ ասէ.

Անդ վարնեաց զամենայն ինչս իւր, զի կլեյայր անառակութեամբ (ԺԵ. 13):

¹ ԻՏ բաց

«Վարնել ընչիցն»՝ աստուածային շնորհացն բնաւ առ ի նմանէ պակասելն է: Եւ զի զառաջինն թէպէտ եւ ել ի դրախտէն եւ, անմահ գոյով, մահկանացու եղեւ, սակայն մնաց առ նա փայլակն շնորհաց Հոգւոյն, զոր թէ պահեալ էր մաքուր վարուք, երանելի ոմն էր, ըստ որում՝ Աբէլ եւ Ենովս եւ Ենովք եւ Նոյ: Բայց զի անառակ վարուք եւ զայն եւս կորոյս, յաղագս որոյ կարի՝ Հէգ եւ թշուառական գտաւ՝ թափուր յամենարարի պարգեւաց Հոգւոյն:

Եւ իբրեւ սպառեաց,- ասէ,- զամենայն, եղև սով սաստիկ յաշխարհին յայնմիկ (ԺԵ. 14):

«Սպառել զամենայն»՝ է պակասելն ի գործոց բարեաց եւ անկանելն ի շնորհացն Աստուծոյ: Յետ այսորիկ եւ գիտութիւն ճշմարիտ աստուածածանաւթութեանն բարձաւ: Եւ այս է «սովն սաստիկ», զի չիք ինչ այլ սով դառնագոյն եւ տաժանելի, իբրեւ զՀոգւոցն² սով, որ ի պակասութենէ աստուածային գիտութեանն եւ վարուց առաքինութեանն է: Արդ, կարի անհնարին նեղութիւն է Հոգւոցն սով, որ թէպէտ եւ յախտիցն յիմարեալ, կրեն զնա եւ իմանալ ոչ կարեն, սակայն տազնապին անբերելի սովովն հաշտեալք: Վասն որոյ ոչ «սով» սոսկ ասաց, այլ «սով սաստիկ»՝ ըստ այնմ՝ «Տաց ձեզ,- ասէ,- ոչ սով հացի եւ ոչ ծարաւ քրոյ, այլ սով լսելոյ զբանն Աստուծոյ» (Ամովս Ը. 11): Եւ յաղագս այսր սովոյ տազնապի՝ չքաւորեալ յամենապատիկ շնորհացն.

Գնացեալ յարեցաւ ի մի ոմն քաղաքացեաց աշխարհին այնորիկ (հմմտ. ԺԵ. 15):

Ո՞րք արդեաւք իցեն առ որս յարեցաւ. ահա յայտ է այս, զի ի ստոյգ գիտութենէն Աստուծոյ վրիպեալ մարդոյն, յարեցաւ ի դեւսն: Վասն զի այսպէս՝ իբրեւ ախտի մեղաց լցին դեւքն զբնութիւնս եւ խաւարաւն անգիտութեան աւտարացուցին յԱստուծոյ: Սկսան այնուհետեւ պատիր խաբէութեամբ երեւումն տալ արհաւիրաց եւ այլ եւս բազմապատիկ երեւումնս սնոտիս, որով հաւանեցուցին զմարդիկ՝ ծառայել նոցա: Եւ այն, որ ունկնդիր եղեւ՝ ուտել զպտուղ ծառոյն եւ աստուածանալ, ի պաշտաւն առ³ եւ աստուա-

¹ ԻՏ > կարի

² ԻՏ զհոգւոյն

³ ԻՏ էած] առ

ծացոյց զդեւսն՝ արկեալ զանձն ընդ նոցա ծառայութեամբն, որ ի սկզբան անդ թշնամին եւ պատերազմողն էր: Եւ նա անյագ չարութեամբ վարեցաւ առ բնութիւնս մեր եւ զամենայնն եհեղ ի մեզ զբարկութիւն իւր եւ քան զամենայն արարածոցս բնութիւն, կամեցաւ անարգ առնել զմեզ, քանզի առաջին ընդ Աստուծոյ հաստատեաց զանձն ի թշնամութիւն եւ հակառակ Արարչին ամբարձաւ եւ անկեալ ի պատուոյն՝ պատրանաւք եւ զմեզ հաւանեցոյց ընդ իւր անկանել եւ այսպէս տիրեաց բնութեանս մերում: Եւ զի արարիչն փառաց վնասել ինչ ոչ զաւրէր՝ գտեալ զմեզ՝ պատկեր եւ նմանութիւն Աստուծոյ, այնպէս հնարեցաւ ամենայն նախատանաւք եւ զազրալի գործովք թշնամանել զկերպարանն եւ ի խոնարհ ընկենուլ, քան զամենայն անարգս ի կենդանեաց: Զոր աւրինակ՝ ատելի ոք թագաւորի եւ նմին չար ինչ հատուցանել անկարացեալ եւ պատահեալ որդւոյ նորա եւ կամ թէ՛ պատուականի ուրուք ի ծառայիցն, եւ զամենայն, զոր ունի չարութիւն առ թագաւորն, ի նա հնարի թափել եւ նմին իսկ թագաւորին համարի զվնասն: Այսպէս եւ սատանայ, կալեալ ընդ ձեռամբ զմարդն, կամեցաւ մարդոյն թշնամանաւքն նախատել զարարիչն, որ արար զնա՝ իւր պատկեր եւ նմանութիւն: Եւ այս է, զոր ասէ.

Առաքեաց զնա յազարակ իւր՝ արածել խոզս (հմմտ. ԺԵ. 15):

Այս է՝ անմաքուր վարք¹ ամենայն գարշութեամբ անասնոցն վատթար զնացիւքն շաղախեալք, յիմարագոյնք եւ անսուրբք, քան զանասունսն գտաք: Եւ ոչ այսչափ միայն, այլ եւս հիգագոյնս կամեցեալ զմեզ առնել, հաւանեցոյց զզազրագոյնս ի կենդանեաց ի պաշտաւն առնուլ եւ նուէրս եւ զոհս մատուցանել եւ երկիր պագանել, իբրեւ Աստուծոյ եւ արարիչն՝ ըստ այնմ՝ զոր առաքեալն գրեաց առ Հռովմայեցիսն. «Զփոխելն զպաշտաւն արարչին յարարածս եւ գլնուլն ամենայն անարգ եւ աղբիղագոյն ցանկութեամբ եւ գործովք, փոխեցին,- ասէ,- զփառս անեղծին Աստուծոյ ի նմանութիւն պապկերի եղծանելի մարդոյ եւ թոջնոց եւ չորքուրանեաց եւ սողնոց: Վասն այնորիկ մարնեաց գնոսս Աստուած ի միպս անարգութեան, ի պղծութիւն՝ անարգել զմարմինս իրեանց յանձինս իրեանց» (հմմտ. Հռոմ. Ա. 23-4): Եւ զի՞նչ, քան զայսպիսի կիրս ապականութեան եւ խոզարած լինելոյ նշանակ: Արդ, վասն զի յաշխարհի

¹ ԻՏ յանմաքուր վարս

վարս վերջին գործ անպատուութեան է խոզս արածելն¹ եւ ի հոգւոց անմաքուր վարս է այս, զոր ընտրութեամբ առաքելոյն ցուցաք, վասն որոյ յայս հայեցեալ՝ Տէրն մեր ասաց առական, եթէ՝ «Առաքեաց գնա յազարակ իւր՝ արածել խոզս»:

Եւ նա ցանկայր լնուլ զորովայն իւր յեղջերէն, զոր խոզքն ուրէին, եւ ոչ ոք փայր նմա (ԺԵ. 16):

Եւ զի՞նչ արդեաւք իցէ այս կերակուր, զի խոզիցն գոյր առատ եւ ի նմանէ պակասեալ գտաւ: Արդ, վասն զի ասաց, թէ «աստուկացաւ սովն», եւ սովն էր գործոց բարեաց եւ աստուածային շնորհացն պակասութիւն եւ ընդ ամենայն չարեաց կալ ի ծառայութիւն: Արդ, առ այս հայելով, այսպէս իմանամք, թէ անասունք զիւրեանց բնակաւոր շարժումն բնութեանն, զոր բնաւորեաց ի նոսա Արարիչն, պահեցին, այլ մարդկային բնութիւնս եւ գայն եւս կորոյս, զի ունէր մարդն բնութեամբ եղեալ նմա յԱրարչէն՝ ճանաչել զԱստուած եւ սիրել զնա եւ ընտրել զբարին եւ զչարն ի միմեանց: Եւ այս է, զոր ասէ, թէ՝ «Եւ ի խոզիցն կերակրոց պակասեալ գտաւ»: Այն իսկ է, զի գոյ բնական առաքինութիւն յանասուն կենդանիս, որպէս ցուցեալ է ի գրոց վարդապետաց. արագիլ՝ արդար, եւ տատրակ՝ ողջախոհ, եւ եզն եւ էջ ի գովութիւն առեալ են առ չարութեամբն Իսրայէլի (Ես. Ա. 3): Եւ դարձեալ՝ անասունք ճանաչեն զամուսնութեանն սահման, որ առ էգսն է արուացն լինել եւ խնայեն ի ծնունդս իւրեանց, իսկ մարդիկ զայս եւս լքին: Ունէին ճանաչել զԱստուած՝ որպէս եզն եւ էջ՝ զմտուր եւ զստացիչ, եւ ոչ ծանեան (Ես. Ա. 3): Եւ վարել աւրինաւոր մերձաւորութեամբ եւ ոչ կացին ի սահմանս բնութեան, այլ ըստ առաքելոյն. «Աղտեղագոյն եւ գարշ ցանկութեամբ եւ անկարգ խառնակութեամբ անարգեցին զբնութիւնս» (հմմտ. Տոմ. Ա. 24): «Ձի էգք ւնցաւ, - ասէ, - փոխանակեցին զպէրս բնականս ի պէրս անբնականս, նոյնպէս եւ արուացն թողեալ զբնական պէրս իգացն, բորբոքեցան ցանկութեամբ ի միմեանս. արուք ընդ արուս զխայրառակութիւն գործէին եւ զդարձ փոխարինին յանձինս իրեանց ընդունէին» (Ա. Տոմ. 26-27): Ձի չիք ինչ չարիք, քան զայս անաւրինագոյն, որ վատթարէ զմարդ եւ քան զշուն գարշելի առնէ: Է առ այս եւ մծղնէիցն անբերելի անաւրէնութիւն. եւ որ ի պարսս աւրինաւք եղին՝ որդւոյ ընդ

մաւր անկանել, յորմէ եւ ձիգք իգամուրք զգուշանան: Այրեցին եւ զծնունդս իւրեանց ի վերայ բազնեաց առաջի դիւաց, յորոց վերայ անասունք անգամ զանձինս ոչ մատնեն, այլ մարդիկ յաւժարութեամբ զոհեցին զուստերս եւ զգստերս իւրեանց դիւաց: Արդ, այս է կերակուր, զոր խոզքն ուտէին եւ անառակին՝ ոչ էր: Քանզի ի միտս ոք եղեալ յիմաստուն քննողաց, աւրինակ ամենայն բնութեանս անառական առեալ, խորհէր ասել, թէ եւ ոչ իբրեւ զբանաւորս եւ զմտաւորս ունիմք զկերակուր արդարութեան, որով բուծանին անձինք եւ զհաց հաւատոյն, որով հաստատին ոգիքն, գոնէ իբրեւ զանասունս (զոր խոզիւք զեկոյց) պարտ էր ունել զբնակաւորն կերակուր առաքինութեան, զոր եղջերքն եցոյց, զի բնակաւոր կերակուր է խոզից եւ վարիլն աւրինաւք բնութեան ի ցանկութիւնս եւ ոչ չար, քան զգագանսն լինել արտաքոյ բնութեան՝ վարիլ անաւրէն խառնակութեամբ եւ խնայել ի բնութեանս ծնունդ եւ ոչ այրել ի յաւրանալ դիւաց եւ այսու մասամբ անմտանալ, քան զխոզս: Եւ այս է ահա կերակուրն, զոր ուտէին խոզքն, եւ անառակին ոչ ոք տայր: Վասն զի աստուածախաւսութիւնք լռեցին, եւ ուսուցիչ ոչ ոք էր, զի՝ «Ամենքեան խոպորեցան եւ անպիպանացան, ընդ Աստուծոյ եւ իրեշտակք լքին» (Սաղմ. ԺԳ. 3): Եւ այսպէս, պակասեալ ի բարեաց մարդոյն եւ քան զգագանս եւ զանասունս ի բարեաց գործոց աղքատացեալ, որ են կերակուր ոգւոց:

Ասէ ի միփս իւր. «Քանի՞ վարձկանք են ի փան հաւր իմոյ հացալիցք, եւ ես ասար՝ սովամահ կորնչիմ: Յարուցեալ գնացից առ հայր իմ եւ ասացից. «Նայր, մեղայ յերկինս եւ առաջի քո» (հմմտ. ԺԵ. 17):

Առ այս հայելով՝ զարմացեալ եմ ընդ այն, որ գրեաց զսովն պակասութիւն բարեաց, իսկ «զցանկալն եղջերն»՝ ցանկալ մեղաց կարգեալ եցոյց: Արդ, եթէ սովոյն տագնապ արդարութեան նուագութիւն է, ո՞չ ապաքէն մեղացն ցանկալ յաւելուած սովոյ է, եւ ի մեղս գոլով՝ զիա՞րդ ասէ՝ «ոչ ոք փայր»: Եւ թէ զմեղս ցանկայր ունել, զիա՞րդ աստի դառնայ առ հայրն՝ ասել. «Քանի վարձկանք են անդ, եւ ես ասար սովամահ կորնչիմ»: Ո՞չ ահա յայտ է, թէ հացին էր ցանկացեալ, եւ որ զեղջիւրն ոչ ունէր, որով յագէր, յիշեաց դառնալ ի տուն հաւրն, զի հացիւ յագեսցի: Աստի յայտ է, թէ որք զայս ասեն, ինքեանք իւրեանց բանիցն զհետ գնալ ոչ գիտեն: Եւ մի՞ ոք ինձ ընդդէմ դիցէ, թէ զՅովհաննուն յանդգնութեամբ ըստգտա-

¹ ԻՏ խոզարած լինել] խոզս արածել

նեմք զբանս, զի ոչ է Յովհաննու, այլ այլոց ուրումն, որ իւրով անուամբն արդարանալ ոչ ունէր, զնորա անունն առնու՝ հաստատել զիւրն կարծիսն:

Սակայն մեք անդրէն ի մերն դարձցուք աւրինակ բանից, քանզի ի միտս եղեալ անառակին՝ յիշեաց զիւր առաջին բարետոհմութիւնն, զմտաւ ամ եւ զթշուառութիւնն, զոր անառակութեամբն ստացաւ եւ տաղտկացաւ ի զազրալի վարուց անտի, որ եւ քան զխոզսն անմտագոյն եւ գարշ կեանս ստացաւ: Ապա զմտաւ ամ՝ դառնալ յարարիչն: Ծանեաւ ի խնամոց աստի կենացս, թէ զթած է իբրեւ զՀայր (Կրն՝ Առկ. Զ. 36): Զի թէ որք այսքան ի չարիս հարեալ են եւ թիկունս ի նա դարձուցեալ, եւ նա ի բաց ոչ դառնայ, այլ տակաւին եւս այսպիսի նախախնամութեամբ բարեգործէ մարմնոյ՝ առատացուցանելով զպէտս բնութեանս՝ յերկրէ եւ յերկնից զպտուղս եւ զլուսոյ հոսումն եւ զայս՝ չարեաց եղելոց: Քանի՞ եւս ունի բարեգործել հոգեւորապէս դարձելոցն առ նա նովին բնութեամբ: Եւ արդ, ուստի՞ էր նմա այս իմաստք, ասիցէ ոք, արդեա՞ւք յայնմ ժամանակի, յորում այնքան խորին խաւարաւ կռապաշտութեան ընկղմեալք էին: Առ որս պատշաճ է ասել, թէ բնական գիտութեամբն կարող էին մարդիկ զամենայն ինչ ուղղել եւ կալ քննութեամբ ի վերայ գիտութեանն Աստուծոյ: Եւ զայս առաքելոյն յայտնապէս ցուցեալ է. «Գիտութիւնն Աստուծոյ յայրնի էր, - ասէ, - ի նոսա, քանզի Աստուած իսկ յայրնեաց նոցա, զի աներեւոյթ աստուծութիւն նորա ի սկզբանէ աշխարհի արարածովքս իմացեալ Կրեանին եւ ոչ զբանիցն ամենաին՝ Կալ պարասխանի, զի ծանեան զԱստուած եւ ոչ իբրեւ զԱստուած փառաբերեցին կամ գոհացան, այլ նանրացան ի խորհուրդս իրեանց» (Իմմր. Տոմ. Ա. 19-21): Աստի ուսանիմք, թէ ունէին բանական իմաստութիւն, որով զբնութիւն արարածոցս քննեցին եւ զշրջանս լուսաւորացն եւ գտին զբազմազիմի արուեստս եւ զարմանալիս եւ դժուարիմացս: Նովին քննութեամբ եւ իմաստիւք կարէին իմանալ զԱրարիչն ամենեցուն այսոցիկ: Քանզի զիա՞րդ մարդ¹, որոյ այսքան իմաստք ոչ ունէր² կալ ի վերայ արարածոցս եւ ճանաչել զԱրարիչն եւ զնախախնամիչն նոցա: Եւ ո՞վ ոք այնքան անմտագոյն ի մարդկանէ, որ ոչ ունէր իմանալ զպատկերս, զոր արարին

¹ ԻՏ մարդ] մարդ

² ԻՏ ունիլ

մարդիկ¹, թէ աստուածք ոչ են: Եւ զանասունս տեսանէին ընդ չարչարանաւք եւ ընդ ապականութեամբ անկեալս եւ ծառայականս եւ սակաւակեացս եւ վաղամահս, զի են, որք զարմատս երկրի ճարակեն եւ են, որք զմարմին միմեանց որսան, պատառեն եւ կերակուր առնեն, եւ ոչ բան է նոցա եւ ոչ իմաստութիւն, եւ ոչ թէ ունին գիտութիւն՝ բնակութիւն շինելոյ, այլ ծերպ վիմաց է բնակութիւն նոցա եւ թափառեալ շրջին յանձրեւու եւ յարեւու: Դարձեալ եւ լուսաւորացդ պար². թէպէտ եւ են պայծառ եւ ի բարձունս³ կացեալք, սակայն անդադար շրջաբերութիւն նոցա յանդիմանէ զնոսա ծառայական ունել բնութիւն, քանզի զի՞նչն այս Աստուծոյ անկ է, ոչ երբէք ունել զկայ, այլ այնքան արագութեամբ երեւիլ ի ծագս երկրի եւ մեծաւ աշխատութեամբ այնքան վերանալ ի բարձունս եւ վայրաբեր եղեալ՝ անցանեն ընդ ստորին վայրս երկրի եւ անսխալ կատարեն զընթացս: Եւ ո՞վ ոք անգիտանայ, եթէ ոչ է այս սպասաւորութիւն անձնիշխան բնութեան⁴, այլ ծառայական, եւ այլ ոմն է գեր ի վերոյ կացեալ իշխան, որ կառավարէ զնոսա եւ այնքան շտապ տագնապի լուսաւորացդ հասուցանէ: Եւ արդ, այս է առաքելոյն ասելն, թէ՝ «Գիտութիւնն Աստուծոյ յայրնի էր ի նոսա» (Տոմ. Ա. 19): Յայս իմաստ եկեալ անառակն՝ ծանեաւ զԱրարիչն եւ զՀաստիչն ամենեցուն: Արդ, պարտ է մեզ վասն յայտնութեան զմի ոք յարդարոցն, որ ինքնաւրէն իմաստիւք հաւատոց արդարութեան եղեւ գիտակ, ի դէմս անառակին առնուլ: Քանզի անառակ ընդ առաջին մարդոյն ամենայն բնութիւնս ցուցաւ, եւ յորժամ զմի ոք առաջին զնեմք, ի նա նկարեալ է անառակ՝ ամենայն բնութեանս դարձ: Եւ ունիմք առ այս զԱբրահամ, որ ընտրիչ եղեւ ամենայնի այսոցիկ, զոր ասացաք: Հայեցաւ նա ի բնութիւն անասնոց եւ ծանեաւ, թէ անասունք են եւ զքարինս եւ զփայտս եւ զայլ նիւթ երկրի՝ իմացաւ ըստ իւրեանց բնութեանն եւ զլուսաւորս գիտաց վասն սպասաւորութեանն, թէ ծառայք են: Հայեցաւ եւ ի սովամահ բնութիւնս՝ յԱստուծոյ որոշեալ եւ ընդ այսքան զարչելի ախտիւք ամենայն անաւրէնութեան անկեալ: Եւ ետես ի ստեղծուածի բնութեանս, թէ քան զամենայն երեւելիս պատուական է մարդ վասն

¹ ԻՏ մարդիք

² ԻՏ պատ] պար

³ ԻՏ բարձու] բարձունս

⁴ ԻՏ բնութեամբ

մտաւոր եւ բանաւոր բնութեանն եւ անձնիշխան կամացն: Ծանեալ եւ զայն, թէ պիտանի է Արարչին իւրոյ, որպէս պատուեաց եւ զամենայն արարածս կացոյց նմա ի ծառայութեան¹, թէպէտ եւ մարդոյն անմտացեալ ծառայեաց նոցա: Արդ, զայս իմացեալ, խորհեցաւ ազատեալ զանձն իւր ի ծառայութենէ աստի չարեաց (որ սովամահ արարին զբնութիւնս)՝ դառնալ յառաջին ժառանգութիւնն: Վասն որոյ ասէ.

Քանի՛ վարձկանք են ի փան հար իմոյ հացալիցք, եւ ես աստ՝ սովամահ կորնչիմ (հմմտ. ԺԵ. 17):

Եւ ո՞վ ոք վարձկանքն իցեն: Թուի, թէ լուսաւորքդ են, որք կարգեցան յԱրարչէն՝ իբրեւ զվարձկանս ծառայել մարդկան, իբրեւ որդւոց եւ կալ յայնպիսի անյապաղ սպասաւորութեան, որք միշտ անցանելով՝ չափեն զժամանակս, եւ կան յայնքան բարձրութեանն² ջահ լուցեալք ի վերուստ բարեգործեն զերկիր՝ սնուցեալ զպտուղս եւ լուծանել զխաւար: Արդ, այսպէս վարձկանք են, որ վասն մեր կան ի ծառայութեան³ եւ «հացալիցք են», զի գեղեցիկ են պայծառութեամբ եւ անկարաւտք ամենայնիւ: Իսկ մարդկային բնութիւնս յայնքան թշուառութիւն անկեալ եւ խաւարաւ անգիտութեան փակեալ՝ մինչեւ սովամահ կորնչել զյաւիտենական սատակումն: Արդ, յայսմ վտանգի եղեալ, զարթեալ ի թմրութենէ մեղացն եւ ուշաբերաց՝ դառնալ առ բարերար Հայրն, վասն որոյ ասէ.

«Յարուցեալ զնացից առ հայրն իմ եւ ասացից ցնա. «Նա՛յր, մեղայ յերկինս եւ առաջի քո, եւ ոչ եւս եմ արժանի կոչիլ որդի քո, այլ արա՛ զիս իբրեւ զմի ի վարձկանաց քոց» (ԺԵ. 18-19):

Եւ այս եւս խնամք արարչին է, զի այնպիսի արար զբնութիւնս, որ թէպէտ զիւրակործան եմք ի մեզս, սակայն առանց ուսանելոյ ինքնագտակ եմք ապաշխարութեան եւ ապաշաւելոյ, զոր գործեցաք զամբարշտութիւնն, ըստ որում եւ այն տնտես, զոր գովեաց Տէրն՝ «գրկեմ անիրաւութեան, զի իմաստութեամբ արար» (Ղուկ. ԺԶ. 8): Եւ որպէս նինուէացիքն, զի կործանումն միայն լուան ի մարգարէէն եւ իմացան, թէ Աստուած է, որ վասն անաւրէնութեան կորուստ

¹ ԻՏ ծառայութիւն

² ԻՏ բարձրութեամբ

³ ԻՏ ծառայութիւն

սպառնայ եւ վասն ուղղութեան կեցուցանէ: Զսոյն զայս էած զմտաւ Աբրահամ՝ յաւրինակ ամենայն հեթանոսաց հաւատոց եւ փրկութեան, որպէս երախայրիք¹ ընծայեալք Աստուծոյ նշանակեն ամենայն պտղոցն ժողովելոց յշտեմարանս: «Յարուցեալ,- ասէ,- զնացից առ հայրն իմ»: Եւ այս ոչ սոսկ մտածութիւն, այլ որպէս խորհեցաւ՝ զնոյն փութացաւ կատարել.

Յարուցեալ եկն առ հայրն: Եւ մինչդեռ հեռագոյն էր, երես հայրն եւ գթացաւ, յարեալ եւ եկն ընդառաջ, անկեալ զպարանոցան, զիրկս արկ² եւ համբուրեաց զնա (հմմտ. ԺԵ. 20):

Ո՞վ, մեծի մարդասիրութեան Հաւրն, զիա՛րդ ամենաբարի է բնութեամբ: Ո՞վ, որքա՛ն անչափ են խնամքն Քրիստոսի, զիա՛րդ զծածուկ կամս Հաւրն յայտնեաց մեզ եւ ընտանեցոյց զմեզ արարչին՝ որդիս անուանելով, որ եւ ծառայս անուանել ոչ էաք արժանաւորք: Զնա Հայր անուանէ, որ արարիչ է բնութեամբ, եւ որ ինչ Հաւր սեփհական է սիրոյ, զնոյն եւ Արարիչն եցոյց: «Յարեալ,- ասէ,- ի հեռասրանէ րեսեալ՝ ընդ առաջ գնաց»: Ոչ ապաշխարութիւն ինչ, ոչ արտաւար եւ ոչ հառաչանք, այլ միայն զիմեաց գալ, եւ «նա, րեսեալ, ընդ առաջ գնաց, անկեալ զպարանոցան՝ համբուրեաց»: Ոչ զարչեցաւ յաղտեղացելոյն մեղաւք, այն, որ ամենամաքուրն է բնութեամբ: Արդ, այս ամենայն անճառ եւ անքննելի բարեաց տեսութիւն առակաւ ի Տեառնէ ասացեալ, նոյն յայտնապէս կատարեալ առ Աբրահամ ցուցաւ: «Նաւարաց, - ասէ, - Աբրահամ յԱստուած եւ համարեացաւ նմա յարդարութիւն, եւ որ ի հաւարոց անրի են, արինին ընդ հաւարացելոյն Աբրահամու» (հմմտ. Գաղ. Գ. 6-7): Ահաւասիկ, արդարացուցանէ զասիւն՝ «Դարձայց առ հայր իմ»: Իսկ հաւրն ընդառաջ գնալն՝ բազմաւք ցուցեալ է՝ առաջին այն՝ ըստ սրբոյն Ստեփանոսի՝ «Աստուած փառաց երեսցաւ հար մերում Աբրահամու՝ մինչքն րեսեցուցեալ էր զնա ի Խառան» (Գործք Է. 2): Եւ զի՞նչ այլ, քան զայս Հաւրն ընդառաջ լինել անառակին: «Աբրահամ հաւատաց յԱստուած եւ համարեցաւ նմա արդարութիւն» (Գաղ. Գ. 6): Եւ Աստուած, եկեալ առ նա, ասէ, «Ե՛լ յերկրէ քումմէ եւ յազգէ քումմէ եւ ե՛կ յերկիր, զոր ցուցից քեզ» (Ծննդ. ԺԲ. 1): Դարձեալ՝ «Երեսցաւ Աստուած Աբրահամու առ կաղնեան Մամբրէի.

¹ ԻՏ երեսայրիք

² ԻՏ էած] արկ

եւ ընդ առաջ զնաց Արրահամ, երկիր եպագ, ողջոյն ետ եւ համբուրեաց» (հմմտ. Ծննդ. ԺԸ. 2): Ահաւասիկ՝ անկանիւն զպարանոցաւ անառակին եւ համբուրելն, եւ նստելն եւս առ նմա, եւ լուանալն, եւ ուտելն եւս զարմանալի եւ յայտնելն զկործանումն Սողոմայ եւ աւետիք ծնանելոյն զԻսահակ եւ որ այլ եւս աստուածախաւսութիւնք առ նահապետն եղեն: Եւ վկայ են յայտոցիկ խնամոց եւ սիրոյ, զոր առ անառակն եցոյց Հայրն բոլորեցունց: Ասէ անառակն.

«Տա՛յր, մեղայ յերկինս եւ առաջի քո (ԺԵ. 21):

Թէպէտ Հայրն անյիշաչար եղեւ, սակայն նա խոստովանի զյանցանս եւ զստահակութիւնն, վասն զի այս իսկ է յարմար եւ պիտանացու՝ Աստուծոյ թողուլն եւ մեր չմոռանալն զաւրինագանցութիւնն մեր, վասն որոյ ի դէպ է ասել, թէ եւ զայս, եւս բազում հառաչանաւք պաղատեցաւ նահապետն առաջի Աստուծոյ, որ է ասելն. «Մեղայ յերկինս եւ առաջի քո»: Արդ, վասն զի զդէմս Ադամայ եւ ամենայն ծննդոց նորա առեալ ունի նահապետն, ըստ որում եւ ասացաւ, վասն այնորիկ զայն պարտիս խոստովանի, որ Ադամայն է, եւ ի վերայ ամենայն բնութեանս ձգի, ասէ. «Տա՛յր, մեղայ յերկինս»: Զդրախտն կոչեաց «երկինս», յորում առաջին յանցանքն եւ դատապարտութիւնն եղեւ, որով այսքան ապականութիւն հեղաւ ի բնութիւնս մեր, իսկ «երկին» ասել զդրախտն, վասն տեղոյն դրութեան եւ անմահ եւ անապական կենացն է: «Մեղայ,- ասէ,- յերկինս եւ առաջի քո»: Զի ոչ թաքուն եւ անյայտ ուրեք, այլ անզգամութեամբ առաջի ամենատես աչացդ: Նաեւ, զի չէ հնար իսկ թաքչել, բայց կէս վնասու է զարհուրելն եւ թաքուցանել զանձն եւ ամաւթալի համարել զմեղս եւ դողալ ի սպառնալեացն Աստուծոյ եւ կարի անաւրինագոյն է կամակատար մտաւք եւ առանց ամաւթոյ, յանդգնութեամբ եւ արհամարհանաւք գործել զմեղս: Վասն որոյ խոստովանի անառակն, որպէս թէ այսպիսի ոք իցէ.

«Եւ ոչ եմ,- ասէ,- արժանի, թէ կոչեցայց որդի, այլ արա՛ զիս իրբու զմի ի վարձկանաց քոց» (հմմտ. ԺԵ. 19):

Արդարեւ այսպիսի միտս ունել յանցաւորաց, թէպէտ ի խնամոցն Աստուծոյ արժանաւորին թողութեան, սակայն զանձինս առ յանցաւորս¹ պարտ է ունել եւ ի չափու կալ եւ չմոռանալ զմեղսն,

¹ ԻՏ յանցաւորս] պարտաւորս

այլ յիշատակաւ մեղացն խոնարհել: Զի որչափ մեք անարժան զանձինս համարիմք եւ ի խոնարհ ընկենումք, նա ի վեր տանի, եւ որչափ ամբառնայ ոք, նա ի խոնարհ ընկենու: Ըստ որում եւ աստ է տեսանել զյանցաւորն, ասէ.

Արա զիս իրբու զմի ի վարձկանաց [քոց]» (ԺԵ. 19):

Իսկ հայրն ասէ ծառայիցն. «Տանէ՛ք զպապմուճանն առաջին եւ ազուցէ՛ք [նմա]» (ԺԵ. 22):

Զի զայն, որ մերկացաւ անհնազանդութեամբն, վերստին զգեցցի հնազանդութեամբն: Բայց առ այս որպէ՞ս աւրէն է զկարգ բանիս յառաջ վարել, իցէ՞ արդեաւք ասել, եթէ յառաջ քան զիսաչն զձեռագիր պարտեացն Ադամայ այլ ոք պատառեաց կամ հանդերձ մերկութեան նորա զգեցոյց: Եւ արդ, եթէ գոյր հատուցանել ուրուք զայս, ապա զիս՞րդ կարաւտացաք Աստուծոյն մարդանալոյ եւ մեռանելոյ: Նախ՝ զի անկելոյն ի ձեռս աւագակացն չէր ոք, որ աւգնէր, մինչեւ նա եկն, որ Սամարացի զանձն անուանեաց (Կրէս Դուկ. Ժ. 29-37): Վասն որոյ, զի ուղիղ ի վերայ խորհրդոյն հաստատեցուք գտեսութիւն բանիս. աւրէն է այսպէս ճշմարտել զբանս եւ զիտել, թէ նախքան զիսաչն ամենեքեան ընդ պարտեաւք էին՝ ըստ առաքելոյն. «Թագաւորեաց մահ յԱդամայ մինչև ի Մովսէս եւ ի վերայ ջանցուցելոյն» (Նոմ. Ա. 14): Արդ, այս է մեզ հաստատուն նշանակ, զի խորհուրդ մահուն Քրիստոսի նախ ժամանեաց, արդարացոյց զարժանիսն ոչ եթէ կատարեալ փրկութեամբ, այլ զառհաւատչեայն փրկութեան, ըստ որում եւ մեք Քրիստոսիւ յուսով ապրեցաք: Այսպէս եւ արդարքն անվրէպ վստահացեալք աւագանիս շնորհաց, զգեցան խորհրդեամբ զմաքրութիւն՝ աւրինակաւ պատմուճանին առաջնոյ, զոր հրաման ետ զգեցուցանել: Եւ այսպէս առ յապայ ամենայն ինչ, որ կատարեցաւ Քրիստոսիւ, ցուցաւ առ նոսա՝ ըստ առաքելոյն. «Այն ամենայն,- ասէ,- արինակաւք ընդ նոսա անցանէր, եւ գրեցաւ ի մեր վարդապետութիւն» (հմմտ. Ա Կոր. Ժ. 11):

Արդ, վասն զի պարտ էր խորհրդոյ տնարէնութեանն հաստատագոյն լինել, այն, որ կարի դժուարին է հաւատալ վասն ահաւորութեան խորհրդոյն, վասն այնորիկ կանխեաց, յառաջագոյն արդարացոյց զորս ընտրեցան եւ առ նոսա աւրինակաւք զտնարէնութեան խորհուրդն տպացոյց, զմարգարէսն զարմացոյց, որք ընկալեալ զխորհուրդ փրկութեանն, աւետեաւք զարթուցին զամենայն հոգիս՝ զուարճանալ յուսովն եւ խրոխտալ ի վերայ բռնու-

թեանն մահու: Վասն որոյ եւ Ենովք առաջին զաւրացաւ՝ լուծանել զմահ, եւ յԱբրահամէ եւս յաճախեցին խորհուրդք՝ քարոզել զայս զաւրութիւն աստուածային մատակարարութեանն, որով ելոյծ զմահ եւ երարձ զկնիք դատապարտութեան մերոյ: Ուստի եւ առ նա պատշաճի առակիս բան, զի ասացաւ՝ Հանել զպատմուծանն առաջին եւ զգեցուցանել նմա, ըստ որում եւ «գեզն պարարակ-ասաց,- զենուլ» (հմմր. ԺԵ. 23): Եւ ոչ ի նմին գենեալ էր, այլ խորհրդեամբ զենաւ վասն վստահացեալ յուսոյն: Նոյն աւրինակաւ զգեցան արդարքն զգեստ անապականութեան զՔրիստոս յուսով խոստմանն, ըստ որում եւ մեք ոչ եմք մատուցեալ ի լեռոն շաւշափելի, այլ յիմանալի լեռոն եւ ի բիւրաւոր բանակս Հրեշտակաց եւ յողիս արանց¹ կատարելոց եւ առ դատաւորն ամենեցուն Քրիստոս, եւ տակաւին եւս յաշխարհի եմք, բայց հաւատովք ունիմք զպարգեւսն: Եւ ի հակառակէն դարձեալ ասացաւ Ադամայ. «Յաւուր յորում ուրիցես, մտանիցիս» (հմմր. Ծննդ. Բ. 17): Եկեր եւ մեռաւ զաւրութեամբ, թէպէտ եւ ոչ ազդամբ: Ըստ այսմ աւրինակի առցես զառաջնոցն՝ զգենուլ զպատմուծանն առաջին: Այլ առանց Քրիստոսի եւ ոչ մի ինչ բնաւ արդիւնք ուրուք ելից, զի ամենեքեան ի դժոխս արգելեալ, փակեալ էին ընդ իշխանութեամբ մահու: Վասն այնորիկ աղաղակէին. «Ջարթ՝ զգարութիւնս քո եւ եկ ի կեցուցանել զմեզ: Եւ ինքն Տէր կկեսցէ եւ փրկեսցէ զմեզ» (հմմր. Ես. ԼԵ. 4):

Արդ, զայս այսպէս դատեալ՝ ժամ է ի նոյն ինքն յառաջինն մեր դառնալ բանս, այն, զի հրաման ետ հայրն զգեցուցանել զմերկացեալ որդին առաջին պատմուծանաւն: Եւ արդ, որո՞ց հրաման տայ ծառայիցն՝ զգեցուցանել զպատմուծանն, զոր մերկացաւ անհնազանդութեամբն, եւ ոչ միում երբէք, զի ինքն միայն է զգեցուցանաւ: Եւ այն զի՞նչ իցէ, զի ասէ. «Նանէ՞ք զառաջին պարմուծանն եւ զգեցուցէք»: Դէմք են, որով յաւզանայ ձեւ կերպարանաց առակաւոր բանից², զի ըստ աւրինի թագաւորաց պաշտաւնէիւք վճարէ: Բայց ամենակատար բնութիւնն ոչ է կարաւտ սպասաւորաւք վարել, այլ հրամանաւ լնու, յոր փութայ: Ապա թէ պարտ ոք վարկցի զառաքեալսն առաջի դնել, որոց ասաց. «Երթայք, աշակերպեցէք զհեթանոսս, զգեցուցէք յանուն Նար եւ Որդոյ եւ Սուրբ Նոյն» (հմմր. Մատթ. 23):

¹ ԻՏ > արանց
² ԻՏ փառաւոր բանիս] առակաւոր բանից

ԻԸ. 19): Բայց ընդդէմ կայ այսոցիկ այն, զի եւ նոքին իսկ առաքեալքն ի մերկացելոց աստի են եւ կարաւտ, զի զգեցցին: Եւ զայս վասն վայրապարացն արգելաք: Ապա թէ ոչ, չեն¹ ինչ ի հակառակացն (մինչ զի եղծանել զբանս տեսութեան առակին), եթէ զգեցան ի Տեառնէ եւ զգեցուցին զտիեզերաց մերկութիւնն՝ սպասաւորք աստուածայնոցն լեալ տեսութեան ի ձեռն աւագանին շնորհի:

Եւ յետ զգեցուցանելոյ, ապա յաւելու, զի մատանի դիցէ ի ձեռինն (տնս Ղուկ. ԺԵ. 22), զի ամենայնիւ շքեղացի անկեալն ի շնորհաց՝ ըստ այնմ, զոր Եսայիաս ետես զառաւելութիւն պարգեւացն եւ ուրախացեալ ասէ. «Յնծացէ անձն իմ ի Տէր, զի զգեցոյց ինձ հանդերձ փրկութեան եւ պարմուծան ուրախութեան. իբրեւ փեսայի, եղ ինձ պսակ եւ իբրեւ հարսն, զարդու զարդարեաց զիս» (Ես. ԿԱ. 10):

Չայս աւրինակ զարդու եւ աստ՝ անառակն զգենու:

Դիք,- ասէ,- մաքանի ի ձեռս դորա (հմմր. ԺԵ. 22):

Նոյն տեսութիւն է բանիս, որպէս այն, որ զկորուսեալ դրամն խնդրեաց զթագաւորական պատկերն: Եւ աստ մատանի տուեալ լինի, զի քանդուածով ականն, զնոյն թագաւորական պատկերն նշանակէ, զոր դարձեալ դրոշմէ ի նա զտիպս թագաւորական կնքոյն:

Ագուցէք,- ասէ,- եւ կաւշիկս յոքս դորա (հմմր. ԺԵ. 22):

Որպես զի ամրացեալ համարձակ լիցի կոխել զգլուխ կամակոր աւձին, այն որ ի սկզբան անդ հրաման առ սպասել եւ հարկանել զգարչապարս մեր: Արդ, զգեցուցանէ կաւշիկս եւ իշխանութիւն տայ՝ կոխել զաւձս եւ զկարիճս եւ զամենայն զաւրութիւնս թշնամուոյն (տնս Ղուկ. Ժ. 19): Եւ այսպիսի թագաւորական պատուով պատուեալ՝ ապա խրախուսնս առնէ.

Աձէք,- ասէ,- զեզն պարարեալ, զենէ՞ք, զի կերիցուք եւ ուրախ լիցուք (հմմր. ԺԵ. 23):

Ո՛վ մեծի խորհրդեանս² եւ զարմանալեաց, որ բաւական է հիացուցանել եւ զյոյժ թանձրագոյնսն մտաւք: Եւ արդ, ընդ ո՞ր առաւել ոք սքանչացի. ընդ Հա՞ւրն, որ վասն անառակ ծառա-

¹ ԻՏ չէ] չեն
² ԻՏ խորհրդեանն

յիցս փրկութեան զստոյգ եւ զսիրելի Որդին, իբրեւ զգուարակ, ի զենումն տայ՝ ոչ ի հարկէ եւ ոչ բռնադատեալ եւ ոչ տրտմութեամբ, այլ ուրախութեամբ: Ասէ. «Կերիցուք եւ ուրախ լիցուք»: Եթէ ընդ Որդւոյն, որ զայս ամենայն առակաւ առաջի դնէ լսողացն վասն անձին իւրոյ զենման՝ յուրախութիւն եւ ի կերակուր ապստամբացս, այսպիսեալք եւ Եսայիաս մարգարէանայ վասն նորա. «Իբրեւ ոչխար,- ասէ,- ի սպանդ վարեցաւ, իբրեւ զորոջ առաջի կտրէի անմոռէ կայ» (Ես. ԾԳ. 7): Եւ թէ՛ «Տէր մարնեաց գնա առ մեղս մեր» (հմմտ. Ա Պետ. Գ 18, Ա Յովհ. Դ 10): Եւ աստ ասէ. «Աձէք զեզն պարարակ». այս է մարմինն, զոր ի մէնջ էառ՝ պարարեալ աստուածային բնութեամբն եւ վասն մեր զենեալ: Եւ այս եւս տպացաւ առ նահապետաւն, յորում պատարագեալ եղեւ Իսահակ եւ ի նմա տեսանէր զչարհարանս անչարհարելոյն եւ զպատարագելն անպատարագելի գառինն, որպէս ասէ, որ ասացն: «Արդ, այս ամենայն եղև հաճութեամբ Հարն» (հմմտ. Եփես. Ա 9), յաղագս որոյ ասէ.

«Կերիցուք եւ ուրախ լիցուք: Զի այս որդի իմ մեռեալ էր եւ եկաց, կորուսեալ էր եւ գտաւ» (ԺԵ. 23-24):

«Մեռեալ էր», ասէ: Կարի անբերելի եւ դառնագոյն մահ այն, որ մեղացն է եւ զճշմարիտ կեանսն սպանանէ եւ կորուսանէ, եւ կարի տաժանելի կորուստ այն, որ հոգւոցն է ապականութիւն եւ ի զեհեհեհ անդ: Ըստ նմին եւ կենդանութիւն կարի զարմանալի՝ աստուածային եւ յաւիտենական կենդանութիւն: Նոյնպէս եւ գտանելն առ Աստուծոյ եւ ի յարկան յաւիտենից, որոյ ուրախութիւնն անփոխանորդելի է: Արդ, վասն այսր մեծի փրկութեանս, որով ամենայն ազգ ընծայեցան Աստուծոյ Հաւր ի ձեռն Որդւոյն միջնորդութեան եւ պատարագին, որով եհեղ զարեւնն իւր ի վերայ ամենայն ծննդոցն Ադամայ: Ուրախացաւ Հայրն եւ ուրախացոյց զամենեսեանն, վասն որոյ ասէ¹. «Սկսան ուրախ լինել» (ԺԵ. 24):

Եւ էր,- ասէ,- երէց որդին յագարակի, եւ մինչդեռ գայր եւ մերձ էր ի փունն, լուաւ զձայն երգոցն եւ զպարուցն: Եւ կոչեցեալ զմի ի ծառայիցն, հարցանէր, թե՛ զի՞նչ իցէ այն: Եւ նա ասէ. «Զի եղբայր քո եկեալ է, եւ հայր քո եզեն զեզն պարարակ, զի ողջամբ ընկալաւ զնա» (հմմտ. ԺԵ. 25-27):

¹ ԻՏ > աստ

Զիմանալեացն բնութիւն եւ բնակութիւն թանձր աւրինակաւք յաւրացուցանէ, որպէս աւրէն էր ունել հաղորդութիւն առակին առ ճշմարտութիւնն: Արդ, ասէ. «Զերէց որդին եկեալ յանդաստանէ», եւ այս յաւրեալ բան միայն զայն ունի նշանակ, զի մերձ ոչ էր եւ ոչ տեղեակ խորհրդոյն: Եւ այս ահա յայտնի է, որպէս ուսաք, զի այս խորհուրդ փրկութեան ծածկեցաւ յիմանալեացն, որ մերձ են առ Աստուծոյ՝ ըստ առաքելոյն, որ ասէ. «Խորհուրդն, որ ծածկեալն էր յախրեանց եւ յազգաց, այժմ յայտնեցաւ ի ձեռն եկեղեցոյ» (Կող. Ա 26): Եւ թէ՛ «Յայտնեցի արդ իշխանութեանց եւ պետութեանց ի ձեռն եկեղեցոյ բազմապարիկ իշխանութիւն Աստուծոյ» (Եփես. Գ 10): Եւ թէ՛ այժմ ուսան զայս խորհուրդ, այսպիսեալքս ցուցեալ է ըստ առաքելոյն եւ ըստ առակիս տեսութեան, զի յորժամ այս ամենայն անքննելի աստուածային տեսութեան խորհուրդ կատարեցաւ յերկրի, եւ մարդկան ազգ մաքրեալք հոգւոյն որդեգրութեամբն ընծայեցան Աստուծոյ եւ պար առեալ յեկեղեցիս՝ մարդիկ, որ դիւաց էին պաշտաւնատարք, ընդ հրեշտակս երգեն աւրհնութիւնս Աստուծոյ՝ գոհանալով զանչափ պարգեւացն նորա եւ վայելին ի մարմնոյ եւ յարենէ Որդւոյն Աստուծոյ եւ աղաղակեն ըստ առաքելոյն եւ ասեն հոգւովն՝ Աբբայ, Հայր: Եւ Հոգին, որ ի մեզ հեղաւ, վկայէ, թէ՛ եմք որդիք Աստուծոյ (Նոռմ. Ը. 15-16): Արդ, զայս լուեալ վերնոցն զարմացեալք, անգիտանալով զխորհուրդ փոփոխմանն յանկարծաւրէն, վասն որոյ հարցանեն զներքին դասն, զի նոքա առաքեցան յերկիր ի մարդկան սպասաւորութիւն, եւ նոքա որպէս էին խորհրդազգացք, պատմեն նոցա զտնաւրէնութեան խորհուրդն, վասն զի Գաբրիէլ նոցա դասապետ էր, որ զաւետիսն Մարիամու ետ եւ Զաքարիայ: Եւ ի ժամանակի ծննդեանն բազմութիւն երկնաւոր զաւրացն, որք աւրհնէին զԱստուած վասն անճառելի խորհրդոյն, յայնմ դասէ էին: Արդ, թէպէտ եւ այս այսպէս արդարացեալ է, բայց ինձ կարի յարմար թուի զհետ զնալ ժամանակին եւ իրացն կատարման, որ ըստ տեսութեանն¹ կարի յարէ ի ճշմարտութիւնն: Վասն որոյ ունիմք զայս տալ ժամանակ ի վերանալոյն, զի իբրեւ եմուտ ի յերկինս աւրհնութեամբ հրեշտակացն, որք յուղարկէին զնա եւ մերձեցաւ յառաջին դասն, որ տեղեակ էին ամենայնի, մեծաւ ցնծութեամբ ընդ առաջ եղեն անթիւ բազմութիւնն այն եւ սկսան մեծաձայն

¹ ԻՏ տնտեսութեանն] տեսութեանն

ուրախութեամբ աւրհնել զանճառելի խորհուրդն, վասն զի տեսին մարմնով զայն, զոր ոչ երբէք տեսին ըստ աստուածութեանն: Եւ այնչափ բազմութիւնն՝ շարժեալք յիւրեանց՝ կարգեալ կայանիցն, յուղարկէին զնա աւրհնութեամբ: Իսկ վերինքն, որ բնաւ անգէտք էին իջանելոյ նորա յերկիր եւ մարդանալոյն, տեսեալ զնա մարմնով ի վեր երթեալ եւ լուեալ զանսովոր ճայն հնչման աղաղակին առաջին դասուն, որք զիւրեանցն թողեալ տեղի դասուն՝ ընդ նմա գային աւրհնութեամբ եւ ի սքանչման եղեալ, սկսան եւ նոքա աղաղակել, որպէս ցուցանէ մարգարէութիւնն Եսայեայ. «Իսկ այս ո՞վ է, - ասէ, - որ դիմնալ գայ յեղովմայ եւ կարմրութիւն ձորձոց իրոց ի բոտրայ» (Ես. ԿԳ. 1): Սկսանի ինքնին տալ զպատասխանին, վասն զի յառաջ գնայր քան զհրեշտակսն, որ ընդ նմայն էին, եւ ասէ. «Ես խաւսիմ զարդարութիւն եւ իրաւունս փրկութեան» (Ես. ԿԳ. 1): Ի գործոյն զինքն յայտնէ եւ ոչ ի բնութենէ պատուոյն: Վասն որոյ անգիտացեալ իշխանութեանցն՝ տակաւին եւս համարձակ իբրեւ ընդ մարդոյ խաւսին եւ ասեն. «Վասն է՞ր են կարմիր ձորձք քո եւ հանդերձք քո իբրեւ հնձանահարի» (Ես. ԿԳ. 2): Եւ զայլն եւս հարցաքննութիւն, որ ըստ Եսայեայ ի կարգին, յորում պատասխանեաց նոցա եւ թէ ո՞վ իցէ զբնութիւնն՝ ոչ յայտնեաց, այլ զոր, ինչ գործեաց զփրկութիւնն առաջի եզ՝ նման հաւրն բանից, յորժամ ասէր թախանձանաւք.

«Այս եղբայր քո մեռեալ էր եւ եկաց, կորուսեալ էր եւ գտաւ» (ԺԵ. 32):

Ըստ նմին եւ Յիսուս զնոյն առաջի դնէ հարցաքննողացն զթշուառութիւն եւ զկորուստ մարդկան, ասէ. «Եւ զի ոչ ոք էր, որ փրկէր, հայեցայ, եւ ոչ ոք էր, որ ի թիկունս հասանէր: Ապա ողորմեցայ կորուսելոյն, հնձան հարի զթշուառին եւ գտի զկորուսեալն եւ կենդանացուցի զմեռեալն» (հմմտ. Ես. ԿԳ. 5-6): Իսկ ներքին դասն, որ ընդ նմա գային, իբրեւ տեսին, թէ անգիտութեամբ իբրեւ զմարդ ոք հարցաքննեն զնա, ասեն մեծաձայն աղաղակաւ՝ իբրեւ սաստելով իշխանութեանցն. «Նամբարձէք իշխանք զորունս ձեր ի վեր, եւ մտցէ թագաւոր փառաց» (Մաղմ. ԻԳ. 7): Այսինքն՝ թոյլ տուք, ի բաց կացէք, ճանապարհ արարէք, զի մտցէ թագաւոր փառաց²: Եւ յայտնիկ եւս ի հիացման եղեալ՝ զարմացան, վասն զի ոչ գիտէին նոքա զոք մարմնով թագաւոր փառաց,

¹ ԻՏ յիւրաքանիւր] յիւրեանց

² ԻՏ Որդի Աստուծոյ] թագաւոր փառաց

որ տյնպիսի բուռն զաւրութեամբ մտանէր յերկինս: Եւ այսպիսի նոր եւ զարմանալի տեսութեան պատահեալ՝ ասեն. «Ո՞վ է սա թագաւոր փառաց» (Մաղմ. ԻԳ. 8): Ապա ներքինքն ասեն. «Տէր զարութեանց, սա ինքն է՞ թագաւոր փառաց» (Մաղմ. ԻԳ. 10): Տէր զաւրութեանց, որ յատուկ Աստուծոյ է: Եւ զայս լուեալ՝ բնաւ ապշեցան, զի ոչ կարացին կալ ի վերայ խորհրդոյն, միայն լուեալ զաղաբեցին, զի մարդ տեսանէին եւ լսէին Տէր զաւրութեանց եւ թագաւոր փառաց: Եւ զայս նոքա ասէին, որ ներքին, քան զնոսա էին, եւ նոցա գիտութեանն կարաւտ: Եւ այսպէս, ի հիացման եղեալ, կային՝ տեսանել, եթէ զի՞նչ կամիցի լինիլ այն: Իսկ յորժամ տեսին, թէ էանց ընդ ամենայն դասս իշխանութեանց եւ պետութեանց եւ տէրութեանց եւ ել ի վերոյ, քան զամենայն երկինս եւ եմուտ ի ներքին կողմն վարագուրին եւ նստաւ ընդ աջմէ մեծութեան ի բարձունս, իբրեւ յիւր սեփհական աթոռ: Ապա սկսան հարցանել զներքին դասն, զի ուսցին ի նոցանէ: Եւ այս է երէց որդւոյն կոչել զմի ի ծառայիցն եւ հարգանել: Պատմեն ապա զամենայն ինչ ստուգութեամբ՝ զիջանելն յերկնից, զբնակելն յորովայնի կուսին, զառնուլն մարմին եւ միաւորել ընդ աստուածութեանն եւ աստուածանալ մարդոյն եւ մարդանալն Աստուծոյ եւ տալ զանճն ի չարչարանս վասն մարդկան եւ արդարացուցանել եւ առ ինքն ժողովել զզիւաց սպասաւորսն: Արդ, սոքա, որք շրջին ընդ մարդկան, զայս լուան ի մարգարէիցն եւ ուսան ի յելից խորհրդոյն, որ կատարեցաւ ի մէջ մարդկան եւ ուսուցին զվերին դասապետութիւնսն: Եւ այսպէս ճշմարտեալ է Պաղոսի ասելն՝ «Յայտնեցի իշխանութեանց եւ պետութեանց ի ձեռն եկեղեցւոյ բազմապատիկ իմաստութիւնն Աստուծոյ» (հմմտ. Եփես. Գ. 10): Արդ, այս անբաւ խնամք Աստուծոյ առ մարդիկ, իբրեւ յայտնեցաւ իշխանութեանցն, կրեցաւ ի նոսա այսպիսի ինչ, զոր ասաց Տէրն.

Բարկացաւ եւ ոչ կամէր մտնել (ԺԵ. 28):

Մարդկաւրէն ձեւացուցանէ զբանն, ապա թէ ոչ՝ այս յայտնի է, զի ահիւ եւ զողութեամբ կան առաջի Աստուծոյ, եւ ոչ է բնաւ համարձակելի նոցա՝ խաւսել ինչ առաջի Աստուծոյ, այլ վասն զի իմացան զայս, եթէ զբնութիւն մարդոյ միաւորեաց ընդ իւրում աստուածութեանն, եւ նստաւ աստուածացեալ մարդն ընդ աջմէ Աստուծոյ եւ նմա կրկնի ամենայն ծուր երկնաւորաց եւ երկրա-

ւորաց (տինս Փիլ. Բ. 10): *Ծանեան, թէ ի վեր անց մարդկան ազգ քան զնոսա, զի ի բուն իսկ յերկինս եւ ոչ մի ոք յիմանալեացն եմուս՝ ըստ այնմ.* «Ոչ որ ել յերկինս, եթէ ոչ որ էջն յերկնից» (Յովհ. Գ. 13): *Եւ որպէս խոստացաւ առաքելոցն, թէ՛* «Ուր եսն եմ, եւ դուք անդ ընդ իս իցեք» (Յովհ. ԺԴ. 3): *Եւ առ Հայր կարգալով, զայս աղաւթէր.* «Կամիմ,- ասէ,- զի ուր ես եմ, եւ սոքա անդ ընդ իս իցեն, զի տեսանիցեն զփառս իմ» (Յովհ. ԺԷ. 24): *Արդ, յայս բարձրութիւն մտին մարդիկ՝ խաղալիկքն դիւաց, որ հրեշտակաց անգամ անմտանելի է, ախտացան ստուգապէս, զի կրի եւ ի նոսա այս ախտ, որ առ մեզ ոգւոց միայն է, եւ է այս նախանձ եւ փառասիրութիւն եւ ամբարտաւանութիւն, բայց ոչ զաւրանայ՝ բռնանալ եւ նեղել զնոսա, որպէս եւ զմեզ: Վասն որոյ ի դէպ է ասել զայս, թէ ախտացան, զի յայնպիսի պատիւ բնութիւն նոցա ոչ ել եւ որչափ եղեն, այլ ինչ յաւելուած պատուոյ ոչ առին: Եւ այս է ասելն.*

Այս քանի ամբ են, զի ծառայեմ քեզ եւ երբէք զպարուիրանալ քո ոչ անցի. եւ ուլ մի ոչ եպուր ինձ, զի ուրախ եղեց ընդ բարեկամս իմ: Իսկ յորժամ այս որդի քո եկն, որ անառակութեամբ ծախեաց զամենայն ժամանակն, զեներ դմա զեզն պարարակ (հմմտ. ԺԵ. 29-30):

Արդ, ոչ եթէ զայս ասել ոք բաւական է, այլ միայն խորհեցան ախտիւ նախանձուն, այլ Հայրն բոլորեցունց մեծաւ խնամակալութեամբ սփոփանս բանից մխիթարութեան առաջի դնէ եւ նոցա:

«Որդեակ,- ասէ,- դու հանապազ ընդ իս ես: Եւ որ ինչ իմ է, ամենայն քո է» (հմմտ. ԺԵ. 31):

Ըստ առաջին տեսութեան, որպէս ցուցաւ, թէ յաւելուածք են բանից մարմնաւորացս կրից, որ առաջնորդութիւն տան յիմանալեացն տեսութիւն, այսպիսեաւքս չափել զնոցայն եւ որպէս պատշաճ է իմանալ վասն նոցա, զի են անկարաւտ բնութեամբ եւ յայնքան բարձրութեան կացեալ եւ ոչ յախտալից եւ ոչ տխրական ինչ կեանս կամ հարկեցուցիչ ի մեղս: Եւ զայս ամենայն մեծութիւն պատուոյ ոչ արեամբ եւ ոչ ճգամբք կամ տաժանելի կրիւք ստացան, այլ ընդ ստեղծուածին՝ յամենառատ պարգեւատուէն ճրի շնորհ ընկալան: Իսկ հէք եւ թշուառական մերս բնութիւն ընդ թանձրագունի եւ վայրաբեր մարմնոյ կապեալ, եւ աւրէնք բազ-

մապատիկ ըստ ախտիցն չափեալ, եւ բնութիւնս պատերազմող, եւ հակառակ մեզ կացեալ, եւ աւճն խաբող, եւ յիմարութիւնն անտեղի¹, եւ ցանկութիւնն ձգող, եւ կարիքն հեշտութեամբ ըմբռնող, եւ գրգռիչն շարժող, եւ որ տիրեացն, մեծաւ բռնութեամբ կապեաց, եւ կուրութիւնն զգուռն փակեաց, եւ անգիտութիւնն զճանապարհն կորոյս, եւ հիւանդութիւնն զիմաստութիւնն ելոյժ եւ թմրութիւնն զխորխորատն ծածկեաց, եւ կամքն զտեսութիւնն կապեաց եւ լուծիչն այսոցիկ կարի ծանր եւ տաժանելի՝ արիւն, քիրտն եւ ապաժոյժ սով եւ մերկութիւն, արտաւար եւ հառաչանք, բանտ եւ կապանք, քերանք եւ նախատինք, տքնութիւն եւ գետնախշտի լինիլ: Եւ զի՞նչ եւս զամենայն յաւելից զվիրացն զբժշկիչ պատուիրանն, յորմէ յամենեցունց յայսցանէ ազատ են իմանալիքն, որով աւրէն էր արդարազատ Հաւրն դատել զերդայրն դատիչ կորուսելոյն եւ զանձն ազատել յանիրաւ կարծեաց: Առ այս, զի եւ հաւասար արարիչ, կամ թէ Հայր համարձակելի իցէ ասել, որ այսպէս կապեաց եւ այնպէս ազատս եթող, այլ վասն զի գթած է, խնայէ, զի մի դժուարեացի յանդիմանութեամբն, եւ այլովք տայ զիրաւունս:

Մեռեալ էր,- ասէ,- եւ եկելաց, կորուսեալ էր եւ գրաւ (ԺԵ. 32):

Ո՞վ ոք այնպէս խիստ եւ վայրագ իցէ, որ ոչ խնդայ ընդ այն, յորժամ ի մեռելոց զոք տեսցէ եւ կամ զկորուսեալն գտցէ: Յայս միտս հայի եւ այն, զոր Տէրն առ փարիսեցիսն ասաց. «Ոչ են,- ասէ,- պիտոյ բժիշկ ողոց, այլ հիւանդաց» (հմմտ. Մարկ. Բ. 17): *Այսպէս եւ աստ ցուցանէ զպատարագելն Որդւոյ, զի գնեսցէ զմեզ արեամբ խաչին, եւ այս գերելոցն պէտք են եւ պատշաճ, եւ ոչ նոցա, որ մնացին յիրեանց պատուին եւ պայծառութեան: Նոյնպէս եւ ուրախանալն, զի որպէս վասն մեռանելոյն եւ կորստեանն՝ տրտմութիւն, այսպէս եւ ի յառնելն եւ ի գտանելն՝ ուրախութիւն:*

ՍԱՐԳԻՍ ԿՈՒՆԴ

Առն միոջ էին երկու որդիք (Ղուկ. ԺԵ. 11):

Զի զամենայն, ինչ Քրիստոս անձամբ վճարեաց, զխնամս գթութեանն եցոյց: Զի գնաց զհետ մոլորեալ ոչխարին եւ եգիտ զպատ-

¹ ԻՏ տեղի] անտեղի

կերն թագաւորական, զի մի՛ Որ[գ]ոյ միայն շնորհակալ լիցին ար[ար]ածք ամենայն: Յուցանէ աստ զՀաւր սեփական խնամակալութիւնն, քանզի նա հաճեցաւ Որդոյն միջնորդութեամբ, որ պատարագեցաւ վասն մեր:

Առն միոջ էին երկու որդի[ք] (ԺԵ. 11):

Պատիւ դնէ ծառայական բնութեանն եւ արարիչ բնութեանն: Երէց են հերշտակք, զի յառաջնում աւուրն գոյացան, յորժամ ասաց Աստուած. «Եղիցի լոյս» (Ծննդ. Ա. 3): «Ի լուսոյ եղեն», որպէս Գրիգոր Աստուածաբան ասէ: Առաջին լոյս՝ Աստուած եւ երկրորդ լոյս՝ հրեշտակք եւ երրորդ լոյս՝ մարդ, զոր. «Փոքր ինչ խոնարհ արար քան զհրեշտակս» (Սաղմ. Ը. 6). ասաց Դաւիթ:

ՍՏ Երէց որդի զհոգիս նշանակէ, որք ո՛չ մեղան, եւ կրսերագոյն՝ զհոգիսն, որք մեղան եւ ապաշխարեն: Եւ վասն է՞ր են կրսերագոյն հոգիք անառակացն: Վասն անառակութեան եւ վասն բարժանելոյ յառաքինութենէ եղբաւր[ն] իւրոյ, վասն որոյ կրսեր կոչեցաւ, եւ երէց՝ հոգիք արդարոցն: Հայր այժմ զՓրկիչն կարծեմ, որ ասաց ցաշակերտսն. «Որդեակք իմ» (Յովհ. ԺԳ. 33): Եւ դարձեալ. «Քաջալեբեաց, դո՛ւսոր, հաւատք քո կեց[ուցի]ն զքեզ» (Մաթթ. Թ. 22):

Ասէ կրսերն ցհայրն. «Տուր ինձ բարժին» (ԺԵ. 12):

ԻԳ Առակիս դէմս այսպէս պահանջեն եւ կարգ բանից:

Եւ նա բարժանեաց նոցա զկեանսն (ԺԵ. 12):

Զոր ստացաւ արարչութեամբ եւ ետ իմանալեացն զերկնից բնակութիւն: Իսկ զգալեացս մեզ՝ զզրախտն ի բնակութիւն եւ ամենաբարի, եւ անկարաւտ, անմահ եւ անապական յամէնառատ պարզեւէն, եւ ո՛չ պահեաց գործակցութեամբ չարին: Կամեցաւ աստուածանալ եւ անաստուած կալ ի դրախտի անդ, եւ յաստուածատուր փառացն մերկացաւ:

Եւ յեւր ոչ բազում աւուրց (ԺԵ. 13):

Յայտ արար, զի ո՛չ եկաց ժամանակ ինչ ի վայելչութեան[ն], ի փափկութեան դրախտին, այլ ի սակաւ աւուրց ինչ վաղվաղակի անց զպատուիրանաւն:

Գնաց յաշխարհ հեռի (ԺԵ. 13):

ՍԿ. Զիք տեղի հեռի յԱստուծոյ. «Թէ ելանեմ յերկինս, դու անդ ես, եւ թէ իջանեմ ի դժոխս, անդ մերձ ես» (Սաղմ. ԸԼԸ. 8): Թէ՛ «Առից զթեւս իմ, բնակեցայց յեզր ծովու, սակայն անդ ձեռք քո տիրեացեն (հմմտ. Երևմ. ԻԳ. 23-24): Արդ՝ չիք տեղի, որ որոշէ զմեզ յԱստուծոյ, բայց միայն մեղք: Որպէս ասաց Տէր. «Մեղք ձեր որոշեն ի մէջ ձեր եւ Աստուծոյ» (Ես. ԾԹ. 2): Մերկացաւ Ադամ ի դրախտէն լուսոյ, որով ծածկեալն էր, եւ ամաւթով կորանայր եւ ի մէջ ծառոցն թաքուցանէր զանձնն: Եւ անմահն մահկանացու եղեւ: Վասն այնորիկ հան, արձակեաց զնա ի տեղոջէ անմահիցն յերկիր մահկանացու եւ ապականելի:

ՍԿ. Յերկիր հեռի յարդարութենէ եւ յերկնային կենդանութենէ, յերկրային ցանկութիւնս, եւ ի խաւարային յաշխարհս յայս:

Անդ վապնեաց զինչս իւր (ԺԵ. 13):

ԻԳ. Զաստուածային շնորհաց զպակասումն ասէ: Զի թէպէտ եւ ել ի դրախտէն, սակայն մնաց առ նմա փայլակն ի շնորհաց հոգոյն: Զոր եթէ պահեալ էին ադամայինքս մաքուր վարիւք, երանելի ոմն էին, որպէս Աբէլ եւ Ենոփս, Ենոք եւ Նոյ:

Զի կեայր անառակութեամբ (ԺԵ. 13):

Վասն որոյ եւ անառակ վարիւք զայն եւս կորոյս եւ հեզ եւ թշուառական գտաւ՝ թափուր յամենայն բարի պարգեւաց հոգոյն:

ՍՏ Զոր Հայր աւանդեաց նմա զինչս, որ են առաքինութիւնք, իսկ նորա, զհրամանաւ Հաւրն, զանց արարեալ՝ կորոյս զամենայն առաքինութիւնսն:

ՍԿ.(գր.) Ես ո՛չ փախեայ եւ ի գործոց տղմականաց՝ ո՛չ զանհնարինն զմտաւ ածելով սովոյ կղկղանս, զիմեցի առ Հայրն, եւ ո՛չ զանբաւ զթութիւն նորա, կալայ ջատագով յանձն զրկեալս յողորմութենէ շնորհի նշխարին, թէպէտ եւ զանմեղութիւն ո՛չ պահեցի եւ սրտահաճութիւն բարեսէր Հաւրն եւ ի գիտութիւն գալ ճշմարտութեանն եւ կեալ սիրելի ամենեցուն, որպէս եսս, որ շարագրեցի՝ ուսեալ զամենայն գործս աստուածային առաքինութեան ի Քրիստոսէ եւ յաշակերտաց նորա, եւ արտաք[ս]եցայ անառակ գործովք վարեալ:

Եւ իբրեւ սպառեաց զամենայն (ԺԵ. 14):

Գր. Զպակասեալն ի բարեաց գործոց եցոյց, եւ անկաւ ի բարեաց շնորհացն Աստուծոյ: Եւ յետ այսորիկ ճշմարիտ աստուածածանաւթութիւն բարձաւ ի նմանէ:

Եղեւ սով սաստիկ յաշխարհին յայնմի[կ] (ԺԵ. 14):

Դառնագոյն եւ տաժանելի է հոգոյն սովն: Թէպէտ եւ ոմանք յիմարեալ կրեն զնա եւ ո՛չ իմանալ կարեն, սակայն տաղնապին անըմբերելի սովովն խարշեալք: Ըստ այնմ՝ «Տայց ձեզ ո՛չ սով հացի եւ ո՛չ ծարաւ ջրոյ, այլ սով ի լսելոյ զԲանն Տեառն» (Ամովս Ը. 11): Յաղագս այնորիկ՝ չքաւորել:

ՍՏ Կամ սով ի խնամակալութենէն Աստուծոյ, զի նուագեալ ի բարեացն դարձցի առ Հայրն, ցանկացեալ Հաւրն մարդասիրութեանն եւ գորովասիրութեանն:

Եւ սկսաւ չքաւորել (ԺԵ. 14):

Այսինքն է՝ մոռացումն եկն իւրոց ցանկութեանն եւ յորմէ անկաւ յամենապատիկ շնորհացն:

Գնացեալ յարեցաւ ի մի ոմն ի քաղաքացեաց աշխարհին այնորիկ (ԺԵ. 15):

ԻԳ Զի ի ստոյգ գիտութենէն Աստուծոյ վրիպեցաւ մարդ եւ յարեցաւ ի դեւս: Ըստ այնմ, եթէ՝ «Թողին զիս եւ ընդ դեւսն բեւեռեցան» (հմմտ. Երեմ. Ա. 16): Եւ թողին զազբիւրս ջրոյ կենդանութեան եւ փորեցին իւրեանց ջրհոր ծակոտկէն, որ ո՛չ տանի ջուր: Կուռք, որոյ անունն Աստուծոյ էր, ի վերայ նորա աւգնութիւն եւ ո՛չ երբեք: Սկսան այնուհետեւ դեւքն պատիր խաբէութեամբ երեւումն տալ սնոտիս, որով հաւանեցան մարդիկ ծառայել նոցա:

Եւ նա անյագ չարութեամբ վարեցաւ ընդ մեզ եւ եհեզ զբարկութիւն իւր: Քանզի ընդդէմ Աստուծոյ հաստատեաց զինքն ե՛ւ թշնամի ե՛ւ հակառակ Արարչին: Համբարձաւ եւ անկաւ ի պատուոյն, եւ հնազանդեցոյց զմեզ ընդ իւր անկել, եւ տիրեաց բնութեանս մերում: Եւ զի Աստուծոյ փառացն վնասել ո՛չ կարաց, գտեալ զմեզ պատկեր Աստուծոյ՝ ամենայն զազրալի գործովք թշնամանեաց զկերպարանս մեր քան զամենայն անարգ կենդանիս: Որպէս ատելի ոք թագաւորի նմա, վնասել ո՛չ զաւրէ, որդոյ

նորա կամ ծառայից թափէ զգառնութիւն՝ թագաւորին համարելով զվնասն:

Առաքեաց զնա յագարակ իւր ար[ա]ծել խո[զ]ալ (ԺԵ. 15):

Քանզի այսպէս գիտեն պատուել դեւք զ[ը]նդունողս իւրեանց, վասն զի յաշխարհիս վարս վերջին գործ անարգութեան խոզարածն է եւ հոգոց անմաքուր վարք, զոր հաւանեցոյց ի զազրագոյնս [ի] կենդանեաց ի պաշտաւն առնուլ եւ զոհս մատուցանել եւ երկիր պագանել իբրեւ Աստուծոյ: Ըստ առաքելոյն՝ «Փոխեցին՝ զփառս անեղին Աստուծոյ ի նմանութիւն պատկերի եղծանելի՝ մարդոյ եւ թռչնոց եւ չորքոտանեաց եւ սողնոց: Վասն այնորիկ մատնեաց զնոսա Աստուած ի միտս անարգութեան ի պղծութիւն» (Տոմ. Ա. 23-24): Զինչքա՞ն զայս անարգութեան կիրք խոզարած լինել զարշուրթեամբ անասնոցն եւ վատթար գնացիւք, եւ յիմարագոյն քան զանասունս գտաք, զի՝ «Եզն եւ էչ զմսուր ստացչին իւրոյ ծանեան» (հմմտ. Ես. Ա. 3), եւ մարդիկ զԱրարիչն իւրեանց ո՛չ ծանեան:

ՍՄ. Կամ յերկնաւոր գաւառէն սատանայ եւ պաշտաւնեայք նորա հեռացան: Եւ մտին յագարակ սատանայի, ուր ո՛չ տունկք երկնաւորք, զոր տնկեաց Հայր: Եւ իբրեւ խոզք զմարգարիտն կոխեն եւ անցանեն: Նա է խոզարած, որ զցանկութիւն մարմնականս կատարէ եւ թաւալի ի ժանդահոտութիւն ախտից մարդկան, այլ այնպիսիքն պիղծ հոգովն լցեալ են, եւ ի մարմին սերմանեն եւ ո՛չ ի հոգի:

Յանկայր լնուլ գորովայն յեղջերէն, զոր խոզքն ուրէին, եւ ո՛չ որ փայր նմա (ԺԵ. 16):

ԻԳ Զի անասունք, զոր բնաւորեաց ի նոսա, Արարիչն պահեցին, զի գոյ բնական առաքինութիւն յանասուն կենդանիս: Որպէս արագիլ արդար ի գրոց ասացաւ եւ տատրակ՝ ողջախոհ, եւ անասունք ճանաչեն զամուսնութեան զսահման եւ խնայեն ի ծնունդս իւրեանց: Իսկ մարդիկ եւ զայս եւս լքին եւ զծնունդս իւրեանց այրեցին առաջի դիւաց, յորոյ վերայ անասունք զանձինս իւրեանց մատնեն: Այլ մարդիկ զոհեցին զուստերս եւ զզստերս դիւաց յաւժարութեամբ: Նաեւ ո՛չ իբրեւ զմտաւորս եւ զբանաւորս կերակրիմք զհաց հաւատոյն, որով հաստատին ոգիք ի բարեպաշտու-

թեան եւ զի բնաւ, որ կերակուր է խոզից, աւրինաւք բնութեամբ վարիլ ի ցանկութիւնս: Իսկ մարդիկ աղտեղագոյն եւ գարշ խառնակութեամբ անարգեցին զբնութիւնս, զի մի՛ ասացից զիգացն եւ զարուացն, զոր առաքեալ նախատէ զխայտառակութեան գործն եւ զոլովիւքն զանց արարից վասն պարկեշտութեան լսողացն: Զոր Յովէլ ասէ, թէ՛ «Պակասեցան կերակուրք ի տանէ Աստուծոյ» (Յովէլ Ա. 16)՝ զիտուութիւն սուրբ յանմաքուր անձանց:

ՍՏ Կամ բանական հոգի ցանկայ վարդապետութեան բանից: Թէպէտ եւ ո՛չ բարիոք է վարդապետութիւն, որպէս եղջերգ այդ պտուղ քաղցր, ընդ նմին եւ դառն, որ նշանակէ զբան մարմնասիրաց, որք ասեն զմարմնական ցանկութիւն բարի՝ «Ըստ մարմաջելոյ լսելեաց իւրեանց» (Բ. Տիմոթ. Դ. 3):

Եւ ոչ որ փայր նմա (ԺԵ. 16):

Բարեմտաց զխախտեալ ուսմունս ո՛չ աւանդեն յետինքն, զի մի՛ յանդիմանեցին:

Եկեալ ի միտս իւր (ԺԵ. 17):

Քանզի ի միտս եկեալ անառակին՝ յիշեաց զառաջին բարետոհմութիւնն եւ զյետին թշուառութիւն, զոր անառակութեամբ ստացաւ, ապա զմտաւ ած դառնալ յԱրարչէն: Ծանեաւ ի խնամոց աստի կենացս, եթէ՛ «Գթած է իբրեւ զՀայր» (հմմտ. Ձ. 36), որք ի չարիս հարեալ են եւ յԱստուծոյ թիկունս դարձուցեալ: Եւ նա ի բաց ո՛չ դառնայ, այլ տակաւին խնամէ զպէտս բնութեանս յերկնից եւ յերկրէ զպտուղս եւ զտարածումն լուսոյ, զճառագայթից ծաւալումն, զաւդոց ցնդումն: Քանի՞ եւս ունի բարեգործել հոգեւորապէս դարձելոցն առ նա, քանզի ունէր մարդն բնութեամբ եղեալ ի նմա յԱրարչէն՝ ճանաչել զԱստուած եւ սիրել զնա եւ ընտրել զբարին եւ զչարն ի միմեանց: Թէպէտ եւ աստուածխաւսութիւնք լռեցին եւ ուսուցիչ ոչ ոք էր, եւ զայս առաքեալ յայտնեաց, թէ՛ «Գիտութիւն Աստուծոյ յայտնի էր ի նոսա, քանզի Աստուած իսկ յայտնեաց նոցա: Զի աներեւոյթ աստուածութիւն եւ զաւրութիւն ի սկզբանէ աշխարհիս արարծովքս իմացեալ տեսանին, զի ոչ գտանիցին տալ պատասխանի: Զի ծանեան զԱստուած, եւ ոչ իբրեւ զԱստուած փառաւորեցին կամ գոհացան, այլ նանրացան ի խորհուրդս իւրեանց» (Ղոմ. Ա. 19-21): Աստի իմանամք, եթէ բնական

իմաստութեամբ քննեցին զարարածս եւ զչրջանս լուսաւորացն եւ բազում արուեստս գտին, վասն որոյ նովին իմաստուն քննութեամբ պարտ էր իմանալ զԱրարիչ ամենեցունց, որ գերիվերոյ կացեալ իշխան՝ կառավարէ զամենայնն:

ՍՏ Եւ յինքն եկեալ որպէս զթմբբեալ, եւ զթմբբութիւն ի բաց ընկեցեալ՝ յիշեաց զՀաւրն երանութիւն:

Քանի՛ վարձկանք են (ԺԵ. 17):

Թուի, թէ որք կարգեցան լուսաւորք յԱրարչէն ծառայել մարդկան եւ իբրեւ որդոց կալ ի սպասաւորութիւն: Միշտ անցանելով չափեն զժամանակս՝ ջահ լուցեալ ի վերուստ լուծանելով զխաւար եւ սնուցանելով զպտուղս, որ վասն մեր կան ի ծառայութիւն:

ՍՊ. Վարձկան կոչի, որ ծառայէ Աստուծոյ կամ այլ ումեք: Եւ ծառայէ ո՛չ վասն սիրելոյ զնա, այլ փոխանակ ծառայութեանն վարձուց ակն ունիցի:

Ի փան հաւր իմոյ (ԺԵ. 17):

ԿՐ Տուն ասի, որ է եկեղեցի Աստուծոյ, յորում երկրպագի երկնաւոր Հայրն:

Նացալիցք (ԺԵ. 17):

ԻԳ Զի գեղեցիկ են պայծառութեամբ եւ անկարաւտք ամենեւին, իսկ մարդկան բնութիւնս թշուառութեամբ լի եւ խաւարաւ անգիտութեամբ փակեալ, մինչեւ սովամահ կորնչել զյաւիտենական կորուստն:

ԿՐ. Իսկ «Հացն կենաց իջեալ յերկնից» (Յովհ. Ձ. 41) Քրիստոս է, որ բաշխի ի վերայ սրբոյ սեղանոյ[ն]:

Յարուցեալ գնացից առ հայրն իմ (ԺԵ. 18):

Եւ եկեալ՝ զփութապէսն ասէ, զի որք դառնան եւ ապաշխարելն խորհին, նոյնպէս մի՛ յապաղեցեն:

Ասացից. Նա՛յր, մեղա յերկինս (ԺԵ. 18):

«Յերկինս» ասելով՝ զառաջին յանցանսն, որ ի դրախտին, գուշակէ, զի անդ նախ՝ մեղաւ մարդկային բնութիւնս, որ եւ երկինք անուանի վասն անախտութեանն եւ անապականութեանն:

ՍՏ Յերկնաւորս մեղայ, զի թողի զերկնաւորացն գործն եւ յերկրաւորս քարչեցայ ի խնամոցն Աստուծոյ:

ԻԳ Այսպիսի եղեւ բնութիւնս: Թէպէտ եւ դիւրամեղ է, սակայն առանց ուսանելոյ ինքնագէտ է ապաշխարութեան եւ ապաշաւանաց, զոր գործեաց: Որպէս Տէրն գովեաց զտնտեսն անիրաւութեան, զի իմաստութեամբ արար (տնն Ղուկ. ԺԶ. 1-8), եւ որպէս նինուեացիքն, որ ի մարգարէէն կործանումն միայն լուան եւ իմացան, եթէ Աստուած է, որ վասն անաւրէնութեան կորուստ սպառնայ եւ վասն արդարութեան կեցուցանէ (տնն Յովհ. Գ. 5-10):

ԳՐ Մեղայ, Տէ՛ր, մեղայ, եւ [զ]անաւրէնութեանց իմոց ես ինձէն վկայեմ:

ՍԼ. Եւ գրեմ զպարտուց զսակ[ս] անձինս մեղաց, քան զհող երկրի հմափոշոյ մեղայ բարեբարիդ գթութեանց անարգս մեղայ:

Եւ առաջի քո (ԺԵ. 18):

Զի անցեալ զպատուիրանաւ քո ի սատանայ յարեցայ:

Ոչ եւս եմ արժանի կոչել որդի քո, արա՛ զիս իբրեւ զմի ի վարձկանաց քոց (ԺԵ. 19):

ԳՐ Անառակ որդին պատկառանաւք հայրենի գթոցն թախանձանս արկանէր՝ ողորմելի եւ աղերսական ձայնիւ, արտասուազո՛չ ողբով մատուցեալ առաջի քո, «Նա՛յր գթութեանց եւ Աստուած» (Բ Կոր. Ա. 3) բոլորից:

Չեմ արժանի եւ բնաւ ծառայ կոչիլ (ԺԵ. 19):

Ոչ միայն որդի, այլեւ անպիտան վարձկան: Ընկալ զսովեալս եւ զտարագրեալս վնասիւք, եւ զցաւս քաղցոյ լլկանաց նուաղեցելոյս կեցոյ հացիւդ կենաց, յագեցոյ եւ բժշկեայ եւ ողորմեայ:

Յարուցեալ եկն առ հայրն: Եւ մինչդեռ հեռագոյն էր, ետես հայրն եւ զթա[ցաւ] (ԺԵ. 20):

ՍՏ Դեռեւս հեռի էր, վասն զի ի յանցանացն ո՛չ էր թաւթափեալ, միայն զղջացեալ փութայր առ հայրն: Ո՛վ մեծ մարդասիրութիւն Հաւրն [ԻԳ] եւ ամենաբարի բնութիւնն: Ո՛վ քանի՞ անչափ են խնամքն Քրիստոսի, որ զծածուկս Հաւրն կամացն յայտնեաց մեզ եւ ընտանեցոյց Որդի[ս] անուանելով, որ եւ ծառայս ո՛չ

էաք՝ արժանաւորք, եւ զնա Հայր անուանեաց զարարչագործն եւ, որ ինչ կարի սեփական է, սիրոյ եցոյց:

Յարեալ ընթացաւ ընդառաջ (ԺԵ. 20):

ՍՏ Թուի, թէ զառակիս դէմս առ Արրահամ դնէ, զբնութիւնս մեր գուշակէ: Արդ՝ իբրեւ էր Արրահամ յՈվր քաղաքի, քաղաքի քաղաքացոց, եւ անդ երեւեցաւ նմա Աստուած, յորժամ պաշտէր զտարերս լուսաւորաւքդ: Եւ նա խնդրեաց զտանել զԱստուած, եւ արագ եգիտ զԱստուած: Եւ պատմեաց զաւետիսն տոհմի իւրոյ եւ հաւատացին, եւ յուժարեցան զնալ յոր կողմ եւ երթայցէ Արրահամ: Բայց եղբայր իւր Առան ո՛չ հաւատաց տեսլեանն, սատակեաց զնա Տէր (տնն Ծննդ. ԺԱ. 28):

ԻԳ. Ո՛չ ապաշխարութիւն ինչ, ո՛չ արտասուք, ո՛չ հառաչանք, այլ միայն դիմեաց զնալ: Եւ նա տեսեալ՝ ընդառաջ զնաց: «Հաւատ[աց] Արրահամ յԱստուած, եւ համարեցաւ նմա յարդարութիւն» (Ղոռմ. Դ. 3) եւ, որք ի հաւատոց անտի են, աւրհնին ընդ հաւատացելոյն Արրահամու: Եւ Աստուած փառաց երեւեցաւ հաւր մերում, մինչեւ բնակեցուցեալ էր զնա ի Խառան, զինչքա՞ն զայս ընդառաջ լինել հաւրն անառակին:

ՍՐԿ Իւրով ի բազում գթով ընթացաւ ընդառաջ, որպէս բարեգործի ումեք որդոյ ի սկզբանէ: Նա եւս առաւել որպէս փափագող կենդանութեան մեռելոյ եւ ի գիւտ կորուսելոյ:

Անկաւ զպարանոցաւ նորա (ԺԵ. 20):

ՍԿ. Որ ազատեալն էր ի լծոյ սատանայի:

Եւ համրուրեաց զնա (ԺԵ. 20):

Տայր նմա եւ զհամրոյրն՝ նշանակելով զմիաւորութիւն առ որդին:

Սրկ.(սպ.) Ո՛չ արդեւք յիշեաց ինչ խնամ առատն զառաջին անզգամութեան զսխալանացն սաստկութիւն վերստին առ ինքն դարձմամբ: Ո՛չ զարչեցաւ ի տգեղութենէ հոգոյ նորա մաքուրն յամենայնի: Եւ գերազանցեալ սրբութեամբ ծայրագունիւ՝ ո՛չ անսաց ի կատարում գալ գործով, զոր ինչ խորհեցաւ թշուառացեալ որդին՝ հայելով ի սրտին ախորժակն միայն, արար մոռացումն ապիրատութեանն: Գիրկս արկանէր զերբեմն ապստամբելոյ

որդոյն [զ]պարանոցաւն՝ համբուրելով վասն կարաւտութեանն: Զտարածամ անդրէն դարձեալ որդին, զի թէպէտ եւ անազան, սակայն ո՛չ անարժան գովութեան:

ԻՊ Արդ, երեւեցաւ Աստուած Արրահամու առ կաղնե[ա]ւն Մամբրէի: Արրահամ ընդառաջ գնաց, երկիր եպագ եւ ետ ողջոյն եւ համբուրեաց (տե՛ս Ծննդ. ԺԸ. 1-5): Ահաւասիկ անկաւ զպարանոցաւ անառակին եւ համբուրելն, եւ նստելն առ նմա, լուանալն եւ ուտելն (տե՛ս Դուկ. ԺԵ. 20-23):

Ասէ ցնա որդին. «Նա՛յր, մեղայ յերկինս» (ԺԵ. 21):

Կր. Լե՛ր ընդառաջ քո ողորմութեամբ, բանաւորացս ապաւինութիւն:

Իգ. Թէպէտ եւ հայրն անյիշաչար եղեւ, սակայն նա խոստովանի գյանցանացն ստահակութիւն: Եւ այս իսկ է պիտանացու: Զի յորժամ մեք յիշեմք՝ Աստուած թողու եւ մոռանայ գյանցանսն, իսկ յորժամ մոռանամք՝ նա յիշէ զանաւրէնութիւնս մեր: Արդ, զգէմս Ադամայ եւ ամենայն ծննդոց նորա առեալ՝ նահապետին ասէ. «Հա՛յր, մեղա՛ յերկինս»:

ԿՐ Զդրախտն կոչեաց երկինս, յորում՝ առաջին [յ]անցանքն եւ դատապարտութիւնքն, որով այսքան ապականութիւն հեղաւ ի բնութիւնս մեր: Իսկ «[յ]երկինս» ասել զդրախտն՝ վասն տեղոյն գրութեան եւ անմահ եւ անապական կենացն:

«Մեղա՛ եւ առաջի քո» (ԺԵ. 21):

զր. Զի ո՛չ թաքուստ եւ անյայտ ուրեք, այլ առաջի ամենատես աչացդ, ուր չիք հնար թաքչել, զի զանգործս իմ տեսին աչք քո եւ ի գիրս քո ամենեքին գրեցան:

«Ոչ եւս եմ արժանի կոչել որդի քո» (ԺԵ. 21):

Այսպիսի միտս ունել պարտ է յանցաւորաց: Թէպէտ եւ ի խնամոցն Աստուծոյ արժանաւորին թողութեան, սակայն զանձինս առ յանցաւորս պարտ է ունել եւ յիշատակաւ մեղացն խոնարհել:

Զի որչափ մեք զանձինս ի խոնարհ ընկենումք, նա ի վեր տանի, եւ որչափ ամբառնամք, նա ի ստորեւս ընկենու:

Ասէ հայրն զճառայս իւր. «Վաղվաղակի հանէք զպարմուճանն առաջին եւ զգեցուցէք» (ԺԵ. 22):

Ըստ որում՝ «Եւ զեզն պարարակ, ասաց, զենուլ» (հմմտ. ԺԵ. 23): Եւ ոչ ի նմին զենեալ էր, այլ խորհրդով զենաւ վասն յուսոյն վստահութեան: Նոյն աւրինակաւ զգեցան արգարքն զգգեստն անապականութեան զՔրիստոս յուսով խոստմանն: Եւ ո՛չ եմք մատուցեալ ի լեառն շաւշափելի, այլ յիմանալի լեառնն եւ ի բանակս բիւրաւոր հրեշտակաց: Եւ տակաւին յաշխարհի եմք, բայց հաւատով ունիմք զպարգեւս: Նոյնպէս եւ աստ ասէ.

Զգեցուցէք (ԺԵ. 22):

Դէմք են առակաւոր բանից, զի ո՛չ ըստ աւրինի թագաւորաց պաշտանէիւք վճարէ, բայց ամենակատար բնութիւնն ո՛չ կարաւտի սպասաւորաւք վարիլ, որոյ կամելն գործ է կատարեալ:

Իգ. Զգեցոյ զթած եւ անոխակալ, անաւրինեալ մեղաւորիս զանկապուտ հանդերձին զձածկոյթ:

ՄԻՎ Արդ՝ մերկութիւն նշաւակութեանս ո՛չ տերեւ թզենոյ,

զր. այլ գեղեցիկ պատմուճանաւ լինէր զգեցեալ, զոր ունէր նախքան զաւտարանալն ի Հաւրն պայծառութենէն:

ՍՏ Կամ առաջին պատմուճան՝ զառաջին զարդ հոգոյն, որով զարդարէ եւ ուրախացուցանէ զհոգի ապաշխարողացն եւ ի բաց ընկենու զտրտմական անզարդութիւն յանցանացն:

«Տուք զմարանին ի ձեռս նորա» (ԺԵ. 22):

ԿՐ Զագատութիւն ի ծառայական կարգացն, եւ զորգեգրութեան աշտիճան ի ձեռն որդեգրութեան աւագանին պատմուճանաւն:

ՍՏ Մատանի՝ զնկարագիրն, որով գործական հոգին զարդարի:

Գր. Արդ՝ աւանդակորոյս ձեռացն աղտեղեալ մեղաւք՝ զկնիք մատանոյն համարձակութեան ամենառատ կամաւք մատուցես ինձ:

Իգ.(զր.) Կամ զի քանդակուածով ականն զնոյն թագաւորական պատկերն նշանակէ, զոր դարձեալ դրոշմէ ի նա զտիպս թագաւորական կնքոյն:

«Եւ զկաշիկս յոպս նորա» (ԺԵ. 22):

Կր. Զի աներկիրը լիցի գարշապարն ի թիւնից աւձին՝ ընթանալ գյաւիտենական ճանապարհն: Կաւշիկս ո՛չ զեզիպտացոցն, զոր հրամայեաց ի բաց ընկենուլ այնոցիկ, որ գնան ի վերայ Սուրբ երկրի, այլ որ ի պատրաստութենէ սուրբ աւետարանին կազմեցան:

ԳՐ Նաեւ զգարշապարացն թշուառութիւն ամրացոյց ի խածանող վիշապէն: Զմերկութիւն ոտից ամուր վերարկու՝ պահպանութեամբն ամրափակէ վերստին խորհրդական կաւշկաւք:

Իգ. Զի համարձակ լիցի կոխել զգլուխ կամակոր աւձին եւ զամենայն զաւրութիւն թշնամոյն: Եւ իբրեւ զթագաւոր նրստուցանէ պատ[ո]ւով յաթոռ զբնութիւնս մեր:

«Ածէք զեզն պարարակ, զնէք, կերիցուք» (ԺԵ. 23):

Ո՛վ մեծ խորհրդեանս եւ արժանի զարմանալեացս, որ հիացուց անէ զթանճրամիտս ընդ Հաւրն զթածի, որ վասն անառակ ծառայից փրկութեան զստոյգ եւ զսիրելի Որդին ի զենուան տայ ուրախութեամբ:

«Ուրախ լիցուք» (ԺԵ. 23):

Ընդ Որդոյն, որ զայս ամենայն առաջի դնէ լսողացն՝ վասն անձին իւրոյ զենման յուրախութիւն ապստամբացս: Վկայէ եւ Եսայի. «Որպէս զոչխար ի սպանդ վարեցաւ, եւ որպէս զորոջ առաջի կտրչի անմոռնչ կայ» (Ես. ԾԳ. 7):

ՍԳ. Արդ, զուարակ պարարեալ՝ Բանն ողջախոհ վարդապետութեամբ, կամ ինքն իսկ Քրիստոս Բան եւ իմաստութիւն Աստուծոյ: Որպէս Սողոմոն ասէ. «Իմաստութիւն շինեաց իւր տուն եւ կանգնեաց սիւնս եւթն: Զէն զզննլիս իւր եւ իսառնեաց զիսառնելիս իւր» (Առակ. Թ. 1-2):

ԿՐ Զի մկրտելոցն եւ որդիացելոցն վայելէ մարմին եւ արիւն Փրկչին:

Գր. Մարդասիրութեամբ կարաւտելոց բաշխեաց նուէրս առատապէս, որ մատուցեալ միշտ բաշխի եւ կայ անպակաս ի լրութեան: Յարակայ զենեալ ի սպանդարանի անթիւ սեղանոց՝ անսպառութեամբ բոլոր յամենեսին եւ բնաւ յամենայնի: Էութեամբ է յերկինս եւ իսկութեամբ յերկրի, աննուազ մարդկութեամբ եւ անթերի աստուածութեամբ զենեալ եւ բաշխեալ ի մասունս անհատս, զի զամենեսին հաւաքեսցէ առ ի նոյն մարմին գլխոյն իւրում:

Եւ արդ՝ Հայր ամենագութ, որ զամենայն անպատում պարզեւեցեր մարդկան՝ յաղթեալ ի մարդասիրութենէ քումմէ, բարձրեալ, հզաւր, անսկիզբն, անեղ, անբաւընդակելի, աննիրհելի, ակն նկատաւղ, ծնաւղ անքն[ն]ին փառաց Միածնիդ:

ՍՐՎ Զուգականին Որդւոյ սիրելոյ եւ հնազանդութեան խոնարհութիւն, ամենայնիւ հաւասար մեզ եւ առանց մեղաց, անչարչարական էութեան, զուգագունին՝ չարչարանք մարմնով, եւ անմահին՝ մեռելութիւն յաղագս մեր կենդանութեան:

«Զի որդիս իմ մեռեալ էր եւ եկեաց» (ԺԵ. 24):

Իգ. Դառնագոյն մահ այն է, որ մեղացն է, որ զճշմարիտ կեանսն սպանանէ:

«Կորուսեալ էր եւ գրաս» (ԺԵ. 24):

Տաժանելի կորուստ այն է, որ հոգոյն է ապականութիւն ի գեհեների անդ, եւ կենդանութիւն եւ կարի զարմանալի եւ աստուածային եւ յաւիտենական: Նոյնպէս եւ գտանելն՝ առ յԱստուծոյ յարկան յաւիտենից բնակելով, եւ ուրախութիւն անփոխանորդելի:

Գր. Աւետարանեայ բանիւ աւրհնութեամբ զկենդանութիւն ինձ մահացելոյս, զբարեբանութիւն կամացդ յայտնեայ, ստացիր քեզ անուն անճառ, եւ ինձ թշուառիս՝ նորոգ փրկութեան: Կորուսցես զգիր մուրհակի մեղուցելոյս ամբաստանութեան, զվճիռ հոգոյս ջրեսցես աստուածապէս՝ կայլակաւք որդոյ քո սիրելոյ:

Վստահութիւն փրկութեան բարեաց, արեամբ Քրիստոսի քո, նկարեսցես զհոգի եւ զմարմին կորուսելոյս:

ՍՐՎ Որ եկն կոչել զմեղաւորս յապաշխարութիւն եւ բժշկել զախտաժէտս հիւանդութեամբ չարութեան:

Եւ էր երէց որդի նորա յագարա[կի] (ԺԵ. 25):

Որպէս յերգսն ասէ Սողոմոն. «Երգմնեցուցանեմ զձեզ դստերք Երուսաղեմի» (Երգ Բ. 7), որ են հրեշտակք ի զաւրութիւն եւ յուժգնութիւն ագարակի զարթուցանել զսէրն, որ ո՛չ մեղան, եւ բարի եւ պարարտ անդաստանի եղեն գործաւնեայք:

Եւ ի մերձենալ ի փունն՝ լուաւ զձայն երգոցն եւ զպար[ուց] (ԺԵ. 25):

Արդ, պարտ էր ի դառնալ որդոյն առ հայրն եւ ապաշխարել, համաձայն երգոց՝ լսելի լինել: Եւ երգք համաձայնք են աստուածաբանութիւնք, աւրհնութիւնք եւ այլոց այսպիսի դանազանք, եւ ո՛չ հակառակ ձայնից դէմք:

ԳՐ Առ երկնաւորսն եւ առ երկրաւորս տաւնէ զկորուսելոցս կենդանութիւն՝ վերնոցն պարակցութեամբ:

ԻԳ Այս յաւդեալ բան նշանակէ զիմանալեացն բնութիւն, թանճր աւրինակաւք ձեւացուցանէ զհաղորդութիւն առակին առ ճշմարտութիւն: Զի այս խորհուրդ փրկութեան մարդկան ծածկեցաւ յիմանալեացն, որ մերձ են առ Աստուծոյ: Որպէս ասէ առաքեալ. «Խորհուրդն, որ ծածկեալն էր յաւիտեանցն եւ յազգաց, այժմ յայտնեցաւ» (Կողոս. Ա. 26)՝ ի ձեռն եկեղեցոյ, իշխանութեանց եւ պետութեանց:

Եւ կոչեալ զմի ի ծառայիցն՝ հարցանէր զի՞նչ իցէ այն: Եւ նորա ասէն, զի. «Եղբայր քո եկեալ է, եւ եզեն հայր քո գեզն պարարակ» (ԺԵ. 26-27):

ՄՏ Արդ՝ ի վերանալն Քրիստոսի յերկինս աստուածային եւ մերոյին բնութեամբն միացեալ՝ ունելով զսպիս բեւեռացն եւ զխոցումն տիգին, զոր ի հանդերձեալսն ծանեաք նոյն կերպիւ գալով, զի տեսցեն զոր խոցեցինն: Ընդ որ մարգարէն հիացեալ ասէ. «Զի՞նչ է այդ վէրք ի ձեռս քո» (հմմտ. Ջաք. ԺԳ. 6): Եւ լուեալ զայս ասէ. «Զոր վիրաւորեցայ ի տան սիրելոյ իմոյ» (Ջաք. ԺԳ. 6): Նոյն տեսեալ եւ Եսայի ասէ. «Ո՞վ է սա, որ դիմեալ գայ յեղոմայ: Կարմրութիւն ձորձոց իւրոց ի բոսորայ» (Ես. ԿԳ. 1), որ թարգմանի մարմին, որ թերեւս զկարմրութիւն արեանն, որ բ[ղ]խեաց ի կողից նորա: Քանզի պահէ զկողն եւ զարիւնն ի յանդիմանութիւն հրէիցն, զոր [մ]ի՛, յորժամ տեսցեն զնա փառաւք եկեալ, ուրասցին, եթէ զսա մեք ո՛չ խաչեցաք:

Վասն այսորիկ զարիւնն եւ զտեղին խոցեալ եւ սպիացեալ՝ մնաց յարութեանն, զի յամաւթ արասցէ զնոսա ի ժամանակի թագաւորութեանն իւրոյ:

ԻԳ Իսկ իբրեւ եմուտ յերկինսն աւրհնութեամբ հրեշտակացն, որք յուղարկէին զնա, եւ մերձեցաւ յառաջին դասն Գաբրիելեան, որք տեղեակ էին տնաւրէնութեանն, եւ նոքա մեծաւ ցնծութեամբ ելին ընդառաջ բազմութիւն զաւրացն եւ սկսան բարձրաձայն ու-

րախնութեամբ աւրհնել զՔրիստոս: Զի տեսին մարմնով զայն, որ ո՛չ երբեք տեսին ըստ աստուածութեանն: Եւ շարժեալք յիւրեաց կայենիցն՝ յուղարկէին զնա փառաբանութեամբ:

ՍԿ. (Կւր.) Իսկ վերին դասքն՝ սրորէիցն եւ յորէից եւ այլն ամենայն, զարմացեալ հիանային՝ տեսանելով զաղամական պատկերն երկնագ[ն]աց եղեալ, անդիտանային զտնաւրէնութեան խորհուրդն սքանչացեալք: Քանզի անհաս մտաց էր Բանն, զի ծածկեաց Որդին Աստուծոյ զստորեաւ ճանապարհն եւ ո՛չ զեկոյց հրեշտակաց, զի խայտառակեցցէ զբանսարկուն ի ծածուկ: Եւ ո՛չ էր ժամանակ պատուոյ, այլ անարգութեան: Զի մի՛ ուսցին սպասաւորք, զի զառ ի ստորին զիջանելն ո՛չ գիտացին: Վասն այսորիկ աստուստ զվեր ճանապարհն զարմանային սքանչելիս նոր եւ սոսկ ալի իրս արտաքոյ բնութեանն՝ տեսանելով զնա մարմնով ի վեր երթեալ:

ԻԳ Եւ զանսովոր ձայն հնչմանն աղաղակէին առաջին դասուցն, որք ընդ նմա գային աւրհնութեամբ: Եւ ի սքանչացման եղեալ՝ սկսան եւ նոքա աղաղակել զԵսայեան. «Ո՞վ է սա, որ դիմեալ գայ յեղոմայ» (Ես. ԿԳ. 1): Սկսանի ինքն Յիսուս առնէ պատասխանի, քանզի յառաջ զնայր քան զհրեշտակս, որք ընդ նմայն էին, որ ո՛չ թողու զձառայս իւր ի տարաբերս: Ասէ. «Ես եմ, որ խաւսիմ զարդարութիւն եւ պատմեմ զճշմարտութիւն եւ զիրաւունս փրկութեան» (Ես. ԿԳ. 1):

ՄՏ Ո՞վ գեղեցիկ տիրական Բանին, ո՞վ ճշմարտութիւն նմա միայնումն վայելուչ գոլով զգործսն ասէ, իսկ զպատիւն լուէ, քանզի ո՛չ ասաց ես եմ Տէրն ձեր, այլ զայն լուեաց: Ի գործոցն կամեցաւ զինքն ծանուցանել:

ԻԳ Վասն որոյ անդիտացեալ իշխանութեանցն հարցանեն. «Վասն է՞ր կարմիր են ձորձք քո, եւ հանդերձք քո իբրեւ հնձանահարի» (Ես. ԿԳ. 2): Յորում պատասխանի առնէ նոցա Տէր. «Հնձան հարի միայն եւ ի հեթանոսաց ո՛չ ոք էր ընդ իս: Կոխեցի զնոսա սրտամտութեամբ իմով» (Ես. ԿԳ. 3), զի «Ո՞չ ոք էր, որ աւգնէր», եւ ո՛չ ոք էր, որ փրկէր, «եւ ո՛չ ոք էր, որ ի թիկունս հասանէր» (Ես. ԿԳ. 5): Ապա ողորմեցայ կորուսելոցն:

ՄՏ Ո՞վ ճշգրտութիւն մարգարէին, մանաւանդ եթէ Հոգոյն Սրբոյ ամենագիտողի, քանզի ո՛չ Եսայե[ա]ն են այսոքիկ, այլ Հոգոյն Սրբոյ, որ ի նմա խաւսէր՝ գիտացեալ յառաջ, որ ի Քրիստոս կատարելոց էր, զբանն պատշաճեաց:

ԻԳ. Իսկ ներքին դասքն, որ ընդ նմա դային, իբրեւ տեսին, եթէ անգիտութեամբ որպէս զմարդ որ հարցաքննեն զնա, ասեն մեծածայն աղաղակաւ՝ իբրեւ սաստելով իշխանութեանցն եւ պետութեանցն եւ այլ հրաբուն զաւրացն. «Համբարձէք իշխանք զգրունս ձեր ի վեր, եւ մտցէ թագաւոր փառաց» (Սաղմ. ԻԳ. 7): Այսինքն՝ թոյլ տուք, ի բաց կացէք, ճանապարհ արարէք: Եւ նոքա հիացեալ՝ զարմացան, վասն զի ո՛չ գիտէին նոքա զոք թագաւոր փառաց մարմնով, որ այնպիսի բուն զաւրութեամբ մտանէր յերկինս եւ այսպիսի նոր տեսութեան պատահել բանից: Դարձեալ կրկնեն. «Ո՞վ է սա թագաւոր փառաց» (Սաղմ. ԻԳ. 8): Ապա ներքինքն ասեն. «Տէր զաւրութեանց, սա է թագաւոր փառաց» (Սաղմ. ԻԳ. 10): Տէր զաւրութեանց յատուկ Աստուծոյ է: Եւ զայս լուեալ՝ բնաւ ապշեցան վերինքն, զի ո՛չ կարացին կալ ի վերայ խորհրդոյն, միայն լուեալ դադարեցին: Իսկ յորժամ տեսին, թէ անց ընդ ամենայն դասս իշխանութեանց եւ պետութեանց եւ տէրութեանց, եւ ել ի վերոյ քան զամենայն երկինս եւ եմուտ ի ներքին կողմն վարագուրին: Եւ նստաւ ընդ աջմէ Հաւր ի բարձունս իբրեւ յիւր սեփական աթոռ: Ապա զներքին դասն սկսան հարցանել, զի ուսցին ի նոցանէ: Եւ այս է, ասէ, երէց որդոյն կոչելն զմի ծառայակիցն եւ հարցանել:

ՍԳ. Բայց երկու պատճառ են անգիտանալոյ հրեշտակացն վերնոց: Մի՛ զի յաթոռ փառաց տեսանէին ընդ Հաւր, թէ պետեւ յորովայնի Կուսին լիով յերկրի եւ բովանդակ յերկինս: Եւ միւս եւս՝ զի յառաջ ի ձեռն հրեշտակաց լինէր երեւումն կամ ազդեցութիւն ինչ Աստուծոյ առ մարդիկ: Կամեցաւ Աստուած, որ մեք ո՛չ վերջանայաք ի հրեշտակաց, զտնաւրէնութիւն[ն] ի նոցանէ ծածկեաց, զի զայս զանճառելի խորհուրդս ի մարդկանէ ուսանիցին:

Եւ նոքա ասեն. «Ձի եղբայր քո եկեալ է, եւ եզեն հայր քո զեզն պարարակ, զի ողջամբ ընկալաւ զնա» (ԺԵ. 27):

ԻԳ. Արդ, զարբիելեան դասքն, որ շրջէին ընդ մարդկան, զայս լուան ի մարգարէիցն՝ զիջանելն յերկնից, զառնուլ մարմին ի Կուսէն եւ միաւորելն ընդ աստուածութեանն, եւ տալ զանձն ի չարչարանս ընդ մարդկան, եւ արդարացուցանել եւ առ ինքն ժողովել, զոր ուսան յելից խորհրդոյն, որ կատարեցաւ ի մէջ մարդկան եւ ուսուցին զվերին դասապետութիւնսն:

ՍՏ Եւ այս է, զոր ասէ Պաւղոս, թէ՛ «Յայտնեցաւ բազմապատիկ իմաստութիւն Աստուծոյ ի ձեռն եկեղեցոյ իշխանութեանց եւ պետութեանց» (հմմտ. Եփես. Գ. 10):

Բարկացաւ եւ ոչ կամէր մտանել (ԺԵ. 28):

ԻԳ. Մարդկաւրէն ձեւացուցանէ զբանն, զի հրեշտակք ահիւ եւ դողութեամբ կան առաջի Աստուծոյ եւ ո՛չ իշխեն խաւսիլ ինչ: Բայց իմացան, եթէ բնութիւն մարդոյ միացաւ ընդ աստուածութեանն եւ նստաւ ընդ աջմէ Հաւր, եւ նմա կրկնի ամենայն ծունր երկնաւորաց եւ երկրաւորաց: Ծանեան, եթէ մարդկան ազգ քան զնոսա ի վեր էանց ի բուն իսկ յերկինս, որ ո՛չ որ եմուտ յիմանալեացն: Ըստ այնմ՝ «Ո՛չ որ ել յերկինս, եթէ ո՛չ որ էջն յերկնից» (Յովհ. Գ. 13): Եւ որպէս խոստացաւ առաքելոցն, եթէ՛ «Ուր եսն եմ, եւ դուք ընդ իս իցէք» (հմմտ. Յովհ. ԺԲ. 26), եւ առ Հայր զայս աղաւթէր. «Կամիմ, զի ուր ես եմ, եւ սոքա ընդ իս իցեն, զի տեսցեն զփառս իմ» (Յովհ. ԺԷ. 24): Ստուգապէս բարկացան հրեշտակք, զի կրի ի նոսա այս ախտ, որ ոգոց միայն է առ մեզ, այսինքն՝ նախանձ եւ փառասիրութիւն եւ ամբարտաւանութիւն: Բայց ո՛չ զաւրանայ բռնադատել զնոսա որպէս զմեզ: Եւ ի դէպ է ասել զայս.

«Այս քանի՞ ամբ են, զի ծառայեմ քեզ, եւ երբեք զպարուիրանաւ քո ո՛չ անցի» (ԺԵ. 29):

Բայց սակայն յայնպիսի պատիւ, բնութիւն նոցա ո՛չ ել եւ ո՛չ այլ յաւելուած պատուոյ առին:

ՍՏ Գիտեա՛, զի ո՛չ է անգործ եւ դատարկ Սուրբ զուարթնոցն կենցաղ, այլ ունին ի բնութեանն իւրեանց պաշտաւն ծառայութեան:

«Ու մի ոչ ետուր ինձ» (ԺԵ. 29):

ԻԳ. Արդ՝ ո՛չ եթէ զայս ասել բաւական էին, այլ միայն խորհեցան ախտիւ նախանձուն:

ՍՏ Վասնզի զենումն ուլոյ՝ հոգոյ բանականի, որ բարձրացուցանէ զմեղուցեալսն եւ հանէ ի սուրբ կենդանութիւն, վասն զի ո՛չ մեղաւ երէց որդին, վասն այնորիկ եւ ո՛չ ուլոյ պիտոյանայր ի զենումն կամ զմտացն յարձակումն եւ մեղս շնչականս:

«Իսկ յորժամ եկն որդիք քո այդ, որ եկեր զկեանս քո ընդ պոռնիկս» (ԺԵ. 30):

Բանքս վստահ եղելոյ են յառաջախոհութեան, բայց պոռնիկք ի գանազան չարութեան հիւթս կան մարմնական կենցաղոյս:

Ջեներ դմա զեզն պարարակ (ԺԵ. 30):

Սրկ. Արտաքս լեալ նախանձու եւ կարծեաց անպատուութեան անձինն, զանճառելիսն առաջի արկանէր ցնծութեանն պատճառ:

Եւ հայրն ելեալ՝ աղաչէր. «Դու հանապազ ընդ իս ես, եւ ամենայն ինչ, որ իմ է, քո է» (ԺԵ. 31):

Սր. Վկայութիւն է Հաւրն, թէ ո՛չ երբեք մեկուսացաւ ի բարոյն:

Իգ. Զի անկարաւտ բնութեանն եւ անկարիք, եւ յայնքան բարձրութեան կացեալ, եւ ո՛չ տիրական ինչ կամս կամ հարկեցուցիչ ի մեզս: Եւ զայս պատիւ ո՛չ արեամբ եւ ո՛չ ճգամբք կրից ստացան, այլ ընդ ստեղծուածին յամէնառատ պարգեւատուէն ճրի շնորհ ընկալան:

«Այլ ուրախանալ եւ խնդալ պարպ էր» (ԺԵ. 32):

Ոկ. Զուարճակից առնէր զիմանալի հոգիսն իւրոյ մարդասիրական բնութեանն, եւ երէց որդոյն աղերսէր՝ ասելով.

«Զի եղբայրս քո այս մեռեալ էր եւ եկեաց» (ԺԵ. 32):

Մեռեալ էր, վասն զի կենդանարարն գոհացութեանն ցրուեաց՝ կելովն անառակութեամբ:

«Կորուսեալ էր եւ զգրաւ» (ԺԵ. 32):

ՍՏ Վասնզի լայն եւ ընդարձակ ճանապարհաւն գնայր գտարողն ի կորուստ, եւ գտաւ՝ ի բաց եղեալ զմեռելոյ եւ զկորուսելոյ: Մի՛ գանապարտ բնութիւնս տիրազգած առնեք, մի՛ յուրախութեան հաւրն զընդդէմսն իմացիս: Եւ գործեսցես ո՛չ վայելչական բնութեան բարեաց, մի՛ յանպատ[ու]ութիւն իջուցանել՝ տրտմագին երեւելով, մի՛ ո՛չ ծանիցես զժամանակիս արժանաւորութիւն, այլ ընդ այլոյ վարկաներ: Ո՛չ է քում գերաշխարհիկ իմաստութեանդ վայելուչ: Յայնժամ էր արտում, յորժամ հեռին էր ի մէնջ, եւ սովոյ զինքն վաճառէր եւ ընդ խոզս թաւալեալ շրջէր, յիրս, որ ո՛չ էր արժան: Եւ զբարետոհմութիւն իւր թշնամանէր անառա-

կութեամբ: Իսկ արդ՝ փոխեցաւ ընդ իրին եւ ժամանակն, զիա՞րդ իմաստունս յամենայնի ո՛չ բերես ի քեզ զընտրութիւն: Այսպէս եւ այսու թելադրութեամբ հաւանեցուցանէր զանդրանիկն յուրախութիւն եղբաւրն: Ապա պայծա[ռա]նայր տաւն[ն], եւ սիրով ընդ միմեանս հայէին եղբարքն, եւ հայրն յաւելոյր գտաւնականսն յաղագս որդոց առ իրեարս խանդաղատանացն: Եւ պարաւորքն երգէին զգոհացողականսն ի վերայ փրկութեան մեղաւորացն, ընդ Հաւրն ողորմածի եւ զթասիրի՝ հիացեալ էին ակամ[բ]ք բազմականացն յաղագս անբաղդատելի մարդասիրութեանն Հաւրն եւ հեզութեան քաղցրութեանն, անոխակալութեանն, առատութեանն, եւ միանգամայն ասել իսկական նորա բարեզարդութեանն եւ ամենայն աշխարհի խնամածութեանն:

ՄԱՏԹԷՈՍ ԶՈՒՂԱՅԵՅԻ

Առն միոջ էին Բ. որդիք: Ասէ կրպսւերն ի նոցանէ. «Նա՛յր, փո՛ւր ինձ բաժին, որ անկանի յընչիցդ». Եւ նա բաժանեաց (Ղուկ. ԺԵ. 11-12):

Սովորութիւն է մարմնաւոր ծնաւդաց ի փոքրկութեանն այլ ազգ սնուցանել զմանուկն եւ ի մեծութեանն՝ այլ կերպիւ խրատել, քանզի մինչեւ յէ. (7) ամն ի հրոյ եւ ի ջրոյ պահեն եւ անտի յեա՝ ի դատարկաբանութենէ եւ յայլոց: Այսպէս եւ Տէրն մեր առնէ՝ խնամելով զբնութիւնս:

Ա. Նախ՝ ասաց մարգարէիւքն. «Մի՛ շնար եւ մի՛ գողանար» (Մաթթ. ԺԹ. 18): Իսկ յորժամ հասեալ ի տիս մանկութեանն, խաւսի այլ կերպիւ ընտանեգոյն, իբր զարմատ մեղաց ի մէնջ կտրելով: Զի զոր աւրինակ ծառ ի յարմատոցն զարգանայ եւ պտղաբերի, այսպէս եւ մեղքն ի խորհրդոցն յառաջագայեալ՝ ի մահն վճարի, որպէս ուսուցանէ առաքեալն (տեսն Յակոբ Ա. 15), վասն որոյ ասաց յառաջագոյն. «Լէր իրաւախոս» (Մաթթ. Ե. 25) եւ մի՛ բարկանար, զի անտի ծնանի սպանութիւնն, եւ մի՛ հայիր յարատ (տեսն Մաթթ. Ե. 28), զի անտի ծնանի շնութիւնն, եւ մի՛ երդուիր ամենեւին (տեսն Մաթթ. Ե. 34), զի անտի ծնանի ուրացութիւնն: Իսկ մեք յամառեալ ի մերն, զհակառակ բանից նորա առնեմք, վասն որոյ աւրինակ բերէ մեզ զայս՝ ասելով. «Առն միոջ էին [երկու որդիք]»:

Իբր թէ ի սա հայելով՝ իմասցուք զանմտութիւնն մեր, ըստ անառակին՝ վատնելով զխրատն աստուածային անառակ գործովք: Եւ դարձեալ՝ զի մեղանչել բնաւորեցաւ մեզ՝ ըստ այնմ: «Միտք մարդկան ի խնամս չարին հասարարեալ են ի մանկութենէ» (Ծննդ. Ը. 21), սակս որոյ եւ զդարձն ասէ, զի ի նմանէ ուսցուք, վասն որոյ ասէ. «Առ միտք [էին երկու որդիս]»:

Արդ, ոմանց այսպէս թուեցաւ, թէ «երկուս որդիս» զարդարս եւ զմեղաւորս ասէ, զոր ոչ պատշաճեցուցանէ կարգ առակաւոր բանիս, քանզի ասէ երէց որդին.

«Երբէք զպարուիրանաւ քո ոչ անցի» (ԺԵ. 29):

Իսկ թէ արդարք, թէեւ մեծ ոմն է, ոչ է առանց մեղաց՝ ըստ այնմ. «Թէւ միարեայ իցէ կեանք մարդոյ, ոչ է առանց [մեղաց]» (հմմտ. Յոր ԺԴ. 4): Եւ դարձեալ՝ թէ ըստ ներգործութեանց ոչ ունի ինչ մեղս, սակայն զնախահաւրն պարտիսն ամենեքեան ունէին, ապա եւ յայտնի է անպատշաճութիւն բանից նոցա, որ վասն առակիս, բայց արժան է բարեպէս մտաւք տեսանել բանս, զի «այր» կոչէ զԱստուած վասն արիականն բնութեանն եւ դարձեալ՝ իբր զնախատիպ պատկերիցս, իսկ «երկու որդին» ասէ զհրեշտակս եւ զմարդիկ: Եւ արդ, քանզի «երէց» ասէ զհրեշտակս, քան զմարդիկ: Եւ այս վասն բազում պատճառի:

Ա. Նախ՝ ըստ ժամանակին, զի յառաջ զհրեշտակսն գոյացոյց յառաջնումն աւուր, իսկ ի վեցերորդ աւուրն ապա արար զմարդն:

Բ. Երկրորդ՝ վասն պատուոյն, որպէս եւ գրեալ է վասն մարդոյն. «Փոքր ինչ խոնարհ արար դու զնա, քան զհրեշտակս քո» (Սաղմ. Ը. 6):

Գ. Երրորդ՝ զի զհրեշտակս միշտ անմահ բնութեամբ ստեղծեաց, իսկ զմարդն՝ մէջ անմահութեան եւ մահկանացութեան, զոր թէ պահեալ էր զպատուիրանն, հանէր զնա ի Վերինն Երուսաղէմ:

Դ. Չորրորդ՝ զի նոքա ի լոյս ստեղծան, եւ մարդն՝ ի հողոյ ի ձեւ մարմնոյ:

Ե. Հինգերորդ՝ վասն տեղւոյն, զի մարդոյն բնակութիւնն ի դրախտին, իսկ հրեշտակացն՝ իմանալին:

Զ. Վեցերորդ՝ զի նոքա երէց են մեղանչականութեամբն, քան զմարդն:

Է. Եւթերորդ՝ զի հրեշտակք դժուարաշարժ են ի մեղս կամ ամենեւին անշարժ, իսկ մարդն՝ զիրաշարժ:

Ը. Ութերորդ՝ զի պարզ է տեսութիւն նոցա, քան զմարդոյս: Թ. Իններորդ՝ զի այլ մերձաւորք են Աստուծոյ, քան զբազումս, այսինքն՝ անմարմնութեամբն:

Ժ. Տասներորդ՝ զի լուսափայլութիւնքն նախ ի հրեշտակս իջանէ եւ ապա՝ ի մարդկային դասս, որպէս գրէ սուրբն Դիոնէսիոս: Եւ արդ, ասէ կրսեբ որդին.

«Տուր ինձ բաժին, որ [անկանի յընչիցդ]» (ԺԵ. 12):

Այս դէմք առակիս են, եւ ոչ թէ ասացեալ են, այլ պահանջէ կարգ բանիս այս լինել: Այլ Աստուած ըստ այնմ կերպին, որպէս արար յոչ գոյից գերկուսն, այնպէս կարգեաց իւրաքանչիւրոցն բաժին, զի հրեշտակաց ետ զիմանալի բնակութիւն, վասն իմանալի բնութեանցն, իսկ մարդոյն՝ զդրախտն, զի որպէս մարդն միջակ գոյով ի մէջ անմահութեան եւ մահկանացութեան, այսպէս եւ բնակութիւն իւր ի միջակ տեղիս պատրաստեաց, այսինքն՝ ի մէջ երկնի եւ երկրի: Արդ, զայս տեսեալ մարդոյն, շեղեալ յաւձին խաբէութենէն, կամեցաւ ինչս ստանալ մեծ, այսինքն՝ կամեցաւ աստուածանալ եւ անաստուած կեալ ի դրախտին: Եւ փոխանակ աստուածանալոյն ի նոյն փառացն, զոր ունէր, անկաւ եւ մերկացեալ զանմահութիւնն: Եւ այս է, զոր ասէ.

Ոչ յեպ բազում աւուրց, ժողովեալ զամենայն կրօսեբ որդւոյն, [զնաց յաշխարհ հեռի] (ԺԵ. 13):

«Յեպ ոչ բազում աւուրց» ասելով՝ յայտ արար, եթէ ոչ եկաց ի դրախտին ժամանակ ինչ, այլ՝ փութով անցեալ զպատուիրանն Աստուծոյ: Այս է «զնալն յաշխարհ հեռի», վասն զի ոչ գոյ տեղի, ուր ոչ գոյ Աստուած՝ ըստ մարգարէին, թէ՛ «[Մի՛թէ] զերկիւր եւ զերկիր ես [ոչ] լնում,- ասէ Տէր ամենայն» (հմմտ. Երեմ. ԻԳ. 24), եւ թէ՛ «Ելանեմ յերկիւնս, դու անդ ես» (Սաղմ. ՃԼԸ 8), յաղագս որոյ չիք տեղի որոշելոյ զմեզ յԱստուծոյ: Բայց ասէ մարգարէիւն՝ «Ես Աստուած մերձաւոր եմ եւ ոչ հեռաւոր» (Երեմ. ԻԳ. 23), «այլ մեղքն ձեր որոշեն ի մէջ իմ եւ ի մէջ ձեր» (հմմտ. Ես. ԾԹ. 2): Զի յԱստուած ոչ գոյ ամենեւին աղտ, վասն որոյ հնարեաց սատանայ զմեղս մարդկան՝ միջնորմն արկանել եւ հեռացուցանել այն աղտեղութեամբն ի մէջ զանմեղն:

Եւ զի՞ ի պատուիրանազանցութենէ մարդոյն բազում ինչ պատահեաց նմա:

Ա. Նախ՝ զի ի լուսոյն մերկացաւ, որով կարէր մերձաւորիլ առ Աստուած:

Բ. Երկրորդ՝ ամալթով եղեալ յԱստուծոյ՝ կորանայր:

Գ. Երրորդ՝ զի մոռացաւ զԱստուծոյ ամենատես բնութիւնն՝ ծածկելով զինքն ի ներքոյ թղենւոյն:

Դ. Չորրորդ՝ զի ծառայ եղեւ մահու՝ ըստ այնմ. «Նոդ էիր եւ ի հող դարձցիս» (Ծննդ. Գ. 19):

Ե. Հինգերորդ՝ զի յանմահութենէն զրկեցաւ:

Զ. Վեցերորդ՝ զի հանեալ վարեցաւ ի գեղեցիկ վայրուցն:

Է. Եաւթներորդ՝ զի գտեղի անասնոց վայելեաց՝ փոխանակ զրախտին:

Ը. Ութերորդ՝ զի գտրամութիւն ժողովեաց յինքն՝ փոխանակ ուրախութեանն՝ ըստ այնմ. «Տրսմութեամբ ծնցես որդի» (Ծննդ. Գ. 16):

Թ. Իններորդ՝ զի անկաւ ի մտաց, զի հոգիք ըմբռնեալք ի մեղս ի մտաց եւս անկանին:

Ժ. Տասներորդ՝ զի յաստուածային տեսութենէն եւ ի խաւսակցութենէն զրկեցաւ:

ԺԱ. Մետասաներորդ՝ զի ապականացու եղեւ մարմնովն:

ԺԲ. Երկոտասաներորդ՝ զի հոգւովն ի դժոխս գերեցաւ:

ԺԳ. Երեքտասաներորդ՝ զի զծնունդս իւր ընդ իւր քարչեալ:

ԺԴ. Չորեքտասաներորդ՝ զի զՀոգին Աստուծոյ հեռացոյց յինքենէ՝ ըստ այնմ. «Մի՛ մնացել Նոգի իմ ի դոսս վասն լինելոյ դոցա մարմին» (Ծննդ. Զ. 3):

ԺԵ. Հնգետասաներորդ՝ զի ապաշխարութեան կարաւտացաւ:

ԺԶ. Վեշտասաներորդ՝ զի փուշ եւ տատասկ բուսոյց յինքեան:

ԺԷ. Եաւթն եւ տասներորդ՝ զի քրտամբ երեսաց եկեր զհացն, փոխանակ անաշխատ ուտելոյն ի դրախտին:

ԺԸ. Ութն եւ տասներորդ՝ զի սովորեցաւ ի մեղանչելն:

ԺԹ. Ինն եւ տասներորդ՝ զի զանասնոց կերակուր կերաւ:

Ի. Քսաներորդ՝ զի թագաւորութիւնն կորոյս, զայն որ ասէ. «Կացուցեր զնա ի վերայ ամենայն ձեռակերպաց քոց» (Մաղմ. Ը. 7):

ԻԱ. Քսան եւ միներորդ՝ զի զմարգարէութիւնն բարձաւ:

ԻԲ. Քսան եւ երկուերորդ՝ զի կամարար սատանայի գտաւ:

Այս է ասելն.

Վարնեաց զինչս իւր, զի կայր անառակութեամբ (ԺԵ. 13):

Այսինքն՝ զի ի բազմանալ մեղացն հեռանայ Հոգին շնորհաց, այս է «վատնել»ն: Իսկ «անառակ» ասելն, այս է անաւրինակ, իբր թէ նախքան զնա մեղանչական ոչ գոյր աւրինակ նմա, որպէս եւ նա՝ մեզ, յազազս որոյ դիպաւ սովոյ, զի ասէ՝

Եղեւ սով սաստիկ (ԺԵ. 14):

Իսկ «սով» զհոգւոյն սովն ասէ, զի չիք ինչ քան զնա դժուարագոյն, եւ առաւել է, քան զմարմնոյ սովն:

Ա. Նախ՝ զի ի մարմնոյ սովն ինքեան միայն առնէ վնաս, իսկ հոգւոյն՝ զմարմինն եւս սպանանէ:

Բ. Երկրորդ՝ զի մարմնոյ սովն հացի է, իսկ հոգւոյն՝ առաքինութեան եւ Բանին կենաց՝ ըստ այնմ. «Ոչ փաց ձեզ սով հացի, այլ լսելոյ զԲանն կենաց» (հմմտ. Ամովս Ը. 11):

Գ. Երրորդ՝ զի մարմնոյ սովն երեւի եւ հնար գտանի, իսկ հոգւոյն սով՝ ոչ ոք գիտէ, եթէ ոչ ինքն՝ ըստ այնմ. «Ոչ որ գիտէ գմարդն, եթէ ոչ հոգին, որ ի մարդն» (հմմտ. Ա Կոր. Բ. 11):

Դ. Չորրորդ՝ զի զմարմնոյ սովն մարդ լցուցանէ, իսկ հոգւոյն՝ Աստուծոյ է կարիս աւգնականութեան:

Ե. Հինգերորդ՝ զի մարմնոյ սով աստ միայն տանջէ, իսկ հոգւոյն սով եւ ի հանդերձեալն առաւելու, վասն որոյ ասէ «սով սաստիկ», եւ ոչ՝ լոկ «սով»:

Արդ, ասէ.

Գնացեալ յարեցաւ ի միումն ի քաղաքացեաց աշխարհին այնմիկ (հմմտ. ԺԵ. 15):

Աստ յայտնի են, զի որք յԱստուծոյ հեռանան, դիւաց ընկեր լինին, զի քաղաքակից այսմ աշխարհի դեւք են՝ ըստ այնմ. «Իշխան աշխարհիս այսորիկ [ընկեցի արարաքս]» (Յովհ. ԺԲ. 31): Իսկ զի՞ ասէ՝ «զնաց յարեցաւ», այն է, զի բազում չարիս գործեցին բնութեանս դեւք:

Ա. Նախ՝ զի ախտիւ լցին զբնութիւնս:

Բ. Երկրորդ՝ խաւարաւ տգիտութեան յԱստուծոյ աւտարացուցին:

Գ. Երրորդ՝ զի զմարդիկ ծառայս ինքեան գործեցին:

Դ. Չորրորդ՝ զի փոխանակ Աստուծոյ՝ զինքեանս պաշտել ետուն:

Ե. Հինգերորդ՝ զի ընկերակից տանջանաց ինքեանց գործեցին ի դժոխս: Եւ զայսոքիկ վասն այն պատճառի, զի նախ ընդ Աստուծոյ ի թշնամութիւն խորհեցաւ՝ ըստ այնմ. «Եղից զայթոռն իմ յամպս եւ եղէց նման բարձրելոյն» (հմմտ. Ես. ԺԴ. 14): Եւ Աստուծոյ ոչ ինչ կարաց առնել, զքէն նախանձուն ի բնութիւնս մեր հանել կամեցաւ: Զոր աւրինակ՝ ոք թշնամի իցէ թագաւորի եւ նմա ոչ ինչ կարիցէ առնել, եթէ զսիրելի թագաւորին ըմբռնէ՝ փոխանակ նմա զնա՝ ցաւեցուցանէ. այսպէս սատանայ ընդ մեզ արար: Յաղագս որոյ ասէ.

Առաքեաց յազարակս իւր՝ արածել խոզս (ԺԵ. 15):

Այս է, քան զամենայն վատթար կենդանիս ներքին կամեցաւ առնել՝ ըստ այնմ. «Նաասարեաց անասնոց [անբանից] եւ նմանեաց նոցա» (Սաղմ. ԽԸ. 13, 21):

Եւ զի՞ սատանայ խոզի նմանի: Եւ այս վասն բազում պատճառի:

Ա. Նախ՝ զի վատթար կենդանի է խոզն. այսպէս եւ սատանայ, վատթար է այժմ, քան զամենայն կենդանիս եւ զգոյքս:

Բ. Երկրորդ՝ զի խոզն միշտ յոգոց հանելով երթայ. այսպէս՝ սատանայ միշտ ի լաց է եւ ոչ ունի ուրախութիւն ինչ:

Գ. Երրորդ՝ զի տղմասէր է. այսպէս եւ սատանայ մեղսասէր է յոյժ:

Դ. Զորրորդ՝ զի ոչ կարէ յերկինս նայել. այսպէս եւ սատանայ ոչ կարէ զԱստուած տեսնել:

Ե. Հինգերորդ՝ զի խոզն ունի մասն ինչ սրբութեան՝ զկճղակն. այսպէս եւ սատանայ ունի զանմահութիւն յինքեան անիրացղենի:

Զ. Վեցերորդ՝ զի ժանիս ունի երկակի. այսպէս եւ սատանայ ունի կրկին կորուսիչ, նախ՝ մեղս տայ առնել, երկրորդ՝ յետ մեղացն յուսահատութեամբ կորուսանէ:

Է. Եւթներորդ՝ զի ի վարդի հոտէն փախչի խոզն. այսպէս եւ սատանայ յառաքինութեան հոտոց սրբոցն յարահետ լինի:

Ը. Ութերորդ՝ զի ընդ ամենայն կենդանիս պատերազմի. այսպէս եւ սատանայ ընդ ամենայն ոք զհէնն իւր ցուցանէ՝ ընդ ծեր եւ ընդ տղայ, ընդ սրբոց եւ անսրբոց:

Թ. Իններորդ՝ զի կրկնակենցաղ է խոզն՝ ուտելով ունդս եւ միս. այսպէս՝ սատանայ այլազգաբար շրջի ընդ մեղսասիրացն եւ այլ

ընդ՝ առաքինեացն, զի զմեղսասէրսն միշտ գործելով զմեղս՝ կորուսանէ, իսկ զառաքինիսն՝ հպարտութեամբ:

Ժ. Տասներորդ՝ զի քան զամենայն կենդանիս բազում ծնունդս առնէ. այսպէս եւ սատանայի բազում է եւ անթիւ է հնարքն եւ զաւրք, վասն որոյ ասէ.

Գնաց յարեցաւ ի մի ի քաղաքացեացն եւ արածէր խոզս (ԺԵ. 15): Իսկ աստ ասէ.

Յանկայր լնուլ յեղջերուացն, զոր խոզքն ուրէին, եւ ոչ որ փայր նմա (ԺԵ. 16):

Եղջերն մեղաց նմանի վասն Բ. (2) պատճառի:

Ա. Նախ՝ զի բազմաճուղ է. այսպէս եւ մեղքն բազում է եւ անթիւ:

Բ. Եւ երկրորդ՝ զի մինչդեռ ոչ է հասեալ, քաղցր է, իսկ յորժամ հասանի, դառնանայ. այսպէս եւ մեղքն յառնելն քաղցր երեւի, իսկ յորժամ հասանի ի հոգին եւ դառնացուցանէ յաւիտենականապէս:

Եւ զի՞ ասէ. «Ոչ որ փայր նմա»: Զի՞նչ իցէ այս կերակուր, որ խոզիցն անկանէր եւ մարդն չգտանէր: Եւ այս Բ. (2) մտաւք իմացեալ լինի:

Ա. Նախ՝ զի անասունքն բնականապէս ունին առաքինութիւն ինչ, որպէս արագիլ՝ արդար, ուղտ՝ խոհեմ, առեւծ՝ արի, տատրակ՝ ողջախոհ, իսկ ի մարդն մի ի սոցանէ ոչ գտաւ:

Բ. Եւ երկրորդ՝ զի անասունք զբնական գործս ոչ փոխեն, այսինքն՝ արուն առ հզն, իսկ մարդիկ եւ զայն եւս քակեցին՝ ըստ այնմ. «Զպէտքս բնականս ի պէտքս անբնականս» (Ա. Նոտմ. Ա. 26): Եւ այլ մեծամեծ չարիս գործեցին, զորս ոչ է արժան յիշել, վասն որոյ ասէ. «Յանկայր լնուլ գորովայն», այսինքն՝ նմանիլ անասնոց զնացիցն, «եւ ոչ ոք տայր նմա»: Իսկ իրրեւ տեսեալ մարդոյն զայնքան անարգութիւնն իւր, ի միտս եկեալ ասէ.

«Քանի՞ վարձկանք են ի փան հար [իմոյ] հացալիցք, եւ ես ասի՜ սովամահ [կորնչիմ]» (ԺԵ. 17):

Բայց աստ է տարակոյս ինչ, զի ցանկայր լնուլ յեղջերացն, եւ մեղքն պատրաստ գոյր, զիա՞րդ կամեցաւ դառնալ ի հայր իւր: Այլ այս է, զի հացին կենաց ցանկացաւ, եւ զի պակասեալ էին, վասն

որոյ «գնացեալ յարեցաւ յեղջիրսն խոզաց»։ Արդ, տեսեալ, զի ոչ ունէին նոքա զհացն կենաց, խնդրեաց զնա, որ կարողն էր տալ նմա զխնդրելին։ Ասէ. «Քանի՞ վարձկանք են ի փան հար իմոյ»։ Եւ եւս կրկին լինի հարց, թէ անառակ ի խոր խաւարի կացեալ, զիա՞րդ իմացեալ դարձաւ։ Զայս առաքեալն ուսուցանէ, թէ՛ «Աներեոյթքն Աստուծոյ երեսիլի արարածովքս իմացեալ փեսանի» (հմմտ. Նոմ. Ա. 20)։ Զի մարդիկ ունէին բանական իմաստութիւն, որովք զբնութիւն արարածոց գտին եւ զըրջանս լուսաւորացոյ, նմանապէս եւ զանազան արուեստս նովին քննութեամբ իմացան՝ եւ զարարիչն ամենայնի։ Եւ արդ, յորժամ մի ոք նկարեալ առաջի դնեմք՝ ի նա կապակցեալ ամենայն անառակ բնութեանս դարձումն։ Եւ եղիցի մեզ աւրինակ Աբրահամ, զի նա եղեւ սկիզբն աստուածապաշտութեան, զի մինչ ի նա ոչ գոյր։ Եւ զի՞ ընտրիչ եղեւ ամենայնի, զոր ասեմս։

Ա. Նախ՝ հայեցաւ ի բնութիւն անասնոց եւ գիտաց, զի անբանք էին, եւ ոչ գոյր ի նոսա գաւրութիւն։

Բ. Երկրորդ՝ ետես զքարինս եւ զայլ անշունչս, զի ոչ ինչ էին։

Գ. Երրորդ՝ զլուսաւորս իմացաւ, թէ ի սպասաւորութեան են, ուստի յայտնի երեւեցան, թէ ծառայք են։

Դ. Զորրորդ՝ զսովամահ բնութիւնս եւ ետես զսոսա որոշեալս յԱստուծոյ եւ յայսքան գարշելի փոստ անգեալ։

Ե. Հինգերորդ՝ եւ զայն եւս ետես, զի քան զամենայն բնութիւն պատուական էր ստեղծեալ զմարդն վասն մտաւոր եւ անձնիշխան կամացն։

Զ. Վեցերորդ՝ ծանեաւ եւ զայն, թէ պիտանի է արարչին իւրոյ, զի զամենայն արարածս ի նմա ծառայութիւնն կացոյց, եւ յայս յամենայնէ գիտացեալ՝ ասաց.

«Քանի՞ վարձկանք են ի փան [հար իմոյ հացալիցք]» (ԺԵ. 17)։

Եւ ո՞վք իցեն «վարձկանքն հացալիցքն»։ Թուի, թէ զլուսաւորսդ ասէ, որք միշտ անդադար ի շարժման կան, իսկ «հացալիցք» են, այսինքն՝ լուսով լցեալ են եւ ամենայնիւ անկարաւտ. եւ այս է «հացալիցք»ն։ Եւ ասացից.

«Նայր մեղայ յերկինս» (ԺԵ. 18)։

Աստ երեւի խնամք արարչին ի բնութիւնս, զի թէպէտ զիւրակործան եմք ի մեղս, սակայն ինքնագտակք եմք ապաշխարութեանն, վասն այնոցիկ, որ գործեցաքն, զոր եւ առ տնտեսն գովեաց զՏէրն։

Զոր աւրինակ նինուէացիքն իմացան, թէ վասն իւրեանց անաւրէնութեանցն քաղաքն կործանի, եւ դարձան ի մեղաց, սոյն աւրինակաւ եւ բնութիւնս.

Եւ յարուցեալ եկն առ հայրն (ԺԵ. 20)։

Եւ այս ոչ սոսկ բան, այլ կատարելապէս եկն, այսինքն՝ ի զղջումն։ Այս է «գալն»։ Եւ աստ Բ. (2) խնամք առաւել երեւի Քրիստոսի առ մեզ։

Նախ՝ զի ծառայք չէաք արժանի, որդի անուանէ զմեզ։

Եւ երկրորդ՝ զարարիչն մեր Հայր անուանէ, որ եւ այս զթութեան ցոյցք եւ ողորմութեան։

Յարեաւ ի հեռասփանէ ընդ առաջ գնաց (հմմտ. ԺԵ. 20)։

Ոչ ապաշխարութեան արտասոււս կամ հառաչանք, այլ միայն զիմեցաւ գալ՝ ասէ.

Անկաւ զպարանոցաւ նորա եւ համբուրեաց (ԺԵ. 20)։

Եւ թնազգ խոնարհութիւն երեւի աստ եւ քաղցրութիւն։

Ա. Նախ՝ զի խոնարհեցաւ ընդ առաջ զնալ անառակ որդւոյն։

Բ. Երկրորդ՝ ոչ գարշեցաւ ի գարշելի պարանոցէն, որ համբուրեաց զնա։

Գ. Երրորդ՝ զի զառաջին պատմուճանն ազոյց նմա։

Դ. Զորրորդ՝ զի մատանի եզ ի ձեռս նորա։

Ե. Հինգերորդ՝ կաւշիկ յոտս նորա։

Զ. Վեցերորդ՝ զի եզէն զեզն պարարակ վասն նմա։

Է. Եաւթներորդ՝ զի ուրախ եղեւ ընդ գտումն մեղաւորին։

Իսկ ի հանդիպել հաւրն՝ ասէ որդին.

«Նայր, մեղայ յերկինս եւ առաջի քո» (ԺԵ. 21)։

Ի սմանէ պարտ է ուսանել մեզ՝ մեղաւորացս, զի այն է պատճառն, որ թէպէտ Աստուած անյիշաչար լինի մեզ, մեք զմեր մեղանշականութիւնն ոչ մոռանամք։ Իսկ ընդ առաջ զնալն հաւրն, ցուցցուք ի յԱբրահամն, զոր աւրինակ եղաք՝ ասէ Ստեփանոս. «Աստուած փառաց երեսցաւ հարն մերում Աբրահամու, մինչդեռ ի Խառան էր» (հմմտ. Գործք Է. 2)։ Եւ ի Մննդոցն ասէ. «Երեսցաւ նմա Աստուած առ կալնեան Մամբրէի» (Մննդ. ԺԸ. 1)։ Եւ ուտելն զբաղարճն ընդ Աբրահա-

մու առ խորանաւն, եւ աղաչանքն Աբրահամու վասն Սողոմայեց-
ւոցն, եւ զաւետիան որդւոյն ծնընդեան, վասն որոյ դէպ է ասել,
թէ եւ զայս եւս պաղատեցաւ հառաչանաւք. «Տա՛յր, մեղայ յերկի-
նս եւ առաջի քո», զի զդէմ Աղամայ ունի նահապետն՝ ըստ որում
ասաց. «Տա՛յր, մեղայ յերկինս»: Իսկ «յերկինս» ասելն զղրախտն ասէ,
ուր առաջին յանցանքն Աղամայ եղեւ: Իսկ «երկին» կոչի զրախտն
վասն Ե. (5) եղանակի:

Ա. Նախ՝ զի բարձր է տեղեաւ:

Բ. Երկրորդ՝ վասն անմահութեան տե[ղ]եացն:

Գ. Երրորդ՝ վասն մերձ լինելոյն յերկինս:

Դ. Չորրորդ՝ վասն անապականութեան պտղոցն:

Ե. Հինգերորդ՝ վասն միշտ կանաչութեանն եւ պայծառութեանն:

Իսկ «առաջի քո» ասէ, զի չէ հնար, ասէ, թաքչել ի քում ամե-
նատես աչացդ, այլ ես հնարեցայ թաքչել ի ներքոյ թղեկոյն, զի
յորժամ մարդն զարհուրելով եւ ամաչելով առնէ զմեղսն, այն կէս
վնասու է: Զոր աւրինակ՝ լիրըն եւ անամաւթն առաւել է, նոյնպէս
զարհուրանաւքն նուազէ, քան զնա, վասն որոյ խոստովանի անա-
ռակ որդին.

«Ոչ եմ արժանի կոչիլ որդի քո, արա զիս իբրեւ [զմի ի վարձկա-
նաց քոց]» (ԺԵ. 19):

Աստ երիս իրս ուսուցանէ յանցաւորացս, որ թէպէտ խնամաւ-
քն Աստուծոյ արժանաւորի թողութեան մեղաց նա[խ]՝ զանձն ընդ
անցաւորսն ունել պարտ է, եւ երկրորդ՝ ոչ մոռանալ զյանցանս
իւր, եւ երրորդ՝ զի խոնարհ լինիցիմք, զի յորժամ զայս առնէ յան-
ցաւորն, Աստուած զայսոց ընդդիմակն առնէ: Զի որչափ մեք զմեզ
մեղանշական ըմբռնեմք, նա արդարացուցանէ զմեզ, եւ որչափ
խոստովանիմք, նա մոռանայ զմեր մեղքն, եւ որչափ ի խոնարհ
ունիմք զանձինս, նա բարձրացուցանէ զմեզ՝ ըստ այնմ. «Որ խոնար-
հեցուցանէ զանձն, բարձրացուցանէ» (Մաթթ. ԻԳ. 12, Ղուկ. ԺԴ. 11, հմմտ. Ղուկ.
ԺԸ. 14), որպէս աստ է տեսանել, զի ասէ անառակն. «Մեղա յերկի-
նս», իսկ հայրն անկեալ՝ համբուրէ: Եւ ասէ անառակն. «Չեմ արժա-
նի կոչիլ որդի»: Իսկ հայրն ասէ.

«Տանէք զպապմուծանն առաջին եւ ազուցէք [նմա]» (ԺԵ. 23):

Իսկ «պապմուծանն» զչնորհս աւագանին ասէ, զոր ի դրախտին
մերկացաւ: Եւ զի՞ պապմուծանի նմանեցուցանէ: Եւ այս վասն Ե.
(5) պատճառի:

Ա. Նախ՝ զի պապմուծանն զբոլոր մարմինն ծածկէ. այսպէս եւ
աւագանին շնորհք՝ զբոլոր մարդն:

Բ. Երկրորդ՝ զի պապմուծանին յատուկ է պայծառ լինել. այսպէս
եւ մկրտութեամբն պայծառանայ հոգին, զի՝ «Որք ի Քրիստոս մկրտե-
ցայք, գ-Քրիստոս զգեցեալ էք» (Գաղ. Գ. 27):

Գ. Երրորդ՝ զի յետոյ պատահի մարդոյ ազանել զպապմուծանն.
այսպէս եւ մկրտութիւնն, յետ մարմնական ծննդեանն պատահի
մարդոյն:

Դ. Չորրորդ՝ զի որք կամին, նոքա զգեհուուն պապմուծան. այս-
պէս եւ որք կամին, նոքա ծնանին աւագանաւն:

Ե. Հինգերորդ՝ զի թէ կամի ոք, հանէ զպապմուծանն. այսպէս
եւ կամաւք ուրանաք զչնորհս աւագանին, զոր աւրինակ կամաւ
խոնարհեցաւ Աղամ ընդ կնոջ, եւ կերան եւ մերկացան զլոյսն: Իսկ
զմերկութիւնն Աղամայ ոչ ոք յառաջնոցն չկարաց ծածկել, վասն
զի ամենեքեան ի ներքոյ պարտուց նախահաւրն անկեալ էին:
Ապա եւ ի ձեռն Տեառն զալստեանն արժանացաք նորին շնորհի՝
ըստ որում ասէ. «Գնացէք [այսուհետեւ], աշակերտեցէ՛ք զամենայն հեթա-
նոսս, մկրտեցէք [զմոսս]» (Մաթթ. ԻԸ. 19): Բայց այս սրբութեան նշանս
գոյր ի յառաջինսն, վասն որոյ յուսացաւ Ենովն, եւ Աբրահամ հա-
ւատաց, բայց առժամայն ընկալան եւ ոչինչ, բայց զաւրութեամբ
առին ի ձեռն հաւատոցն, զոր աւրինակ Աղամայ ասացաւ՝ ի նմին
ժամու մեռանել յաւուրն, յորում ուտիցէ զպտուղն (Կրն՝ Ծննդ. Բ. 17):
Եկեր եւ ոչ մեռաւ ներգործութեամբ, այլ՝ զաւրութեամբ մեռաւ,
ըստ նմին աւրինակի եւ զառաջինսն իմասցիս, առ որս իմացեալ
եղեւ խորհրդոյս տեսութիւն, բայց առանց Քրիստոսի ոչ ինչ առին:

Իսկ զի՞ հրամայէ՝ հանել զպապմուծանն եւ ազուցանել: Եւ այս
դէմք բանի միայն, զի Աստուծոյ ոչ է կարիս սպասաւորութեան,
այլ՝ հրամանաւ լնու, զոր ինչ կամի: Բայց ըստ աւրինակի թագա-
ւորաց խաւսի, այլ դէպ է ասելն, որպէս ասաց՝ առաքելոցն. «Գնա-
ցէք [այսուհետեւ], մկրտեցէք զամենայն [հեթանոսս]» (Մաթթ. ԻԸ. 19):

Իսկ զի՞ մատանի եղ ի ձեռն (Կրն՝ Ղուկ. ԺԵ. 22). այս զպատկերին
նորոգիլն յայտնէ՝ ըստ այնմ, որ ասէ Եսայի. «Յնձացէ անձն իմ ի Տէր,
զի զգեցոյց [ինձ] հանդերձ փրկութեան եւ պապմուծան [ուրախութեան]. իբրեւ

փեսայի [եղ ինձ պսակ] եւ [իբրեւ] հարսն զարդու [զարդարեաց զիս]» (Ես. ԿԱ. 10): *Եւ այն, զի ի ձեռն աւանդեաց զպատկերին նորոգիլն, ուստի յայտ է, զի ի գործն կայացոյց զպատկերն իւր, զի որք սուրբ են վարուք, նոքա ունին զպայծառ պատկերն աստուածային: Եւ զի՞ ձեռն զգործն նշանակէ: Եւ այս վասն է. (5) պատճառի:*

Ա. Նախ՝ վասն սովորութեան հասարակաց, որք ամենայն ձեռուք առնեն զարուեստն:

Բ. Երկրորդ՝ է միջակ տեղաւ ձեռն, որով կարէ մարդն զմարմնոյ գործն եւս կատարել եւ զհոգւոյ. զհոգւոյն, զի աղաւթէ ձեռուք եւ մարմնոյն. «Զվաստակս ձեռաց քոց կերիցես, երանի է քեզ, եւ բարի [եղիցի]» (Մաղմ. ՃԻԷ. 2):

Գ. Երրորդ՝ զի կարէ ձեռն եւ պատկեր յաւրինել ի ձեռն դեղոց. այսպէս եւ բարի գործք զպատկերն Աստուծոյ կարէ կանգնել:

Դ. Չորրորդ՝ զի ձեռն է կենդանացուցիչ մարմնոյ եւ գործքն՝ հոգւոյ:

Ե. Հինգերորդ՝ զի ամենայն փառք մարդոյ յառաջին ի ձեռաց. այսպէս եւ փառք հանդերձեալ կենացն յառաջին ի բարի գործոց՝ ըստ այնմ. «Տեսցեն զգործս ձեր բարիս եւ փառաւորեսցեն [զհայր ձեր, որ յերկին է]» (Մատթ. Ե. 16): *Եւ ասէ.*

«Ազուցէք զկաշիկն յոտսն» (հմմտ. ԺԵ. 22):

Այն է, զոր ասէ Տէրն. «Երու ձեզ իշխանութիւն կոխել զաւս եւ զկարիճս եւ զամենայն [զարութիւնս թշնամոյն]» (Ղուկ. Ժ. 19):

Եւ զի՞ «կաշիկն» զզաւրութիւնն նշանակէ:

Ա. Նախ՝ զի թագաւորական է կաշիկն. այսպէս՝ յաստուածային զաւրութենէն նորոգեալ մարդս պատերազմի ընդ թշնամւոյն:

Բ. Երկրորդ՝ զի զսպէ զոտսն յամենայն կողմանց. այսպէս՝ աստուածային զաւրութիւնն յամենայն չարէ պահէ:

Գ. Երրորդ՝ զի մեռելոտի մորթի լինի կաշիկն. այսպէս՝ մահկանացու բնութեանս ետ Աստուած զզաւրութիւն իւր:

Դ. Չորրորդ՝ զի կաշիկն զմարդն փառաւոր ցուցանէ. այսպէս եւ աստուածային խնամքն զսուրբսն գերագոյն ցուցանէ ամենայն աշխարհի:

Ե. Հինգերորդ՝ զի կաշիկն զմարդն բարձր պահէ յերկրէ. այսպէս եւ աստուածային զաւրութիւնն հեռի պահէ զմարդն ի չարեաց, որպէս ասէ Յոհաննէս. «Ո՛ր, որ զիս պահեցեր անմերձ ի խառնակու-

թենէ կանանց» (հմմտ. Ա. Կոր. Ե. 9, հմմտ. Յայրն. ԺԴ. 4): *Յեա որոց խրատութիւնս առնէ, ասէ.*

«Աձէք զեզն պարարակ, զենէք՝ կերիցուք եւ ուրախ լիցուք» (ԺԵ. 23):

Եւ այս զճշմարիտ պատարագիլն ի խաչին նշանակէ, ըստ որում ասէ մարգարէն. «Իբրեւ գոչխար ի սպանդ վարեցաւ, եւ իբրեւ գորոջ առաջի կորցի անմոռնչ կայ» (Ես. ԾԳ. 7, հմմտ. Գործք Ը. 32):

Եւ զայս աւրինակ տպաւորեցաւ առ Արրահամ ի պատարագելն ի Սահակայ, վասն որոյ ասէր Տէրն. «Արրահամ հայր ձեր ցանկացաւ փեսանել զար իմ, երես Իսահակ եւ ուրախ եղև» (Յովի. Ը. 56): *Յաղագս որոյ ասէ.*

«Կերիցէք եւ ուրախ լիցուք, զի այս որդիս մեռեալ էր եւ եկաց, կորուսեալ էր եւ գտաւ» (ԺԵ. 23-24):

Իսկ զի՞ եզին նմանեցուցանէ զՏէրն:

Ա. Նախ՝ զի եզն «հեզ» ստուգաբանի: *Եւ Տէրն ասէր.* «Ես եմ հեզ եւ խոնարհ սրբի» (Մատթ. ԺԱ. 29):

Բ. Երկրորդ՝ զի եզն սուրբ կենդանի է. *եւ Տէրն մեր ոչ արար մեղս.* «Եւ ոչ գրաւ նենգութիւն ի բերան նորայ» (Ա. Պետ. Բ. 22):

Գ. Երրորդ՝ զի պատարագելի է. *եւ Տէրն պատարագեցաւ ի վերայ խաչին՝ ըստ որում.* «Սրբութիւն մեղաց մերոց արարեալ՝ նստաւ ընդ աջմէ [մեծութեանն ի բարձունս]» (Երբ. Ա. 3):

Դ. Չորրորդ՝ զի եզն գործէ զերկիր եւ սերմանէ. *եւ Տէր մեր ասէ.* «Ել սերմանացան սերմանել» (Ղուկ. Ը. 5), *որ եւ սերմանեաց զԲանն կենաց ի յոգիս մեր, եւ հերկեալ պատառեաց զքարացեալ սիրտս մեր յուսով անվախճան կենացն:*

Ե. Հինգերորդ՝ զի եզն յոյժ աշխատի, քան զամենայն կենդանիս. *եւ Տէր մեր աշխատեալ մարմնով վասն մեր, ըստ որում ասէ.* «Վաստակեալ ի ճանապարհին՝ նստեր» (հմմտ. Յովի. Դ. 6), *եւ հանգիստ եղեւ ամենեցուն՝ ըստ այնմ.* «Եկայք առ իս, ամենայն աշխարհայք եւ ծանրաբեռնիք, եւ ես հանգուցից [զձեզ]» (հմմտ. Մատթ. ԺԱ. 28):

Իսկ զի՞ «մեռեալ էր եւ եկաց». ըստ կրկին պատժոյն կրկին նորոգումն արար:

Ա. Նախ՝ զի մեռեալ էր մեղաւք, այս է անբերելի մահ, զի զճշմարիտ կեանս սպանանէ, ընդդէմ այսմ կենդանութիւնս ետ՝ կարի զարմանալի եւ աստուածային եւ անապական:

Բ. Երկրորդ՝ զի կորեալ էր անհամեմատ, այս է հոգին ի դժոխս մաշելով, ընդդէմ այսմ ի յարկսն յաւիտենից գտաւ անդ, ուր ուրախութիւն է մշտնջենաւոր:

Արդ, վասն զի եհեղ Որդին Միածին զարիւն իւր սուրբ, ի ձեռն իւր արեան միջնորդութեան ընծայեաց զբնութիւնս մեր Հաւրն երկնաւորի, յաղագս որոյ ասէ.

Սկսան ուրախ լինել (ԺԵ. 24):

Իսկ ասելն, թէ՛ «Աձէք եւ զեզն պարարակ զենէք», եւ ոչ ասաց, թէ՛ «Տուք ի ձեռն անառակ որդւոյն, զի զենցէ», ուստի ուսաք յեկեղեցի, որ թէպէտ մեղուցեալն զղջանայ եւ արժանի լինի թողութեան, բայց ոչ է արժան նմա այն, որ պոռնկեալն է, եւս սպասաւորել անարատ խորհրդոյն եւ պատարագել: Այլ, որք պահեցին զսրբութիւն նմա, նոքա մերձ լիցին նմա, եւ թէպէտ մեղքն թողեալ է ի ձեռն զղջմանն, սակայն ի դասս ապաշխարողաց է այսուհետեւ եւ ոչ յառաջ կատարելոցն, վասն որոյ թէպէտ զշնորհս աւագանին ետ կրկին Հայրն երկնաւոր, որպէս զառաջինն, այլ ոչ հրամայեաց ի զենումն համարձակիլ անարատ գառինն, այլ լինել ուրախակից:

Որո՞յ պատճառ է, զի կրկին է գործ պատարագին:

Ա. Նախ՝ էութեամբ նմանիլ Աստուծոյ, որ է կուսութիւնն, որպէս եւ Քրիստոս կոյս էր: Եւ ապա՝ ծառայ լինել սրբութեան նորա, ըստ խորհրդոցն մաքրութեան եւ զղջման: Արդ, եթէ նման է Քրիստոսի մարդն ըստ սրբութեան կուսութեանն, կարէ գործակից լինել Քրիստոսի՝ ըստ որում ասէր. «Եղերուք սուրբ, զի ես սուրբ եմ» (Պեղ. Ա. 16): Իսկ եթէ կորոյս զայսպիսի սրբութիւն, ոչ կարէ գործակից լինել Քրիստոսի, ըստ նմանութեան նորա, որ ի յէութիւնն, այլ գործեցելոցն ուրախակից լինել, վասն տրտմութեան կամացն եւ արտասուացն եւ բազում սիրոյն, որ ի նա, զի որում շատ սիրէ, թողուսաց Տէրն (տին Ղուկ. Է. 47):

Եւ էր երեց որդին յագարակին եւ [մինչդեռ գայր եւ մերձ եղել ի քունն], լուաւ զձայն [երգոց եւ զպարուց], կոչեցեալ զմի ի ծառա-

յիցն՝ [հարցանէր, թէ զի՞նչ իցէ այն]: Եւ նա ասէ [ցնա. «Զի եղբայր քո եկեալ է եւ] եզեն հայր քո զեզն պարարակ» (ԺԵ. 25-27):

Այս է տեսութիւն բանիս, զի վերին զուարթունքն ոչ էին տեղեակ Քրիստոսի մարդեղութեանն, բայց միայն հրեշտակաց դասք: Եւ զի տեսան յեկեղեցի զուրախութիւն հոգեւոր ի համբառնալն ի յերկինս հիացեալ, հարցանէին վերինք զներքինն դասն. «Ո՞վ է սա, որ դիմեալ գայ յեղումայ» (Ես. ԿԳ. 1), որպէս պատմէ Եսայիաս: Նմին եւ Պաւղոս վկայէ, թէ՛ «Յեկեղեցոյ ուսան զբազմապարիկ իմաստութիւնս քո քնարեւորութեանդ» (հմմտ. Եփես. Գ. 10): Արդ, աստ կարգաւորի բանք մարդարէին Եսայիայ, որ յելսն վերին պատմէ, քանզի մերձեալ Տէր մեր յառաջին դասն, որ տեղեակ էին Տեառն, զի Գաբրիէլ եւ դասք իւր ի ծննդեանն եւ յամենայն տեղիս սպասաւորէին նմա, եւ ընդ առաջ եղել նմա անթիւ բազմութիւնն, եւ սկսան աւրհնել զանճառ խորհուրդն, վասն զի տեսին Աստուած մարդացեալ, եւ այնպէս աւրհնութեամբ յուղարկէին ի վերին դասն, իսկ վերինքն, որ բուն անգէտք էին իջանելոյ եւ մարդանալոյ նորա, տեսեալ զմարմնովն վեր ընթանալն, այլեւ զանլուր ձայնն առաջի դասուն, զի ընդ նմա գնային, սկսան հիացմամբ ասել. «Իսկ այս ո՞վ է, որ դիմեալ գայ յեղումայ» (հմմտ. Ես. ԿԳ. 1): Եւ սկսանի Տէրն ինքնին տալ պատասխանի, զի առաջի նոցա գնայր, ասէ. «Ես խաւսիմ զարդարութիւն եւ զիրաւունս փրկութեան» (Ես. ԿԳ. 1): Ի գործոյն զինքն յայտնեաց, եւ ոչ ի բնութենէ պատուոյն: Իսկ նոցա անգիտացեալ տակաւին համարձակեալ՝ ասեն. «Ընդ էր եւ կարմիր ձորձք քո» (հմմտ. Ես. ԿԳ. 2): Իսկ նա պատասխանեաց, թէ՛ «Ո՞վ իցէ» (հմմտ. Սաղմ. ԻԳ. 8), ըստ նմանութեան այսր բանի, զոր հայրն ասէ.

«Մեռեալ էր եւ եկաց, կորուսեալ էր եւ գտաւ» (ԺԵ. 24):

Ընդ նմին եւ Տէրն առաջի դէէ հարցաքննողացն զթշուառութիւն եւ զկորուստ մարդկան եւ զի ոչ ոք էր, որ փրկէր, ապա ողորմեցայ կորուսելոցն եւ հնձան հարի միայն զթշնամին ի խաչին եւ գտի զկորուսեալն եւ կենդանացուցի զմեռեալ ոգի մարդկան: Իսկ ներքին դասքն տեսին, զի անգիտութեամբ, իբրեւ զմարդ ոք հարցաքննեն, սաստեն իշխանութեանցն՝ ասելով. «Վամբարձէք իշխանք գորունս [ձեր ի վեր, համբարձցին դրունք յախտենից], եւ մարգէ թագաւոր փառաց» (Սաղմ. ԻԳ. 7): Այսինքն՝ թոյլ տուք, ճանապարհ արարէք: Իսկ նոքա ընդ այս եւս զարմացան, քանզի ոչ գիտէին զոք մարմնով թա-

գաւոր հզաւր: Ասեն. «Ո՞վ է սա թագաւոր փառաց» (հմմտ. Սաղմ. ԻԳ. 10), ապա ասեն ներքինքն. «Տէր զարութեանց, սա ինքն է թագաւոր փառաց» (Սաղմ. ԻԳ. 10): Եւ դարձեալ՝ այս եւս իսկ, զի տեսին զնա վերացեալ, քան զամենայն պետութիւնս, եւ անցեալ ի ներքին կողմ վարագուրին, նստի ընդ աջմէ մեծութեանն ի բարձունս: Ապա հարցեալ զներքինքն եւ ուսեալք ի նոցանէ զխորհուրդ մարդանալոյն, այս է երէց որդւոյն կոչել զմի ի ծառայիցն եւ հարցանելն ի նմանէ: Այս ամենայն, որ ասացաք, կրեցաւ առ հրեշտակաց դասն, վասն որոյ ասէ.

Բարկացաւ եւ ոչ կամէր մտնել (ԺԵ. 28):

Ջայս մարդկաւրէն ձեւացուցանէ զբանս, զի ահա յայտնի է, զի ահիւ եւ դողութեամբ կան առաջի Աստուծոյ, այլ զի տեսին զբազում գործս, զոր ինքեանք ոչ գիտէին:

Ա. Նախ՝ զի իմացան, թէ զմարդկային բնութիւնն միացոյց ընդ իւրում բնութեան աստուածութեանն:

Բ. Երկրորդ՝ զի նստաւ մարդացեալն ընդ աջմէ Աստուծոյ:

Գ. Երրորդ՝ զի իմացան, թէ նմա կրկնի ամենայն ծուներ երկնաւորաց եւ երկրաւորաց:

Դ. Չորրորդ՝ զի ծանեան, թէ մարդկային ազգ ի վեր անց քան զնոսա, զի առ Հայր ոչ ոք յիմանալեացն եմուտ՝ ըստ այնմ. «ԶԱստուծոյ ոչ ոք երես երբէք» (Յովհ. Ա. 18):

Ե. Հինգերորդ՝ զի լուան, թէ զմարդկային ոգիքն զամենեւեան հանեալ ի դժոխոցն, եւ ճանապարհ յերկինս արարեալ, ապա բարկացան, զի կրեն նոքա զայս ախտ, քանզի նման են հոգւոց մերոց, եւ զինչ հոգի ունի, եւ զայն նոքա ունին, այսինքն՝ նախանձ, փառասիրութիւն եւ ամբարտաւանութիւն, ապա այս է զանագանութիւն, զի ի վերայ նոցա ոչ բռնանան եւ նեղեն զնոսա, որպէս եւ զմեզ, վասն որոյ ի դէպ ասել, թէ ախտացան: Եւ ասեն.

«Այս քանի ամբ են [ծառայեմ զքեզ] եւ երբէք զպապուիրանաւ [քով ոչ անցի], ու մի ոչ երուր մեզ, զի ուրախ [եղէց ընդ բարեկամս իմ]» (ԺԵ. 29):

Իսկ արդ՝

Զեներ դմա զեզն պարարակ (ԺԵ. 30):

Ջայս ասել ոչ ոք բաւական է, այլ խորհեաց անախտիւ նախանձու: Այլ Հայրն բոլորից սիրտփանս մխիթարութեան եղ առաջի նոցա՝ ասելով.

«Դու հանապազ ընդ իս ես, եւ որ ինչ իմ է, այն քո է» (ԺԵ. 31):

Այս զհրեշտակաց զբարի կեանսն յայտնէ:

Ա. Նախ՝ զի են անկարաւտ բնութեամբ:

Բ. Երկրորդ՝ զի ի վերին բարձրութիւնս կան յիմանալի աշխարհն:

Գ. Երրորդ՝ զի չեն ախտալից, որպէս մեք, այլ՝ անախտ:

Դ. Չորրորդ՝ զի ոչ ունին տրտմութիւն երբէք անենեւին:

Ե. Հինգերորդ՝ զի չունին իր ինչ, որ հարկ է ի վերայ նոցա մեզս առնել:

Եւ արդ, զայս ամենայն եւ այլեւս առանց ճգնութեանց եւ առանց աշխատութեանց ստացան: Այլ ընդ ստեղծանելն ամենառատ բնութիւն եղ ի նոսա շնորհաւք ողորմութեանն իւրոյ, իսկ ընդդէմ նոցա հէզ եւ թշուառականքս մեք ունիմք բազում նեղութիւնս:

Ա. Նախ՝ զի ընդ թանձրագունի եւ ընդ վայրաբերի մարմնոյ եմք կապիս:

Բ. Երկրորդ՝ զի աւրէնք ախտիցն բազմէ ի վերայ մեր ըստ չափոյ մեղացն:

Գ. Երրորդ՝ զի մեր բնութիւնս հակառակ եւ պատերազմող է ընդ մեզ:

Դ. Չորրորդ՝ զի թշնամի եւս ունիմք՝ աւձ խաբող:

Ե. Հինգերորդ՝ զի յիմարութեան տեղի եմք անկեալ:

Զ. Վեցերորդ՝ զի ցանկութիւն ունիմք քարշող բնութեամբ:

Է. Եաւթներորդ՝ զի հեշտութիւնն զմեզ պատրէ:

Ը. Ութերորդ՝ զի աւգնականն ունիմք զգալիսս:

Թ. Իններորդ՝ զի յորժամ ի մեզս անկանիմք, մեծաւ բռնութեամբ կապիմք:

Ժ. Տասներորդ՝ զի յետ մեղանչելոյն յուսահատութեամբ փակեմք զգրունս ողորմութեան:

ԺԱ. Մետասաներորդ՝ զի անգիտանամք զճանապարհ փրկութեան:

ԺԲ. Երկոտասաներորդ՝ զի հիւանդութիւն մեղացն զչափաւոր իմաստութիւն մեր լուծանէ:

ԺԳ. Երեքտասաներորդ՝ զի թմրեալ ի մեղս, զգատաստան ինչ երեւեցուցանեն մեզ զգժուարութիւն:

ԺԴ. Չորեքտասաներորդ՝ զի կամաւ կուրացուցանեմք զմիտս մեր:

ԺԵ. Հնգետասաներորդ՝ զի լուծիչն այս ամենեցունց կարի ծանրազոյն եւ այպանելի, որ փրկէ զմեզ յամենայն տկարութենէ, այսինքն՝ զարիւն հեղուլ պարտ է, սով կրել, մերկութեան տանել, արտասուս չափել, միշտ հառաչել, բանտի եւ կապանաց համբերել, աշխատանաց եւ քրտանց, թքոց, պահոց եւ գետնախշտութեան եւ այլն ամենայն բժիշկ հնարեալ ըստ զանազան մեղացն, յորոց յայտոցիկ հեռի են իմանալեացն դասքն: Ապա յիրաւի էր ասելն.

«Ղու հանապազ ընդ իս ես» (ԺԵ. 31):

Յուրախութեանս կաս եւ մարդկային ազգ՝ ի չարչարանս, եւ զի եղբայր քո է, ոչ էր պարտ թողուլ զնա յայնպիսի տանջանս: Արդ, յիրաւի էր գեներւն նմա գեզն պարարակ եւ քեզ՝ ոչ, զի դու կենդանի էիր եւ աստ՝ առ իս, իսկ եղբայրն քո մեռեալ էր եւ կենդանացաւ (Ղուկ. ԺԵ. 32)՝ կորուսեալ էր ի դժոխս, բայց արդ, գտաւ յերկինս: Վասն որոյ ասէ յայլում տեղւոջ, թէ՛ «Ոչ է պիտոյ բժիշկ ողջաց, այլ՝ հիւանդաց» (Ղուկ. Ե 31, հմմտ. Մարկ. Բ. 17): Այսուհետեւ բանս իրաւապէս զկայ առցէ, բայց աղաւթից ձերոց եւ բարեխաւսութեամբ եղբարք ինդրեսցէ Տէր՝ ըստ անառակին զկորուսեալ եւ զտառապեալ ազգս մեր, զի բազմացան մեղք մեր եւ կորուսին զմեզ՝ քակեալ ի յեկեղեցւոյ, որոշեալ ի թագաւորաց, սպառեալ ի հայրապետաց եւ պակասեալ ի տաւնախմբութենէ եւ յաղաւթից եւ ի բարի գործոց, եւ այն, որ անառակ որդւոյն դիպեցաւ, առաւել բազմապատիկ ազգիս հայկազեան պատահեցաւ, զի գնացեալ յարեցաք ի խողեանն թուրքաստանեաց, եւ զոր, ինչ նոցա դիւրին անկանի, մեզ ոչ ոք տայ: Եւ վայ է ինձ, զի անառակ որդին եկեալ ի միտս եւ զպակասութիւնն իւր գտեալ, դարձաւ՝ մեղայ ասելով: Իսկ ի յազգի իմում ոչ ոք է, որ զմտաւ ածէ զկորուստ հոգւոց եւ մարմնոց մերոց եւ կամ թէ իմասցի, թէ այսչափ վտանգի եմք տարակուսեալ, վասն որոյ աղաչեմ ի զիմաստս ի գործ արկանել եւ իմանալ զտառապանս մեր եւ ասել ընդ անառակ որդւոյն. «Մեղա յերկինս առաջի քո» (ԺԵ. 18), զի ոչ արասցէ ըստ անաւրէնութեան մերում, այլ հայեցեալ յանարատ միածինն, որ վասն մեր մեռաւ, եւ զգինս արեան

նորա առ ինքն հաւաքեսցէ եւ քակեսցէ զբազմամանուած մեղս մեր եւ փրկական բղխմամբ կողին իւրոյ սրբեսցէ զչարաւացեալ հոգիս մեր եւ զերծուցէ զմեզ ի դառն տանջանացն եւ յանբերելի ցաւոցն: Մանաւանդ տացէ մեզ զեղջ եւ աղբււր արտասուաց՝ լուանալ զաղտեղի խորհուրդս մեր, զի եւ սրբոյ յարութեանն իւրոյ արժանաւորք լիցուք հաղորդել սուրբ մարմնոյ եւ արեանն իւրոյ շնորհաւք քաւչապետին ստեղծողին եւ անմահացուցանողին, որում պատիւ եւ փառք եւ զաւրութիւն, յաւիտեանս:



ՎԱՍՆ ԱՆԻՐԱՒ ՏՆՏԵՍԻՆ

Ղուկ. ԺԶ. 1-9

ՍՏԵՓԱՆՈՍ ՍԻԻՆԵՑԻ

Ասաց առ աշակերտսն. «Այր մի մեծաբուն ունէր փնփնուս եւ եղև ամբաստանութիւն զնմանէ, որպէս թէ վափնեսցէ զինչս նորայ» (հմմտ. Ղուկ. ԺԶ. 1):

«Տնփնուս» անիրաւութեան նշանակէ զամենայն մեղաւորս, որ իւր պարտապանաց թողու զյանցանս եւ առնէ իւր սիրելիս մամոնայ հարստութիւն եւ մեծութիւն ընչից, զոր բաշխեալ առատապէս կամ թողեալ զպարտիս, ստանա[յ] իւր սիրելիս զհրեշտակս եւ զհոգիս արդարոց:

ԻԳՆԱՏԻՈՍ

Եւ ասէ առ աշակերտսն. «Այր մի էր մեծաբուն, որոյ էր փնփնուս, եւ եղև զնմանէ ամբաստանութիւն, որպէս թէ վափնիցէ զինչս նորայ (Ղուկ. ԺԶ. 1):

Ըստ ժամանակին կարգաւ եղան ամենայն բանք առակացս այսոցիկ: Առաջին այն՝ իջանելն ի Հաւրէ եւ գնալ զհետ մորտեալ ոչխարին (տես Մարթ. ԺԸ. 12-14, Ղուկ. ԺԵ. 1-7) եւ զդրամն խնդրել եւ գտանել (տես Ղուկ ԺԵ. 8-10), յետ այնորիկ՝ տալ զինքն ի գենումն վասն անառակին դարձի (տես Ղուկ. ԺԵ. 11-32), զի թէպէտ եւ խորհուրդն առ Աբրահամաւ ցուցաւ, այլ ելք կատարածի խորհրդոյն պատարագաւն Քրիստոսի յայտնեցաւ, զի եւ ընդ պատիւ բնութեանս մերոյ նախանձաբեկք եղեն հրեշտակք: Արդ, իբրեւ այսքան խնամակալութեամբ ժողովեաց եւ արդարացոյց զբնութիւնս մեր, ապա շինէ տուն՝ զեկեղեցի եւ կեցուցանէ տնտես յայսմ տան՝ ըստ իւրաքանչիւր աստիճանի սպասաւորութեան: Եւ տնտես է իւրաքանչիւր ոք՝ եթէ մեծի եւ եթէ փոքու արժանացաւ շնորհի: Եւ է մեծ եւ առաջին՝ առաքելոցն սպասաւորութիւն՝ ըստ այնմ. «Զորս եղ Աստուած յեկեղեցոջ՝ այս են. նախ՝ զառաքեալս, երկրորդ՝ մարգարէս, երրորդ՝ զվարդապետս» (Ա. Կոր. ԺԲ. 28): Վասն այնորիկ յառաքեալսն

դարձուցանէ զգէմս առակին եւ ասէ առ աշակերտսն. «Այր մի էր մեծաբուն, որոյ էր փնփնուս»: Արդ, նոքա էին, որ զամենայն շնորհս եւ զամենայն գործոց մատակարարութիւնս ընկալան ի Քրիստոսէ, վասն որոյ եւ ամենայն անուամբ¹ նշանակին ի գրոց. «Երբեմն գումարեալ թագաւորք յերկնատրէն եւ կացեալ իշխանք ի վերայ երկրի» (Մաղմ. ԿԷ. 15): Այսպէս համարեցին, ասէ, զմեզ մարդիկ՝ իբրեւ զպաշտաւենայս Քրիստոսի եւ հազարպետս խորհրդոցն Աստուծոյ. «Եւ ինդիր է ի մէջ հազարապետաց, եթէ որ հաւաքարիմ գրցի» (Ա. Կոր. Դ. 1-2): Եւ դարձեալ՝ «Գեղեցիկ են, - ասէ, - ուրք աստիքսն յաղաղութան» (Նոսմ. Ժ. 15): Արդ, վասն զի այսչափ առատացաւ ի նոսա շնորհք Հոգւոյն, նորին աղագաւ կարեւոր էր առ նոսա հաստատել զբանն եւ նոքաւք՝ առ ամենեսեան: Վասն որոյ զնէ զանձն այր մեծատուն, որ սակաւ մի յառաջ զուարակ ածեալ ի գենումն (տես Ղուկ. ԺԵ. 11-32): Եւ աստ՝ «այր», թէ յաղագս այրացելոյ աստուածութեանն, եւ թէ վասն հզաւր եւ արիական բնութեանն իմանալ ո՛չ է անտեղի: Զի նա միայն է այր, որում չիք ինչ առ որ տկարանայ: Եւ «մեծաբուն»՝ նա, որ ամենայնիւ զծայրս մեծութեան բնութեամբ ունի եւ ոչ ստանալով յայլմէ: Արդ, ստացաւ նա արարչութեամբ զերկիր ամենայն՝ իբրեւ զյատակ եւ երկին՝ ի վերայ ձգեալ իբրեւ զձեղուն եւ հաստատեաց զսա իբրեւ զմի տուն՝ ամենայն առատ գանձիւք կանխաւ պաշտպանեալ: Դարձեալ ի լրման աւուրցս եկն եւ նորոգեաց զեկեղեցի եւ այսպէս կացոյց զմարդն տնտես. որում հոգեւոր շնորհ հաւատացաւ, նա յեկեղեցոջ եղաւ ի Հոգւոյն տնտես եւ որում մարմնական ինչ արուեստ կամ ստացուած, կամ իշխանութիւն ինչ, կամ զաւրութիւն ինչ հաւատացաւ, եւ նա նմին տնտես է: Եւ բարւոք կոչեցաւ տնտես, զի տնտեսն չունի ինչ զիւր սեպհական, այլ տէրունեացն հաւատացաւ նմա, ուստի եւ պարտական է ըստ կամաց տուողին մատակարարել: Այսպէս եւ մարդկան ազգ՝ չունին ինչ զանձանց, այլ Աստուծոյքն հաւատացան նոցա եւ պարտապան են ըստ կամացն Աստուծոյ զայն ի գործ արկանել, զի բարւոք գտեալ ի փոքունսն՝ եւ մեծին արժանասցին, ըստ որում եցոյց ի բանս քանքարացն (տես Մարթ. ԻԵ. 14-30, Ղուկ. ԺԹ. 11-27), որ տոհմականաւքն մատոյց եւ որ զլացաւ վասն հեղգութեանն: Դարձեալ՝ ո՞վ իցէ հաւատարիմ եւ իմաստուն տնտես, զոր կացոյց

¹ ԻՏ անուամբ

Տէր ի վերայ ծառայիցն, եթէ փոյթ գտանիցի, երանելի է, ապա թէ չարասցի՝ հարկանել զծառայան՝ եղկելի է եւ թշուառական: Արդ, զայս վասն հատուցման յաւել եղ՝ բարեաց եղելոց եւ չարաց, զի կամ երկիւղ ունիցին եւ կամ ցանկութեամբ բարեացն փութասցին ի հաճոյս կամաց տուողին: Իսկ աստ՝ առակաւս զհնարս անիրաւաց՝ փրկութեանն առաջի դնէ, զի մի՛ ոք, որ չար իցէ, անյուսուութեամբ կորիցէ, այլ ունի նա ժամանակ եւ տեղի յիս շնչոյն խնդրել զԱստուած եւ բարեգործել: Արդ, զայս ամենայն յուզէ, զի մի ոք ի մինն միայն հայեցեալ վնասեցի, այլ յամենեցունց անտի զաւգտակարն ունիցի ի պէտս փրկութեան: Եւ ունին իմաստք խորհրդոյ այսպէս՝ եցոյց զկամս քաղցրութեան հաւրն ի վերադարձի անառակին, զի այնպէս եցոյց զխնամս մարդասիրութեանն, մինչեւ նախանձու շարժել հրեշտակաց: Եւ զի մի ոք յայս հայեցեալ յորս այս կացցէ եւ անհոգ լիցի՝ կարգէ զհետ նորին եւ զայն, որ անիրաւ գտաւ առ պարզեւատուն: Եւ անուանէ «ծառայ», զոր ի շնորհաց ժամանակին որդի կոչեաց, վասն զի շնորհն մի անգամ է, եւ յամենայն ժամ շնորհ լինել ոչ ունի, այլ յետ շնորհին գործոց քննութիւն է՝ արդարութեամբ հատուցումն ի գալստեանն Տեառն, յառնուլն համարս ստուգութեամբ եւ ի հատուցանելն՝ ուղղութեամբ²: Վասն որոյ յայսմ առակի զգուշացուցանէ յառաջ քան զգալն եւ գատելն եւ չափելն՝ ըստ անիրաւութեան անիրաւացն, զի այսպէս միտս ստասցին՝ մերկանալ զանիրաւութիւնն:

Եղև,- ասէ,- գնմանէ ամբաստանութիւն, որպէս թէ վափնիցէ զինչս նորա (ԺԶ. 1):

Եւ ո՞ք ոմանք են արդեաւք ամբաստանողքն, եւ զիա՞րդ ամբաստանութեան կարաւտէ իմանալ զյայտնի վարս ուրուք, այն, որ զաներեւոյթս մտաց տեսանէ եւ նախքան զգործելն ինչ: Արդ, թէպէտ նա ամենատես է բնութեամբ եւ ոչ կարաւտէ³, եթէ գուշակեցցէ ոք, սակայն զի երկայնամիտ է, ներէ ժամանակ ինչ յանցաւորացն, իսկ մարդիկ կարճամիտ գոլով, ի չարութեանէ զոք տեսեալ ի յափշտակութեան եւ ի նեղել գտնանկա եւ յայլ եւս գործս զազրալիս՝ հեղեալ անբարշտութեամբ ձանձրացեալք յայսպիսեաց

¹ ԻՏ իրաւացի] անիրաւաց

² ԻՏ ողորմութեամբ] ուղղութեամբ

³ ԻՏ կարաւտի

աստի, զձեռս ընդ երկինս ամբարձեալք՝ բողոքեն առ Աստուած՝ ըստ այնմ, զի ասէ. «Զրկեալն ի ձէնջ աղաղակէ եւ բողոք հնձողաց ձերոց ել առ Աստուած» (հմմտ. Յակ. Ե. 4): Նաեւ հրեշտակք, որք կարգեցան յերկրի՝ պահապանք տանս՝ շրջել ընդ մարդկան, են ամենայնիւ մաքուրք եւ մինչ տեսանեն զգարչ գործս ամբարշտաց տաղտկացեալք եւ նոքա ամբաստան լինին առ Աստուծոյ, զի մի միշտ երկայնամիտ լինիցի, այլ եւ՝ վրէժխնդիր՝ ըստ այնմ. «Բարկութիւն սրտմտութեան Տեսն, իբրեւ զհուր ձորալիր պարանցաթաղ յորդեցէ» (Ես. Լ. 28-30). եւ՝ «Յայրնելոց է բարկութիւն Աստուծոյ ի վերայ ամենայն անբարշտութեան եւ անիրաւութեան մարդկան» (Նոսմ. Ա. 18): Եւ դարձեալ՝ եթէ զմեծութեամբ քաղցրութեանն Աստուծոյ եւ զներելովն եւ զերկայնմտութեամբն արհամարհիցես, չգիտիցե՞ս, զի քաղցրութիւնն Աստուծոյ կամի զքեզ յապաշխարութիւն ածել: «Այլ ըստ խստութեան քում եւ ըստ անգեղջ սրտիդ, գանձես քեզ բարկութիւն յառոր յայրնութեան արդար դարաւորութեանն Աստուծոյ» (հմմտ. Նոսմ. Բ. 5): Եւ կարի բազումք են յայսպիսիք ի Գիրս, որ զներելն եւ զիջանելն Աստուծոյ յայտնեն: Եւ դարձեալ՝ զսաստ սպառնալեաց վրէժխնդրութեանն՝ ըստ որում եւ աստ՝ ի ներելն Աստուծոյ ոչ զանգիտեաց ի ցասմանէ անտի, մինչեւ ամբաստան լինելով շարժեցին զՏէրն ի վրէժխնդրութիւն: Վասն որոյ.

Կոչեաց գնա եւ ասէ. «Զի՞նչ է այս, որ լսեմս զքէն. րո՞ւր գիտմար րնպետութեան քոյ, զի ոչ եւս կարես լինիլ րնպետ» (ԺԶ. 2):

Մարդկաւերինաբար ձեւացուցանէ զբանն, որպէս թէ լուաւ եւ տակաւին եւս յերկբայս է եւ քննութեամբ կամի կեալ ի վերայ ստուգութեանն: Արդ, զայս կամ կարգ բանիցն պահանջեաց, կամ խրատել զմեզ կամեցաւ՝ մի վայրապար առանց քննութեան զոք դատել, այլ հաւաստի քննութիւն նորա ի յարութեան¹ անդ սահմանեալ է, յորժամ ընդ բանից եւ ընդ մտաց շարժման, որք մտին ընդ մեզ ի գերեզմանս մեր, համարս տալ պարտապան եմք, այլ աստ միայն կոչելն է, որով լուծանէ ի կենաց աստի: Իսկ ասելն՝ «ոչ եւս կարես լինիլ րնպետ», փոխանակ ասելոյ, եղեալ է՝ «Ոչ եւս է մարթ լինել քեզ րնպետ», զի ոչ է աւրէն չարի ուրուք եղելոյ՝ կալ ի նմին, յորում անաւրինագոյն գտաւ, զի գոր, ինչ ընկալաւ ոք յԱստուծոյ, պարտ է մեծաւ զգուշութեամբ հատուցանել Աստուծոյ՝ մաքուր,

¹ ԻՏ յարութեան] յարթայութեան

առանց խառնակութեան չարեաց: Իսկ որ վատթարագոյն գտաւ, եթէ հոգեւորին էր վերակացու կացեալ եւ եթէ մարմնաւորի ինչ մատակարար եղեալ՝ ոչ է աւրէն կալ ի նմին, այլ տարածամ բառնալ, զի մի եւս վատնիչ լինիցի աստուածայնոց գանձուցն: Եւ թէ զի՞նչ աւրինակ բանից վատնիչ լինելոցն իցէ, գիտեմ, թէ ամենայն ոք կարաւ չէ առ որ հայեցաւ եւ ետես եւ զբանն յաւզել, յաղագս որոյ մեզ աւելորդ է ի գրի աստ կարգել, այլ յայն փութալ, զոր ինչ նեղեալ առ վտագնի՝ առաջի եդ եւ հնարեցաւ գտանել զայն, ինչ որ եւ ի նմին իսկ ի պահանջողէն վկայեցաւ, թէ իմաստութեամբ արար, որ եւ ամենեցուն փութալի ցուցաւ:

Խորհեցաւ, ասէ, ի միփս իւր, թէ զի՞նչ արարից, զի փէր իմ հանէ զփնփնութիւնս, այս է՝ լուծանէ ի կենաց ասփի, գործել ոչ կարեմ (հմմտ. ԺՁ. 3):

Զի չիք ինչ ժամանակ ներելոյ, զի գործովք առաքինութեան զժանգ անաւրէնութեանն յանձնէ քերեալ՝ ի բաց ընկեսցէ, եւ փոխանակ՝ բարեացն գործովք լցցի եւ յանփոփոխ կեանսն մերձեալ՝ ամենայն ինչ փակեալ մարդկան: Նաեւ ոչ որ մուրանալն կամի, գոյ տեղի, վասն այնորիկ ասէ՝ «մուրանալ ամաչեմ» (ԺՁ. 3): Թէպէտ զամաչելն դնէ առաջի վասն կարգին, սակայն անդ ողորմութիւն գտանել եւ կարի լրբութեամբ ժտողին ոչ է, զի եւ ոչ մեծատունն ի խնդրելն ընկալաւ ինչ¹ եւ ոչ կուսանքն, որոց պակասեաց իւղն (Մապթ. ԻԵ. 1-13): Արդ, սա տակաւին ի մարմնի գոլով, ծանեաւ, թէ ոչ ներէր նմա ժամանակն գործել ինչ, եւ որ առաջի կայր աշխարհն գնալոյ, ողորմութեամբ կեալ ոչ ունէր:

Ապա ասէ՝ «Գիփեմ զինչ արարից»: Եւ կոչեալ զպարպապանս փեառն իւրոյ, ասէ ցառաջինն. «Դու քանի՞ ինչ պարփս փեառն իմոյ»: Եւ նա ասէ, հարիւր մար ձիթոյ: Եւ ասէ ցնա. «Կա զգիր քո, եւ նիսպ, գրեա յիսուն»: Ասէ եւ ցմիւսն. «Դու քանի՞ ինչ պարփս»: Եւ նա ասէ. «Նարիւր քու ցորենոյ»: Ասէ ցնա. «Կա զգիր քո եւ նիսպ, գրեա ութսուն» (ԺՁ. 4-7):

Ի՞նչք առակիս համարէն յայն հայի, զի զոր ազահութեամբ ժողովեաց՝ փութալ² սփռել եւ տալ աղքատաց եւ արտասուաւք եւ

¹ ԻՏ > ինչ
² ԻՏ փութալ] փութալ

խոստովանութեամբ անկանել առաջի Աստուծոյ եւ հառաչանաւք խնդրել զնա: Բայց մեզ պարտ է յարմար՝ ըստ դրութեան¹ բանիցն եւ զթարգմանութի՛ւնն մերձ կարգել, զի մի՛ ինչ թերատես լիցի: Եւ արդ, գիտելի է մեզ այս, զի իբրեւ աշխարհ իմն է բնութիւնս, եւ յաշխարհի բնութեանս՝ եղաւ յարարչէն միտքս տնտես, եւ պարտապանք Տեառն են հոգին եւ մարմինն: Եւ միտքն իշխանական գոլով եւ կառավար եւ ուղղիչ սոցա՝ յինքն առեալ, ունի զգիր պարտեացն, որով առ Աստուած յանցաւոր գտաք: Եւ որքան է ի հեշտութեան եւ ունի զախորժակսն ախտակիր բնութիւնս՝ հարեալ ի սէր աշխարհի, ոչինչ է նմա փոյթ վասն սպառնեալեաց դատաստանացն Աստուծոյ եւ ո՛չ կամի տալ զգիր պարտեացն ի ձեռս հոգւոյն եւ մարմնոյն, զի խոստովանութեամբ եւ ապաշխարութեամբ պատառեսցեն, այլ ըստ նմանութեան այնր տնտեսի՝ հարկանէ զծառայակից հոգին եւ զմարմինն՝ ուտել եւ ըմպել ընդ պոռնիկս: Մաղթանաց հոգւոյն պարտականի ո՛չ անսայ, այլ ընկղմեալ² ի ցանկութեանց աստի կենացս եւ վարակեալ ի մեղացն կապանաց՝ ի վեր հայել եւ թիթեւանալ ի ծանր բեռանց մեղացն ոչ կամի: Իսկ ապա մերձեալ պահանջողն յայնմանէ, որ կոչէ տալ զհամար տնտեսութեանն եւ ունի ի նմին ժամու անհնարին տագնապ ցաւոց զմարմինն, բարձեալ է եւ ցանկութիւն, որով հեշտացեալ՝ յաւրանայր. ապականեալ որովայնն, ո՛չ բաղձայ կերակրոց եւ ըմպելեաց եւ զոր մատուցանեն՝ դժուարելով, ի բաց վարէ եւ զյոյժ համեղագոյնսն ի կերակրոց՝ իբրեւ ի գարշ տեսլենէ տաղտկացեալ: Սպառի եւ եռանդն ցանկութեան՝ պոռնկական դիմաւքն կախարդեալ, որք իբրեւ կապանաւք ձգէին՝ քարշեալ իբրեւ զշուն տոռամբ եւ անեալ իբրեւ զարջառ ի սպանումն եւ իբրեւ զեղջերու հարեալ զլերդակողմն (փնս Առակ. Է. 22):

Այլ յայնժամ առ վտանգի ցաւոցն եւ որք յոյժ առաւելեալ են պայծառութեամբ գեղոյ, չէ ինչ փոյթ նորա: Բարձեալ է եւ սէր պայծառ զգեստուց եւ ոսկւոյ եւ արծաթոյ ցանկութիւն, դադարեալ է փառասիրութիւն եւ նախանձ եւ մախանք եւ առաջիկայ լքանելն զայս եւ յայլ աշխարհ գնալոյն ճանապարհ: Վտանգէ եւ ընդ ցաւոց բնութեանն կրից եւ երկիւղ անտի տանջանացն, եւ

¹ ԻՏ գրութեան] դրութեան
² ԻՏ զմայլի

ամենայն ուստեք տրտմականքն յաճախեն: Ապա այն, որ անիրաւութեամբ զամենայն ժամանակն զհետ զնաց արտիցն ցանկութեան, յայնմանէ պակասեալ, կոչէ յինքն զհոգին եւ զմարմինն, տայ ի ձեռս նոցա զգիր պարտեացն, զի թերեւս հնար ինչ լինիցի թեթեւանալ ի բեռանց անտի եւ ազատիլ ի խղճէ մտացն: Եւ առաջին՝ ասէ հոգւոյն, քանի՞ ինչ են պարտիք մեղացն, եւ նա վասն զի ի գլուխ եհաս ամենայն անաւրէնութեան, զի հարիւրն թիւ կատարեալ է, ըստ որում եւ ի սերմանցս բարեաց պողարերութեան ի հարիւրորդն ժամանեաց թիւ, որ ի գլուխ ամենայն բարեացն եհաս եւ բովանդակ զամենայն առաքինութիւնս հատոյց: Ըստ նմին եւ աստ, որ ի գլուխ ամենայն չարեաց եհաս, ի հարիւրորդն ժամանեաց թիւ, զի ոչ իւրք պակաս ի չարեաց գտաւ: Եւ ապա ցուցանէ բանիւն, թէ այնպիսեաց յանցանաց, որ ընդ հոգին միայն անցանեն առանց գործակցութեան մարմնոյն, կէս վնասուն թողեալ լինի, վասն զի թեթեւ եւ դիւրաշարժ է ի մեղս եւ դժուար արգելելի վասն երազութեան բնական բերմանն եւ անժամանակաբար շաղի ընդ ցանկութեան, նորին աղագաւ բազմի, արժանանայ շնորհի յարդարադատ իրաւանցն Աստուծոյ: Ասէ եւ միւսոյն՝ դու քանի՞ ինչ պարտիս: Իսկ նա, վասն զի եւ մարմնով ընդ ամենայն էանց տեսակս չարեաց, զնոյն թիւ առաջի դնէ, արժանացուցանէ եւ զսա շնորհի, սակայն սակաւագոյն, քան զնորայն, զի մարմին կարի շաղի ընդ մեղսն եւ առաւել հեշտանայ զարչ ցանկութեամբն, եւ զոր մարմնով ոք գործեաց, կամակոր մտաւք յանցեալ, վասն զի ունէր՝ խափանել զնա եւ ոչ կամեցաւ, այլ յաւժարութեամբ եւ արհամարհանաւք աւրինացն, զհետ զնաց կորստական մեղացն: Եւ զի մարմին ծառայական եւ դժուարաշարժ, ժամանակի կարաւտանայ եւ գործակցի՝ լնուլ զցանկութիւնն, վասն որոյ դիւրին է արգելուլ զբերումն նորա եւ բարեաց խորհրդով իբրեւ սանձիւք ընկրկել զանվայելուչ յարձակումն նորին: Քանզի զի՞նչ դժուարին է՝ արգելուլ զձեռս ի հեղլոյ զարիւն եւ ի հարկանելոյ եւ ի զրկելոյ եւ յազահութենէ եւ յորովայնամոլութենէ եւ ի պոռնկութենէ գէջ խառնակութեանց՝ եւ որ սոցին նման են եւ որ՝ այլ եւս անաւրինագոյն քան զնոսա: Յորոց լուելն եւ կալն ի հանդարտութեան եւ չափով մերձենալ ի կարեւորագոյնսն դիւրին է, իսկ անչափ տաժանիւն արտիցն ցանկութեամբ՝ կարի դժուարին: Արդ, վասն սոցին այսոցիկ կրից հաւաստի քննութեամբն փոքր ինչ ներէ եւ մեղացն

մարմնոյ: Դարձեալ եւս քննելի է՝ զի՞նչ է, զի նշանակաւ որոշեաց ձէթ եւ ցորեան լինել պարտեացն, վասն որոյ չէ պարտ վայրապար զնիւթոյն բնութեամբն անցանել, այլ խնդրել եւ աստ իմաստս: Արդ, զոր աւրինակ զանկեալն ի ձեռս աւազակաց ձիթով եւ զինով բժշկեաց՝ նշանակեալ զաւժումն մկրտութեանն եւ զկենդանաբար արիւնն, որով փրկեցաք: Ըստ նմին եւ աստ՝ մեղուցեալ անձն յետ աւազանին շնորհաց եւ հաղորդութեան մարմնոյ եւ արեանն՝ պարտապան սոցա գտաւ: Եւ ի ներելոյ՝ ի թողութեան ժամանակին, վասն զղջման եւ պաղատանացն, եւ զոր ազահութեամբն ստացաւ՝ տալ կամելով կարաւտելոց, զոր աւժման մկրտութեանն պարտական գտաւ, կէս վնասուն թողեալ լինի: Իսկ զոր առ մարմինն Տէրունական լրբութեամբ յանցեալ անարժան հաղորդութեամբն ի զղջման եղեալ՝ գտանէ եւ այնմ ներումն թողութեան, բայց սակաւ՝ զհինգերորդ մասն միայն: Վասն զի կարի ծանր է մարմնոյ եւ արեանն Քրիստոսի հաղորդութիւնն՝ ըստ առաքելոյն. «Փորձեցէ մարդ զանձն իր եւ ապա ի հազէն անպի կերիցէ եւ ի բաժակէն արբցէ: Ջի որ ուրէ եւ ըմպէ անարժանութեամբ, պարպապան եղիցի մարմնոյ եւ արեանն Տեսուն» (Ա Կոր. ԺԱ. 28-29): Եւ որ ոք զաւրէնան Մովսէսի արհամարհեաց, անողորմ զատաստանաւ ասացաւ, զի ամենայն ժողովուրդն սատակեսցեն զնա քարամբք¹, ապա քանի՞ սաստիկ պատժոց են, ասէ, արժանի, որ անարժան հաղորդեցան, զի «զՈրդին Աստուծոյ առ ոտն հարեալ կոխեցին եւ զարիւնն Նորոյ ուխտին անսուրբ եւ խառնակ համարեցան եւ զհոգին շնորհաց թշնամանեցին» (Եբր. Ժ. 28-29): Արդ, այսպէս անչափ յանցանք են եւ ծանր վնաս արեանն Աստուծոյ պարտապան լինել անարժան հաղորդելովն, բայց սակայն վասն մեծի մարդասիրութեանն աւրինակ ներելոյ առաջի եղ, զի մի ոք ի մեծութիւն վնասուն հայեցեալ՝ անյոյս կորիցէ: Յաղագս որոյ խրատէ ողորմութեամբ եւ ցուցանէ զքաղցրութիւն բարերար կամացն, թէ յամենայնի պարտ է յուսալ, թէպէտ եւ կարի անբաւ են պարտիքն, եւ դաղրեալ է ժամանակ ապաշխարութեանն: Վասն այնորիկ ասէ.

Գովեաց րէր զփնփնան անիրաւութեան, զի իմաստութեամբ արար (ԺՁ. 8):

¹ ԻՏ քարամբ] քարամբք

Իսկ արդ, եթէ գովելի է նմա այս, մի՛ վերջասցուք եւ յելսն մեր խնդրել զնա, թէպէտ եւ կարի ծանունք են բեռինքն եւ բարձրացեալ, քան զգլուխս մեր, զի ահաւասիկ ինքն է թողութեանն շտեմարանապետ եւ վասն նորին զաւրացուցանէ զառատութիւն շնորհին: Զի թէեւ ոչ ունի արդարացուցանել մինչ զի ժառանգաւոր Աստուծոյ լինել, սակայն յայնմանէ ազատեալ է, զոր ընդ մէջն կտրել դատեցաւ եւ զոր կապեալ ոտիւք եւ ձեռաւք՝ հրաման ետ հանել ի խաւարն արտաքին (տն՝ Մատթ. ԻԲ. 13): Եւ արդ, կարի մեծ է յայսպիսեաց ապրելն: Եւ զի աւգտակար է, ապաքէն նա ինքն գիտէ, որ այսպիսի առակս յաւդեաց, զի ոչ եթէ վայրապար ինչ ի նմանէ ասացեալ եղեւ, այլ վասն զի ունի նա այսպիսեաւքս տալ քաւութիւն: Վասն նորին եւ գովէ զտնտեսն անիրաւութեան՝ յասելն. «Իմաստութեամբ արար»:

Զի որդիք աշխարհիս այսորիկ իմաստագոյնք են, - ասէ, - քան զորդիս լուսոյ յազգիս իւրեանց (ԺՁ. 8)

Վկայեաց իմաստագոյնս լինել զգտաւզսն հնար փրկութեան, քան զայնս, որոց եւ ոչ մի ինչ փոյթ եղեւ վասն հնարիցն փրկութեան: Արդ, որդիս լուսոյ անուանէ զհրեշտակս վասն պարզ եւ անախտ բնութեան նոցա: Եւ թէ զիա՞րդ մարդկան ազգ իմաստնագոյն, քան զնոսա ցուցան, անտի առցես զաւրինակն, զի մարդիկ, անկեալ ի փառաց եւ աւտարացեալք յԱստուծոյ, հնարս գտին ապաշխարութեամբ խնդրել զԱստուած եւ մերձենալ առ նա անախտ կենալք՝ առանց խրատու աւրինացն, որով ծանեան, թէ զոր յանցանքն աւտարացուցին, գիտէ ուղղութիւն ընտանի առնել եւ ի ճանապարհէն, յորմէ խոտորելովն վրիպական գտան, ընդ նոյն հետս դառնալն ունի ի նոյն անվրէպ ածել: Եւ զայս աւրինակ ուղղութեան բազմաւք ունիմք ճշմարտել: Իսկ որ ի դասուց անտի նոցա շեղեալ անկան, այսպիսի ինչ նոցա ոչ եղեւ, այլ եւս չարացան անմտութեամբ: Եւ մի ոք առ այս ընդդէմ դիցէ ասել, թէ վասն զի ոչ է նոցա մարմին չարչարելի, որ տաժանաբար կրիւք արտասուաց եւ տքնութեան եւ այլոց առաքինութեանց ուղղութեամբ ունիցին հաշտ Աստուծոյ հանդիպել: Առ որս ի դէպ է ասել, զի թէ եւ ի նոյն տեղի, ուստի անկաւ, ելանել ոչ ունէր, սակայն այլ եւս չարանալն կարի անտեղի էր: Ուստի աւրէն էր իմանալ, թէ այն, որ վասն յանցանացն այնոցիկ յերկիր ի խոնարհ ընկեց ի բարձրութենէ ան-

տի, ունի նա, նովին զաւրութեամբ եւ ըստ յաւելուածոյ անհնազանդութեան նորա եւ չարանալոյն՝ յաւելուլ նմա հարուածս եւ դատաստանաւ ըստ բազմապատիկ չարեացն հատուցանել ի վերայ նորա բազումս եւ կարի եւս տանջողական նեղութիւնս: Այլ նա յայսպիսեաց ինչ զմտաւ ոչ ած, այլ անմտացեալ, ի պատերազմողի կարգի՞ զինքն հաստատեաց եւ կացոյց²: Եւ ընդ պատկերին Աստուծոյ մարտուցեալ պատրանաւք ուսոյց եւ նմա ապստամբել եւ հաւանեցոյց գործակից լինել իւրում անաւրէնութեանն: Եւ այսպիսի չարասէր եղեալ՝ անաւրէնութեամբ զբնութիւնս մեր ապականեաց, մինչեւ շարժեալ Աստուծոյ վրէժս՝ հատուցանել նմա: Եւ այս է, զի պատրաստեաց նմա հուր տանջողական իմանալի բնութեանն, վասն որոյ, թէ յետ անկմանն ապաշաւեալ էր զչարիսն եւ կացեալ էր ի հնազանդութեանն Աստուծոյ եւ մերս բնութիւն ի մերս կարգի, ապա այնպէս տանջանք ոչ պատրաստէին նմա: Եւ արդ, եթե զայս իմաստութիւն ստացեալ էր, երանելի ոմն էր: Զի թէպէտ եւ զդասն ելիք եւ զտեղի փառացն կորոյս, սակայն բնութիւն ունէր անմահ եւ անապական եւ անկարաւտ, զոր ոչ եբարձ ի նմանէ յանկանելն նորա: Արդ, այս է անիմաստութիւն նոցա, եւ այս է իմաստութիւն մեր, զի գիտացաք առ վտանգին խնդրել զԱստուած եւ դառնալ առ Հայրն եւ գտանել խնամս յԱրարչէն եւ հասանել թողութեան: Վասն որոյ ասէ.

Իմաստագոյնք են որդիք յաւիտենիս այսորիկ քան զորդիս լուսոյ յազգիս իւրեանց (ԺՁ. 8):

ՍԱՐԳԻՍ ԿՈՒՆԴ

ԻԳ Այր զինքն անուանէ, որ յառաջ զուարակ ածեալ ի զենումն, եւ աստ այր յաղագս այրացեալ աստուածութեանն եւ վասն հզաւր եւ արիական բնութեանն, եւ տկարանալի: Մեծատուն[ն] ամենայնիւ զծայրս մեծութեանն բնութեամբ ունի եւ ո՛չ ստանալով: «Որոյ էր փնփր[ես]»: Արդ, ստացաւ նա արարչութեամբն զերկիր իբրեւ զյատակ եւ զերկիրն իբրեւ զձեղուն՝ ի վերուստ ձգեալ, եւ հաստատեաց զսա իբրեւ զմի տուն ամէնառատ զանձիւք՝ պաշտպանեալ

¹ ԻՏ կարգ

² ԻՏ եցոյց] կացոյց

կանխաւ: Եւ [ի] լրման ժամանակացն եկն եւ նորոգեաց զեկեղեցի, եւ կացուցանէ տնտես զմարդ ըստ իւրաքանչիւր աշտիճանի սպասաւորութեան: Եւ իւրաքանչիւր ոք եթէ մեծի եւ եթէ փոքու արժանացաւ շնորհի, եւ եղաւ ի հոգոյն տնտես, որում մարմնական ինչ արուեստ կամ ստացուած կամ իշխանութիւն հոգեւոր կամ մարմնաւոր կամ զաւրութիւն հաւատացաւ նմա եւ նմին տնտես է: Զի տնտեսն չունի ինչ զիւր սեփական, այլ ի տէրունեացն հաւատացաւ նմա, եւ պարտական է ըստ կամաց Տեառն մատակարարել: Այսպէս եւ մարդկան ազգի ի Տեառնէ տուաւ նոցա, եւ պարտական են ըստ կամացն Աստուծոյ զայն ի գործ արկանել: Որպէս ի քանքարսն է տեսանել, որք ի փոքուն գտան բարիք, մեծին արժանացան եւ որ զլացաւն՝ պատժեցաւ (Կրն՝ Մարթ. ԻԵ. 14-30):

Եւ ասէր առ աշակերպոսն (Ղուկ. ԺԶ. 1):

Առաջին եւ մեծ սպասաւորութիւն առաքելոցն: Ըստ այնմ, թէ՛ «Զորս եղ Աստուած յեկեղեցոջն, նախ՝ զառաքեալսն, երկրորդ՝ զմարդարէս, երրորդ՝ զվարդապետս» (Ա. Կոր. ԺԲ. 28): Վասն այնորիկ առ առաքեալսն դնէ զդէմս առակին, եւ որ զամենայն շնորհս եւ զգործս մատակարարութեան ընկալան ի Քրիստոսէ:

Վասն այնորիկ բազում անուամբ կոչէ զնոսա ի Գրոց. երբեմն՝ «[ի] գումարել երկնաւորին զթագաւորս» (Մաղմ. ԿԷ. 15) եւ «Կացուցեն զնոսա իշխանս ընդ ամենայն երկիր» (Մաղմ. ԽԴ. 17): Եւ այսպէս համարեսցին զմեզ մարդիկ իբրեւ զպաշտաւենեայս Քրիստոսի եւ հազարապետս խորհրդոցն Աստուծոյ, առ որս առատացաւ շնորհք Հոգոյն: Վասն այնորիկ առ նոսա հատուցանէ զբանն, եւ նոքաւք ընդ ամենեսին խաւսի, որ գտան հաւատարիմ եւ իմաստուն տնտես, եւ ետուն զկերակուր ի ժամու հաւատացելոց:

Եւ եղեւ, ասէ, ամբաստանութիւն, որպէս թէ վարնէ զինչս նորա (ԺԶ. 1):

ԿՐ Զի ոչ ծածկի առաջի Աստուծոյ, որք ոչ ի հաճոյս Աստուծոյ մատակարարեն: Վասն այնորիկ եղեւ ամբաստանութիւն:

ԻԳ Արդ, որ զաներեւոյթսն տեսանէր եւ նախքան զգործելն ճանաչէր, զի թէպէտ եւ նա ամենատես է բնութեամբ եւ ո՛չ կարաւտի գուշակելոյ ումեք, սակայն երկայնամիտ է, ներէ ժամանակս յանցաւորաց: Իսկ մարդիկ, կարճամիտ գոլով, թէ տեսանեն

զոք յափշտակելով, զտնանկս եւ զայլս ի գործս զաւրութեան, ձեռս յերկինս համբարձեալ առ Աստուած: Ըստ այնմ՝ «Զրկեալն ի ձէնջ աղաղակէ, եւ բողոք նոցա եհաս յականջս Տեառն» (Յակ. Ե. 4)՝ ի քրորէս: Նաեւ հրեշտակք, որք կարգեցան ի պահպանութիւն մարդկան, տեսանելով զգարչ գործս ամպարչտաց, տաղտկան[ան] եւ ամբաստան լինին առ Աստուած, զի ի վրէժխնդրութիւն փութասցի: Թէպէտ եւ սրտմտութիւն Աստուծոյ իբրեւ զհուր ձորալիր պարանոցաթաղ, եւ յայտնելոց է բարկութիւն Աստուծոյ ի վերայ որդոցն անհաւանութեան, որք քաղցրութեամբն Աստուծոյ ո՛չ ապաշխարեցին, այլ գանձեցին անձանց զբարկութիւն:

Վասն որոյ կոչէ զնա փէր եւ ասէ. «Զի՞նչ է այս, զոր լսեմս զքէն, փո՛ր զհամար փնփնտութեան» (ԺԶ. 2):

Մարդկաւրէն ձեւացուցանէ զբանն որպէս թէ լուաւ եւ իբր թէ յերկրայս է, եւ քննութեամբ կամի ստուգել զայս: Կա՛մ կարգ բանիցն պահանջեաց, կա՛մ խրատել զմեզ կամեցաւ, զի մի՛ զոք առանց քննութեան դատեսցուք: Ըստ այնմ, թէ՛ «Իջեալ տեսից ըստ աղաղակին այնմիկ, որ յիս վճարեցա՞ւ» (Ճննդ. ԺԸ. 21): Այլ հաւաստի քննութիւն[ն] Աստուծոյ ի Յարութեանն սահմանեալ ընդ բանից եւ ընդ մտաց շարժման տալոց եմք համար, այլ աստ՝ կոչելն, յորժամ լուծանի ի կենցաղոյս:

ԿՐ Եւ ի հասանել մահուն, որ է տնտեսութեանն ի բաց բարձուն:

«Զի ո՛չ եւս կարես լինել փնփնտ» (ԺԶ. 2):

ԻԳ Եւ ո՛չ է աւրէն չար ի նմին կալ, յորում անաւրիներցաւ ոք: Եւ զոր ինչ ընկալաւ ոք յԱստուծոյ, պարտ է զգուշութեամբ հատուցանել: Իսկ որ վատթարագոյն գտաւ ի հոգեւորսն կամ ի մարմնաւորսն մատակարարութեամբ, ո՛չ է աւրէն կալ ի նմին, այլ տարածամ բառնալ, զի մի՛ վատնիչ լիցի աստուածային գանձուցն:

Ասէ ընդ միփս իւր փնփնտն. «Զի՞նչ արարից, զի փէր իմ հանձ գրնար[եսութիւնս]» (ԺԶ. 3):

Կր. Բառնայ ի կենաց աստի:

«Գործել ոչ կարեմ» (ԺԶ. 3):

ԻԳ Ո՛չ է ժամանակ գործոյ, այսինքն՝ աղաչանաց եւ ներելոյ, զի գործաւք առաքինութեան զժառանգ անաւրէնութեանն ի բաց քերեսցէ եւ զտեղիքն բարեաց գործովք լցցէ: Ի մարմնի գոլով ծանեաւ, զի ո՛չ ժամանակն էր գործելոյ ինչ, զի առաջի կայր ճանապարհն գնալոյ:

«Մուրանալ՝ ամաչեմ» (ԺՁ. 3):

ԿՐ Զի ո՛չ սուրբքն աւգնեն եւ ո՛չ արդարքն բարեխաւսեն:

ԻԳ Արդ՝ անդ ողորմութիւն գտանել կարի լրբութիւն էր ժողովին, զի մեծատունն խնդրելովն ո՛չ ընկալաւ (տրն Ղուկ. ԺՁ. 19-31) եւ ո՛չ յիմար կուսանքն, որոց պակասեաց իւղն (տրն Մաթթ. ԻԵ. 1-13):

Ապա ասէ. «Գիտեմ զինչ արարից»: Եւ կոչեալ զպարտապանս քեան՝ ասէ ցառաջինն. «Դու քանի՞ ինչ պարտիս քեան իմոյ»: Եւ նա ասէ. «Նարիւր մար ձիթոյ»: Ասէ. «Կայ զգիր քո եւ նիսպ գրեալ յիսուն» (ԺՁ. 4-6):

Իմաստունքն փոքր աշխարհ ասացին զմարդն եւ միտքն տնտես: Եւ պարտականք Տեառն են հոգին եւ մարմինն, եւ միտքն՝ իշխան եւ ուղղիչ սոցա: Եւ առեալ յինքն՝ պնդեալ ունի զգիր պարտեացն, որով մեղաւ Աստուծոյ: Եւ հեշտութեամբ զախորժակս բնութեանն յաշխարհի գործեաց եւ անփոյթ արար զսպառնալիս դատաստանին Աստուծոյ: Եւ ո՛չ կամի տալ զգիր յանցանացն ի ձեռն հոգոյն եւ մարմնոյն, զի խոստովանութեամբ եւ հառաչանաւք եւ արտասուաւք անկցի առաջի Աստուծոյ, եւ ի ձեռն ապաշխարութեանն պատառեսցի, այլ ըստ նմանութեան այնր տնտեսի հարկանէ զծառայակից հոգին եւ զմարմինն, ուտելով եւ ըմպելով ընդ պոռնիկս՝ ընկղմեալ ցանկութեամբ աշխարհիս, եւ ո՛չ կամի մաղթանաց հոգոյն լսել պարտականի: Իսկ ի մերձենալ պահանջող հրեշտակին, որ կոչէ տալ զհամար տնտեսութեանն, եւ նա ի ժամուն յայնմիկ տագնապէր ի ցառոց մարմնոյն: Եւ բարձեալ է ցանկութիւն մեղացն) եւ ապականեալ որովայնն, ո՛չ ընդունի կերակուր եւ ըմպելի: Եւ զոր մատուցանեն՝ դժուարելով ի բաց վարէ, թէ եւ կարի համեղագոյն իցէ: Զի իբրեւ զչուն տոռամբ ձգեն ի սպանումն եւ իբրեւ զեղջերու հարեալ լերդակողմն: Եւ առ վտանգի ցառոցն անարգէր զոսկին եւ զարծաթն եւ զփառասիրութիւնն) եւ զնախանձն, եւ ամենայն ուրեք տրտմականքն յաճախեն: Եւ ապա կոչէ

միտքն զհոգին եւ զմարմինն, եւ տայ ի ձեռս նոցա զգիր պարտեացն՝ խոստովանութեամբն, եւ ապա շնորհէ պարտապանացն զթողութիւն, թերեւս հնար լիցի թեթեւանալ ի բեռանց եւ ազատել ի խղճէմտացն:

Ասէ միտքն ցհոգին. «Քանի՞ ինչ պարտիս»: Եւ նա ասէ. «Նարիւր մար ձիթոյ» (ԺՁ. 6):

Վասնզի հարիւր թիւն գլուխ եւ կատարեալ թիւ է: Եւ ի բարի սերմանս Տեառն երեւեցաւ պտղաբերութիւն, որ է ամենայն առաքինութիւն: Նոյնպէս եւ աստ հարիւր թիւն, զի որ ի գլուխ ամենայն առաքինութեանց եհաս՝ այսու նշանակեցաւ: Աստ ցուցանի, որ հոգով միայն մեղաւ՝ առանց մարմնոյ գործակցութեան:

Գրեցաւ «յիսուն» (ԺՁ. 6):

Արդ, կէս վնասուն թողեալ լինի: Վասնզի թեթեւ եւ դիւրաշարժ գոլով է ի մեղս, եւ դժուարաւ արգելի վասն [ան]արգութեան բնական բերմանն, շաղկելոյ ի ցանկութիւն: Վասն այնորիկ բազմաց արժանի լինի թողութեան [յ]արգար իրաւանցն Աստուծոյ:

Իսկ ձէթ, որով զանկեալս ի ձեռս աւազակացն ձիթով եւ գինով բժշկեաց, նշանակէ զաւճուճմն մկրտութեանն եւ կենդանի արիւնն, որով փրկեաց զմեզ, ըստ նմին եւ աստ մեղուցեալն յետ աւազանին շնորհացն: Եւ հաղորդութեան մարմնոյ եւ արեան Տեառն պարտական գտաւ, եւ վասն զղջմանն եւ պաղատանացն՝ յելս հոգոյն: Եւ, զոր ազահեաց՝ բաշխելով կարաւտելոցն յիսունն, կէս պարտեաց մեղացն թողեալ լինի:

Դարձեալ ասէ ցմիւսն. «Դու քանի՞ ինչ պարտիս»: Եւ նա ասէ. «Նարիւր քո ցորենոյ, որ է կապիճ»: Եւ նա ասէ. «Կա՛ զգիր քո եւ նիսպ գրեա՛ ութսուն» (ԺՁ. 7):

Իսկ որ մարմնով զամենայն չարիս կատարեաց, սակաւ ինչ թողեալ լինի. քսան միայն, զի մարմնովն շաղախեցաւ ընդ մեղս:

Եւ առաւել հեշտացաւ գարշ ցանկութեամբն, զոր գործեաց մարմնով եւ մտաւք հոգոյն կամակար, զի ունէր խափանել զնա եւ ո՛չ կամեցաւ: Այլ յուժարութեամբ արհամարհեաց զաւրէնս եւ գործեաց զմեղս: Զի մարմինն զդժուարաշարժ է ժամանակի, եւ գործակցի կարաւտանայ լնուլ զցանկութիւնն): Եւ դիւրին է արգելուլ բարեաց խորհրդովն, եւ իբրեւ սանձիւք ընկրկել զյար-

ձակումնն ի մեղս: Զի ո՛չ դժուարին է արգելուլ զձեռս յարիւն հեղլոյ, ի հարկանելոյ, ի զրկելոյ եւ յազահելոյ, եւ յորովայնամոլութենէ, եւ ի պոռնկութենէ: Եւ ի չափով մերձենալ ի կարեւորագոյնսն դիւրին է եւ անչափն դժուարին: Իսկ որ առ մարմին[ն] տերունական մեղաւ անարժան հաղորդութեամբ, եւ զղջանալովն գտանէ թողութիւն սակաւ, քսան միայն, վասն զի կարի ծանր է մարմնոյ եւ արեանն Քրիստոսի: «Փորձեսցէ մարդ զանձն իւր, եւ ապա ի հացէ անտի կերիցէ եւ ի բաժակէն արբցէ, զի որ ուտէ եւ ըմպէ անարժանութեամբ» (Ա. Կոր. ԺԱ. 28-29), «պարտական եղիցի մարմնոյ եւ արեանն Տեառն» (Ա. Կոր. ԺԱ. 27): Զի որ ոք զաւրէնսն Մովսիսի արհամարհէր, անողորմ զատաստանաւ ամենայն ժողովուրդն քարկոծ առնէին զնա: Ապա քանի՞ պատժոց արժանի են, որ անարժան հաղորդեցան: Զի զՈրդին Աստուծոյ կոխեցին եւ զարիւն նորոյ սուրբ ուխտին խառնակ համարեցան, եւ զհոգին շնորհաց թշնամանեցին: Այսպէս անչափ յանցանք են եւ ծանր վնաս արեանն Աստուծոյ պարտապան լինել: Բայց վասն մարդասիրութեանն աւրինակ եղ ներելոյ, զի մի՛ ոք անյոյս կորիցէ: Զի խրատէ ողորմութեամբ եւ ցուցանէ [զ]քաղցրութիւն: Պարտ է յուսալ, թէպէտ եւ անբաւ են պարտիքն, եւ դատել ի ժամանակս ապաշխարութեան:

Գովեաց փէր զԿրնփեսն անիրաւութեան, զի իմաստութեամբ արար (ԺԶ. 8):

Թէպէտ եւ առնթեր մահուն եւ յետին շունչն հասանելոյ, սակայն ո՛չ արար անփոյթ յիւրմէ փրկութենէն:

ՍՏ Արդ, տնտեսն անիրաւութեան նշանակէ զամենայն մեղաւորս, որ իւր պարտապանացն թողու զյանցանս եւ առնէ իւր սիրելիս:

ԵՓ Սակայն անաւրէն գաւառապետն մեղացն իմաստուն գտաւ եւ գովեցաւ առաջի Տեառն: Զի մեղաւք մատնեաց զգանձս առաջինս, եւ խորամանկութեամբ եթող զպարտս ի վերջին ժամուն:

Արդ, մի՛ վերջասցուք յելսն մեր խնդրել զնա, թէպէտ եւ կարի ծանր է բեռն մեղացն եւ բարձր քան զգլուխ մեր, զի աւասիկ ինքն է թողութեանն շտեմարանապետն: Զի թէպէտ եւ ո՛չ արդարացուցանէ ընդ ժառանգաւորս Աստուծոյ, սակայն ազատէ ընդ մէջն կտրելոյ, զոր կապեալ ոտիւք եւ կապեալ ձեռաւք հանէ «ի խա-

ւարն արտաքին» (Մաարթ. Ը. 12, ԻԲ. 13, ԻԵ. 30): Եւ արդ, մեծ է յայսպիսեացս ապրել եւ տալ քաւութիւն:

Զի որդիք աշխարհիս այսորիկ իմաստնագոյն են յազգս իւրեանց (ԺԶ. 8):

Զի մարդիկ անկեալ ի փառաց եւ աւտարացեալք յԱստուծոյ՝ հնարս գտան ապաշխարութիւն խնդրել զԱստուած եւ մերձենալ առ նա: Եւ ծանեան, թէ զոր յանցանքն աւտարացուցին, զիտէ ուղղութիւն ընդանի առնել Աստուծոյ: Եւ ճանապարհ, յորմէ խոտորեցաք, ընդ նոյն յետս դառնալ եւ անվրէպ ածեն:

Քան զորդիս լուսոյ յազգս իւրեանց (ԺԶ. 8):

ԿՐ Զհրեշտակս ասէ, զի ո՛չ սատանայ, որ ի նմին նիւթոյ էր կարաց յետ անկմանն [յ]այսպիսումն փրկութեան հասանել:

ԻԳ Զի չարացան անմտութեամբ: Եւ մի՛ ոք ընդդէմ դիցէ, թէ մարմին ո՛չ ունին: Առ որս ի դէպ է ասել, զի թէ ի նոյն տեղի ուստի անկաւն, ո՛չ ելանել, սակայն այլ ո՛չ եւս չար գտանել:

Եւ պարտ է իմանալ, թէ որ վասն յանցանաց ի խոնարհ ընկէց, ունի զաւրութիւն վասն անհնազանդութեանն ի հարուածս արկանել եւ ըստ բաղմապատիկ չարեացն հատուցանել: Իսկ նա [յ]այսպիսեացս ինչ զմտաւ ո՛չ էած, այլ անմտացաւ եւ պատերազմող զինքն կացոյց: Եւ ընդ պատկերին Աստուծոյ, մարտուցեալ պատրանաւք, ուսոյց ապստամբել յԱստուծոյ: Եւ հաւանեցոյց գործակից առնել անաւրէնութեանն իւրոյ, մինչ չարժեցաւ Աստուած վրէժս հատուցանել նմա հուր տանջողական: Զի թէ ապաշաւեալ էր, այնպիսի տանջանք ո՛չ պատրաստէին նմա:

ՄԱՏԹԷՈՍ ԶՈՒՂԱՅԵՅԻ

Այր մի էր մեծաբուն, որոյ էր փնտես. եւ եղև զնմանէ ամբաստանութիւն, որպէս թէ վարնիցէ [զինչս նորա]: Կոչեաց զնա. «Տո՛ւր զհաշիւն» (հմմտ. Ղուկ. ԺԶ. 1-2):

Ընդ սքանչելի առակացս Տեառն զարմանալ արժան է, թէ զիա՞րդ մարդասիրութեամբ լցեալ գոյ, զբոլորն խրատէ եւ զմասնաւորսն ուսուցանէ, զառաքինիսն յորդորէ եւ զմոլիսն յուղղութիւն ածէ, որպէս հայր զթած զանկիրթ որդի ուսման աւրինակաւ վարժեցու-

ցանկ. այսպէս եւ Տէր մեր արար, զի թէ զանձն իւր ոչ խնայեաց, այլ՝ վասն ամենեցուն մեր մատնեաց զնա: Ապա եւ զամենայն ինչս տնաւրինեաց փրկութեան մերոյ հնար, վասն որոյ առակաւոր բանիւ ուսուցանէ զմեզ ի մեղաց զերծանել. «Այր մի էր մեծապուն»: Արդ, նախ տեսցուք, թէ քանի տունք են եւ տնտեսք եւ ապա՝ թէ առ ո՛ր տնտես է բան:

Արդ, նախ՝ «պուն» կոչի երկինքն, այսինքն՝ իմանալի աշխարհն՝ ըստ այնմ. «Իմաստութեամբ շինեաց իւր պուն» (Առակ. ԻԳ. 3): Իսկ «պնտեսք» ի նմա՝ զդասս հրեշտակաց՝ ըստ այնմ. «Պաշտամեայք եւ հոգիք հարկատրք են, որ առաքինի սպասարորութիւն» (հմմտ. Երր. Ա. 14):

Բ. Երկրորդ՝ կոչի «պուն» զբախտն եղեմական՝ ըստ այնմ. «Տէր, սիրեցի զվայելչութիւն քան Բո» (Սաղմ. ԻԵ. 8), իսկ «պնտես ի նմա»՝ զմարդն առաջին՝ ըստ այնմ. «Եղ զմարդն ի դրախտին գործել զնա եւ պահել» (հմմտ. Ծննդ. Բ. 15):

Գ. Երրորդ՝ «պուն» կոչի աշխարհս զգալի՝ ըստ այնմ. «Ո՛չ լուցանիցէ ճրագ եւ ածէ աել ի քան» (Ղուկ. ԺԵ. 8), իսկ տնտես ի սմա՝ մարդկային բնութիւնս՝ ըստ այնմ. «Չամենայն ինչ հնազանդ արարեր [ի ներքոյ ուրից նորա], զխաշն եւ զարջատ եւ զամենայն [ինչ]» (Սաղմ. Ը. 8):

Դ. Չորրորդ՝ «պուն» կոչի եկեղեցի՝ Նոր Սիոն՝ ըստ այնմ. «Տան բում վայելէ սրբութիւն» (Սաղմ. ՂԲ. 5), իսկ տնտեսք ի սմա՝ առաքեալք եւ մարգարէք եւ վարդապետք եւ հայրապետք՝ ըստ այնմ. «Չորս եղ [Աստուած] յեկեղեցոջ՝ այս են. նախ՝ զառաքեալս, [երկրորդ՝ զմարգարէս]» (Ա. Կոր. ԺԲ. 28) եւ այլք:

Ե. Հինգերորդ՝ «պուն» կոչի իւրաքանչիւր մարդ՝ ըստ այնմ. «Ես յո՞ հանգեայց, եթէ ոչ ի հեզս» (հմմտ. Ես. ԿԶ. 2): Եւ Պաւղոս ասէ. «Որոյ պունն մեր իսկ ենք» (Երր. Գ. 6): Իսկ տնտեսք ի սմա՝ միտքն, որպէս ասէ աստ. «Որոյ էր պնտես. եւ եղեւ զնմանէ ամբաստանութիւն»:

Արդ, յայսցանէ, զոր ասացաք բան սուրբ Աւետարանիս, երկնայնոցն ոչ պատշաճի, զի ոչ կարեն մեղանչել ի տնտեսութեանն եւ պարտապան գտանել, այլ են զժուարաշարժք ի մեղս կամ ամենեւին անշարժք: Իսկ Աղամայ ոչ պատշաճի, զի դեռեւս յանմեղութեանն էր, եւ տակաւին ոչ տիրէին մեղք, մինչեւ խաբեցաւ յաւձէն: Իսկ բոլոր բնութեանս ոչ հետեւի, զի բնութիւն առհասարակ ոչ կարէ մեղանչել, այլ առանձին՝ միոյ-միոյ մարդոյ: Եւ եկեղեցւոյ տնտեսի պատշաճի սակաւ ինչ այնու, զի նոքա ի մարդկանէ են, իսկ այնու՝ ոչ, զի թէ ոք տնտես կարգեցաւ յեկեղեցի, ոչ եւս կա-

րէ ելանել ի նմանէ: Ուրեմն յայտ է, թէ իւրաքանչիւր առանձին մարդոյ պատշաճի: Արդ, առձեռն պատրաստեսցուք, ո՞վ է այրն: «Այր» է այրացեալ Աստուածն մեր Յիսուս, զոր եւ սակաւ յառաջ ասացեալսն «գուարակ» ասաց: Եւ յիրաւի, զի նա միայն է ճշմարիտ այր, զի ոչ ինչ է, զոր կարաւտի նա:

Իսկ «մեծապուն» կոչի, եւ սա առաւել մեծատուն, քան որ յաշխարհի:

Ա. Նախ՝ զի ամենայն մեծատուն մասամբ ունի մեծութիւն, իսկ նա՝ ծայրագոյն եւ կատարեալ՝ ըստ այնմ. «Երկինք արոտ իմ են եւ երկիր [պարտանդան ուրից իմոց]» (Ես. ԿԶ. 1):

Բ. Երկրորդ՝ զի սոքա ստացմամբ ունին, իսկ նա՝ բնութեամբ:

Գ. Երրորդ՝ զի սոքա կարաւտ են աւզնականի, իսկ նա անկարաւտ բնութիւն է՝ ըստ այնմ. «Ո՛ր էիր մինչ ես հիմունս արկանէի երկրի» (Յոր ԼԸ. 4):

Դ. Չորրորդ՝ զի սոքա զոմանց կարաւտութիւն լնուն եւ ոչ իսկապէս, իսկ նա՝ զամենեցուն եւ կատարելապէս՝ ըստ այնմ. «Եկայք առ իս ամենայն աշխարհայք եւ ես հանգուցից [զձեզ]» (հմմտ. Մատթ. ԺԱ. 28):

Ե. Հինգերորդ՝ զի ի սոցա տալն [պա]կասին մեծութիւնք սոցին, իսկ նորայն անպակաս մնայ:

Զ. Վեցերորդ՝ զի սոքա ոչ կարեն ստեղծանել եւ տալ, իսկ նա՝ ստեղծաւղ եւ արարիչ՝ ըստ այնմ. «Ամենայն ինչ լուվա եղեւ» (Յովհ. Ա. 3):

Է. Եաւթներորդ՝ զի սոքա թէպէտ մեծատունք, սակայն դեռեւս կարաւտին առնուլ, իսկ նա ոչ փափագի իրաց:

Ը. Ութերորդ՝ զի սոքա չարչարանաւք են ստացեալ, իսկ նա ոչ ունի աշխատանք:

Թ. Իններորդ՝ զի սոցա ինչքն կորստական է, իսկ նորայն՝ անկորուստ՝ ըստ այնմ. «Չուրախութիւնն ձեր ոչ որ հանէ ի ձեզ» (Յովհ. ԺԶ. 22):

Ժ. Տասներորդ՝ զի սոքա՝ մարդ սոսկ ի մեծութեան, իսկ նա՝ Աստուած մարդացեալ, յաղագս որոյ ասէ. «Այր մի էր մեծապուն»:

Իսկ յատկութիւն տնտեսին բազում ինչ է:

Ա. Նախ՝ զի տնտեսն ոչ ունի իւր ինչ, այլ ի տէրունեացն հաւատացաւ նմա:

Բ. Երկրորդ՝ յատուկ է տնտեսին ըստ կամաց տեառն զնալ եւ պատրաստել զամենայն, որպէս եւ կամեսցի:

Գ. Երրորդ՝ ժիր լինել ի գործն, յոր հրաւիրեալ է եւ ոչ երբէք ծուլանալ:

Դ. Չորրորդ՝ զկերակուրն պատրաստել ի ժամու:

Ե. Հինգերորդ՝ տալ յամենայն ժամու ծառայակցացն առատապէս:

Իսկ «ելանելն» ի տնտեսութենէն լինի վասն բազում պատճառի:

Ա. Նախ՝ զի ժիր ոչ լինի ի գործն:

Բ. Երկրորդ՝ թէ վատ շինէ զկերակուրն:

Գ. Երրորդ՝ թէ գող լինի:

Դ. Չորրորդ՝ թէ ընդ վայր մտնէ:

Ե. Հինգերորդ՝ թէ լիրբ լինի եւ լեզուաւ, եւ դիմաւք:

Զ. Վեցերորդ՝ թէ պիղծ լինի գործով:

Է. Եաւթներորդ՝ թէ անհնազանդ լինի բարուք:

Ը. Ութերորդ՝ թէ հիւանդ լինի մարմնով:

Թ. Իններորդ՝ թէ անհամբեր լինի:

Ժ. Տասներորդ՝ թէ պինդ լինի, ուշտ:

Այսոքիկ պատճառք են ելանելոյ:

Արդ, այսպէս, որ ասացաք մարդկային բնութեանս, ոչինչ է, այլ յԱստուծոյ տուեալ է պարզեւքն ամենայն, զոր ինչ տեսանես ի վերայ երկրի՝ ըստ այնմ: «Զի՞նչ է, զոր ոչ առեր եւ զիս՞րդ պարծիս առեալդ, իբրեւ չառեալ» (հմմտ. Ա. Կոր. Դ. 7), թէ քահանայութիւն է եւ թէ վարդապետութիւն, թէ այլն ամենայն: Եւ զայսոսիկ սակս այնր տայ, զի փոքուաւս զմեծ եւ զանճառելիւն ստասցուք՝ ըստ այնմ: «Ի փոքուն հաւարարիմ ես, ի վերայ բազմաց կացուցից զքեզ» (հմմտ. Մաթթ. ԻԵ. 21) եւ թէ՛ «Որ ի փոքուն հաւարարիմ է եւ ի բազմին հաւարարիմ է» (Ղուկ. ԺԶ. 10):

Արդ, ամենայն քահանայ եւ ամենայն ոք, որ շնորհ ընկալեալ է յԱստուծոյ, տնտես է այնմ գործոյ եւ շնորհի, յաղագս որոյ պարտի ըստ յառաջ ասացեալ յատկութեանց տնտեսին գնալ, իսկ եթէ զմի պատճառաց ելանելոյն գործէ, ըստ վերոյ ասացելոցս, ելանէ յայնմ բարեաց տնտեսութենէ: Եւ յայտ է, թէ այլ իրաց հանդիպի, յորժամ յայնմանէ զրկիցի, քանզի հակառակ են այնմ գործոյ, տասներին սոքա, որպէս ասացաւ ի կարգէ բանիցդ: Զի եթէ ի մարմնաւորս, որք զայն գործեն, եղկելիք են, յայտ ուրեմն, եթէ առ Աստուած եւս առաւել պարտի զգուշութեամբ, իսկ եթէ ոք ոչ կարէ տանել այսմ եւ սխալել ի գործն զինչ եւ իցէ, առնէ, քանզի յուսահատի ուսուցանէ առակաւս մինչ ի յելս շնչոյն խնդրել զԱստուած եւ բարեգործել: Այլեւ զայս յառաջագոյն ուսոյց, այսինքն՝ զկամս քաղցրութեան հաւրն անառակ որդին, զի ընդունի յամենայն ժամ,

միայն զդարձն խնդրէ առ ինքն: Զի թէ ոչ ընդունի ի մահուան ժամանակի ծերութեանն, զիս՞րդ յերկարէ զժամանակ մեղաւորին, զի ասէ. «Ոչ կամիմ զմահ մեղաւորին» (Եզեկ. ԺԸ. 23), քանզի որքան կայ, ի ծերութիւնն մերձի եւ ի մահուան ամբաստանութիւն, այսինքն՝ վատնելոյ զինչս նորա:

Արդ, զիս՞րդ լինի այս, զի Աստուած ծածկագետ է, զանգործսն զիտէ, զիս՞րդ գործելեացն անգէտ մնալով կարաւոր ամբաստանութիւն: Արդ, թէպէտ նա ամենագէտ է, եւ ոչ է կարիս ամբաստան լինելոյ, սակայն երկայնամիտ է, ներէ ժամանակ ինչ յանցաւորաց: Իսկ մարդիկք, կարճամիտ գոլով, եւ զոմանք ի չարութեանն տեսեալ, ի յափշտակութեան եւ ի նեղել զտնանկս եւ յայլ ամենայն գործս զազրալիս, ձանձրացեալ յայսպիսեացս, զձեռն յերկինս համբարձեալ, բողոքեն առ Աստուած՝ ըստ այնմ. «Զրկեալն ի ձեռք աղաղակէ, եւ բողոք հնձողաց եհաս յականջս Տեառն զարութեանց» (Յակ. Ե. 4): Նաեւ հրեշտակք, որք կարգեալ են պահապան մարդկան, նոքա ամենեկին մաքուր, եւ տեսանեն զգործս ամբարշտաց եւ ձանձրացեալ, ամբաստան լինին նոքա առ Աստուած, զի մի միշտ երկայնամիտ լիցի, այլեւ վրէժխնդիր՝ ըստ այնմ. «Յայրնկոց է բարկութիւն Աստուծոյ ի վերայ ամբարշտութեան մարդկան» (հմմտ. Հոմ. Ա. 18), եւ թէ՛ «Բարկութիւն Տեառն իբրեւ զօր ձորայից պարանցաթաղ յորդեսցէ» (հմմտ. Ես. Լ. 27-28): Արդ, զիտասցուք եղբարք, զի բազում ժամանակս երկայնամիտ լինի մեզ Տէր, մի՞թէ դարձցուք ի մեղաց, որպէս եւ ասացաք յԱւետարանէ աստի: Իսկ ի բազմանալ մեղաց մերոց լինի ամբաստանութիւն, եւ շարժեն զԱստուած ի վրէժխնդրութիւն, վասն որոյ կոչեաց զնա եւ ասէ.

Զի՞նչ է, որ լսեմս զքէն, փոքր ինձ զհամար փնտրեսութեան [քոյ], զի ոչ եւս կարես լինել փնտրես (ԺԶ. 2):

Մարդկաբար խաւսի, իբր թէ ոչ զիտէ եւ զեռ յերկրայս է: Եւ արդ, վասն այն արար, զի մեզ ուսուցանէ, թէ մի առանց քննութեան զոք դատել, զի թէ նա, որ ամենեցուն գիտողն է, առանց քննութեան ոչ դատէ, եւ մեք անզգամեալ միայն սուտ համբաւիւն զեղբայրն մեր ջանամք խեղդել: Արդ, կոչելն զհիւանդութիւնն՝ ասէ, որ կոչէ ի դուռն մահուն: Իսկ ասելն՝ «ոչ եւս կարես լինել փնտրես», յիրաւի, զի ամենայն, որ չարանայ, եւ այն բարեգործիւք ոչ միաբանի ընդ բարւոյն՝ ըստ այնմ. «Զի՞նչ միաբանութիւն

է լուսոյ ընդ խաւարի» (հմմտ. Բ Կոր. Չ. 14): *Իսկ արդ, զի իմաստուն արար Աստուած զմարդն, յորժամ տեսանէ զայս, խորհի միտքն իմաստութեամբ իւրով՝ ըստ անառակին.* «Իմաստութիւն յետ ճանապարհաց գովի» (Առակ. Ա. 20):

Խորհեցաւ եւ ասէ. «Զի՞նչ արարից, զի փէր իմ հանէ ի փնփնուրենէ» (հմմտ. ԺՁ. 3):

Այսինքն՝ լուծանէ ի կենաց աստի:

«Գործել ոչ կարեմ» (ԺՁ. 3):

Զի չիք ինչ ժամանակ ապաշխարութեան, զի քերեցից զազա ի հոգւոյս, եւ փոխանակ չարեացն՝ բարի արարից եւ ի հանդերձեալն յանփոփոխ կեանս ժամանել:

«Մուրանայ ամալթ է» (հմմտ. ԺՁ. 3):

Զի այն չէ տեղի մուրանալոյ, եւ թէ մուրանամ եւս, ոչ ոք տայ ինձ, զի ոչ է անդ ողորմութիւն, զոր աւրինակ յիմար կուսանք (փնն Մարթ. ԻԵ. 1-13), *վասն որոյ Հնար իմանայ եւ ասէ.*

«Գիպեմ զինչ արարից» (ԺՁ. 4):

Եւ կոչեաց զմի մի ի պարպապանացն. «Դու քանի՞ ինչ պարպիս» (հմմտ. ԺՁ 5):

«Ճ. (100) մար ձիթոյ»: Ասէ [ցնա]. «Կա զգիր քո, եւ նիսպ, գրեա՛ր [վաղվաղակի] Ծ. (50)»: Եւ երկրորդն՝ Ճ. (100) քո՞ ցորենոյ: «Կա զգիր քո, եւ նիսպ [եւ գրեա՛ր] Զ. (80)» (հմմտ. ԺՁ. 5-7):

Եւ այս յիրաւի, զի դիւրաւ մեղանչէ հոգին եւ փոքր հեշտանայ ի մեղքն, վասն որոյ ըստ արդար դատաստանին զկէսն եթող: Իսկ զմարմնոյն զհնգէն մինն, վասն զի նա ունէր ի ձեռն ոչ առնել զմեղս եւ արար, զի դիւրին է, թէ կամի ոչ զշնութիւնն գործել եւ ոչ զայլն: Եւ զի կամաւորութեամբ գործեաց մարմնաւորաւք, յիրաւի զմինն թողու ի զղջումն, իսկ զայլսն՝ խոստովանութեամբ եւ ողորմութեամբ, եւ տրաւք տնանկաց: Դարձեալ՝ զոր յետ աւագանին գործեցաք, պարտապան եղաք նմին, զկէսն թողու, իսկ եթէ լրբութեամբ ի մարմին Տեառն մերձեցաք, այն դժուարին է, հնգէն մինն՝ ըստ որում. «Ար ուրի [եւ ընպէ] զմարմին Տեառն անարժանութեամբ,

դաբասարան անձին իրում ուրի եւ ընպէ, զի ոչ խարեաց զմարմին Տեառն» (Ա Կոր. ԺԱ. 29):

Իսկ «Ճ.» (100) ասաց, որ զկատարեալն նշանակէ, զոր աւրինակ՝ առաքինութիւնն ի հարիւրաւորն պատշաճեցան, նոյնպէս եւ մեղքն կատարեալ թուով ասէ:

Իսկ զի՞ զհոգւոյն մեղքն ի «ձէթ» առակէ (Ղուկ. ԺՁ. 6): *Եւ այս վասն բազում պատճառի:*

Ա. Նախ՝ զի ձէթն լուսոյ նիւթ է. այսպէս եւ բամբասանքն եւ սուտն հոգւոյն մեղք են:

Բ. Երկրորդ՝ զի անաւար իմն է ձէթն. այսպէս եւ հոգւոյն մեղքն ոչ նիւթաւոր, որպէս մարմնոյ:

Գ. Երրորդ՝ զի դիւրաւ տարածանի ձէթն ի վերայ հանդերձին. այսպէս եւ հոգւոյն մեղքն փութանակի լինի:

Դ. Չորրորդ՝ զի ոչ իջանէ ձէթն յատակ ջրոյ, այլ յերեսն ելանէ. այսպէս եւ նախանձ եւ ամբարտաւանութիւնն ոչ մտանէ ի մարմին, այլ ի հոգին:

Ե. Հինգերորդ՝ զի դժուարաւ ելանէ ձէթ ի նիւթոյ. այսպէս եւ հոգւոյն դժուար է լինել առանց մեղաց:

Զ. Վեցերորդ՝ զի կրկին զհակառակսն յինքն ընդունի՝ զջերմութիւն եւ զցրտութիւն. այսպէս եւ հոգին միշտ զղջայ եւ միշտ մեղանչէ:

Է. Եւթներորդ՝ զի ի վայթելն ոչ ածէ զձայն. այսպէս եւ մեղքն ի հոգին ոչ երեւի մարդկան:

Ը. Ութերորդ՝ զի թափանց զաւրութիւնն ունի ձէթն. այսպէս եւ մեղքն թափանցանէ ի մարմինն եւ ի հոգին հասանէ:

Թ. Իններորդ՝ զի ինքն ըստ ինքեան ոչ լինի ձէթն, այլ ի նիւթոյ իմիքէ. այսպէս եւ հոգին ոչ ունի բնութեամբ մեղք, այլ ի պատճառէ իմիքէ լինի:

Ժ. Տասներորդ՝ զի հնարին մարդիկք հանել զձէթն ի հանդերձէն. այսպէս եւ գոյ Հնար զհոգին սրբել ի մեղաց, որպէս ասէ Տէրն. «Կա զգիր քո եւ նիսպ գրեա՛ր Ծ.»:

Իսկ զմարմնոյն մեղք ի «ցորեն» առակէ: Եւ այս եւս վասն բազում պատճառի:

Ա. Նախ՝ զի ցորենն ոչ է մի թուով, այլ անթիւ. այսպէս եւ մարմնոյն մեղք ոչ են մի, այլ՝ բազում:

Բ. Երկրորդ՝ զի ծանր է ցորեանն. այսպէս եւ մեղք մարմնոյն ծանր են, քան զհոգւոյն:

Գ. Երրորդ՝ զի ի յաշխարհի ոմանք վաստակին ցորեան, այսպէս եւ ոմանք գործեն մեղս մարմնով եւ ամենեքեան:

Դ. Չորրորդ՝ զի առանց ծասկելոյ ոչ ոք առնու զհամ ցորենոյն. այսպէս եւ առանց մերձաւորութեամբ ի մեղս մարմնաւոր ոչ ոք զիտէ զնա:

Ե. Հինգերորդ՝ զի մի հատ ցորեանն բազում ճուխդք բերէ. այսպէս եւ մի մեղք մարմնոյն սովորեալ բազումս տայ գործել:

Զ. Վեցերորդ՝ զի դժուարին է ի հացէ կտրիլ եւ ոչ ուտել. այսպէս եւ թէ ոք սովորեցաւ ի շնութիւն, ոչ կարէ գերծանել ի նմանէ, եթէ ոչ աւգնականութեամբն Աստուծոյ:

Է. Եաւթներորդ՝ զի քաղցրութիւն տայ սակաւ մի եւ կորնչի յորկորն. այսպէս եւ մեղք մարմնոյն սակաւ մի հեշտացուցանէ եւ այլ ոչ եւս:

Ը. Ութերորդ՝ զի հաստատէ զսիրտ մարդոյն. այսպէս եւ մեղք մարմնոյն կապէ զմարդն եւ ոչ տայ թոյլ զղջալ կամ ապաշխարել:

Թ. Իններորդ՝ զի առատ է ցորեանն, եւ ամենայն մարդ զտանէ. այսպէս եւ մեղք մարմնոյն առ ձեռն պատրաստ է ամենեցուն գործողաց իւրոց:

Ժ. Տասներորդ՝ զի թէ ի ջուր անկեալ ցորեանն՝ փտի եւ կորնչի. այսպէս եւ մեղք մարմնոյն արտասուաւք դիւրաւ կորուսանի, որպէս ասէ. «Կալ զգիր քո, եւ նիսպ գրեա՛ Զ.»:

Իսկ արդ, զիտեա՛, ո՛վ եղբայր, զի որպէս ասացաւ, ամենայն մեղաց կէսն թողութիւն, եւ մարմնոյ, եւ արեան պարտուցն Հնգէն մին: Մի՛ յուսահատեսցիս, այլ ուղղեա զքեզ՝ ոչ լինել պարտապան նմա, զի դիւրին է ոչ լինել պարտապան. այս է փոքր ժամանակաւ խոստովանութեամբն յայս ամենայն ահէ եւ յերկիւղէ: Իսկ թէ սխալիս եւ ի նոյն մի յամեսցիս, այլեւ զայն փութով խոստովանեա՛: Զի թէ ի Հնուամն, որք զաւրէնսն անցանէին Մովսիսի, քարամբք սատակել հրամայէր, քանի եւս առաւել, որ զՈրդին Աստուծոյ առ ոտն եհար եւ զարիւն Նորոյ Ուխտի խառնակ համարեցաւ: Ուրեմն յայտ է, թէ որչափ վնաս է անարժանութեամբ ուտել եւ ըմպել, բայց զի մի՛ յուսահատութեան ալիս զմեզ ընկղմեսցէ, ուսուցանէ քաղցրութեամբ այսու բանիւքս, որ ասացաւ ի յելս շնչոյն, թէպէտ անբաւ լինի պարտիքն, եւ է ժամանակդ ապաշխարութեան, վասն որոյ

գովեաց տէրն գտնտեսն՝ անիրաւութեան զիմաստութեամբ արար: Արդ, աղաչեմ սիրելի՛ք, մի՛ վերջացուք ի յելք կենաց մերոց խնդրել զնա, թէպէտ եւ կարի ծանր է բեռն մեր եւ բարձրացեալ է, քան զերկինս, զի թողութեանց պարգեւողն ինքն է: Զի թէպէտ ոչ ունի յայնմ ժամու ընդ սուրբսն դասել, սակայն յայնմանէ ազատեցաւ, որ ընդ մէջն կտրի եւ ընդ անհաւատսն դասի, եւ զոր կապեալ ոտիւք եւ ձեռաւք, հանին ի խաւարն արտաքին ի լալ աչացն եւ ի կրճել ատամանցն (տին Մապրթ. Ը. 12): Եւ այս մեծ ողորմութիւնն է մեզ, թէ յայսպիսեացս գերծանիցեմք: Զայս եթէ ոք ընդդէմ բերիցէ ոչ հաւատալ, նախ ինքն զիտէ, որ զայս առակս ասաց, զի ոչ թէ սուտ ասաց նա, որ ճշմարտութիւնն է, քաւ լիցի, այլ՝ զի ճշմարիտ է բանք նորա, վասն որոյ ունի կարողութիւն, այսպիսեաւքս տալ զքաւութիւն: Իսկ եթէ ոք անհաւատ եղեալ բանիցս հակառակիցի, մեք ոչ ունիմք զայն սովորութիւն եւ ոչ եկեղեցիքն Աստուծոյ, յաղագս որոյ գովէ գտնտեսն անիրաւութեան, «զի իմաստութեամբ արար զայս»: Զնոյնս «իմաստութիւն յելս» գովէ Սողոմոն (Առակ. Ա. 20), եւ թէ՛ «Յորս գտայց՝ ի նոյն դատեցայց» (հմմտ. Յովն. Ե. 30):

Իսկ արդ, իմաստնագոյն ասէ զմարդիք, քան զորդիս լուսոյ, այսինքն՝ քան զհրեշտակս: Եւ այս ըստ բազում եղանակի:

Ա. Նախ՝ զի մարդկան ազգ դարձ ունի ի մեղաց, իսկ հրեշտակք ոչ ունին, զոր աւրինակ՝ դեւքն:

Բ. Երկրորդ՝ մարդիկք կարեն ապաշխարութեամբ ապրել, իսկ հրեշտակաց ոչ գոյ Հնար ապաշխարութեան:

Գ. Երրորդ՝ զի առնուն թողութիւն մեղաց, իսկ հրեշտակաց ոչ գոյ Հնար թողութեան մեղաց:

Դ. Չորրորդ՝ զի մարդիկ կարեն զինքեանս նուաճեցուցանել ընդ հրամանաւք նորագունիւք, իսկ նոքա բնականապէս վարին եւ ոչ ունին փոփոխումն:

Ե. Հինգերորդ՝ զի յորժամ մեղք ինչ անկանիմք, ի յետ մեղացն ողբամք զանցեալն, իսկ նոքա, թէ ի չար անկեալ եւ չարանան եւս, որպէս սատանայ եւ իւրքն:

Զ. Վեցերորդ՝ զի մեք առաւելացուցանեմք զառաքինութիւն, իսկ նոքա ոչ կարեն, զի ոչ ունին մարմնական գործիք:

Է. Եաւթներորդ՝ զի մեք գնեմք արեամբ մերով զարքայութիւնն, իսկ նոքա ոչ կարեն հեղուլ զարիւն եւ ոչ գնել, քանզի ոչ ունին մահ եւ ոչ՝ արիւն:

Ը. Ութերորդ՝ զի մեզ կարողութիւն գոյ ի հրեշտակաց դասն մերձաւոր լինել եւ եւս գեր ի վերոյ, իսկ հրեշտակք միոյ ճգնաւորի պսակի ոչ կարեն հասանել:

Թ. Իններորդ՝ զի մեք ձեռինն Աստուծոյ եմք ստեղծուած, իսկ հրեշտակք բանիւ միայն, որպէս եւ անասունք:

Ժ. Տասներորդ՝ զի Աստուած ի մեր բնութենէս էառ մարմին եւ ոչ ի հրեշտակաց, վասն որոյ ասէ Տէրն վասն ինքեան՝ «Իմաստնագոյն», այսինքն՝ գերագոյն եւ բարձրագոյն է, քան զնոսա, վասն զի Աստուած է բնութեամբ, իսկ հրեշտակք սպասաւորք են նմայ:

Իսկ զհրեշտակք «որդիս լուսոյ» կոչէ: Եւ այս վասն բազում պատճառի:

Ա. Նախ՝ զի ի լուսոյ արարան հրեշտակք, վասն որոյ որդիք նմին կոչին՝ ըստ այնմ. «Ասաց Աստուած՝ «Եղիցի լոյս» (Ծննդ. Ա. 3), եւ թէ՛ «Որ արար զհրեշտակս իր յոգիս եւ զպաշտանեայս իր ի հուր» (հմմտ. Եբր. Ա. 7):

Բ. Երկրորդ՝ զի պարզ է լուսոյ բնութիւնն. այսպէս եւ հրեշտակաց:

Գ. Երրորդ՝ զի անաղտ է լոյսն. այսպէս եւ հրեշտակք, որք մնացին յանկմանէն, ոչ կարեն մեղանչել:

Դ. Չորրորդ՝ զի անորակ է լոյսն. այսպէս եւ հրեշտակք:

Ե. Հինգերորդ՝ զի անձեւ է. այսպէս եւ զուարթունքն:

Զ. Վեցերորդ՝ զի չէ մարմին լոյսն. այսպէս եւ հրեշտակք:

Է. Եաւթներորդ՝ զի թափանց է լոյսն ընդ ջուր եւ յապակի. այսպէս եւ հրեշտակք ոչ ինչ արգելք ունին:

Ը. Ութերորդ՝ զի բարձր է տեղեալ լոյսն. այսպէս եւ կայանք հրեշտակաց գեր ի վերոյ է յիմանալի աշխարհն:

Թ. Իններորդ՝ զի ունի շարժումն լոյսն. այսպէս եւ հրեշտակք, որք առաքին ի սպասաւորութիւն՝ ըստ առաքելոյ (պնս Եբր. Ա. 14):

Ժ. Տասներորդ՝ զի լոյսն ոչ շեղի ի բնութենէ իւրմէ. այսպէս եւ հրեշտակք ոչ ապականին: Դարձեալ, զի լոյսն յուժեքէ ոչ ըմբռնի, բայց ինքն զայլս ջերմացուցանէ. այսպէս եւ զհրեշտակք ոչ ոք կարէ ըմբռնել, բայց նա պատուհասէ զոք հրամանաւ Աստուծոյ:

Արդ, այսոքիկ գովութիւն, զոր կարգեաց Տէրն, յորդորէ զմեզ միշտ պատրաստ ի կալ: Եւ մանաւանդ, զի աւրինակաւս պարզէ զմիտք բանին, զի ասէ.

«Արարէք ձեզ բարեկամս ի մամոնայէ անիրաւութեան, զի յորժամ պակասեսցի այս կեանքս, ընկալցի զձեզ յարկսն յաւիտենականս» (հմմտ. ԺՁ. 9):

Ուստի յայտ է, զի զանտի կեանքն ոչ իւրիք իրաւք է գտանել, բայց միայն ողորմութեամբ, զի զայս ինչ, զոր անիրաւութեամբ գործեմք, զնոյն դարձեալ առցուք ի բարեգործութիւն, զի զստոյզ զմեզքն մեր ջնջէ ողորմութիւնն՝ ըստ այնմ. «Զմեղս քո ողորմութեամբ քուեսցես եւ զանարեւոյթիս քո՝ փրաւք փրանկաց» (հմմտ. Դան. Դ. 24): Վասն որոյ, զոր աւրինակ զպահս ի յանձին ունիմք, ընդ նմին եւ զաղաւթս, ըստ սոցա կարաւտի ողորմութիւնն, զի կատարեալ լիցուք ի յառաքինութիւն: Եւ այս փոխէ մեզ, զոր աւրինակ առնեմք եւ նմին իրի հանդիպիմք, վասն որոյ մի՛ հեղգասցուք առնել զողորմութիւն, զի ողորմութեանն Աստուծոյ արժանաւոր լիցուք ի Քրիստոս Յիսուս Տէր մեր, որ է աւրհնեալ յաւիտեանս:



ՄԵԾԱՏԱՐՈՒԲՈՒՍ ԵՒ ԱՂՔԱՏ

Ղուկ. ԺԶ. 19-31

ՍՏԵՓԱՆՈՍ ՍԻՒՆԵՅԻ

Այր մի էր մեծաբուն, ազաներ ծիրանիս եւ բեհեզ (հմմտ. Ղուկ. ԺԶ. 19):

Առակէ զամենայն մեծատունս, որ միայն զմարմնոյ հոգայ եւ յերկրային իրս զբաղեալ է. եւ աղքատ է ոմն, զամենայն, որ աղքատ է հոգւով, վասն որոյ ասացաւ. «Երանի աղքատաց հոգով, զի նոցայ է արքայութիւն երկնից» (Մատթ. Ե. 3):

Եւ ի վերայ այսր ամենայնի եւ ի մէջ մեր եւ ձեր վիհ մեծ է հաստատեալ (հմմտ. ԺԶ. 26):

Որպէս գործովք մեկուսացեալ են ի միմեանց արդարք եւ մեղաւորք, նոյնպէս կայենիւք եւ տեղեալք. եւ զայս զիտայ, զի զյարուսթիւնն նշանակէ առակդ, այլ եւ զայս եւս, եթէ է՝ ծանաւթութիւն ի հանդերձելումն:

ԻԳՆԱՏԻՈՍ

Այր ոմն էր մեծաբուն, եւ ազաներ բեհեզս եւ ծիրանիս, եւ ուրախ լինէր [հանապազ] առաքապէս: Եւ աղքատ ոմն՝ Ղազարոս անուն, անկեալ դներ առ դրանն [նորա] վիրաւորեալ: Եւ ցանկայր յազիլ ի փշրանացն, որ անկանէին ի սեղանոյ մեծաբանն: Այլ եւ շունք եւս զային եւ լիզուին զվերս նորա (հմմտ. Ղուկ. ԺԶ. 19-21):

Առակիս բան ոմանց այնպէս թուեցաւ, թէ առանց էութեան բանք սոսկ ասացան եւ ունին զլրումն կատարման խորհրդոյն ի յարութեան անդ, յորժամ երկաքանչիւրոցն լիցի որոշումն եւ կարգի նոցա ըստ վարուցն հաւաստեալք հատուցումն, եւ յայնմանէ առնուն զկարծիս, զի մեծատունն տազնապէր տանջեալ, եւ Ղազարոս կայր¹ ի հանգստեան: Եւ ընդդէմ դնեն այսոցիկ, թէ նախ քան

¹ ԻՏ կեայր

զամենեցուն յարութիւնն եւ զգատաստանին ընտրութիւն, հատուցումն ոչ է՝ ոչ արդարոց, ըստ արդարութեան նոցա եւ ոչ անբարչտաց՝ ըստ նոցա վատթար գնացիցն: Արդ, զայս զմտաւ ածին եւ յայն ոչ կարացին հայել, զոր մեծատունն մաղթէր նահապետին, զի առաքեսցէ զՂազար՝ քարոզս եւ ուսուցիչ եղբարցն, զի մի՛ եւ նոքա գայցեն յայն տեղի տանջանաց, եւ ասելն Աբրահամու. «Ունին զմարգարէիցն բանս, անտի ուսցին» (հմմտ. ԺԶ. 29):

Եւ այս ահա ի յարութեանն ոչ է, զի ամենեքեան յառնեն, եւ ոչ եթէ աշխարհ ինչ է յայնմ ժամու, որ քարոզ նոցա ոք լինիցի ուսուցանել, զի մի չարասցին կորնչել, կամ թէ իցէ բնաւ այնոցիկ, որ ընդ տանջանաւք կապեալ իցեն՝ տեսանել զարդարս: Արդ, պարտ է մեզ ամենայնիւ կալ ի վերայ ուղիղ տեսութեան բանիցս եւ որքան հնար է, կրթել զմիտս յստակ տեսութեան, զի մի ինչ մտածութիւն ընդդէմ անկցի՝ եղծանել հակառակաւ: Վասն որոյ իմանալ արժան է, զի բան առակիս փոխանակ աւրինակ ասելոյ եղեալ է, եւ աւրինակ երբեմն յանշնչից առեալ է, որպէս որ զսերմանիսն արկանէ յերկիր (տրն՝ Մատթ. ԺԳ. 4-24, Մարկ. Դ. 3-20, Ղուկ. Ը. 5-15): Եւ է, զի ի կենդանեաց, որպէս ուռկան արկեալ ի ծով (Մատթ. ԺԳ. 47-50), եւ երբեմն՝ ի մարդկանէ առ մարդիկ, ըստ որում այգի տուեալ մշակաց (տրն՝ Մատթ. ԻԱ. 33-46, Մարկ. ԺԱ 1-11, Ղուկ. Ի. 9-19), եւ այլք բազումք, որ զնոյն ունին, եւ երբեմն յեղեղոց իրաց եւ ի հին պատմութեանց առակս առաջի դնէ, որպէս երկու որդիք Աբրահամու եւ աւճն կախեալ: Արդ, այսպէս առեալ է եւ այս առակ՝ յեղեղոց իրաց: Կամեցաւ զարհուրեցուցանել եւ տալ զիտութիւն այնոցիկ կենացն, որք աստի ի բաց վճարեցան: Առ այս պարտ է մերձ դնել զառաջին առակացն զբանս, այն, որ ցուցաւ կարգ ունել: Առաջին՝ գալ ի խնդիր կորուսեալ ոչխարին եւ դրամին եւ ապա՝ ածեալ լինի իբրեւ զզուարակ¹՝ պատարագեալ ի վերայ անառակ բնութեանս: Եւ, արդ, կացուցանէ տնտեսս, յորոց փրկեաց պատարագաւն: Յայսցանէ ոմանք արդարութեամբ գնացեալս եւ ոմանք՝ անիրաւութեամբ, զորս կոչէ տալ համարս եւ յայտասիկ, որ զղջացան՝ զովեաց: Եւ զի են, որ առանց հնարս փրկութեան գտանելոյ գնացին: Յայտնէ եւ զայսպիսեացն վտանգս, որ ընդունելոց է զնոսա ի լքանելն զայս եւ աւրինակ դնէ զմեծատունն, զի ամենեքեան, որ չարք իցեն, մի վասն զի աստ երկայնամիտ է Աստուած, արհա-

¹ ԻՏ զուարակ

մարհանաւք կացցեն¹, իբրեւ թէ միշտ այնպէս լինիցի, եւ չկայ ինչ ի վերուստ դատաստանք եւ վրէժխնդրութիւնք: Եցոյց զվտանգս մեծատանն, զի անտի ուսցին, որ ինչ պահեալ են դատաստանք Աստուծոյ ի վերայ անբարշտաց: Դարձեալ՝ վասն զի երանեաց զաղքատութիւնն եւ զհալածական լինելն եւ անարգանս կրել վասն անուան նորա եւ եղկելի համարեցաւ զմեծատունսն՝ յասելն. «Վա՛յ ձեզ, մեծատանցդ, զի այսու կենաւքս չափեցաւ մխիթարութիւնն ձեր» (Խմբ. Դով. Զ. 24): Արդ, զայս երանութիւն, որ առ վշտացեալս եւ զսպառնալիս, որ առ փափկացեալս, յեղելոց իրաց մերձ դնէ, որ ինչ պատահեաց յետ աստի վճարելոյս Ղազարու եւ մեծատանն, եւ զի թանձրագոյն են յաւժարութեամբ մարդիկ եւ յերեւելեացս առաւելագոյն ըմբռնին ցանկութեամբ, քան թէ յաներկութիցն: Եւ էին յայնմ ժամու քահանայապետք եւ իշխանք հրէիցն ի մեծութեան եւ ի հանգստեան, եւ որ ընդ նմա էին ի թշուառութեան, վասն այնորիկ առակեաց նա զաշակերտսն իւր ի Ղազար եւ զնոսա՝ ի մեծատունն, զի մի սոքա տարակուսեցին ի նեղութեան իւրեանց, եւ մի նոքա զուարճացին ի փառս իւրեանց, այլ սոքա Ղազարու հանգստեամբն մխիթարեցին, եւ նոքա մեծատանն տանջանաւք տարակուսեցին: Այսպէս եւ յետ նոցա ամենեցուն լիցի խրատ բարեպաշտութեան, զի մի՛ մեծատունք յաւրասցին եւ մի՛ աղքատք վհատեցին: Վասն որոյ դնէ զմեծատանն, զի՛ զամենայն ինչ առատութեամբ ունէր՝ զգեստս պայծառս եւ երեւելիս եւ կերակուրս ամենալիցս, եւ ամենայն ուստեք հեշտալիքն յաճախէին նմա, եւ տրտմականք եւ ոչ մի ինչ բնաւ ուստեք: Եւ ընդդէմ կարգեալ էր սորա Ղազարուն կիրք՝ ամենայնիւ լի տրտմութեամբ, եւ մխիթարութիւն եւ ոչ բնաւ ուստեք: Արդ, այս Աստուծոյ նախախնամութեանն է, զի տայ փարթամութիւն անժուժկալից, զի ունիցին այնու վճարել զպէտս իւրեանց եւ աւելորդաւքն հաղորդել աղքատացն եւ զնել զանտի հանգիստն: Վասն այնորիկ եւ զոմանս աղքատս արար, զի տեղի լիցի մեծատանցն՝ բարեգործելոյ առ նոսա եւ ապականացու գոյիւքն ստանալ զմեծն եւ զանապականն: Ապա թէ չարասցին հեշտասիրութեամբ եւ ազահութեամբ, վճարէ զնոսա մերձակայիցս վայելմամբ եւ ի հանդերձեալսն անպատասխանիս արարեալ՝ պատժէ արդարութեամբն: Եւ աղքատք, եթէ

¹ ԻՏ կայցեն] կացցեն

գոհացողք լինիցին, մեծի հանգստեան եւ փառաց արժանացեալ ի հատուցման արդարոցն յաւիտենական ունին զմխիթարութիւնն: Իսկ եթէ տրտնջողք իցեն եւ մտաւք յաւժարեալք ի մեծութիւնս եւ ոչ անսան խրատու ասողին. «Մեծութիւն թէ առիւ զայցէ, մի յաժարեսցին սիրքք ձեր» (Սաղմ. ԿԱ. 11): Այսպիսիքս կրեն զաղքատութեան դժուարին կիրս եւ ի պարգեւացն Աստուծոյ զրկեալք են ի հատուցման աւուրն: Իսկ մեք աստ առակաւս ուսանիմք զտմարդի բարս մեծատանն եւ զհաստատուն միտս արդարոյն, զի ոչ սա խոնարհեցաւ առ նա եւ ոչ նայեցաւ ի վիշտս նորա, եւ զազանք ողորմեալ լիզուին զվէրս նորա, եւ ոչ նա չարացաւ¹ ինչ ի նեղութեանն, այլ կայր հաստատուն յուսով յայնքան տառապանսն: Նորին աղագաւ սահմանեաց յամենայնիւ չարաց եւ ի կատարեալ բարեաց՝ լինել ի միասին, զի անպատասխանի լիցի փափկացեալն եւ ոչ եթէ՛ ոչ տեսի, կարէ ասել, որքան զշունս անողորմ եցոյց բարս, զի եւ ի փշրանացն անկելոց ոչ կամեցաւ բարեգործել այնպիսում վշտացելոյ: Եւ զի մեծատունք ատեսցեն զմեծատանն զչարութիւն, եւ աղքատք ուսցին զարդարոյն զհամբերութիւն եւ մի դժուարեցին ընդ աղքատութիւնն, զի մի ընդունայն լինիցի, վասն որոյ յարէ յայս զկատարած ելից երկոցունց նոցա.

Եղև,- ասէ,- մեռանել աղքատին, եւ փանել զնա հրեշտակացն ի գոգն Արրահամու (ԺՁ. 22):

Դադարեցին նեղութիւնքն, եւ եհաս հանգիստն, լուծան տրտմականքն, եւ ժամանեաց մխիթարութիւնն, բարձան վէրքն, յորում կեայր տաժանաբար, եւ ընկալաւ զնա կեանքն անապական: Յետ շանցն՝ հրեշտակացն սպասաւորութիւն, եւ յետ այնորիկ, զի ի դուրս մեծատանն անկեալ դնէր՝ ի նահապետին գոգն զրգեալ հանգչէր: Որ ոք աստ սիրէ երկայնիլ զբանս վարդապետութեան, զգիրսն Յոհաննու ընթերցցի զՈսկեբերանին:

Մեռաւ,- ասէ,- մեծափունն՝ եւ թաղեցաւ (ԺՁ. 22):

էանց եւ սորա հեշտալի փափկութիւնն եւ զոր ունէր յերկրէ, յերկիր մնաց, եւ որ չարաչար ստացաւ, մերկ գտաւ, ուրախութիւնն եւ հանդերձիցն վայելչութիւն եւ կերակրոցն հեշտութիւնք

¹ ԻՏ զչարեցաւ] չարացաւ

եղծան, եւ տրտմականքն յաճախեսցին, եւ վիշտք եւ նեղութիւնք բազմացան, զի յամենեցունց, զոր յաճախեաց անձին իւրոյ՝ եթէ բարեկամս եւ եթէ ստացուածս, այնքան միայն զաւրեցին աւգնել նմա, զի պատուով զմարմինն գերեզմանի ետուն: Նորին աղագաւ եւ Տէրն զտորայս ասէ զթաղումն, զի այնչափ էր սահման մեծութեան նորա՝ ըստ այնմ. «Ոչ թէ ի մեռանելն իրում առցէ ընդ իւր գամենայն, եւ ոչ են փառք նորա ընդ նմա» (հմմտ. Մաղմ. ԽԸ. 18), «այլ անձն նորա ի կենդանութեանն իրում պարուեսցի» (հմմտ. Մաղմ. ԽԸ. 19): Եւ նախքան զայս՝ «Տուք նոցա,- ասէ,- են գերեզմանք նոցա, եւ անուք նոցա յիշին միայն նոքար» (հմմտ. Մաղմ. ԽԸ. 12): Իսկ վասն արդարոյն թաղման չկամեցաւ ինչ ասել, զի անարգ եւ առանց պատուի էր, կամ թէ բնաւ իսկ եւ թաղեցաւ ոչ: Զի թէ մինչ կենդանին էր, այնքան վիրաւք էր զազրացեալ, զի շունք էին սպասաւորք, եւ ի մարդկանէ չէր ոք, որ մերձենայր առ նա՝ ի խնամարկել. ո՞վ ոք էր, որ յետ մահուն հողոյ տայր զմարմին նորա, այլ այնպէս անթաղ անկեալ դնէր: Եւ մի՛ ոք տակաւին եւս մարմին՝ զանթաղան մարմնով տեսեալ դժուարեսցի ինչ, կամ անարգ զոր թաղեալ՝ մի՛ երանեսցէ վասն պատուական թաղմանն անշնորհակալու մարմնոյն, այլ ի վարսն հայեսցի, թէ ոգի նորա ի կենդանութեան եւ ի զգայութեան յորո՞ւմ մասին իցէ: Եւ զայս, զոր եղաք, ոչ եթէ սահմանեցաք վճիռ ամենայն արդարոց՝ անարգ լինիլ ի մահուն եւ ամենայն անբարշտաց՝ պատուով ունել զգերեզմանս, այլ միայն վասն կարճմտացն ասացաք, որք յերեւելիս եւեթ հային եւ իմանալեացն չեն տեսողք: Ապա թէ ոչ՝ բազմաց արդարոց քաջավայելուչ են շիրիմք նոցա, եւ անաւրէնք անթաղ մնացին եւ ոչ ինչ սոքա գրեցան առ Աստուծոյ՝ ի հատուցումն նոցա: Իսկ մերս միայն վասն Ղազարու կրից անարգ մարմնոյն եւ բարետոհմութեան ոգւոյն եղաւ եւ մեծատանն բարեկրութեան եւ որ յետ այնորիկ վշտացն, վասն որոյ ասէ.

Մինչ էր ի դժոխս՝ ի փանջանսն, ամբարձ գաշս իւր եւ երես ի հեռասփանէ գԱբրահամ եւ գՂազար՝ հանգուցեալ ի գոգս նորա (հմմտ. ԺՁ. 23):

Որք տարակուսեալք վասն այսորիկ ասեն, թէ ոչ ոք է, որ ունի զհատուցումն բարեաց՝ ըստ արդարութեանն, եւ ոչ տանջանք ինչ են մեղաւորաց նախքան զյառնելն՝ ըստ առաքելոց. «Չեւ ես ընկալան զանբիսն Աստուծոյ վասն մեր լաւագոյն համարեալ, զի մի առանց մեր կապա-

րեացին» (Եբր. ԺԱ. 39): Արդ, այսոցիկ տարակուսանաց դիւրին է լուծումն, քանզի ունիմք զայս հաստատութեամբ, թէ սահմանեաց նա աւր, յորում դատէ զամենայն ոք արդարութեամբ: Բայց զայս առցես աւրինակաւ՝ աստի կենացս ամենայնիւ անվրէպ տեսանել եւ ի դժոխս, զի նախքան զմահն տէրունական, որով լուծաւ մահ, եւ դժոխք բացան, եւ արգելեալքն արձակեցան, ամենեքեան փակեալ էին ընդ իշխանութեամբ դժոխոց: Եւ թէպէտ զոյին արդարք, սակայն առանց պատարագելոյ ոչխարին, որով պատառէր դատակնիքն Աղամայ եւ բառնայր պարտիք մարդկութեանս, ումեք աղատանալ ի դժոխոց աւրէն ո՛չ էր: Վասն որոյ ըստ որում յաշխարհս յայս, զոր անիծիւք ժառանգեցաք, ի միասին բնակին չարք եւ բարիք, եւ է սա մեզ տեղի դատապարտութեան, եւ ոչ են որոշեալ արդարքն ի մեղաւորաց: Այսպէս պարտ է եւ վասն դժոխոցն զիտեալ, զի արդարք եւ մեղաւորք արգելեալ փակեցան ի նա վասն առաջին մարդոյն անհնազարդութեանն: Բայց սակայն ըստ որում աստ ոմանք չարչարեալ են ի դիւաց, որպէս այնք, որ ախտիւ մեղաց գերեցան ի նմանէ եւ անհնարին նեղութեամբ տանջեալ են ոգւով, թէպէտ անզգայացեալք՝ ոչ իմանան, զոր կրեն զապականութիւնն: Եւ են, որք մարմնով չարչարեալք են ի նոցանէ, որպէս որ կարկամեալ էր, զոր կապեաց սատանայ ամս ութուտասն եւ որպէս այն, զի ուր հասանէր, զարկուցանէր եւ փրփրեցուցանէր եւ ի հուր արկանէր եւ ի ջուր, զի կորուսցէ: Եւ արդ, իբրեւ այսպէս իշխեն ի վերայ տկարացն, սակայն սուրբքն սաստէին նոցա եւ հալածէին՝ իբրեւ զծառայս չարս եւ ապստամբս, յորոց եւ ի ստուերէն երկիւղիւ մեծաւ տագնապէին: Զայս աւրինակ առցես եւ ի դժոխս, զի է նա ստորին սահման երկրի եւ ոչ է անդ հուր տանջողական եւ ոչ այլ ինչ տանջանք ի վերուստ, այլ է անդ տանջանք դիւացն, զի զոր աստ մեղաւք եւ անհաւատութեամբ ծառայեցուցին, անդ անխնայ անհնարին լլկանաւք չարաչար տանջէին, որպէս զմեծատունն զայն: Իսկ առ սուրբսն եւ ոչ բնաւ մերձենալ համարձակէին նոքա, զի ըստ որում մինչ մարմնով էին, հալածէին զգեւսն վերին օգնականութեամբն, այսպէս եւ մերկ ոգւով, թէպէտ էին ի դժոխս, այլ զգեւս չարս հալածէին նովին զաւրութեամբն, քանզի չիք ինչ տեղի թափուր, ուր ոչ է մերձ ձեռն ամենակալ՝ ըստ այնմ. «Եթէ յերկինս ելանեմ՝ անդ ես եւ թէ ի դժոխս իջանեմ եւ որպէս յերկինս՝ անդ մաւր ես» (Մաղմ. ՃԼԸ. 8): Արդ, այսպէս ոգիք արդարոց ի ձեռին Աստուծոյ

են, եւ ոչ մերձենայ ի նոսա չար, եւ «բանակք հրեշտակաց Տեառն շուրջ են երկիւղածովք իւրովք» (Մաղմ. ԼԳ. 8): Եւ որպէս յերկրի առ եղիսէիւ տեսաք (տրն՝ Դ. Թագ. Զ. 17): Եւ ի դժոխս զնոյն աւրինակ առցուք, յաղագս որոյ ասէ:

Ի մեռանել աղբարին ի հրեշտակաց բերեալ եղեւ ի գոգն Արրահամու (հմմտ. ԺԶ. 22): Իսկ մեծատունն, տանջեալ ի դիւաց, տագնապէր (տրն՝ Ղուկ. ԺԶ. 23), վասն որոյ առ վտանգին աղաղակէր.

«Նայր Արրահամ՝ առաքեա՛ գՂազար, զի թացցէ զձագ մաւրինն ի ջուր, եւ զովացուցէ զլեզուս, զի պապակիմ ի փապոյ աստի» (ԺԶ. 24):

Արդ, ըստ որում ասացաք, չիք ինչ ի դժոխս հուր այրիչ, զի այս իւրում ժամանակին պահեալ է դիւաց եւ որք նոցին հաղորդեցան չարեաց: Այլ Տէրն, զնեղութիւնն, զոր կրէին հոգիք անբարչտաց ի դիւաց անտի, առակեաց ի տապ: Իսկ գՂազարու զովացուցանելն միայն ծայրիւ մատինն եւ կաթիլ ջրոյն եւ զլեզուն եւեթ, թերեւս զայն տայ նշանակ, զի առաքեսցէ գՂազար՝ փոքր մի հալածել զդեւսն, որպէս եւ աստ՝ այսակիրք ապաւինին ի յարս սուրբս՝ զերծանել ի վտանգէն, զոր կրեն ի դիւաց: Այսպէս եւ մեծատունն այն գիտէր, թէ զաւրութեամբն այնու, որով պահեալ լինին արդարքն ի խաղաղութեան ի դիւաց անտի, ունէր գՂազար՝ հալածել ի մեղաւորաց զդեւսն, զի մի՛ տանջեսցին նոքա ի նոցանէ: Եւ զի՞նչ արդեւք իցէ, զի զանուն աղքատին ամենայն ուրեք նշանակեաց բանին, իսկ զմեծատանն եւ ո՛չ բնաւ ուրեք: Արդ, կարծելի է՝ թերեւս ի պիտանեաց առաջնոց սրբոցն ուրուք անուամբ անուանեալ էր նա, եւ վասն այնորիկ լռեաց, զի մի՛ անուամբ բարի առնն անուանեսցէ զչարն, կամ թէ ի մերձակայիցն, որ լսէին՝ էր ոք անուամբ մեծատանն, եւ խնայեաց ի նա, զի մի՛ խոռովեալ ամբոխեսցի՝ կարծելով, թէ առ նա իցէ բանն: Եվ՛ վասն այսորիկ այսքան դատեալ եղեւ ի մէնջ: Այլ ժամ է այսուհետեւ ի վճիռ բանիցն Աբրահամու հայել, որ լի՛ է արդարութեամբ եւ կարի՛ դժուարին՝ լսելեաց.

¹ ԻՏ > ԵԼ

«Ընկալար,- ասէ,- որդեա՛կ, դու գրարիսն քո ի կեանս քո եւ Ղազարոս՝ զչարհարանս: Վասն այսորիկ սա աստ մխիթարի, եւ դու այդր պապակիս» (հմմտ. ԺԶ. 25):

Ողորմութեանն Աստուծոյ չափ սահմանեալ է եւ յաւիտենիւս այսու ձգի եւ անդր եւս, քան զայս անցանել ո՛չ ունի: Զի որչափ յաճախէ ոք ի մեղս եւ զղջացեալ անկանի առ Աստուած, արդարացուցանէ՝ աւրինաւք ընկալեալ: Ապա թէ ընդ մեզ մտանեն մեղքն մեր ի գերեզմանս մեր, այնուհետեւ նախանձ հրոյն է, որ ուտէ զհակառակորդս, եւ ոչ է գտանել ուրուք արտասուաւք թողութիւն, վասն որոյ եւ Աբրահամ, որ կարի ողորմած էր, առ նա անողորմ գտաւ եւ որ առ Սողոմոնացիսն զթացեալ՝ խնամարկէր եւ բազում մաղթանս առաջի եղեալ Աստուծոյ՝ կամէր այնու խոնարհեցուցանել զԱստուած՝ ի ներելն, սակայն աստ դատաստանաւք խաւսի եւ արդարութեամբ դատէ. «Ընկալար,- ասէ,- զմխիթարութիւնն քո ի կեանս քո, եւ Ղազարոս՝ զչարհարանս»: Ագահեցեր, ասէ, ժողովել զմթերս բազումս շուսյտել եւ փափկանալ եւ բարեգործել առ կարաւտեալս ոչ հաճեցար: Դու ինքնին ուսուցեր, թէ ո՛չ է պարտ վշտացելոց առնել խնամակալութիւն, վասն այսորիկ «սա աստ մխիթարի, եւ դու այդր պապակիս»: Յայս հայի եւ յայտնութիւն մարգարէին եղեալ, վասն որոյ ասէ. «Վայ, որ ազաիէ զազաիութիւն չար փան իրոյ՝ դնել ի բարձունս գրոյն իր՝ կորզել ի ձեռաց չարաց. խորհեցա՛ զամաթ փան քո» (Ամբ. Բ. 9-10): Վասն սորին եւ տախտակի գրեալ ասաց, զի ընթերցեալ ուսցին եւ մի անմտութեամբ զնասցեն զհետ ցանկութեանց, զի մի՛ ի² կատարածի այսոցիկ³, դժնդակ կրից պատահեալ, անլուծանելի ունիցին զվրէժս իրաւացի հատուցմանն, զի նեղելոյն եղեւ ընդարձակութիւն հանգստեանն եւ որ փափկանայրն, անբերելի եհաս տանջանացն: Զայս եւ առաքելոյ հաստատեալ է իրաւացի դատեալ՝ յասելն. «Պարտ է առաջի Աստուծոյ հարուցանել նեղաց ձեռոց նեղութիւն, եւ ձեզ նեղելոցդ՝ հանգիստ ընդ մեզ» (Բ. Թեա. Ա. 6-7): Ըստ այսմ եւ նահապետն այն. նախ՝ զիրաւունս կարգեաց եղ եւ ապա՝ յանհնարինսն աւանդեաց զբանն, իբրու թէ վհաւ արգելեալ փակին նոքա: Վասն որոյ ասէ.

¹ ԻՏ խորհեցար] խորհեցաւ

² ԻՏ > ի

³ ԻՏ այսորիկ

«Ի վերայ այսր ամենայնի վիի մեծ է ընդ մեզ եւ ընդ ձեզ. զի ոչ, աստի՛ առ ձեզ անցանել կարեն. եւ ոչ այսրի առ մեզ որ կարէ անցանել» (ԺՁ. 26):

Եւ արդ, մի՛ ոք ընդ այս տարակուսեսցի, քանզի է այս եւ ի միում քաղաքի տեսանել՝ զոմանս ի գահոյս յաւրացեալս եւ ի սպասաւորաց շուրջ լեալս եւ պատուեալս եւ ոմանք ի կապանս եւ ի խորին արգելարանս փակեալս: Յայս առցես ինձ եւ զՂազարու եւ զմեծատանն վհաւ ի բաց պարսպեալս զոլ ի միմեանց: Եւ արդ, անձին անյոյս փրկութեան եղեալ, ապա սկսանի մարդասէր բարս ցուցանել, որով խնամարկէր ազգայնոցն, յաղազս որոյ ասէր.

«Աղաչեմ զքեզ, հա՛յր Արրահամ, զի առաքեա զՂազար ի փուն հար իմոյ, զի են իմ անդ եղբարք հինգ, [որպէս] զի փացէ նոցա պապուէր, զի մի՛ եւ նոքա զայցեն յայս փեղի փանջանաց» (ԺՁ. 27-28):

Դարձեալ՝ աղաչէր մեծատունն զԱրրահամ, ո՛չ եթէ մեղաւորք ոչ կամին զգնալն այլոց ի դժոխս, այլ զի մեծատունս այս, մինչ էրն յաշխարհի, բազում պատճառս մեղաց լեալ էր եղբարցն: Յաղազս այնր աղաչէր չգալ եղբարցն յայն տեղի տանջանաց, զի մի՛ առաւել պատիժս կրեսցէ¹: Յորոց² ինքն վտանգեալ տազնապէր, ուսաւ, թէ լաւ է զամենայն ժամանակս կալ ի տառապանս, քան թէ տիրել ամենայն ծագաց երկրի եւ ի կատարածի հասանել այսպիսի դժնդակ կրից՝ ըստ այնմ. «Ձի՛նչ ապուր է մարդոյ, եթէ զաշխարհս ամենայն շահեսցի եւ զանձն իւր փոմեսցի³» (Մապթ. ԺՁ. 26): Ուստի ընտրելի է, որ ոք միտս ունի՝ զամենայն զկեանս իւր ընուկ կոծով եւ զամենայն աւուրս՝ տրտմութեամբ եւ արտասուաւք եւ տքնութեամբ հաշել զանձն, եւ թեթեւ համարել զամենայն նեղութիւնս եւ չգրել ինչ բնաւ, որ ինչ յաշխարհի իցէ, այլ զամենայն մերկանալ զաստի կեանս հեշտալիս եւ ամենայն նեղութեանց տալ զանձն յաւժարութեամբ եւ զայն խնդրել միայն, որով հնար իցէ զաղէտս տարակուսանացն այնոցիկ ի բաց քերել յանձնէ: Վասն որոյ ի փորձոյ ուսեալ զայս մեծատանն՝ աղաչէր, զի քարո՛ղ զՂազար արձակեսցէ՝ եղբարցն պատուէր տալ: Յորոց ինքն զփորձ էառ եւ ծանեաւ,

¹ ԻՏ > դարձեալ աղաչէր մեծատունն... պատիժս կրեսցէ

² ԻՏ յորում

³ ԻՏ տուժեսցէ

կարծէր եւ եղբարցն զնոյն միտս ունել եւ հաւատալ, թէ արդարեւ այնպէս իցէ, եւ տալ զանձինս առաքինութեանց, մերկանալ ի ցանկալեաց աստի: Եւ զայն անգիտանայր, թէ եւ եղբարքն նորին ախտիւն ըմբռնեալ են եւ ոչ հաւատան: Այլ թէ զի՞նչ եղբարքն իցեն, զամենայն բնութիւնս¹ իմանալ պատշաճ է. եւ հինգ վասն զգայութեանց թուոյ, զի մի՛ աչաւք խաբեալ՝ ըմբռնեսցին ի հեշտալի տեսութեանց եւ մի՛ ականջաւք ի պատիր բանից եւ մի՛ լեզուաւ ի բանս չարս եւ մի շաւղափելեալք ի գարշ ցանկութիւնս, զի մի եւ նոքա այսպիսեալք ընկղմեալ ախտիւք ի նոյն հասցեն տեղի տանջանաց: Կամ, թէ արդարեւ էին նորա եղբարք, որ նորին անիրաւ եւ չար մեղաւքն վարէին, որոց ողորմեալ, աղաչէ, զի առաքեսցէ զՂազար՝ խրատել զնոսա: Եւ առ այս զի՞նչ առնէ պատասխանի.

«Ունին,- ասէ,- զբանս Մովսէսի եւ այլոց մարգարէիցն, նոցա լուիցեն» (հմմտ. ԺՁ. 29):

Անտի ուսցին զհանգիստ արդարոցն եւ զտանջանսն մեղաւորացն: Եւ այնպէս կարող են, եթէ կամին, ապրեցուցանել զանձինս, քանզի լի են ամենայն բանք մարգարէիցն ամենայն աստուածեղէն իմաստիւք, որք սաստեն, սպառնան թանձրագունիցն մտաւք, եւ որք շողեալք են ընդ գիջական ախտիցն, զի ուսեալք զերկիւղ տանջանացն, հեռացին յապականացու կրիցն մեծաւ զգուշութեամբ: Յայտնեն եւ զփառս արդարոց, զի ցանկացին հասանել փառացն եւ մի խաւարաւ անգիտութեան գնացեալ, հասցեն կորստեան: Իսկ նա, վասն զի գիտէր, որոց եւ ոչ ինքն լուաւ մարգարէիցն, ասէ.

«Ոչ, հա՛յր Արրահամ, բայց եթէ ի մեռելոց որ երթեալ խաւսեսցի ընդ նոսա, եւ այնպէս հաւապան եւ ապաշխարեն» (հմմտ. ԺՁ. 30):

Ամենայն ոք, յորոց կրէ ի նոյն եւ զայլս կարծէ, զի մինչ ի մարմնի էր, առասպելք թուէին նմա բանք մարգարէիցն, վասն զի սէր ընչիցն եւ այլոց հեշտութեանցն առ ինքեանս ձգեալ՝ պահէին զնա: Այլ յայնժամ մերկացեալ ի մարմնոյն եւ ազատեալ ի բռնութենէ ախտիցն եւ զգաստացեալ ի չարաչար կրիցն, որովք տան-

¹ ԻՏ բնութեանս

ջեալ լինէր ի դիւաց, կարծէր, եթէ զայս ամենայն լուեալ ի մեռելոց ուրուք առ նոսա գնացելոց, հաւատան եւ ապաշխարեն՝ զերծեալք յայնպիսի վտանգից: Բայց Աբրահամ, քանզի գիտէր, եթէ հաւատարմագոյնք են բանք մարգարէիցն, քան զմեռելոց յարուցելոց, վասն որոյ ասէ.

Եթէ Մովսիսի եւ մարգարէիցն ոչ լսեն եւ ոչ թէ ի մեռելոց որ յառնէ՝ հաւանեցին (ԺՁ. 31):

Եւ զիս՞րդ ունէին հաւատալ մեռելոյ յարուցելոյ մարդիկ, որ այնքան անհաւատութեամբ եւ ցանկութեամբ աշխարհի վարակեալք էին, մինչ զի զբանս մարգարէիցն չգրէին ինչ՝ ըստ այնմ. «Զբանս սուրբս խոստանս համարեցան» (հմմտ. Յոր Ձ. 25): Զի ահաւասիկ՝ մարդ որ ի մեռելոց յարուցեալ զոր ինչ եւ խաւսի, մարդոյ են բանք, բայց մարգարէիցն հոգւոյն Աստուծոյ բանք են, զոր խաւսեցան: Քանզի պատգամաւորք Աստուծոյ էին¹ եւ անտի առեալ խաւսէին ընդ նոսա², զի երկիցեն ի տանջանաց գեհնին եւ պիտանիք լինիցին կամ ցանկասցին բարեացն հատուցման եւ ուսցին մոռանալ զաստի հեշտալիս եւ յաւժարամիտք լինիցին՝ բարեգործեալ առ աղքատս՝ վասն երանելի յուսոյն եւ կատարածի հանգստեանն արդարոցն: Այլ յայտոցիկ՝ ոչ թէ միայն ոչ զղջացան, այլեւ անարգանաւք եւ չարչարանաւք բարձին զնոսա ի միջոյ՝ ըստ նորուն Տեառն ասելոյն. «Առաքեաց ծառայս, զի ի պրոյոյ այգոյն ատցեն եւ նոցա կալեալ սպանին, եւ զոմանս անարգանաւք յղարկեցին» (հմմտ. Մապթ. ԻԱ. 34-36): Արդ, որ մարգարէիցն զայս հատուցին, մեռելոյ ուրուք լուիցե՞ն, ո՞չ ապաքէն զնոյնս առնեն եւ ի մեռելոց եկելոյ առ նոսա հատուցանել: Արդ, վասն զի յամառեալ պնդեաց մեծատունն ասել, եթէ զմեռեալ որ տեսանեն յարուցեալ, որ խաւսեցի ընդ նոսա, լուեալ ի նմանէ զայս, որ աստ է՝ նեղութիւն՝ երկուցեալ ապաշխարեն: Իսկ Աբրահամ, ըստ որում յայտնի էր նմա, ասաց, որ մարգարէիցն ոչ անսան բանից եւ ոչ մեռելոյ ուրուք հաւանեցին լսել:

Եւ զի մի թուեսցի ումեք, եթէ ուղիղ իմացաւ զայս ասել մեծատունն, թէ զմեռեալ որ տեսանէին յարուցեալ, որ պատմէր զան-

¹ ԻՏ > նոքա
² ԻՏ նոքա] ընդ նոսա
³ ԻՏ յուղարկեցին

տի կենացն, հաւատային ասացելոցն¹ եւ զղջացեալ ապաշխարէին: Վասն այնորիկ, զի արդարացուցէ զբանս Աբրահամու, որ վկայեաց, թէ ոչ լսեն, կոչեաց զՂազար ի գերեզմանէն եւ կորզեաց ի դժոխոց եւ էած, կացոյց ի մէջ նոցա կենդանացեալ, զի խաւսեցի ընդ նոսա՝ հաւատալ եւ ապաշխարել, զի կեցցեն եւ մի կորիցեն: Իսկ եղբարք մեծատանն, քահանայապետք եւ ծերք ժողովրդեանն խորհեցան, զի սպանցեն զյարուցիչն՝ զՅիսուս եւ զոր յարոյցն՝ զՂազար: Այսքան ապառուժ եւ վայրենամիտ եղեն եւ յայսպիսի անհաւատութիւն ձգեցան, վասն որոյ ի նոյն յարեալ՝ ասաց առ աշակերտսն.

«Ոչ է մարթ չգալ գայթակղութեան, բայց վա՛յ այնմիկ, յոյր ձեռն գայթակղութիւնն գա» (Ղուկ. ԺԷ. 1):

ՄԱՏԹԷՈՍ ԶՈՒՂԱՅԵՅԻ

Այր մի էր մեծաբուն եւ ազաներ բեհեզս եւ զծիրանիս եւ հաւնապազ ուրախ լինէր (հմմտ. Ղուկ. ԺՁ. 19):

Առակիս բանս ոմանց այսպէս թուեցաւ, թէ առանց էութեան սոսկ բան ասացան, եւ ունի զկատարումն խորհրդին ի հանդերձեալ ատենին: Եւ զայս յայնմանէ առնուն կարծիս, որ մեծատունն տանջէր եւ զՂազար հանգչէր. եւ վկայ բերեն, թէ նախքան զամենեցուն յարութիւնն, հատուցումն ոչ է, ոչ արդարոցն եւ ոչ մեղաւորաց՝ ըստ առաքելոյն (պնն Բ Կոր. Ե. 10): Աստ, զայս զմտաւ ամին եւ յայն ոչ կարացին հայել, զի մեծատունն մաղթէր նահապետին, թէ առաքեա՛ զՂազար, զի մի եղբարքն իմ աստ եկեսցեն (պնն Ղուկ. ԺՁ. 28), վասն որոյ ասէ.

«Զմարգարէքն ունին, նոցա լուիցեն» (հմմտ. ԺՁ. 29):

Եւ այս ի յարութեանն ոչ է, զի ամենեքին յառնեն, եւ ոչ աշխարհ ինչ է, յայնժամ, որ պիտոյանայ քարոզութիւնն, կամ թէ բնաւ մեղաւորքն զարգարսն տեսանել կարացեն: Ապա եւ՝ պարտ է մեղ ուղիղ պահել զմիտս բանիս, զի մի՛ ուրեք անկանիցեմք ի սխալանս ըստ ոմանց: Արդ, այժմ գիտելի է, զի ամենայն առակք ի տեղի աւրինակի առեալ լինի[ն] ի Տեառնէ: Է երբեմն, զի յանշնչիցն առեալ լինի առակն, որպէս ուռկանն (պնն Մապթ. ԺԳ. 47-50), եւ է, զի

¹ ԻՏ ասացելոյն

կենդանեաց, որպէս ի մարդկանէ առ մարդիկ, որպէս մշակք այգւոյն (տե՛ս Մատթ. ԻԱ. 33-34), եւ որք զսերմանսն Հնձեցին: Եւ երբեմն յեղելոց իրաց եւ ի Հին պատմութեանց առաջի դնէ առակս, որպէս աւճ կախեալ յանապատի (տե՛ս Յովհ. Գ. 14), եւ զԱբրահամ, նմանապէս եւ այս առակս յեղելոց իրաց է, եւ այսու կամեցաւ զարհուրեցուցանել եւ տալ գիտութիւն, որք աստի ի բաց վճարեցան: Արդ, երկաբնակք խնդան ընդ այս աւրինակ, իբր Հաստատեալ իւրեանց քաւարան, որք խայտառակին յայտնի բանիւք, վասն զի Տէր մեր տակաւին ոչ եւս էր չարչարեալ: Իսկ յառաջ քան զխաչիլն, յայտ է, թէ Հոգիք ամենայն ի դժոխս էին՝ արդարք եւ մեղաւորք: Իսկ յետ յարութեանն՝ ոչ եւս, այլ ազատեցան ամենեքեան՝ ըստ այնմ. «Որք ի կապանս էր, ելէք, եւ որք ի խաարի՛ յայրնեցարուք» (հմմտ. Ես. ԽԹ. 9), եւ թէ՛ «Տեսցէ ամենայն մարմին զփրկութիւն Աստուծոյ մերոյ» (Ղուկ. Գ. 6), ուստի յայտ է, թէ սուտ է քաւարան նոցա: Նաեւ ոչ յառաջ, քան զՔրիստոս է քաւարանն, զի այն, որ ի դժոխս էին, ոչ թէ տանջէին, իբր թէ քաւէին, այլ՝ անկարգ էր տանջանք նոցա, այսինքն՝ զի ոչ էր վասն իւրեանց գործոցն, այլ վասն նախաՀաւրն յանցանացն: Իսկ առանձին գործոց դեռեւս պահի Հատուցանել ի դատաստանի՝ ըստ այնմ. «Դարձցին մեղատորք անդրէն ի դժոխս» (Մաղմ. Թ. 18), եւ թէ՛ «Մեզ [ստաջի] ամենեցուն յանդիմանեալ» (հմմտ. Ա Տիմոթ. Ե. 20): Արդ, Տէր մեր ուսուցանէ մեզ աւրինակաւս ի պատրաստի կալ, զի մի՛ ընդ մեծատանն պապակիցիմք ի տապ գեհնոյն, վասն որոյ առակէ՛ ասելով. «Այր մի էր»: Արդ, նախ քննեսցուք, թէ զայս Աւետարանս, վասն է՞ր յառաջնում կիրակէին եւ յերկրորդին ոչ կարգամք, այլ ի չորրորդին: Այս է պատճառն, զի կարգաւորէ ուղղեալ, այսինքն՝ նախ պարտ էր գալ ի խնդիր կորուսեալ ոչխարին (տե՛ս Ղուկ. ԺԵ. 4-6) եւ դրամին (տե՛ս Ղուկ. ԺԵ. 8-10), եւ յորժամ գտաւ, զեզն պարարակ ի գենումն հաժ վասն անառակ բնութեանս (հմմտ. Ղուկ. ԺԵ. 11-32): Իսկ յետ գենման Գառնինն ոչ գոյր պատճառ գնալոյ մեր ի դժոխս, բայց միայն մեղքն մեր, վասն որոյ աստ ընթեռնումք զսա, իբրեւ զգուշացուցանելով խորհրդով Հանդերձեալ ատենին: Յաղագս որոյ ասէ. «Այր մի»:

Դարձեալ, զի երանեաց զաղքատութիւնն եւ արհամարհեաց զմեծութիւնն մեծատանն՝ ասելով. «Վայ՛ ձեզ, մեծաբանց[ի]» (Ղուկ. Զ. 24), վասն որոյ ասացեալսն իւր հաւատարմացուցէ յեղելոց իրաց մեծատամբն եւ Ղազարու:

Դարձեալ զքահանայքն տեսանէին աշակերտքն փարթամացեալս եւ զինքեանս աղքատս եւ գժուծս, վասն որոյ առակէ զքահանայսն ի մեծատունն եւ զառաքինիսն ի Ղազար, զի Հաստատուն լիցին եւ մի՛ երկմտիցեն, յաղագս որոյ ասէ. «Այր մի էր մեծաբուն»:

Արդ, է տարակոյս մի աստ, թէ զի՞նչ պատճառի Աստուած զոմանս աղքատս արար եւ զոմանս՝ մեծատուն: Արդ, կամ աղքատ պարտ էր առնել կամ մեծատուն, զի բազումք յուսահատին այսու: Զայս տարակուսութիւնս լուծանելով՝ ասեմք, թէ այս Աստուծոյ նախախնամութեանն է գործ, զի ծածկագէտ է եւ զամենեցուն միտս գիտէ, եւ զի կամի զամենեսին արժանի առնել այնմ բարեացն: Արդ, ոմանք ի վերայ երկրի անժոյժք են եւ ոմանք՝ Համբերողք: Արդ, տայ անժոյժիցն զփարթամութիւնն, զի ունիցին այնու լցուցանել զիւրեանց կարիս եւ աւելորդաւքն հաղորդել զաղքատս եւ գնել զանտի Հանգիստն, վասն որոյ զոմանս աղքատս արար, զի տեղիք լիցին մեծատանց բարիս գործելոյ, զի թէ ամենեքեան մեծատունք էին, լինէին իբրեւ զայս մեծատուն, եւ թէ ամենեքին աղքատ, սակայն Եւայն ոչ վայել էր բարերար բնութեանն այնպէս աղքատ թողուլ զմարդիկ՝ զրկեալ ի դրախտէն, վասն որոյ զոմանս մեծատունս արար եւ զոմանս՝ աղքատ, վասն ասացեալ պատճառացդ:

Եւ դարձեալ՝ աղքատ եւ մեծատուն արար, զի կարիս լիցին միմեանց, եւ այնու յաջողեսցի գործ աշխարհի, վասն որոյ ասէ. «Այր մի էր մեծաբուն»:
Աստ «մեծութիւն» ո՛չ գտան մեծութիւն ասէ, այլ՝ զփարթամութիւն ընչիցն, զի բազում բարութիւնք մարմնականք կային, այլեւ զանկարգութիւն նմին, զոր կարգէ աստ:

Ա. Նախ՝ զի ասէ. «Փարթամ էր ընչիւք եւ Հացիւն եւ գինովն» (հմմտ. ԺԶ. 19) եւ այլովքն:

Բ. Երկրորդ՝ զյատուկ զգեստ նորա, որ ասէ. «Ազանէր բեհեզս եւ ծիրանիս». բեհեզն վուչն է եւ ծիրանին՝ թաղաւորական զգեստ:

Գ. Երրորդ՝ զի ոչ էր յազգի նորա պակաս, քանզի այս է յատուկ մեծատանն:

Դ. Չորրորդ՝ զի Հանապազ ուրախ լինէր եւ ոչ երբէք տրամեցաւ ի կեանս իւր:

Ե. Հինգերորդ՝ զի ամենայն ոք կարաւտ էր ի նմանէ ինչ առնելոյ, որպէս ասէ՝ «առաքութեամբ»:

Զ. Վեցերորդ՝ զի առողջ էր մարմնովն:

Է. Եւթերորդ՝ զի էր տմարդի բարութն, այսինքն՝ անողորմ:

- Ը. Ութերորդ՝ զի ոչ հայեցաւ ի վիշտս աղքատին:
- Թ. Իններորդ՝ զի հպարտութեամբ շրջէր ի մէջ բազմութեան քաղաքին:
- Ժ. Տասներորդ՝ զի միայն զմարմինն հոգաց եւ ոչ զհոգին:
- Ընդդէմ այսմ եւ Ղազարու չարիքն էին պատահեալ:
- Ա. Նախ՝ զի աղքատ էր ամենեւին:
- Բ. Երկրորդ՝ զի հիւանդ էր մարմնով:
- Գ. Երրորդ՝ զի անկեալ դնէր ի դրան նորա:
- Դ. Չորրորդ՝ զի վիրաւորեալ էր բազում վիրաւք անձն նորա:
- Ե. Հինգերորդ՝ զի շուենք էին սպասաւորք նորա, զի լիզէին զթափափ վիրացն:
- Զ. Վեցերորդ՝ զի ցանկայր փշրանաց անկելոցն ի սեղանոյ մեծատանցն:
- Է. Եաւթներորդ՝ զի ոչ ոք տայր նմա, զինչ եւ պիտոյ իցէր:
- Ը. Ութերորդ՝ զի ոչ ունէր ազգականս:
- Թ. Իններորդ՝ զի ոչ ոք ունէր մխիթարիչ իւրոյ վշտացն:
- Ժ. Տասներորդ՝ զի եւ ծառայք մեծատանցն հարկանէին զնա, վասն որոյ ետ Տէրն փոխանակ նմա ուրախութեանն՝ զվիշտս պապակմանն եւ փոխանակ չարեացն Ղազարու զհանգիստն կենաց, զոր եւ ասէ:

Եղև մեռանիլ աղքատին, եւ փանել [զնա] հրեշտակացն ի գոգն Արրահամու. եւ [մեռաւ] եւ մեծապտունն՝ ի դժոխս (հմմտ. ԺԶ. 22):

Աստ է հարցումն. վասն զի՞ ասէ աստուածային գիր, թէ՛ «Գիւրբ Տէր զասպուածապաշտան փրկել ի փորձութենէ: Եւ զանիրաւսն պահել ի փանջանս» (հմմտ. Բ. Պետ. Բ. 9): Եւ առաքեալ ասէ, թէ՛ «Ամենայն ոք փորձի յիւրոց ցանկութեանց» (հմմտ. Յակ. Ա. 17), եւ թէ՛ «Ասպուած անփորձ է ի չարեաց» (Յակ. Ա. 13):

Արդ, զիա՞րդ է, զի ամենայն արդարք միշտ ի փորձութեանն են, եւ զի արդարքն ոչ ունին ցանկութիւն, որ ի նոցանէ փորձին: Ուրեմն երեւի, զի Աստուած անիրաւ փորձէ զարդարսն:

Պատասխանի. Թէպէտ Աստուած անփորձ է ի չարեաց, սակայն զարդարսն ի փորձութիւն ձգէ, վասն բազում պատճառի:

Ա. Նախ՝ զի թէ ոչ փորձէ Աստուած զարդարսն, ոչ երեւին արդարութիւնք սրբոցն, վասն որոյ փորձէ, զի յայտնի արասցէ զքաջութիւն արդարոյն, որպէս զՅորայն եւ Աբրահամուն՝ ըստ այնմ. «Այժմ

ծաեեա՛, թէ երկիւղած ես [Ասպուծոյ]» (հմմտ. Ծննդ. ԻԲ. 12), այսինքն՝ ծանուցի մարդկան:

Բ. Երկրորդ՝ զի երբեմն սուրբքն հպարտացեալ արդարութեամբք համասեռք լինին սատանայի եւ այնպէս ընդ Բելիարայ կորնչին յաւիտենական, վասն որոյ թոյլ տայ Աստուած սրբոցն անկանել ի փորձութիւն, զի ի հպարտութէնէն ի խոնարհութիւն անկցին, եւ ապա յետոյ զղջմամբ խոստովանութեանն ապրեսցին:

Գ. Երրորդ՝ թոյլ տայ Աստուած, զի ի ձեռն անտեղի չարչարանաց սրբոյն մեծ իմն եւ սքանչելի գործ կանգնեսցի, որպէս յայտ է ի Քրիստոս, զի եւ ոչ վասն ինքեան չարչարեցաւ, այլ վասն մեր, զի ի ձեռն նորին չարչարանացն ապրեսցուք մեք:

Դ. Չորրորդ՝ թոյլ տայ սրբոյն անկանել ի փորձութիւն, զի ի յուզիղ մտացն մի թիւրեսցին, որպէս Պաւղոսի, զի ետ խայթ մարմնոյ սատանայ՝ կռփել զնա, զի մի՛ անկցի ի բարուռք մտացն եւ զնացիցն:

Ե. Հինգերորդ՝ թոյլ տայ Աստուած սրբոցն անկանիլ ի փորձութիւն վասն փառացն Աստուծոյ, որպէս ի ծնէ կուրին, զի նա ոչ ունէր զմեղս, յայտ է, զի [ի] ծնէ կոյր էր եւ հաւատաց Տեառն եւ ո հաւր եւ մաւր իւր, որպէս ասաց Տէրն (տն՝ Յովն. Թ. 3), այլ վասն վառացն Աստուծոյ եղեւ այնպէս:

Զ. Վեցերորդ՝ թոյլ տայ Աստուած չարչարել սրբոց, վասն նաեւ անձու այլոց, զի այլքն, տեսեալ զսուրբսն ի չարչարանսն, փութոցսցին եւ նոքա, որպէս զսուրբ մարտիրոսսն, եւ որք զանձինս ի ռահ ետուն վասն Քրիստոսի: Բայց աստ տարակուսելի է, զի զի՞նչ ի սուք է սրբոյն մեռանելն, զի այլոց աւգտութիւն լիցի: Այսմ պատասխանէ սուրբն Գրիգոր Նիւսեայ, թէ՛ «Հանդիսի տեղի է այս կիւանքս, ոչ թէ վասն այլոց միայն է աւգուտ սրբոյն չարչարելն, այլեւ վասն ինքեան, զի պսակաց չափն ի չարչարանք սրբոյն է, զի որքան տանջանաց համբերեսցէ, այնքան եւ պսակեսցի»:

Է. Եաւթներորդ՝ թոյլ տայ Աստուած սրբոյն ի փորձութիւնն, զի յամենայնի յաղթող եւ կատարեալ երեւեսցի: Քանզի երկու են պատերազմողք, մինն՝ ներքուստ եւ մինն՝ արտաքուստ: Արդ, միայն չէ բաւական, թէ միայն ի ներքս ի բնութիւնն միայն պատերազմեսցի, այլեւ արտաքնոցն եւս յաղթող երեւեսցի, որ է չարչարելն եւ նախատելն ի ձեռն այլոցն: Վասն որոյ թոյլ տայ Աստուած, զի կրկին յաղթողութեանն կրկին եւ պսակեսցէ: Եւ թէ ո՛չ տայր

Աստուած զարտաքին փորձանսն, ասէին ոմանք, թէ ոչ են կատարեալ սուրբքն, զի զարտաքին չարչարանքն ոչ տեսին:

Ը. Ութերորդ թոյլ տայ Աստուած, զի որ երբեմն ողորմութեամբ վարի առ ամենայն մարդիկ, այսպէս եւ երբեմն՝ արդարութեամբ: Արդ, զի՞նչ արդարութիւն էր Աստուծոյ, զի գաշխարհի փորձութիւն միշտ տայ վասն մեղաց եւ միայն մեղաւորաց: Քանզի սուրբքն թէպէտ ներգործութեամբ ոչ արարին մեղս, սակայն ի մեղանչական բնութենէս էին, եւ թէ՛ «Ոչ որ է առանց մեղաց»,- ասէ Յոր (հմմտ. Յոր. ԺԵ. 14): Վասն որոյ թոյլ տայ, զի արդարսն վասն իւր մեղաց կրեցէ պատիժս, եւ զի Աստուածային գիր ասէ. «Անձն, որ մեղիցէ, նոյնն է մեղցի» (Եզեկ. ԺԸ. 4): Արդ, ոչ է դատաստան, զի արդարոցն վասն փոքր մեղացն գյաւիտենական մեղութիւնն տալ, վասն որոյ Հարկի, զի աստ մեղցին, զի անդ՝ զերծցին:

Թ. Իններորդ զի խնամքն Աստուծոյ, որ հաւասար է, յամենայնէ երեւեսցի, զի որպէս զարարածս ամենայն յորժամ բարեպէս խնամէ, ո՛չ թէ զարդարսն արտաքս հանէ ի մարմնաւոր բարութենէն, այլ՝ ի միասին շնորհէ՝ ոչ խտրելով: Այսպէս եւ ի ժամանակի նեղութեան աշխարհի եւ արդարքն չարչարին, զի որպէս կցորդեցան խաղաղութեանն եւ առողջութեանն արդարք եւ մեղաւորք, այսպէս եւ չարչարեսցին ի միասին, զի աստի կեանքս զայս խնդրէ, զսոյն եւ Տէրն ասէ, թէ՛ «[Զի] զարեգակն իւր ծագէ ի վերայ չարեաց եւ բարեաց, եւ ամէ անձրեւ ի վերայ արդարոց եւ մեղաւորաց» (Մատթ. Ե. 45), որ է աշխարհական հանգիստ եւ տանջանք:

Ժ. Տասներորդ զի ծածկագէտ է Աստուած. տեսանէ զանգործսն որպէս զներկայ եւ գիտացեալ, զի սուրբքն յառաջիկայն ի չար գործ ինչ անկանին, խնամաւք իւրովք ի փորձութիւն ձգէ, զի մեղցի արդար, եւ զի մի՛ մեղաւոր լիցի, եւ կորուսցէ զայնչափ արդարութիւնն:

ԺԱ. Մետասաներորդ զի հանդիսադիրն ամենեցուն Քրիստոս է: Արդ, որպէս նա, որ Աստուածն է եւ սուրբն սրբոց, չարչարանաւք եւ յաշխարհէս. այսպէս եւ հետեւողին պարտ է հետոց նորա հետեւել, վասն որոյ թոյլ տայ Աստուած:

ԺԲ. Երկոտասաներորդ զի սրբոց բնակութիւնն հաւասարի ոչ է յայսմ աշխարհի, վասն որոյ նեղութիւն քարչեն, որպէս Տէրն ասէ. «Յաշխարհի ասար նեղութիւն ունիցիք» (Յովհ. ԺԶ. 33): Եւ յայտ է ի յանասունսն եւ ի թռչունս, զի ի բնակութենէ իւրեանց արտաքս գոլով,

ոչ ւունին հանգիստ, նոյնպէս եւ սուրբքն, ի սեպհական բնակութենէ իւրեանց արտաքս գոլով, չարչարին:

ԺԳ. Երեքտասաներորդ զի թէ սուրբքն ոչ անկանէին ի չարչարանք, զիտէաք, թէ Աստուած ամենեցուն միապէս տայ զիւր արքայութիւնն, իսկ զնոսա, տեսանելով այնպիսի նեղութեամբ, գտանել զերկիրն կենդանեաց, իմաստ՝ ւք, թէ՛ «Բազում նեղութեամբ պարպ է մեզ մտանել յայն հանգիստն», - որպէս ասէ առաքեալ (հմմտ. Գործք ԺԴ. 21):

ԺԴ. Չորեքտասաներորդ զի սովորութիւն է տնկոց, զի որք պտուղք ունին, առաւել տեսարք նոցա յաւտեն զաւելորդն եւ ջրեն, եւ այն նեղութիւն է ծառին. այսպէս եւ զսուրբսն առնէ, որ պտղաբեր ծառք են Աստուծոյ, միշտ յաւտէ եւ սրբէ փորձութեամբ, զի առաւել եւս պտղաբեր լիցի, որպէս ասէ Տէրն (տնս Յովհ. Ժ. 2):

ԺԵ. Հնգետասաներորդ թոյլ տայ ի փորձութիւն առ ի յուզողութիւն այլոց, զի ի նորա զիպուածոցն, որ անկաւ ի փորձութիւնն, այլքն խրատեսցին, որպէս զՂազարու եւ մեծատանն, զի թէ Ղազար եւ մեծատունն ոչ էին պատուեալ եւ անպատուեալ, ո՛չ ցանկայաք աղքատութեանն Ղազարու, եւ ո՛չ արհամարհէաք զմեծութիւն մեծատանն, վասն որոյ ասէ.

Մեռաւ մեծապունն: Եւ ի դժոխս ամբարձ գաչս իւր (ԺԶ. 22, 23):

Իսկ թէ վասն է՞ր կոչի արքայութիւնն «գոգս Աբրահամու» եւ ոչ գոգ Մովսիսի եւ կամ Նոյի եւ այլոցն:

Վասն Դ. (4) պատճառաց:

Ա. Նախ՝ «գոգ Աբրահամու» վասն հաւատոյն ասէ՛ ըստ այնմ. «Նաւարաց Աբրահամ յԱսորու, եւ համարեցաւ նմա արդարութիւն» (Ծննդ. ԺԵ. 6), զի որք զնորին հաւատն ստանան, մտանեն ի հանգիստ նորին:

Բ. Երկրորդ՝ վասն Քրիստոսի, որ էր ի գոգոյն, այսինքն՝ յերանացն Աբրահամու ի զաւակէ նորին՝ ըստ այնմ. «Գիրք ծննդեան [Յիսուսի Քրիստոսի որդոյ Դաւթի] որդոյ Աբրահամու» (Մատթ. Ա. 1): Եւ զի՞ Քրիստոս է «արքայութիւն» եւ «հանգիստ», ինքն ասէր. «Եկայք առ իս, ամենայն աշխարհայք եւ ծանրաբեռնեալք» (հմմտ. Մատթ. ԺԱ. 28), եւ ընդ աւագակն ասէր՝ «Այսար ընդ իս իցես ի դրախարին» (Ղուկ. ԻԳ. 43):

Գ. Երրորդ՝ վասն աւրհնութեանցն, որպէս ասէ. «Ի գաւալի քում առինեսցին ամենայն ազգք երկրի» (Գործք Գ. 25), զի որ ոք բարի գործեսցէ, զնորայն աւրհնութեանց նորին արժանաւորին:

Դ. Չորրորդ՝ զի Աբրահամ պատկեր է Աստուծոյ Հաւր, զի որպէս նա ետ զՈրդին միամաւր Իսահակ պատարագ Աստուծոյ (Կրնն Ծննդ. ԻԲ. 10). եւ Հայր Աստուած զՄիածինն ետ ի մահ վասն մեր՝ ըստ այնմ. «Այնչափ սիրեաց Աստուած գաշխարհ, մինչեւ գորդին իւր միածին եպ» (Յովհ. Գ. 16), այսինքն՝ ի մահ:

Իսկ արքայութիւնն «գոգ» կոչի վասն բազում պատճառի: Ա. Նախ՝ զի «գոգ» զժողով իրացն նշանակէ, որ ցուցանէ զժողովումն սրբոցն յարքայութիւնն երկնից՝ ըստ այնմ. «Ուր գէշն է անդր արծուիքն ժողովեցին» (Մարթ. ԻԳ. 28):

Բ. Երկրորդ՝ զի լայնատարած է եւ ընդարձակ է ամենեւին, որ է երկինք երկնից՝ ըստ որում ասէր Քրիստոս. «Ի քան Նար Իմոյ այթեւանք բազում են» (Յովհ. ԺԴ. 2):

Գ. Երրորդ՝ զի ապահով է յամենայն հակառակորդաց՝ որդին ընդ հովանեաւ ձեռաց հաւրն, այսպէս եւ «Նոզիք արդարոց ի ձեռինն Աստուծոյ են, եւ ոչ մերձենայ ի նոսա մահ», - ասէ իմաստունն (Իմաստ. Գ. 1):

Դ. Չորրորդ՝ նշանակէ ամենեւին զհանգիստ, որպէս Որդի ի գոգս Հաւրն, եւ վասն ընտրելոցն ասէ իմաստունն. «Թուեցան յաչս անգգամաց, թէ մեռան» (Իմաստ. Գ. 2), այլ նոքա են ի խաղաղութեան, այսինքն՝ ի հանգիստ, որպէս յայտ է ի Ղազարու:

Ե. Հինգերորդ՝ նշանակէ զգորովագութ համբոյրն հաւրն առ որդին. այսպէս եւ Աստուած՝ զմեղաւորս համբուրէ, յորժամ դառնայ եւ ապաշխարէ, որպէս յայտ է յանառակ որդւոյն, զի ել ընդ յառաջ եւ համբուրեաց զնա (հմմտ. Ղուկ. ԺԵ. 20):

Զ. Վեցերորդ՝ նշանակէ զմխիթարութիւն, զի որպէս հայրն յետ լալոյ առնու զորդին ի գոգն եւ մխիթարէ զնա. այսպէս եւ Աստուած Հայր, զչարչարեալսն եւ զնահատակեալսն յետ աստի կենացս մխիթարէ ի հանդերձեալսն, որպէս ասէ իմաստունն. «Սակաւ ինչ իւրաքեպք գրցեն զմեծ բարութիւնս» (հմմտ. Իմաստ. Գ. 5), զի Աստուած փորձեաց զնոսա որպէս զոսկի ի բովս, այսինքն՝ չարչարանաւք մարմնոյն մաքրեաց զժանգ մեղացն:

Է. Եաւթներորդ՝ զամենեւիմբ զուրախութիւնն նշանակէ որդւոց ի գիրկս հաւրն, այսպէս եւ սրբոցն ի տեսութենէն Աստուծոյ անարտում ուրախութիւն գիպի, որպէս ասէ Տէրն. «Ղարձեալ քնսից զձեզ, եւ ուրախ լիցին սիրոյք [ձեր], եւ գուրախութիւն [ձեր] ոչ ոք հանիցէ ի ձեռն» (Յովհ. ԺԶ. 22):

Ը. Ութերորդ՝ նշանակէ զամենայն բարութեանց վայելումն որդւոյ ի գիրկս հաւրն. այսպէս եւ սրբոցն յարքայութեանն՝ ըստ խոստման բանին. «Ի սեղան Նարն նստեցուցանել եւ անցեալ պաշտել» (հմմտ. Ղուկ. ԺԲ. 37):

Թ. Իններորդ՝ զի փոքր մանուկն առնու հայրն ի գիրկն, որ նշանակէ զանմեղութիւնն արժանացելոցն՝ ըստ այնմ, որ. «Առ մանուկ մի, կացոյց ի մէջ նոցա եւ առեալ ի գիրկս՝ աւրհնեաց եւ ասէ. «Որ ոք ոչ դառնայցէ եւ լինիցի անմեղ, իբր գմանուկ [ոչ մարցէ ի նա]» (հմմտ. Ղուկ. Թ. 47-48):

Ժ. Տասներորդ՝ զանհեռանալի մերձաւորութիւնն նշանակէ գոգ հաւրն. այսպէս եւ առաքեալն ասէ. «Ամպովք ընդառաջ Տեառն ելցուք» (հմմտ. Ա. Թեսաղ. Դ. 16), եւ այնպէս յամենայն ժամ ընդ Տեառն լինիցիմք, որ եւ կեանք է յաւիտենից՝ ըստ այնմ. «Եկայք արինեալք Նար Իմոյ» (Մարթ. ԻԵ. 34):

Իսկ աստ է տարակոյս ինչ, թէ վասն է՞ր զանուն աղքատին ասաց, եւ զմեծատանն՝ ոչ:

Ա. Նախ՝ այսպէս ասեն վարդապետք, թէ զառաջնոցն զբարի անուանս ունէր մեծատունն, վասն որոյ ոչ յիշեաց, զի մի՛ զբարի անունն ի վերայ չարեացն դիցի:

Բ. Եւ երկրորդ՝ զի ի ժողովրդենէն, որք լսէին, է՞ր ոք անուամբ մեծատանն, խնայեաց ի նա, զի մի՛ խռովեցի, կարծելով, թէ առ նա իցէ բանն:

Գ. Եւ երրորդ՝ այլ յայտնագոյն, զի անուանք մեղաւորաց ջնջեալ են ի դպրութենէ կենաց, որպէս Դաւիթ ասէ. «Ջնջեսցին նոքա ի դպրութենէ [քումմէ կենաց] եւ ընդ արդարս [քո] մի [գրեսցին]» (Սաղմ. ԿԸ. 29): «Մի՛ յիշեսցի [անուանս նոցա ի շրթունս իմ]» (Սաղմ. ԺԵ. 4):

Իսկ զի՞ զմեծատանն թաղումն ասէ եւ զաղքատին՝ ոչ:

Այն է, զի զոր ինչ արար մեծատունն յերկրի առ բարեկամքն եւ այլն, ուտելն եւ ըմպելն եւ փառաւոր կենալն, այնքան զաւրեցին, մինչ զի ի գերեզմանն իջուցին, այլ յետոյ ոչ ինչ կարացին առնել: Ուստի ուսանիմք, ո՛վ մեծատունք, զայն բան, յորում զոր ասաց յառաջագոյն Տէրն, թէ՛ «Արարէք ձեզ բարեկամս ի մամոնայէ անիրաւութեան» (Ղուկ. ԺԶ. 9), զի յորժամ պակասիցի այս, լինիցի մեզ տեղի յայնմ արքայութեանն, զի աստի պարտ է շինել զարքայութիւնն զայն: Ապա թէ՛ անհոգ կենամք, որպէս զմեծատունն՝ ուտելով եւ ըմպելով, եւ զայն կեանքն ոչ հոգամք. ուրեմն աւրինակ է մեզ մեծատունն՝

ստուգիլ պապակիմք ի տապոյ մեղաց չարեացն: Իսկ զաղքատին ոչ յիշեաց, զի մեծ քան զայն էր, որ ի կենդանութեանն չարչարանքն: Եւ դարձեալ, զի ի կենդանութեանն չունք էին սպասաւորք նմա, ո՞վ էր, որ թաղէր զնա: Ուրեմն յայտ է, զի ոչ թաղեցաւ, զի աստ զչարչարանքն կատարելապէս ընկալաւ, վասն որոյ բարեացն կատարելապէս հասաւ: Իսկ արդ, ասելով զայս զաղքատս անթաղ թողցուք, եւ կամ զթաղեալսն այսպանեսցուք: Այլ ի վարքն հայել արժան է, զի թէ վարք արդարոյն գոյ ի մեռեալն, ոչ ինչ պակասեցուցանէ թաղելն, եւ թէ ոչ՝ ոչ յաւելու: Նոյնպէս եւ աղքատն, թէ բարիւժք զնացս ունի, ոչ պակասեցուցանէ չթաղելն, եւ թէ ոչ ունի գործս բարիս, թէ քան զլերինս բարձրացուցանէ զգերեզմանս նոցա, ոչ ինչ յաւելու: Իսկ զայս, զոր Ղազարոս պատմեցաք, զոչ թաղելն ոչ թէ հարկիւ ասացաք, ամենայն արդար անարգ լինել ի մահուանն, եւ մեծատուն մեղաւորին փառաւորել, այլ միայն կարճամտացն ասացաք, որք յերեւելիս եւեթ հային եւ իմանալեացն չեն տեսողք, քանզի ահա բազում արդարոց քաջափայելուչ են շիրիմք նոցա, եւ բազում անաւրէնք անթաղ մնացին եւ ոչ ինչ սոքա գրեցան առ Աստուած ի հատուցումն նոցին: Իսկ մեր բանս վասն Ղազարու անարգ կրիցն մարմնոյն եւ բարձրատոհմութեան հոգւոյն եւ մեծատան վշտացն է: Իսկ լսելով զայն, թէ Ղազար ի գոզն Աբրահամու, եւ մեծատունն ի դժոխս պապակէր, մի՛ կարծեր հակառակ բանից առաքելոյն, որ ասէ. «Ձեւ ես ընկալեալ գտեփիս Ապրուծոյ լաւագոյն համարեալ, զի մի՛ առանց մեր կարարեսցին» (հմմտ. Եբր. ԺԱ. 39- 40), զի դեռեւս ի դժոխք էին հոգիքն, եւ Տէր մեր ոչ էր խաչեալ, որով աւերաւ դժոխքն, որպէս ասացաւ յառաջագոյն: Ջի վասն դժոխոցն, որ յառաջ քան զչարչարանքն Տեառն, պարտ է այսպէս գիտել, զի դժոխքն է ի ներքին մասն երկրի, եւ զի նախ քան զՔրիստոս ամենեքեան անդ զնային՝ արդարք եւ մեղաւորք, եւ մի է դժոխքն եւ ոչ բազում, որպէս հաչեն երկաբնակքն, զոր ցուցից աւրինակաւ երկրի ըստ չորից եղանակաց զկերպ բնակելոյ անդ ի միասին արդարոց եւ մեղաւորաց:

Ա. Նախ՝ զոր աւրինակ երկիր պատժապարտութեան տեղիք էր, եւ ամենեքեան ի միասին բնակեն՝ արդարք եւ մեղաւորք, այսպէս եւ ի մի դժոխքն բնակէին արդարք եւ մեղաւորք, եւ ոչ է բազում դժոխս, այլ մի: Այլ եւ այս գիտելի է, զի յարքայութիւնն երկնից

ոչ՝ ոք էր յայնժամ եւ ոչ այժմ՝ ի դժոխքն, այլ ամենեքեան առ հասարակ ի մի դժոխք էին:

Բ. Երկրորդ՝ զի յերկրիս յայսմ գոմանս տանջեն դեւք, այսինքն՝ զչարսն եւ յոմանց հալածական լինին. այսպէս եւ ի դժոխս ոչ գոյր այրիչ, որպէս ի հանդերձելումն, զի այն հուրն տանջիչ ի միւս անգամ գալստեանն կազմի: Այլ զչարսն դեւք տանջէին եւ ի սրբոցն հալածականս լինէին: Եւ այս եւս գիտելի է, զի ի հանդերձելումն դեւք ոչ զոք տանջեն, այլ եւ ինքեանք տանջին ի հուրն՝ ըստ այնմ. «Երթայք [յինէն, անիծեալք] ի հուրն յախիբենականն, որ պարբարեալ է սափանայի եւ հրեշտակաց նորա» (Մատթ. ԻԵ. 41):

Գ. Երրորդ՝ զոր աւրինակ ի մէջ քաղաքի բազում տեղիք, ոմանց՝ դարպաս, ոմանց՝ խանութ, ոմանց՝ բանտ, եւ ոմանց՝ տանջանարանք, ոմանց՝ հանգստարանք. այսպէս եւ ի դժոխս. ոմանց՝ տանջանք եւ կսկիծ, որպէս սողոմայեցուց, մեծատանն եւ այլոցն, եւ ոմանց՝ հանգիստ, որպէս Աբրահամու եւ այլ նահապետացն:

Դ. Չորրորդ՝ զի աստ դեւք մեղաւք եւ անհաւատութեամբ ծառայեցուցին. անդ անխնայ անհնարին լլկանաւք չարչարեն: Իսկ սուրբքն ի մարմնի գոլով հալածէին զդեւս եւ թէպէտ ի դժոխքն զնացին վասն պարտուց նախահաւրն, սակայն զաւրութեամբն Աստուծոյ հալածէին զդեւսն, զի չիք ինչ տեղիք, ուր ոչ է ձեռն ամենակալին: Եւ դարձեալ՝ զոր աւրինակ աստ առ Եղիսէիւն տեսաք, բանակք հրեշտակաց (տն՝ Դ. Թագ. Բ. 11-14) նոյնպէս եւ անդ էին, որ եւ յատուկս դժոխոցն գոլով մեծատանն, համբարձ զաչս եւ ետես զԱբրահամ ի հեռաստանէ եւ ասէ.

«Նայր Աբրահամ՝ ողորմեաց ինձ եւ՛ առաքեա՛ զՂազարոս, զի թացցէ զձագ մափին [իւրոյ ի ջուր]» (ԺՁ. 24):

Եւ աստ եւս բազում յիմարութիւն երեւի մեծատանն:

Ա. Նախ՝ զի անտի կեանքն զգործն Աբրահամու ոչ գործեաց, որով որդի լինէր նմա: Իսկ իմացեալ զտանջանսն՝ «հայր» կոչէ զնա:

Բ. Երկրորդ՝ զի յայն կեանքն ոչ ումեք ողորմեցաւ, իսկ ի դժոխքն ասէ. «Ողորմեա՛ ինձ»:

Գ. Երրորդ՝ զի յիւր կեանքն առ Ղազար ոչ զնաց եւ ոչ ետես զնա ի հիւանդութեանն, իսկ ի դժոխս զՂազար առ ինքն մեծարէ:

Դ. Չորրորդ՝ զի ի յիւր կեանսն Ղազարու ոչ ետ ի փշրանաց սեղանոյ իւրոյ, իսկ ի դժոխս Ղազարու գալ,- ասէ,- «թանալ զձագ մաւրին եւ զովացուցանել» (Ղուկ. ԺԶ. 24):

Ե. Հինգերորդ՝ զի ի յիւր կեանքն ի հանգստութենէն ոչ ումեք հաղորդեցոյց, անդ զտապն պատմէ: Եւ դարձեալ ասէ անգիտութեամբ, եթէ հայր ես, արդարութիւն արա, զի զՂազար զհնգէն մինն մեղք է արարեալ, եւ նովին չափով ես՝ արդարութիւն: Արդ, հաւասարաբաշխութիւն արա՛ եւ առաքեա՛ զդա, զի մի մասն տանջի, եւ ես՝ մի մասն հանգչիմ, զի զայս ունի խորհուրդ, որ զծայր մի մատինն յիշէ: Եւ զի ծայրն յիշէ, այն է, զոր աւրինակ ծայր մատինն փոքր է, այսպէս եւ արդարութիւն մեծատանն կարի փոքր էր: Իսկ «Վրապ» զնեղութիւն զիւացն ասէ, որ լլկէինն: Իսկ «զովացուցանել» զհալածումն ասէ զիւաց: Եւ զոր աւրինակ՝ յերկրի այսակիրք ապաւինին ի սուրբսն՝ զերծանել ի վտանգէն, զոր կրեն ի զիւաց: Նաեւ մեծատունն զիտէր, զի սուրբքն ունէին կարողութիւն ազատել ի զիւաց: Իսկ զի լեզու յիշէ, այն է հայհոյութեամբն, զոր մեղանչելովն նովիմբ տանջի: Իսկ արդ, տե՛ս՝ զի՞նչ տա պատասխանի:

Ա. Նախ՝ «Յիշեալ» ասէ, այսինքն՝ զքո բարիսն եւ զՂազարու չարչարանսն, եւ զի ոչ եմ անիրաւ, զի դու մի մասն բարեացն փոխարէն զկեանսն ընկալար, եւ սա նոյնպէս զտանջանսն: Արդ, դատաստանն ձեր վճարեալ է, վասն որոյ.

«Սա ասար մխիթարի, եւ դու՝ այդր պապակիս» (ԺԶ. 25):

Բ. Եւ երկրորդ՝ զի ողորմութեան չափ եւ սահման է այն յաւիտեան, եւ մինչ դեռ ի մարմնի էր եւ քան զայն անցանել ոչ է, զի այս աւտարս արդարութեան է եւ ոչ ողորմութեան, վասն որոյ «սա ասար մխիթարի եւ դու այդր [պապակիս]»:

Գ. Եւ երրորդ՝ զի աւրինաւքն ոչ արդարացուցար, ընդ քեզ ի դժոխս իջուցեր, ոչ է հնար քեզ ելանել այտի: Նոյնպէս եւ զՂազարոս ոչ ունի աստի ելանել, վասն որոյ եւ ես թէպէտ կարի ողորմած եմ, աստ՝ անողորմ գտանիմ: Նոյն է եւ այժմ ժամանակի, եթէ ոք մեղաւք ի գերեզման մտանէ, եւ թէպէտ հիմա ոչ առնու զհատուցումն, սակայն ի հանդերձելումն նոյնն պատահի, զոր եւ ասէ մեծատանն. «Դու ընկալար զմխիթարութիւնն» (հմմտ. Ղուկ. Զ. 24), զի զայն

ընտրեցեր, այսինքն՝ զազահութիւնն եւ զշուայտանալն եւ զայլն, եւ դու ասացեր, թէ ոչ է պարտ վշտացելոցն առնել սփոփանս եւ խնամարկութիւն, վասն որոյ. «Սա ասար մխիթարի, եւ դու այդր պապակիս»: Արդ, իմացարուք, եղբարք, զի որք աղքատին ասեն ոչ ողորմել, ինքնին հատանեն զողորմութիւն իւրեանց յԱստուծոյ, զի զոր աստ առնենն, նոյնն եւ անդ պատահին, վասն որոյ ասէ.

«Վիհ մեծ է ընդ մէջ մեր եւ ընդ մէջ ձեր» (հմմտ. ԺԶ. 26):

Այսինքն՝ հեռի է փառք մեր ի ձեր տանջանաց: Եւ կամ դարձեալ՝ ոչ ոք աստ եկեալ արդարանալ կարէ, եւ ոչ, որ արդարն է՝ մեղանչել, այն է ասելն.

«Աստի ա[ն]դր ոչ կարեն անցանել» (հմմտ. ԺԶ. 26):

Իսկ մեծատունն յինքենէ յուսահատեալ՝ սկսաւ վասն ազգակաւնացն աղաչել.

«Առաքեա՛ ի քուն հաւր իմոյ» (հմմտ. ԺԶ. 27):

Վասն զի ուսաւ, թէ լաւ է զայնքան ժամանակն տանջել, որպէս Ղազարու, եւ անդ հանգչել, քան թէ տէր լինել ամենայն աշխարհի եւ ի կատարածին դժոխոցն ժամանել: Նոյնպէս եւ մեզ ուսանել արժան է, վասն զի ասէ Տէրն. «Զի՞նչ ազուր է մարդոյ, թէ զամենայն աշխարհս շահեսցի եւ զանն իւր քուժեսցի» (Մարկ. Ը. 36), զի զի՞նչ տացէ փոխանակ անձին իւրոյ: Ապա ընտրել արժան է՝ այսինքն՝ զամենայն կեանս մեր ընուլ կոծելով եւ տրտմութեամբ եւ հեծութեամբ եւ արտասուաւք մաշել զանձինս, եւ զամենայն աստի նեղութիւնս ոչ ինչ գրել, եւ զոր ինչ հեշտալի է, զամենայն ի բաց ձգել եւ կամաւ զճզնութիւն ի յանձին բերել, որովք զաղէտն զայն եւ զտարակուսանքն զայն ի բաց կարիցեմք ձգել, զոր փորձիւ ուսեալ մեծատանն աղաչէր, զի քարոզս առաքեսցէ, զի այսպէս կարծեաց նա, թէ եղբայրքն այլ այնպէս հաւատային, որպէս եւ նա հաւատաց փորձիւ: Ո՛չ գիտէ, թէ նոքա զիւր առաջին խտտն կրէին եւ ոչ հաւատային: Իսկ «եղբարք» զամենայն բնութիւնս է իմանալ, եւ «հինգ» ասելն (Ղուկ. ԺԶ. 28) վասն սզայարանացն թուոյ, զի մի՛ աչաւք խաբեալ կամ ականջովք եւ այլովք: Եւ եթէ ճշմարտութեամբ էին եղբարք չարք եւ անհաւատք, վասն որոց ողորմել աղաչէր: Իսկ Աբրահամ, տե՛ս՝ զի՞նչ պատասխանէ՛ ասէ.

«Ունին զբանք մարգարէիցն, ի նոցանէ լուիցեն զփանջանս մեղաւորաց եւ զփառս արդարոց» (հմմտ. ԺՁ. 29):

Եւ որք կամին, կարող են ապրեցուցանել զանձինս, զոր ասացան, քանզի լի են Աստուածաշունչ զիրք, որք սպառնան մեղաւորաց փախչել ի մեղաց: Իսկ նա վասն զի գիտէր, զի ոչ լսէին մարգարէիցն բանից, զի եւ ինքն ոչ լսեաց, ասէ:

«Ոչ հայր, բայց թէ ի մեռելոց երթան, յոյժ հաւարան» (հմմտ. ԺՁ. 30):

Իսկ աստ վեցերորդ՝ անմտութիւն է, զի ի կենդանութեանն ամենայն բանք մարգարէիցն առասպել թուէր, զի հեշտացեալ էր ի սէր ընչիցն, իսկ յորժամ զերծաւ ի հեշտութենէն եւ անմարմնութեամբն ծանեաւ զշահն լսելոյ, կարծէր, թէ եւ նոքա լուիցեն: Իսկ Աբրահամ ճշմարտագոյնս գիտէր զբանք մարգարէիցն, քան զմեռելոց յառնելն: Ասէ, թէ՛

«Աստուածաշունչ գրոցն ոչ հաւարան, եւ ոչ թէ յառնեն ի մեռելոց, նոցա հաւարան» (հմմտ. ԺՁ. 31):

Եւ ստոյգ գիտացուք, զի լաւագոյնք են բանք Աստուածաշունչք, քան թէ ոք ի մեռելոց յառնէ, վասն զի մեռելոյն բանն մարդոյ բան է, իսկ զիրք՝ Հոգւոյն Սրբոյ: Իսկ որք Հոգւոյն Սրբոյ ոչ հաւատան, եւ ո՛չ յարուցելոյն ի մեռելոց, եւ արդ, վասն զի բազումք գոն յայսմ ժամանակի, զի ոչ այնմ հաւատան, եւ ոչ՝ այնմ, քանզի յոյժ անհաւատացեալ են, բայց մեք, սիրելի՛ք, ունկնդիր լիցուք բանիցս աստուածային եւ պահեսցուք զմեզ ի մեղաց, զի մի՛ ընդ պապակողացն դասիցիմք: Մանաւանդ ողորմած լիցուք եւ ի միտ ածցուք զանողորմութեան դատաստանն մեծատանն, զի թէ ոչ պատրաստիցեմք զմեզ, անողորմ դատաստան լինելոց է այնմ, որ ոչ առնէ զողորմութիւն, իսկ եթէ կրեմք փոքր ինչ նեղութիւն ի սակաւ ժամանակս, անդ յաւիտենական կենացն հասցուք ի Քրիստոս Յիսուս Տէր մեր, որով եւ ընդ որում Հաւր միանգամայն եւ Հոգւոյն Սրբոյ վայել է փառք:

ԴԱՏԱԲՈՐ ԵՒ ԱՅՐԻ ԿԻՆ

Ղուկ. ԺԸ. 1-8

ՄՏԵՓՈՆՈՍ ՍԻՒՆԵՅԻ

Ասաց նոցա զառակս զայս առ ի հանապազ աղաւթել եւ մի ձանձրանալ (հմմտ. ԺԸ 1). «Դաբաւոր մի էր ի քաղաքի միում, յԱստուծոյ ոչ երկրնէր եւ ի մարդկանէ ոչ ամաչէր» (հմմտ. Ղուկ. ԺԸ. 1-2):

Ոմանք ի Քրիստոս վերաբերեցին զառակս, քանզի որպէս Աստուած յԱստուծոյ ոչ երկնչի, այլ եւ ի մարդկանէ ոչ ամաչէ, զի չէ ինչ յետին դործեալ. արդ եթէ դատաւոր արդարութեան է Քրիստոս եւ ամենայն ճանապարհք նորա իրաւամբք են, որպէս եւ են իսկ ըստ ոմանց մեկնութեանդ, անիրաւութեան դատաւոր լինի Քրիստոս, քանզի ի վերայ ածէ աւետարանագիրն յետ սակաւուց՝ ասելով. «Լուարուք, զինչ դաբաւորն անիրաւութեան ասէր» (Ղուկ. ԺԸ. 6). եւ եթէ այդ զմտաւ ածել յետին յիմարութիւն է եւ ընդդիմակաց են միմեանց դատաւորն արդարութեան եւ անիրաւութեան:

Ապա մեկնելի է այսպէս. երկուս անիրաւս եւ չարս աստ իմասցուք մին՝ զդատաւորն անիրաւութեան եւ միւսն՝ զայրւոյն աւստիս, որ էր ընդ իշխանութեամբ անիրաւ դատաւորին, եւ մարթի ի չարսն ումեմն իշխել, եւ ումեմն իշխել, որպէս Բեէզզերուդ «իշխան դիւաց» ասացաւ (Մաթթ. ԺԲ. 24, Ղուկ. ԺԱ. 15, 18, 19). արդ անիրաւութեան դատաւորն յԱստուծոյ ոչ երկեաւ, քանզի ետ խաչել զՈրդի նորայ, սպանանել եւ զմարգարէսն նորայ, եւ զառաքեալսն են մինչեւ ցայժմ եւս հալածանս ի վերայ [յ] քրիստոնէից յարուցանէ ըստ ներելոյ Աստուծոյ այն դատաւոր ամբարտաւան եւ ամբարհաւած եւ ի մարդկանէ ոչ ամաչէ, արհամարհելով զազգ մարդկան: Իսկ «այրի ի քաղաքին» (տէն ԺԸ. 3)՝ Հոգի մարդոյն, այրի լեալ ի Քրիստոսէ, որ է փեսայ եկեղեցական Հոգւոյ. այս այրոյ թողեալ զՔրիստոս, ապաւինէր ի դատաւորն անիրաւութեան՝ լլկեալ յոսոխէն, ի դիւէ, իրաւունս խնդրէր ի դիւաց, զի թաւթափեսցի ի բռնութենէ աւստիսն. աւստիս այս, որպէս ասացի, կա՛մ դեւ իսկ էր, որ լլկէր, կա՛մ մարդ՝ Հնազանդեալ սատանայի. իսկ դատաւորն անիրաւութեան յաշխատութենէ այրւոյն առնէր, զոր ինչ խնդրէին: Եւ խրա-

տէ առակս, թէ պարտ է անձանձրոյթ աղաւթել առ Աստուած, զի եթէ դատաւորն անիրաւութեան, որ ոչ յԱստուծոյ երկնչի եւ ոչ ի մարդկանէ ամաչէ, յաղագս դեգերելոյ եւ թախանձելոյ այրւոյն արար նմա դատաստան, ո՛րչափ եւս առաւել Քրիստոս՝ արդարութեան արեգակն եւ դատաւոր, լուիցէ աղաչանաց եւ պաղատանաց այնոցիկ, որք հանապազ պաղատին եւ աղաչեն զնա:

ԻԳՆԱՏԻՈՍ

Դաւրաւոր մի,- ասէ,- էր ի քաղաքի ուրեմն¹, յԱստուծոյ ոչ երկնչէր եւ ի մարդկանէ ոչ ամաչէր (Ղուկ. ԺԸ. 2):

Դէմք առակիս ոմանց թուեցաւ, թէ վասն Աստուծոյ ասացեալ է, զի ոչ ունի նա զոք ի վերոյ, քան զինքն Աստուած, թէ երկնչի² ի նմանէ եւ ի մարդկանէ նա ոչ ամաչէ: Արդ, որք զայս ասացին, զհետ կարգի բանիցն զնալ ոչ գիտացին, վասն զի ի կատարածի անդ բանի առակին դատաւոր անիրաւութեան զնա կոչէ, զոր վասն Աստուծոյ իմանալ կարի անտեղի է, քանզի դատաւոր է նա իրաւանց եւ արդարութեան, բայց մեզ ըստ պատշաճի իրացն քննել արժան է: Արդ, զմիտս, ասէ, դատաւոր՝ ի քաղաքի բնութեանս, վասն զի եւ բնութիւնս իբրեւ քաղաք իմն ընդարձակ է, եւ մտանեն, շրջին եւ բնակին ի սմա չարք եւ բարիք. եւ են զգայութիւնքս ի մեզ՝ զբունք, որ ընդունին զմտեալսն: Իսկ միտքն է դատաւոր եւ ընտրիչ՝ որպէս կամի, կրէ եւ շտեմարանեալ պահէ եւ զոր ոչ ախորժէ, ի բաց դառնայ եւ արտաքոյ փակեալ պահէ կամ թէ մտեալ իցէ՝ արտաքս հանէ: Եւ այս է, որպէս է՝ առ ոմանս չարս լինել կամ բարիս: Բայց աստ վասն չարի ուրուք եղելոյ են բանք, զի ահաւասիկ յԱստուծոյ ոչ երկնչէր եւ ի մարդկանէ ոչ ամաչէր: Արդարեւ, այսպիսի են միտք վասն նրբութեան եւ ծածուկ գոլոյն՝ երկիւղն Աստուծոյ արհամարհեալ է ի նմանէ եւ իրագէտ վկայութեամբ, որով քննէ զամենայն ապիրատութիւնս. ամենայն ինչ յայտնի է նմա, եթէ գործեաց ինչ աղտեղազոյն, եթէ մտածութիւն ինչ անաւրէնից է³ առ նա, եւ ի խորհուրդս զազրացեալ՝ չաղի ընդ ամաւթալիսն: Սակայն, ըստ որում ասացաք, վասն զի ոչ տեսանի, ի մարդկանէ ոչ ամաչէ: Եւ արդ, այսպէս զարատաւոր կիրս եւ

¹ ԻՏ ուրումն
² ԻՏ երկնիցցի
³ ԻՏ անաւրիցեցաւ] անաւրեցից է

զվնասակար ցանկութիւնս հանապազորդ յինքն ձգեալ՝ խստացեալ է ընդդէմ սպառնալեացն Աստուծոյ եւ զամաւթ առ մարդկան ինչ ոչ զրէ: Առ այսպիսի դատաւոր մատուցեալ այրի հոգին, զրկեալ յոտխէ¹ մարմնոյն աղաչէ, զի դատ արասցէ, զի մի ամենայնիւ պակասեալ ի բարեաց, կորիցէ, վասն զի կարի մեծ եւ անբերելի տագնապ է ոգւոցն² դատարկանալն ի բարեաց: Թէպէտ եւ ապշելոցն ոչ երեւի, սակայն ոգին, որ կրէ զապականութիւնն՝ մարմնական ախտիւք լցեալ, բողոքէ առ միտսն, զի դատ արասցէ: Եւ է դատելն մտաց, յորժամ բաժանէ զմարմնոյն չափով կարեաց բնութեանն տալ, որ ի հաստատութեան պահէ զնա եւ ոչ այնչափ հեղուլ ի նա զարատաւոր կիրս վայրապար ցանկութեանց: Ըստ նմին եւ ոգւոյն³ մասին զիւրն պատշաճ առաքինութիւն, որով եւ ոգին⁴ պահէ զիւրն կենդանութիւն եւ մի կրիցէ զմեղացն մահ: Եւ է բողոքելն ոգւոյն առ միտսն այն, յորժամ զղջացեալ երբեմն՝ խոցոտեն զմիտս մեր յիշատակք վատթար գնացիցն մերոց եւ հեղգութեան, որով զժամանակն ծախեցաք եւ ստրջացեալ մեր՝ յապաշաւանս դառնամք: Է երբեմն, զի առանց ջանալոյ յարտասուս ցնդիմք եւ աստի կենացս յատելութիւն դառնամք եւ զարձակելն խնդրեմք. այս ամենայն ի թախանձելոյ հոգւոյն է: Բայց սակայն ցանկութիւն մեղացն, ընդ որում կապեալ է, ոչ տայ թոյլ առժամայն մերկանալ զչարն եւ ազատել զանձն ի պատժոց, այլ հայի ի ժամանակն: Եւ առժամայն ընտրէ զախորժակսն մարմնոյն տալ եւ յառաջիկայ ժամանակն ընկենու զբարեգործելն: Եւ ապա, այսու սնտոի յուսով զինքն խաբեալ՝ յանկարծակի լուծեալ ի կենացս, անպատրաստ եւ դատարկ ի գործոց բարեաց գտեալ՝ մտանէ ընդ մշտնջենաւոր կապանաւք, յորում⁵ առաջին վստահանալն ժամանել ոչ զաւրեաց: Այլ աստ բանք են, որոց զղջումն յաղթեաց, վասն այնորիկ ասէ.

Թէպէտ եւ յԱստուծոյ ոչ երկնչիմ եւ ի մարդկանէ ոչ ամաչեմ, գոնեայ վասն աշխատ առնելոյ զիս այրոյն՝ արարից նմա դապ, զի մի ի սպառ եկեալ, թախանձիցէ զիս⁶ (ԺԸ. 4):

¹ ԻՏ ի յոտխ] յոտխտ
² ԻՏ ոգւոցն
³ ԻՏ հոգւոյն
⁴ ԻՏ հոգիս
⁵ ԻՏ որում
⁶ ԻՏ ինձ

Այս յայտնի է առ ոմանս¹, որ ի խղճէ մտացն տազնապին եւ առ ի չժուժել նեղասարութեանն եւ տրտմութեանն, որ ի յիշատակէ մեղացն կրեն, հեղուն զանձինս ի լաւագոյնսն: Եւ են, որ անյուսացան, եթէ հնար է ազաշխարութեամբ հասանել արդարութեան, եւ ոչ կարացեալ տանել խղճի մտացն, ի խեղդ մտաբերեցին: Արդ, այսպէս զաւերաւոր եւ դժուարակիր է հոգւոյն թախանձելն զմիտսն յիշատակաւ մեղացն, վասն այնորիկ ասէ. «Թէն յԱստուծոյ ոչ երկնջիմ»: Այսինքն՝ թէ եւ չգոյր ինչ յԱստուծոյ կարգեալ ի վերայ անբարշտաց տանջանք եւ ոչ զատաստանաւ հատուցանել վրէժս եւ ի մարդկանէ ոչ մի ինչ ամաւթոյ եւ նախատանաց կիրք, գոնեայ վասն աշխատ առնելոյ զիս մտացս խղճի, լաւագոյն է դառնալն յարդարութիւն եւ ազատանալ ի տրտմական կրից աստի: Եւ այս է ասելն. «Ձի մի իսպառ եկեալ՝ թախանձիցէ զիս»: Գիտէ, զի ի լաւագոյնսն փոփոխել² ազատէ յայսպիսի տխրական կրից եւ ի նոյն մնալն՝ թախանձալս պահէ զոգին: Եւ արդ, ըստ որում առ անիրաւ տնտեսիւն ասաց, եթէ՝ «Գովեաց Տէր գրեպետն անիրաւութեան, զի իմաստութեամբ արար» (Ղուկ. ԺԶ. 8), զնոյն եւ աստ առնէ, վասն որոյ ասէ.

Լուարո՞ւք՝ զի՛նչ դաբաւորն անիրաւութեան ասէր: Իսկ Աստուած՝ ո՛չ առնէ վրէժխնդրութիւն ծառայից իւրոց, որ ազաղակեն առ նա ի քուռ եւ ի գիշերի, եւ երկայնամիտ միայն լինիցի առ նոսա (ԺԼ. 6-7):

Ձի թէ զանմարդի եւ զվայրենամիտ դատաւորն բազում մաղթանքն հաւանեցոյց դառնալ յիրաւունս, քանիաւ՞ն ապա զարդարադատ բնութիւնն, որ եւ յամենայնի պատրաստէ տալ խնդրողին՝ միայն թէ՛ զարժանն խնդրիցեմք, որ մեզ աւգտակար իցէ եւ նմա տալն՝ պատշաճ: Արդ, վասն զի ի սկիզբն³ բանին յայն եդ, եթէ պարտ է ստէպ յաղաւթս կալ եւ ոչ ձանձրանալ եւ տալոյն երաշխաւոր լինի եւ անիրաւ դատաւորաւն զիրաւացին հաւատարիմ առնէ: Եւ թէ ժամանակաւ երկայնամիտ լինի, մեզ կարճամիտ լինել չէ աւրէն: Յուցանէ եւ աստ մեզ ոտոխ զսատանայ եւ վրէժխնդիր զԱստուած, զի ընդ ամենայնի, որչափ նեղէ զմեզ, ունի վրէժս հատուցանել Աստուծոյ: Դարձեալ եւ զչարս ի մարդկանէ զարհու-

¹ ԻՏ ոմանց
² ԻՏ փոխել] փոփոխել
³ ԻՏ զսկիզբն

րեցուցանէ, որք նեղեն զտնանկս, զի թէպէտ եւ զրկելոց չէ պարտ աղաւթիւք զԱստուած ի վրէժխնդրութիւն կոչել, սակայն նա ինքն զդատաստանս իւր դատէ՝ ըստ այնմ. «Իմ է վրէժխնդրութիւն, եւ ես հասարակց» (Նոմ. ԺԲ. 19): Վասն որոյ եւ աստ մեծաւ պնդութեամբ զնոյն կարգէ.

Այո՛ ասեմ ձեզ,- ասէ,- առնէ վրէժխնդրութիւն նոցա վաղվաղակի (ԺԼ. 8):

Ձի որ չարքն իցեն, մի արհամարհիցեն վասն երկայնատութեանն, այլ երկիւղիւ վրեժխնդրութեանն չարշարեցին, եւ որ նեղեալ են, յուսով մխիթարեցին: Արդ, այս ամենայն ի կատարածի անդ ունի զտեսութիւն, զի ի դատաստանի կացեալ Աստուծոյ՝ դատի՛ արդարութեամբ: Եւ թէպէտ մասնաւոր աստ ցուցանէ երբէք ուրեք առ արդարս կամ առ մեղաւորս, սակայն ամենայն իրաւունք նորա առ ամենեսեան պահեալ է իւրում ժամանակին, վասն որոյ յորմէ սկսաւ, ի նոյն աւարտէ զբանն.

Իսկ որդի մարդոյ,- ասէ,- եկեալ, գրանիցէ՞ արդեաւք հաւաքս յերկրի (ԺԼ. 8):

Ձի յայտ լիցի, թէ ամենայն գործք բարիք, սպառեալ, պակասին յերկրէ եւ միայն թէ աստուածգիտութիւն մնացեալ իցէ², եւ այն՝ առ ոմանս, քանզի զայս արդեաւքն յայտ առնէ, վասն զի նեոն եկեալ՝ յանբարի աւուրսն յայնոսիկ եւ զաւրացեալ իշխանութեամբ ընդ կրաւնիցն տայ պատերազմ՝ բառնալ զնա:

ՄԱՐԳԻՍ ԿՈՒՆԴ

Դաբաւոր մի էր (Ղուկ. ԺԼ. 2):

Կր. Ձիշխանական միտսն ասէ, որ ի մէջ մարմնոյն եւ ոգոյն որպէս կամի ներգործէ, երբեմն ի բարիսն միտելով, որ են հոգեկան առաքինութիւնք, եւ է, զի զմարմնական վատթար խիտն:

ԻԳ Արդ՝ միտքն է դատաւոր, եւ ընտրէ որպէս եւ կամի: Եւ կրէ եւ յշտեմարանի պահէ: Եւ զոր ո՛չ խնորժէ, ի բաց դառնայ եւ արտաքոյ փակեալ պահէ, կամ թէ մտեալ եւ արտաքս հանէ: Եւ

¹ ԻՏ դատ
² ԻՏ [իցի] իցէ

այսպէս ոմանք բարիք եւ ոմանք չարք լինին: Բայց աստ վասն չար մարդոյ է առակս:

Սր. Անիրաւի եւ չարի:

Ի քաղաքի (ԺԸ. 2):

Կր. Աշխարհս ընդարձակ

Իգ. Կամ զբնակութիւն մարդկան ասէ, որ մտանեն եւ շրջին: Եւ բնակի[ն] ի սմա չարք եւ բարիք: Եւ զգայութեանս գբունք են, որ ընդունին զմտեալսն:

ՅԱստուծոյ ո՛չ երկնէր եւ ի մարդկանէ ո՛չ ամաչէր (ԺԸ. 2):

Իգ. Այսպիսի են միտքն վասն նրբութեան եւ ծածուկ գոյոյն: Աստուծոյ երկի[ւ]ղն արհամարհեալ է ի նմանէ: Եւ իրաւագէտ[ն] վկայէ, որ քննէ զամենայն ապիրատութիւն եւ ո՛չ թաքչի ինչ ի նմանէ գործք աղտեղիք, թէ մտածութիւն անաւրէն էառ, զի գարշ խորհրդով շաղի ի զագրալիս: Սակայն, զի մարդիկ ո՛չ տեսանեն, եւ նա ո՛չ ամաչէ՝ զարատաւոր կիրս եւ վնասակար ցանկութիւնս Հանապազ յինքն ձգելով: Եւ խստացեալ է ընդդէմ սպառնալեացն Աստուծոյ, եւ զամաւթ մարդկան չգրէ ինչ:

ՍՏ Քանզի յԱստուծոյ ո՛չ երկեալ եւ ետ խաչել զՈրդի նորա, եւ սպան զմարգարէս նորա եւ զառաքեալս: Եւ մինչեւ ցայժմ հալածանս ի վերայ քրիստոնէից յարուցանէ ըստ ներելոյն Աստուծոյ, դատաւոր ամբարտաւան եւ ամբարհաւած: Ի մաղկանէ ո՛չ ամաչէ՝ արհամարհելով զազգս մարդկան:

Եփ. Անիրաւութիւն նորա խիստ էր, զի համարձակեցաւ եւ էանց գերկի[ւ]ղիւն Աստուծոյ: Եւ ժպրհուութիւն նորա արհամարհեաց զամաւթ մարդկան:

Եւ այրի մի էր ի նմին քաղաքի (ԺԸ. 3):

Կիդ. Հոգի մարդկան՝ անկեալ ի ճոխութենէ եւ ի փառաց դրախտին, եւ զրկեալ ի բարեաց:

Իգ. Զի կարի մեծ տազնապ է հոգոյն դատարկանալ յառաքինութենէ: Թէպէտ ամիշելոցն մեղաւք ո՛չ երեւի, սակայն հոգին կրէ զապականութիւն՝ մարմնական ախտիւք լցեալ:

ՍՏ Հոգի մարդոյ այրի եղեալ է ի Քրիստոսէ, որ է փեսայ եկեղեցական հոգոյ:

Գայր առ նա եւ ասէր (ԺԸ. 3):

Բողոքէր հոգոյն առ միտսն, յորժամ զղջացեալ խոցոտէ զմիտս մեր յիշատակաւ պիղծ գործոցն, որով զժամանակն ծախեցաք, եւ զղջացեալ յապաշաւանս դառնամք: Եւ երբեմն առանց ջանից արտասուեմք, եւ յաստեացս յատելութիւն փոխիմք, եւ զարձակեալն ինդրեմք: Այս ամենայնի թախանձել հոգոյն է:

ՍՏ Ա[յ]րոյն թողեալ զՔրիստոս՝ ապաւինի ի դատաւորն անիրաւ՝ լլկեալ ի մեղացն անյագութեանց:

«Դապ արա՛ ինձ» (ԺԸ. 3):

Իգ. Բարժանել չափով կարեաց մարմնոյն բնութեան տալ զհարկաւորն, որ ի հաստատութեան պահէ զնա եւ ո՛չ անչափն հեղուլ ցանկութեամբ: Ըստ նմին եւ հոգոյն մասն պատշաճ առաքինութեան, որով պահի ի կենդանութեան, եւ մի՛ կրեսցէ զմեղացն մահն:

«Յոսոխէ իմմէ» (ԺԸ. 3):

Սատանայ, որ զմարմինն միշտ զէն կազմէ զգայարանացն ցանկութեամբ ընդդէմ հոգոյն:

ՍՏ Մարթի ի չարսն եւ յանիրաւսն: Ումեմն իշխել եւ ումեմն իշխիլ, որպէս Բեղզբեղ իշխան դիւաց ասացաւ: Արդ՝ այրոյն իրաւունս ինդրէ՝ թաւթափեալ ի դառնութենէ ոսոխին, կամ դեւ էր, որ լլկէր, կամ մարդ՝ հնազանդեալ սատանայի:

Եւ ո՛չ կամէր ի բազում ժամանակս (ԺԸ. 4):

Զմտացն վատթարագոյն յուժարութիւն[ն] ցուցանէ:

Կր. Որ մեղաւքն կապեալ էր եւ ո՛չ տայր թոյլ մերկանալ զչարն եւ ազատել զանձնն ի պատժոց: Այլ կայ ի ժամանակն, եւ առժամայն ընտրէ զախորժակս մարմնոյն տալ. յառաջակայ ժամանակն ընկենուլ զբարեգործելն: Եւ այս սնտոի յուսովս խաբէ զինքն, յայնկարծակի լուծանի ի կենաց աստի: Անպատրաստ, դատարկ ի բարի գործոց մտանէ ի մշտնջենաւոր կապանքն:

Ասէ ի միպս իւր. «Թէեւ յԱստուծոյ ո՛չ երկնիմ եւ ի մարդկանէ ո՛չ ամաչեմ» (ԺԸ. 4):

ԻԳ. Այսինքն՝ թէ չգոյր յԱստուծոյ կարգեալ տանջանք ամպարշտաց դատաստանաւն առնուլ վրէժս եւ ի մարդկանէ ամաւթ:

«ԳՈՆԷ ՎԱՍՆ ԱՇԽԱՐ ԱՌՆԵՂՅ ՂԻՍ ԱՅՐՈՅՆ՝ ԱՐԱՐԻԳ ՆՄԱ ՂԱՐ» (ԺԸ. 5):

Մտացն խղճի[ւ] լաւագոյն է դառնալ յարդարութիւն եւ ազատիլ ի տրտմական կրից:

ԿՐ Վասնզի ստէպ յիշելով գերկի[ւ]զն Աստուծոյ սրաջացեալ մտացն՝ խորհրդած է ի հոգեւորսն:

սար. Խրատէ առակս, թէ պարտ է անձանձրոյթ աղաչել զԱստուած: «Զի մի՛ ի սպառ եկեալ թախանձիցէ զիս» (ԺԸ. 5):

ԻԳ Արդ, այս յայտնի է ոմանց, որք ի խղճէմտացն կրեն տագնապ առ ի չժուժել նեղասրտութեանն, զոր յիշատակաւ մեղացն կրեն: Եւ են, որ հատանեն զյոյս սպաշխարութեան՝ ո՛չ արդարանալ նովաւ եւ ո՛չ տանելով խղճի մտացն, ի խեղդ մտաբերեցին: Զդժուարակիր է հոգոյն թախանձն, որ զմիտան տանջէ յիշատակ մեղացն: Եւ գիտելով ի լաւագոյնսն փոխել՝ ազատի ի վշտացն կրից:

Լուարարուք զի՛նչ դարաւորն անիրաւութեան արար (ԺԸ. 6):

ԿՐ Այսինքն՝ զդարձումն մտացն, որ ի ստէպ յիշատակացն լինի: Զի աղաւթքն եւ հանապազ յիշատակ երկի[ւ]ղին Աստուծոյ դարձուցանեն զանիրաւ միտսն: Յաղագս դեգերելոյն եւ թախանձելոյն արար նմա դատաստան]:

ԵՓ Առաւել խիստ էր ժտութիւն ա[յ]րոյն, որ խոնարհեցոյց զերկոսեանն, եւ զկնի իւր կամացն էած զայս, յետոյ դառն անիրաւ եւ ոսոխ փոխեաց ժտութիւն: Եւ ետ պտուղ քաղցր, որ աւտար էր նոցա: Արդ՝ արար նոցա դատաստանս ուղիղ[ս] եւ հատուցումն արար կնոջ այրոյն:

ԻԳ Է՛, զի եւ զանմարդի եւ զվայրենամիտ դատաւորն հաւանեցուցին մաղթանքն բազում գալ յիրաւունս:

Իսկ Աստուած ոչ առնիցէ վրէժխնդրութիւն ծառայից իւրոց, որ աղաղակեն առ նա ի փութ եւ ի գիշերի (ԺԸ. 7):

Եւ որք դառնան, Աստուած առնէ վրէժխնդրութիւն հոգեկանաց, այսինքն է՝ ձեռնատու լինի յառաքինասէր գործս առ ի ժուժկալութիւն, յորժամ աղաղակեն առ նա ստէպ աղաւթիւք եւ պաղատանաւք:

Եփ. Իսկ արդարութիւն Աստուծոյ պահանջել զիտէ, եւ ողորմութիւն Աստուծոյ կեցուցանել ճանաչէ: Թէպէտ եւ անաւրէնութիւն

նորա հակառակ էր արդարութեան նորա եւ չարութիւն նորա ընդդէմ էր ողորմութեան եւ քաղցրութեան նորա, որչա՞փ եւս առաւել կարեմք մեք ժտութեամբ բռնադատել զողորմութիւն եւ զարդարութիւն Աստուծոյ: Զի տացէ նմա զպտուղ բնութեան իւրեանց, այսինքն՝ արդարութիւն նորա զվրէժս մեր խնդրէ ի սատանայէ եւ ողորմութիւն նորա հանգուցէ զմեզ:

ՍՏ Քրիստոս՝ արդարութեան արեգակն եւ դատաւոր[ն], լուիցէ աղաչանաց եւ խնդրուածոց այնոցիկ, որ հանապազ աղաչեն եւ պաղատեն զնա:

ԻԳ. Քանի առնէ արդարադատ բնութեանն, որ յամենայնի պատրաստէ խնդրողացն, միայն թէ զարժանն խնդրեսցեն, որ մեզ աւգտակար է եւ նմա պատշաճ: Վասնզի սկիզբն զայն եդ, թէ՛ «Պարտ է յաղաւթս կալ եւ ո՛չ ձանձրանալ» (ԺԸ. 1): Եւ տալոյն երաշխաւոր լինի եւ անիրաւ դատաւորաւն զամէնարդարն Աստուած հաւատարիմ առնէ: Զի թէ ժամանակաւ երկայնամիտ լինի՝ [ի] տալոյն կարի անմիտ լինել ո՛չ է արժան:

«Այո՛, ասեմ ձեզ, առնէ վրէժխնդրութիւն նոցա վաղվաղակի» (ԺԸ. 8):

ԻԳ. Վասն այնորիկ ասէ զայս, զի որք չարքն իցեն՝ մի՛ արհամարհիցեն զերկայնամտութիւն Աստուծոյ, այլ երկի[ւ]ղիւ վրէժխնդրութեանն չարչարեսցին: Եւ, որ նեղեալքն են, յուսովն մխիթարեսցին, զի ի դատաստանի կացեալ Աստուծոյ՝ դատի արդարութեամբ: Թէպէտ եւ մասնաւոր աստ ցուցանէ, երբեք երբեք առ արդարս կամ մեղաւորս,

Կի. սակայն ամենայն իրաւունք նորա ի հանդերձեալ ատեանն ժամանեալ մնայ:

Իսկ Որդի մարդոյ եկեալ՝ զգրանիցէ արդեւք հաւարս յերկրի (ԺԸ 8):

Կր. Հաւատս աստ ո՛չ զխոստովանութիւն Սուրբ Երրորդութեանն ասէ, այլ զսերտ եւ զաներկբայ հաւատոցն, որովք կարողք եւ մարտիրոսքն զարիւնս իւրեանց հեղին վասն Տեառն:

ԻԳ Զի յայտնի լիցի, թէ ամենայն գործք բարիք սպառին յերկրէ, եւ միայն աստուածգիտութիւն[ն] մնացեալ լինի առ ոմանս: Քանզի զայս արդեւք յայտ առնէ, վասն զի նեռն, եկեալ յանբարի յա-

ւուրսն [յ]այնոսիկ եւ զաւրացեալ լինի իշխանութեամբ ընդ կրաւնից աստուածպաշտութեանն, տայ պատերազմ բառնալ զնա:

ՄԱՏԹԷՈՍ ՋՈՒՂԱՅԵՅԻ

Դափաւոր մի էր ի քաղաքի ուրումն, յԱստուծոյ ոչ երկնէր եւ ի մարդկանէ ոչ ամաչէր: Եւ այրի մի էր ի նմին քաղաքի (Ղուկ. ԺԸ. 2-3):

Բարեխնամն եւ ամենազուրկն Յիսուս յամենայն ժամ կամի կեցուցանել զոգիս մեր եւ ոչ ունի նախանձ ըստ մերոյ անաւրէնութեան, նա թէեւ վասն մեր խաչեցաւ եւ զի՞ մեռաւ վասն մերոյ անաւրէնութեան. ուրեմն յայտնի է, զի կամի կեցուցանել զոգիս մեր, վասն որոյ զահ դատաստանին առաջի եզ մեզ այսաւր եւ պատմեաց զարհաւիրսն, մանաւանդ թէ զհատուցումն, որ անդ, զորմէ երկնչել տարակուսիմք, վասն որոյ մեծն եւ ամէնողորմն խնամէ զմեզ խրատիւ եւ առակաւ ցուցանէ մեզ ուսանել մեզ նա ի չարչարանաց զերծումն, վասն որոյ ասէ՝ «կալ միշտ յաղաւթս եւ ոչ ձանձրանալ», եւ ընդ նմին զառակն յաւրինէ:

Դափաւոր մի էր ի քաղաքի (ԺԸ. 2):

Բայց՝ նախ տեսցուք, թէ ո՞վ է դատաւորն, եւ զի՞ ոմանք ասացին զԱստուած գոյ դատաւոր, պատճառելով, թէ ոչ ունի ի վերոյ ինքեան մեծ, յորոյ երկնչի եւ ոչ ի մարդկանէ ամաչէ, եւ ի յետին բան ոչ նայեցան, որ ասէ.

«Տեսանէք, զի՞նչ դափաւորն անիրաւութեան արար» (հմմտ. ԺԸ. 6):

Յորոց յայտնի ստութիւն այնմ բանի, վասն զի զԱստուած «դատաւոր արդարութեան» ուսաք ի Սուրբ Գրոց՝ ըստ այնմ. «Յարդարութիւն եւ յիրաւունս հասարակեալ է Աթոռ Նորա» (հմմտ. Մաղմ. 2Ը. 15): Այլ «դափաւոր» զմիտս մարդոյ ասէ, իսկ «քաղաք»՝ զմարդ, եւ «այրի»՝ զհոգին եւ զայլն նմանապէս, զոր ի կարգի ուսցուք:

Ա. Նախ՝ տեսցուք, թէ զի՞նչ է գործ դատաւորին:

Բ. Եւ երկրորդ՝ թէ վասն է՞ր թիւրի դատաստանն:

Գ. Եւ երրորդ՝ թէ որպէ՞ս նմանի բնութիւնս մեր քաղաքի:

Դ. Եւ չորրորդ՝ ո՞ր է առաւելութիւն այսմ քաղաքի:

Վ. Եւ հինգերորդ՝ թէ զի՞նչ է ի դատաստան, զոր ոչ կամեցաւ առնել:

2. Վեցերորդ՝ թէ զի՞նչ է յետոյ արար:

Եկեսցուք յառաջին գլուխն եւ ասացուք, թէ քանի են գործք դատաւորին:

Ա. Արդ, առաջին գործ է դատաւորին՝ լսել զբան դատախազացն, զոր ասեն:

Բ. Երկրորդ՝ քննել եւ որոնել զասացեալսն, թէ ճշմարտութեամբ ասեն, թէ՛ ոչ, թէ պատրուակաւ եւ զստոյղն հանել:

Գ. Երրորդ՝ զերկոսին դատախազին համանգամայն քննել եւ ոչ առանձին:

Դ. Չորրորդ՝ վկայս խնդրել Բ. (2) կամ երիցս՝ ըստ բանին Տեառն. «Յերկուց եւ յերից վկայից հասարակեցի» (հմմտ. Մաթթ. ԺԸ. 16):

Ե. Հինգերորդ՝ զսուտն սուտ առնել եւ զճշմարիտն՝ ճշմարիտ:

2. Վեցերորդ՝ վճիռ հատանել երկոցունց:

Արդ, ահայ այս է գործ դատաւորին:

Իսկ միտքն, զի դատաւոր ետ Աստուած, ամենեւին ոչ կամեցաւ զմի ի սոցանէ ի գործ ածել: Եւ այս յայտնի ի պատճառացն, թէ՛

ՅԱստուծոյ ոչ երկնէր եւ ի մարդկանէ ոչ ամաչէր (ԺԸ. 2):

Իսկ արդ, տեսցուք զերկրորդ գլուխն, թէ վասն է՞ր թիւրի ի դատաստանն: Եւ այս վասն Դ. (4) պատճառի:

Ա. Նախ՝ վասն անգիտութեանն, զոր ոչ իմանայ դատաւորն զուղիղն, այլ ըստ թիւր իմացմանն վատթար առնէ զդատաստանն:

Բ. Երկրորդ՝ զի առնու կաշառս, վասն որոյ կապի լեզու նորա՝ ոչ խաւսել զճշմարիտն:

Գ. Երրորդ՝ թէ երես առնէ կամ վասն մերձաւորութեան ազգականութեան, կամ վասն սիրելութեան, կամ վասն աղքատութեան եւ աղաչանաց:

Դ. Չորրորդ՝ թէ երկնչի ի բռնաւորաց եւ յիշխանաց եւ յաղազս այսոցիկ թիւրի դատաստանն:

Արդ, միտքն զայս ամենայն առնէ: Նախ՝ զի յիմարի ի մեղացն. զի ոգիք ըմբռնեալք ի մեղս ի մտաց եւս անկանին: Եւ ապա՝ առնու կաշառ զհեշտութիւն մեղաց, զի նախ նա հեշտանայ եւ ապա՝ մարմինն: Իսկ երես պահէ մարմնոյն. այս է, զի սիրեցեալ ի նմանէ վասն զկամսն կատարելոյ գործով եւ երկնչի եւս, գուցէ թէ դատ

առնէ, վնասեսցի բաժանմամբ: Արդ, պարտ է հոգւոյն, որ խաւարեալ է ի մեղս, յոյժ գոչալ եւ յԱստուած յուսալ, որ սաստեսցէ անխիղճ մտացն, զի արասցէ դատաստան:

Իսկ զերրորդ գլուխն տեսցուք, զի զբնութիւնս մեր քաղաքի նմանեցուցանէ, որպէս ասէ. «Դափաւոր մի էր ի քաղաքի ուրեմն»: Եւ այս ըստ բազում յեղանակի:

Ա. Նախ՝ զի քաղաքն ամրացեալ է պարսպաւք եւ բրգաւք. այսպէս եւ մարդն՝ մարմնով եւ ջլաւք եւ ոսկերաւք եւ նէարդեամբք:

Բ. Երկրորդ՝ զի ի քաղաքն են տունք բաժանեալք ի միմեանց. այսպէս եւ մարդն, զի գլուխն բաժանեալ է ի լանջացն. եւ ի գլուխն՝ տունս երիս՝ տեսողական, դատողական եւ յիշողական, նա թէ եւ սիրտն որոշեալ է բոլորակութեամբն իւրով ի լերդէն եւ ի թոքոյն եւ երիկամունքն եւ այլն նմանապէս:

Գ. Երրորդ՝ զի յիւրաքանչիւր տուն գործի որիչ գործ ի քաղաքն. այսպէս եւ ի մարդն ի խելսն ունի որիչ գործ՝ բաժանումն առնել, այլեւ խելապատակն, նոյնպէս ստամոքսն՝ հալել, եփել եւ պարզել եւ արտաքս վտարել, եւ լերդն՝ կարմրել եւ ներկել, եւ սիրտն ընդ ամենայն յաւդուածս բաժանել եւ այլն նմանապէս:

Դ. Չորրորդ՝ զի զբարեբարսն պահեն ի քաղաքի, իսկ զվատթարսն արտաքս հանեն. այսպէս եւ ի մարդն, զի ստամոքսն զգեղեցիկն ի գոլորչեացն առ խելապատակն առաքէ եւ զպարզ ջուրն՝ ի լեարդն, իսկ զգուրտն արտաքս վտարէ, այսպէս եւ խելապատակն՝ զաղի նորա յաչսն, եւ զգառն՝ ընդ ականջն, եւ զկծուն՝ ի քիթն, այսպէս եւ այլքն:

Ե. Հինգերորդ՝ զի սպասաւորք կարգեալ են ի քաղաքի՝ բերել ի նա զամենայն ինչ. նմանապէս եւ ի մարդն կարգեալ է. աչքն ծառայ է, զի տեսանիցէ, եւ ի ներքս ի միտքն տանի զկերպարն, զի ճանաչիցէ, եւ զձեռն, զի գործեսցէ, եւ զճաշակելիքն, զի մանրեսցէ, եւ հոտոտելիքն եւ այլն:

Զ. Վեցերորդ՝ զի բազում դրունք են քաղաքին. այսպէս եւ ի մարդն երկոտասան դրունք կարգեալ են յարարչէն, ընդ որում մտանեն եւ ելանեն: Այս է Բ. (2) ականջ, Բ. (2) աչք եւ Բ. (2) ունգունք եւ մի բերան եւ Բ. (2) ծիծն, եւ պորտն, եւ յառաջքն եւ յետքն:

Է. Եւթներորդ՝ զի են ի քաղաքին, որ բարեկամ են քաղաքին, եւ են, որ ոչ. այսպէս եւ ի մարդն կամի զառաքինութիւնն, որով

ապրի մարդն, իսկ մարմինն զհակառակն նորին խորհի,- ըստ առաքելոյ (պնս Գաղ. Ե 17):

Ը. Ութերորդ՝ զի ի դիշերի դադարին ամենեքեան ի գործոց, որ ի քաղաքի. այսպէս եւ մարդոյն ի ննջելն դադարին ամենայն զգայարանքն ի գործոց իւրեանց:

Թ. Իններորդ՝ զի թագաւոր կարգեալ է ի քաղաքի, եւ նա նստի ի բարձր տեղւոջ. այսպէս եւ ի մարդն թագաւոր միտքն է, այն, որ նստի [ի] գլուխն՝ ըստ Սողոմոնի (տե՛ս Ժող. Բ 14):

Ճ. Տասներորդ՝ զի թշնամիք քաղաքին քակեն զքաղաքն եւ զինչսն տանին եւ փլուցանեն զշինուածսն, որ ի նմա. այսպէս եւ մահն զմարդն քակէ՝ զգեղեցկայարմար շինուածն, եւ զպատուականն ի նմա՝ զհոգին, հանէ ի նմանէ եւ զմարմինն լուծանէ ի միմեանց ապականութեամբ, վասն որոյ ասէ. «Դափաւոր մի էր ի քաղաքի [ուրեմն]»:

Հետեւմամբ տեսցուք զչորրորդ գլուխն, թէ քանի պատուականութիւն մարդոյս քաղաքի, քան զանշնչիցն: Եւ արդ, բազում պատուականութիւն սորա:

Ա. Նախ՝ զի քաղաքն ձեռագործ է մարդոյ, իսկ մարդն՝ Աստուծոյ:

Բ. Երկրորդ՝ զի քաղաքն բնակութիւն է մարդոյ, իսկ սա՝ Աստուծոյ, որպէս թէ քաղաքի է քաղաք:

Գ. Երրորդ՝ քաղաքն պատկեր է հողոյ, իսկ մարդն՝ Աստուծոյ:

Դ. Չորրորդ՝ քաղաքն անկենդան է, իսկ մարդն՝ կենդանի:

Ե. Հինգերորդ՝ զի քաղաքն՝ ապականացու, իսկ մարդն՝ անապական հոգւով:

Զ. Վեցերորդ՝ քաղաքն վասն մարդոյ ամենայն պիտոյիւք, իսկ մարդն՝ վասն Աստուծոյ:

Է. Եւթներորդ՝ զի զաւրութիւն սորա եւ փառք անցաւոր է, իսկ մարդոյն՝ մշտնջենաւոր:

Ը. Ութերորդ՝ զքաղաքս աւերեալ շինէ ա՛յլ ոք, իսկ զբնութիւնս քակեալ, որ ստեղծ նա, շինէ յարութեամբն:

Թ. Իններորդ՝ մեծ է որքանութեամբ, զի սա ի տեղիս տեղիս, իսկ նա՝ յարեւելից մինչ ի մուտս եւ յայլսն:

Ճ. Տասներորդ՝ զի տեղիք այսմ քաղաքի է երկիր խոնարհ, իսկ մարդոյս քաղաք է երկին ի բարձունս եւ քաղաքակից հրեշտակաց:

Տեսցուք եւ զհինգերորդ զլուխն, թէ զի՞նչ է դատաստանն, զոր ոչ առնէ միտքն: Այս է ի հասանել ժամանակին ի գործ մեղացն հեշտանայ միտքն եւ թոյլ տայ առնել: Եւ զոր աւերինակ լուծեցանց գերկոսինն ուղիղ վարէ, իսկ ի խոտորել լծոյն, խոտորնակի միակողմանի գնա նա. այսպէս զմիտքն՝ դատաւոր, եւ լուծ է դրել Աստուած ի վերայ հոգւոյ եւ մարմնոյ՝ առնել դատաստան եւ ուղղել, եւ ի միջինն գնալ ճանապարհ: Իսկ նա ոչ երկնչի ի նմանէ վասն բազում պատճառի:

Ա. Նախ՝ զի ոչ հաւատայ հատուցման գործոցն, թէ այս մեղացս վճարել կայ զփոխարէնն:

Բ. Եւ երկրորդ՝ զի զինքն միայն գիտէ եւ ոչ զայլ ոք:

Իսկ «ոչ ամաչի ի մարդկանէ».

Ա. Նախ՝ զի ծածուկ է եւ անտես ի մարդկանէ յամենեցունց:

Բ. Եւ երկրորդ՝ վասն նրբութեանն: Ուստի զամենայն ստուգապէս ճանաչէ, եւ թէ ուղիղ է բանն, նա ունի ամբարեալ եւ ամենեցուն հետեւող է: Յաղագս այնր, զի ոչ ոք տեսանէ գնա եւ յանդիմանէ, նմին իրի եւ ոչ ամաչի, եւ ոչ երկնչի, վասն որոյ եւ ոչ առնէ դատաստան արդար:

Քննեսցուք եւ զվեցերորդ զլուխն, թէ վասն է՞ր «այրի» կոչէ զհոգին: Եւ այս վասն բազում պատճառի:

Ա. Նախ՝ զի այրին յոյժ տառապանաւք կենայ, այսպէս եւ հոգին ի մէջ մեղաւորաց եւ անաւրէնաց՝ ըստ այնմ. «Տոռուք մեղաց պարեցան զինս» (Սաղմ. ԸԺԸ. 61):

Բ. Երկրորդ՝ զի միշտ աղաչէ այրին, եւ ոչ ոք լսէ. այսպէս եւ հոգին միշտ աղաչէ զմիտքն, եւ ոչ ոք լսէ նմա, որպէս եւ ասէ.

Այրի մի էր ի քաղաքին, գայր առ նա եւ ասէր. «Դաք արա՛ ինձ յոտխէ իմէ»:

Եւ ոչ կամէր ի բազում ժամանակս (ԺԸ. 3-4):

Գ. Երրորդ՝ զի գծուծ է հանդերձիւ այրին. այսպէս եւ հոգին մերկ է ի բարեացն, յորժամ ի մեղքն է:

Դ. Չորրորդ՝ զի չունի ակնկալութիւն յուճեքէ այրին. այսպէս եւ հոգին անյոյս լինի ի մէջ անհուն մեղացն:

Ե. Հինգերորդ՝ զի այրին «անայր» կոչի. այսպէս եւ հոգին ի մէջ մեղացն անբարի կոչի:

Զ. Վեցերորդ՝ զի «այրին» այսպէս ստուգարանի. «այրի»՝ այսինքն՝ կսկծի եւ խորովի, այսպէս եւ հոգին յոյժ կսկծի ընդ կորուստ իւր:

Է. Եաւթներորդ՝ զի այրին իւրովի ջանայ եւ ոչ կարէ ապրել. այսպէս եւ հոգին առանց մարմնոյն ոչ կարէ արդարանալ:

Ը. Ութերորդ՝ զի այրին աղքատ լինի ամենեւին. այսպէս եւ հոգին աղքատ կոչի ի բարեաց կամ ի չարեաց:

Թ. Իններորդ՝ զի ամենայն ոք կամաւ ողորմի այրոյն եւ ոչ ի բռնութենէ հարկիւ. այսպէս եւ միտքն ոչ բռնութեամբ հարկիւ առնէ դատ հոգւոյն, այլ յինքենէ շարժեալ:

Ժ. Տասներորդ՝ բազում անգամ կամի այրին մեռանիլ եւ ոչ կարէ. այսպէս եւ հոգին ցանկայ ելանել ի ժահահոտ մարմնոյն եւ գերծանիլ ի նմանէ, որպէս ասէ Դաւիթ. «Տէր հաս ի բանլք գանձն իմ» (Սաղմ. ԸԽԱ. 8): Վասն որոյ «այրի» կոչէ գնա:

Հետեւաբար տեսցուք եւ զեաւթներորդ զլուխն, թէ զի՞նչ է դատաստան, զոր արար միտքն:

Արդ, այս է դատելն մտաց, յորժամ բաժանէ զմարմնոյն չափով կարեաց բնութեանն տալ վասն հաստատուն պահելոյ գնա, եւ ոչ անչափ հեղուլ ի նա զարատաւոր կիրսն: Նոյնպէս եւ զհոգւոյն մասինն՝ զիւր պատշաճ առաքինութիւնսն, որք զհոգին պահեն կենդանի, եւ զի մի կրեսցէ հոգի զմահ: [Ի]սկ բողոքել հոգւոյն առ միտս յերիս ժամանակս լինի:

Ա. Նախ՝ յորժամ զղջացեալ երբէք իս[ոց]ոտեն ի միտս, յիշատակելով զվատթար գնացս եւ զհեղգութիւնս անուզղայս, որով զժամանակն ծախեցաք:

Բ. Երկրորդ՝ յորժամ առանց ջանալոյ ընդ արտասուսն ցնդիմք. այս է զղջական բանս ի սրբոց, եւ նա հանէ զարտասուսն առանց կամաց մարդոյն:

Գ. Երրորդ՝ յորժամ նեղանամք յաշխարհէ, ատեմք զմեզս եւ կամենամք ելանել, գերծանել ի սմանէ, եւ այս ամենայն ի թախանձանաց հոգւոյն, իսկ ցանկութիւն մեղաց ընդ նմա կապեալ է, եւ ոչ տայ թոյլ առ ժամայն մերկանալ զչարն, այլ միշտ խարէ, թէ յառաջիկայ ժամանակն բարի առնես, այժմ ժամանակ չէ: Եւ այսպիսի չար յուսով բազումք են կորեալ, յանկարծակի գալ ի վերայ լուծումն կենաց, անպատրաստ եւ դատարկ ի բարեաց գործոց գտեալ, մտեալ ի մշտնջենաւոր կապանսն, վասն որոյ ոմանք, որք ունին խղճմտանք, փոքր մի ասէ միտքն, թէ՛

«ՅԱստուծոյ ոչ երկնչիմ եւ ի մարդկանէ ոչ ամաչեմ, գոնէ վասն աշխար առնելոյն [զիս այրւոյն], արարից [նմա] դար» (ԺԼ. 4-5):

Եւ արդ, երեք իրք տայ ասել զայս:

Ա. Նախ՝ որ ասէ մարդն, թէ լինի յԱստուծոյ իբր մի տանջանք զայ ի վերայ իմ, վասն այս ամբարշտութեանս դառնամ:

Բ. Երկրորդ՝ թէ երկնչի ի գազանաց կամ ի բռնաւորաց չարեաց, կամ ի ճանապարհէ եւ կամ յայլ իրաց եւ ասէ՝ դառնամ:

Գ. Եւ երրորդ՝ թէ խղճայ հոգւոյն եւ նեղանայ ի ետրին թախանձանացն, ասէ՝ բաւական է դառնամ: Իսկ զայս աւրինակ Տէրն վասն Հաւատացելոցն ետ, որք ի նեղութիւնս, եւ աղաղակեն առ Աստուած, եթէ իցէ ոք տարակոյս վասն այսմ, թէ՛ «Լսէ Աստուած աղաչանաց ծառայից իւրոց (հմմտ. Բ Մնաց. Զ. 19), կամ «վրէժխնդիր լինի նոցա» (հմմտ. Սաղմ. ԴԸ. 8),- ասէ Տէր, զի զանմարդի եւ զվայրենամիտ դատաւորն բազում մաղթանաւքն Հաւանեցոյց դառնալ յիրաւունս, քանի եւս Աստուած, որ ամենաղատն է, նա զի եւ յամենայնի պատրաստէ ի տալն, այլ այս միայն, որ զարժանն խնդրիցեմք ի նմանէ, որ մեզ աւգտակար իցէ եւ նմա տալն՝ պատշաճ: Եւ արդ, սկիզբն բանին յայն եղ, թէ՛ «Պարտ է սրեպ յաղաւթս կալ եւ ոչ ձանձրանալ» (հմմտ. ԺԸ. 1) եւ թէ՛ չէք Հաւատալ, թէ առնոյք զխնդրուածն, աւրինակ ձեզ դատաւորն անիրաւութեան, որ բազում խնդրելով՝ էառ: Ապա այս միայն է ի նմա տալն եւ ի վրէժխնդիր լինելն, զի երկայնամիտ լինի մեզ, իսկ մեզ կարճամիտ լինելն չէ աւրէն:

Դարձեալ, որպէս այրոյ հոգւոյն ոսոխ զմարմին իւր աւրինակ ետ, նոյնպէս սատանայ բոլոր մարդկութեանս թշնամի է, իսկ Աստուած՝ վրէժխնդիր, զի զինչ իրաւք նեղէ զմեզ, Աստուած ամենայնի վրէժ Հատուցանէ նմա:

Դարձեալ՝ չարք ի մարդկանէ թշնամի են Հաւատացելոցն եւ նեղեն զտնանկս եւ զաղքատսն, զապրանքն տանին եւ թալանեն եւ զայլն ամենայն, սակայն չէ պարտ զրկելոցն զԱստուած ի վրէժխնդրութիւն կոչել, զի Աստուած զիւր դատաստանն դատէ եւ ոչ թողու խուն մի մինչեւ Հատուցէ զամենայն: Եւ զայս Հետագայ բանիւն ուսաք, որ ասաց պնդութեամբ, թէ՛ «Այո՛, ասեմ ձեզ, ճշմարտութեամբ առնէ զվրէժխնդրութիւն» (հմմտ. ԺԸ. 8):

Եւ զայս վասն այնր կրկնեաց, զի են մարդիկ, որ ոչ Համբերեն երկայնամտութեան տանջանացն, վասն որոյ յուսադրէ զմեզ Աստուած, թէ ստուգիւ առնէ վրէժխնդրութիւն: Արդ, թէպէտ մաս-

նաւորաբար աստ տայ Հատուցումն, սակայն կատարեալն ի Հանդերձելն իւրաքանչիւրոցն պահի անվախճան տանջանքն, բայց զայս յուսադրութիւնս, ո՛վ եղբայրք, մի՛ մոռասցուք, զի Աստուած է մեր ապաւէն եւ թէ ոք նեղէ զմեզ՝ կեղեքելով զկեանսն, այլ մեք մի՛ տրտմեսցուք վասն մարմնաւոր իրաց զրկելոյն, զի որպէս լուաք ի Տեառնէ, վրէժս առնու ի նոցանէ Աստուած, թէպէտ յայսմ ժամանակի պակասեալ է Հաւատք ի մարդկանէ, զի ոչ Հաւատան Աստուածաշունչ զրոցն, այլ զոր ինքեանք ի միտս բերեն եւ այնմ Հաւատան: Եւ զոր մարմնոյ աչաւք տեսանեն, նոցին եւ ցանկան, որոց ոչ է մեզ փութալ ուղիղ քրիստոնէիցս, այլ կալ ըստ Հրամանաւ Տեառն մերոյ, մանաւանդ ոչ առնել չար մարդոյ, զի մի՛ եւ նա բողոքեսցէ եւ վրէժխնդիր երեւեսցի մեզ Աստուած, եւ տանջանացն պատահիցիմք, այլ ուղղելով զվարս մեր ճշմարտութեամբ, զի պատրաստեալ պսակացն սրբոցն, Հասցուք ի Քրիստոս Յիսուս Տէր մեր, որով եւ ընդ որում Հաւր, միանգամ[այն վայել է փառք յաւիտեանս. ամէն]:



ՓԱՐԻՍԵՅԻ ԵՒ ՄԱՔՍԱԿՈՐ

Ղուկ. ԺԸ. 9-14

ԻԳՆԱՏԻՈՍ

Եւ դարձեալ.

Առ ոմանս պանծացեալս յանծինս, թէ արդարք իցեն եւ խոփեն զբազումս, ասաց զառակս զայս (Ղուկ. ԺԸ. 9).

Չար է ամբարհաւածութիւն եւ որ ի նոյն յարին ախտք հոգւոց, վասն զի կրկին գործեն ի մեզ զվնասն: Մի զի զբարիսն, որ ի մեզ են, հոսեն, եւ որոց կրեն զվատթարագոյնսն, իմանալ ոչ տան, եւ մարմնոյ հանգիստ ոչ շնորհեն, որպէս զայլ տեսակս ախտից, քան զի մարմնական ախտք առ հեղազոյնսն եւ տարտամսն բնաւորեցան բուսանել, իսկ ամբարտաւանութիւն եւ որ նորին մասին են առ փոյթսն եւ որ առաքինութեամբ լնուն վարսն իւրեանց, զաւրանան: Եւ մեծ տոյժք են ոգւոյ, որ տաժանաբար տանին տքնութեան եւ պահոց պնդութեան եւ մաքրութեամբ բարեպաշտեն եւ ընդ պոռնիկսն եւ ընդ փափկացեալսն մարմնով՝ վրիպեալ գտանին ի հաւաստի ընտրութեանն: Եւ արդ, զի մի ոք առանց գիտութեան ըմբռնեսցի յայսպիսեաց վնասակար եւ անշահ ախտից, ասաց զառակս զայս.

Արք երկու ելին ի փաճարն՝ կալ յաղաթս (ԺԸ. 10):

Քանզի անդ սահման էր աւրինացն մատուցանել Աստուծոյ զգոհս եւ զգոհութիւնս եւ ամենայն նուիրաց¹ առաքինութեան նոցա տեղի այն էր ընծայելոյ, եւ յաղագս այսորիկ անդ ելանեն եւ սոքա՝ աղաթս մատուցանել Աստուծոյ: «Մինն փարիսեցի», ասէ, «եւ միսն՝ մաքսաւոր»: Մինն ի կարի լաւագունիցն՝ առ նոսա եւ միւսն՝ ի կարի չարացն, յորմէ եւ նոքա եւս զարշէին եւ բամբասէին եւս զՅիսուս՝ վասն առ նոսա մտանելոյն: Եւ նոյն ինքն՝ Տէրն, զմնացեալսն ի չարիսն, ասաց լինել իբրեւ զհեթանոսն եւ զմաքսաւորն: Արդ, զսոսա հուպ առ միմեանս եղեալ՝ զմինն՝ վասն ամբարտաւանութեանն ընդ չարս պատժէ եւ զմիւսն՝ վասն խոնարհութեանն արդարանալ վկայէ, վասն որոյ ասէ.

Փարիսեցին կայր մեկուսի, եւ զայս առանծին աղաթս մաքուցանէր. Աստուած իմ, գոհանամ զքէն. զի ոչ եմ իբրեւ զայս ի մարդկանէ՝ զյափշտակողս եւ զանիրաւս եւ զշունս (ԺԸ. 11):

Այս գոհութիւնն չար գտաւ, քան որք տրտնջենն՝ ըստ այնմ, զոր չար հովիւքն գործէին եւ ասէին. «Արհնեալ Տէր եւ փարթամացար» (Չար. ԺԱ. 5): Ըստ նմին եւ սա՝ յաղաւթելն վնասի, զի որպէս թէ բնաւ ոչ յանցեաւ եւ ոչ ինչ է կարաւտ խնդրուածս առնելոյ՝ աղաթէ: Ոչ վասն որոյ յանցեաւ, զի մարդ էր ախտակիր բնութեամբ, եւ ոչ վասն ժամանակին, որ կայր առաջի դիւրասխալ բնութեանս: Վասն զի ըստ Յորայ՝ «Ո՛վ իցէ առանց մեղաց, թէ եւ միով ատորք իցեն կեանք նորա ի վերայ երկրի» (Յոր ԺԳ. 4). եւ «Երկինք իսկ չեն անարար առաջի նորա, թող թէ մարդ, որ ըմպէ զանարեւորին» (Յոր ԺԵ. 13): Արդ, այսու եւ որ ըստ այսմ իցեն, խրատիմք, թէ ո՛չ ոք յարդարոց վստահացաւ յարդարութիւնս իւր պարծել առաջի ամենատես բնութեանն: Այլ սա ախտիւ ամբարտաւանութեանն յիմարեալ՝ առ նա մեծաբանէր, որ յառաջ քան զգործելն զամենայն ուրուք ունի անվրէպ գիտել զվարս: Արդ, ոչ ներեաց Աստուծոյ՝ ճանաչողին, այլ ինքն սկսանի չարաչար գոհանալ, ասէ. «Ոչ եմ իբրեւ զայս ի մարդկանէ»: Կարի մեծացաւ յանդգնութեամբ յայսպիսի միտս եկեալ, զի զամենեսեան չարս համարեցաւ եւ զանձն միայն յարդարութեան կացեալ: Եւ զի՞նչ շահ անտի, զի այլք նախատեսցին առ նորա լաւութեամբն, ո՞չ ապաքէն այն, յորոյ ձեռն հատուցումն է, ոչ սխալէ՝ ըստ այնմ՝ «Տէր ճանաչէ զարդարն եւ զանարիշտն» (Մաղմ. Ժ. 6): Եւ զի՞նչ թմրեալ ի փառասէր ախտիցն՝ զայ ասել՝ «ոչ եմ իբրեւ զայս ի մարդկանէ»: Արդարեւ, ոչ էր նա իբրեւ զայս ի մարդկանէ՝ զհեզս եւ զխոնարհս, յորս հանգուցեալ է Աստուած, այլ այսքան մոլեալ ի դիւլաց, յորոց ըմբռնեալն էր, ոչ եբէր յինքն արգելուլ, զոր երկնէր, այլ, աղճատեալ խայտառակիւր առաջի Աստուծոյ եւ ոչ իմանայր: Զի որ զանծինս գովեն, լի են պարսաւանաւք: Արդ, դատեալ զամենեսեան, զորս շուն անուանեաց անիրաւս եւ յափշտակողս, դառնայ եւ ի մաքսաւորն յայն.

«Եւ ոչ եմ,- ասէ,- իբրեւ զմաքսաւորս զայս» (ԺԸ. 11):

Մեծ ամբաստանութիւն է ոգւոցն չարութեան, յորժամ հասարակաբար ձգեն զմիտս ամբարտաւանս, բայց այն կարի եւս չարագոյն է, յորժամ ի մինն եւ ի մերձակայն կրթէ զբանն եւ առ ոտն

¹ ԻՏ նուիրաց] նուիրաց

հարկանէ, զոր եւ սա, այնչափ ախտացեալ, էանց ընդ ամենայն, եւ ոչ անխայեաց յայն, որ այն ինչ անկեալ¹ կայր առաջի Աստուծոյ եւ ժտէր՝ գտանել թողութիւն, այլ անփակ բերանով եւ ի նա ձգեաց զբանս ամբաստանութեան: Ի վերա այսոցիկ յաւելու եւ զայն եւս, որ ապշելոց մտաց է.

«Պահեմ,- ասէ,- երկիցս ի շարաթու եւ փամ փասանորդս» (ԺԸ. 12):

Ո՛վ յիմարութեանն, թէ զորպիսի² ինչ առաքինութիւնս, ո՞ւմ պարծի, կամ ո՞յր առաջի բարբառի՝ արբեալ ամբարհաւաճութեամբ: Յայսպիսեաց աստի զգուշացոյց³, որով ասացն. «Յորժամ գամենայն կարարիցէք, ասասցիք, եթէ ծառայք անպիպանք եմք, զոր պարս իր անել, արարաք» (Ղուկ. ԺԷ. 10):

Եւ մաքսաւորն կայր մեկուսի, եւ չկամէր եւ ոչ զաչսն ընդ երկինս ամբառնալ. այլ կոծէր զկուրծս իւր եւ ասէր. «Աստուած, քաւեա՛ զիս՝ զմեղաւորս» (ԺԸ. 13):

Իբրեւ եզ զպատճառս փարիսեցւոյն կործանմանն, որ արդարն կարծէր զինքն, կարգէ առ նմին եւ զայն ինչ, որով արդարանայ յանցաւորն: Արդ, այս ամենայն ուստեք յայտ է, թէ սկիզբն մերոյ անկմանն ամբարտաւանութիւնն եղեւ, վասն որոյ եւ հաստիչն բնութեանս, իբրեւ կամեցաւ կանգնել զանկեալս³, խոնարհութեամբ եմուտ ի բնութիւնս, զի զվէրս հպարտութեան բժշկեսցէ, եւ զնոյն եցոյց մեզ ճանապարհ բարձրութեան: Արդ, փարիսեցին զառաջինն պատճառս անկմանն մերոյ ախտացեալ՝ անկաւ, իսկ մաքսաւորս, զերկրորդ դեղս փրկութեան գտեալ, անդրէն ի նոյնն դարձաւ շնորհաւք փրկողին մերոյ Աստուծոյ, քանզի առ խոնարհութեանն եւ յերկինս հայել զանձն անարժամ համարէր, որ նման էր դարձին Մանասէի: Զի որպէս նա ասաց. «Զեմ արժանի հայել եւ տեսանել զբարձրութիւնս երկնից»⁴, նոյնպէս եւ սա՝ ոչ կամէր զաչսն յերկինս ամբառնալ, այլ բախէր զկուրծսն եւ հառաչէր՝ ասելով. «Աստուած, քաւեա՛ զիս, զմեղաւորս»: Եւ զի այսպիսի

¹ ԻՏ տնկեալ] անկեալ

² ԻՏ զգուշացայց

³ ԻՏ զանկեալքս

⁴ Տե՛ս Գիրք Աստուածաշունչք Յիմ եւ Նոր Կտակարանաց Վեներտիկ, 1860, Աղաւթք Մանասի թագավորի, էջ 1215:

որ էր կատարեալ զղջմամբ, վասն որոյ եւ վկայեաց նմա այն, որ զձածուկս յայտնէ.

Էջ սա,- ասէ,- արդարացեալ ի փուն իւր, քան զնա (ԺԸ. 14):

Եւ կարի քաջ յիրաւի, քանզի զոր խոստովանի որ առաջի Աստուծոյ, կորուսանէ: Արդ, սա զմեղս խոստովան եղեւ եւ կորոյս, եւ նա՝ զարդարութիւնն, եւ թափուր գտաւ: Եւ սա ի ծովու մեղաց ալեկոծեալ՝ ի նաւահանգստի անդ խնդրեաց զնաւապետն եւ ի վտանգէ ալեացն յարուցելոց՝ ապրեցաւ: Իսկ նա ի նաւահանգստի անդ բեռամբ ընկղմեաց զնաւն, զի ոչ խնդրեաց զնաւապետն աւզնական, այլ զանձին ճարտարութիւնն առաջի եղ, առ որս ասէ.

Ամենայն, որ բարձրացուցանէ զանձն, խոնարհեացի, եւ որ խոնարհեցուցանէ զանձն, բարձրացի (ԺԸ. 14):

Քանզի մարդ ոչ է ինքն իւր բաւական, այլ ձեռն ամենակալի է, որ խոնարհեցուցանէ եւ բարձրացուցանէ. զի որք ի նա ապաստան առնեն եւ զանձինս ի չափու ունին, ունի եւ նա ի ստոյգ բարձրութեանն հատուցանել պատիւ՝ փոխարէն խոնարհութեան նոցա: Իսկ որք¹ փառասիրութեամբ անձամբ զանձինս յառաջ մատուցանեն՝ ի փառս ածել, եւ սոքա, վասն զի ոչ վստահացան յայնմանէ առնուլ, որ բաշխէ զփառս, նորին աղագաւ եւ նա ինքն ամփոփէ զիւրն, եւ այնպէս յանդիմանեալ լինի մարդկային տկարութիւնն՝ մերկացեալ յաստուածային փառացն, զի ոչ է բաւական անձամբ ստանալ զփառս, թէպէտ եւ աստ սակաւ մի խարէութեամբ ծածկեալ՝ գողանայ զինքն: Զգուշագոյնս դնէ հանդէպ այսոցիկ զմանկանցն ճառս, զի սոքա բնութեամբ ունին զաւրինակ բարեաց:

ՍԱՐԳԻՍ ԿՈՒՆԴ

Ասաց առ ոմանս պանձացեալս, թէ արդարք իցեն եւ խոփեցեն զբազումս, զառակս զայս (Ղուկ. ԺԸ. 9):

ԻԳ Չար է ամբարհաւաճութիւն եւ, որ ի նոյն յարին, ախտ հոգոյն, վասն զի կրկին գործեն ի մեզ զվնասն: Մի՛, զի զբարիսն, որ ի մեզ է, հոսեն իսկ, եւ վատթարագուռնիցն իմանալ ո՛չ տան զմեզ,

¹ ԻՏ որ

եւ մարմնոյ հանգիստ ո՛չ շնորհեն, որպէս յայլ տեսակս ախտիցն, քանզի մարմնական ախտք առ հեղգագոյնան բնաւորեցան բուսանել: Իսկ ամբարտաւանութիւն եւ ամբարհաւածութիւն եւ սնափառութիւն անփոյթս յառաքինութեան վարս առ նոսա զաւրանայ: Եւ մեծ տոյժք են ոգոցն, որ տաժանաբար տանին տքնութեան եւ պահոց պնդութեան, եւ մաքրութեամբ բարեպաշտին ընդ պոռնիկսն, եւ ընդ փափկացեալսն վրիպեալ գտանին ի հաւաստի ընտրութեանն:

Արք երկու ելին ի փաճարն կալ յաղաւթս (ԺԸ. 10):

Քանզի աւրինացն սահմանէր հատուցանել զոհս Աստուծոյ, եւ զգուշութիւն նուիրաց առաքինութեան: Տեղի էր նոցա իւրաքանչիւր ումեք կալ յաղաւթս ի տաճարին: Յաղագս այնորիկ անդ ելանեն:

Մինն՝ փարիսացի եւ միւսն՝ մաքսաւոր (ԺԸ. 10):

Մինն՝ ի կարի լաւագունիցն առ նոսա, եւ միւսն՝ ի չարացն, յորմէ եւ նոքա զարչէին: Եւ բամբասէին զՅիսուս վասն առ նոսա մտանելոյն: Եւ Տէրն զմնացեալն ի չարիս հեթանոսաց եւ մաքսաւորաց նմանեցուցանէ: Արդ՝ զսոսա առ միմեանս եղեալ Տէրն՝ զմինն վասն ամբարտաւանութեանն ընդ չարսն պատժէ եւ զմիւսն վասն խոնարհութեան արդար վկայէ:

Կր. Թէպէտ եւ առ հրէայսն ասաց զառակսն, սակայն զամենեսին խրատէ ո՛չ հպարտութեամբ կալ յաղաւթս որպէս փարիսեցին:

Փարիսեցին կայր մեկուսի եւ զայս աղաւթս մաքուցանէր. Աստուած իմ, գոհանամ զքէն (ԺԸ. 11):

Իգ. Ահա գոհութիւն չար քան զտրտունջ: Ըստ այնմ, զոր չար հովիւքն գործէին եւ ասէին. «Աւրհնեալ է Տէր եւ մեծացաք» (Ձաք. ԺԱ. 5): Ըստ նմին եւ սա յաղաւթելն վրիպի եւ ի բարեպաշտելն գայթազդի: Ախտիւ ամբարտաւանութեանն յիմարեալ՝ առաջի նորա մեծաբանէր, զի որ յառաջ քան զգործելն զամենեցուն վարս անվրէպ զիտէ: Ո՛չ ներեաց Աստուծոյ ճանաչելոյն, որ ստեղծ զսիրտս, եւ ի միտ առնու զամենայն գործս նոցա: Ո՛վ գոհութիւն չար:

«Ո՛չ եմ իբրեւ զայլս ի մարդկանէ զափշտակողս եւ զանիրաւս եւ զշուս» (ԺԸ. 11):

Որ մեծ յանդգնութեամբ յայսպիսի միտս եկեալ, զամենեսին չարս համարելով եւ զանձն միայն արդար, արդ՝ զի՞նչ [չ]ահ, զի այլք նախատեսցին նորա լաւութեամբն: Ո՞չ [ապա]քէն հատուցանողն ո՛չ սխալէ: Տէր ճանաչէ զարդարն եւ զամբարիշտն, զի ամբարտաւանք ի մտաց եւս անկանին: Արդ՝ ո՛չ էր սա ի խոնարհ, յորում հանգչի Աստուած, այլ ունելով զմայրն անմտութեան՝ մոլորեալ ի զիւաց:

սողմ. Ո՛չ կարէր արգելուլ, զոր երկներ սրտիւ, զի որ զանձն գովէ՝ լի՛ է պարսաւանաւք. «Գովեսցէ զքեզ ընկերն եւ մի՛ քո բերանդ» (Առակ. ԻԷ. 2): Զի մարդ էր ախտացեալ բնութեամբ, եւ ո՛չ իմանայր:

Որպէս Յոր յանդիմանէ. «Ո՞վ է առանց մեղաց, թէ մի աւր իցէ կեանք նորա ի վերայ երկրի» (Յոր ԺԴ. 4): Եւ երկինք չեն անպարտ առաջի նորա, թող թէ մարդ, որ ըմպէ զանաւրէնութիւն: Ըստ այնմ՝ «Անաւրէնութիւն յղացաւ, եւ ի մեղս ծնաւ զիս մայր իմ» (Սաղմ. Ծ. 7): Եւ ո՞վ ոք վստահացաւ յարդարոցն յարդարութիւն պարծել առաջի ամենատես բնութեանն:

Եփ. Իսկ փարիսացին ստոյգ ասաց յաղաւթսն, բայց պարծանաւք խաւսեցաւ, խոտեցաւ:

Կամ իբրեւ զմաքսաւորս զայս (ԺԸ. 11):

Մեծ ամբաստանութիւն ոգոցն չարութեան, յորժամ հասարակաբարձեն զմիտս ամբարտաւանս: Բայց այն կարի եւս չարագոյն է, յորժամ յայն մինն, որ մերձն կայր, կրթէ զբանն եւ առ ոտն հարկանէ, զոր եւ սա անչափ ախտացաւ եւ էանց ընդ ամենեսին: Եւ ո՛չ անխայեաց զայն, որ կայր առաջի Աստուծոյ եւ ժտէր գտանել թողութիւն: Այլ անփակ բերանով եւ ի նա յարձակեաց բանս ամբարտաւանութեան:

Սկ. Զի թէ յերկնից բարբառ լինի, մի՛ ոք հաւատասցէ մինչեւ յաւրն, յորում քննէ Աստուած զգաղտնիս մարդկան, եւ ապա՝ իւրաքանչիւր գովութիւն եղիցի ի Տեսունէ:

«Այլ պահեմ երկիցս ի շարաթու եւ փամ փասանորդս ի սփացուածոց» (ԺԸ. 12):

Տեսանե՞ս, զի զստացուածս իւր ասաց ստուգարար եւ ո՛չ յԱստուծոյ շնորհեալ: Այ[սոյ]ւ ամենայն ուստեք զհպարտութիւն /Իգ./ յանձն իւր ձգէր: Ո՞վ յիմարութիւն, ո՞ւմ առաջի պարծիս՝ արբեալ ամբարհաւածութեամբ: Վասն որոյ Տէրն աստի զգուշացոյց. «Յորժամ զամենայն առնիցէք, ասասջիք՝ ծառայք անպիտանք եմք, զոր պարտն էր առնել՝ արարա՛ք» (ԺԷ. 10): Պարտական եմք առնելոյն եւ ո՛չ պարծելոյն:

Եւ մաքսաւորն կայր մեկուսի եւ ո՛չ գաջս յերկինս ամբառնայր (ԺԸ. 13):

Կր. Տե՛ս, որպէ՞ս զհակառակն դնէ՝ զխոնարհութիւն ընդդէմ ամբարտաւանութեանն: Նա զանձն գովէ. «Ո՛չ եմ իբեւ գայլս», եւ սա ո՛չ գաջս յերկինս համբառնայր՝ անարժան համարելով զանձն:

ԻԳ. Այս եղեւ պատճառ կործանման փարիսեցոյն: Եւ Տէրն, որ կամեցաւ կանգնել զբնութիւնս մերոյ սխալանս, խոնարհութեամբ հմուտ ի բնութիւնս, զի զվէրս հպարտութեան բժշկեսցէ: Եւ զսոյն եցոյց մեզ ճանապարհ բարձրութեան: Փարիսեցին

զպատճառս անկմանն մեր գտաւ եւ անկաւ, իսկ մաքսաւորն՝ զղեղ փրկութեան մերոյ, որ յԱստուծոյ շնորհեցաւ, գտեալ կանգնեցաւ: Որ նմանեցաւ դարձին Մանասէի, որ ասէր. «Չեմ արժանի հայել եւ տեսանել զբարձրութիւնս երկնից» (հմմտ. Ես. ԼԸ. 14):

Եւ սա ո՛չ կամէր գաջս յերկինս ամբառնալ, այլ բախէր զկուրծս իւր եւ ասէր. «Աստուած, քաւեա՛ զիս՝ զմեղաւորս» (ԺԸ. 13):

ԵՓ Արդ՝ մաքսաւորն, որ զմեղսն խոնարհութեամբ ասէր, հաճոյ եղեւ: Զի զմեղսն խոստովանել ծանր է քան զարդարութիւն[ն]: Աստուած ընդ այն հայի, որ բարձեալ ունի զժանրութիւն:

ԿՐ Յիրաւի ընկալաւ զայսպիսի խոնարհութեան աղաւթս, զի կատարեալ էր զղմամբն:

Ասեմ ձեզ. «Էջ սա արդարացեալ ի քուն իւր քան զնա» (ԺԸ. 14):

ԵՓ «Որ քննէ զսիրտս» (Սաղմ. Է. 10), արդարացոյց զսա միտովս, որ խոնարհեցաւ՝ զմաքսաւորն: Զի թէ մեղաւոր էր փարիսեցին, մեղս ի վերայ մեղաց յաւելոյր: Զի յաղաւթս եկաց եւ եղեւ բարկութիւն վասն ամբարտաւանութեանն:

ԻԳ Արդ, սա զմեղսն խոստովանելով առաջի Աստուծոյ՝ կորոյս զնա, եւ նա՝ զարդարութիւն: Վասն այնորիկ թափուր գտաւ ի բարեաց: Սա ի ծովէ մեղաց ալեկոծեալ՝ զնաւահանգիստն խնդրեաց զպետն նաւարկելոց եւ ի յարուցեալ մրրկէն ապրեցաւ, իսկ նա մերձ ի նաւահանգիստն ընկղմեցաւ, զի ո՛չ խնդրեաց զնաւապետն աւզնական, այլ զանձինն ճարտարութիւն:

Զի ամենայն որ խոնարհեցուցանէ զանձն՝ բարձրացի, եւ որ բարձրացուցանէ զանձն՝ խոնարհեցի (ԺԸ. 14):

Քանզի մարդ ո՛չ է իւր բաւական, այլ ձեռն Աստուծոյ, որ բարձրացուցանէ զխոնարհս: Զի որք ի նա ապաստան առնեն զանձինս եւ ի չափու ունին, Տէրն ստուգութեան ի բարձր հանէ զնոսա եւ ի պատիւ փոխանակ խոնարհութեան նոցա: Իսկ որք փառասիրութեամբ զանձինս յառաջ մատուցանեն ի փառս եւ ո՛չ վստահացան յԱստուծոյ առնուլ, որ բաշխէ զփառս, վասն այնորիկ նա յինքն ամփոփէ զիւրսն եւ այնպէս յանդիմանէ զմեր տկարութիւնս՝ մերկացեալ յաստուածային փառացն:

ՄԱՏԹԷՈՍ ԶՈՒՂԱՅԵՅԻ

Արք երկու ելին ի փաճարն կալ յաղաւթս, մինն փարիսեցի եւ միւսն՝ մաքսաւոր (Ղուկ. ԺԸ. 10):

Գիտել արժան է, զի ժամ աղաւթիցն, որ կարգեալ են մեզ, ոչ ի Նորոմս միայն է, այլեւ ի Հնուան կարգաւորեալ գոյր եւ Աւրէնս եղեալ՝ ըստ այնմ. «Ի մէջ գիշերի յառնի խոսրովան լինել [առ քեզ, Տէր]» (Սաղմ. ԾԺԸ. 62), եւ թէ՛ «Ի գիշերի համբարձէք [զձեռս ձեր ի սրբութիւն]» (Սաղմ. ԾԼԳ. 2): Եւ թէ՛ «Ընդ առաւարս կանխեցից յանդիման» (հմմտ. ԿԲ. 7), եւ թէ՛ «Ես առ Աստուած կարդացի, եւ [Տէր] լուսա [լինձ]»: Յերեկոյս, ի վաղորդայն, ի հասարակ աւուրն» (Սաղմ. ԾԴ. 17-18) եւ այլ եւս բազումս, զորս գտանեմք ի Սուրբ գրոց, մանաւանդ, թէ եւ յառաքելոցն իսկ կարգեցան մերս եկեղեցւոյ կարգաւորութիւնք, զորս ուսանիմք յառաջիկայս ի գիրս գործոց, որում ոչ է արժան հեղգալ եւ ծուլանալ ի ժամուն յայնմիկ, եւ ոչ միայն յայնմ ժամու, զի Տէրն ասէ. «Յամենայն ժամ աղաւթս արարէք» (Ղուկ. ԻԱ. 36): Իսկ թէ ոչ գոյ մեզ յամենայն ժամ հասանել այնմ գործոյ, զի զբաղիմք ի մարմնաւոր պիտոյից փաստակ, գոնեա ի սահմանեալ ժամն պատրաստ լիցուք, զի թէ ի

Հնումն մաքսաւորին արժան էր աղաւթել, ապա եւ մեզ, որ շնորհաւքն Քրիստոսի արդարանամք, վասն որոյ ի մէջ բերէ աստանաւր Տէրն առակաւոր բանիւք զմեզ ուսուցանելով, իբր յորդորելով եւ աւրինակ եղեալ, թէ որպէս կացցուք յաղաւթս՝ ասէ. «Արք երկու ելին ի փաճարն [կալ յաղաւթս]»:

Նախ՝ տեսցուք, թէ վասն է՞ր ասաց զառակս զայս: Այն է, զոր Աւետարանաւն յայտնէ, թէ վասն այնոցիկ, որք Հպարտացեալ էին եւ զինքեանս արդարս կարծէին եւ զայլս՝ մեղաւորս, վասն որոյ ասէ զառակս:

Բայց տեսցուք, թէ զի՞նչ է առաւելութիւն Հպարտութեան, քան զամենայն մեղաց: Արդ, Հպարտութիւնն մեկին է եւ ոչ ունի ճուղս եւ դատերս, եւ մի է յէ՛(7)անց մահու չափ մեղաց եւ առաջին ամենեցուն: Եւ այս է սորա առաւելութիւնն, զի բազում վնասս գործեն զմեզ:

Ա. Նախ՝ զի զբարիսն, որ ի մեզ իցէ, արտաքս Հանեն, զոր աւրինակ, եկեալ խաւարն Հանէ զլոյսն. այսպէս եւ ի Հանգիպիլ Հպարտութեանն ելանեն ամենայն բարութիւնք մեր:

Բ. Երկրորդ՝ զի որք զՀպարտութիւն կրեն, զվատթար մեղսն ամենեւին իմանալ ոչ տայ, վասն իւր առաւել չարութեանն:

Գ. Երրորդ՝ զի որք Հպարտք են, ոչ ունին Հանգիստ մտաց եւ մարմնոյ, քանզի որքան մարդ խոնարհ է, այնքան Հանգիստ է:

Դ. Չորրորդ՝ զի ամենայն տեսակ ախտիցն իր մի ցուցանեն մեզ, թէ՛ զողութիւն զինչսն, թէ՛ պոռնկութիւն, զհեշտութիւնն եւ ազահութիւն եւ որկորամոլութիւն զկերակուրն: Իսկ Հպարտութեանն ոչ ինչ գոյ ամենեւին:

Ե. Հինգերորդ՝ զի մարմնական ախտն եւ այլն առ այնոսիկ լինի, որ Հեղգ են եւ թոյլ, եւ տարտամ, եւ գիջասէր: Իսկ Հպարտութեանն առ առաքինիքն եւ որք փոյթ սրբութեամբ վարին, անդ առ նոսա զաւրանայ:

Զ. Վեցերորդ՝ զի յորժամ ոք առ պոռնիկսն երթայ, գիտէ ճշմարտութեամբ, թէ վրիպեցաւ ի ճշմարտութենէն: Իսկ ամբարտաւանն ոչ իմանայ զմեղս, զոր գործէ Հպարտութեամբ, այլ գիտէ եւս, թէ առաքինութիւն է:

Է. Եւթներորդ՝ զի փութով կորնչի ամբարտաւանն՝ ըստ այնմ. «Տեսի զամբարիշտն վերացեալ բարձրացեալ քան զմայրս [Լիբանանու]: Անցի, եւ ահա ոչ էր, խնդրեցի՛ [եւ ոչ գրաւ փեղի նորա]» (Մաղմ. ԼԶ. 35-36):

Ը. Ութերորդ՝ զի ամենայն մեղք մի ժամ լինի մեզ, իսկ Հպարտութիւնն ոչ երբեք անկանի ի մտացն:

Թ. Իններորդ՝ զի յամենայն մեղաց կարող գոյ զերծանիլ, իսկ ի Հպարտութենէն ոչ է Հնար ամենայնիւ, զոր աւրինակ, աստանայ է տեսանել:

Ժ. Տասներորդ՝ զի ամենայն մեղք ընդ մարդոյ լինի, իսկ Հպարտութիւնն յածէ ամբարշտութիւն՝ ըստ այնմ. «Եղից զայթոռ իմ յամպս, եւ եղէց նման բարձրելոյն» (հմմտ. Ես. ԺԴ. 14), վասն որոյ մեծ է, քան զամենայն մեղս եւ առաւել է կորուսիչ ոգւոց մարդկան, որպէս ցուցաւ: Եւ արդ՝ զի մի ոք առանց զիտութեան գոլով ըմբռնեցի յայսպիսեաց վնասակար ախտից, վասն որոյ Տէրն ասաց զառակս զայս. «Արք երկու ելին [ի փաճարն կալ յաղաւթս]»:

Արդ, տեսցուք, թէ վասն է՞ր անդ ելանէին ամենայն ոք: Եւ այս վասն Բ. (2) պատճառի:

Ա. Նախ՝ զի անդ էր սահմանեալ աւրէնքն յաղաւթս կալ՝ ըստ այնմ. «Տուն իմ փուն աղաթից կոչեցի» (Մաթթ. ԻԱ. 13), որպէս ասէ առ Մովսէս. «Արացես խորան, զի անդ երեսեցայց քեզ» (հմմտ. Ելք ԻԶ. 1, ԻԵ. 8), եւ Սողոմոնի, թէ՛ «Շինեցես փուն անուան իմոյ» (հմմտ. Բ. Թագ. Է. 13), զոր եւ յաղաւթսն ասէր. «Եթէ ոք կացցէ յաղաթս ի փանս, զոր շինեցի» (հմմտ. Գ. Թագ. Ը. 27):

Բ. Եւ երկրորդ՝ զի ամենայն գոհութիւնք, պարգեւք եւ ընծայք անդ մատուցանէին Աստուծոյ: Իսկ սոքա ելին ի տաճարն ոչ վասն պատարագ մատուցանելոյ, այլ զպատճառն յաւելու՝ ասելով. «Կալ յաղաւթս»:

Իսկ զի՞ ասէ «յաղաւթս ելին» եւ ոչ յայլ ինչ. ուսուցանէ զմեզ աստանաւր, յորժամ առաջի սուրբ եկեղեցւոյ զալ զաղաւթսն խոկալ, եւ ոչ զայլ ինչ, զի պատճառ գալոյ մեր աղաւթքն է:

Եւ արդ, բազում ինչ է, զոր ոչ է պարտ մեզ առնել յեկեղեցւոյ:

Ա. Նախ՝ չէ պարտ ի տեղի աղաւթիցն զրոյց տալ, զի սատանայ է խաւսակից, եթէ ոք զրոյց տայ, զի անդր խաւսակից մեր Աստուած է, ըստ սահմանի աղաւթիցն, զի զինչ է աղաւթքն, եթէ ոչ խաւսակցութիւն առ Աստուած, ապա եւ զնա թողեալ եւ ընդ այլում զրուցել ոչ է արժան:

Բ. Երկրորդ՝ ոչ է պարտ ի տեղի աղաւթից յետս դառնալ եւ Հայել ի կին մարդ կամ յայլս, զի միայն, որ ասաց Տէրն, զարատն սատանայ բերցէ ի մեզ Հակառակ փրկութեան աղաւթիցն:

Գ. Երրորդը՝ ոչ է պարտ ի ձայնս քաղցրանուագս նայել, այլ ի զղջական բանսն, որ ի մէջ քաղցրանուագացն երգողին, զի երգողն եւս առաւել պարտի պատրաստել, զի մի փքասցի ի քաղցրութիւն ձայնին, եւ ճրի աշխատի գլուխ նորա, քանզի ոչ ունի վարձս:

Դ. Չորրորդը՝ ոչ է պարտ ծիծաղել, այլ լալ, զի այն լալոյ տեղիք է եւ արտասուելոյ, զոր Սողոմոն խրատէ. «Լաւ է գնալ ի փուն սգո, քան ուրախութեան» (հմմտ. Ժող. Է. 3), զի ասէ Տէրն. «Վայ ձեզ, որ ծիծաղիք» (Ղուկ. Զ. 25), քանզի այնպէս կարծեն, թէ դժոխք ոչ պատէն զնոսա:

Ե. Հինգերորդը՝ ոչ է պարտ խարբալել զմիտս անցեալ բանիւքն, զի աղաւթքն խաւսակցութիւն է առ Աստուած, որպէս եւ ասացաւ, զի թէ դու, որ աղաւթես եւ խնդրողդ ես, ոչ իմանաս՝ զի՞նչ խաւսիս, զիս՞րդ պիտի առնուս փոխարէնն կամ պարգեւք:

Զ. Վեցերորդը՝ ոչ է պարտ ննջել ի տեղի աղաւթիցն, այլ՝ արթուն կալ՝ ըստ այնմ. «Արթուն կացէք, զի ոչ գիտէք, զի [երբ փեր փանն գայցէ]» (Մարկ. ԺԳ. 35), զի թէ անդ ննջես, զի՞նչ զանազանութիւն ունի քունն, որ ի տունն, եւ թէ քնոյ համար դաս, յոյժ բարի է ոչ գալն:

Է. Եաւթներորդը՝ ոչ է պարտ զառանձնականն աղաւթսն աղաղակելով ասել, այլ ի սրտին գոչել՝ ըստ Մովսիսի, զի եզ զծունկսն դէմ երեսացն եւ ի սրտէն գոչեաց, վասն որոյ ասէր Տէր. «Զի՛ գոչես առ Իս» (Ելք ԺԴ. 15): Նմանապէս եւ Տէր մեր ուսոյց՝ «Մո՛ւր ի սննեակ հոգոյդ, փակեա՛ գորունս զգայարանացդ եւ Նարն քում ի ծածուկ առ Աստուծոյ, եւ եւս հարուսցէ քեզ յայտնապէս» (հմմտ. Մատթ. Զ. 6):

Ը. Ութերորդը՝ ոչ է պարտ զբան Աստուածաշունչ գրոց առանց հասկանալոյ թողուլ, զի մի զուղիղն թիւր իմացիս, եւ լինի քեզ գայթակղութեան պատճառ: Եւ զի նա է կերակուր է հոգւոց մերոց, պարտ է, ծասքել, զի համ առցուք:

Թ. Իններորդը՝ ոչ է պարտ փութալ, թէ երբ ելանիցեմք ի ժամատեղեացս, այլ՝ որքան խնդրես, այնքան առնուս, եւ զի Տէրն հանէր զգիշէր ի գլուխ յաղաւթս՝ ըստ այնմ. «Որ հայցէ՛ գրանն» (Մատթ. Է. 8):

Ժ. Տասներորդը՝ ոչ է պարտ յորժամ ի յաղաւթսն կալ ի մտի խոստանալ, թէ յորժամ ելանեմք յեկեղեցոյս, զայն չար առնեմք կամ զայն, այլ զայն խոստանալ, թէ այլ ոչ գործեմ, զոր գործեցի, վասն որոյ ասէ Տէրն. «Արք երկու ելին [ի փաճարն կալ յաղօթս]:»

Իսկ արդ, որ աղաւթեն, յերկուս բաժանէ Տէրն՝ մին՝ փարիսեցի եւ միւսն՝ մաքսաւոր, այսինքն՝ ոմանք լաւագոյնք եւ ոմանք՝ չա-

րագոյնք: Զորոյ գերագունին պատիւն տեսցուք, եւ չարագունին՝ զանաւրէնութիւնն: Արդ, ասէ.

Փարիսեցին կայր մեկուսի (ԺԸ. 11):

Զի թէպէտ ոք առանձին աղաւթէ, սակայն Աստուած գիտէ զսիրտս նոցա, վասն որոյ ասէ.

Զայս առանձին աղաւթս մարուցանէր. «Աստուած իմ, գոհանամ զքէն» (ԺԸ. 11):

Արդ, փարիսեցւոյն ամբարտաւանութիւնն յայտնի է ի բազում իրաց:

Ա. Նախ՝ զի հպարտութեամբ զառանձին տեղն կալաւ եւ ոչ խոնարհութեամբ:

Բ. Երկրորդը՝ զի զԱստուածն ամենեցուն «իմ» ասաց, վասն որոյ Տէրն ուսոյց՝ ասել. «Նայր մեր, որ յերկինս» (Մատթ. Զ. 9):

Գ. Երրորդը՝ զի ասաց՝ «գոհանամ զքէն», եւ այս բարւոք է, բայց նա, ոչ այսպիսի խորհրդով, այլ թէ իբր ամենեւին ոչ եմ յանցաւոր, եւ զներքոյ անկեալ կարեաց բնութիւնս անկարիս եցոյց:

Դ. Չորրորդը՝ զի մարգարէն ասէ. «Ես որդն եմ եւ ոչ եմ մարդ, նախափինք [մարդկան] եւ արիամարիանք [ժողովրդոց]» (Մաղմ. ԻԱ. 7), **իսկ սա ասէ.**

«Ոչ եմ իբրեւ զայս ի մարդկանէ» (ԺԸ. 11):

Ե. Հինգերորդը՝ զի Յոր ասէ. «Եթէ միաւրեայ իցէ կեանք մարդոյ ի վերայ երկրի, ոչ է առանց մեղաց» (հմմտ. Յոր ԺԴ. 4), **իսկ սա ամենեւին անմեղ ցուցանէ զինքն՝ ասելով՝ «ոչ եմ», իբր թէ ոչ գոյ առ իս մեղք:**

Զ. Վեցերորդը՝ զի Աստուած զանգործսն գիտէ՝ ըստ մարգարէին (տես Մաղմ. ՃԼԸ. 16), **իսկ սա կամեցաւ զԱստուծոյ կանխագիտութիւնն կորուսանել՝ զինքն արդար երեւեցուցանելով:**

Է. Եաւթներորդը՝ զի առակախաւսն ասէ. «Մի՛ գովեսցէ զքեզ քո բերան, այլ ընկերին» (հմմտ. Առակ. ԻԷ. 2), **իսկ սա զինքն գովէ, թէ՛**

«Տամ փասանորդս յամենայն սրացուածոց իմոց» (ԺԸ. 12):

Ը. Ութերորդը՝ զի զամենեսան, որք զպահքն պահէին, չար համարեցաւ, եւ զինքն միայն արդար՝ ասելով՝ «պահեմ», իբր թէ նոքա չեն իմ ընկեր:

Թ. Իններորդ՝ զի ասէ իմաստունն. «Ինքեան զիտակքն իմաստունք են», իսկ սա զինքն մոռացաւ եւ զայլոց գովութիւն իւրն համարեցաւ:

Ճ. Տասներորդ՝ առաւել չարութիւն սորա այս է, զի զմաքսաւորն արհամարհեաց՝ ասելով:

«Իրրեւ զայս մաքսաւորս» (ԺԸ. 11):

Զի թէպէտ ամբարտաւանութեան գործ է հասարակաբար ձգել զմիտս, այլ այն առաւել է, զի առ մինն եւ մերձակայնն, որ առ ոտն եհար, որպէս փարիսեցին, որ ոչ խնայեաց, որ անկեալ էր առաջի Աստուծոյ, եւ խնդրէր զթողութիւն, այլեւ զնա եւս անգոսնեաց:

Արդ, այսքան միայն ասացան ի նորայն չարութենէ, իսկ զայլ ծածուկան Աստուած զիտէ:

Ընդ զիմակ նմին մաքսաւորին բարութիւնն բազում երեւի:

Ա. Նախ՝ զի որպէս փարիսեցին հպարտութեամբ կորեաւ, ըստ նմանութեան բնութեանս մեր, որ զառաջինն կորեաւ հպարտութեամբ, իսկ մաքսաւորն խոնարհութեամբ գտաւ բարձրացեալ՝ ըստ այնմ. «Ես յո՞ հանգեայց, եթէ ոչ ի հեզս [եւ ի խոնարհս]» (Ես. ԿԶ. 2), եւ՝ «Որ խոնարհեցուցանէ զանձն, բարձրացի» (Մաթթ. ԻԳ. 12):

Բ. Երկրորդ՝ զի որպէս փարիսեցին մեծ համարեցաւ զինքն քան զամենայն, իսկ սա քան զամենայն ցած եւ վատ համարեցաւ զինքն, քան զամենայն ըստ ասելոյն՝ «չկամէր» (Ղուկ. ԺԸ. 13), այսինքն՝ ոչ մեծացոյց զինքն:

Գ. Երրորդ՝ զի այնքան անարժան համարեցաւ զինքն, մինչ զի ոչ կամէր զաչսն յերկինս համբառնալ, ըստ այնմ. «Չեմ արժանի հայել եւ տեսանել [զբարձրութիւնս երկնից]»¹:

Դ. Չորրորդ՝ զի լայր ազազակելով, որ եւ այս զկատարեալ զղջումն ցուցանէ:

Ե. Հինգերորդ՝ զի «կոծէր զկուրծսն» (Ղուկ. ԺԸ. 13), եւ այս զփափագ սրտին նշանակէր:

Զ. Վեցերորդ՝ զի ոչ գովէր զինքն, որպէս փարիսեցին:

Է. Եաւթներորդ՝ զի ասէր.

«Աստուած քաւեա զիս՝ զմեղաւորս» (ԺԸ. 13):

Այսինքն՝ մի՛ արա զիս, որ երկուացեալս եմ մեղաւք, եւ կամ սրբեա՛ զիս ի յանցանացս:

Ը. Ութերորդ՝ զի եւ ոչ մի զարդարութիւն իւր յիշեաց, որպէս փարիսեցին, որ եւ զայս առնել պարտ է. ոչ ասել զոր գործեն զարդարութիւն կամ զարդիւնս:

Թ. Իններորդ՝ զի եւ ոչ զփարիսեցին ի միտ էած եւ ոչ չար եւս խաւսեցաւ զնմանէ:

Ճ. Տասներորդ՝ զի խոստովան եղեւ զմեզս իւր, զի որք խոստովանին, կորուսին, զոր ասեն՝ ըստ այնմ. «Ասա դու նախ զանարեւոթիւնս քո, զի արդարացիս» (Ես. ԽԳ. 26):

Արդ, զայս աւերինակ ետ մեզ Տէր, զի յորժամ յեկեղեցին գայցեմք, զամենայն ինչ ի բաց բնկենուցումք, եւ որպէս յառաջագոյն ասացաք զայն առնել, քանզի ի մէջ ծփանաց ալեկոծութեան եմք, պարտ է ձեռն ձգել առ նաւապետն, աւգնականութիւն խնդրելով ի նմանէ, թերեւս յեզր ելանիցեմք ի մէջ խռովութեան մեղաց ծովուս, այլեւ ոչ անհոգ լինել, զի մի հեղձուցէ զմեզ յուսահատութեան ալիքն: Եւ արդ, մարդ ինքն ինքեան ոչ է բաւական, որպէս ոք, ի խորխորատ անկեալ կամ ի ծով, ինքեամբ ոչ կարէ ելանել, ապա թէ ոք արտաքուստ մերձաւոր ի նմա եւ ի ձեռն ձգեալ հանէ, այսպէս թէ ի նա ապաստան կայցեմք, որ կարողն է խոնարհել եւ բարձրացուցանել զմեզ: Եւ զի ըստ չափու պարտ է ունել զանձինս մեր խոնարհ եւ հնազանդ, զի ի նմանէ փառաւորիցիմք: Իսկ որք փառասիրութեամբ զանձինս յառաջ մատուցեալ ի փառսն եւ ոչ յԱստուած վստահանան առնուլ զփառս եւ զգովութիւնս, վասն որոյ նա, որ ծածկագէտն է, զիւրն յինքն ամփոփէ, յայնժամ ծանակ լինին այնոքիկ տկարութեամբք իւրեանց, զի ոչ զաւրէն առ խուն մի բարկութեանն Աստուծոյ: Եւ զի՞նչ է այս, զի աստ զողանամք փոքր մի ժամանակ զմեզ առաջի մարդկան սուրբ երեւեցուցանել եւ փարթամ, արդար: Եւ զայն մոռանամք, թէ որ բարձր է առաջի մարդկան, պեղծ է առաջի Աստուծոյ, վասն որոյ ազաչեմ պատրաստ լինել, զի այն է ազաւթից զիտաւորութիւնն՝ զնալ ազաւթել, զի փառաւորեացի յԱստուծոյ եւ արդարացին: Իսկ զի՞նչ աւգուտ է անմեղ զնալ ի ժամատեղ եւ մեղաւք ի տուն գալ. Աստուծոյ բաժին զնալ եւ սատանայի դառնալ, որպէս փարիսեցին: Եւ այս յորովի մեր աւուրքս, քանզի եմք գերի եղեալ սատանայի, զի այնո-

¹ Գիրք Աստուածաշունչք Յից եւ Նոր Կտակարանաց, Աղաթք Մանասէի թագաւորի, էջ 1215:

քիկ, որք զիտունք են, թէ Բ. (2) պատահի ի մին եկեղեցի, նախանձու պաշտեն՝ զմիմեամբք ելանելով: Ես լաւ պաշտեմ, եւ իմ ձայնս քաղցր է եւ արուեստիւ, ի յայս անուն վարդապետէ ուսեալ եւ զոր ինչ զգիչերն ամենայն սրբութեամբ կեցեալ, անգանօր նախանձիւ բանսարկու լինին եւ ելանեն արտաքս: Իսկ որք տգետք են, զայն ինչ լուեալ, թէ եւ յերեքորեայ զբանս աստուածային իցեն լուեալ, ոչ ինչ արձանանայ ի նոցին միտս, բայց աղաղակ պաշտաւնէից, եւ նախանձն իբրեւ զբեւեռս ի սիրտս նոցա հարեալ՝ աղջամղջին սրտիւ ելանեն յեկեղեցւոյն գայթակղեալք: Եւ ոչ իմացան, թէ յինչ պէտս գնացին յեկեղեցին եւ կամ զինչ առին, որ եւ այս աներեւոյթաբար կորուստ հասարակաց է, եւ ոչ իմանան, զի թէ մի բան փարիսեցւոյն, որ ասաց՝ «պահեմ» (Ղուկ. ԺԸ. 12), եւ ուղիղ էր կորոյս զնորին արդարութիւնն, քանզի եւս առաւել, որ անիծիւք անարգեն զընկերն եւ նախատինս բարուրանաց զնեն, եւ այն, զի ոչ ելանէ խէթն այն ի մտաց երկուցունցն, եւ յետ այնորիկ անզղջաբար եւ առանց մեղայի ձեռնարկել ի սուրբ խորհուրդն, որ բերէ զանբերելի պատուհասն յԱստուծոյ: Վասն որոյ աղաչեմ, մանկունք եկեղեցւոյ, ուսումնասկի՛ցք իմ, մի զձածուկ նետս բանսարկութիւնն ի սիրտս ձեր հարկանիջիք, այլ խոնարհութեամբ իւրաքանչիւր ոք, զոր շնորհ ունի, ի պէտս Աստուծոյ ծախիցէ, իսկ եթէ ծնանի ոխ եւ բարկութիւն ի քոյդ ասելոյ, լուեա՛ ի բարկութենէ եւ հանգիր, զի անդ ի լուութիւն քո հաճի Աստուած եւ ոչ ի պաշտաւնն, զի մի տկար եղբայրն քո գթիցի, բայց ակն ունիմք փրկչին, զի մի տացէ գերի գերողին զփրկեալքս պատուական արեամբն իւրով, զի զինք արեան նորա եմք եւ ազատեալք անարատ ձեռացն, որում վայել է փառք յաւիտեան:



ԱՌԱՎ ԿՏԱՍՆ ՄՆԱՍԱՅ

Ղուկ. ԺԹ. 11-27

ՄՏԵՓԱՆՈՍ ՍԻՒՆԵՅԻ

Եւ ասաց. «Այր ոմն բարեպոռնմ գնաց յերկիր հեռի՝ առնուլ իւր թագաւորութիւն եւ դառնալ (հմմտ. Ղուկ. ԺԹ. 12):

«Այր բարեպոռնմ»՝ Քրիստոս, «եկեալ ի հեռաստան երկիրս»՝ ի յերկնաւորացն յերկրուորսս թագաւորեաց եւ համբարձեալ յերկինս, զարձեալ զալոց է՝ զատել զմեռեալս եւ զկենդանիս:

Եւ կոչեցեալ զձառայս իւր՝ եր նոցա փասն մնաս» (ԺԹ. 13¹):

Նոյն առակ է, որ ի Մա[տ]թէոսին, «փաղանդն» եւ «քանքար» անուանեցան (տես Մաթթ. ԻԵ. 14-30). եւ նոյնպէս մեկնեսցի, բայց միայն զանագանի, զի անդ «ուրք քանքար» ասացաւ (Մաթթ. ԻԵ. 15) եւ աստ՝ «փասն», կատարեալ թիւդ:

ԻԳՆԱՏԻՈՍ

Արդ, յաւելու² նոցա առակ՝ բառնալ զայն կարծիս, որ առժամայն իցէ:

Ասէ. «Այր ոմն ազնուական գնաց յաշխարհ հեռի՝ առնուլ իւր թագաւորութիւն եւ դառնալ» (Ղուկ. ԺԹ. 12):

«Այր»՝ վասն բնութեանս մերոյ, զոր առ, եւ ազնուական, որ ոչ միայն ազնուական, այլ եւ քան զամենայն բնութիւն ազնիւ անդր եւս կացեալ անզուգական բարձրութեամբ: Մի եւ նոյն է մերով բնութեամբս՝ ի խառնելն եւ ի միանալն: Իսկ «յաշխարհ հեռի գնալն»՝ չիք ուրեք հեռագոյն ի մէնջ տեղի, քան ուր գնաց նա՝ ի սրբութիւն սրբութեանցն մտեալ՝ ի ներքին կողմն վարագուրին: Բայց ասելն՝ «առնուլ իւր թագաւորութիւն եւ դառնալ», թէպէտ տան զայսպիսի իրս առելոյն, սակայն եւ ոչ առ նա պատշաճի, վասն զի ընդ առնուլն զամենայն ինչ ունի եւ ոչ թէ առ սակաւ սակաւ եկն ի

¹ ՍՏ 3

² ԻՏ յաւել

կատարելութիւն՝ յառաջադէմ եղեալ, այլ զձեւ կերպարանի բանիցդ, վասն ըստ մեզ յայտնելոյն կարգէ, ապա թէ ոչ, զի՞նչ ունի ասելն. «Իշխանութիւն ունի Որդի մարդոյ թողոյ զմեղս» (հմմտ. Մապթ. Թ. 6): Եւ իշխանութիւն տայ աշակերտին՝ թողուլ եւ ունել, եւ հաւատայ նմա զփականս արքայութեանն երկնից, զի փակեացէ մեղուցելոցն եւ բացցէ զղջացելոցն: Եւ այսպիսի ունելով իշխանութիւն եւ յետ յարութեանն, իբրու թէ ոչ ունէր, ասէ՝ «Տուա ինձ ամենայն իշխանութիւն յերկինս եւ յերկրի» (Մապթ. ԻԸ. 18): Իսկ Պաւղոս, որպէս թէ տակաւին եւս ոչ ունի, ասէ. «Յորժամ րացէ ի ձեռս զթագաւորութիւնն Ասրուծոյ եւ Նար» (Ա Կոր. ԺԵ. 24): Նման սմին եւ Դանիէլ ետես, զի «Նմա րուա իշխանութիւն, եւ թագաւորութիւն նորա՝ թագաւորութիւն յաիպենական» (Դան. Է. 13): Արդ, զայս ըստ որում ասացաւ, վասն յայտնելոյն կարգեալ է, այլ նա ընդ սկզբան յղանալոյն, զամենայն ունէր, որ ինչ յատուկ աստուածութեանն է, եւ ոչ այնորիկ ընկալաւ ինչ: Չայս աւրինակ բանից իմանամք եւ աստ, զի եկն նա նուաստութեամբ կեցուցանել եւ դարձաւ անդրէն, ուստի եկն եւ հաստատեաց ժամանակ, յորում դատէ զամենայն տիեզերս, եւ յայնժամ յայտնէ զինքն իւր ընտանի փառաւքն: Արդ, երեւեցաւ այժմ ծննդեամբ եւ վարագուրեաց ի մէնջ զաստուածութիւն իւր թանճրագոյն մարմնովն եւ կոչեաց զամենայն ազգս՝ ծառայս իւր եւ «ետ մնասս տասն եւ ասաց.

«Յարգեցէ՛ք զայդ» (ԺԹ. 13):

Նման են այս առակ եւ որ ի Մատթէոսի Աւետարանին գրեալ են քանքարն (րեն Մապթ. ԻԵ. 14-30) եւ այնպէս, մինչ զի կարծելի եղեւ, թէ նոյն իցէ: Սակայն զնոյն ասել կարգ բանիցն ոչ ունի, զի անդ այլ չափ առաջնոյն եւ այլ՝ երկրորդին եւ երրորդին: Իսկ աստ՝ հաւասար չափէ ամենեցուն, եւ անդ հաւասար մատուցին զչահն չափով տուողին: Իսկ աստ՝ ի հաւասարէն, զոր ընկալան, ոմն՝ բազումս եւ ոմն՝ սակաւս մատոյց: Արդ, ի համեմատելն զայս ընդ մերս՝ բարւոք դատեցաք՝ յատուկ առ վարդապետս որոշել զքանքարսն, իսկ զմնասն զայս հասարակաբար առ ամենեւեանն տուեալ աւրինացն նորա հնազանդութիւն՝ գործել զնա եւ պահել, որում ամենայն ոք ինքնատէր եւ բաւական է: Իսկ տասն ասացեալ զմնասն՝ կամ զգայարանաւքս չափի, որով ընդունիմք կամ ի բաց ընկենումք, կամ թէ զաւրէնս իւր թուեաց՝ ըստ աւրինացն ի մի ածեալ, վասն զի այնպէս մինն միւսովն պահեալ լինի: Արդ,

տուեալ զայս, ասէ. «Յարգեցէ՛ք մինչն եկից»: Եւ է սա յայտնի տեսողացն, զի զաւրէնսն, զոր ետ, պարտ է ի գործ ածել ամենայն զգուշութեամբ եւ սպասել, ակն ունել զալստեան նորա եւ ըստ վաստակոցն ակն ունել եւ հատուցմանն.

Եւ քաղաքացիքն, ասէ, որ արէին զնա, առաքեն հրեշտակս եւ ասեն. «Ոչ կամիմք զթագաւորելն դորա ի վերայ մեր» (ԺԹ. 14):

Այնքան յայտնագոյն ունի զմիտսն յելից բանից¹, զի եւ մեկնութեան ընաւ իսկ չէ ոք կարաւտ, թէ ո՞վ ոք քաղաքացիքն իցեն կամ զիա՞րդ ատեցին զնա. «Յիւրս եկն, ասէ, Յովհաննէս, եւ իւրքն զնա ոչ ընկալան» (Յովհ. Ա. 11): «Արեցին զնա», զի լոյս էր՝ յանդիմանիչ գործոց նոցա, եւ նոքա սիրեցին զիսաւար առաւել, քան զլոյս, զի ծածկեցեն զգործս իւրեանց զազրալիցս, որք էին գերեզմանք՝ լցեալք ապականութեամբ, վասն որոյ աղաղակէին յատենի անդ եւ ասէին. «Չիք մեր թագաւոր, բաց ի կայսերէ» (Յովհ. ԺԹ. 15): Եւ երկայնք են բանք, որով ցուցին նոքա զբարս ատելութեան եւ ապստամբութեան ընդդէմ այսր թագաւորի, զի զնոյն ինքն զնա տեսեալ, ոչ միայն ատեցին, այլեւ բազում ձաղանաւք նախատեցին եւ ընդ փայտի բեւեռեալ՝ սպանին: Եւ նորա առ Հայր երթեալ, զվկայս աստուածութեան նորա, որ քարոզէին զամենակալ թագաւորութիւնն նորա, հալածականս առնէին, զի մի յայտնեցեն զպատիւ թագաւորութեան նորա: Եւ այս է, զոր ասաց.

Առաքեցին հրեշտակս եւ ասեն. «Ոչ կամիմք զթագաւորելն դորա ի վերայ մեր»: Եւ եղև, ասէ, դառնալ նմա՝ առեալ զթագաւորութիւնն, կոչէ զժառայսն, որոց ետ զարծաթն, եթէ զինչ շահեցան (հմմտ. ԺԹ. 14-15):

Ամենայն ուստեք յայտնի են աւրինակք բանիցս, զի զայ նա՝ առեալ ի Հաւրէ զբնակաւոր զիւր թագաւորութիւնն եւ նստի՝ դատել, ըստ այնմ՝ «Նայր ոչ դարէ զոր. այլ զամենայն դարասարսն եղ Որդոյ իւրոյ, զի ամենեքեան պարուեսցեն զՈրդի, նովին սահմանա՝ Նար» (հմմտ. Յովհ. Ե. 22-23): Արդ, առնու նա համարս յամենեցունց հաւաստի քննութեամբ: Մատեաւ նախ առաջի նորա ըստ կարգի, որ կատարեալ ցուցաւ ի գործս առաքինութեան՝ զիւրն պատմել առաքինութիւն, վասն որոյ ասէ.

Մնասն քո րասն մնաս արար (ԺԹ. 16):

¹ ԻՏ իրացն] բանից

Եւ այս ըստ առաջին կարգին, որ եւ յաւգեսցէ ոք զբանս, յազագս կատարելութեան ունի զթիւս զայս:

Ասէ ցնա. «Ազնի՛ւ ծառայ եւ բարի, զի ի սակաւուդ հաւաքարիմ եղեր, լիցիս իշխանութիւն ունել փասն քաղաքի¹»:

Ամենայն պատուով պատուէ զառաքինացեալսն. նախ՝ անուամբն, զի զոր անուն Աստուծոյ եդ, նովին եւ զծառայսն կոչէ: «Այր ոմն ազնուական գնաց առնուլ իւր թագաւորութիւն» (ԺԹ. 12) եւ չիք ոք բարի, բայց մի Աստուած: Եւ աստ՝

«Ազնիւ ծառայ եւ բարի, ի սակաւուդ, ասէ, հաւաքարիմ եղեր» (հմմտ. ԺԹ. 17):

Ըստ որում զվատթարսն յանհաւատարիմ լինելոյն դատէ, ըստ նմին եւ զսոսա՝ ի հաւատարիմ լինելոյն պատուէ: Անդ ասէ. «Եթէ յանիրաւ մամոնային եւ յաւարին չեղէք հաւաքարիմ, զճշմարիտն եւ զձերն ձեզ ո՞ հաւաքացէ!» (Ղուկ. ԺԶ. 11): Իսկ աստ ասէ, զի.

«Ի սակաւուդ հաւաքարիմ եղեր, լիցիս իշխան փասն քաղաքի» (հմմտ. ԺԹ. 17):

Եւ արդ, ոչ եթէ քաղաքք² իցեն ի հանդերձեալսն, յորոց վերայ իշխանս կացուցանէ զնոսա, որք զաւրէնս նորա կատարեցին, այլ՝ զի բազմապատիկ խոստացաւ ի վարձատրութեանն հատուցանել, եւ աստ քաղաքաւք նշանակէ, որ տայ զայն իմանալ, թէ որքան զանազանեալ են տասն քաղաք եւ տասն մնաս արծաթոյն, զոր մատուցին եւ ընկալան:

Ըստ այսմ կարգի եւ երկրորդն մատուցեալ՝ ասէ.

«Մնասն քո հինգ մնաս արար» (ԺԹ. 18):

Ընդունի եւ սա յարդարադատ իրաւանցն Աստուծոյ չափով առաքինութեանն զպարզեւսն: Կացեալ լինի եւ սա իշխան ի վերայ հնգից քաղաքաց: Իսկ միւս ոմն՝ հէզ եւ թշուառական՝ մատուցեալ ամբաստան լինի զքաղցր Տեառնէն, այն, որ ոչ ունի արդարացուցանել զնա, այլեւ դատապարտ եւս առնել:

«Գիտի, ասէ, զի այր մի սքամբակ ես. բառնաս, զոր ոչ եղիր, եւ հնձես, զոր ոչ սերմանեցեր, երկեայ եւ թաքուցի զարծարն քո» (հմմտ. ԺԹ. 22):

¹ ԻՏ քաղաքաց
² ԻՏ քաղաք

Եթէ հեզ ասացեալ էր զՏէրն, գոյին ինչ իրաւունք, որպէս թէ ասել՝ վստահացեալ ի հեզութիւն քո՝ հեղգացայ: Իսկ որովհետեւ գիտէր զնա խիստ եւ թէ հարուածս եւ տանջանս արկանէ զգլխով անբարչտաց, ապա պարտ էր նմա զգաստանալ եւ զարհուրել ի տանջողական բռնութենէ անտի նորա եւ ի գործ արկանել զարծաթն, զի մի պատիժս կրեսցէ ի ստամբակ տեառնէն¹: Յայս հայի ասելն.

«Ի բերանոյ քումմէ դապեցից զբեզ, ծառայ՝ անհաւաք» (ԺԹ. 22), զի ոչ էիր անգէտ, այլ գիտէիր զխստութիւնն դատաւորին եւ զսաստն, որ կայ ի վերայ մեղաւորաց: «Անհաւաք» ասելով՝ ընկենու ի հաւատոյն զայն, զոր ոչ յոյսն յորդորեաց եւ զարթոյց ի գործ պատուիրանի նորա եւ ոչ սպառնալիք տանջանացն զգաստացոյց՝ լինել պիտանացու:

«Ընդէ՞ր,- ասէ,- ոչ արկեր զարծարթ իմ ի սեղանաւորս, եւ ես եկեալ փոկոսեաւք պահանջի» (ԺԹ. 23):

Եւ զայս զի՞նչ ունիցի իմաստ առ այս, քանզի ի քանքարացն առակի յարմարէ, թէ առ վարդապետս ասացեալ է, իսկ աստ, զի առ իւրաքանչիւր ոք ասացեալ է, որպէ՞ս ամենայն ոք արկանէ արծաթ ի սեղանաւորս: Արդարեւ, ամենայն ումեք հարկ է այս, զի որպէս վարդապետաց է՝ զեկեղեցիս խրատել, նոյնպէս է եւ ամենայն ումեք իւրում տանն բարւոք վերակացու լինել եւ խրատիչ: Եւ թէ յառաջնորդաց արիւն ամենայն ժողովրդեան խնդրի, քանի՞ եւս զորդուցն, զորս ծնաւ ոք պահանջի, թէ երկիրդիւն Աստուծոյ, ոչ սնուցանէ:

Ասէ սպասաւորացն. «Առէք ի դմանէ զմնասն եւ փուք այնմ, որ ունի զփասն մնասն» (ԺԹ. 24):

Այս լուծանելն ի հաւատոյն է, զոր յայլում վայրի ընդ մէջ կտրել հրաման ետ: Այսու ուսուցանէ, թէ եւ զբան հաւատոյն, զոր խոստովանեաց, բառնան ի նմանէ եւ ընդ անհաւատսն պատժեն: Իսկ ասել ծառայիցն. «Տէր, ունի փասն մնաս» (ԺԹ. 25), այս իբրեւ յաչաղանք թուին: Ոչ եթէ ի քննութիւն անդ ժամանակին գոյ ումեք ասել ինչ ի հրեշտակաց, յորժամ նա հաւասարէ ի դատելն, այլ միայն զայն կամի բանիւն յայտնել, եթէ այնչափ է պարզեւք

¹ ԻՏ ստամբակութենէն] ի ստամբակ տեառնէն

արդարոցն, մինչ զի եւ Հրեշտակաց նախանձ արկանեն: Իսկ առ այս Տէրն, զի զիրաւուեսս դատաստանին յայտ առնէ եւ ոչ միայն շնորհ, ասէ.

«Ամենայնի, որ ունիցի՝ փացի. եւ որ ոչն ունիցի, եւ զոր ունիցի, բարձցի ի նմանէ» (ԺԹ. 26):

Ձայս եղ իմանալ մեզ՝ եթէ ոչ ըստ չափոյ վաստակոցն¹ են պարգեւքն, այլ ըստ աշխատութեանն, որում արժանի արարին զանձինս, ունին եւ յաւելու նոցա այլ եւս առատութիւն պարգեւաց նորա: Իսկ ծուլիցն եւ հեղգացելոցն, վասն զի ոչ կամեցան ստանալ ինչ անձանց յանտի բարեացն, արդարութեամբ բառնայ յայնպիսեաց եւ զայն եւս, զոր ինքն ետ զաւագանին շնորհ, որով որդիք Աստուծոյ արժանացան լինել: Արդ, մերկանայ զայն, զի զորդիս ոչ տանջէ, այլ զապստամբս: Ըստ որում եւ թագաւորք երկրի դատեն, զի զմեղուցեալ ոք իշխան նախ՝ զպատիւ եւ զհանդերձ իշխանութեանն մերկանալ հրաման տան եւ ապա՝ մատնեն դահճաց. նոյն իրաւանց հետեւին եւ աստուածայինքն: Արդ, զայս, որ առ հաւատացեալս է բան՝ ուղղեալ իրաւամբք, ձգէ յանուհետեւ զդատաստանն ի վերայ անհաւատիցն, զի եւ զնոցայն դատեսցի ըստ նոցունց ժպրհութեանն, վասն որոյ ասէ.

«Զթշնամիսն իմ՝ զայնոսիկ, որք ոչ կամէին զթագաւորելն իմ, ածէք եւ սպանէք առաջի իմ» (ԺԹ. 27):

Որքան առաջին գալստեամբն զքաղցրութիւն նորա տեսին, յերկրորդի անդ՝ զսաստկութիւնն ծանիցեն, յաղագս որոյ այն, որ ի մահու անդ կարդայր առ Հայր՝ աղաչելով. «Տայր, թող սոցա, զի ոչ զիպեն՝ զինզ գործն» (Ղուկ. ԻԳ. 34), «եւ որ ասիցէ բան զՈրդոյ մարդոյ՝ թողցի նմա» (Ղուկ. ԺԲ. 10)՝ այժմ ահարկու դատաւոր եւ վրէժխնդիր զանձն ցուցանէ՝ ըստ նմին աւրինակի յամենայն յաւիտենիս երկայնամիտ է առ ամենեսեան, իսկ յիրաւանցն մերձեցեալ ժամանակ վարի առ ամենայն քննութիւնս՝ ոչ բարկութեամբ եւ ոչ քաղցրութեամբ, այլ իրաւամբք եւ արդարութեամբ հատուցանել: Արդ, զայս ամենայն առաջի դնէ, զի մի ոք վասն քաղցրութեանն անհոգ լիցի, այլ զսաստն լուեալ՝ զարհուրեսցի ի վրէժխնդիր լինելոյ նորա:

¹ ԻՏ վաստակոյն

ՍԱՐԳԻՍ ԿՈՒՆԴ

Յաւել առակ մի վասն համարելոյ նոցա, թէ այժմ մերձեալ է արքայութիւն Աստուծոյ (Ղուկ. ԺԹ. 11):

Իգ. Աշակերտքն, եւ որ մերձն էին, համարէին, թէ առժամայն յայտնելոց է վերին թագաւորութիւնն մարմնապէս յերկրի: Եւ էր այսպիսի կարծիք առ նոսա: Նորին աղագաւ եւ որդիքն Զեբեդեայ ընդ աջմէ եւ ընդ ահեկէ նստել խնդրէին (լին Մաթթ. Ի. 21, Մարկ. Ժ. 35): Վասն այնորիկ յառաջակայ առակաւս բառնայ զայնպիսի կարծիսն:

Աւէ. Այր ոմն ազնուակլան] (ԺԹ. 12):

ԿՐ Այր աստանաւր Փրկիչն զինքն անուանէ, իսկ ազնուական՝ ըստ որումն է[ջ] յերկնից աստուածութիւն եւ ի սրբոյ Կուսէն անապականաբար ծնեալ:

ԻԳ Վասն բնութեանս մեր, զոր էառ եւ միացոյց ընդ աստուածութեանն եւ անզուգական բարձրութեամբ միեւնոյն արար: Եւ մերոյ բնութեանս որոշեաց զգրախտն ի բնակութիւն, տեղի ամենաբարի եւ անկարաւտ, անմահ եւ անապական, խառնեալ, եւ միանալ ընդ նմա ի կեանսն յաւիտենից:

Գնաց յաշխարհի հետի (ԺԹ. 12):

ՍԿ. Եկեալ յերկնից երկրաւորացս թագաւորեաց:

ԿՐ Որ ի ժամանակի խաչին աւանդեաց զմարդկային հոգիսն ի ձեռն Հաւր եւ չողաւ առ հոգիսն, որ ըմբռնեալն էին: Ըստ առաքելոյ բանին, թէ՛ «Քրիստոս վասն այսորիկ մեռաւ եւ եկեաց, զի մեռելոց եւ կենդանեաց տիրեսցէ» (հմմտ. Հռոմ. ԺԴ. 9): Զի որպէս ազգակից մերով մարմնովս քարոզեաց մարմնաւորացս զիւր աստուածութիւն[ն], այսպէս եւ ազգակից մերով հոգովս՝ երթեալ քարոզեաց զիւր աստուածութիւն[ն], որ յոյժ հեռի են բնութիւնք հոգոցն ի մարմնական կենցաղոյս՝ անտեսանելի դուրով:

ՍՐԿ. Եմուտ ի գերեզման[ն], որ կրէ զամենայն բանիւ, եւ ապականեալ զեղծագործն, որպէս խաչիւն զհարչարանսն՝ անապական առնելով զ[ը]յրուհեալսն ի մահուանէ:

ՍՐԿ. Իջանելով ի դժոխս՝ մարդկային անձամբ իւրով յաշխտակել զորս ի նմա՝ զիշխանութիւն նորա խափանելով: Կապէր զհզաւրն՝ կորացուցանելով զամբարտաւանութիւն նորա:

Առնուլ իւր թագաւորութիւն եւ դառնալ (ԺԹ. 12):

ԻԳ. Վասնզի ընդ առնուլն զմարմինն ի Կուսէն եւ ընդ սկիզբն յղանալոյն ունէր, որ ինչ՝ յատուկ աստուածութեանն, եւ ո՛չ յետ այնորիկ ընկալաւ ինչ: Որպէս եւ ինքն ասաց. «Իշխանութիւն ունի Որդի մարդոյ թողուլ զմեզ» (Ե. 24): Եւ իշխանութիւն տայ աշակերտին թողուլ եւ ունել: Եւ հաւատայ նոցա զփականս արքայութեանն երկնից, զի փակեցէ մեզուցելոցն եւ բացցէ զզջացելոցն: Եւ այսպիսի բնութեամբ ունէր զիշխանութիւն միացեալ ընդ մարմնոյն: Բայց զկնի յարութեանն, իբրու թէ ո՛չ ունէր, ասէ. «Տուաւ ինձ իշխանութիւն յերկրի» (Մարթ. ԻԸ. 18): Վասն յայտնի լինելոյ տէրութեանն իւրոյ ասէր:

ՈՎ Մարդկաւրէն իմն խաւսելով ընդ նոսա, քանզի չեւ եւս առեալ էին զհոգին, որ կարող էր բարձրագոյնս առնել զնոսա եւ զմեծամեծսն ծանուցանել:

ԿՐ Արդ՝ առեալ Քրիստոսի զգաւանութեանն անուն իւրոյ աստուածութեանն եւ թագաւորութեանն յապստամբ ծառայիցն ի կռապաշտ ոգոյն: Զի թէպէտ եւ հասարակաց իմանի Աստուած գոլ, սակայն ո՛չ հետեւելոցն եւ ուրացելոցն եւ երկրպագուացն զիւրաց իմանի Աստուած գոլ: Իսկ յորժամ ծանուցաւ հոգոցն՝ յայտնելովն եւ քարոզելովն զինքն, ըստ առաքելոյ բանին, թէ՛ «Հոգոցն, որ ի բանդին էին, երթեալ քարոզեաց» (Ա Պետր. Գ. 19) ապստամբելոցն, յորժամ ներէր նոցա Աստուծոյ երկայնմտութիւն[ն]: Յայնժամ խոստովանեցաւ Աստուած եւ թագաւոր հոգոցն՝ որ գունակ եւ մարմնոցս:

Գնաց յաշխարհ հեռի (ԺԹ. 12):

ԱՍ. Համբառնալն մարմնով յերկինս, զի երկնայնոցն եւ երկրայնոցս թագաւորեաց:

ՍՍ. Զիք հեռագոյն տեղի, քան որ նայն գնաց:

ԻԳ Ի սրբութիւն սրբոցն՝ մտանել ի ներքին կողմն վարագուրին:

ԿՐ Եւ անդ առնու ի հաւատացելոց փառաբանութիւն, եւ երկրպագութիւն ի հրեշտակաց եւ ի մարդկանէ: Ըստ այնմ՝ «Յանուն Յիսուսի Քրիստոսի ամենայն ծունր կրկնեսցի, երկնաւորաց եւ երկրաւորաց, եւ ամենայն լեզու խոստովան լիցի Տէր Յիսուս ի փառս Աստուծոյ Հա[ւր]» (Փիլիպ. Բ. 10-11):

Եւ կոչեալ առ ինքն զծառայս իւր (ԺԹ. 13):

ԻԳ. Արդ՝ երեւեցաւ այժմն ծննդեամբ, եւ վարագուրեաց ի մէնջ զաստուածութիւն իւր թանձրագոյն մարմնովն, եւ կոչեաց զամենայն ազգս ծառայս իւր:

ԵՓ Զի սփռեալ է զիտութիւն նորա ի վերայ ամենայն ազգաց: Որպէս ասացին նինուեացիքն. «Ո՞ գիտէ, դառնայ Տէր եւ ողորմի» (հմմտ. Յովնան Գ. 9): Արդ, յայտ է, թէ գիտէին, զի ողորմած է եւ սիրէ զապաշխարողսն: Գա՛ն արբին փաղշտացիքն եւ գիտացին զՏէր բժիշկ: Դատապարտեցաւ Ամոն եւ եհան զորդին իւր պատարագ Տեառն: Նոյնպէս եւ Բաբել մատուցանեն եգիպտացիքն պատարագս Տեառն: Տեսե՞ր աւասիկ, զի գիտէին զնա Տէր ամենայն հեթանոսք, որպէս Իսրայէլ բարկութեամբ: Իսկ առ հաւատացեալսն ասէր մարգարէն. «Արարից զկաղն ի ժառանգութիւն եւ զբկարն յազգս հաւր»:

Եր նոցա փասն մնաս եւ ասէ ցնոսա. «Յարգեցէք մինչեւ եկից» (ԺԹ. 13):

ԻԳ. Զմնասս զայս հասարակաբար ամենեցուն ետ, զաւրինաց նորա հնազանդութիւն գործել եւ պահել, որում ամենայն ոք ինքնատէր եւ բաւական: Որպէս ասէ Մաղաքիաս. «Քանզի յարեւելից մինչեւ ի մուտս արեւու, փառաւորեալ է անուն իմ ընդ ամենայն հեթանոսս» (Մաղաք. Ա. 11), եւ «Ժողովեցից զհեռացեալսն, եւ զցրուեալսն մերձեցուցից» (հմմտ. Ա. Մակ. Գ. 9):

ԱՍ. Իսկ տասն ասացեալ մնասն, որ նշանակէ զկատարեալ առաքինութիւն[ն], միաբանութեամբ հինգ հոգեղէն զգայութեամբք ընդ հինգ մարմնեղէն զգայութեանցս, զի տասն կատարեալ թիւ է:

ԻԳ. Որով ընդունիմք զբարիսն կամ ի բաց ընկենումք զչարն: Կամ զաւրէնս իւր թուեաց Քրիստոս ըստ աւրինացն, որ տուաւ հրէիցն՝ ի մի ածելով ամենայն զգուշութեամբ: Եւ սպասել զալստեան նորա, եւ ըստ վաստակոց ակն ունել հատուցման:

ԻԳ. Կամ աւրէնք նոր տուան Իսրայելի, ի գալստեանն թարգմանեցին եւ ամենայն լեզուք

ԵՄ. Խորհել նովին հոգով եւ աւրհնեսցեն զայն, որ գրեացն զնա: Ըստ այնմ, թէ՛ «Ամենայն հոգիք աւրհնեսցէք զՏէր» (Մաղմ. ԸԾ. 6) եւ «Ընդ ամենայն երկիր ել բարբառ նորա» (Նոոմ. Ժ. 18):

ԿՐ Կամ զչնորհս վարդապետութեանն ի կաթողիկէ եկեղեցոջ գործել նոքաւք՝ քահանայից եւ վարդապետաց եւ ամենայն ժողովրդոց, մինչեւ ի միւս անգամ գալուստն:

Իսկ քաղաքացիքն, որ արեին զնա (ԺԹ. 14):

ԻԳ Իւրքն էին: *Ըստ ասելոյն.* «Յիւրսն եկն եւ իւրքն զնա ո՛չ ընկալան» (Յովհ. Ա. 11): *Ատեցին զնա, զի լոյս էր յանդիմանիչ գործոց նոցա:* *Եւ նոքա սիրեցին զխաւար առաւել քան զլոյս, զի ծածկեսցեն զգործս իւրեանց զազրալիս, որք էին գերեզմանք լցեալք ապականութեամբ:*

ՍԳ. Ըստ այնմ՝ «Ատեցին զյանդիմանիչս ի դրունս իւրեանց» (Ամովս Ե. 10): *Եւ որպէս Յովկէլ ասէ.* «Բայց դու, Իսրայէ՛ղ, լուսով աւրինացն եւ մարգարէիցն եւ քահանայիցն, խաւարեցան աչք քո» (հմմտ. Յովկէլ Բ. 10, Գ. 15): *Ահա որպէս որդիք հնդկաց էք դուք ինձ որդիք Իսրայէղի:* *Եթէ կամիք դուք հաւատալ յիս, որդիք էք Աբրահամու, ապա եթէ ոչ՝ մի՛ պարծիք, քանզի ի հեթանոսս արարի զշնորհս որպէս եւ ի ձեզ:* *Զի Իսրայէղ հանի ես յերկրէն Եգիպտացոց եւ զփղշտացիսն ի Գամրաց կողմանէ եւ զասորիսն ի Բոսորայ (տրն Ամովս Թ. 7): Եւ զի ասէ մարգարէն.* «Մեծամեծք նոցա լի են անաւրէնութեամբ, եւ բնակիչքն խաւսին ստութեամբ: Վասն այնորիկ սկսայց հարկանել զքեզ վասն մեղաց քոց» (հմմտ. Միքիէ Զ. 12): *Ո՛չ միայն ատեցին, այլեւ բազում ձաղանաւք նախատեցին եւ ընդ փայտի բեւեռեալ՝ սպանին:* *Եւ նորա՝ առ Հայր երթեալ:* *Եւ զվկայս աստուածութեան նորա, որք քարոզէին զամենակալ թագաւորութիւն նորա, հալածական արարին, զի մի՛ յայտնեսցեն զպատիւ թագաւորութեան նորա:*

Առաքեցին առ նա հրեշտակս եւ ասեն. «Ո՛չ կամիմ[ք] զքեզ թագաւորել ի վերայ մեր» (ԺԹ. 14):

ԿՐ Զոր քաղաքացիս ասաց զհրէայան: *Վասնզի ի նոցանէ ծնաւ ըստ մարմնոյ Տէրն:* *Որք ասէին ցՊիղատոս.* «Զիք մեր թագաւոր, բայց ի կայսերէ» (Յովհ. ԺԹ. 15): *Եւ զարձեալ.* «Մի՛ գրել թագաւոր հրէից» (Յովհ. ԺԹ. 21), *որք սպանան ի Տիտոսէ սովով եւ սրով:*

ԵՎ. Զոր Մաղաքիա վկայէ. «Մինչչեւ եկեալ հարից սատակեցից զերկիրն Իսրայելի» (հմմտ. Մաղաք. Դ. 5-6): *Զվերջին սատակումն նոցա ի հռոմայեցոցն:* *Յոյց, զոր ասաց Դանիէլ մարգարէն.* «Յորժամ տեսանիցէք զպղծութիւն աւերածոյն Երուսաղեմի, զի կայցէ ի տեղոջն սրբողբան» (հմմտ. Դան. ԺԱ. 31): *Եւ Քրիստոս ասաց.* «Թողեալ լիցի տունդ ձեր աւերակ, եւ ասացէք լերանց թէ՛ ծածկեցէք զմեզ եւ ըլրոց թէ՛ անկերուք ի վերայ մեր» (հմմտ. ԻԳ. 30):

Եւ եղև ի դառնալ նմա՝ առեալ զթագաւորութիւնն (ԺԹ. 15):

ԿՐ Զերկրորդ գալուստն ասէ յերկիր ի դատել զկենդանիս եւ զմեռեալս:

ԻԳ Եւ յայնժամ յայտնէ զինքն իւր ընտանի բնութեամբն՝ փառաւք թագաւորութեանն իւրոյ:

Եւ կոչեաց զժառայսն, յորս փուեալ էր զարծաթն, զի գիպացէ, եթէ ո՞ր զինչ շահեցաւ (ԺԹ. 15):

Նստի ի դատել: *Ըստ այնմ՝ «Հայր ո՛չ դատի զոք, այլ զամենայն դատաստան ետ Որդոյ իւրոյ, զի ամենեքին պատուեսցեն զՈրդի, նովին սահմանաւ՝ Հաւր»* (հմմտ. Յովհ. Ե. 22):

ԵՓ Զի յաւուր յայնմիկ յայտնելոց է վրէժխնդրութիւն Աստուծոյ՝ առնլով համարս յամենեցունց հաւաստի քննութեամբ:

Եկն առաջինն եւ ասէ. «Տէր մնասն քո փասն մնաս արար» (ԺԹ. 16):

ԻԳ Մատեան առաջի նորա ըստ կարգի: *Զի, որ կատարեալ ցուցաւ ի գործս առաքինութեան, նախ՝ զիւրն պատմել զառաքինութիւն, յոր եւ յաւղէ ոք զբանս:* *Յաղագս կատարեալ բարեգործութեան թուոց է ասացեալ:*

Ասէ ցնա. «Ազնիւ ծառայ» (ԺԹ. 17):

Ամենայն պատուով փառաւորէ զառաքինացեալսն՝ անուանակցութեամբ: *Զի զոր Աստուծոյ ետ՝ այր ոմն ազնուական ասելով, նովին անուամբ զժառայսն կոչէ:*

«Եւ րարի» (ԺԹ. 17):

Ոկ. Որպէս ասաց ինքն. «Զի՛ք ոք բարի, բայց մի Աստուած» (Մարկ. Ժ 18, Ղով. ԺԸ 19): *Քաջ ծառայ եւ բարեգործ:* *Այն իսկ է, բարեգործին զ[ը]նկերին կարիսն տեսանելով՝ հազորդիլ նմա կարեկցութեամբ:*

«Զի ի փոքուղ հաւաքարիմ եղեր» (ԺԹ. 17):

Զամենայն երանութիւնս այսու բանիւս յայտ առնէ:

ԻԳ Ըստ որում զվատթարսն յանհաւատարիմ լինելոյն դատի եւ զարդարս ի հաւատարիմ լինելոյն պատուէ: *Յառաջագոյն ասաց.*

«Յանիրաւ մամոնային եւ յապարին չեղէք հաւապարիմ» (ԺՁ. 11): *Զճշմարիտն եւ զձեռն ձեզ ո՞ հաւատայ: Իսկ աստ ասէ.*

«Ի փոքուդ հաւապարիմ եղեր, լիջիր իշխանութիւն ունել ի վերայ փասն քաղաքաց» (ԺԹ. 17):

Արդ, ո՛չ եթէ քաղաք իցէ մարմնաւոր ի հանդերձեալսն, զի իշխանս կացուցանէ զնոսա, որք զաւրէնս նորա կատարեցին, այլ վասն զի բազմապատիկ խոստացաւ: Եւ աստի քաղաքաւք նշանակէ զանիմանալիսն, որոյ ճարտարապետ եւ Արարիչ Աստուած է:

Եկն երկրորդն եւ ասէ. «Մնասն քո» (ԺԹ. 18):

ՍՏ Արծաթն քո հնգապատիկ ընտրեալ եւ փորձեալ ի հողոյ:

«Տինգ մնաս արար» (ԺԹ. 18):

Արդ, յայտնէ զայս սուրբ առաքեալն Պաւղոս. «Իւրաքանչիւր ոք ի ձէնջ, եթէ սաղմոս ունիցին, թէ՛ մարգարէութիւն, թէ՛ յայտնութիւն, թէ՛ լեզուս, թէ՛ թարգմանութիւն» (Ա. Կոր. ԺԴ. 26): Իսկ եթէ ի Մատթէոս այլ ազգ կայ առակ, զայս պարտ է ասել, եթէ այլ այս է եւ այլ այն:

Ասէ եւ ցնա. «Եւ դու լիջիր ի վերայ հինգ քաղաքաց» (ԺԹ. 19):

ԻԳ. Եւ սա ընդունի յարդարադատ իրաւանցն Աստուծոյ չափով առաքինութեանն զպարգեւան:

ԿՐ. Զի ըստ հաւատոցն աճեցուցանել զբան հաւատոցն եւ զառաւելութիւն գործոցն առաքինութեանց, կարգաւորութիւն յանձինս եւ ի ժողովուրդս:

ՍՏ Ուսուցանել եւ գործել զաստուածայինսն՝ հաճութեամբ զլուսափայլ վարսն:

Եկն եւ միւսն եւ ասէ. «Տէ՛ր, ահա մնասն քո ծրարեալ ի վարշամակի» (ԺԹ. 20):

ԿՐ Այսինքն՝ ո՛չ ի գործ արկ զհաւատոցն բան, մնաց անպտուղ՝ պատճառելով զանձին եւ զայլոց ծուլութիւն: Գուցէ, որք աշակերտինն եւ ո՛չ անսայցեն իմոյ վարդապետութեանս, եւ զնոցա գործսն յինէն պահանջէիր:

«Երկեայ ի քէն, զի այր մի սփամբակ ես. բառնաս, զոր ո՛չ եղիր, եւ հնձես, զոր ո՛չ սերմանեցեր» (ԺԹ. 21):

ԻԳ. Զի թէ հեզ ասացեալ էիր զՏէրն, գոյին իրաւունք պատճառելոյ: Վստահացայ ի հեզութիւն քո եւ հեզացայ: Իսկ որովհետեւ գիտէիր զնա խիստ եւ արկանող զտանջանս զգլխով ամբարշտաց, պարտ էր զգաստանալ եւ զարհուրել ի բռնութենէ անտի, եւ ի գործ արկանել զարծաթն, զի մի՛ պատիժս կրեսցես ի ստամբակ տեսունէն:

Ասէ ցնա. «Ի բերանոյ քումսլէ դափեցայց զքեզ, ծառայ անհաւար» (ԺԹ. 22):

Զի գիտէիր զգատաւորն պատժող մեղաւորաց: Անհաւատ ասելով՝ ընկենու ի հաւատոցն զայն, որ ո՛չ սպառնալիքն եւ ո՛չ պատիւն զարթուցին ի գործելն:

«Ընդէ՛ր ոչ արկեր զարծաթն իմ ի սեղանաւորսն» (ԺԹ. 23):

ԿՐ. Այսինքն՝ ի լսելիս հաւատացելոց: Զի որպէս մարմինք ի ձեռն կերակրոց զաւրանան եւ տեւեն, այսպէս եւ հոգիք ի ձեռն գիտութեան հաւատոց եւ վարդապետութեան բանի պայծառացեալք լինին:

ՍՏ Արդ՝ ի վարդապետս հմուտս եւ բարի, որք ունին ճշմարիտ վարդապետութիւն, եւ ի նոցանէ ուսանել զմիտս գրոց, եւ առնել եւ զայլս ուսուցանել ի յառնելն: Ի դէպ է:

ԻԳ. Իսկ աստ իւրաքանչիւր ոք ասացեալ էր բանս, որպէս ամենայն ոք արկանէ արծաթ ի սեղանաւորսն: Եւ ամենայն ումեք հարկ է այս: Եւ որպէս վարդապետացն խրատել զեկեղեցիս, այնպէս եւ ամենայն ումեք՝ իւրում տանն, որ ընդ իւրում իշխանութեամբ է, վերակացու լինել բարիոք եւ խրատիչ: Եթէ յառաջնորդաց արիւն ամենայն ժողովրդեանն խնդրի, քանի՞ եւս որդոցն, զոր ծնաւ եւ սնոյց, պահանջի: Եթէ ո՛չ՝ երկի[ւ]ղիւն Աստուծոյ սնուցանէ:

«Եւ ես եկեալ փոկոսիւք պահանջ[ելի]» (ԺԹ. 23):

Կամի յունկն նոցա զգործոյն աւրինակ: Եւ զհանդէս քեզ պարտ էր առնել եւ ինձ զգժուարագոյնսն թողուլ:

Ասէ ցապասաւորսն. «Առէ՛ք ի նմանէ զմնասն եւ փո՛ւք այնսմ, որ ունի զփասն մնասն» (ԺԹ. 24):

ԿՐ Հրաման տայ մերկացուցանել ի նմանէ զշնորհս Հոգոյն Սրբոյ, որով արժանաւորեցաւ այնմ շնորհի, զոր թաքոյցն, եւ մատուցանել տանջանաց, ուր «լալ աչաց է եւ կրճել արամանց» (հմմտ. ԺԳ. 28):

ԻԳ Եւ լուծանել ի հաւատոցն, զոր յայլում վայրի ընդ մէջ կտրել հրաման ետ: Նաեւ այսու ուսուցանէ, զի զբան հաւատոցն, զոր խոստովանեաց բառնան: Եւ ընդ անհաւատսն պատժեն, զի ծոյլքն ո՛չ կամեցան ստանալ ինչ [յ]անձանց ի բարեացն Աստուծոյ: Արդարութեամբ բառնայ ինքն յայնպիսեացն զայն, զոր ետ ինքն զաւագանին շնորհն, որով որդիք Աստուծոյ արժանաւորեցան կոչիլ, մերկանայ յապատամբացն: Ըստ որում՝ թագաւորք երկրի դատին զիշխան ոք մեղուցեալ: Զպատիւն եւ զհանգերձ իշխանութեանն հրաման տայ մերկանալ եւ ապա մատնել դահճացն: Ի նոյն իրաւանց հետեւին աստուածայինքն:

Ասնն ցնա. «Տէ՛ր, ունի գրասն մնասն» (ԺԹ. 25):

Այս թուի ինձ յաչաղանք: Ո՛չ զի դատաստանի քննութիւն է, եւ ո՛չ հրեշտակք ասնն ինչ, յորժամ նա հաւասարէ դատելովն, այլ կամի բանիւս յայտնել, թէ արդարոյն այնչափ պարգեւս բարի է, զի եւ հրեշտակաց նախանձ արկանեն:

«Որ ունիցի՝ փացի եւ յաւելցի, եւ որ ո՛չ ունիցի՝ բարձցի ի նմա[նէ]» (ԺԹ. 26):

ՈԿ. Որ փոյթ ունի յանձին սպասաւորել, եւս առաւել յինքն ամփոփել զպարգեւսն Աստուծոյ: Եւ զի ո՛չ ըստ չափոյ վաստակոցն են պարգեւքն, այլ ըստ աշխատութեանցն, որում արժանի արարին զանձինս: Առնուն եւ յաւելու նոցա եւ այլ եւս առատութիւն պարգեւաց:

«Բայց զթշնամիսն իմ, որ ո՛չ կամէին զիս թագաւորել ի վերայ նոցա, աճէք այսր եւ սպանէք առաջի իմ» (ԺԹ. 27):

ԻԳ. Զգէ այնուհետեւ զբանն ի վերայ անհաւատիցն: Եւ դատի զնոցա ժպրհութիւն[ն], որք յառաջին գալ[ս]տեան նորա զքաղցրութիւն տեսին, յերկրորդի անդ զսաստկութիւն ծանիցեն: Արդ, որ ի խաչին ի Հաւրէ զթողութիւն խնդրէր անաւրինացն. «Զի ո՛չ գիտնն զի՛նչ գործեն» (ԻԳ. 34), եւ «Որ ոք ասէ բան զՈրդոյ մարդոյ՝ թողցի նմա» (Մաթթ. ԺԲ. 32, Մարկ. Գ. 28), զիա՞րդ աստ պահանջէ: Զի անցեալ

է ժամանակ երկայնատութեան, եւ այժմու ժամանակիս է, իսկ այն ժամանակն՝ իրաւանց եւ քննութեան եւ արդարութեամբ հատուցանել: Վասն այնորիկ զայս եղ առաջի, զի մի՛ ոք քաղցրութեամբ անհոգացի, այլ զգաստն լուեալ զարհուրեսցի ի վրէժխնդրելոյն:

ԿՐ. Արդ, կշտամբեալ առաքին ի տանջանս յաւիտենականս, զոր առակաւոր բանն սպանումն ասէ:

ՍԳ. Եւ զի նաւում ասէ. «Նախանձոտ եւ քինախնդիր է Տէ՛ր» (Նաւում Ա. 2): Թէպէտ եւ երկայնամիտ է, սակայն ո՛չ արդարացուցանէ զամբարիշտն, այլ խնդրէ զվրէժս ի հակառակորդաց եւ ի թշնամեաց իւրոց (Կրն՝ Նաւում Ա. 3, 2): Զոր Մատթէոս ասէ. «Զձառայդ անպիտան հանէք ի խաւարն արտաքին» (Մաթթ. ԻԲ. 13):

ՍՏ Ուր հոգին ամենայնիւ խաւարի դառն տրտմութեամբ, ուր ո՛չ է այցելութիւն աստուածային լուսոյն: Որպէս Փիլոն Յիկոնացի գրովն Մովսիսի մեկնէ, եթէ՛ «Նաւարն, որ ի վերայ անդնդոց էր, արտաքս առաքեաց»: Տեսանե՞ս, զի անարժանքն արտաքսին ի բոլոր աշխարհէս եւ ի դրախտէն Աստուծոյ եւ յերկնից արքայութենէն:

ՄԱՏԹԷՈՍ ԶՈՒՂԱՅԵՑԻ

Այր մի ազնուական գնաց յաշխարհ հեռի՝ առնուլ իւր թագաւորութիւն եւ դառնալ (Ղուկ. ԺԹ. 12):

Զի՞ «այր» վասն բնութեան մերոյ ասէ. զոր էառ Բանն Աստուած, իսկ «ազնուականն»՝ վասն միաւորութեան Բանին: Եւ արդ, զի՞ է նա ազնիւ քան զամենայն դոյքս, ցուցից բազում եղանակաւ:

Ա. Նախ՝ զի Աստուած է բնութեամբ Տէ՛ր մեր մարմնով, իսկ այլ ամենայն դոյքս՝ ծառայք եւ ստեղծուածք: Եւ այս մի համեմատութիւնս բաւական է ցուցանել զամենայն, բայց յերկարեցից սակաւ մի վասն համբաւացն, վասն զի որպէս կատարեալ Աստուած է Բանն մարմնով եւ նոյնն կատարեալ մարդ է:

Բ. Երկրորդ՝ զի անապական է մարմնով՝ ըստ այնմ. «Մարմին նորա ոչ երես զապականութիւն» (Գործք Բ. 31), իսկ մարմինս մեր՝ ապականացու եւ ի հոգ լուծանելի:

Գ. Երրորդ՝ զի մեք մեղանչեմք, իսկ նա ոչ արար մեղս եւ «ոչ գրաւ նենգութիւն [ի բերան նորա]» (Մաղմ. ԼԱ. 2):

Դ. Չորրորդ՝ զի մեք ոչ մագ մի կարեմք սպիտակացուցանել, իսկ նա կարէ եւ այլ եւս բազում արարածս ստեղծանել:

Ե. Հինգերորդ՝ զի մեր կամքս եւ կարն հակառակ են, զի զոր, ինչ կամիմք, ոչ կարեմք առնել: Իսկ նորայն հաւասար է, զի զոր, ինչ կամի եւ կարէ, եւ զոր, ինչ կարէ եւ կամի՝ ըստ մարգարէին. «Ձոր ինչ կամեցաւ եւ արար» (Սաղմ. ԸԼԴ. 6):

Զ. Վեցերորդ՝ զի մի մասն մարդոյս, այսինքն՝ հոգին կամ մարմին, ոչ է առանձնակի կատարեալ մարդ: Իսկ նորա հոգին կամ մարմին կատարեալ Աստուած է, վասն զի ի Բանն միաւորեալ է անբաժանապէս:

Է. Եաւթներորդ՝ զի մեր մարմին ոչ կարէ կենդանացուցանել զհոգիս մեր, իսկ Բանին Աստուծոյ մարմին եւ արիւն սրբէ զմեզ յամենայն մեղաց՝ ասէ առաքեալն. «Եւ կեցուցանէ զհոգիսն» (հմմտ. Բ. Կոր. Գ. 6):

Ը. Ութերորդ՝ զի մարմին մարդոյ ոչ է ճաշակելի մեղ, իսկ նորայն ճշմարիտ կերակուր է եւ արիւնն՝ ըմպելի, որպէս ինքն ասաց (տեսն Յովհ. Զ. 56):

Թ. Իններորդ՝ զի սոսկ մարդ ոչ կարէ զմեղս թողուլ, իսկ նա կարող է զմեղս թողուլ, զի Աստուած է բնութեամբ, որպէս ասաց. «Թողեալ լիցին քեզ մեղք քո» (Ղուկ. Է. 48), որ է իշխանաբար:

Ժ. Տասներորդ՝ զի ամենայն ոք, թէ աստ է, անդ չէ եւ թէ անդ է, աստ ոչ է. իսկ Տէր մեր յերկինս ընդ աջմէ Հաւր նստի եւ յամենայն եկեղեցիս պատարագի անծախապէս, այլեւ բնակէ յամենայն սուրբս:

ԺԱ. Մետասաներորդ՝ զի արարածքս կարաւտինք ամենայն իրաց, իսկ նա անկարաւտ է բնութեամբ՝ ըստ այնմ. «Որ միայն ունի զանմահութիւն՝ բնակեալն ի լոյս անմարտոյ» (Ա Տիմ. Զ. 16):

ԺԲ. Երկոտասաներորդ՝ զի մեք ցանկամք հրեշտակաց նմանիլ, իսկ նա ի հրեշտակաց երկրպագութիւն առնու՝ ի սէրովբէից եւ ի քէրովբէից:

ԺԳ. Երեքտասաներորդ՝ զի մեք փոփոխական եմք եւ այլայլական բնութեամբ, իսկ նա՝ անփոփոխ եւ անեղուն ի բնութիւն:

ԺԴ. Չորեքտասաներորդ՝ զի մեք այլ կերպիւ եմք նախքան զյարութիւնն եւ այլապէս՝ յետ յարութեանն, իսկ նա միեւնոյն գորով մարմնովն յառաջ եւ յետոյ՝ ըստ որում ասէր. «Շաշափեցէր զիս եւ տեսէր, զի ես նոյն եմ» (հմմտ. Ղուկ. ԻԴ. 39):

ԺԵ. Հնգետասաներորդ՝ զի մեք ի դատաստան մտանեմք, իսկ նա դատէ զմեզ եւ պատժէ եւ փառաւորէ՝ ըստ այնմ. «Ձամենայն դարաստան եւր Որդոյ իրում» (Յովհ. Ե. 22): Է եւ այլ բազումք, զոր առ ի չձանձրանալոյ, վասն ոչ գրեցի: Բայց այսքան պատճառ լիցի իմաստութեան ձեր, զի իմացիք ի սկզբանէ յղացման նորին եւ ի ծնունդն, եւ ի գործն, եւ յետ յարութեան ուտելն, եւ հանդերձիւ երեւիլն, որով ցուցանէ զնա ազնիւ եւ զերակատար, վասն որոյ ասէ. «Այր մի ազնուական»:

Իսկ զի՞ ասէ. «Գնաց յաշխարհ հետի»: Այսինքն՝ ի ներքին կողմ վարագուրին, այսինքն՝ յերկինս լուսեղէնս յանմատոյց բնակարանս, զոր Պաւղոս ասէ (տեսն Եբր. Զ. 19): Իսկ «գնալ» զհամբառնալն ասէ, զի կամաւ ել եւ նստաւ ընդ աջմէ Հաւր: Իսկ այն բնակութիւնն, զոր «հետի» կոչէ, ոչ այնպէս հեռի է, իբր թէ ոտամբ չափի կամ աւուրբք եւ տարով չափի նորա հեռաւորութիւնն, այլ՝ «հետի» ասի նա ըստ Ե. (5) եղանակի:

Ա. Նախ՝ զի նա բնակարան է Սուրբ Երրորդութեանն, իսկ այս երկիր՝ անասնոց վայր: Եւ տե՛ս, թէ որքան՝ հեռաւորութիւն է Աստուծոյ առ անասնոց բնութիւն:

Բ. Երկրորդ՝ զի նա անտեսանելի է զդայարանաց մարմնոյ, իսկ այս զգալի աչաւք տեսանի: Եւ իմա՛, թէ քանի հեռաւորութիւն է ի զգայարանացս առ միտս:

Գ. Երրորդ՝ զի նա անմարմնոյ վայրք է, իսկ սա՝ մարմնաւորաց: Եւ զիտես, թէ որքան հեռաւորութիւն է մարմնոյ առ անմարմինսն:

Դ. Չորրորդ՝ զի նա անեղին տեղիք է, իսկ սա՝ եղականացս, եւ տես, թէ որքան է անդր եղականն յանեղէն:

Ե. Հինգերորդ՝ զի այս ապականեալ վայր է, իսկ նա՝ անապական, որով ճանաչել կարես զհեռաւորութիւն այնմ աշխարհին: Իսկ զի՞ «աշխարհ» ասաց եւ ոչ երկիր. որ ցուցանէ, թէ արտաքոյ է ամենայն աշխարհիս, որ յերկնէ եւ յերկրէ, եւ որ ի մէջ սոցունց պարառեալ են բնութիւնքն:

Իսկ զի՞ «աշխարհ» կոչի նա. վասն է. (7) պատճառի:

Ա. Նախ՝ զի որպէս աշխարհս հանգիստ է կենդանեաց, այսպէս եւ լուսեղէն խորանն հանգիստ է աստուածութեանն՝ ըստ այնմ. «Նարի յերկինս երկնից» (Սաղմ. ԿԷ 34), «Եւ Տէր է անուն նորա» (Սաղմ. ԿԷ 5):

¹ Դ որքան են

Բ. Երկրորդ՝ զի որպէս յաշխարհի բնակեն մեծ եւ փոքր, այսպէս եւ ի լուսեղէն խորանն հանգիստ է հրեշտակաց եւ արդարոց, եւ սրբոց, եւ զղջացողաց՝ ըստ այնմ. «Ի սեղան Նար իմոյ բազմցուցից եւ անցեալ պաշտեցից» (հմմտ. Ղուկ. ԺԲ. 37):

Գ. Երրորդ՝ զի որպէս աստ յայտնի են թագաւորք եւ ծառայք, այսպէս եւ անդ Աստուած բազմի ի կառս քերովբէականս, եւ հրեշտակք՝ շուրջ զնովաւ՝ ըստ այնմ. «Տեսի զՏէր նստեալ յարթո բարձրութեան եւ վերացելոյ: Եւ սերովբէք [կային] շուրջ զնովաւ» (Ես. Զ 1):

Դ. Չորրորդ՝ զի որպէս աստ ամենեքեան հնազանդ¹ կան հրամանաց թագաւորին, այսպէս եւ անդ մնան եւ սպասեն հրամանաց արքային Աստուծոյ, եւ ոչ ոք ելանէ արտաքոյ հրամանաց նորա՝ ըստ այնմ. «Ամենեքեան քեզ սպասեն» (Մաղմ. ԾԳ. 27):

Ե. Հինգերորդ՝ զի որպէս աստ կերակրով ապրին ամենայն կենդանիք, այսպէս եւ անդ յաստուածային լուսափայլութենէն զմայլեալ հոգիքն կան եւ մնան յաւիտենական:

Զ. Վեցերորդ՝ զի որպէս աստ որոշեալ է իւրաքանչիւր տուն, այսպէս եւ ամենայն սրբոց զանազանեալ է բնակութիւնք նոցին ի վայրի միոջ՝ ըստ այնմ. «Ի քան Նար իմոյ արթեալք բազում են» (Յովի. ԺԴ. 2):

Է. Եւթներորդ՝ զի որպէս աստ ոմն զաւրաւոր եւ ոմն նուազ փառս ունի, այսպէս եւ անդ ոմն՝ հարիւրաւոր եւ ոմն՝ վաթսնաւոր եւ երեսնաւոր եւ այլ փառք արեգական եւ այլ՝ լուսնի: Իսկ զի՞ գերագոյն է նա, քան զսա: Այս է, զի զոր ինչ տեսանեմք ի սմա, մեղք եւ մահ, եւ ապականութիւն, եւ կարաւտութիւն, ցանկութիւն, զրկումն եւ սպանումն, ախտ եւ այլն ամենայն, ոչ է անդ ամենեւին՝ ըստ այնմ. «Ուստի մերժեալ են ցար եւ քրքրութիւն եւ հեծութիւն» (հմմտ. Ես. ԾԱ. 11) եւ այլն:

Իսկ ասելն՝ «առնուլ իւր թագաւորութիւն եւ դառնալ», թէպէտ եւ տան զայսպիսի իրս առնելոյն, սակայն առ նա անպատշաճ է, վասն զի ընդ առնուլն զամենայն ունի գերալրապէս: Բայց որպէ՞ս իմաստցուք զայս: Արդ, վասն զի եկն Տէրն մեր, եւ ամենայն ինչ նորա ծածկեցան աստ, զի մի՛ չարն գիտասցէ զայս, այս է, զի աղքատ կերպիւ շրջեցաւ եւ յաղքատ մաւրէն ծնաւ, եւ հետիոտս ընթացաւ, եւ չարչարեցաւ: Նա, թէեւ մեռաւ, այլեւ ամենայն նուաստականքն, որք կարծիս տան մարդկան, իբր թէ ընդ աղքատ կերպին,

¹ Դ հնազանգ

որ յաշխարհի երեւեցաւ առնուլ զթագաւորութիւն, այլ նա ի բնութենէ ունի զթագաւորութիւնն: Այլ զի յայտնի այժմ նա Տէր գոլով եւ թագաւոր երկնի եւ երկրի. այն է «առնուլն»: Իբր թէ յայտնէ թագաւորութիւնն նա, որ աղքատ կերպիւ երեւեցաւն յերկրի: Ապա թէ ոչ, զի՞նչ ցուցանէ ասելն. «Իշխանութիւն ունի Որդի Մարդոյ [յերկրի] թողուլ զմեղս» (Մալթթ. Թ. 6), եւ զիշխանութիւն եւ ետ աշակերտացն թողուլ եւ առնուլ, եւ հաւատայ նմա զփականս արքայութեանն եւ այլն: Եւ արդ, այս ամենայն ցուցանէ նախքան զյարութիւնն: Իսկ յետ յարութեանն ոչ էր նմա այս իշխանութիւն, զի ասէր. «Տուա ինձ ամենայն իշխանութիւն յերկինս եւ յերկրի» (Մալթթ. ԻԸ. 18): Եւ Պաւղոս, որպէս թէ տակաւին եւս ոչ ունի, ասէ. «Յորժամ քացի ի ձեռս զթագաւորութիւն Աստուծոյ եւ Նար» (Ա. Կոր. ԺԵ. 24): Նմանապէս եւ Դանիէլ, թէ՛ «Տուա նմա իշխանութիւն եւ թագաւորութիւն նորա յաւիտենական» (հմմտ. Դան. Է. 14): Այլ այս է, ըստ որում ասացաւ, զի վասն յայտնելոյն ասէ, ուր յայտնի երեւի աստուածութիւն նորա եւ թագաւորութիւն: Իսկ յորժամ յերկրի շրջեցաւ, ի ծածուկ էր: Իսկ զի՞ «դառնալ» ասէ. իբր զի հաստատեաց աւր մի, յորում գայ կրկին անգամ՝ դատել զկենդանիս եւ զմեռեալս եւ յայնժամ յայտնէ զինքն իւր ընտանի փառաւքն: Այսքան վասն վերանալոյն ասաց եւ դարձեալ վասն գալոյն: Իսկ յորժամ երեւեցաւ մեզ ծննդեամբն ի կուսէ եւ վարագուրեաց ի մէնջ զաստուածութիւնն իւր թանձրագոյն մարմնովն: Եւ կոչեաց զամենայն ազգաց ծառայս իւր եւ ետ նոցա տասն մնաս եւ ասէ. «Շահեցէք զայդ» (հմմտ. ԺԹ. 13): Արդ, այս առակ նման է այնմ առակին, որ ի Մատթէոս գրեալ են քանքարքն (տես Մալթթ. ԻԵ. 14-30): Եւ կարծելի եղեւ, թէ նոյն է, սակայն Բ. (2) իրաց յայտնի է այլ գոլ:

Ա. Նախ՝ զի անդ այլ չափով առաջնոյն էր ետ, եւ այլ՝ երկրորդին, եւ երրորդին, իսկ աստ հաւասար չափէ ամենեցուն:

Բ. Երկրորդ՝ զի անդ որչափ ընկալան, կրկնապատիկ չա՛հ բերին, իսկ աստ ի հաւասարէ, զոր ընկալան, ոմն՝ բազում եւ ոմն՝ սակաւ մատոյց: Արդ, ի համեմատութենէ ուսաք, զի քանքարսն առ վարդապետսն ասաց, իսկ զմնասս զայս հասարակաբար առ ամենեսեան տուեալն աւրինաց նորա հնազանդութիւն՝ գործել զնա եւ պահել, որում ամենայն ոք կարէ տիրել: Իսկ «գրասն» ասացեալ զմնասն՝ զկամսն զգայարանաւք չափէ, որով ընդունիմք կամ ի բաց ընկենումք: Եւ դարձեալ զաւրէնս իւր թուեաց՝ ըստ աւրինացն ի մի ածեալ, վասն զի մինն միւսովն պահեալ լինի: Արդ, այս է.

«Շահեցուցէք մինչեւ զամ եւս միւս անգամ» (հմմտ. ԺԹ. 13):

Իսկ այս յայտնի է ի տեսողացն, զի զաւրէնսն, զոր ետ, պարտ է ի գործ արկանել ամենայն զգուշութեամբ եւ միշտ սպասել եւ ակն ունել գալստեան նորա: Եւ ըստ աշխատանաց աւրինացն ակն ունել հատուցման պսակին:

Իսկ զի¹ ասէ.

Քաղաքացիք յղեցին, թէ՛ «Ոչ կամիմք գթագաւորելն դորա ի վերայ մեր» (հմմտ. ԺԹ. 14):

Այն է, զոր հրէայքն աղաղակէին. «Չիք մեր թագաւոր, [բաց ի կայսերէ]» (Յովհ. ԺԹ. 15), վասն որոյ Յոհաննէս վկայէ. «Յիսուս եկ, եւ իւրքն զնա ոչ ընկալան» (Յովհ. Ա. 11): Եւ զպատճառն ասէ, թէ՛ «Սիրեցին [մարդիկ] զիսաւար առաւել, քան զյոյս» (Յովհ. Գ. 19), զի լոյսն յայտնի առնէ զգողն, իսկ խաւարն ծածկէ: Եւ ոչ միայն ատեցին, այլեւ սպանին: Մանաւանդ, թէ՛ եւ զվկայս աստուածութեան նորա հալածականս առնէին: Եւ այս է ասելն, թէ՛ «Ոչ կամիմք գթագաւորելն դորա ի վերայ մեր¹»:

Եւ եղև դառնալ նմա (հմմտ. ԺԹ. 15):

«Դառնալն» յայտնի ցուցանէ զբնականապէս թագաւորութիւն իւր, եւ նստի ի դատել՝ ըստ այնմ. «Նայր ոչ դարի գոթ, այլ՝ զամենայն դարաստանն եւր Որդոյ իրոյ» (Յովհ. Ե. 22): Աստ ստուգապէս զքննութիւնն ուսուցանէ, զոր առնէ ի հանդերձեալ դատաստանին: Եւ նախ զառաքինիսն դատէ, որք ասեն.

«Մնասն քո փասն մնաս արար» (ԺԹ. 16):

Այսինքն՝ զի կատարեալ արարի զառաքինութիւնն, զի Ժ. (10) թիւն զկատարեալն ցուցանէ, որպէս ասացաւ ի վերոյ: Եւ նորա ասացեալ՝

«Ծառայ բարի, ի սակաւ հաւաքարիմ [եղեր], լիջիր ի վերայ Ժ. (10) քաղաքի» (հմմտ. ԺԹ. 17):

Այսինքն՝ կատարեալ պսակ քեզ շնորհեսցի, զի թէ՛ զաւտարն ճշմարտապէս շահեցուցեր, զիմն կարես ամբողջ պահել:

Եւ զի¹ բազմապատիկ խոստացաւ կատարողացն զաւրէնսն՝ ասելով. «Ճ.(100)ապարիկ առցէ եւ զկեանսն [յախրենականս] ժառանգեսցէ»

¹ Դ իմ] մեր

(Մաւրթ. ԺԹ. 29): Նոյն եւ աստ Ժ. (10) քաղաքաւս զնոյն ի նոյն նշանակէ իմանալ, զի տե՛ս, թէ՛ քանի շատ է Ժ. (10) քաղաքն, քան զտասն արծաթն: Նմանապէս եւ երկրորդին պատասխանէ՝ տալ իշխանութիւն ի վերայ Ե. (5) քաղաքաց (տե՛ս Ղուկ. ԺԹ. 18): Իսկ երրորդ թշուառականն եւ անաւրէնութեամբ կացեալ, մատուցեալ ամբաստան լինի զքաղցրութենէ նորա եւ այսպիսի բանս ասէ, որ ոչ արդարացուցանէ, այլ բարկացուցանէ: Ասէ.

«Գիպէի, զի այր մի խիստ ես, հնձես զոր ոչ սերմանեցեր» (հմմտ. Ղուկ. ԺԹ. 21, Մաւրթ. ԻԵ. 24):

Եւ թէ՛ հեզ էր ասացեալ, գոյին իրաւունք, իբր թէ՛ ասէր՝ վստահացայ ի քո հեզութիւնդ եւ հեզագայ: Այլ՝ աւտարտի ասաց եւ «ստամբակ», այսինքն՝ գոռոզ եւ այլն, վասն որոյ ասէ.

«Ծառայ անհաւար» (ԺԹ. 22):

«Անհաւար» ասելով՝ ընկենու ի հաւատոցն: Եւ յիրաւի, զի զյոյսն ոչ յորդորեաց ի գործ պատուիրանին, եւ ի սպառնալեաց տանջանացն ոչ երկեաւ, որ զպատուիրանն արարեալ էր, վասն այն.

«Անհաւար»,- ասէ,- «ընդէ՛ր ոչ արկեր ի սեղանաւորս, եւ ես եկեալ՝ փոկոսաւք պահանջէի» (հմմտ. ԺԹ. 23):

Իսկ աստ ընդդէմ բերեն, զի թէ՛ քանքարացն առակքն ի վարդապետն առեալ լինին: Եւ այս եւս ահա տարեալ եհան ի վարդապետն, որոց պատասխանեմք, թէ՛ արդարեւ ամենեցուն հարկ է այս, զի որպէս վարդապետաց է խրատել զեկեղեցիս, նոյնպէս եւ ամենայն ումէք իւրում տանն պարտ է վերակացու լինել եւ խրատել բարուք: Եւ թէ՛ յառաջնորդէն ամենայն արիւն ժողովրդեանն խնդրի, քանի եւս առաւել ի մարմնաւոր ծնաւդացն՝ զորդւոցն, զոր ծնաւ, պահանջի, թէ՛ երկիւղն Աստուծոյ ոչ սնուցանէ, վասն որոյ ասէ.

«Առէք ի դմանէ եւ փուք այնմ, որ ունի զփասնն» (հմմտ. ԺԹ. 24, հմմտ. Մաւրթ. ԻԵ. 28):

Այս է լուծանել ի հաւատոցն, զոր այլում վայրի «ընդ մէջ կտրել» հրաման ետ, զի զբան հաւատոցն, զոր խոստովանեաց Բանիւն, եւ զմկրտութեան շնորհն առնու եւ ընդ անհաւատսն պատժէ յաւի-

տենական հրովն: Իսկ հրեշտակք, զի յաչաղկոտք են, ասեն՝ Տէր ունի զԺ.ն (10) մնասն (տիւն Ղուկ. ԺԹ. 16): Եւ արդ, այնչափ առաւել է պսակք արգարոցն, որ զհրեշտակս ի նախանձ արկանեն:

[Հարց]: Իսկ թէ վասն է՞ր զշնորհ աւագանին հանէ:

Պատասխանի: Այս է, զի յորժամ յաւագանն մկրտին, Աստուծոյ որդիք լինին, իսկ Աստուած զիւր որդիսն ոչ տանջէ: Այլ, զոր աւրինակ, թագաւոր ոք, յորժամ զիշխան ոք յիշխանութեանն կամի ձգել եւ սպանանել, յառաջ զպատիւ իշխանութեանն զհանդերձն հանել տայ եւ ապա՝ սպանանել: Նոյնպէս եւ Աստուած ոչ կամի որդիական անուամբ տանջել զմեղաւորսն, այլ՝ նախ քակէ ի նմանէ զանուն եւ ապա՝ դժոխոցն մատնէ: Իսկ զթշնամիսն, այսինքն՝ զհրէայսն, որք ոչ կամեցան զթագաւորութիւն նորա, տանջէ սպանմամբ ի գեհեանն յաւիտենական: Արդ, զայսոսիկ աւրինակ տայ զհրէայսն, որք ոչ կամեցան զթագաւորութիւն նորա, տանջէ սպանմամբ, զի մի միայն զայժմու գիտութիւնս նորա իմանալով, հեղգասցուք ի սուրբ պատուիրանաց նորա, այլ զսաստն եւ զվրէժ դատաստանին ի միտ ածցուք եւ պատրաստ լիցուք սուրբ գործով, այսինքն՝ ոչ միայն սուտ անուն քրիստոնեութեան, այլ ըստ անուանն եւ զգործն հաստատուն ունիցիմք, զի մի՛ ընդ անհաւատսն պատիժ կրեցեմք, վասն որոյ այս ամենայն աւրինակ վասն տկար մտաց մերոց հրամայեաց: Այլ, ո՛վ սիրելիք որդեակք իմ, զի զոր ինչ առնեմք մեք եւ մոռանամք, նա անմոռաց պահէ, եւ զի զիւրն խնդրէ եւ զշահն պահանջէ: Արդ, եթէ զշնորհս աստուածային առեալ ի դանձուց նորա ճրի եւ ծախէ ոք՝ մեծամեծ գին առնելով, ուրեմն լսէ նա՝ «ծառայ չար եւ վար», զի այնպիսին շահ ոչ բերէ Տեառն իւրոյ, այլ՝ որպէս ճրի գտաւ եւ ճրի վաճառեացէ՛ ըստ այնմ. «Ձրի առէք եւ ձրի վորք» (Մաթթ. Ժ. 8): Մանաւանդ, զի շահ ի յողիսն ածէ, որ ճրի վաճառեաց: Իսկ որ զմարմինն պարարէ աստուածային շնորհաւք, թաղելով յերկրի գանձառ գանձ նորա, վճիռ դատաստանի երեւեսցի նմա: Իսկ մեզ մի՛ հասցէ պարտապան գտանել մեծի տանուտեառն, այլ պարզ դիմաւք ցուցանել նմա զշահն ի Քրիստոս Յիսուս ի Տէր մեր:

ԱՌԱԿ ԸՐԱԳԻ

Ղուկ. Ը. 16-18

ՍՏԵՓԱՆՈՍ ՍԻՒՆԵՅԻ

Ոչ որ ճրագ լուցեալ ծածկէ զնա ընդ անաթիւ կամ ի ներքոյ մահճաց դնէ, այլ ի վերայ աշտանակի, զի որք մտանեն, քեսցեն զլոյն (հմմտ. Ղուկ. Ը. 16):

Ոչ ասէ զայս յաղագս երեւելի ճրագիս, այլ վասն իմանալոյն ասէ. բանի ուղիղ վարդապետութեանն, որ ոչ ծածկի անաթիւ իւրք, կամ ի ներքոյ մարմնոյ, այլ ի վերայ աշտանակի իւրոյ. «անաթ է քան»՝ հոգւոյս զաւրութիւնք. «մահիճք»՝ մարմինս, որք մտանեն՝ լսողք բանին վարդապետութեան լուսոյն ճշմարտի:

Որ ունիցի, քացի նմա, եւ որ ոչն ունի եւ զոր կարծիցէ ունել, հանցի ի նմանէ (հմմտ. Ը. 18):

Որ ունի զճրագն եւ դնէ ի վերայ աշտանակի, տացի նմայ գաղտնին եւ անյայտն, իսկ որ ոչն լուցանէ եւ դնէ ի վերայ աշտանակին, թէպէտ եւ կարծէ իմանալ ինչ, բարձցի յանդիմանեալ, զի մի՛ ստութեամբ ուսուցէ:



ՎԱՍՆ ՆՐԱԲԻՐԵԼՈՅՆ Ի ԽՆՋՈՅՍ

Ղուկ. ԺԴ. 8-11

ԻԳՆԱՏԻՈՍ

Տեսեալ զնոսա, թէ զիա՞րդ բարձրնաիր լինէին ի կոչունսն, ասէ ցնոսա. «Յորժամ կոչիցիս ի հարսանիս կամ ի կոչունս, մի բազմիցիս յառաջին բարձին. գուցէ պապուականագոյն քան զքեզ իցէ կոչեցեալ ի նմանէ. եւ եկեալ, որ զքեզ եւ զնա կոչեաց՝ ասիցէ ցքեզ. «Տո՛ւր սմա փեղի». եւ ասպ սկսանիցիս ամալթով զյեփին փեղին ունել (Ղուկ. ԺԴ. 7-10):

Առ խոնարհութիւնն մեծաւ խնամով կրթէ զմեզ ոչ միայն անդի Հատուցմամբքն, այլեւ ի մերձակայիցս ցուցանէ ի փառասիրութենէն դժուարին կիրք եւ ի խոնարհութենէ՝ հեշտալիք: Զայս աւրինակ բանից յամենայն իրս իբրեւ զաւգտակարս դնէ, որպէս յորժամ ասէ. «Լե՛ր իրաւախոս ընդ ոսոխին քում՝ զերժանիլ ի նմանէ, զի մի մաքնեսցէ զքեզ դապաւորին եւ դապաւորն՝ դահճի» (հմմտ. Մաթթ. Ե. 25): Արդ, այսպէս կարեւոր համարի ոչ միայն զհեհնին երկիւղիւն զարհուրեցուցանել, այլ եւ աստի՛ ամալթովս: Արդ, զայս խնամս առաջի արկանէ, զի են որ քանի յանտի կենացն վրիպել՝ յաստեացս զարհուրին, վասն որոյ ընդ այնպիսի թանձրամիտսն խաւսելով՝ ասէ. «Մի՛ անմտութեամբ զաթոռոցն առաջինն ընտրէր, զի մի ամալթով եւ նախատանաւք զվերջինն կալցես տեղի»: Ապա դարձուցանէ զբանն ի խրատու ի հեշտալիսն եւ ասէ.

Այլ երթիջիր, բազմեսջիր ի յեփին բարձին եւ այն, որ կոչեացն զքեզ, ասիցէ քեզ. «Բարեկամ, ի վեր մափի՛ր»: Եւ եղիցի քեզ փառք առաջի բարձակցացն քոց» (հմմտ. ԺԴ. 10):

Արդ, զայս յաւելու, զի իւրեանցն ախտիւն զրգեալքն ուսցին զխոնարհութիւն, զի թէեւ ոչ վասն աստուածային փառացն, գոնէ վասն մարդկային փառացն անսալ պարտ է եւ խոնարհիլ: Զի կարի չար են այսպիսի ախտք, որ ի փառասիրութենէ եւ յամբարտաւանութենէ, եւ յոխակալութենէ, եւ ի նախանձուէ մտանեն եւ

ըմբռնեալ՝ վարակեն զոգիսն: Զի այլ յանցանք թէպէտ եւ ասպականիչք են ողոց, սակայն զգայութիւնս փոքր ինչ հեշտացուցանեն, իսկ սոքա զոգիսն հանդերձ մարմնովն հաշեն եւ թշնամի եւ ատելի ամենայն ուրուք առնեն: Նորին աղագաւ երանէ Տէրն զաղքատս հոգևով եւ զհեզս եւ զսգաւորս, զի այնպիսիքն յայսպիսեաց ախտից ազատ են եւ ի մարմնի են խաղաղականք, եւ առանց ամբոխելոյ, եւ սիրելիք բազմաց, եւ բարեբանեալք յամենեցունց, եւ առ Աստուծոյ բարձունք, եւ Հատուցման բարեացն արժանաւորք: Իսկ փառասէրք եւ անբարտաւանք աստ՝ զամենեսեան ատելիս եւ անպատուաղիրս եւ պարսաւադէտս ունին եւ առ Աստուծոյ, անարգ եւ յետեալք, հրոյ եւ խաւարի ժառանգաւորք: Դարձեալ քննելի է բանս, զի ի սկզբան բանին առակ ասաց, թէ իցէ, իսկ այսպէս սոսկ պարզ՝ ուղիղ են: Ապա թէ յեղանակելով զգուշագոյն իցէ, ունի այս իմաստ զնոյն ինքն զնա լինել կոչող իբրեւ զփեսայ այսր մաքուր եւ անախտ հարսանեացս եւ առագաստի ուրախութեան, յորում ժողովեաց ի ձեռն հաւատոյն կոչման ի ճանապարհաց եւ ի հրապարակաց զմեզ՝ բարձր քարոզութեամբ առաքելոցն, եւ խրատէ՝ ոչ անձամբ զանձն յառաջ մատուցանել յաստիճան ինչ բարձրագոյն, որպէս զայնոսիկ, որ պարսաւեալ են ի գրոց, որ նեղին եւ մղին առ սեղանն եւ ոչ անսան Աստուծոյ ընտրութեանն, կալ մնալ կոչողին շնորհելոյ զպատիւն, որպէս ճանաչէ այն, որ զանյայտսն տեսանէ, զի լինիցի փառաւք պատուասիրութեան կոչողին: Եւ այսպէս, խոնարհք պատուեալ, բարձրանան յանկապուտ բարձրութեանն: Իսկ որ աստ գուցէ գործեն՝ յարգել զանձինս, յայնմ ատենին յետեալ գտանին եւ կորացեալ ամաչեն, զի զանոտիսն խնդրեցին եւ աստուածայնոցն ոչ բաղձացան:

ՍԱՐԳԻՍ ԿՈՒՆԴ

Ասէ ցնոսա. «Յորժամ կոչեցիս ի կոչունս, մի՛ բազմեսցիս յառաջին բարձին» (Ղուկ. ԺԴ. 8):

ԻԳ Կրթէ զմեզ մեծաւ խնամով ի խոնարհութիւն: Ո՛չ միայն անտի Հատուցմանն, այլեւ ի մերձակայիս ցուցանէ զփառասիրութիւնն դժուարին իրք, իսկ զխոնարհութիւնն՝ հեշտալիք: Զայս աւրինակ բանից յամենայն իրս իբրեւ զաւգտակարս դնէ, որպէս ասաց. «Լե՛ր իրաւախորհ ընդ ոսոխին քում՝ զերժանել ի նմանէ, զի

մի՛ մատնեսցիս դատաւորին» (հմմտ. Մարթ. Ե. 25): Այսպէս կարեւոր համարի ո՛չ միայն գեհննին երկի[ւ]ղիւն զարհուրեցուցանել, այլեւ աստի ամաւթովն, զի են, որքան յայն կենացն վրիպեալ, յաստեացս առաւել զարհուրին: Յիսուս ինքն է կոչաւղ փեսայ մաքուր եւ անախտ հարսանիս եւ առագաստ ուրախութեան երկիրնք, յորում ժողովէ ի ձեռն հաւատոցն կոչման՝ քարոզութեամբ առաքելոցն:

Մի՛ բազմիցիս յառաջին բարձին (ԺԴ. 8):

Ընդ թանձրամիտսն խաւսի մի՛ անմտութեամբն գառաջին աթոռսն խնդրել, զի մի՛ ամաւթով գվերջինն ընկալցիս: Խրատէ մի՛ անձամբ զանձն յառաջ մատուցանել յաշտիճան ինչ բարձրագոյն: Որպէս զայնոսիկ, որ պարսաւեալ են ի գրոց, որ մղին առ սեղանն եւ ո՛չ անսան Աստուծոյ ընտրութեանն՝ կոչողին շնորհելոյ զպատիւն: Որպէս ճանաչէ այն, որ զանյայտսն տեսանէ, զի լիցի կոչողին փառաւք պատուասիրութեամբ:

«Այլ յորժամ կոչեսցիս, բազմեսցիր յերին րեղոջ: Եւ այն, որ կոչեսց գրեգ, ասիցէ. «Բարեկա՛մ, ի վեր մապիր»: Եւ եղիցի քեզ փառք առաջի բարձակցացն քոց» (ԺԴ. 10):

Ձի իւրեանց ախտիւն զրգեալք՝ ուսցին զխոնարհութիւն: Եթէ ո՛չ վասն աստուածային փառացն, գոնեայ վասն մարդկան փառացն պարտ էր խոնարհել: Ձի կարի չար է փառասիրութեան ախտն, յամբարտաւանութիւն եւ յոխակալութիւն, եւ ի նախանձ ըմբռնեալ արկանեն զհոգին: Ձի այլ յանցանք թէպէտ եւ ապականիչ են ոգոց, սակայն զգայութիւնքն հեշտանան փոքր ինչ: Իսկ սոքա զոգիսն հանդերձ մարմնովն հաշեն եւ թշնամի եւ ատելի ամենեցունց առնեն: Վասն որոյ Տէրն երանէ զաղքատս եւ զհեզս եւ զսգաւորս (հմմտ. Մարթ. Ե. 3-5), զի այնպիսիքն յայսպիսեաց ախտից ազատեն եւ ի մարմնի խաղաղ կեանս ունին՝ եւ առանց ամբոխելոյ, եւ սիրելիք ամենեցունց, եւ Աստուծոյ բարեացն արժանաւորք: Իսկ փառասէրք եւ ամբարտաւանք անտ՝ յամենեսին ատելի[ս] եւ անպատուազիրս, եւ աստ պարսաւեալք են եւ ի հանդերձեալսն յԱստուծոյ անարգեալք եւ խաւարի ժառանգորդք:

Ձի ամենայն, որ խոնարհեցուցանէ զանձն, բարձրացի (ԺԴ. 11):

ՍՏ Իսկ որ զինքն խոնարհեցուցանէ կամաւորութեամբ, նա բարձրացի: Իսկ որ ի տնանկութեան է, խոնարհի եւ տառապի, կամ ի նախատանաց ուրուք, այսոքիկ ո՛չ է խոնարհութիւն: Բայց Քրիստոս հրամայէ ինքն զինքն խոնարհեցուցանել յուժարութեամբ, որպէս ինքն կամաւորութեամբ խոնարհեցաւ:

Որ բարձրացուցանէ զանձն՝ խոնարհեսցի (ԺԴ. 11):

Իգ. Իսկ որ աստ գոն գործել յարգել զանձինս, յայնմ ատենին յետեալ գտանին: Եւ կորացեալ ամաչեսցեն, զի զսնոտիս բարձրութիւն խնդրեցին եւ ո՛չ աստուածայնոցն բաղձացան:



ԸՆՏՐՈՒԹԻՒՆ ՆՐԱԲԻՐԵԼՈՅՆ

Ղուկ. ԺԴ. 12-14

ԻԳՆԱՏԻՈՍ

Տայ պատշաճ խրատ եւ այնմ, որ առնիցէ ընդունելութիւն, մի բնաւ կոչել զոք ի փարթամաց կամ ի բարեկամաց, զի ունին նոքա, ասէ, հատուցանել քեզ հաւասար չափով եւ առ Աստուծոյ եւ ոչ մի ինչ հատուցումն: Որպէս այն, զի մեղաւորք մեղաւորաց փոխ տան, զի առցեն զկշիռն:

«Այլ դու, - ասէ, - կոչեա՛ր զաղբաբարս եւ զամենայն հաշմեալս, որոց ոչ գոյ փայլ այժմ փոխարէնս: Եւ յայնժամ երանելի ես» (հմմտ. Ղուկ. ԺԴ. 13-14):

Զի զԱստուած ունիս պարտապան, եւ հատուցանէ քեզ բազմապատիկ յարքայութեանն, ի հատուցման արդարոցն (հմմտ. ԺԴ. 14):

ՍԱՐԳԻՍ ԿՈՒՆԴ

Ասէ ցկոչնապէրն. «Յորժամ առնիցես ճաշ կամ ընթրիս, մի՛ կոչեր զբարեկամս եւ զեղբարս եւ զազգականս քո» (Ղուկ. ԺԴ. 12):

Մի՛ բնաւ զոք կոչել ի փարթամաց կամ ի բարեկամաց, զի ունին նոքա հատուցանել հաւասար չափով: Եւ յԱստուծոյ եւ ոչ մի ինչ հատուցումն լինի քեզ: Որպէս ասաց Քրիստոս. «Մեղաւորք մեղաւորաց փոխ տան, զի առցեն զկշիռն» (Ձ 34):

«Այլ դու կոչեա՛ր զաղբաբարս եւ զամենայն կաղս եւ զկոյրս, որոց ոչ է փայլ այժմն փոխարէն: Եւ յայնժամ երանելի ես» (ԺԴ. 13-14):

Զի զԱստուած ունիս պարտապան, եւ հատուցանէ քեզ բազմապատիկ յարքայութեանն արդարոց:

ՎԱՍՆ ՄԵԾԻ ԽՆՋՈՅԻՑ

Ղուկ. ԺԴ. 15-24

ՍՏԵՓԱՆՈՍ ՍԻՒՆԵՅԻ

Եւ նա ասէ ցնոսայ. «Այր ոմն արար ընթրիս մեծ, կոչեաց զբազումս: Եւ առաքեաց զժառայս իւր ի ժամու ընթրեացն՝ կոչել յ[ը]նթրիսն» (հմմտ. Ղուկ. ԺԴ. 16-17):

«Ծառայ»՝ Քրիստոս, վասն զի ի կոչումն եւ ի փրկութիւն ամենեցուն ծառայ[յ]եաց Հաւր՝ զկերպարանս ծառայի առեալ, եւ եկեալ ոչ ի սպասաւորիլ, այլ ի սպասաւորել. «Եւ ես, - ասէ, - ի միջի ձերում ոչ բազմեալ, այլ սպասաւոր» (հմմտ. Ղուկ. ԻԲ. 27): «Ժամ ընթրեացն»՝ զալուստն առաջին:

Առաջինն ասաց. «Ազարակ գնեցի» (ԺԴ. 18), եւ որ ի կարգին է.

Ոչ կամեցան զալ յ[ը]նթրիսն, որք ուսան եւ զնեցին ազարակս՝ աղանդ աւտարս յաստուածապաշտութենէ: Ունի այնպիսին հարկաւորութիւն ելանել եւ տեսանել զազարակն, այսինքն՝ փորձել եւ քննել զաղանդ հաւատոյն, զոր ստացաւն:

Եւ միւսն ասաց. «Զոյգս եգանց գնեցի հինգ, եւ երթամ փորձել գնոսայ» (հմմտ. ԺԴ. 19):

«Զոյգս հինգս» ասացաւ, որ թողեալ զիմանալի եւ զմտաւոր զգայութիւնս, եւ միայն մարմնեղէն հինգ զգայութեամբքս իմաստասիրէ:

Եւ այլն ասաց. «Կին առի եւ վասն այնորիկ ոչ կարեմ գալ» (հմմտ. ԺԴ. 20):

«Կին առի»՝ ասէ, ոչ զիմանալի եւ զհոգեւոր իմաստութիւն, այլ զմարմնեղինաց եւ զաշխարհիս այսորիկ զբաղանս եւ զցանկութիւնս:

Եւ եկեալ ծառայն՝ պարմեաց զայն փեռոն իւրոյ (հմմտ. ԺԴ. 21):

Որ պատմէ զհրաժարումն նոցայ յընթրեացն Քրիստոսէ՝ հեռացուցնելով ի Հրէից զփրկութիւն աստուածային:

Ել՝ վաղվաղակի յանցս եւ ի հրապարակս եւ ի փողոցս քաղաքիդ (հմմտ. ԺՂ. 21):

Սոքա են հեթանոսք ընդարձակ, որ նստին, այնոքիկ են, որք զ[ը]նդարձակ ճանապարհ գնացին, եւ վարէին զկեանս իւրեանց առանց վարդապետութեան եւ հաւատոյ. «եւ ի փողոցս», որք երբեմն երեւեալ կարծէին զհարութեան գնացս իւրեանց. «քաղաք»՝ երկրային աշխարհս. «աղքատք, խեղք, կաղք, կոյրք» (տե՛ս ԺՂ. 21)՝ յիմարք աշխարհիս այսորիկ. «աղքատք»՝ զաղքատացեալս յաստուածապատութենէ: Նոյն աւրինակաւ իմացիր, «զխեղս եւ զկոյրս եւ զկաղս», սոքայ ոչ տեսանէին եւ ոչ գնային ըստ ճշմարիտ իմաստութեանն:

Եւ ասէ Կիւրն ԳԾԱՌԱՅԱՆ. «Եւ ի ճանապարհս եւ ի ցանկս եւ արամբանել այսր» (հմմտ. ԺՂ. 23):

Կոչեցեալ յընթրիսն, որք ի փողոցս քաղաքին նստէին եւ ի հրապարակս հրամա[յ]է կոչել եւ զայնոսիկ, որք արտաքոյ քաղաքին. եւ եթէ «քաղաք» զերկրաւոր աշխարհս անուանեցաք, արտաքոյ քաղաքիս ո՞վ արդեւք իցեն, զոր կոչել հրամայեաց. կարծեմ, եթէ որք զժոխս արգելեալ էին հոգիքն սրբոցն, զորս ազատեաց Քրիստոս իւրովն իջանելով ի դժոխս:

ԻԳՆԱՏԻՈՍ

Զայս լուեալ՝ ոմն բաղձացաւ բարեացն: Ոչ արդարեւ իմանալեացն, ըստ որում է իրացն բնութիւն, այլ տակաւին մարմին գոլով մարմնապէս իմանայր զհատուցումն արդարոցն՝ որպէս սազուկեցիքն ասեն. «Ի յարութեան ո՞ւմ ի նոցանէ լինիցի կին» (հմմտ. Մատթ. ԻԲ. 28, Ղուկ. Ի. 33): Նովին ցանկութեամբ ընթռնեալ այրս այս, մարմնոյ հեշտացուցիչ կերակուր կարծելով, երանեաց, որ կերիցէ ճաշ յարքայութեանն Աստուծոյ: Այլ Յիսուս ոչ սաստեաց, զի տգիտութեամբ եւ ոչ թէ չարութեամբ խաւսեցաւ: Ապա առակս յաւդէ, որով զնոսա տարագիրս յայնպիսի երանութեանցն ցուցանէ լեալս²: Զի ահաւասիկ, հրաւիրեաց զնոսա մարգարէիւքն եւ կոչեաց առաքելաւքն բազում խնամակալութեամբ, եւ նոքա, յուլացեալ եւ կապեալ աշխարհի ցանկութեամբ, վերջացան գնալ զհետ կոչողին,

¹ US եւ

² ԻՏ լեալ

այլ իւրաքանչիւր ոք զիւրն առաջի դնէ պատճառս մեղաց, որով ըմբռնեցաւ ոմն յագարակս եւ ոմն ի լուծս եզանց հնգից, թերեւս ամենայն զգայարանաւքն շաղախեալքն եւ այլ ոմն ի սէր կանանց հարեալ՝ ոչ կամեցան անսալ կոչողին, իսկ այլք կարի չարացան անհաւատութեամբ, անարգանս եւ վէրս, եւ մահս, եւ անհնարին տանջանս հասուցին ի վերայ նոցա, որ կոչեցին զնոսա յարքայութիւնն եւ ի փառսն Աստուծոյ: Եւ ասա՛ զի՞նչ. բարկանայ անբարկանալի բնութիւնն, մերժէ զհրէայսն եւ հրաման տայ՝ կոչել զհեթանոսս, զկաղացեալսն ի ճանապարհացն արդարութեան եւ զկուրացեալսն՝ ի լուսոյ զիտութեանն Աստուծոյ, եւ աղքատացեալսն՝ ի շնորհաց Հոգւոյն եւ ի հայրենի փառացն՝ ժողովել զնոսա ի դռեաց, ի փողոցաց, ի քաղաքէ անբարչտաց, ի չարեաց ճանապարհաց: Եւ այսպէս զիւրալուր հեթանոսք անսան կոչողին, եւ իսկ եւ իսկ կատարի հրամանն, վասն զի հեթանոսք նուիրեցին զանձինս իւրեանց Աստուծոյ եւ փոխանակ տանն Յակոբայ, որ խոտորեցան, ամենայն հեթանոսք ի չորից ծագաց երկրի եկեալ լցին զարքայութիւնն Աստուծոյ: Առ որ հայեցեալ սպառնայ անհաւատիցն եւ ասէ.

Ոչ որ յայնց կոչեցելոցն ճաշակեսցէ յընթրեաց իմոց (Ղուկ. ԺԴ. 24):

Եւ զի մի ոք ի ձեւ կերպարանաց առակին հայեցեալ՝ կարծեսցէ զիւրին զայն եւ կոչունք հարսանեաց յատուկ, այլ զիտացեն զայն կարի ծանր եւ տաժանելի, վասն զի խաչեալ է փեսայն, եւ սպանեալ են հարսանեացն մանկունք, եւ կոտորեալ որդիք առագաստին, եւ արեամբ եւ խաչիւ կոչին հրաւիրեալքն, քարկոծեալ են կոչողքն եւ խողխողեալ կոչեցեալքն, արեամբ թաթաւեալ են հարգերձք հարսանեաց նոցա: Արդ, յայս հայեցեալ Յիսուս, ասէ ժողովրդեանն, որ գնային զհետ նորա:

ՍԱՐԳԻՍ ԿՈՒՆԴ

Իրրեւ լուաւ զայս ոմն ի բազմականացն, ասէ. «Երանի, որ կերիցէ ճաշ յարքայութեանն Աստուծոյ» (Ղուկ. ԺԴ. 15):

Բաղձացաւ բարեաց, ո՛չ իմանալեաց իրացն բնութեան, այլ մարմնապէս իմանայր զհատուցումն արդարոց: Որպէս սազուկե-

ցիքն ասեն. «Ի յարութեանն ո՞ւմ լինիցի կին» (Մարթ. ԻԲ. 28, Մարկ. ԺԲ. 23): Նոյնպէս եւ այլոս այս կարծեաց մարմնոյ հեշտացուցիչ կերակուր: Իսկ Յիսուս ո՛չ սաստեաց, զի տգիտութեամբ եւ ո՛չ չարութեամբ խաւսեցաւ:

Այր ոմն գործեաց ընթրիս, հրաւիրեաց [զբազումս] (ԺԴ. 16):

ԿՐ «Այր» զինքն անուանէ Տէրն, եւ «ընթրիս»՝ զժամանակս խաչին, յորժամ բաշխէր՝ զմարմին եւ զարիւնն իւր: Իսկ ընդէ՞ր ընթրիս ասաց եւ ո՛չ ճաշ: Վասնզի յետին ժամանակս եկն ի մերձեալ կատարածի:

Եւ առաքեաց զժառայս իւր ի ժամու ընթրեացն (ԺԴ. 17):

ՍՏ «Ծառայ» կոչէ զՄովսէս եւ զմարգարէքն:

«Ծառայ»՝ Քրիստոս, վասն զի ի կոչումն եւ ի փրկութիւն ամենեցուն ծառայեաց Հաւր՝ զծառայի զկերպարանս առեալ, եւ եկեալ ո՛չ ի սպասաւորիլ, այլ ի սպասաւորել բազմաց (հմմտ. Մարկ. Ժ. 45): Եւ «Ես, ասէ, ի մէջ ձեր եմ, ո՛չ բազմեալ, այլ սպասաւոր» (հմմտ. ԻԲ. 27):

Կոչել զհրաւիրեալսն (ԺԴ. 17):

ԿՐ Զառաքեալսն, որք բազում խնամով ելին կոչել յեկեղեցի Աստուծոյ, որ բաշխի մարմին[ն] եւ արիւնն կենսաբեր:

Պապրաստեա՛ ամենայն ինչ (ԺԴ. 17):

ՍՏ Սեղան իմաստութեան եւ գիտութեան աստուածայնոյ:

Սկսան հրաժարել ամենեքին մի ըստ միոջէ (ԺԴ. 18):

Զաշխարհասիրացն եւ զմարմնասիրացն ասէ, որք ո՛չ հետեւեցին աւետարանական քարոզութեանն, որք են հրէայքն:

ԻԳ Նոքա, յուլացեալ եւ կապեալ աշխարհի ցանկութեամբ, վերջացան զալ զհետ կոչողին: Եւ իւրաքանչիւր զիւրն գնէ առաջի, որով ըմբռնեցաւ ի պատճառս մեղացն:

Առաջինն ասէ. «Ազարակ գնեցի» (ԺԴ. 18):

ՍՏ Ո՛չ կամեցան զալ որք ուսան, զի գնեցին ազարակս՝ աղանդ[ս] աւտարս յաստուածապաշտութենէ: Այնպիսին հարկա-

ւորի ելանել եւ տեսանել զազարակն, այսինքն՝ փորձիւ քննել զաղանդն հաւատոյն, զոր ստացաւ:

Միւսն ասաց. Լուծս հինգս եզանց գնեցի եւ երթամ փորձել (ԺԴ. 19):

ՍԿ. Թողեալ զիմանալի եւ [զ]մտաւոր խորհուրդս բարիս, որով Աստուած փառաւորի ի խորհուրդս սրբոց իւրոց, եւ միայն մարմնեղէն հինգ զգայութեամբքս իմաստասիրէ զերկրաւորս:

ԻԳ. Թերեւս՝ ամենայն զգայարանաւք շաղախեալ:

Եւ այլն. Կին ածի, վասն այնորիկ ո՛չ կարաց զալ (ԺԴ. 20):

ՍԿ. (իգ.) Ո՛չ զուգեցաւ ընդ իմանալի եւ ընդ հոգեւոր իմաստութեանն, այլ յաշխարհիս այսորիկ ի զբազումն ցանկութեան:

ԻԳ ի սէր կանանց հարեալ՝ ո՛չ կամեցան անսալ կոչողին:

Եւ եկեալ ծառայն՝ պապմեաց րեառն իւր[ում] (ԺԴ. 21):

ՍՏ Պատմէ զհրաժարումն հրէիցն ի փրկութենէն Քրիստոսի աստուածային:

ԻԳ Զարացան անհաւատութեամբ: Անարգանս եւ մահս տանջանաւք հասուցանէին ի վերայ նոցա, որք կոչէին զնոսա յարքայութիւն եւ ի փառսն Աստուծոյ:

Ապա բարկացեալ րեւն ասէ. «Ելէք ի հրապարակս» (ԺԴ. 21):

Յազգս հեթանոսաց, որ ո՛չ էին գնացեալ ի շաւեղս պատուիրանաց[ն]:

ԿՐ. Որք ընդարձակ ճանապարհ գնային՝ վարելով զկեանս իւրեանց առանց վարդապետութեան հաւատոց:

Փողոցս (ԺԴ. 21):

ՍԿ. Որ երիւրեալ կարծէին զչարութեան գնացս իւրեանց:

Քաղաք (ԺԴ. 21):

Երկրաւոր աշխարհս:

Զաղբալս (ԺԴ. 21):

ԻԳ Զաղբատացեալս յաստուածային ճոխ աստուածապաշտութեանցն, զաղբատացեալսն ի շնորհաց Սուրբ Հոգոյն եւ ի հայրենի փառացն:

Կաղս (ԺԴ. 21):

ԿՐ. Զհեթանոսս, որք խեղ էին հոգով ըստ կռապաշտութեանցն եւ բիւր չարեացն:

ՄՏ «Կաղս», որք ոչ գնան ընդ ճշմարիտ իմաստութիւնն եւ ընդ ճանապարհս արդարութեան:

Զկոյրս մոյժ այսր (ԺԴ. 21):

Յիմարս աշխարհիս:

ԻԳ Զկուրացեալսն ի լուսոյ գիտութենէ Աստուծոյ:

Ասաց փէրն. Ել ի ճանապարհս եւ արա՛ մփանել, զի լցցի փուն իմ (ԺԴ. 23):

ԿՐ Տուն՝ աշխարհ հաւատացելոց, ընթրիս առակեաց: Վասն որոյ եւ ասաց. «Երանի, որ կերիցէ ճաշ յարքայութեանն Աստուծոյ» (ԺԴ. 15):

ՄՏ Հրամայէ կոչել զայնոսիկ, որք արտաքոյ քաղաքին են: Կարծեմ, թէ որք ի դժոխս արգելեալք էին՝ հոգիք սրբոցն, զորս ազատեաց Քրիստոս իւր իջմամբն ի դժոխս: Կամ յամպարշտաց չար ճանապարհաց այսպէս դիւրալուր հեթանոսք կատարեն զհրամանն՝ նուիրելով զանձինս փոխանակ տանն Յակոբայ, որ խոտորեցան ամենայն հեթանոսք ի չորից ծագաց երկրի եկեալ լցին զարքայութիւնն Աստուծոյ: Ասէ.

«Ո՛չ որ յայնց կոչեցելոց ճաշեսցէ յլընթրեաց իմոց» (ԺԴ. 24):

ԻԳ Սպառնայ անհաւատիցն, զի մի՛ ի ձեւ կերպարանաց առակիս հայելով՝ կարծիցի դիւրիւն կոչունք հարսանեաց յատուկ, այլ գիտասցեն ծանր եւ տաժանելի: Վասնզի խաչեալ է փեսայն, եւ մանկունք հարսանեացն սպանեալ են, եւ որդիք առագաստին՝ կոտորեալք, եւ հրաւիրակքն՝ արեամբ: Եւ խաչիւ կոչեն քարկոծեալք եւ խո[ղ]խողեալ կոչեցեալքն, եւ արեամբ թաւթաւեալ են հանդերձք նոցա հարսանեացն:



ՎԱՍՆ ՉԱՐ ՄՇԱԿԱՅՆ

Ղուկ. Ի. 9-19

ՍՏԵՓԱՆՈՍ ՍԻԲՆԵՅԻ

Այր ոմն փնկեաց այգի եւ եփ մշակեաց եւ գնաց ճանապարհ աւուրս բազումս (հմմտ. Ղուկ. Ի. 9):

«Այգի»՝ աստուածական վարդապետութիւնն մարգարէական եւ առաքելական, յորս զայգին ետ, զի պտղաբերեսցէ հրէական ժողովուրդն. «ծառայք» (տն՛ս Ի. 10)՝ Մովսէս եւ այլ մարգարէքն. «որդին, գոր սպանին» (տն՛ս Ի. 15)՝ Քրիստոս՝ միածին Որդին Աստուծոյ:

ԻԳՆԱՏԻՈՍ

Սկսանի այնուհետեւ ի սկզբանց անտի աւրինակաւ այգւոյ եւ մշակաց (հմմտ. Ղուկ. Ի. 9) մերկացուցանել զգործ նոցա, որով ընդդէմ Աստուծոյ վարեցան խստութեամբ եւ զծառայս նորա՝ զմարգարէսն՝ առաքեալս առ նոսա, հարուածովք եւ արեամբ դարձուցին ունայնս եւ ի ներելն Աստուծոյ բազմաւք, լաւագոյնք ոչ եղեն, վասն որոյ եւ ընդդէմ ժառանգաւորին կարի ժպրհութեամբ մարտեան: Եւ թէ զի՞նչ այսոցիկ հատուցումն գործոց. նախ ինքեանք տան անձանց զվրիժուցն սահման, զի դատաստանաւ է փոխել կորստեամբ զչարսն եւ արանց բարեաց հաւատալ զայն, իսկ ի կնքել Տեառն զբանս նոցա, զգաւնացեալք ամփոփեն զանձինս, հրաժարեալք ի բանէ անտի, «քաւ», ասեն, «մի լիցի» (Ի. 16):

Վասն այնորիկ ասէ.

«Եւ թէ ոչ այսպէս, զիա՛րդ ապա արդարանան բանք մարգարէիցն, եթէ ոչ անարգեալ վիմին գլուխ լիցի, եւ ոչ հարեալքն ընդ նմա մանրեսցին, եւ ոչ գնովաւ անկեալքն հոսեցին» (հմմտ. Ի. 17-18):

Արդ, յորմէ պարտ էր զարհուրել նոցա վասն զի իմացան, սակայն նոքա նովին գրգռեցան ունել զնա, թէպէտ եւ երկիւղ ժողովրդեանն արգել, նաեւ զի տարածամ ո՛չ էր աւրէն: Իսկ իբրեւ անձամբ վճարել զայն ոչ զաւրէին, խորհեցան, զի աւրինաց տէրութեանն Հռովմայեցւոց լուծիչ զնա յանդիմանեսցեն լինել, կամ

վտարանդիս զնոսա տուեալ, զոր համբաւեն՝ ազատիչ նոցա լինել: Եւ զայս, ոչ պարզ ուղիղ, առաջի եղեալ, այլ թաքուցանեն զանձինս՝ գողանալ զնա:

ՍԱՐԳԻՍ ԿՈՒՆԴ

Ապա սկ[ս]աւ ասել զառակս առ ժողովուրդն. Այր ոմն փնկեաց այգի (Ղուկ. Բ. 9):

ՍՏ Մարդ Աստուած ասի ի բազում գիրս աստուածայինս վասն Որդոյն Աստուծոյ՝ զգեհնոյ զկերպ մարդկան:

Տնկեաց այգի (Բ. 9):

ՁՀաւրէ, ասէ, յորժամ ի ձեռն Մովսիսի հանէր զիսրայեղացիսն յեգիպտոսէ: Եւ Դաւիթ ասէ. «Այգի յեգիպտոսէ փոխեցեր, հաներ զհեթանոսս եւ զիսրայէղ տնկեցեր» (Սաղմ. ԿԹ. 9): Զոր եւ Նսայի քաջայայտ առնէ զբանն. «Այգի Տեառըն զաւրութեանց տուեղ Իսրայեղի» (Ես. Ե. 7):

ՍԿ. Կամ այգի աստուածային վարդապետութիւն[ն] է՝ մարդարէական եւ առաքելական, յորս զայգին ետ, զի պողաբերեսցէ հրէական ժողովուրդն:

Եր զնա մշակաց (Բ. 9):

ԿԲ Զոր ետ ցքահանայսն գործել զայգին՝ վարդապետել ժողովրդեանն: Դաստիարակել առ հաւատս ըստ աւրինացն եւ մարգարէիցն, որք զուշակէին զՔրիստոսի աւետարանութիւն աւետեացն:

Գնաց ճանապարհի ի ժամանակս բազումս (Բ. 9):

Գնալ Տեառն զո՛չ երեւեալ նոցա հրեղէն ամպով՝ զկնի խաւսելոյն ի Սինեական լիւրինն եւ պատգամացն եւ ահագին երեւմանցն, եւ ո՛չ այլ գունակ երեւեցաւ ժողովրդեանն:

Առաքեաց առ մշակսն ծառայ, զի ի պարոյ այգոյն փացեն նմա (Բ. 10):

ՍԿ. ԶՄովսէս եւ զմարգարէսն առ քահանայսն խնդրել զհաւատս եւ զգործս բարիս ժողովրդեանն: Սակայն եւ այնմ ընդդէմ Աստուծոյ վարեցան ստութեամբ:

Մշակքն զան հարին, անարգեցին եւ առաքեցին ունայն (Բ. 10):

ԵՓ Արդ, գանեցաւ Միքիայ, աստակեցաւ Սեղեկիայ: Որպէս եւ Յովսիայ ասէ. «Եղեն նոքա որոգայթ զիտանոցին, որպէս վարմ ձգեալ ի վերայ լիւրանց» (հմմտ. Ովսէ Ե. 1): Նոյնպէս եւ զուր զմար-

գարէսն ճշմարտութեան որսայիք ի սպանումն: Վասն այսորիկ ջնջեցից զմարգարէսն եւ կոտորեցից զարդարսն ի բանս բերանոյ իմոյ, զի հաւանեցուցից զմարդիկ:

Յաւել զերրորդն առաքել, եւ զնոսա վիրաւորեցին (Բ. 12):

ՍՏ Քարկոծեցին զԵրեմիայ եւ զԶաքարիայ որդի Ամովգա:

ԻԳ Հարուածաւք [եւ] արեամբ զարձուցին ունայնս:

Առաքեցից զորդի իմ սիրելի (Բ. 13):

ԵՓ Այսինքն՝ ի բնութենէ Հաւր Որդին միածին, եւ յետոյ՝ առաքեալն: Ո՛չ թէ վերջին էր նա, այլ զի յետոյ երեւեցաւ այն, որ երբեմն էր իսկակից Հաւր: Որպէս վկայեաց Յովհաննէս, թէ՛ «Որ գալոց[ն] է զկնի իմ, յառաջ է քան զյաւիտեանս» (Յովհ. Ա. 30):

Թերեւս ի սմանէ պարկառեցին (Բ. 13):

ՈԿ. Ո՛չ անգիտանալով ասէ. «Քա՛ւ լիցի» (Բ. 16), այլ ցուցանէ զառաւել չարութիւն նոցա անպատասխանի: Այլ ինքն գիտէր, զի սպանանելոց էին, եւ առաքեաց, «թերեւս պարկառեցին»: Եւ նոցա պարտ էր ակնածել եւ յանդիմանիլ:

ԿԲ Եւ ի մեծագոյն նշանացն ցածնուլ՝ Որդի գոլով եւ Տէր ամենայնի, եւ ո՛չ հանգոյն մարգարէիցն, որ իշխանաբար հրամանաւ թողոյր զմեղս եւ ազատէր վերստին ծննդեամբ ի ծառայական կարգաց:

Իբրեւ փեսին մշակքն, ասեն. Սա է ժառանգն, սպանցուք, եւ մեր լիցի ժառանգ[ուրթիւնն] (Բ. 14):

Որպէս Հերո[վ]դէս լուաւ զգալուստն Քրիստոսի եւ կոտորեաց զամակտին՝ կամելով կորուսանել զնա (փնս Մարթ. Բ. 16-18):

ԵՓ Զնա սպանին, եւ ժառանգութիւն բարձաւ եւ տուաւ հեթանոսաց, զի հանդերձեալ էին հեթանոսք լինել նմա ժառանգ: Ըստ այնմ՝ «Նախանձեցուցից զձեզ, ոչինչ ժառանգաւորաւք» (Նոոմ. Ժ. 19): Զի որպէս որդիք աւտարաց հնազանդեցաւ ինձ, եւ բարձաւ ժառանգութիւն եւ տուաւ հեթանոսաց, նոյնպէս բարձաւ անուն ժողովրդեան եւ տուաւ հեթանոսաց: Եւ անուն հեթանոսաց եղաւ ի վերայ Իսրայեղի:

Նանին զնա արքաքոյ քան զայգին եւ սպ[անին] (Բ. 15):

Տեսանե՞ս, զի յառաջագոյն մարգարէանայ եւ զտեղին յայտնէ, ուր սպանելոց էին:

ԿՐ Զոր յետ բազում նշանացն, զոր տեսին, արտաքոյ քաղաքին ի խաչ հանին, զոր առականոր բանին «այգի» կոչեաց:

Զի՞նչ արա[ս]ցէ փէր այգ[ւոյն] (Ի. 15):

ԵՓ Մուծանէ զնոսա ի դատաստան առաջի նոցա, թէ որում արժանի էին մշակքն կամ զինչ հատուցումն գործոց:

Կորուսցէ զմշակսն զայնոսիկ (Ի. 16):

ԿՐ (Իգ.) Զի ի ձեռն առական եցոյց զլինելոց նոցա, թէ արհամարհելոց են ազգն, մանաւանդ թէ՛ կորնչելոց, եւ այգին այլոց լինելոց:

(Կր.) Եւ դուք, որ զժառայսն հալածեցիք եւ զորդին սպանիք, ելանելոց էք: Զոր եւ Մատթէոս ասէ. «Զչարսն չարաւ կորուսէ.» (Մաթթ. ԻԱ. 41):

ԵՓ Իսկ ինքեանք զվճիւ դատապարտութեան հատին ի վերայ անձանց, զի թշնամեացն վկայութիւն ստուգութեամբ լի է:

Տայցէ զայգին այլոց (Ի. 16):

Այսու զհեթանոսաց մուտն կարի քաջ յայտնեաց: Որպէս ասաց Ամբակում. «Դարձուցից ի վերայ հեթանոսաց շրթունս ընտրութեան փոխանակ այնր, որ հանապազ սանձք մոլորեցուցիչք եղեալ էին յերախս նոցա»: Զ[ի] ընդ միով լծով ծառայեսցեն նմա, որ կազմեցաւ խաչն ի Քրիստոսէ, որ եղաւ խորհրդով ի վերայ ուսոյ Շմաւոնի նշան դարձին հեթանոսաց:

Իբրեւ լուան՝ ասեն. Քա՛ւ՝ մի՛ լիցի (Ի. 16):

Կր. Վասնզի խ[ս]տագոյն համարեցան, ասեն մի՛ լիցի այդպէս: Զգաւնացեալ ամփոփեն զանձինս՝ հրաժարելով ի բանէ անտի:

Յիսուս հայեցեալ ընդ նոսա՝ ասէ. Զի՞նչ իցէ, որ գրեալն է. Վէմն, զոր անարգեցին (Ի. 17):

Զմարգարէութիւն Դաւթի ի մէջ բերէ (տես Սաղմ. ճԺԷ. 22) ի գէմս նոցա [եւ] պատկառեցուցանելով՝ սաստէ:

Սր. Վէմ զինքն նշանակեաց նոցա: Ըստ որում՝ ընթերցեալ էին զմարգարէութիւն Նսայեայ իբրեւ յերեսաց Աստուծոյ. «Ահաւասիկ դնեմ ի Սիոն վէմ ընտիր, գլուխ անկեան» (Ես. ԻԸ. 16), եւ զԴանիէլի՝ «Ի լեռնէ վէմն առանց ձեռին հատեալ» (Դան. Բ. 34): Եւ Պաւղոս ասէ. «Վէմն էր ինքն Քրիստոս» (Ա Կոր. Ժ. 4): Որ արբուցանէր նոցա զջուրն, զոր կանխաւ ետ աւրինակ ժողովրդեանն, զոր արհամարհեցին ի ժամանակի հաւատոցն: Վասն որոյ Զաքարիայ ասէ. «Ահաւասիկ Տէր կայր ի վերայ անդամանդեայ պարսպաց» (հմմտ. Ամովս Է. 7), որ է մարմինն Քրիստոսի: Անարգեցին, զի ասէին. «Զէ դա յԱստուծոյ» (հմմտ. Յովհ. Թ. 16, 33) եւ մոլորեցուցանէ զժողովուրդն:

Շինողքն (Ի. 17):

Կր. «Շինող»՝ զհրէից վարդապետսն կոչէ: Որպէս Եզեկիէլ ասէ, թէ՛ «Շինէին զորմն եւ ծեփէին փորիւ առանց խճելոյ» (հմմտ. Եզեկ. ԺԳ. 10-14):

Եղև գլուխ անկեան (Ի. 17):

Վասնզի որպէս անկեան վէմ զերկոսեան ազգս միաւորեաց՝ զհրէայս եւ զհեթանոսս, որք հեռագոյնք էին ի միմեանց եւ հակառակք, թշնամիք միմեանց հաւատովք եւ գործովք: Ի Տեառնէ եղև այս եւ է սքանչելի յաչս մեր: Այն իսկ է. «Բարձցի ի ձէնջ արքայութիւն Աստուծոյ» (Մաթթ. ԻԱ. 43) եւ տացի ազգի, որ արասցէ պտուղ հաւատոցն Քրիստոսի: Որպէս Միքիայ մարգարէ ասէ. «Հով[ու]եսցէ զնոսա զաւրութեամբ Տեառն ի փառս անուան նորա» (Միք. Ե. 4):

ԵՓ Անուն Յիսուսի է, զի մեծացի նա եւ բարձրացի մինչեւ ի ծագս երկրի: Քրիստոս բարձրացաւ մինչեւ ի ծագս երկրի քարոզութեամբն իւրով, որ սփռեցաւ մինչեւ յոլորտս երկրի: Ըստ Դաւթայ՝ «Ընդ ամենայն երկիր ել բարբառ արեւոտս նորա» (հմմտ. Սաղմ. ԺԸ. 5):

Ամենայն, որ հարցի ընդ վէմս, ընդ այս խորպակեսցի (Ի. 18):

ԵՓ Աձէ ինքեամբ զպատիժսն ի վերայ իշխանաց ժողովրդեանն, որ մարտեան ընդդէմ նորա: Եւ կամեցան շիջուցանել զնա, զի ո՛չ քաղցրացաւ նոցա վարդապետութիւն նորա:

ԿՐ Այլ թշնամանաւք խաչէին եւ ընդ[ղ]իմացան, խորտակեցան յահաւոր զաւրութեանց եւ ի նշանացն եղելոց, եւ բարձաւ թագա-

ւորութիւն նոցա, եւ զկնի Համբարձմանն եղծաւ կարգ պատարագացն, եւ ցրուեցան ընդ ոլորտս երկր[ի]:

Եւ յոյր վերայ անկցի՝ հոսեցէ (Ի. 18):

ԵՓ Ջոր ասաց Դանիէլ. «Վէ՛մն, որ եհար զպատկերն եւ փշրեաց, եւ ինքն եղեւ լեառն մեծ, եւ լցաւ ի նմանէ ամենայն երկիր» (Դան. Բ. 35)՝ աւետարանական քարոզութեամբն: Եւ խափանեաց նա զպաշտաւն կռոցն՝ այլովքն հանդերձ:

Սր. Եւ աստ՝ զառնուլ քաղաքին եւ զբնաջինջ լինել ազգին, զոր կարի յայտնագոյն գուշակեաց:

Կր. Եւ գլխտնում աւուրն գուշակէ, զոր Յովհաննէս ասաց. «Հեծանոցաւն սրբել զկալն» (Մարթ. Գ. 12, Ղուկ. Գ. 17): Զբաց որոշեալսն յաջմէ եւ յԱբրահամեան կայանիցն եւ ընդ դիւացն առաքել ի տանջանսն մեծ:

Խնդրէին դպ[իրքն] (Ի. 19):

ՍՏ Ի ցեղէն Շմաւոնի էին դպիրքն եւ խառն կային ընդ քահանայսն, թէպէտ եւ ո՛չ ի քահանայագործութիւն:

Կր. Զի ո՛չ ոք էր, որ առնէր զճշմարտութիւն: Ժողովուրդն իբրեւ զքահանայ հակառակի, զի ո՛չ հաւանէին նոքա խրատու որպէս ո՛չ քահանայքն աւրինացն, զի գայթակղեցան նոքա ի տուէ:

Եւ քահանայապետքն ի նմին ժամու արկանէին ի նա ձեռս (Ի. 19):

Կր. Յորժամ պարտ էր զարհուրել եւ երկիր պագանել, եւ ի պատժոցն զոր լուան՝ ակնածել եւ ցածնուլ: Սակայն նովին զրգուեցան, զի տարածամ ո՛չ էր աւրէն:

ԱՐԻՆԱԿՆ ԾՇՄԱՐԻՏ ՆՈՎՈՒԻ

Յովհ. Ժ. 1-18

ՍԱՐԳԻՍ ԿՈՒՆԴ

Որ ոչ մտանէ ընդ դուռն գաւթին (հմմտ. Յովհ. Ժ. 1):

Այսինքն՝ է պատուիրանացն Աստուծոյ շաւեղք, ընդ որ հետեւին ի գաւթին՝ յեկեղեցի Աստուծոյ, զի նա՛ է գաւթի թանաւոր ոչխարաց: Վասն որոյ եկն հովիւն քաջ ի խնդիր մոլորեալ ոչխարին:

Այլ ընդ այլ ելանէ, նա գող է եւ աւագակ (Ժ. 1):

Սկսաւ Տէր մեր յամաթ առնել զնոսա, զի որ ի ծածուկ դարանաւք եկին, գողք էին եւ աւագակք, զի ոչ ցուցին զանձինս իւրեանց յայտնապէս: Զի որպէս եկին գողք ի պատճառ ծննդեան նորա, զան եւ աւագակք ի պատճառս երկրորդ գալստեան նորա, եւ բազմանան համբաւք նոցա. մի՛ ելանիցէք՝ ի խնդրել զնոսա եւ մի՛ իցէք որսացեալք:

Իսկ որ մտանէ ընդ դուռն, ոչխարաց հովիւ է (Ժ. 2):

Ահաւասիկ Տէր խաչինն իբրեւ մտանէր ի գաւթի իւր ընդ գուռնն, այսինքն՝ ի ժառանգութիւն իւր, համարձակութեամբ նշանաւք եւ արուեստիւք եւ քաջութեամբ, ահա՛ ի ներքս ի սրտի ձերում է վկայութեամբ իրաւք եւ ոչ թաքստեամբ, եթէ կարաւտասցին խնդրողք նորա:

Նմա դռնապանն բանայ (Ժ. 3):

ՈՍԿ ԶՄովսէս ասէ, զի ի ձեռն նորա տուան աւրէնք եւ աստուածածանաւթութիւնք:

Զիր ոչխարս կոչէ յանուանէ եւ հանէ զնոսա (Ժ. 3):

«Նանէ զնոսա» (հմմտ. Ժ. 4) Աւետարանն: «Առաջի նոցա երթայ» (Ժ. 4)՝ ոչ Մովսէս, այլ պատուիրան նորա առաջնորդէր նոցա, որ եւ ինքն իսկ Տէրն է, որ մտանէր ընդ դուռն՝ ի նա պահելով զաւանդութիւնն, այլեւ բանալով, որք հաւատան ի նա:

«Որք յառաջ, քան զիս էին, գողք էին եւ աւագակք» (Ժ. 8):

ԶՅուդայ Գալիլեացի ասէ եւ զԹեղաս, եւ զսաղուկեցիսն, եւ զփարիսեցիսն:

ԵՓ եւ նոքա յայտնիք էին, զի ոչ էին Քրիստոսք, վասն այսորիկ եւ ծածուկ խնդրէին զողանալ զմարդկութիւնս, եւ յանդիմանէ զնոցա հպարտութիւնն, զոր յաւդէին, վասն այնորիկ երկնչէին յայտնել, թէ իցեն մեծ ոք, ասէին, թէ յանձն առցեն նոցա:

«Ես եմ դուռն» (Ժ. 9):

Որ յիս հաւատայ, մտցէ, եկեսցէ Հաւր յանդիման լինել աւագանին շնորհաւք: Որ ոչ հաւատայ յիս, ոչ հոգւովն, այլեւ մարմնովն կրէ զսատակումն, որպէս Թեղաս եւ Յուդա եւ նմանք նոցա (Կրթ. Գործք Ե. 36-37):

«Իսկ որ սրանէ, ճարակ գրցէ» (հմմտ. Ժ. 9):

Զյաւիտենական արքայութիւնն՝ զմարմին եւ զարիւն Տեառն:

«Ես եկի, զի զկեանս ունիցիք» (հմմտ. Ժ. 9):

Յերկնից ասէ՝ «եկի» եւ մարդացայ՝ մարմնով տնաւրինել եւ ի մահուանէ, որ տիրեալ էր ազգի մարդկան, կամիմ ազատել եւ առնել կենդանի ոչ բազմաժամանակեա կենաւք, այլ՝ յաւիտենական:

«Ես եմ հովիւն քաջ» (Ժ. 11):

Փոխանակ քաջին, զբարին գտաք. մի՛ ոք անհանճար իմացի զասացեալսն զխոնարհագոյնս, զի թէ զայսոսիկ ոչ խոստովանեաք զթափումնն ի մեր բնութիւնս եւ յորժամ այլ բարձրագոյնս լուրցուք, ի միտ առցուք, թէ նորա՛ են խոնարհագոյնքն, որ ի բարձրութենէն ի մեր նուաստացաւ բնութիւնս՝ ոչ փոխելով յիւր բնութենէն, այլ փոխատրելով զմերս՝ յինքն միացոյց: Դարձեալ, զի «հովիւն» եւ «բարին» հասարակ աստուածութեանն են յորջորջանք, որպէս մարգարէն ասէ. «Որ հովեսդ Իսրայէլի նայեաց» (Սաղմ. ԿԹ. 2). «Որ զԻսրայէլ հովեսդ եւ ի մեզ նայեաց եւ փրկեա» (հմմտ. Սաղմ. ԿԹ. 20), ասէ:

Հովիւ քաջ զանձն իւր դնէ ի վերայ ոչխարացն (Ժ. 11):

Չարչարանաւք մահուն ասէ, զի ոչ վասն ինքեան մեռանի, զիւր պարտսն վճարելով որպէս մարդ, այլ վասն հաւտիս փրկութեան կրէ զմահ:

Վասն է՞ր առակաւոր բանիւք ճառէ առ աշակերտսն եւ առ հրէայսն զիւր մահուն, զի յորժամ ըմբռնեսցի ի մահն, ի միտ առցեն: Իսկ «վարձկան» զմարգարէս եւ զառաքեալս եւ զարդարս կոչէ, որ թէպէտ յաւժարէին ապրեցուցանել զհաւտն, վասն զի յայն եղ զնոսա Աստուած, զի ի կոոցն որոշեալ՝ փրկեսցեն զոգիս նոցա ի մահուանէ, այլ այն ոչ հանգոյն իմոյս ասէ, զի կարեն իսկ ոչ, զի որք վասն Աստուծոյ սիրոյն զմահ յանձինս իւրեանց կրեցին, հատուցումն վարձուց գրէին ինքեանց, այլ ոչ վասն հաւտին փրկութեան մեռանէին եւ ոչ կարէին զնոսա ապրեցուցանել:

Վարձկանն իբրեւ փեսանէ՛ զգայլն, զի գայ (Ժ. 12):

«Գայլ» զսատանայ անուանէ՛ տեսանելով զհաւտն կործանեալ ի չարագործս նորա, զայն իմանային, այլ ոչ կարէին հնարել, ասէին չառ նորեն իմացմունսն, այլ զանձինս եւեթ ապրեցուցանել ջանային՝ զիտելով եւ զինքեանս ընդ կարաւք գրաւեալ:

«Ես՝ քաջս հովիւ, ճանաչեմ, - ասէ,- զիմսն» (Ժ. 14):

Այսինքն՝ զիմ սիրողսն, եւ զի մի՛ կարծեսցեն, որպէս այլք ի մարդկանէ ճանաչեն, ասէ:

«Ճանաչիմ յիմոցն» (Ժ. 14):

Նոցա ճանաչիմ, ասէ, ես, որք հաւատան յիս եւ բարի գործոցն: Զիս ծանուցանեմ նոցա յաւուր հատուցման նոցա փրկիչ եւ ապրեցուցանել եւ ընդ իս իսկ թագաւորեցուցանելով անմահ: Յարէ ի նոյն.

«Որպէս գիտէ զիս հայր» (Ժ. 15):

Որզի՛ ըստ բնութեան եւ ըստ զաւրութեան, եւ իշխանութեան, եւ արարչագործութեան, այսպէս զնա ասէ՛ զիտեմ մի բնութեամբ:

«Վասն այսորիկ սիրէ զիս հայր» (Ժ. 17):

Զանչափ բարերարութիւն Հաւր ցուցանէ մի բնութեամբ:

«Չայս պապուէր աօի ի Նաւրէ իմմէ» (Ժ. 18):

Ոչ փոքր գոլով քան զՀայր, ասեմ զայս, այլ թէ Հաւր կամաւք լինի չարչարանքս իմ եւ մահ եւ ոչ յանձնէ ինչ:

ԳՐԻԳՈՐ ՏԱԹԵԲԱՅԻ

Եւ աստ զնի տասներորդ պատճառն, թէ Աստուած է Քրիստոս: Այսպէս, որ ոք էութեամբ եւ մեծութեամբ նոյն է ընդ Աստուծոյ, Աստուած է, իսկ Քրիստոս նոյնն է էութեամբ եւ մեծութեամբ ընդ Աստուծոյ, ապա ուրեմն Քրիստոս Աստուած է:

Եւ գէութիւն եւ զմեծութիւն Քրիստոսի ցուցանէ աստ չորս կերպիւ. առաջինն է Հաւատացելոցն ներգործութեամբ, որպէս ասէ. «Ես եմ դուռն եւ մուծանող» (հմմտ. Յովհ. Ժ. 9): Երկրորդ. որ հովուէ զամենայն բարի եւ քաջ հովուութեամբ, որպէս ասէ. «Ես եմ հովիւն քաջ» (Յովհ. Ժ. 11): Երրորդ. հայրական հաղորդութեամբ, որպէս ասէ. «Նայր իմ, որ եր ինձ [գնոսա], մեծ է քան զամենայն» (Յովհ. Ժ. 29), այս է զԱստուածութիւն: Չորրորդ. իւր վկայութեամբն, որպէս ասէ. «Ես եւ Նայր իմ մի ենք» (Յովհ. Ժ. 30):

Արդ, նախ եցոյց աւետարանիչս զվարդապետութիւն Քրիստոսի լուսաւորիչ գոլ: Աստ ցուցանէ զսոյն վարդապետութիւնս կենդանացուցիչ գոլ, զի յայս գլուխս բանիւ ցուցանէ, զի կենդանացուցիչ է, եւ յետ այսորիկ զգալի նշանաւ ցուցանէ: Եւ այս գլխոյս նախ ճառէ զհեղութիւն Քրիստոսի, առ ի յուսուցանել, եւ երկրորդ՝ ճառէ զչարութիւն հրէից՝ առ ի զնա հալածել: Անդ եղին յայնժամ նաւակատիքն յԵրուսաղէմ, այլ աստ ցուցանէ զաւրութիւն բարի հովուին եւ գողին, եւ զանազանութիւն նոցա երեք եղանակաւ.

Առաջին՝ Վասն զանազան մտանելոյ ի հաւտն, որպէս ասէ. «Ամէն, ամէն ասեմ ձեզ, որ ոչ մտանէ ընդ դուռն ի գաւիթ [ոչխարացն], այլ ընդ այլ ելանէ, նա գող է եւ աւագակ, իսկ որ մտանէ ընդ դուռն, հովիւ է ոչխարաց» (Ժ. 1-2):

Մեկնութիւն. Արդ, ի կարճոյ սոյնպէս բացայայտի. դուռն զաւրէնսն ասէ, հովիւ՝ զքահանայսն եւ զփարիսեցիսն, ոչխար՝ զժողովուրդն, գաւիթ՝ զխորանն հին, որպէս պատուական է ներքին տաճարն քան զգաւիթն, սոյնպէս մերս եկեղեցի, քան զխորանն իւրայնէլացւոց:

Երկրորդ՝ Ձի ամենայն ոք նախ զգաւիթն կոխէ եւ ապա ի ներքս մտանէ, սոյնպէս առաջին է այն, քան զմերս, այլ ընդ այլ ելանէ: Քահանայքն եւ փարիսեցիքն ոչ պահեցին զաւրէնս. գող զփարիսեցիսն ասէ, զի կեղծաւորք էին, աւագակ՝ քահանայքն, որ յայտնապէս յանցանէին, իսկ հովիւ, որ մտանէ ընդ դուռն, Քրիստոս վասն իւր ասէ:

Եւ այլ կերպիւ մեկնեն վարդապետք. աստ անուամբ դրանն իմանի ուղիղ մուտ հովուութեան, իսկ այլ ընդ այլ ելանելն նշանակէ զթիւր մուտն ի հովուութիւն հոգւոց, եւ Քրիստոս ասէ յառաջիկայդ. «Ես եմ դուռն» (Ժ. 7), զայն ցուցանէ, թէ որ լինի հովիւ ի վերայ ոչխարաց, պարտ է, զի ի Քրիստոսէ ունիցի իշխանութիւն եւ զճշմարտութիւն Քրիստոսի եւ զսէրն առ Քրիստոս: Եւ զի հովիւ է Քրիստոս, զայս ճշմարտութիւնս եւ զիշխանութիւնս եւ զսէրս Քրիստոս զոյացութեամբ ունի, եւ այլք զերիսս զայս ունին հաղորդութեամբն ի Քրիստոս, եւ նոքա բարի հովիւք են, իսկ որք հաւատովն հերձուածող են եւ չունին ճշմարիտ իշխանութիւն եւ ոչ սիրեն զՔրիստոս, այլ զինքեանս, նոքա չար հովիւք են եւ չար որոմն սերմանեն եւ գողանան զմիտս եւ զհաւատս եւ սպանանեն զհոգիս ժողովրդեանն: Եւ թէ ոք ճշմարիտ հաւատացեալ է ի Քրիստոս եւ զճշմարիտ իշխանութիւն ընդ Քրիստոսի ոչ ունիցի, վարձկան ասի: Եւ այնպիսին գող ասի, զի ոչ խնդրէ զփրկութիւն ոչխարաց եւ ոչ զփառս Քրիստոսի, այլ զփառս անձին իւրոյ: Այլ առաւել գող եւ աւագակ ասի, որ առանց հաւատոյ եւ ուղիղ իշխանութեան զանձն հովիւ կացուցանէ բռնութեամբ, սա յատկաբար կորուսանէ զոչխարս եւ սպանանէ, իսկ վարձկանն չար աւրինակաւ միայն սպանանէ:

Վասն դրան

Դարձեալ՝ դուռն տասն յատկութիւն ունի. նախ՝ զի նովաւ մտանեմք եւ ելանեմք: Երկրորդ՝ զի առաջին է ի մուտն, երրորդ՝ զի ամենեցուն է մուտ, չորրորդ՝ բանայ եւ փակէ, հինգերորդ՝ զմտեալսն ի ներքս պահէ, վեցերորդ՝ ուղղութիւն է, եւթներորդ՝ նեղութիւն է, ութներորդ՝ խոնարհութիւն է, իններորդ՝ բարձրութիւն է, տասներորդ՝ նախ մի ոտամբ կոխեմք:

Եւ վեց են դրունք. նախ՝ Քրիստոս, որպէս ասէ. «Ես եմ դուն»։ Երկրորդ. աւրէնքն, որպէս ցուցաւ։ Երրորդ. Եկեղեցի Սուրբ՝ «Սիրէ Տէր զդունս Սիոնի» (Սաղմ. 22, 2), ասէ։ Չորրորդ. ծնունդն եւ մահն դունն է հանդերձեալ կենացն։ Հինգերորդ. դրունք են զգայութիւնքս հոգւոյն։ Վեցերորդ. դրունք են հաւատն եւ մկրտութիւն ի գործս բարեաց։

Գաւիթ չորս կերպիւ է. նախ՝ մարմնոյ չըջապատք։ Երկրորդ. հին ժողովարանն գաւիթ է նորս Եկեղեցւոյ։ Երրորդ. գաւիթ է ստորինս Եկեղեցի վերնոյն Երուսաղէմի, ըստ այնմ. «Ի գաւիթս Ասորոնոյ մերոյ ծաղկեցիցին» (Սաղմ. ՂԱ. 14)։ Չորրորդ. գաւիթ է կայանք հոգւոցն վերնոց փառաց երկնաւոր արքայութեան։ Յայս միտս ի կողմ հարաւոյ շինեմք զգաւիթս Եկեղեցւոյ, զի հոգիքն են ի լոյս հանգստեան եւ ի ջերմ սէրն Աստուծոյ։

Չորս են ոչխարք բանաւոր հաւտից. նախ՝ երկնաւոր բանակք։ Երկրորդ. մարդկային ազգ ըստ մոլորեալ ոչխարին։ Երրորդ. հրէիցն ժողովք յորդան ետ, որպէս խաշին ասէ։ Չորրորդ. քրիստոնէից ժողովք, ըստ այնմ. «Արածեա՛ զոչխարս Իմ» (Յովհ. ԻԱ. 16)։

Եւ դոնապանք չորք են. նախ՝ դոնապան կոչի հոգին Սուրբ։ Երկրորդ՝ Մովսէս եւ այլ մարգարէքն։ Երրորդ՝ հայրապետք եւ վարդապետք Եկեղեցւոյ։ Չորրորդ՝ միտք բանական, ըստ այնմ. «Դոնապանին պապուէր րացէ, զի արթուն լինիցի» (Մր. ԺԳ. 34)։

Այս ըստ մասին տեսութիւն։

Երկրորդ. Չանագանութիւն է բարի հովուին ի գործոյն՝ ուղիղ առաջնորդելով ոչխարացն եւ յարաւտս ածելով, որպէս ասէ.

Բան. «Նմա դոնապանն բանայ» (Ժ. 3)։

Մեկնութիւն. Նախ՝ մարմնապէս աւրինակն, զի դոնապանն հովուին բանայ եւ ընդդէմ գողիցն փակէ, եւ ոչխարքն զձայն հովուին ճանաչեն ի սովորութենէ, որպէս ասէ Եսայի. «Ծանեալ եզն գաւաղիչ իւր» (Ես. Ա. 3), եւ հովուին ճանաչէ զնոսա յանուանէ եւ առաջի նոցա երթայ, եւ այլն յայտնի է։ Դարձեալ՝ հոգեպէս ի Քրիստոս տեսանի, որպէս ասէ մեկնիչդ. դոնապանն Մովսէս է, զի ի ձեռն նորա տուան աւրէնք, եւ բանալն է, որ յաղագս Քրիստոսի մարգարէացաւ. «Մարգարէ յարուցէ ձեզ Տէր Ասորուս» (Կրն Բ. Ար. ԺԸ. 15), եւ թէ՛ «Տեսանիցէք զկեանս ձեր կախեալ»։ Այլ եւ զաւրհանութիւն Յակովբայ վասն Յուդայի. «Մի՛ պակասեցէ իշխան ի [Յուդայ եւ պնր յե-

րանաց նորա], մինչեւ եկեցէ [նա, որոյ իւրն է հանդերձեալքն]» (Ծննդ. ԽԹ. 10)։ Դարձեալ՝ դոնապանն զՅոհաննէս ասէ, եւ բանալ վկայութեամբն, որ յաղագս Քրիստոսի։

Բան. «Եւ ոչխարքն ձայնի նորա լսեն» (Ժ. 3)։

Մեկնութիւն. Որպէս առաքեալքն եւ հաւատացեալքն ի ժողովարանին։

Բան. «Կոչէ յանուանէ» (Ժ. 3)։

Մեկնութիւն. Նախ՝ զերկնաւորսն, որպէս ասէ Դաւիթ. «Չամենեսեան զնոսա յանուանէ կոչէ» (Սաղմ. ՃԽԶ. 4)։ Երկրորդ. զթիւ ընտրելոցն անուանք ձեր գրեալ են յերկինս։ Երրորդ. կոչեաց յանուանէ զառաքեալսն։ Չորրորդ. զամենայն հաւատացեալս յաւազանէն կոչէ։

Բան. «Չամենեսեան հանէ» (Ժ. 3)։

Մեկնութիւն. Նախ՝ ի հաւատս, երկրորդ՝ յարդարութիւնս, երրորդ՝ յԱւետարանս, չորրորդ՝ յերկինս. «Ուր ես եմ, անդ եւ պաշտուներայն [իմ եղիցի]» (ԺԲ. 26)։

Բան. «Առաջի նոցա երթայ» (Ժ. 4)։

Մեկնութիւն. Նախ՝ քարոզութեամբ, երկրորդ՝ վարուք, երրորդ՝ չարչարանաւք, չորրորդ՝ յարութեամբն եւ փառաւք։ Սոյնպէս պարտ է առնել բարի հովուաց եւ առաջնորդաց Եկեղեցւոյ՝ հանել զժողովուրդն ի խաւարէ մեղաց եւ անգիտութեանց եւ լինել առաջի նոցա բարի աւրինակաւ առաքինութեան վարուց։

Երրորդ. Չանագանութիւն ցուցանէ բարի հովուին եւ չար, որպէս ասէ.

Բան. «Եւ ոչխարքն զհեպ նորա երթան, զի ճանաչեն զձայն նորա» (Ժ. 4)։

Մեկնութիւն. Սոյնպէս ժողովուրդն զհետ բարի հովուին ընթանայ, որպէս զհետ Քրիստոսի բանիցն եւ վարուցն եւ այլ առաքինութեանց։ Իսկ չար հովուացն, որպէս ասէ.

Բան. «Չաւարի զհեպ ոչ երթիցեն, այլ փախիցեն ի նմանէ, զի ոչ ճանաչեն զձայն աւարաց» (Ժ. 5)։

Մեկնութիւն. Ի չորս բաժանեաց զհովիւս՝ զերկուսն բարի հովիւ. նախ՝ զՔրիստոս, երկրորդ՝ զճշմարիտ եւ զուղղափառ առաջնորդս Եկեղեցւոյ։ Եւ զերկուսն՝ չար. նախ՝ զփարիսեցիսն, երկրորդ՝

զհերձուածողս եւ զծոյլս, եւ աւտար զնոսա քարոզութեամբն եւ վարուքն: Եւ աւտար է նախ՝ որ յեկեղեցւոյ որոշեալ լինի: Երկրորդ. զի յայտնի մոլորեալ ի հերձուածս: Երրորդ. ի կարգէն թիւրեալ: Յայնպիսի աւտարացն պարտ է ամենեւին ի բաց փախչել:

Եւ գիտելի է, զի աստ անուամբ ոչխարաց նախ իմանին ամենեքեան, որք ունին շնորհս յԱստուծոյ, այսինքն՝ հաւատ եւ սէր յայնմ ժամանակի: Երկրորդ. իմանին միայն նախասահմանեալքն յԱստուծոյ ի փրկութիւն, յորում ժամանակս եւ իցեն: Եւ սոքա երկոքին ոչխարք ոչ լսեն զձայնն եւ ոչ հետեւին աւտարին, այլ միայն ճշմարիտ հովուին, զի նոքա, որք ունին զշնորհս, մնալով ի շնորհս, ոչ մեկնին ի ճշմարիտ հովուէն, այլ թէ թողուն զշնորհս, կարեն թողուլ եւ զճշմարիտ հովուէն: Եւ դարձեալ՝ նախասահմանեալն յԱստուծոյ ի փրկութիւն ոչ որոշին ի ճշմարիտ հովուէն, զի ընդ ժամանակի նախասահմանեցաւ հնազանդիլ Քրիստոսի: Եւ ասացեալ բանքս Քրիստոսի ծածուկ էր, զի առակաւ էր, որպէս ասէ.

Բան. «Չայս առակ ասաց նոցա Յիսուս» (Ժ. 6):

Մեկնութիւն. Այսինքն՝ փարիսեցւոցն: Առակ ասի, յորժամ բան ինչ վասն այլոյ բանի դնի, կամ յորժամ իր ինչ նշանակէ եւ նովաւ այլ ինչ իր ցուցանի: Եւ թէ վասն է՞ր առակաւ խաւսէր Քրիստոս, ասացաւ հատորն համարն: Եւ զի նոքա ոչ ծանեան զառակն Քրիստոսի, վասն այն պարտ էր մեկնել զնա, որպէս զկնի դնէ.

Բան. «Ասէ ցնոսա Յիսուս» (Ժ. 7):

Մեկնութիւն. Եւ զի առակն Քրիստոսի երկու մասն ունէր՝ մին, զոր ընդ այլ մտանէ, զող է եւ աւագակ, եւ զայս նախ մեկնէ: Երկրորդ. զի որ մտանէ ընդ դուռն, հովիւ է ճշմարիտ: Եւ զայս երկրորդ մեկնէ: Անդ. «Ես եմ հովիւն քաջ», իսկ աստ վասն առաջնոյն ասէ.

Բան. «Ամէն, ամէն ասեմ ձեզ, [զի] ես եմ դուռն ոչխարաց» (Ժ. 7):

Մեկնութիւն. Քրիստոս դուռն ասի, զի նովաւ մարդիկ առ Աստուած մտանեն, եւ զի առաջին մասն առակին ոչ միայն զդուռն յիշէ, այլ եւ զգալն, վասն այն զկնի մեկնէ զգալն.

Բան. «Ամենեքեան, որ յառաջ քան զիս եկին, զողք էին եւ աւագակք» (Ժ. 8):

Մեկնութիւն. Զայս ոչ է պարտ իմանալ վասն մարգարէիցն, որ յԱստուծոյ առաքեցան, այլ նախ վասն նոցա, որք եկին առանց հաւատոցն Քրիստոսի, զի ի սկզբանէ աշխարհի, որք փրկեցան, հաւատովն Քրիստոսի փրկեցան, թէպէտ հաւատ նոցա ծածուկ էր եւ մերս յայտնի, այլ որք ոչ ունէին զհաւատն Քրիստոսի, ոչ մտին ընդ դուռնս այս, զողք էին եւ աւագակք:

Երկրորդ. իմանի բանս վասն Յուդայի եւ Թեւդայի գալիլեացւոյ, որ ի Գիրս Գործոցն է գրեալ (հմմտ. Գործք Ե. 34-42), որք յանձնէ եկին եւ ոչ առաքմամբն Աստուծոյ, որպէս ասէ Յովսէպոս. «Թեւդաս կախարդ ոմն էր, որ խաբեաց զբազումս ի ժողովրդենէն Իսրայէլի եւ տարաւ զնոսա մինչեւ Յորդանան զեա՝ խոստանալով նոցա բաժանել զջուրն եւ անցուցանել անթաց ոտիւք, որպէս եւ հարքն նոցա յառաջագոյն անցին», իսկ Յուդաս գալիլեացի ի ժամանակս ծննդեանն Քրիստոսի արգելոյր զժողովուրդն հրէից ի հնազանդութենէ կայսեր եւ ի հարկ տալոյ, եւ բազումք հետեւեցան նմա, որք ոչ էին ճշմարիտ ոչխարք: Նոքա էին աւտարք եւ զողք, զի Թեւդասն կախարդութեամբ պատրէր զժողովուրդն, եւ Յուդայ գալիլեացի յայտնի իբրեւ զաւագակ, ասէր զինքն թագաւոր Իսրայէլի:

Երրորդ. իմանի բանս վասն սաղուկեցւոցն, որ աւտարացան ի բանից եւ ի կամաց եւ ի գործոց մարգարէից, եւ ոչ լուան նոցա ոչխարքն, որպէս լուսաւորեալն ի կուրութենէ, որպէս յայտ է ի մեկնիչդ:

Եւ դուռն կոչի

Բան. «Ես եմ դուռն» (Ժ. 9):

Մեկնութիւն. Որպէս այլուր ճանապարհ կոչի եւ որթ անուանեաց զինքն եւ այժմ դուռն կոչէ: Եւ այս է առաջին, որ ցուցանէ, թէ Աստուած է Քրիստոս հովութեամբ եւ մեծութեամբ հաւասար է Աստուծոյ, որպէս ասէ՝ ես եմ դուռն եւ մուծանող հաւատացելոց:

Եւ ի վերայ այնմ բանի լինի վեց իմն հարց.

Առաջին. Վասն է՞ր Քրիստոս դուռն կոչի:

Նախ՝ զի Քրիստոսիւ մտանեն մարդիկ առ Աստուած, ըստ այնմ. «Ոչ որ գայ առ Նայր, եթէ ոչ ինե» (հմմտ. Ժ. 9): Երկրորդ. զի ոմանց փակէ եւ ոմանց բանայ, այսինքն՝ անհաւատից եւ հաւատացելոց, որպէս յիմար կուսից եւ իմաստնոց: Երրորդ. զի պահէ զորս ի տանն են,

եւ Քրիստոս է պահապան քրիստոնէից: Չորրորդ. զի մուտ եւ ելն նովաւ լինի, որպէս ասէ. «Ընդ իս մտցէ եւ ելցէ» (հմմտ ժ. 9), եւ այլ յատկութիւն ասացաւ ի վերոյ:

Երկրորդ հարց. Վասն է՞ր ասէ յաւելին՝ դուռն:

Պատասխան. նախ՝ զի յատկացի ի հասարակ դրանց, երկրորդ՝ զի կենաց է դուռն, երրորդ՝ զի երկնից, չորրորդ՝ առ Հայր մտից:

Երրորդ հարց. Վասն է՞ր յոմանս Եկեղեցիս միափեղկ է դուռն եւ յոմանս՝ երկփեղկ:

Պատասխան. Երկփեղին խորհրդաւորք են. նախ՝ զի ետես Յոհաննէս ի տեսիլան զդուռն վերին քաղաքին յողջոց մարգարտաց, իսկ Սողոմոն արար զդուռն տաճարին երկքացիկս: Դարձեալ՝ միափեղկեանն զմիութիւն Բանին մարդացելոյ նշանակէ, իսկ երկփեղկն զհոգի եւ զմարմինն Քրիստոսի:

Եւ սուտ են, որ ասեն զԱստուածութիւն եւ զմարդկութիւն նշանակէ. նախ՝ զի Աստուածութիւն եւ մարդկութիւն ոչ բաժանեցան, այլ հոգի եւ մարմինն: Երկրորդ. զի Սողոմոն արար զգրուսն երկքացիկս ի գիտց եւ պատեաց ոսկով, որ ցուցանէր փայտն զանապական մարմին եւ հոգին, եւ ոսկին՝ զԱստուածութիւն միաւորեալ: Երրորդ. զի ողջ մարգարիտն նշանակէ զԲանն միացեալ ի մարմնի: Չորրորդ. ասէ աստ. «Ես եմ դուռն»՝ միաւոր, եւ ոչ՝ դրուսք՝ բազմաւոր: Եւ զի մուտ դրանն, որ է բացուածք ընդ որ մտանեն, որ ասի դուռն, եւ այս միաւոր է եւ ոչ բազմաւոր, զի ընդ տախտակն թէ մի, թէ բազում ոչ ոք մտանէ, այլ բացուածն, որ մի է, որով զինքն նշանակեաց Տէրն:

Չորրորդ հարց. Զի՞նչ է. «Ընդ իս մտցէ եւ ելցէ» (ժ. 9):

Պատասխան. նախ՝ հաւատովն մտցէ եւ առ իս ելցէ: Երկրորդ. մտցէ առ իս եւ ելցէ յերկինս՝ առ Հայր: Երրորդ. մտցէ յԵկեղեցիս եւ ելցէ յերկինս: Չորրորդ. մտցէ ի շնորհս եւ ելցէ ի փառս, այսինքն՝ Քրիստոսի մտանեմք ի հաւատս եւ յաշխարհիս թշուառութենէն ելանեմք ի փառս:

Հինգերորդ հարց. Զի՞նչ է ճարակն:

Պատասխան. Չորս ինչ. նախ՝ դաւար արաւտն յաւիտենական կենդանութեան: Երկրորդ. աւետարանական վարդապետութիւն Քրիստոսի: Երրորդ. մարմին եւ արիւնն փրկական: Չորրորդ. ի սեղան Հաւրն բազմեցուցանել եւ անցեալ պաշտել, այսինքն՝ յիմաս-

տութեանց եւ ի տեսութեանց փառաց Աստուածութեանս կերակրեցից զնա:

Վեցերորդ հարց. Զի՞նչ է ճարակք բազմաւորապէս կոչէ:

Պատասխան. Վասն բազում երանութեանց մարդկային մասանց, զի հինգ պատճառաւ ասէ. «Մտցէ եւ ելցէ», նախ՝ զի այս է սահման դրան, զի ել եւ մուտ ընդ նոյն արասցեն: Երկրորդ. զի ոչխարքն արտաքս ճարակին յանդաստանս եւ ձմեռն ի տան: Երրորդ. ցուցանէ խորհրդաբար, զի ընտրեալքն ճարակեն մտածութեամբ մտանելով առ Աստուած եւ արտաքս հային՝ խոկալով ի գործս Նորա: Չորրորդ. ցուցանէ, թէ միտք մեր կերակրին հայելով ի հոգեւոր եւ իմացական իրս իբրեւ ի ներս եւ հայելով ի զգալի իրս իբրեւ արտաքս: Հինգերորդ. ցուցանէ, թէ երանեալքն կերակրին ի միտս՝ հայելով զԱստուածութիւն Քրիստոսի եւ արտաքս տեսանելով զգալապէս զմիաւորեալ մարդկութիւն Քրիստոսի: Եւ վասն այսմ պատճառի ճարակք ասէ, որ է արաւտք բազմաւորական:

Յորժամ եցոյց զինքն դուռն գոյ, զկնի ցուցանէ զմտեալսն, որք ոչ Քրիստոսի՝ գողս գոյ, որք ոչ եկին ի փրկութիւն ժողովրդեան, այլ ի մահ:

Բան. «Գող ոչ գայ, եթէ ոչ զի գողացի եւ սպանցէ եւ կորուսցէ» (ժ. 10):

Մեկնութիւն. Երկու բացասութիւն ի մի ստորաստութեան տեղի դնէ, զի այս է ըստ մարմնոյ գողի խորհուրդն եւ կամքն եւ գործ, որ ասաց:

Եւ հոգեպէս գող հինգ կերպիւ ասեն. նախ՝ փարիսեցիքն եւ սադուկեցիքն, եւ Յուդա եւ Թեւեղաս, որ յառաջ քան զՔրիստոս եկին եւ ի չարիս առաջնորդէին: Երկրորդ. յիս Քրիստոսի հերձուածողք եւ չար առաջնորդք Եկեղեցւոյ, որ մոլորութիւն են ժողովրդեանն եւ կորուստ: Երրորդ. գող ասի նոյն ինքն սատանայ, որ խաբելով մտանէ ի մարդ: Չորրորդ. գող ասի մեղք, որ կորուսիչ է հոգւոց: Եւ չորքս այսոքիկ չար են յայտնապէս, իսկ հինգերորդ՝ գող ասի մահն, ըստ այնմ. «Ո՛չ զիտէք յորում աւուր գողն ձեր գայ» (հմմտ Ղուկ. ԺԲ. 39): Եւ սա միջակ է գող, զի բարեացն բարի հանդիպի եւ չարեացն՝ չար:

Բան. «Ես եկի, զի զկեանս ունիցին, եւ առաւել եւս ունիցին» (Ժ. 10):

Մեկնութիւն. Գալն ի յերկնից զմարդեղութիւն ասէ, եւ ընդդէմ չար գողոցն զկեանս տայ, զի ունիցին, եւ առաւել եւս ունիցին:

Վեց է իմացումն. նախ՝ շնորհքն, որ աստ ունիմք, կեանք է հոգւոյ, որպէս ասէ Պաւղոս ի Հռոմայեցիսն. «Ճնորհքն Աստուծոյ կեանք են յաիւրենական» (Կրեն Կոմ. 2. 23), վասն որոյ ասէ. զկեանս ունիցին, եւ առաւել եւս ընդունիցին զկատարումն շնորհաց յարքայութեան երկնից: Երկրորդ. առաւել կեանս զխորհուրդ նոր աւրինացս ասէ, զի թէպէտ պատարագ հնոյն շնորհս տայր, ոչ յինքեանց, այլ միայն վասն բարութեան ընդունողին, նոյնպէս եւ թլփատութիւն ի սկզբնական մեղացն մաքրէր, այլ ոչ այնպէս, որպէս մկրտութիւն եւ Պատարագն Սուրբ. Երրորդ. առաւել կեանս գյաւտենականն ասէ ի վերայ ժամանակեայս, որպէս ասէ մեկնիչդ: Չորրորդ. որպէս մեղքն մահ է եւ առաւել տանջանք, նոյնպէս արդարութիւն կեանք է, եւ առաւել կեանք՝ ազատն ի տանջանաց: Հինգերորդ. աստ յուսով եւ զաւրութեամբ կենդանացաք եւ առաւել անդ արդեամբ եւ ներգործութեամբ: Վեցերորդ. աստ հոգւով միայն կենդանացոյց եւ անդ հոգւով եւ մարմնով յարուցանէ, զայն առեալ կեանք ասէ:

Յորժամ եցոյց Քրիստոս զառաջին մասն առակին, զի ընդ այլ մտեալքն գողք են եւ աւազակ, զկնի ցուցանէ զմիւս մասն առակին, որ է բարի հովիւ մտեալ ընդ դուռն:

Թէ հովիւ է Քրիստոս

Բան. «Ես եմ հովիւն քաջ» (Ժ. 11):

Մեկնութիւն. Այսինքն՝ բարի: Եւ այս է երկրորդ բանն, որ ցուցանէ, թէ Աստուած է Քրիստոս եւ էութեամբ եւ մեծութեամբ հաւասար է Աստուծոյ, որ զամենայն հովուէ բարի եւ քաջ հովուութեամբ, որպէս ասէ. «Ես եմ հովիւն քաջ»: Եւ մի երկմտեսցիս վասն նուաստ անուանս, զի ոչ միայն հովիւ ասէ, այլեւ բարի, որ Աստուծոյ է յատուկ, ըստ այնմ. «Չիք որ բարի, բայց մի Աստուած» (Ղուկ. ԺԼ. 19): Նաեւ զՀայր մարգարէքն հովիւ կոչէին, ըստ այնմ. «Ո՞ հովուեսդ Իսրայէլի, նայեաց եւ փրկեաց զմեզ» (Կրեն Սաղմ. ՆԹ. 2-4): Դարձեալ՝ որպէս Քրիստոս զինքն լոյս անուանէ վասն խաւարելոյն, եւ կեանք՝ վասն մահացելոյն, եւ բժիշկ հիւանդաց, սոյնպէս եւ հովիւ կոչեաց վասն

ցրուելոյն, փոխարկաբար շփոթմամբ միաւորելն է, որպէս ալիւր եւ ջուր, եւ փոխատրապէս անշփոթ միաւորութիւն, որպէս հուր եւ երկաթ եւ որպէս լոյս ընդ աւդ:

Վասն յապկութեան հովուին

Եւ վեց յատկութիւն հովուին, որ աստ ասաց. նախ՝ զի ընդ դուռն մտանէ ի փարախն: Երկրորդ. զի դռնապանն բանայ: Երրորդ. զի ոչխարքն ձայնի նորա լսեն: Չորրորդ. զիւրսն կոչէ յանուանէ: Հինգերորդ. զի հանէ զիւրսն ամենայն: Վեցերորդ. զի առաջի նոցա երթայ:

Դարձեալ ասեմք տասն յատկութիւն հովուին, որպէս ասէ Դաւիթ. «Տէր հովուեսցէ զիս» (Սաղմ. ԻԲ. 2), նախ. «Ի վայրի դալարոջ բնակեցոյց» (Սաղմ. ԻԲ. 2), այսինքն՝ ի վայրենացեալ զիտութիւնս Սուրբ Գրոց: Երկրորդ. «Առ ջուրս հանգստեան սնոյց» (Սաղմ. ԻԲ. 2), այսինքն՝ մկրտութեամբ սուրբ աւազանին: Երրորդ. առաջի հաւտին ընթանայ, ըստ այնմ. «Երթամ եւ պարարաստեմ ձեզ փղի» (Յովի. ԺԴ. 2): Չորրորդ. ընդ թշնամիսն պատերազմի, որ է սատանայ եւ մահ եւ մեղք: Հինգերորդ. զմոլորեալսն դարձուցանէ ըստ առակի անառակին (հմմտ Ղուկ. ԺԵ. 11-32): Վեցերորդ. զկորուսեալն գտանէ, որպէս զդրամն (հմմտ Ղուկ. ԺԵ. 8-9): Եւթներորդ. զբեկեալն պատէ, որպէս զկիսամահ վիրաւորեալն (հմմտ Ղուկ. Ժ. 29-37): Ութերորդ. զգաւրավարսն պահէ, որպէս՝ «Ընդ ձեզ եմ զամենայն ատուրս» (Կրեն Մտ. ԻԸ. 20): Իններորդ. ի վերջ աւուրն ի փարախն ժողովէ, այսինքն՝ ի կատարածի երկնաւոր փարախն: Տասներորդ. հովուական բանիւք մխիթարէ, այսինքն՝ «Ի սեղան Նարն բազմեցուցանէ» (հմմտ. Մտ. ԻԵ. 34),- ասէ:

Իսկ յաւրիւն ասելն՝ հովիւն, եւ ոչ սոսկ՝ հովիւ, չորս ինչ նշանակէ. նախ՝ ցուցումն է եզական ի հասարակ հովուութեանց: Երկրորդ. նշանակ է ծանաւթութեան յառաջին ժամանակաց: Երրորդ. որոշող է յատկութեան եւ բարի հովուին եւ չարեաց: Չորրորդ. ընդդէմ է եւ ներհակ հովուին մահացու, ըստ որում. «Մահ հովուեսցէ զնոսա» (Սաղմ. ԽԸ. 15), եւ աստ կենաց է հովիւ:

Բան. «Հովիւ քաջ դնէ զանձն ի վերայ ոչխարաց» (Ժ. 11):

Մեկնութիւն. Չորս է իմացումն. նախ՝ զի ազնիւն վասն անարգին ոչ մեռանի, այլ անարգն վասն ազնուին մեռանիցի, վասն

որոյ հովիւն վասն ոչխարին ոչ մեռանի, թէպէտ աշխատի եւ պահէ, այլ ոչխարն վասն մարդոյն մեռանիցի, իսկ հոգի մարդոյն ազնիւ է քան զմարմինն, վասն որոյ հովիւն հոգւոց վայելչաբար դնէ զմարմնոյ կենդանութիւն վասն փրկութեան հոգւոց հաւտին: Երկրորդ. ընդդէմ է չար հովուացն, որ սպանանէ զոչխարս, այլ Նա կեցուցանէ: Երրորդ. զի վասն փրկութեան մարդկան մեռանի, այլ ինքն ոչ է պարտական մահու, զի ոչ արար մեղս: Չորրորդ. զի կամաւ եւ գիտութեամբ մեռանի, ասէ զայս յառաջագոյն:

Ասաց զգանազանութիւն բարի եւ չար հովուաց, այժմ ասէ զանազանութիւն վարձկանաց:

Բան. «Իսկ վարձկանն, որ ոչ է հովիւ» (Ժ. 12):

Մեկնութիւն. Նախ՝ զիտելի է, զի վարձկանն կրկին է, այսինքն՝ բարի եւ չար: Բարի վարձկան է, որ վասն հոգւոյ եւ յաւիտենից կենացն աշխատի, որպէս մարգարէքն եւ արդարքն սուրբ: Եւ չար վարձկան է, որ վասն մարմնոյ եւ ժամանակիս լինի, ոչ մարմնոյ վարձկանաց ասեմ, այլ հոգւոյ, որպէս եպիսկոպոսք, վարդապետք, որ վասն մարմնոյ շահի եւ փառաց աշխարհի լինին, նոյնպէս եւ կրկին են ծառայական երկիւղն. բարի է, որ վասն հոգւոյն տանջանաց երկնչի, եւ չար, որ վասն մարմնոյն:

«Իսկ վարձկանն, որ ոչ է հովիւ», զմարգարէսն ասէ, եւ զարդարսն, որ փոխարէն աշխատութեան զերանութիւն ընկալան:

Չանազանութիւն մարգարէից եւ Տեառն

Եւ զիտելի է, զի մարգարէքն եւ արդարք չորս իրաւք հաւասարեն ընդ Տեառն եւ չորս իրաւք պակաս:

Եւ հաւասար են. նախ՝ զի ի կոոցն դարձուցանէին զժողովուրդն: Երկրորդ. ի մեղաց հանէին: Երրորդ. զհաւատն Քրիստոսի ուսուցանէին: Չորրորդ. վասն սիրոյն Աստուծոյ մեռանէին եւ սրբութիւն գործէին:

Չայտոսիկ եւ Տէրն արար, իսկ պակաս եւ տկարք եղեն. նախ՝ զի վասն ոչխարացն ոչ կարացին մեռանել: Երկրորդ. զանէծս Ադամայ ոչ բարձին: Երրորդ. ի մահու հոգւոյ եւ մարմնոյ ոչ ազատեցին: Չորրորդ. զփառս եւ զերանութիւն մարդկան ոչ տուին: Եւ զայտոսիկ հովիւն քաջ կատարեաց:

Պարձեալ՝ վարձկան վասն վարձուն ասի, եւ այն է, որ վերակացու լինի վասն աւգտի ժամանակաւորացս, որ վարձ կոչի, որպէս ասէ յառակս անառակին. «Ի տան հաւր իմոյ վարձկանք բազում են» (Կեն Ղուկ. ԺԵ. 17), իսկ երկնաւոր փառքն ոչ ասի վարձ, այլ ի հասարակ սովորութենէ վասն աշխատանաց հատուցմանն վարձ ասի, ըստ այնմ. «Վարձք ձեր բազում են յերկինս» (Մարթ. Ե. 12), իսկ երկնային փառքն յատկաբար ժառանգութիւն կոչի, որ հատուցանի որդւոց, իսկ վարձկանն, որ հայի յերկրաւոր իրս, ոչ է ճշմարիտ հովիւ, որպէս ասէ.

Բան. «Որոյ ոչ իւր են ոչխարքն» (Ժ. 12):

Մեկնութիւն. Աստ անուամբ հովուին իմանի տէր ոչխարացն, որ պահէ զոչխարն իբրեւ զիւր, եւ վարձկանն վասն վարձուն պահէ եւ ոչ վասն ոչխարաց, վասն որոյ ի նեղութեան ժամանակի հեռանայ յոչխարաց, որպէս ասէ.

Թէ գայլ է սարանայ

Բան. «Իբրեւ փեսանէ զգայլն, զի գայ» (Ժ. 12):

Մեկնութիւն. Գայլ կոչի սատանայ վասն տասն պատճառի: Պարձեալ զիտելի է, զի երեքն են գայլք եկեղեցւոյ. նախ՝ սատանայ, երկրորդ՝ հերձուածողք, երրորդ՝ չար իշխանք, որ բռնութեամբ ածեն ի մեղս: Եւ յորժամ ի գանազան չարիս կործանին ոչխարքն, զիտասցեն, եթէ եկեալ է սատանայ, զոր պարտ է աղաւթիւք ընդդէմ կալ սատանայի եւ ուղիղ վարդապետութեամբ հերձուածողաց ընդգիմանալ, եւ բռնաւոր իշխանին բանադրական բանիւ կամ մխիթարելով զոչխարսն: Այլ այսու գանազանի վարձկանն ի գայլոցն, զի թէպէտ վարձկանն ոչ խնդրէ զփրկութիւն բանական ոչխարաց, սակայն ոչ հալածէ զնոսա, այլ պահէ վասն ընչից շահելոյ ի նմանէ, եւ յորժամ ոչ շահի, փախչի, որպէս ասէ.

Բան. «Թողու զոչխարսն եւ փախչի» (Ժ. 12):

Մեկնութիւն. Կրկին է փախչելն, կամ տեղուջէ ի տեղ ընթանայ, կամ զի ոչ ինչ աւգնէ ոչխարացն:

Բան. «Եւ գայլն յափշտակէ զնոսա եւ ցրուէ» (Ժ. 12):

Մեկնութիւն. Յայնժամ յափշտակին, յորժամ ի մեղս ածին, եւ յայնժամ ցրուին, յորժամ ի հաւատոցն բաժանին, ապա ասէ զպատճառ փախչելոյն:

Բան. «Քանզի վարձկան է եւ չէ փոյթ նմա վասն ոչխարացն» (Ժ. 13):

Մեկնութիւն. Այսինքն՝ միայն հպի ի ժամանակաւոր իրս եւ ոչ սիրէ վասն ինքեան, այլ վասն շահին, եւ յորժամ շահն պակասի, թողուն եւ փախչին:

Վասն ճանաչմանն

Յորժամ ասաց վասն բարի հովուաց եւ չարաց եւ վարձկանաց, այժմ ասէ զանազանութիւն ոչխարաց:

Եւ զայս կրկին նշանաւ. նախ՝ վասն անդրադարձութեան ճանաչման հովուին եւ ոչխարաց, որպէս աստ ասէ. «Ճանաչեմ զիմսն եւ ճամաչիմ յիմոցն» (Ժ. 14): Երկրորդ. վասն սիրոյ հովուին, որ ունի առ ոչխարս, անդ. «Եւ զանձն իմ դնեմ ի վերայ ոչխարաց» (Յովհ. Ժ. 14):

Եւ զառաջինն ասէ.

Բան. «Ես եմ հովուին քաջ. եւ ճանաչեմ զիմսն եւ ճամաչիմ յիմոցն» (Ժ. 14):

Մեկնութիւն. Որպէս մարմնաւոր հովուին ճանաչէ զոչխարս իւր զրոշմամբ եւ կերպիւն եւ խնամելովն, նոյնպէս եւ ոչխարն զհովուին ճանաչէ, միշտ ի նա հայելով եւ ձայնիւն եւ տածելովն, այսպէս եւ ճշմարիտ հովուին Քրիստոս ճանաչէ զհաւատացեալս հաւատով եւ մկրտութեամբն եւ բարի գործով եւ Աւետարանին շնորհաւք:

Դարձեալ՝ ճանաչումն Աստուծոյ կրկին է. նախ՝ տեսական ճանաչումն, եւ այսու Աստուած զամենայն զիտէ զբարի եւ զչար, որպէս ասէ Պաւղոս. «Ամենայն ինչ մերկապարանոց կայ առաջի [աչաց] նորա» (Եբ. Դ. 13): Երկրորդ. ասի ճանաչումն Աստուծոյ հաճոյական սիրով եւ հոգացողութեամբ, եւ Քրիստոս այս կրկին կերպիւն ճանաչէ զհաւատացեալս իւր: Դարձեալ՝ ճանաչէ Աստուած զեղեալսն եւ զլինելոցն եւ զձածուկս սրտին: Եւ սոյնպէս ճանաչէ Քրիստոս, զոր ոչ ճանաչէ մարդ: Դարձեալ՝ որպէս մեկ-

նիչդ ասէ՝ անդ ճանաչէ Քրիստոս, զի հատուցանէ բազում վարձս եւ յաճախ պարգեւս եւ փառս անկողոպտելիս:

Եւ զայս չորս մտաւք իմացիս. նախ՝ առ որդիսն եւ վարձկանսն եւ ծառայան է: Երկրորդ. ի հոգի, ի մարմին եւ ի միտս: Երրորդ. վասն հաւատոյ եւ յուսոյ եւ սիրոյ: Չորրորդ՝ հարիւրաւոր, վաթսունաւոր եւ երեսնաւոր:

Բան. «Որպէս գիտէ զիս Նայր, գիտեմ եւ ես զՆայր» (Ժ. 15):

Մեկնութիւն. Նախ՝ զի գիտութեամբն Հաւր հաւասար է, ապա եւ էութեամբն ընդ Հաւր հաւասար Աստուած է, եւ զայս մի իմանալ բաժանմամբ, այլ միութեամբ, զի որպէս էութեամբ միացեալ է Բանն Աստուած ի մարդկութիւն իւր եւ մի է բնութեամբ եւ մի է անձամբ, սոյնպէս մի է եւ գիտութեամբ, մի է եւ կամաւք, եւ որպէս մարդկայինս ընդ Բանն Աստուած միաւորեալ մի է անբաժանելի, սոյնպէս եղական գիտութիւն ընդ անեղ գիտութեան է միացեալ եւ ստեղծական կամք ընդ անստեղծ կամացն է միաւորեալ, զի յետ անձառ միաւորութեան Բանին եւ մարմնոյն, այլ ոչ ունի երկուութիւն եւ ոչ բաժանումն, եւ որ բաժանէ ի Քրիստոս իր ինչ ի բնաւորական գոյացութեան, բաժանեալ լիցի ինքն եւ որոշեալ ի շնորհաց միութենէն Քրիստոսի եւ ի փառաց նորին զրկեսցի:

Յետ այսաւրիկ դնէ զերկրորդ նշանն, որ է սէր ճշմարիտ հովուին առ հաւատացեալս:

Բան. «Եւ զանձն իմ դնեմ ի վերայ ոչխարաց» (Ժ. 15):

Մեկնութիւն. Այն է դնել զանձն, զի Քրիստոս կամաւորապէս մեռաւ վասն մարդկան հաւատացելոց եւ հոգին բաժանեցաւ ի մարմնոյն, այլ հոգին եւ մարմինն միշտ միաւորեալ մնացին առ Աստուածութիւն, զի անձն զհոգին ասէ, որ մատոյց Հաւր Աստուծոյ, որպէս ասէր. «Հայր, ի ձեռս քո աւանդեմ զհոգի իմ» (Ղուկ. ԻԳ. 46): Եւ զի կարծէին հրէայքն, թէ միայն նոքա էին ոչխարք եւ միայն վասն նոցա մեռանելոց էր, վասն որոյ զայս կարծիքս ի բաց բառայ:

Բան. «Նա եւ այլ եւս ոչխարք են իմ» (Ժ. 16):

Մեկնութիւն. Վասն հեթանոսաց ասէ, որ չէին ի գաւթէ եւ ի ժողովարանէ հրէիցն:

Իսկ ասելն՝ նա, երեք ինչ ցուցանէ. նախ՝ բառ է նախդիր, երկրորդ՝ դերանուն է, երրորդ՝ բացասական է, որպէս ասել, թէ՛ ոչ, որպէս եւ Դաւիթ ասէ. «Նա՛ երանի ժողովրդեանն, որոյ Տէր Աստուած աւգնական է նմա» (Կն՝ Սաղմ. ՃնԳ. 15), զի բացասելով զկարծիս հրէիցն ի բաց բառնայ եւ դերանուն զդէմս հեթանոսաց ասէ, եւ նախդիրն սկիզբն է բանի:

Եւ աստ լինի չորս հարց.

Առաջին. թէ որպէ՞ս էին հեթանոսք ոչխարք նմա, զի դեռ չէին հաւատացեալք:

Պատասխան. Նախ՝ զի թէպէտ հնազանդութեամբ չէին նմա, այլ նախասահմանութեամբ նմա էին: Երկրորդ. թէպէտ հաւատով չէին նմա, այլ արարչութեամբ նմա էին:

Երկրորդ հարց. Վասն է՞ր ասէ. «[Եւ զայնս եւս] պարտ է ինձ ածել այսր» (Ժ. 16):

Պատասխան. Զի քան զհրէայս նոքա պարտականք էին վասն չորից. նախ՝ վասն բազմութեան ազգացն: Երկրորդ. զի զիւրահաւանք էին: Երրորդ. զի զճշմարտութիւն ստացան եւ ոչ՝ զաւրինակն: Չորրորդ. զի կատարեալք եւ հաստատուն մնացին ի հաւատս: Եւ հրէայքն ընդդէմ այսմ սակաւք էին, եւ անհաւանք, եւ անկատարք, եւ փոփոխեալք ի հաւատոցն:

Երրորդ հարց. Վասն է՞ր ասէ. «Չայնի իմում լուիցեն» (Ժ. 16):

Պատասխան. Զի թէպէտ առաքեալքն զհեթանոսս ի հաւատս ածին, այլ գործակցութեամբն Քրիստոսի էր, որպէս գրէ Մարկոս ի վերջքն. «Իսկ նոքա ելեալ քարոզէին ընդ ամենայն տեղիս Տիառն գործակցութեամբ» (Մր. ԺԶ. 20):

Եւ ձայնի, ասէ, լսեն վասն հնգից. նախ՝ զի միջնորդաւք խաւսեցաւ: Երկրորդ. զի հեռաւորք էին: Երրորդ. զի բազումք էին: Չորրորդ. զի յայտնի քարոզեցաւ նոցա: Հինգերորդ. զի զիւրաւ լսեցին, վասն այն ձայն ասէ:

Չորրորդ հարց. Վասն է՞ր ասէ. «Եղիցին մի՛ հաւար եւ մի՛ հովիւ» (Ժ. 16):

Պատասխան. Նախ՝ զի սատանայ ցրուեաց զազգս մարդկան ի պէսպէս կուռս եւ ի գանազան մեղս, Քրիստոս ընդդէմ նմին ժողովեաց ի մի հաւատս եւ ի մի հովիւ: Երկրորդ. զի ինքն Քրիստոս ի բաժանմանէ ի միութիւն եկն, վասն այն եւ զբաժանեալ ազգս ի

միութիւն ածէ, այսինքն մի՛ հաւատովն, եւ մի՛ մկրտութեամբն, եւ մի՛ հաղորդութեամբն, եւ մի՛ յուսովն, եւ սիրովն եւ այլն:

Միութիւն է ի մէջ քրիստոնէից, եւ թէ ոք ասէ՝ պարտ է մի՛ գլուխ լինել, որպէս պապն Հռովմայ, ասեմք, թէ՛ սուտ են ամենեւիմք վասն չորս պատճառի. նախ՝ զի Քրիստոս առաքելոցն հաւասարապատիւ ետ զերկոտասան աթոռս դատողութեան: Երկրորդ. զի յորժամ համբարձաւ, եղ զձեռս ի վերայ առաքելոցն եւ արար զնոսա կաթուղիկոսունս: Երրորդ. զի իւրաքանչիւր յազգս առաքեալքն ձեռնադրեցին եպիսկոպոսունս: Չորրորդ. զի ի ժողովն Նիկիոյ ի չորիս բաժանեցին զչորս կողմս աշխարհիս ըստ չորից աւետարանչացն, եւ զԵրուսաղէմ, եւ զԿիպրոս, եւ զՀայք ինքնագլուխ սահմանեցին:

Եւ թէ ոք ասիցէ, եթէ ընդէ՞ր Հայոց ազգիս երեք կաթողիկոս է, զի անպատշաճ է միոյ մարմնոյ երկու կամ երեք գլուխ լինել, կամ միոյ հարսին երեք փեսայ: Ասեմք առ այս, եթէ ճշմարիտ մի՛ է կաթողիկոս եւ մի՛ գլուխ ազգիս Հայոց, որ ի սրբոյն Գրիգորէ յաջորդեցին մինչեւ ցայժմ, իսկ աղուանիցն ոչ է Հայոց, այլ աղուանից կաթողիկոս եւ ի Լուսաւորչէն մերմէ կարգեալ զսուրբն Գրիգորիս թոռն իւր: Իսկ Աղթամարայն՝ թերակատար եւ սուտ անուն, ո՛չ է կաթողիկոս, այլ արքեպիսկոպոս, եւ այժմ ապստամբեալ ո՛չ աւրինաւք, այլ բռնութեամբ կոչեն զինքեանս կաթողիկոս, միայն անուամբ եւ ոչ իրաւք ստացեալ սուտ անուն, որպէս եղջերուաքաղն եւ յարալէզն:

Այսքան առ այս:

Յետ այսորիկ զկատարեալ սէրն ցուցանէ, որ ունի Քրիստոս առ ոչխարս:

Բան. «Վասն այսորիկ սիրէ զիս Հայր իմ, զի ես դնեմ զանձն իմ» (Ժ. 17):

Մեկնութիւն. Չորս է իմացումն. նախ՝ վասն որոյ սիրէ զիս Հայր, այսինքն՝ վասն սիրոյն Հաւր առ իս զիս առաքեաց ի փրկութիւն ոչխարաց: Երկրորդ. վասն այն սիրէ զիս Հայր, այսինքն՝ վասն հնազանդութեանս իմոյ առ Հայր, զի կատարեցից զկամս Հաւր: Երրորդ. վասն սրբութեան հոգւոյս եւ չարչարանաց մարմնոյս սիրէ զիս Հայր: Չորրորդ. վասն հեթանոսաց ժողովելոյս ի մի հաւատ եւ ի մի հովիւ սիրէ զիս Հայր իմ:

ԹԷ զԻՆՆ Է մահն Քրիստոսի

Բան. «Զի ես դնեմ [զանձն իմ], զի միւսանգամ առից զնա» (Ժ. 17):

Մեկնութիւն. Չորս ինչ ցուցանէ. նախ՝ զաստուածային զաւրութիւն իւր, ըստ այնմ. «Ես սպանանեմ եւ ես կեցուցանեմ» (Բ. Ար. ԼԲ. 39): Երկրորդ. զկամաւոր չարչարանս եւ զյարութիւն: Երրորդ. զտկարութիւն հրէիցն յանդիմանէ: Չորրորդ. զանազանէ զմահն իւր յամենայն մարդկանէ:

Հարց. Որպէ՞ս որոշի մահն Քրիստոսի յամենայն մարդկանէ:

Պատասխան. Չորիւք. նախ՝ որպէս ասէ. «Դնեմ զանձն իմ», այսինքն՝ զՀոգիս զնեմ արտաքոյ մարմնոյս եւ առնում յարութեամբն: Իսկ մարդիկ բանիւ ոչ զՀոգիս հանել կարեն եւ ոչ արգելու ի յելանելն եւ ոչ միւսանգամ առնուլ, որպէս յայտ է ի մեկնիչդ: Եւ չգիտելն զայն ասէ, զի ոմանք ի խաւար ասեն եւ ոմանք ի լոյս, ոմանք ի տանջանս եւ ոմանք ի հանգստի: Եւ դարձեալ թէպէտ գիտեմք առ հասարակ, այլ յատկապէս ոչ գիտեմք զտեղիս հոգւոց:

Եւ չորս ինչ ճարտարապէս է Քրիստոս ի յարութիւն մեր. նախ՝ զապականեալ մարմինն անապական կազմէ: Երկրորդ. զզանազանեալ մարմինս անխառն յարուցանէ: Երրորդ. զհոգի եւ զմարմին ի մին կապէ: Չորրորդ. ամենայն ուստեք եւ զամենայն մարդիկ յարուցանէ: Եւ զայս առնէ ի քթիկ ական եւ ի սուղ վայրկեանի:

Երկրորդ. դարձեալ զանազանի մահն Քրիստոսի երիւք. նախ՝ ի ձայն բարձր աղաղակեաց (հմմտ. Մտ. ԻԷ. 50): Երկրորդ. զգլուխն խոնարհեցոյց (Ծովհ. ԻԹ. 30): Երրորդ. զաչսն եխից, զի ամենայն մարդոյ ի մեռանելն ձայնն նուազի, եւ գլուխն պնդի, եւ աչքն ի բաց մնայ:

Երրորդ. այլ է մահն Քրիստոսի սոյնպէս, զի մահն Ադամայ եղեւ ի ներգործելոյն, եւ մահ ամենայն մարդկան պարտաւորութիւն է եւ ակամայ, իսկ մահն Քրիստոսի կամաւ է, ո՛չ ի գործոյ եւ ո՛չ պարտք, զի ոչ ունի մեղս:

Չորրորդ. յայտ է ի սքանչելեացն, որ նախքան զխաչն, յորժամ ոչ կարէին ձեռն արկանել ի Նա եւ ի խաչին սքանչելիքն ամենայն:

Հարց. Վասն է՞ր կամաւ էր մահն Քրիստոսի:

Պատասխան. Վասն չորից, որպէս նախ ասացաւ յերկրորդ հատորն, համարն. նախ՝ զի ցուցցէ զինքն Տէր մահու եւ կենաց, եւ ոչ

ի ներքոյ մահու: Երկրորդ. զտկարութիւն հրէիցն, զի իւր կամաւն չարչարեցաւ: Երրորդ. զի կամաւն զկատարեալ սէրն ցուցանէ: Չորրորդ. զմեծամեծ հատուցմունքն, որով փրկեցան մարդիկ:

Բան. «Միւսանգամ առից զնա» (Ժ. 17):

Մեկնութիւն. Յուցանէ, զի Քրիստոս իւր յատուկ զաւրութեամբն յարեաւ ի մեռելոց, զի ինքն զինքն յարոյց, զի ինքն էր յարուցիչ եւ ինքն էր յարուցեալ, որպէս ի խաչին, նոյն ինքն մեռեալ էր եւ կենդանի, որպէս ինքն է Պատարագ եւ ինքն ընդունի, եւ զի Քրիստոս կամաւորապէս չարչարեցաւ, վասն այն ասէ.

Բան. «Ոչ որ հանէ զնա յինէն, այլ ես դնեմ զնա անձամբ իմով» (Ժ. 18):

Մեկնութիւն. Ոչ ոք հանէ, այսինքն՝ բռնութեամբ բաժանէ զՀոգիս իմ յինէն, եւ զայս ոչ է պարտ իմանալ, թէ Քրիստոս ոչ մեռաւ ի չարչարանացն, զի թէ կամեցեալ էր, միով բանիւ կարէր զչարչարողսն կորուսանել, այլ զայն պարտ է իմանալ, թէ Քրիստոս կամաւ եկն ի չարչարանս եւ ի չարչարանացն մեռաւ:

Եւ զի ցուցցէ, թէ Քրիստոս ոչ ի հարկէ եւ ոչ յանկարութենէ ետ զՀոգին, ասէ.

Բան. «Իշխանութիւն ունիմ դնել զնա եւ իշխանութիւն ունիմ [միւսանգամ] առնուլ զնա» (Ժ. 18):

Մեկնութիւն. Եւ այսու ոչ է պարտ իմանալ, թէ Հոգին Քրիստոսի բաժանեալ եղեւ ի Բանէն, զի Բանն Աստուած զմի անգամ առեալն զՀոգի եւ զմարմինն եւ միաւորեաց ընդ իւրում Աստուածութեան, այլ ոչ բաժանեցաւ ի նմանէ, վասն այն մարմինն Քրիստոսի եւ Հոգին բաժանեցան ի միմեանց ի մահն, այլ Աստուածութիւն անբաժանելի մնաց ի մարմնոյն, որ ի գերեզմանի եւ ի Հոգւոյն, որ ի դժոխս, այլ զայն պարտ է իմանալ, զի Հոգին եւ մարմինն բաժանեցան ի մահն եւ միաւորեցան յարութեամբն:

Եւ զայն ոչ արար անկարգ եւ անսահման, վասն որոյ ասէ.

Բան. «Զայս պապուէր առի ի հարկ իմմէ» (Ժ. 18):

Մեկնութիւն. Այսինքն՝ Հաւր հրամանաւ զանձն իմ դնեմ ի մահ, եւ ոչ պատահամբ, եւ ոչ ի հարկէ, այլ սահմանաւ եւ կամաւ

Հաւր, որպէս յայտ է ի մեկնիչդ: Ոմանք տարակուսին առ այս, եթէ՛ ոչ ոք եհան զՆա յինչն. նախ՝ զի հրէայքն խաչեցին եւ սպանին:

Դարձեալ՝ զի թէ կամաւ ետ զանձն, ահա ինքեան սպանող է եւ անձնամատն:

Պատասխան. Այս է առաջնոյն լուծումն, զի հրէայքն ոչ կարէին խաչել, որպէս յամենայն տեղիս, ուր ոչ կամէր, ելանէր ի ձեռաց նոցա, այլ Քրիստոս ազատ կամաւքն իւր խաչեցաւ եւ եհան զոգին: Իսկ երկրորդին, զի թէպէտ կամաւ ետ զանձն՝ ոչ որպէս այլք, որ վասն նախանձու, կամ այլ իրաց լիկելով ի դիւէ անձնամատն լինին, այլ Քրիստոս վասն փրկութեան մարդկան ետ զանձն:

ՄԱՏԹԷՈՍ ԶՈՒՂԱՅԵՅԻ

[Ամէն ամէն ասեմ ձեզ. որ ոչ մտնէ ընդ դուռն ի գաւիթ ոչխարացն, այլ ընդ այլ ելանէ, նա գող է եւ աւազակ] (Յովհ. Ժ. 1):

«Դուռն» զաւրէնքն ասէ: «Նովի»՝ զքահանայքն եւ զփարիսեցիքն: «Ոչխարք»՝ զժողովուրդն: «Գաւիթ»՝ զխորանն հին.

Ա. Առաջին՝ զի որպէս պատուական է ներսինն, քան զգաւիթն. այսպէս մերս եկեղեցի քան զխորանն իսրայէլացւոցն:

Բ. Երկրորդ՝ զի ամենայն ոք նախ զգաւիթն կոխէ եւ ապա ի ներս մտանէ. այսպէս առաջին էր այն, քան զմերս:

«Այլ ընդ այլ ելանէ»՝ քահանայքն եւ փարիսեցիքն, որ ոչ պահէին զաւրէնսն:

«Գող» զփարիսեցւոցն ասէ, զի կեղծաւորք էին:

«Աւազակ»՝ քահանայքն, որ յայտնապէս անցանէին:

[Իսկ որ մտնէ ընդ դուռն, հովի է ոչխարաց: Նմա դոնապանն րանայ, եւ ոչխարքն ձայնի նորա լսեն. եւ զիւր ոչխարսն կոչէ յանուանէ, եւ հանէ զնոսա] (Ժ. 2-4):

Իսկ որ «հովի է ոչխարաց»՝ Քրիստոս վասն իւր ասէ:

«Դոնապան» Մովսէս է, զի ի ձեռն նմա տուան Աւրէնքն: «Բանալն» այն է, որ յաղազս Քրիստոսի մարգարէացաւ. «Մարգարէ յարուցէ ձեզ» (Գործք Գ. 22), եւ թէ՛ «Տեսանիցէք զկեանս ձեր կախեալ զփայտէ» (հմմտ. Բ. Ար. ԻԱ. 23, Գաղ. Գ. 13-14), նաեւ՝ զաւրհնութիւնն Յակոբայ վասն Յուդայի, թէ՛ «Մի՛ պակասեցի իշխան ի քէն, մինչեւ ցնա, որ իւրն է հանդերձեալն» (հմմտ. Ծննդ. ԽԹ. 10):

Մովսէս գրեաց եւ զայս: Դարձեալ «դոնապան» զՅովհաննէս ասէ եւ «րանալ» վկայութեամբն, որ յաղազս Քրիստոսի:

«Ոչխարք ձայնի իմում լսեն» (հմմտ. Ժ. 3):

Որպէս առաքեալքն եւ հաւատացեալքն ի ժողովրդոց: Եւ կոչեաց զառաքեալսն յանուանէ, նաեւ այժմ զամենայն հաւատացեալս յաւազանէն: Առաջի նոցա զնաց վարուքն, քարոզութեամբն եւ չարչարանաւքն եւ եհան զնոսա յԱւետարանն: «Աւրար»՝ զթեւդաս կախարղն ասէ (տես Գործք Ե. 36), որ զողութեամբ պարտէր զժողովուրդն: Եւ զՅուդա Գալիլեացի (տես Գործք Ե. 37), որ յայտնի իրբեւ զաւազակ ասէր թագաւոր լինել զինքն Իսրայէլի:

«Ես եմ դուռն»՝ ոչ թէ այսմ գաւիթի, այլ արքայութեանն երկնից: Եւ նախ զգաւիթն ասաց «դուռն», յիրաւի, զի որպէս մարդիկ նախ ընդ դուռն գաւիթին մտանեն եւ ապա ի սրբութիւնն, այսպէս ամենայն ոք ընդ շաւիղս աւրինացն ընթանալով, առ Քրիստոս մերձեանայն:

«Ընդ իս եթէ որ մտնէ» (Ժ. 9):

Որ հաւատայ յիս, մտցէ յարքայութիւնն եւ մնասցէ կենդանի յաւիտեան: Դարձեալ՝ «մտնէ» առ իս եւ ելցէ առ Հայր.

«Եւ «ճարակ գտցէ» (Ժ. 9):

Այժմ զմարմին եւ զարիւն իմ տամ՝ նմա ի ճաշակումն եւ ի հանդերձեալսն, ի սեղանոյ Հաւր իմոյ յիմաստութեանց եւ ի տեսութեանց փառաց աստուածութեանս կերակրեցից զնայ: Առաւել եւս «կեանք» զյաւիտեանականն ասէ՝ ի վերայ այսմ կենացս (տես Յովհ. Ժ. 10):

«Ես եմ հովիւն քաջ» (Ժ. 11):

Իրբ թէ բարի: Մի երկմտեցես վասն այս նուաստ անուանս, զի ոչ միայն «հովիւ» ասէ, այլեւ բարի, որ Աստուծոյ է: Նաեւ մարգարէքն զՀայր կոչէին այսպէս. «Որ հովուեսդ Իսրայէլի, նայեա՛ եւ փրկեա՛ զմեզ» (հմմտ. Մաղմ. ՆԹ. 2): Զի որպէս Քրիստոս զինքն լոյս անուանէր (տես Յովհ. Ա. 5), վասն խաւարելոցն եւ կեանք մահացելոցն եւ բժիշկ հիւանդացն (տես Մաթթ. Թ. 12, Մարկ. Բ. 17, Դուկ. Ե. 31), այսպէս եւ ժողովող, այսինքն՝ «հովիւ» ասաց վասն ցրուելոցն: Եւ է յատկութիւն հովուին.

Ա. Առաջին՝ զի ի դուռն մտանէ ի փարախն:

- Բ. Երկրորդ՝ զի գոնապանն բանայ:
- Գ. Երրորդ՝ զի ոչխարքն ձայնի նորա լսեն:
- Դ. Չորրորդ՝ զի զիւրան կոչէ յանուանէ:
- Ե. Հինգերորդ՝ զի հանէ զիւրան զամենայն:
- Զ. Վեցերորդ՝ զի առաջի նոցա երթա:

«Տոբիլի քաջ զանձն [իւր] դնէ» (Ժ. 11):

Այսինքն՝ ի մահ տամ զիս, եւ ասէ զայս, զի ոչ էր նա ընդ հարկի մահուան, վասն զի ոչ արար մեղս, եւ մահ մեղաց էր պատիժ, այլ վասն մերոյ փրկութեան:

Իսկ «վարձկանն» զմարգարէսն ասէ, զարդարան, որք փոխարէն աշխատութեանցն զերանութիւնն ընկալան: Իսկ «փախսիլ» ասէ նոցա, զի տեսանելով զգայլն սատանայ, յափշտակելով զմարգարէսին ընտրիւնս յԱստուծոյ, չար գործով իւրով, զանձինս իւրեանց կեցուցանէին ի յարկածից թշնամոյն: Եւ թէպէտ եւ ի մահ տային զինքեանս, որպէս Եսայի սղոցեցաւ, եթէ մի այլ ջարկոծեցաւ (Կրն Երբ. ԺԱ. 37), եւ ոչ կարկամէին ազատել զընտրիւնս:

- Երեք են գայլք եկեղեցոյ:
- Ա. Առաջին՝ սատանայ:
- Բ. Երկրորդ՝ հերձուածողք:
- Գ. Երրորդ՝ չար թագաւորքն՝ հալածողք քրիստոնէից:

«Ճանաչիմ յիմոցն» (Ժ. 14) հաւատովք եւ գործովք արդարութեան եւ սիրելովն զիս:

«Եւ ճանաչեմ զիմսն» (Ժ. 14)՝ փրկելով զնոսա եւ ընդ իս յաւիտեանս թագաւորեցուցանելովն:

«Որպէս գիտէ զիս հայր, գիտեմ [եւ ես զհայրն]» (Ժ. 15): Ցուցանէ ընդ Հաւր հաւասար ունելով զգիտութիւնն:

«Նաեւ այլ եւս ոչխարք [են իմ]» (Ժ. 16). զհեթանոսաց ժողովուրդն ասէ:

«Վասն այնորիկ սիրէ զիս հայր [իմ]» (Ժ. 17):

Ոսկեբերան զառաւել սէրն ցուցանէ զՀաւր առ մարդիկ: Դարձեալ՝ վասն այնորիկ, զի մի եւ զնոյն կամիմ, որպէս Հայր, զի որպէս նայ կամի, եւ ես կատարեմ զփրկութիւն մարդկան:

«Ոչ որ հանէ զնոսա յինէն» (հմմտ. Ժ. 18):

Տարակոյս է այս, զի հրէայքն խաչեցին եւ սպանին, եւ դարձեալ տարակոյս է, զի թէ կամաւ ետ զանձն, ահա անձնամատն եղել: Այս է առաջնոյն լուծ, զի թէ բռնութեամբ հրէայքն ոչ կարէին խաչել, որպէս յամենայն տեղիս, ուր ոչ կամէր, ելանէր ի ձեռաց նոցա, իսկ երկրորդին, զի թէ պատգամաւ ետ, որ որպէս այլք, որ վասն նախանձու եւ այլ ինչ իրաց՝ լիկելով ի դիւէ անձնամատն լինին, այլ Քրիստոս վասն մարդկան փրկութեան ետ զանձն:

«Իշխանութիւն [ուրիմ] դնել զանձն եւ իշխանութիւն» (հմմտ. Ժ. 18):

Որպէս ասէ մարգարէն. «Ես սպանանեմ, եւ ես կեցուցանեմ» (Բ. Ար. ԼԲ. 39), որպէս զի յայտ լիցի, թէ Աստուած է:



ՎԱՍՆ ՈՐԹՒՈՅՆ ԵՒ ՃԻՒՂԻՆ

Յովհ. ԺԵ. 1-11

ՍԱՐԳԻՍ ԿՈՒՆԴ

«Ես եմ որթն ճշմարիտ» (Յովհ. ԺԵ. 1):

ՈՍԿ Վասն այնորիկ խրատէ զնոսա, որով առաւելագոյն արժանասցին պտղոյն: Զի՞նչ կամի նշանակել ի ձեռն առակիս: Որպէս որթն բնութեամբ ունի զվեր առաքումն ուռ, այնպէս եւ տայ զպտուղն, որքան ընդ որթոյն կապեալ է եւ միաւորեալ. նոյնգունակ եւ դուք՝ հաւատովն եւ սիրովն, որ յիս: Բայց ինքն յիսրայէլի այգւոյն է որթն՝ հայրական Բանն Աստուծոյ, ոչ քան զերկրաւոր տեսակս, այլ զերկնայինն եւ զիմանալին առնլով, որ զլսողսն քաջ ի ճշմարտութիւնն ածէր, որք Հոգւովն Աստուծոյ նորոգեալ են զիտութեամբ:

«Ես եմ որթն» (ԺԵ. 1)

Որոյ պտուղն է անճառ զիտութիւն եւ իմաստութիւն եւ փառք:

«Եւ հայր իմ մշակ է» (ԺԵ. 1):

Որով ամենայն գործք յարինին, եւ արարածք լուսաւորին եւ ընդ հովանեաւ նորա խնամին՝ զվերագոյն կամս անճառ ծնաւդին Հաւր ճառելով, եւ անմահական է նոր տունկն որթոյն հայրենի ձեռաւքն մշակի՝ ըստ անախտ մարմնոյն եւ ձեռն է բանն՝ ըստ այնմ. «Եղիցի ձեռն քո ի վերայ առն» (Սաղմ. ԿՁ. 18), որպէս ներգործող կամքն, որ առ Ադամն ստոր անկեալ, եւ աջ քո ի վերայ որդւոյ մարդկան: Աջոյն զաւրութեամբ զաւրացուցանէր զստեղծուածս իւր առ հաւատսն: Նա՛ է մշակն, որ խնամէ իւրոց ծառայիցն, զիտողն զաղտնեաց մարդկան եւ հատուցանողն ըստ գործոցն, ոչ ազգման կարաւորի Որդին Աստուծոյ, զի ոչ արմատն վայելէ ի խնամոցն Աստուծոյ մշակին, այլ ուռն, զի ուսցին, թէ առանց նորա զաւրութեան ո՛չ ինչ գործի:

«Ամենայն ուռ, որ յիս է» (ԺԵ. 2):

Այն է, զոր ձգեաց զորթ իւր Բանն Աստուած, մինչեւ ի ծով եւ ի գետս՝ զիտութիւն խորոցն Աստուծոյ, հասին առաքելոցն գունդն, շառաւելքն պտղաբերք, զաւրութեամբն Աստուծոյ հաստատելով զոսաս՝ նոցա առ գեղեցիկ արմատն խորոցն Աստուծոյ եւ լնուն բուռնք զաւրաւորք, որպէս մշտնջենաւորք լերինք՝ ծածկեալք ի հովանւոյ ճառագայթիցն Աստուծոյ, եւ բարեզարդ բարունակք:

Եւ որ ոչ բերէ պտուղ, կտրէ զնա (ԺԵ. 2):

Որպէս զանպտուղ ուռն իսրայէլի, որ էին գաւսք եւ անպիտանք փշաբերք, զոր անեծ Տէրն զչար մշակսն ըստ աւրինակի թղենւոյն անպտուղ (սրեն Դուկ. ԺԳ. 6-9), որ աւրինաւքն էին տերեւալիցք եւ դառինք, եւ չորք, եւ սրով հոգւոյն հատեալք, զոր կտրեաց Բանն՝ ի բաց գնելով, եւ եղ զնոսա առակս եւ յողբ ի դէպ:

«Եւ ամենայն, որ բերէ պտուղ» (ԺԵ. 2):

Երկոտասանքն, որք նախ բոյսք եւ փափուկք էին եւ զրգանս գորովաւքն Քրիստոսի, կրկնատարածք եւ իմաստունք, որպէս գնդակ Հոգւովն շուրջ կալով, եւ ի ծաղիկ ունէին՝ զաւրինակ պտղոյն, որ է սերտ սէրն Աստուծոյ:

«Սրբէ զնա» (ԺԵ. 2):

Այսու յորդորէ զնոսա ի հաւատս եւ քաջալերս տայ, որպէս ընտիր սիրելեաց, զամենեցուն միտս նորաւք ընդունակ առնել Աստուծոյ, որ հոգւովն բուսան գեղեցիկ ուռք, որ ի քաղցր որթոյն Քրիստոսի, որպէս սասց.

«Դուք սուրբ էք վասն Բանին, զոր խաւսեցա ընդ ձեզ» (ԺԵ. 3):

Զի առաւել պտղաբերք լիցիք՝ ճանաչել մեզ զառաւելութիւն սիրոյն Քրիստոսի, թէ պտուղ հոգւոյն այս է. սէր, որ է արմատ կենդանի որթւոյն, եւ խնդութիւն, որ է իմանալի ուռ՝ կենդանագրեալք ի Հոգւոյն Աստուծոյ, խաղաղութիւն, որ է գնդակին շաղկապ՝ խաղաղութեամբ սպասել Բանին Աստուծոյ՝ զիտողին խորհրդոց նոցա:

«Որ բերէ պտուղ, սրբէ [զնա]» (ԺԵ. 2):

¹ լս.՝ զոսաս

ՈՍԿ Այսինքն՝ բազում հոգամտութեամբ տա պտղաբեր առնել. նաեւ արմատս պէտս ունի առ մաւտ յուռն փորել շուրջ, բայց աստ ոչ ինչ ասէ վասն արմատոյն, այլ զամենայն վասն ուռոցն ցուցանելով խնամս, թէ նա ի՛նքն է մշակն, իսկ աշակերտքն բազում աւգնութեան կարաւտին, որ ի մշակէն, իսկ որ անպտուղն է եւ ոչ յայգւոջ կարէ լինել:

«Իսկ որ բերէ պտուղ, սրբէ զնա» (ԺԵ. 2):

ՍՏ Զի փորձութիւնքն առաւել եւս յորդորեն ի քաջապտղութիւն:

«Գուք արդէն իսկ սուրբ էք վասն բանին, զոր խաւսեցայ ընդ ձեզ» (ԺԵ. 3):

ՈՍԿ Այսինքն՝ ընդունելով զհաւատոց բան, զոր վարդապետեցի ձեզ, ցուցանէ զինքն խնամակալ ուռոյն, քանզի եւ սրբեաց, եւ ասէ.

«Եւ որպէս ուռն ոչ կարէ բերել պտուղ յանձնէ, որ ոչ է հասարարեալ յորթն, այնպէս եւ որ ոչ է հասարարեալ յիս» (հմմտ. ԺԵ. 4):

Զի մի ի վատութիւն անկեալ թուլացին, պնդէ զանձն նոցա եւ զուզէ ընդ ինքեան, իսկ ի բաց հատեալքն յինէն անպիտան լինին, որպէս հատեալ ուռ: Իսկ ազգակցութիւն, որ ի մարմնոյն որ ի կուսէն առ, ոսկերք եւ մարմինք եմք, զի նա՛ է մշակն, որ խնամէ զծառայս իւր, զիտողն գաղտնեաց մարդկան եւ հատուցանողն ըստ գործոց: Որպէս ուռն ոչ հաստատեալ յորթն անպտուղ է, այսպէս եւ դուք ոչ առանց աւգնականութեան կարէք համբերել չարչարանաց եւ մահու, եւ հալածանաց, եւ պտղաբերել զառաքինութիւն.

«Եւ ոչինչ կարէք առանց իմ առնել» (հմմտ. ԺԵ. 5) ի լաւագունիցն, իսկ ըստ թանձրամտացն որ իմանի, ոչինչ կարել առնել: Ընդէ՞ր ապա այնքան յորդորէր եւ քրքրէր զմիտս նոցա առ լաւագոյնսն, զի՞նչ տացուք նման զՀաւարէ զննել. զի Որդի լոյս է եւ ի լուսոյն Հաւր, զի առանց նորա ոչ գոյ հնար արարածոց տեսանել զՀայր առանց Որդւոյ չհաւատալոյ, որպէս ուռն, որ ոչ է հաստատեալ յորթն (տեսն Յովհ. ԺԵ. 6):

ՍՏ Երեւելի առակաւքս զիմանալի բարձրութիւն ցուցանէ բանիւ Բանն Աստուած, որպէս ասէ Պաւղոս, թէ՛ «Աներեւոյթ զաւրու-

թիւն եւ իմաստութիւն Աստուծոյ ի սկզբանէ աշխարհի արարածովքս իմացեալ լինի» (հմմտ. Նոռմ. Ա. 20)՝ ըստ որթոյն եւ ուռոյն եւ պտղոյն, որ «մշտնջենաւորութիւն աստուածութեան նորա» (հմմտ. Նոռմ. Ա. 20), որ ըստ առման մարմնոյն ժողովեաց զաշակերտսն բանիւն, որպէս ուռ կապելով զնոսա սիրով հոգւոյն:

«Եթէ որ ոչ է հասարարեալ յիս, էլ նա արարաքս [իրբեւ զուռն] եւ ցամաքեցաւ» (ԺԵ. 6):

Որպէս ուռն անհաստատ եւ չորին՝ ըստ անպիտան մատնչին Յուզայի՝ արտաքսեալ եւ անպտուղ, եւ կամակոր, եւ խաւարին տանջեալ խեղդմամբ հատմամբ ի Տեառնէ:

«Որ հասարարեալ է յիս, եւ ես՝ ի նա» (ԺԵ. 5):

ՈՍԿ Որդի՛ Հաւր կատարելակից եւ ոչ նուազ գոյ յաշակերտացն խնամարարութիւն հաստատելով զնոսա ի սրբոյ հաւատոյ եւ սիրոյ:

«Ել արարաքս» (հմմտ. ԺԵ. 6):

Ի մշակական ձեռանէ ցամաքեցաւ, ի շնորհացն Աստուծոյ, զոր ունէր, մերկացաւ եւ անապատացեալ յաւգնականութենէ եւ «ի հուր արկանի» (Հմմտ. ԺԵ. 6): Կամ զհրէիցն զնեղութիւնն գուշակեաց, որ լինելոց էր ի Տիտոսէ եւ յայլոցն:

«Ես եմ որթ» (ԺԵ. 5):

ՍՏ Որ գեղեցիկ է տունկս քան զտեսակ տնկոց փայտից մրգապահաց, արդ որ ի սերովբէիցն պահի ծառն կենաց յԵղեմ կամ յերկինս չըջափակեալ յանմահութիւն, Քրիստոս ըստ ողորմութեան խնամոցն լինի մարդ եւ նմանի մարդկան, զի նմանեաւն զնմանն մաքրեսցէ՛ ըստ այգւոյն անմահութեան դրախտին՝ անապական մարմնովն հրաշագործելով մարդ. եւ որթ երկնային, որպէս յանկեան տեղւոջ տաճար շինեաց ամբիժ եւ զբնութիւն մարդկան ձողաբարձ զարդարեաց հրեշտակաց սպասաւորութեամբ:

«Եւ դուք՝ ուռ» (ԺԵ. 5):

Աստուածային փառաւք հիմունս եղ զառաքեալսն մինչեւ ի ծով եւ մինչեւ ի գետս Աւետարանին քարոզն, ի չորս կողմ երկրի եւ հոգւոյն շառաւեղաւքն վարսաւորեալ:

«Որ յիս հասարակալ է» (ԺԵ. 6):

Որ ի նոյն փառս հաստատեաց զմարդն, որ հաստատեալ է յիս հոգևով եւ ոչ գրովն, որ սպանանէ (Կրն՝ Բ. Կոր. Գ. 6), զոչ հաստատեալսն ի սէրն Աստուծոյ. եւ հոգին կեցուցանէ զընդունողս Բանին: Որ հաստատեալ է յիս սիրովն, եւ ես ի նա՝ կամաւք եւ զաւրութեամբ, նա բերէ պտուղ՝ աստուածպաշտութիւն գործովք կատարեալ՝ ըստ այնմ, թէ՛ «Աստուծով արասցուք զաւրութիւն» (Մաղմ. ՃԷ. 14), եւ Պաւղոս ասէ. «Զամենայն յանուն Յիսուսի Քրիստոսի արասցուք» (հմմտ. Կորոս. Գ. 17), եւ թէ՛ «Որոց սիրենն զԱստուած, գործակից լինի յամենայն ի բարիս» (հմմտ. Ղոսմ. Ը. 28):

«Թէ որ ոչ է հասարակալ յիս» (ԺԵ. 6):

Որ ըստ պատուիրանին Աստուծոյ՝ սրբութեամբ եւ անեղծութեամբ, որպէս զՊետրոս եւ զՅովհաննէս հաստատուն սիւնքն եւ զայլ աշակերտսն՝ անբիծ:

«Ել նա արքարս» (ԺԵ. 6). որպէս զողորմելի ուռն զՅուդաս կամ զբոլոր ազգն հրէից:

«Եւ ցամաքեցաւ» (ԺԵ. 6) ի սիրոյն Քրիստոսի, որպէս եւ ամենայն մեղաւորք եւ չարքն աշխարհի:

«Եւ ժողովեն զնա եւ ի հուր արկանեն, եւ այրի» (ԺԵ. 6):

Հրեշտակք՝ սպասաւորք Աստուծոյ, որ ի գերեզմանաց ձայնիւ փողոյն ի կատարածի աւուրն, որպէս եւ ինքն յորոմանց ագարակին առակի ասաց (Կրն՝ Մարթ. ԺԳ. 24-30), թէ՛ առաքեսցէ զհնձողսն, որ են ժողովիչք, ժողովեն զչարին ուռսն, որ ի դառն տապոյ մեղացն չարացան, եւ արկցէ զնոսա ի հնոց հրոյն. «Անդ եղիցի լալ եւ կրճել ատամանց» (Մարթ. Ը. 12), եւ ոչ ուստեք աւգնականութիւն:

«Թէ կայցէք յիս» (ԺԵ. 7):

ՈՍԿ Եւ որ զբարեմիտ աշակերտսն խրատէ Տէրն եւ նոքաւք՝ զամենայն տիեզերս. ցուցանէ, թէ խորամանկք բազումք փոխադրեն զչարութիւնն յայլս եւ ցուցանէ, թէ սուրբքն անպարտելիք եղիցին:

«Եւ րանք իմ ի ձեզ» (ԺԵ. 7):

ՍՏ Կենդանականն, զոր ասաց Պետրոս, բանս կենաց ունիս եւ սուրբ, զոր հրաշարանս ասէ Յովհաննէս, եւ որք ընկալաք զբան նորա, հաստատեցաք ի սէր նորա, եւ ի հոգւոյն իւր ետ մեզ:

«Զոր, զինչ կամիցիք եւ խնդրեսցիք» (ԺԵ. 7):

Զի խնդրելոյն աւրինակ է զերկնայինսն եւ զանճառսն եւ զոչ զերեւելիս, որպէս ասաց Քրիստոս. «Խնդրեցէք զարքայութիւն նորա» (հմմտ. Ղուկ. ԺԲ. 31) եւ զարդարութիւնն եւ զհաճոյսն, եւ որ ինչ աստ է, տացի ձեզ ի կամողի ձեզ: Եւ Պաւղոս ասէ. «Ոչ խնդրեմք զառժամանակեայքս, այլ զաներեւոյթքն եւ զյաւիտենականն» (հմմտ Բ. Կոր. Դ. 18), որում ուշ եղեալ ընթանամ ի կես կոչմանն Քրիստոսի, որ ասաց. «Ան, արիք գնացուք աստի» (Յովհ. ԺԴ. 31):

«Յայսմիկ փառաւորեցաւ Հայր իմ» (ԺԵ. 8):

ՈՍԿ Զի դուք աշակերտէք զտիեզերս, բայց որ զպտուղն բերէ, նա է իմ աշակերտ, յորս փառաւորի Հայր, յորժամ յիս հաւատասցէ երկիր՝ մտեալ ընդ աւրինաւք, եւ ազգակից իւր արար եւ փառաւորս շնորհաւք աստուածային զորս սիրեաց, եւ խաղաղութիւն զինքն ի նոսա եւ փառաւորեալ ի նոսա ասաց զՀայրն բոլորից, ուստի Բանն ճշմարիտ բղխեաց, զոր եզ ի նոսա իմանալի որթովն եւ կալ հաստատուն:

«Զի պտուղ յոյժ բերիցէք եւ եղիցիք աշակերտք» (ԺԵ. 8):

Իմանալին Հաւր մշակողին ընծայեալք աստի, այս իմանալի պտղոցն բերք բանական տնկոցն իւր պտուղ է: Եւ Հաւր փառք եւ ընդունակ, որ ի խաչին ողկոյզն ճմլեցաւ եւ սրբոց միտքն լցան անապական բաժակաւն՝ ըստ Պաւղոսի. «Հողագործին պարտ է նախ ի պտղոյն վայելել» (հմմտ. Բ Տիմ. Բ. 6) ի խաչին չարչարանացն, որ ի փառս աշխարհի իրքն եղեւ, եւ առաքելոցն աւանդէ կրել զչարչարանս մահու:

«Որպէս սիրեաց զիս Հայր» (ԺԵ. 9):

ՈՍԿ Յայսմ տեղւոջ մարդկաւրէն բարբառի, որ մեռանիլ յանձն էառ եւ զթշնամիսն այնքան պատուոյ արժանի արար եւ յերկինս եհան:

«Սիրեաց զիս Հայր». որ յառաջ էր սէրն, քան զլինելն աշխարհի, որ ասաց. «Դայ է Որդի իմ սիրելի» (Բ. Պետր. Ա. 17):

«Եւ ես սիրեցի զձեզ» (ԺԵ. 9). *ի լրման ժամանակիս ժողովել զնոսա:*

«Նաստարուն կացէք ի սէր իմ» (ԺԵ. 9):

Եւ որք լուանն, սիրեցին զՈրդին եւ սիրեցան ի նմանէ եւ առին պատուէր վասն զիմանալիսն ճառեալս իմանալ զԱստուծոյ՝ ըստ այնմ. «Որ սիրեն, նա տեղեկանայ ամենայն սքանչելեացն Աստուծոյ, թէ կատարեալ սէրն մերժէ զմարդկան երկիւղ» (հմմտ. Ա Յովհ. Գ. 17-18), եւ որ զպատուիրանն պահէ, աւրէնքն լնուն եւ մարգարէքն:

«Թէ պահիցէք զպարուրանն եւ կայցէք ի սէրն իմ» (ԺԵ. 10)

Որ ասաց. «Պատուիրանն, որ տամ ձեզ, զի սիրես՞իք զմիմեանս» (հմմտ. Բ. Պետ. Գ. 11): Եւ այս առնէ ծանալթ աշխարհի. զաշակերտութեանդ ձեր ինձ, որ սիրեցի զձեզ եւ մարդ եղէ եւ աւրինակ սիրոյ, զիմ ճշմարիտ սէրն ետու. թէ ո՛ր է առաւելութիւն պտղոյն եւ անշարժ կալ յարմատն Աստուծոյ:

«Որպէս ես զպարուիրանս Նար պահեցի» (ԺԵ. 9):

ՈՍԿ Առ նոցա կարծիսն ասէ, զի մի ասիցեն, թէ ելաք ի Հայրենեացն եւ թողեալ եղեաք, յիս, ասէ, Հայեցարուք, որ սիրեցեալս եմ ի Հաւրէ, բայց կրեմ զչարչարանս խաչին, ապա որչա՞փ ձեզ չէ՛ պարտ խոովել: Եւ որպէս ես ի սկզբանէ իսկակից էութենէ նորա, որպէս սիրելի Որդի եւ Միածին, եւ ճառագայթ փառաց Հաւր, եւ գոյակից, եւ փառակից անբաժանելի հրաշիւք եւ կամ ի սէր նորա:

ՍՏ Եւ ոչ ձեզ տացի դժնդակս այս չարչարանս՝ նայել ի սիրոյն բանն, զի մեծ է եւ անպատմելի, ցուցցո՞ւք զաւրինակն ի ձեռնգործոցն, զի մեք թշնամիք գոլով՝ հաշտեցոյց, իսկ սիրելիք եղեալ՝ հաստատուն կացցուք. նա ոչ վասն ընտանի շնորհին սիրէ, զի անկարաւտ է, ուստի գերակայ արմատն կայ ի խորունջն, ունի յինքեան զանճառ լոյսն, որով սիրեալ ասէ եւ ոչ քննեալ: Պաւղոս ասէ. «Սիրով արմատացեալք ի նա եւ հաստատեալք» (հմմտ. Եփես. Գ. 17): Եւ սէրն Քրիստոսի ստիպէ զմեզ քննել, զոր ինչ սիրոյն Աստուծոյ է լրումն եւ հաւատոցն կատարումն:

«Ջայս խաւսեցայ ընդ ձեզ» (ԺԵ. 11):

ՈՍԿ Այս տրամութիւնս, որ կայ ի ձեզ, ցուցանէ, թէ ոչ են տրամութեան արժանի մերձակայքս. լուայք վասն նեղութեան, որ

բերէ պարգեւս երկնայինս: Յայտնէ այս, թէ՛ վասն իմանալի որթոյն խաւսեցաւ բանս.

«Ձի ուրախութիւն իմ ձեզ իցէ» (ԺԵ. 11):

ՍՏ Յայտ է, թէ գովութիւն որթոյն, որ պտղոյն է վայելումն զինւոյն, որ նախ զայգեգործն ուրախ առնէ եւ ապա՝ այլոցն տայ: Եւ այգեգործ այնպիսի որթոյն Հայր է, եւ ուրախ է Հայր ի գործս Որդւոյ, վասն արարածոց փրկութեան, զի եկն տնկեցաւ Յենգադեայ այնպիսի որթն եւ ուրախ է ի գործս իւր եւ ի կամս Հաւր:

ՈՍԿ «Ուրախութիւն իմ ի ձեզ». լնուլ զկամս առաքողին Հաւր, որ բոլոր կեանս տայ աշխարհի, որպէս Տէր եւ կեցուցիչ եւ լոյս աշխարհի: Այս բարի յայնժամ ունի զվարձս, յորժամ ի կատարումն եկեացէ, զոր աւրինակ՝ նաւ ծանրաբեռն, թէ ոչ ի նաւահանգիստն հասանէ, ի մէջ ծովուն ծփի, այսպէս ի վախճան հասանել վաստակոց անձինք Պաւղոս ասէ. «Փառք եւ պատիւ եւ խաղաղութիւն համբերողացն» (հմմտ. Նոմ. Բ. 10), զի հատանել ընթացիցն ուրախ լինին վաստակողքն, եւ ձեր ուրախութիւնն լցեալ եղիցի, նոցա ուրախութիւնն ոչ այլ ինչ է, թէ ոչ Քրիստոս, որ ասաց ընդ նոսա լինել եւ զանապական բաժակն էր տալոց մխիթարիչ Հոգին ի վերուստ, որ ուրախ առնէ այն զինին զսիրտս իմաստնոց:

ԳՐԻԳՈՐ ՏԱԹԵԻԱՅԻ

«Ես եմ որթն ճշմարիտ» (Յովհ. ԺԵ. 1):

Յորժամ որթ լսես, երիս իրս յայտնէ. նախ՝ զուռն, երկրորդ՝ զպտուղն տերեւովն եւ երրորդ՝ զմշակն:

Իսկ թէ ընդէ՞ր որթ անուանէ զինքն, այս է, զի որթոյն չորս յատկութիւն կայ. նախ՝ զի կենդանական ունի զաւրութիւն, երկրորդ՝ զի աճողութիւն ունի, երրորդ՝ զի պտուղ բերէ, չորրորդ՝ զի տերեւ բերէ, որով ի տաւթոյ զպտուղն պահէ եւ ի ցրտոյ: Այսպէս եւ Քրիստոս կենդանութիւն է ամենայն կենդանեաց:

Երկրորդ. զի յորժամ սոքա ի Քրիստոս միանան սիրով եւ հաւատով, բազումս կարող են դարձուցանել յաստուածպաշտութիւն եւ զփոքր հաւտն Քրիստոսի աճեցուցանեն: Երրորդ. զի բարեպաշտութեան պտուղն ի Քրիստոս միանալով ի հանդերձեալ կեանս պտղաբերեն: Չորրորդ. զի խնամքն Աստուծոյ ի վերայ հաւատա-

ցելոց իբրեւ գտերեւս ի վերայ պտղոց հանապազ հովանի է, զի յամենայն վնասակար աւդոց չարութեանց պահէ զնոսա:

«Եւ Նայր իմ մշակ է» (ԺԵ. 1):

Մշակ ասի Հայր եւ բոլոր Երրորդութիւն, զի լրումն շնորհաց եւ ճշմարտութեան եհեղ եւ տնկեաց ի մարդկութիւն Քրիստոսի, բայց զիտելի է, զի մշակն ոչ աշխատի եւ յաւտէ զարմատն, այլ զուռն, նոյնպէս եւ Հայր ոչ աշխատի եւ հոգայ վասն արմատոյն, որ է Քրիստոս, այլ զուռն կամի սրբել եւ խնամել, որ են Հաւատացեալք:

«Ամենայն ուռ, որ յիս է եւ ոչ լրերէ պտուղ» (ԺԵ. 2):

Չորս ազգ մխիթարութիւն զնէ աստանաւր յառաջիկայդ առաքելոցն. նախ՝ թէ յիս հաստատուն լինիք հաւատով, նա պտուղ յոյժ բերելոց էք: Երկրորդ. զի զերկիւղն եւ զխորշումն պահապան զնէ նոցա, այսինքն՝ թէ ոք հատանի յինէն որպէս ուռ յորթոյ, այնուհետեւ պտղաբերել, այլ հրոյ ճարակ լինի, զգուշացուցանէ զնոսա այսու երկիւղիւս, զի յորժամ նեղութիւն գայցէ, մի՛ վաղվաղակի գայթակղիցին: Երրորդ. զի զոր ինչ խնդրէք յանուն իմ, առնուք (ԿԵՆ 30վի. ԺԶ. 23): Չորրորդ. զի Հայր իմ փառաւորի ի ձեզ պտղաբերելն:

ՄԱՍԹԷՈՍ ԶՈՒՂԱՅԵՅԻ

«Ես եմ որթն ճշմարիտ» (Յովհ. ԺԵ. 1):

«Ճշմարիտ» ասէ առ ի զանազանել զինքն ի վայրենի որթոյ, որ ոչ տայ պտուղ: Իսկ «որթ» ասի Քրիստոս, վասն Ե. (5) պատճառի.

Ա. Առաջին՝ զի որպէս զգալի որթս ունի անարգ փայտս եւ անաւգուտ երեւի, թէպէտ կարի բարի ունի զպտուղն, նոյնպէս Քրիստոս մարդկայինս բնութեամբ անարգ եւ արհամարհելի երեւէր, սակայն ի ձեռն խոնարհութեան նորա եղեւ պտուղ փառաւոր եւ պատուական:

Բ. Երկրորդ՝ ասի Քրիստոս «որթ», զի որպէս ուռ, շողկապեալ ընդ որթոյ ի նմանէ ունի ազգումն կենդանութեան եւ հաստատութեան, նոյնպէս Հաւատացեալքն ի Քրիստոսէ:

Գ. Երրորդ՝ զի որթն պտուղ բերէ, այսինքն՝ ողկոյզ, որ բազում պտուղ ի նմին կան յեռեալ, այսպէս գործ մի գործեաց Տէր մեր, այսինքն՝ աւերեաց զդժոխքն, ուստի բազում հոգիքն, որպէս մի ողկոյզ պտուղ պատրաստեցաւ Հաւր Աստուծոյ:

Դ. Չորրորդ՝ զի զանազան որակաւք բերէ պտուղ որթն, այսպէս հաւատացեալք Քրիստոսի զանազան առաքինութեամբ որդիք նորա կոչին:

Ե. Հինգերորդ՝ զի նախ ուռ բերէ որթն եւ ապա՝ պտուղ, այսպէս եւ Տէր մեր նախ ծնանի զմեզ աւագանաւն եւ ապա՝ արժանի է պտուղն:

«Եւ Նայր իմ մշակ է» (ԺԵ. 1):

«Մշակ» ասի «Նայր» եւ բոլոր Երրորդութիւնն, զի լրումն շնորհաց եւ ճշմարտութեան եհեղ եւ տնկեաց ի մարդկութիւնն Քրիստոսի, բայց զիտելի է, զի մշակն ոչ աշխատի եւ յատէ զարմատն, այլ զուռն, նոյնպէս Հայր ոչ աշխատի եւ հոգայ վասն արմատոյն, որ է Քրիստոս, այլ զուռն կամի սրբել եւ խնամել, որ են Հաւատացեալք:

Մեծ եւս քան զայս սէր ոչ ոք ունի, զի Դ. (4) են, զորս պիտոյ է սիրել, այսինքն՝ Աստուած, հոգիս մեր, ընկերն եւ մարմին: Եւ զի՞ սէրն կարգաւորէ. վասն որոյ Աստուած, որ մեծագոյն է, նախ զնա՛ սիրել արժան է եւ ապա զայսն վասն նորա: Իսկ վասն հոգւոյն պարտ է զընկերն եւ զմարմինն արհամարհել, եւ վասն փրկութեան ընկերին պարտ է զկենդանութիւն մարմնոյն զնել, եւ քանզի այս է մեծագոյն բարի[ք], զոր կարեմք վասն ընկերին առնել եւ զանձն զնել վասն եղբաւրն, է մեծ նշանակ եղբայրսիրութեան:



ԲՈՎԱՆԴԱԿՈՒԹԻՒՆ

Երկու խոսք 5

Վասն սերմանաց (Մատթ. ժԳ. 4-23, Ղուկ. Ը. 5-18) 17

Վասն որոմանց առակին (Մատթ. ժԳ. 24-30) 49

Մեկնութիւն առակին որոմանց (Մատթ. ժԳ. 36-43, 51-52)..... 57

Վասն հատոյ մանանխոյ (Մատթ. ժԳ. 31-32, Ղուկ. ժԳ. 18-19) 69

Առակ խնորոյն (Մատթ. ժԳ. 33, Ղուկ. ժԳ. 20-21) 74

Առակ գանձի (Մատթ. ժԳ. 44) 81

Վասն մարգարտի (Մատթ. ժԳ. 45-46) 85

Առակ ուռկանին (Մատթ. ժԳ. 47-50) 88

Առակ հարիւր ոչխարաց (Մատթ. ժԸ. 12-14)..... 93

Առակ երկուց պարտապանացն (Մատթ. ժԸ. 23-35)..... 97

Վասն այգւոյն եւ մշակաց (Մատթ. Ի. 1-16) 111

Վասն անիծեալ թգնւոյն (Մատթ. ԻԱ. 18-20)..... 127

Առակ երկուց որդւոցն (Մատթ. ԻԱ. 28-32)..... 130

Վասն այգւոյն (Մատթ. ԻԱ. 33-46, Մարկ. ժԲ. 1-11)..... 136

Վասն սեղանին հարսանեաց (Մատթ. ԻԲ. 1-14)..... 171

Վասն թգնւոյն (Մատթ. ԻԴ. 32-35, Մարկ. ժԳ. 28-31, Ղուկ. ժԳ. 29-33) 195

Տանուէր եւ տնտես (Մատթ. ԻԴ. 42-51, Մարկ. ժԳ. 33-37) 204

Առակ տասն կուսանաց (Մատթ. ԻԵ. 1-13) 229

Առակ քանքարաց (Մատթ. ԻԵ. 14-30, Ղուկ. Ի. 9-18) 251

Բարի սամարացի (Ղուկ. ժ. 29-37) 268

Առակ անմիտ մեծատանն (Ղուկ. ժԲ. 16-21) 285

Առակ անպտուղ թգնւոյն (Ղուկ. ժԳ. 6-9) 299

Յաղագս կորուսեալ ոչխարին (Ղուկ. ժԵ. 3-7) 313

Վասն կորուսեալ դրամին (Ղուկ. ժԵ. 8-10)..... 319

Վասն անառակ որդւոյն (Ղուկ. ժԵ. 11-32)..... 331

Վասն անիրաւ տնտեսին (Ղուկ. ժԶ. 1-9)..... 392

Մեծահարուստ եւ աղքատ (Ղուկ. ժԶ. 19-31)..... 418

Ղատաւոր եւ այրի կին (Ղուկ. ժԸ. 1-8) 443

Փարիսեցի եւ մաքսաւոր (Ղուկ. ժԸ. 9-14)..... 460

Առակ տասն մնասաց (Ղուկ. ժԹ. 11-27)..... 475

Առակ ճրագի (Ղուկ. Ը. 16-18) 497

Վասն հրաւիրելոցն ի խնջոյս (Ղուկ. ժԴ. 8-11)..... 498

Ընտրութիւն հրաւիրելոցն (Ղուկ. ժԴ. 12-14)..... 502

Վասն մեծի խնջոյից (Ղուկ. ժԴ. 15-24) 503

Վասն չար մշակացն (Ղուկ. Ի. 9-19)..... 509

Աւրինակ ճշմարիտ հովուի (Յովհ. ժ. 1-18)..... 515

Վասն որթոյն եւ ճիւղին (Յովհ. ժԵ. 1-11)..... 540

ՏՅԸ ՄԵԿՆՈՂԱԿԱՆ ԳՐԱԿԱՆՈՒԹՅԱՆ ԸՐԵՍՏՈՄԱՏԻԱ

ԵԻԻ

ԵԻԲ

ՍՅԻ

ՅԵԻ

ՆԵԲ

ՅԵԻ

ՏՅԸ

ԸՍԸ

ՅՍԸ

ՋԻԸ

ՍԻԸ

ԱՎԵՏԱՐԱՆԱԿԱՆ ԱՌԱԿՆԵՐԻ ՄԵԿՆՈՒԹՅՈՒՆՆԵՐ

Կազմող՝ Լիլիթ Նովսելիյան
Խմբագիր՝ Գևորգ Տեր-Վարդանյան

Հրատարակչական Խորհրդի
նախագահ և բաժնի տնօրեն՝

Նաթան Արք. Հովհաննիսյան

Հրատարակչական Խորհրդի
անդամներ՝

Ա. Մադոյան, Պ. Հովհաննիսյան,
Գ. Տեր-Վարդանյան

Սրբագրիչ՝
Էջաղրուճը

Հ. Նիկողոսյան
Ղևոնդ քահանա Մայիլյանի

ՄԱՅՐ ԱԹՈՒ ՍՈՒՐԲ ԷԶՄԻԱԾՆԻ ՀՐԱՏԱՐԱԿՉՈՒԹՅՈՒՆ
Ս. ԷԶՄԻԱԾԻՆ - 2013

Թուղթ՝ օֆսետթ 70x100, 1/16
Ծավալ՝ 34.5 տպ. մամուլ, կազմը կոշտ,
Տպաքանակը՝ 300:

